


Widi'zh che'n
Jesukrist kwa'n kinu
yalnaban



New Testament in Zapotec, Coatecas Altas (MX:zca:Zapotec,
Coatecas Altas)

Widi'zh che'n Jesukrist kwa'n kinu yalnaban New Testament in Zapotec, Coatecas Altas (MX:zca:Zapotec, Coatecas Altas)

copyright © 2013 Wycliffe Bible Translators, Inc.

Language: Zapotec, Coatecas Altas

Translation by: Wycliffe Bible Translators, Inc.

Zapoteco, Coatecas Altas [zca], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Coatecas Altas

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
8463507e-7c54-5a9b-a15d-c9ae76b11b9e

Contents

San Mateo	1
San Marcos	36
San Lucas	57
San Juan	94
Hechos	121
Romanos	156
1 Corintios	171
2 Corintios	186
Gálatas	196
Efesios	202
Filipenses	208
Colosenses	212
1 Tesalonicenses	216
2 Tesalonicenses	219
1 Timoteo	221
2 Timoteo	226
Tito	229
Filemón	231
Hebreos	232
Santiago	244
1 San Per	248
2 San Per	253
1 San Juan	256
2 San Juan	260
3 San Juan	261
San Judas	262
Apocalipsis	264

Widi'zh nazhon che'n Jesukrist kwa'n mizobni' Mateo

*Ben che'n rē men re'nzē Jesukrist
(Lc. 3:23-38)*

¹ Kure' lē rē men xa' ngok ben che'n Jesukrist, Me nzē ben che'n rey Dabi, mbaino nu ben che'n Abraham.

² Xga'n Abraham ngok Isaac, lē' xga'n Isaac ngok Jakob, mbaino lē' xga'n Jakob ngok Judá kun rē wech Judá.

³ No lē' rē xga'n Judá ngok Fares mbaino Zara,

no xna' bixa' ngok Tamar.

No xga'n Fares ngok Esrom, mbaino lē' xga'n Esrom ngok Aram.

⁴ No lē' xga'n Aram ngok Aminadab, lē' xga'n Aminadab ngok Naasón, no lē' xga'n Naasón ngok Salmón.

⁵ Lē' xga'n Salmón ngok Booz, mbaino lē' xna' Booz ngok Rahab.

No lē' xga'n Booz ngok Obed, lē' xna' Obed ngok Rut.

No lē' xga'n Obed ngok Isai.

⁶ Mbaino lē' xga'n Isai ngok rey Dabi, no lē' xga'n rey Dabi ngok Salomón, no lē' xna' Salomón ngok tsa' Uriás.

⁷ No lē' xga'n Salomón ngok Roboam, lē' xga'n Roboam ngok Abías, mbaino lē' xga'n Abías ngok Asa.

⁸ No lē' xga'n Asa ngok Josafat, mbaino lē' xga'n Josafat ngok Joram, no lē' xga'n Joram ngok Uzias.

⁹ Lē' xga'n Uzias ngok Jotam, no lē' xga'n Jotam ngok Akaz, mbaino lē' xga'n Akaz ngok Hezekias.

¹⁰ Lē' xga'n Hezekias ngok Manasés, no lē' xga'n Manasés ngok Amón.

Lē' xga'n Amón ngok Josías.

¹¹ Lē' rē xga'n Josías ngok Jecunías kun rē wech Jecunías.

Le'n rē ngubizh ze' ñanu rey Babilonia rē men yezh Judá. Lazh men ze' ngok bixa' nela rē men nado ga', dox nguzakzi bixa'.

¹² Or mile' Dios nguro' bixa' lazh men Babilonia, ñé'd bixa' lazh bixa'.

Orze' lē' xga'n Jecunías ngok Salatiel, no lē' xga'n Salatiel ngok Zorobabel.

¹³ Lē' xga'n Zorobabel ngok Abihud, lē' xga'n Abihud ngok Eliakim, mbaino lē' xga'n Eliakim ngok Azor.

¹⁴ Lē' xga'n Azor ngok Sadok,

lē' xga'n Sadok ngok Akim, lē' xga'n Akim ngok Eliud.

¹⁵ Lē' xga'n Eliud ngok Eleazar, mbaino lē' xga'n Eleazar ngok Matán, lē' xga'n Matán ngok Jakob,

¹⁶ no lē' xga'n Jakob ngok Che, xa' ngok tsa' Mari,

no lē' Mari ngok xna' Jesús, Me lē' Krist.

¹⁷ Kuze', dizde zhē che'n Abraham haxta zhē che'n Dabi nded chida tiemp kwa'n niban tu men, orze' nguio xtu chida tiemp kwa'n niban tu men dizde zhē che'n Dabi haxta zhē kwa'n ñanu rey Babilonia rē men yezh Judea par lazh men Babilonia. No dizde zhē kwa'n nguro' bixa' lazh men Babilonia haxta zhē kwa'n ngol Krist, nded xtu chida tiemp kwa'n niban tu men.

Ngol Jesukrist

(Lc. 2:1-7)

¹⁸ Se' ngok or ngol Jesukrist: lē' Mari, xna' Jesukrist, nzo xti'zh kun Che; per nagat ban bixa' junt, lē' Mari mbi'y xin la por Sprit che'n Dios. ¹⁹ Lē' Che xa' ngok tsa' Mari, ter nak xa' tu miyi' xa' dox nile' kwa'n nzobni' lo ley kwa'n mila' Dios lo Muisés, per gat nzhaklat xa' xo'bdi'zh xa' kwan nak Mari, orze' mile' xa' xigab, xla'n la' xa' Mari. ²⁰ No dub kile' xa' xigab kure', lē'chi ngurulo tu ganj che'n Dios lo xa' le'n mika'l, nzhab ganj:

—Che, xga'n Dabi, nazhebtal banal kun Mari par gak tsa'l; lē' Mari nakxin por Sprit che'n Dios. ²¹ Lē' una' gap tu mē'd xibiyl', mbaino ku'lēl mē'd JESÚS; lē' mē'd re' ko' rē men che'n Dios lo rē kwa'n nzē'b xki bixa'.

²² Ngok rē kure' par mile' Dios rē kwa'n mila' Dios di'zh lo tu rē profet, xa' midi'zh por Dios, or nzhab Dios:

²³ Biwí' go, lē' tu una' ye'n wei' xin, no gap una' tu mē'd xibiyl',

mbaino ku'lē bixa' mē'd Emanuel.

Widi'zh re' gab: Dios nzo kun be.

²⁴ Or nguro' mika'l lo Che, mile' xa' nela xmod mile' ganj mandad ga'. Orze' nguziyél xa' ngok Mari tsa' xa', ²⁵ per nanga't bixa' junt, haxta or ngol xin una' mē'd re'; no ngulo'lē Che mē'd JESÚS.

2

Rē xa' nane xmod nak mbēl lo yibē', ng-watsi' lo mē'do'

¹ Lē' Jesús ngol yezh Belén kwa'n ña'n laz h men Judea; le'n rē ngubizh ze' nak Herodes rey. Orze' nded pla men yezh Jerusalén, rē xa' nane xmod nak rē mbēl lo yibē', zit nzē bixa' al nez plo nilen ngubizh, no nzhab bixa':

² —¿Ma mē'do' kwa'n ngol ze', mē'd nak rey che'n rē men Israel? Lē'no une tu mbēl che'n mē'd re' lo yibē'. Nzē no par di'zh no nazhon mē'd.

³ Or mbin rey Herodes kure' kun rē xa' nzhoh yezh Jerusalén, net bixa' kwan le' bixa'. ⁴ Orze' mikan Herodes rē ngulēi' xa' más nile' mandad, no rē xa' nilu' ley par minabdi'zh Herodes:

—¿Plo nak di'zh, gal Krist?

⁵ Orze' nkab bixa':

—Yezh Belene, kwa'n ña'n lazh men Judea, porke se' nzhab tu xa' midi'zh por Dios:

⁶ Lu, yezh Belén, kwa'n ña'n lazh men Judea, nagaktra'l tu yezh kwa'n natsakt kwa'n nzhoh xid rē yezh kwa'n tsak lazh men Judea,

lè' xid rē men xa' nzhoh lol, rozi' tu xa' le' mandad,

par kina rē men da, men Israel.

⁷ Orze' xla'n ngurezh Herodes rē xa' nane xmod nak mbèl lo yibè', par minabdi'zh Herodes, pok ka nguluxo'b mbèl ze', ⁸ no or mixè'l Herodes bixa' par yezh Belén, nzhah Herodes lo bixa':

—Wa go ba' par wanabdi'zh go cho ka mè'd ba'. No or yazhèl go mè'd, ne go rēi lon, par nu da yadi'zh nazhon mè'd.

⁹ No or milox mbin bixa' kwa'n nzhah rey, orze' nzhah bixa'. No une bixa' mbèl lo yibè' nzhah dilant lo bixa'; no or ngulèz mbèl, nali laka ze' nzhoh mè'd. ¹⁰ Or une rē xa' ze' ngulèz mbèl, dox mizak laxto' bixa'. ¹¹ Or nguio bixa' le'n yo' ze', une bixa' mè'd kun xna' mè'd, orze' nguzuxib bixa' lo mè'd mbaino midi'zh bixa' nazhon mè'd. No ngulo' bixa' rē kwa'n nzhahanu bixa', rē or, kun ya'l, mbaino nits nax che'n mirra. Rē kure' ngok kwa'n miza' bixa' par lè' mè'd. ¹² Or milox ngok kure', nzhah Dios lo bixa' le'n mika'l, nayubretre' bixa' lo Herodes. Orze' xa' nez ña bixa' par lazh bixa'.

Che no Mari ña bixa' kun mè'd lazh men Egipto

¹³ Mbaino or ña rē xa' nane xmod nak mbèl lo yibè', orze' ngurulo tu ganj che'n Dios lo Che le'n mika'l, nzhah ganj:

—Waxche, bi'y mè'd kun xna' mè'd, bizè go lazh men egipto, no ba'gaka guyo go haxta na ka gani pok ro' go ba'; lè' Herodes kwa'n mè'd ye'n par gut xa' mè'd.

¹⁴ Orze' lweg'a' ngwaxche Che, nguzen xa' mè'd ye'n kun xna' mè'd or ye'l ze', nguio xa' nez, ña xa' lazh men egipto, ¹⁵ no ba'gaka nguio bixa' haxta or ngut Herodes, par ngok rē kwa'n mila' Dios di'zh lo tu xa' midi'zh por Dios or nzhah xa': "Dizde lazh men egipto ngurezha Xga'na."

Mile' Herodes mandad, gat rē mè'd ye'n

¹⁶ No or une Herodes, lè' rē xa' nane xmod nak mbèl lo yibè' ze' mikide xa', dox miyi'xian Herodes, no mile' xa' mandad, gat rē nak mè'd xibi'y' kwa'n nzhah haxta chop li'n. Nguzen Herodes dizde zhè kwa'n midi'zhnu xa' rē xa' kwa'n une nguluxo'b mbèl ze' lo yibè'; rē mè'd ye'n mbit xa' kwa'n nzhoh yezh Belén mbaino rē mè'd kwa'n nzhoh más rē yezh kwa'n nzhin naka'n yezh Belén, ¹⁷ par ngok widi'zh che'n Dios kwa'n

mizobni' Jeremías, rē widi'zh kwa'n nzhah se':

¹⁸ Dox tu yalnawin nzhoh lazh men Ramá, dox niwin laxto' Raquel, nzhoh'n xa' naye; nibizhyè xa' por rē xmè'd xa', no nanetra' yalnawin che'n xa' kwèz, por niyen ra' rē xmè'd xa'.

¹⁹ No or ngut Herodes, xtu wèlt ngurulo tu ganj che'n Dios lo Che le'n mika'l lazh men egipto, ²⁰ nzhah ganj:

—Waxche, bi'y mè'd kun xna' mè'd; bizè go lazh men Israel; lè' rē xa' nzhakla gut mè'd, lè' rē bixa' ngut la.

²¹ Ngwaxche Che, mbi'y xa' mè'd kun xna' mè'd, nguibre bixa' lazh men Israel. ²² Per or mbin Che, lè' Lao nilè' mandad lazh men Judea lugar che'n Herodes xuz xa', dox nizheb Che bi xa' ze'; orze' nzhah Dios lo xa' le'n mika'l, bi xa' lazh men Galilea, ²³ no or mizhin xa' ze', ña xa' tu yezh lè Nazaret, par ngok rē widi'zh kwa'n midi'zh tu profet or nzhah xa': "Lè' xa' ru'lè xa' nzè yezh Nazaret."

3

Widi'zh che'n Juan, xa' nililè'i men le'n nits

(Mr. 1:1-8; Lc. 3:1-9, 15-17; Jn. 1:19-28)

¹ Le'n rē ngubizh ze', Juan xa' nililè'i men le'n nits, nguio xa' le'n yuo bizh kwa'n ña'n lo yuo che'n men Judea, kidi'zh xa' lo rē men, ² nzhah xa':

—Bila' go rē kwa'n gat lè' nak go; lè' zhè nzhazhin la, ne go xmod ban go kun Dios.

³ No Juan re' mize't Isaiás, tu xa' midi'zh por Dios chi tiemp or nzhah xa':

Dizde le'n yuo bizh, naye kibizhyè tu xa', kidi'zh:

"Bizuxkwa' go laxto' go par Dios; bila' go rē kwa'n gat lè' kwa'n nak go."

⁴ Nakxao' xab Juan kun yich che'n kamey, no nazi' tu sint yid laxto' xa'; kwa'n nzhah Juan nak nab tsa xanch kun mizhin che'n rē mbèz dan. ⁵ Rē men re' ñayon kwa'n nidi'zh Juan: rē men yezh Jerusalén kun rē men xa' nzhoh lazh men Judea, mbaino rē men xa' nzhoh naka'n ro' you' Jordán. ⁶ Or nixo'bdol bixa' lo Juan, nililè'i Juan bixa' le'n you' Jordán.

⁷ No or une Juan, nayax rē men fariseo kun nayax men saduceo, nzè bixa' par lilè'i Juan bixa', orze' nzhah Juan:

—jRè go, men nakap, xa' nak nela mbè'l nayi' ga! ¿Cho ne lo go, nab por galkè'i go, le' go gan lo kwa'n nazhe'b kwa'n xè'l Dios par rē men kwa'n nzè'b xki lo Me? ⁸ Nal bilu' go, walika mila' go rē kwa'n gat lè' nak go, ⁹ mbaino nagabt go, yent kwa'n le' Dios kun go por nzè go ben che'n Abraham, porke nin lo go, haxta kun rē ke re', gak le' Dios, gake rē men xa' nzè ben che'n Abraham, ¹⁰ no lè' yi'bya nzo la xan rē ya, par cho'i rē ya kwa'n

gat niza' xlë wen, orze' yole. ¹¹ Walika, nab tsa nililëi'ña men le'n nits or walika nila' bixa' rë kwa'n gat lë' nak bixa' lo Dios. Per nzho xtu xa', xa' nzadkë ticha, xa' re' nililëi' men kun Sprit che'n Dios, no más tsak xa' lon. Per ni gat ñal lan yalyid che'n xa' ni' xa'. ¹² No nzen la xa' pal par tsumbe xa' triu, no tu lad ko' xa' yix. Or lox tsumbe xa'i, orze' kan xa' triu par kichao' xa'i, per lë' yix zë'k xa' plo gat ñalt bël.

Ngoklëi' Jesús you' Jordán
(Mr. 1:9-11; Lc. 3:21-22)

¹³ Nalse nzha Jesús plo nzo Juan par lilëi' Juan Me le'n nits; dizde lazh men Galilea nguro' Me par mizhin Me ro' you' Jordán plo nzo Juan. ¹⁴ Or galo laka nanet Juan lilëi' Juan Jesús, nzhab Juan:

—¿Taxa na lilëi'ña? ¡Maska lu lilëi' da!

¹⁵ Per nzhab Jesús:

—Por nal, la' be gake se', par le' be rë kwa'n nzhakla Dios gak.

Orze' mililëi' Juan Jesús. ¹⁶ No or milox ngoklëi' Jesús, tuli nguro' Me le'n nits, lë'chi mixa'l lo yibë', une Jesús ngulayët Sprit che'n Dios yek Me, nela tu palom ga', ¹⁷ lë'chi mien tu widi'zh dizde lo yibë' kwa'n nzhab:

—Xa' re' Xga'na xa' nazhi' da; dox nizak laxto'n por xa' re'.

4

Nguzenbe' Mizhab Jesús
(Mr. 1:12-13; Lc. 4:1-13)

¹ Or nguio Sprit che'n Dios laxto' Jesús, mbi'y Sprit Jesús plo más zit le'n yuo bizh par nabei chi zile' Mizhab gan kide Jesús. ² Nzhala cho' ngubizh no cho' yë'l di nzo Me ze', dub orze' gat gao Me, orze' dox mila'n Me. ³ Lë'chi nguzubi Mizhab par zenbe' Mizhab Jesús (wi' Mizhab xmod nak Jesús), nzhab Mizhab:

—Chi walika Lu nak Xga'n Dios, bile' ke re' gake yët gawal.

⁴ Orze' nzhab Jesús:

—Se' nzobni' lo Yech che'n Dios: “Gat lë't nab yët gak gao men par ban men; nab tsa kun widi'zh kwa'n niro' ro' Dios gak ban men.”

⁵ Orze' mbi'y Mizhab Jesús yek yado' Jerusalén plo más ya, ⁶ par nzhab Mizhab:

—Chi walika nakal Xga'n Dios, bila' gabal dizde re' haxta lo yuo; nela nzobni' ka lo Yech che'n Dios: “Xë'l Me rë ganj che'n Me par kinal, no zen rë ganj ya'l par nayachinal lo ke.”

⁷ Per nzhab Jesús:

—Nuska nzobni' lo Yech che'n Dios: “Nazenbe'tal Dios che'nal, Me nile' mandadal.”

⁸ Lult mbi'y Mizhab Jesús yek tu yi' dox kwa'ro; di ze' milu' Mizhab rë naklakh men,

plo nzhin men yizhyuo, mbaino rë kwa'n tsak che'n bixa', ⁹ no nzhab Mizhab:

—Na ne rë nak kure' ka'l, chi lë'l ne, nazhon da, mbaino zuxibal xan ni'n haxta gal lol lo yuo.

¹⁰ Orze' nzhab Jesús:

—¡Yubchi lon, Mizhab! Nela nzobni' ka lo Yech che'n Dios: “Nabtsa lo Dios, Me nile' mandadal, di'zhal nazhon Me, mbaino gonal ro' Me.”

¹¹ Orze'se nguubchi Mizhab lo Jesús, lë'chi nguzubi pla ganj che'n Dios, miza' rë kwa'n naki'n Jesús.

Nguzublo kile' Jesús zhi'n nazhon che'n Xuz Me Dios

(Mr. 1:14-15; Lc. 4:14-15)

¹² Or mbin Jesús, lë' Juan nzho lizhyi'b, nzha Me lazh men Galilea. ¹³ Mila' Me yezh Nazaret, ña Me yezh Capernaúm, kwa'n nzhin ro' lagún plo nazhë'l rë men yezh Zabalón no rë men yezh Neftalí, ¹⁴ Se' ngok rë kwa'n mizobni' Isaías, xa' midizh por Dios, or nzhab xa':

¹⁵ Bin goi, men yezh Zabalón,

mbaino men yezh Neftalí, kwa'n nzhin al nez ro' nitsdo' al xtu ro' you' Jordán;

no bin goi, rë men yezh Galilea,

rë xa' gat lë't men Israel:

¹⁶ Ter naban go lo nakao,

per lë' tu ki ro zini lo go;

rë go xa' dox nizheb gat mbaino lox lo Dios.

¹⁷ No dizde orze' nguzublo kidi'zh Jesús lo rë men, nzhab Me:

—Bila' go rë kwa'n gat lë' nak go lo Dios; lë' nzhazhin la gak go men che'n Dios.

Jesús ngule tap miyi' par gak men che'n Me

(Mr. 1:16-20; Lc. 5:1-11)

¹⁸ Dub nikizë Jesús ro' nits kwa'n ña'n lazh men Galilea, une Me rop wech tu miyi'. Tu xa' lë Simón Per, mbaino xtu xa' lë Ndres. Zhi'n che'n bixa' nizen bixa' mbël, no mer ngulubi bixa' yex le'n nits par zen bixa' mbël, ¹⁹ lë'chi nzhab Jesús lo bixa':

—Dikë go ticha, na le kan go men nela mbël ga'.

²⁰ Tuli mila' bixa' rë yex kwa'n nizen bixa' mbël, nzhakë bixa' tich Jesús. ²¹ No nguzë Jesús xche'p, une Me rop wech xchop miyi', tu xa' lë Jakob no xtu xa' lë Juan, xuz bixa' lë Zebedeo; nzho bixa' le'n bark kun xuz bixa', kiluwen bixa' rë yex kwa'n nizen bixa' mbël. Orze' ngurezh Jesús bixa'. ²² Mbaino tuli mila' bixa' xuz bixa' le'n bark, lë' bixa' nzhakë tich Jesús.

Jesús kilu' widi'zh che'n Dios lo nayax men

(Lc. 6:17-19)

²³ No dub lazhen men Galilea, nikizē Jesús, kilu' Me widi'zh che'n Dios le'n rē yo' plo nitse'd men widi'zh che'n Dios, kidi'zh Me xmod le' men, gak men, men che'n Dios; mbaino miliwen Me rē lo yalyizh no rē yalne kwa'n kinu rē men. ²⁴ No dub lazhen men Siria ngxo'b xti'zh Jesús, ngwanu rē men lo Jesús rē xa' nzhakne, wanei cho yalyizh nizak bixa', mbaino cho yalne kinu bixa'; rē xa' nzho mbi mal laxto' no rē xa' nizak yalyizh nikao, mbaino rē xa' nizak yalyizh kwa'n nagakt win men; rē bixa' miliwen Jesús. ²⁵ Dox tu bēd men nzhakē tich Jesús: men Galilea no rē men yezh Decápolis, no nu rē men yezh Jerusalén, mbaino rē men yezh Judea, kun rē men xa' nzē xtu ro' you' Jordán; rē men re' nzhakē tich Jesús.

5

Midi'zhnu Jesús nayax men yek tu lom

¹ Or une Jesús nayax dox men nzhakē tich Me, nkili Me yek tu lom, ze' nguzob Me, orze' nguzubi rē men che'n Me lo Me, ² mbaino nguzublo Me kilu' Me widi'zh che'n Dios lo rē men, nzhab Me:

¿Cho rē men nzha wen?

(Lc. 6:20-23)

³ —Nazhon nzha rē men xa' nane, dox naki'n bixa' Dios, porke che'n bixa' nak rē kwa'n kinu Dios par rē men che'n Me.

⁴ 'Nazhon nzha rē men xa' nzho'n nalre'; lē' Dios tsiyal laxto' bixa'.

⁵ 'Nazhon nzha rē men xa' niwi' nab tsa lo Dios por rē kwa'n naki'n bixa'; kuze' lē' bixa' gal kwa'n mila' Dios di'zh.

⁶ 'Nazhon nzha rē men, xa' nizak nela or nila'n tu men ga', mbaino nizak xa' nela or nizēi' laxto' tu men ga', por tanta nzhakla xa' ban xa' nela xmod nzhakla Dios ga', orze' dimás za' Dios kwa'n ka' xa'.

⁷ 'Nazhon nzha rē men xa' nilats laxto' xtu men; lē' Dios lats ska laxto' bixa'.

⁸ 'Nazhon nzha rē men xa' nambe laxto' lo Dios; lē' bixa' ne Dios.

⁹ 'Nazhon nzha rē men xa' nile' nibin tu men wen kun xtu men; lē' bixa' ru'lē xme'd Dios.

¹⁰ 'Nazhon nzha rē men, xa' niyi' men nine men por nile' bixa' kwa'n nzhakla Dios; kuze' lē' bixa' yo plo nzho yalnazhon che'n Dios.

¹¹ 'Nazhon nzha go or nichao' yek men tu bēd kwa'n gat lē' nak go, no or dox nakap men lo go, mbaino or nidi'zh men tu bēd kwa'n mbēl nak go, por nak go men da. ¹² Dox bizak laxto' go por kuba'; lē' dox tu kwa'ro ne' Dios ka' go lo yibē'. Sa' nguzak rē men nzhala xa' midi'zh por Dios, rē xa' miban galo lo go.

Zed che'n yizhyuo

(Mr. 9:50; Lk. 14:34-35)

¹³ 'Lē' go nak nela zed ga' yizhyuo re', per chi lē' zed gat nazhira', orze' yent kwan zu'i; lē'i yubi, mbaino lo men loi.

Biani che'n yizhyuo

¹⁴ 'Go nak nela tu ki ga' lo yizhyuo re', nela tu yezh nzhin yek tu lom nilu' lakai; ¹⁵ no yent cho tsinki tu biani par zob xa'i le'n tu kaj; lē' xa' zobe al ya' par ziniy lo rē men nzho le'ño'. ¹⁶ Gok go nela tu biani ga', nes par ne men xa' naban go, orze' lē' men di'zh nazhon Xuz go Dios, Me nzho lo yibē'.

Jesús milu' xmod nak ley kwa'n mila' Dios lo Muisés

¹⁷ 'Nale't go xigab, nzhala par chila ley kwa'n mila' Dios lo Muisés, o nzhala par kubchin rē widi'zh kwa'n mikē' rē xa' midi'zh por Dios nzhala; na nzhah par len, gak rē kwa'n nzobni' lo ley, mbaino par gak rē kwa'n mikē' rē xa' midi'zh por Dios nzhala. ¹⁸ Walika kwa'n nin lo go, dub nzho gaka yibē' no yizhyuo, rē kwa'n nzobni' lo ley gak; haxta rē kwa'n más kwa'n win, rēi' gak. ¹⁹ Kuze', tu xa' nane la kwa'n nzobni' lo ley, ter más che'ptsa nilu' tsake, no chi nilu' xa' re' lo men, gat naki'nt le' men kwa'n che'ptsa nilu' tsak re', orze' xa' re' gak xa' más che'p tsak plo nile' Dios mandad. Per men nile' rē kwa'n nzobni' lo ley, no nilu' xa'i lo más men par nu bixa' le'i, orze' xa' re' dox xa' ro gak xa' plo nile' Dios mandad. ²⁰ Nin lo go, chi lē' go nale' gan le' go más rē kwa'n nzobni' lo ley che'n Muisés lo rē men fariseo, mbaino lo rē men nilu' ley re', orze' por kuba' nayot go plo nile' Dios mandad.

Jesús milu' kwan nzhak, or niyi' tu men kun xtu men

(Lc. 12:57-59)

²¹ No nu nzhab Me:

—Lē' go nane ka, se' nak widi'zh kwa'n mbin rē xuz go xa' nzhala: “Naguttal men, porke xa' nzhut men, lē' gustis wei' xa' par kix xa' kwa'n mile' xa'.” ²² Per na ni lo go, wanei cho men, xa' niyi' kun xtu men, orze' lē' gustis gab kwan ñal xa' re'; no wanei cho men nzhah lo xtu xa': “Tont gox”, guzhē nzē'b xki xa' ze' lo gustis xa' más tsak; mbaino wanei cho nzhah: “Le'n bēl loxal”, lo xtu men, orze' por midi'zh xa' re' sa', lē' xa' re' nzho rriez bi le'n gabil.

²³ 'No chi dub kiza'l tu gon lo Dios, mbaino nanel, lē'l kinu tu kwent kun wechal, ²⁴ orze' más wen nalta' za'l gon lo Dios, galo laka watsiya'l laxto' wechal, orze' yubre'l, za'l gon lo Dios.

²⁵ 'No chi wei' tu menal lo gustis, dub nzha go nez, bitsiyal laxto' xa' re', nes par nachi xa' lu lo gustis xa' nile' mandad, napa' wei' xa' re' lu lo xa' nikina lizhyi'b; no xa' nikina lizhyi'b re' kol lizhyi'b. ²⁶ Walika kwa'n

nin, nako't bixa' lu lizhyi'b haxta ke kixal rē kwa'n nzē'bal.

Jesús midì'zh, nabant men kun xa' gat lē' tsa'men

²⁷No nzhah Jesús:

—Lē' go mbin la kure': "Nabant go kun men gat lē' tsa' go." ²⁸Per na ni lo go, wanei cho tu miyi' niwi' lo tu una' no niwix xa' ban xa' kun una' ze', guzhē nzē'b xki xa' re' lo Dios por kuba'. ²⁹Kuze', chi lē' zalol lad direch nile', nzē'b xkil, neka gulo'i tuli; más wen gak jwalt tu plol ke par dubal bi le'n gabil. ³⁰No chi lē' ya'l lad direch nile' nzē'b xkil, neka bicho'i tuli; más wen yent xtu plol ke par bi dubal le'n gabil.

Jesús milu' kwan nzhak, or nilē' men kun tsa'men

(Mt. 19:9; Mr. 10:11-12; Lc. 16:18)

³¹'No nu mbin la go: "Wanei cho tu men lē' kun tsa', naki'n yats tu yech par gak ban xa' kun xtu men." ³²Per na ni lo go, chi tu miyi' lē' kun tsa', no chi gat lē' por ngop la una' re' xtu miyi'y, orze' kure' le', nzē'b xki una' lo Dios, mbaino miyi' xa' ban kun una' re', por kure' no ska xa' nzē'b xki lo Dios.

Jesús nilu' kwan nzhak or nila' men di'zh tu kwa'n

³³'No mbin la go xmod midì'zh Dios lo rē xuz go chi tiemp or nzhah Dios: "Naya'lt laxto' go, le' go kwa'n mila' go di'zh lon."

³⁴Per na ni, naze't go lē' Dios lo ni tu kwa'n or ña'n go di'zh le' go tu kwa'n, ni por yibē', porke lē'i nak plo nzob Dios; ³⁵no ni naze't go yizhyuo or ña'n go di'zh tu kwa'n, porke lē' yizhyuo nak nela plo nizo ni' Dios; no ni naze't go yezh Jerusalén, porke lē'i nak yezh che'n rey, Me más tsak. ³⁶No ni naze't go yek go or ña'n go di'zh le' go tu kwa'n, porke nagakt le' go naguzh o nagats ni tu yich yek go. ³⁷Naki'n gab go "Yoo", o "Aa" namás, porke chi gab go más kwa'n, che'n Mizhab kuze'.

Xmod naki'n le' be kun xa' nakap lo be
(Lc. 6:29-30)

³⁸'No mbin la go se' nzhah di'zh: "Men kwa'n kich zalo xtu men, se'ska kix xa'i; mbaino xa' ko' kilēi xtu men, se'ska kix xa'i."

³⁹Per na ni, nagakt go nela men xa' nile' kwa'n nakap lo go; más wen chi nzho tu xa' kē' tube ta' ro' go, orze' biza' go xtu lad. ⁴⁰No chi cho men nzhakla chi go lo gustis par lat xa' xkamiset go, orze' bila' go wei' xa' ter nu xkamis go. ⁴¹No chi tu men ki'l go par wei' go tu kwa'n ne' tu kilómetro garol, neka bi'y goi chon kilómetro; ⁴²no wanei cho tu men na'b tu kwa'n jwers lo go, biza' goi; no cho tu men ki'n tu kwa'n lo go, la't go bi xa' nab ya' xa'.

Bichizhi' go xa' niyi' nine go
(Lc. 6:27-28, 32-36)

⁴³'No nu mbin go se' nzhah di'zh: "Bichizhi' go tsa' men go, per xa' niyi' nine go, biyi' ska go, une go xa'." ⁴⁴Per na ni: Bichizhi' go xa' niyi' nine go, no bina'b go lo Dios por rē xa' niru'kē tich go, ⁴⁵nes par gak go xmē'd Dios, Me nzho lo yibē'; porke Dios nile' niro' ngubizh par niziniy lo rē men wen no lo rē men nakap; mbaino nila Dios yiu par rē men, xa' nile' kwa'n nzhakla Dios no par rē men xa' nile' kwa'n gat lē' lo Me. ⁴⁶No chi chizhi' go nab tsa xa' nazhi' go, çkwan gab go, ne' Dios tu kwa'n wen ka' go, por nak go sa't, porke haxta nu rē xa' nikan dimi che'n rey Roma nak sa'. ⁴⁷No chi nab tsa lo rē melizh go nini' go, çkwan gab go, más wen kwa'n kile' go, par lo rē men, xa' gat nilibe't Dios't, porke haxta nu rē xa' nikan dimi che'n rey Roma nak sa'. ⁴⁸Gok go wen kun rē men, nela wen Dios Xuz go, Me nzho lo yibē', kun rē men.

6

Jesús milu' xmod nilu' or nile' men tu kwa'n wen lo Dios

¹No nzhah Jesús:

—Or le' go tu kwa'n wen, nale't goi namás par ne mene, porke chi nak go sa', ni tu kwa'n wen nane't Xuz go ka' go, Me nzho lo yibē'. ²Kuze' or gaknu go tu men prob nali, naxo'bdi'zht goi lo men, nela xmod nile' rē xa' chigab walika men wen, or nizo bixa' le'n rē yo' plo nitse'd men widi'zh che'n Dios, no le'n rē nez, par di'zh men wen tich bixa' namás. No walika kwa'n nin, yalnak bixa' sa', nab tsa lo rē men yizhyuo ña'n bixa' wen, per par lo Dios, yent kwan gal bixa'. ³Per go, or gaknu go tu men yent kwan nzhap, nadi'zht goi ni lo xa' más nichē'l go; ⁴bile' goi namás, porke lē' Xuz go Me nzho lo yibē', niwi' lo rē kwa'n nzhak xla'n, orze' lē' Me ne' tu kwa'n wen ka' go, por kwa'n mile' go ba'.

Jesús milu' xmod na'b men lo Dios
(Lc. 11:2-4)

⁵'Or na'b go lo Dios, nale't go nela xmod nile' rē xa' chigab walika men wen, rē xa' ño laxto' nina'b lo Dios, dub nzoli le'n rē yo' plo nitse'd men widi'zh che'n Dios, mbaino le'n rē nez, no plo nzhak xbi', par xo'b xti'zh bixa' namás. No walika kwa'n nin, yalnak bixa' sa', nab tsa lo rē men yizhyuo ña'n bixa' wen, per par lo Dios, yent kwan gal bixa'. ⁶Per go, or na'b go lo Dios, guyo go le'n yo', no bitsao' go ro'i, orze' xla'n bina'b go lo Dios Xuz go; no lē' Xuz go niwi' kwa'n kile' go xla'n, lē' Me ne' tu kwa'n wen par go dilant lo rē men. ⁷No dub kina'b go lo Me, nadi'zht go tutsa kwa'n garga'l, nela nile' rē men, xa' gat nilibe't Dios. Lē' bixa' gab, por nile' bixa' sa', gon Dios kwa'n nina'b bixa'. ⁸Kuze' nale't go nela rē men ba', porke lē' Xuz go,

Me nzho lo yibè', nane la kwan naki'n go, antis di na'b goi lo Me. ⁹ Or na'b go lo Xuz go Dios, se' guzh go:

Xuz no, Me nzho lo yibè',
dox ñal di'zh rè men, nazhon Go;

¹⁰ nzhakla no, rè men yizhyuo ziyël le' Go mandad lo bixa',

nela xmod nile' Go lo yibè' ga';

¹¹ bine' Go kwa'n gao no, no kwa'n naki'n no zilita';

¹² biya'l laxto' Go rè kwa'n gat lè' nile' no lo Go;

sa' ska ya'l laxto' no rè kwa'n gat lè' nile' men lo no.

¹³ No nala't Go zenbe' Mizhab no (wi' Mizhab xmod nak no);

gulo' Go no lo rè kwa'n nzhakla xa' li'nu xa' no.

¹⁴ 'No chi lè' go ya'l laxto' rè kwa'n gat lè' nile' xtu men lo go, orze' nu ska Xuz go Me nzho lo yibè', ya'l laxto' rè kwa'n gat lè' nile' go lo Me, ¹⁵ per chi naya'lt laxto' go rè kwa'n gat lè' nile' xtu men lo go, orze' nu ska Xuz go Me nzho lo yibè', naya'lt ska laxto' Me rè kwa'n nile' go.

Jesus milu' xmod, na'b men xlats men lo Dios

¹⁶ 'No or na'b go lo Dios dub xlats go; nale't go nalats lo go nela nile' rè xa' chigab walika men wen; nalats nile' bixa' lo bixa' or nina'b bixa' lo Dios xlats bixa' par ne mene namás. No walika kwa'n nin, yalnak bixa' sa', nab tsa lo rè men yizhyuo ña'n bixa' wen, per par lo Dios, yent kwan gal bixa'. ¹⁷ Per go, or zo go xlats go lo Dios par na'b go lo Me, bichob go aseit yek go no bizèt go lo go, ¹⁸ nes par nane rè men, nzo go xlats go lo Dios; no Xuz go Dios Me niwi' lo rè kwa'n nzhak xla'n; lè' Me ne' tu kwa'n wen ka' go por nile' go sa'.

Rè kwa'n tsak kwa'n nzho lo yibè'

(Lc. 12:33-34)

¹⁹ 'Naku'chao't go rè kwa'n tsak nzho yizhyuo re', plo nilox rè kwa'n nzhao mbèze, mbaino nikibèowe, plo ño rè men wa'n, niliwa'ne; ²⁰ más wen bile'o xigab xmod le'o kwa'n tsak lo Dios, no por rè kure' gal go tu kwa'n lo yibè' kwa'n más tsak, plo nagaot mbèz kwa'n, mbaino ni nakibèowe, no ni rè wa'n nayo ze' par liwa'ne. ²¹ No plo kinu go kwa'n tsak che'n go, ze' nzo xigab che'n go.

Yalnaban che'n men nak nela tu biani par dub men

(Lc. 11:34-36)

²² 'Lè' yalnaban che'n men nak nela tu biani par dub men. Chi lè' yalnaban kwa'n kinul nizini, orze' dubal ñani; per chi gat nizini yalnaban che'nal, orze' dubal nzo lo nakao; ²³ no chi dubal nzo lo nakao por gat nizini yalnaban che'nal, orze', jdox nazhe'b nzhali!

Dios no dimi

(Lc. 16:13)

²⁴ 'Yent cho tu mos gak le' zhi'n che'n chop xa' nile' mandad lo xa' tutsa or; porke lè' mos yi' ne tu xa', no xtu xa' chizhi' mos; o ro' tu xa' gon mos, mbaino ro' xtu xa' nagont mos. Kuze', nagakt le' go kwa'n nzhakla Dios, mbaino wix go gap go dimi.

Nzhaknu Dios rè xmè'd Me

(Lc. 12:22-31)

²⁵ 'Kuze' nin lo go: Nale't go be's xigab por kwa'n gao go, o por kwa'n go go par ban go; no ni nale' go dox xigab por kwa'n gak go. ¿Chi nanet go, más tsak yalnaban che'n men lo kwa'n nzhao men, mbaino más tsak men lo xab men? ²⁶ Biwi' go lo rè miyin kwa'n nikizè lo yibè'; naban ma no ni gat nzha'n ma, mbaino ni gat nikan ma yalgo'n, par kuchao' ma kwa'n gao ma; per Dios Xuz go Me nzho lo yibè', niza' kwa'n nzhao ma. No, ¿chi nanet go, más tsak go lo rè miyin? ²⁷ No ter dox nile' go xigab, ¿xmod le' go par ban go xtu or más lo rè li'n, kwa'n mine' Dios ban go yizhyuo re'?

²⁸ ¿Chon nile' go be's xigab plo ro' xab go? Bile' go xigab por rè ye' dan, xmod niro' be: Gat nikète zhi'n, no ni gat nitibe lar. ²⁹ Per ni rey Salomón, ter dox miar kwa'n ngop xa', no nangakt xab xa' nela xmod nilu' tu ye' ga'. ³⁰ No chi sa' nile' Dios nilu' rè yix kwa'n nzhi'b dan nal, mbaino yè', lè' yèk la lo ki, orze', ¿chi nale't Dios más kwa'n por go? Tatu nazhe'b nak go, gat nzhont goi, we'tsa ñila go Dios. ³¹ Kuze', nagabt go nal: "¿Plo ro' kwa'n gao be no kwa'n go be, mbaino lar gak be'?", ³² porke kure' nile' rè men, xa' gat nili'be't Dios; per go, lè' Xuz go Me nzho lo yibè', nane la, lè' go naki'n rè kure'. ³³ Kuze' galo laka biwi' go lo Dios por rè kwa'n naki'n go, mbaino ban go nela xmod nzhakla Me, orze' lè' Me zilazh rè kwa'n naki'n go ba'. ³⁴ Kuze' nale't go be's xigab por rè kwa'n naki'n go yè'. Kad ngubizh nzadnu kwa'n nizob xigab yek men, kuze' gat ñalt le' go xigab par yè'.

7

Nadi'zht go kwan ñal tu men por kwan nile' xa'

(Lc. 6:37-38, 41-42)

¹ 'Nagabtal kwan ñal tu men or nile' xa' tu kwa'n gat lè', nes par nazakzi Diosal or nul nile'i, ² porke or nini'l tich tu men por xmod nak xa', sa' ska le' Dios kun lu. ³ ¿Chon nila'chal por yix kwa'n nzho zalo xtu men, no chi nanetal, lè' tu kwa'n más kwa'ro nzho zalol? ⁴ No chi más tu kwa'ro nzho zalol, ¿xmod gabal lo wechal: "Dinu lol, kon yix?" ⁵ ¡Tatu nazhe'b nakal, chigab walika men wenal! Galo laka gulo' yix ro' kwa'n nzho lol

ba', nes par gak wi'l wen no ko'l yix kwa'n nzhō zalo wechal ba'.

⁶ 'Naza't go kwa'n nazhon che'n Dios ka' rē xa' gat nzhont nzhō Dios, par nayēk bixa' dil bixa' kun go, orze' lo'x bixa' go tuli. Mbaino naza't go rē kwa'n tsak che'n Dios par ka' wane'i cho xa' gat nambet laxto' lo Dios; nayot laxto' bixa' yalnazhon che'n Dios, nitsinu bixa'i.

Rē kwa'n na'b go lo Dios, lē'i gap go
(Lc. 11:9-13; 6:31)

⁷ Nzhah Jesús:

—Dubta' bina'b go kwa'n naki'n go lo Dios, lē' Me ne'i; dubta' bikwa'n goi lo Dios, lē' Me le' yazhēl go kwa'n naki'n go; mbaino zilita' bikwe'zh go ro' yo', lē' Dios xa'le, ⁸ porke tu men nina'b tu kwa'n lo Dios, lē' Dios za'i; mbaino xa' nikwa'n tu kwa'n, lē' xa' yazhēle por Dios; no xa' nikwe'zh ro' yo', lē' Dios xa'le. ⁹ O, ¿cho tu go, za' tu ke gao xmē'd go or nina'b mē'd tu yēt gao mē'd lo go?; ¹⁰ o, ¿chi ziza' go tu mbē'l' gao mē'd or nina'b mē'd tu mbēl' gao mē'd? ¹¹ No chi nzhak go niza' go kwa'n wen par xin go ter nile' go kwa'n gat lē' lo Dios, per Xuz go Diōse, Me nzhō lo yibē', más nzhak Me niza' Me kwa'n wen ka' rē men, xa' nina'be lo Me.

¹² 'Chi se' nazhi' Dios go, se'ska bile' go kun men, nela xmod nzhakla go le' men kun go ga'; porke kure' nzobni' lo ley che'n Muisés; no se'ga' mid'i'zh rē profet, rē xa' mid'i'zh por Dios nzhala.

Pwert naya
(Lc. 13:24)

¹³ 'Bile' pa' go por yo go ro' puert naya, porke pwert mbaino nez kwa'n ña par gabil, dox naxene, no dox nayax men ño ze'; ¹⁴ per naya nez no naya pwert kwa'n ña plo nzhō Dios, Me niza' yalnaban par dubta' ka' men; kuze' che'ptsā men ño ze'.

Nakbe' ya por xlē kwa'n niza'i
(Lc. 6:43-44)

¹⁵ 'Bikina go go lo rē xa' chigab walika nidi'zh por Dios; ter nilu' nado' bixa' nela tu mbēkxi'l' ga', per le'n laxto' bixa' nak bixa' nela tu ma nazhe'b ga', ¹⁶ per por zhi'n kwa'n nile' bixa', li'be' go cho men bixa'; lē' go nane ka, gat nikēt gub lo cho la ya, no ni nzhao' gat nikēte lo ya yich. ¹⁷ Kuze' rē ya wen niza' xlē wen, mbaino rē ya nazu't, xlē nazu't ska niza'í, ¹⁸ porke tu ya wen za'te xlē nazu't, no ni tu ya nazu't naza'te xlē wen. ¹⁹ No rē nak ya kwa'n gat niza't xlē wen, lē'i ro'g no yoi lo ki par yole. ²⁰ Sa' ska por kwa'n nile' bixa', ne go cho men bixa'.

Gat lē't rē men yo plo nile' Dios mandad
(Lc. 13:25-27)

²¹ 'Gat lē't rē xa' nine lon: “¡Señor, señor!”, yo plo nile' Dios mandad; lē'i nab tsa rē xa' nile' kwa'n nzhakla Xuza Me nzhō lo

yibē', yo ze'. ²² Zhē ze', nayax men ne lon: “¡Señor, señor! No mid'i'zh widi'zh che'n go lo men, no por yalnazhon che'n go ngulo' no mbi mal laxto' rē men, mbaino nayax kwa'n nazhon mile' no por yalnazhon che'n go.” ²³ Per orze' lē'da gap: “Lalta' gat libe'n go; yubchi go lon, ¡rē go xa' mila' ley che'n Dios tu lad, nayi'lazh go!”

Chop xa' michao' tu ga' lizh
(Lc. 6:47-49; Mr. 1:22)

²⁴ 'Kuze', rē xa' nzhon xti'zha no nile' xa' kwa'n nzhapa, men ze' nak nela tu men natsin, kwa'n michao' tu lizh yek tu ke ro. ²⁵ No or ngula tu yiubi nazhe'b, miro'b you', naye ndin nits ta' yo' ze', per ni nangayalai, por nzobe lo ke. ²⁶ Per rē xa' nzhon xti'zha, no gat nile't xa' kwa'n nzhapa, rē men ze' nak nela tu men yent xigab kwa'n michao' tu lizh lo pura yux. ²⁷ No or ngula yiubi nazhe'b, miro'b you', naye ndin nits ta' yo' ze', ngubixchei, orze' milao'we.

²⁸ No or milox mid'i'zh Jesús kure' lo rē xa' nzhin ze', xe mia'n bixa' tuli por kwa'n mid'i'zh Me, ²⁹ porke nitse'd Me men nela tu xa' nile' ka mandad, no gat nakt Me nela rē maestr xa' nilu' ley che'n Moiseze.

8

Jesús miliyak tu men nizak yalyizh kwa'n lē lepra

(Mr. 1:40-45; Lc. 5:12-16)

¹ No or ñala Jesús yek lom ze', nayax dox men nzadkē tich Me, ² lē'chi nguzubi tu miyi' lo Jesús, tuli ngo't kuslo xa' lo Me; no miyi' re' nizak tu yalyizh kwa'n lē lepra, orze' nzhah xa' lo Jesús:

—Lē' go, chi lē'o' nzhaklai, gak liyak go da.

³ Orze' mitsiga' Jesús ya', no migal Me yek miyi' re', nzhah Me:

—Nzhaklan niwenal.

Orze' lwega' miak xa' re', no mimbe xa', ⁴ orze' nzhah Jesús:

—Wi'le, nadi'zhtle lo men, maska wa lo ngulēi' par rēl' xa' lu, no biza' gon nela xa' nzobni' lo ley che'n Muisés par ne xa', lē'l uniwen la.

Jesús miliyak mos che'n tu xa' nzē Roma
(Lc. 7:1-10)

⁵ No or nguo Jesús yezh Capernaúm, nguzubi tu capitán xa' nzē Roma lo Me, dox nalats mile' xa', nguna'b xa' lo Jesús, ⁶ nzhah xa':

—Lē' go, kinun tu mos da, nax nzhakne, nagakt win xa', no dox yalne kinu xa'.

⁷ Orze' nzhah Jesús:

—Lē'da yal, liyaka xa'.

⁸ Orze' nzhah capitán ze':

—Lē' go, gat ñalt da yi'd go lizha; namás bile' go mandad por xti'zh go, lē' mos da niwen, ⁹ porke kinun más rē xa' nile' mandad lon, no nu ska da kinu rē sondad xa' nile'

kwa'n nzhapa; chi gapa lo tu xa': "Wa", lè' xa' ya; no chi gapa lo xtu xa': "Dè'", no lè' xa' yè'd; no or gapa lo tu mos da: "Bile' kure'", no lè' xa' lè'i.

¹⁰ Or mbin Jesús kure', xe miwi' Me, orze' nzhab Me lo rè xa' nzhakè tich Me:

—Walika kwa'n nin lo go; per ni xid rè men Israel gat nen tu xa' ñila xti'zha nela miyi' re', ¹¹ no nin lo go, nayax men yi'd nez plo nilen ngubizh, no nez plo ña'z ngu-bizh, par gao bixa' lo mes kun Abraham no kun Isaac, mbaino kun Jakob plo nile' Dios mandad, ¹² per rè men Israel xa' gat nzhont widi'zh che'n Dios, lè' Dios xè'l bixa' plo nakao no plo go'n bixa' lo yalne, haxta kwezh lèi bixa'.

¹³ Orze' nzhab Jesús lo capitán ze':

—Bizè lizhal; sa' gake nela xmod ngwayil da.

No mis orze', tuli miak mos che'n capitán ze':

Miliyak Jesús xna'zha'p Per
(Mr. 1:29-31; Lc. 4:38-39)

¹⁴ No or mizhin Jesús lizh Per, une Me, lè' xna'zha'p Per nax lo lo'n, nizak xlè', ¹⁵ no migal tsa Jesús ya' xa' una' re', tuli nguro' xlè' xa', no ngwaxche xa', orze' miza' una' re' kwa'n ndao Jesús.

Miliyak Jesús nayax men nzhakne
(Mr. 1:32-34; Lc. 4:40-41)

¹⁶ No or nzhazhèlalyuo, nghanu men nayax xa' nzho mbi mal laxto', lo Jesús; no kun widi'zh che'n Jesús namás, mile' Me mandad nguro' rè mbi mal laxto' rè men ze'; no nu miliyak Jesús rè nak rè xa' nzhakne nzhin ze'. ¹⁷ Rè kure' ngok par mizhin rè kwa'n midì'zh Isaiás, tu xa' midì'zh por Dios nzhala, or nzhab xa': "Lè' xa' re' mbi'y yalizh che'n be, no ñanu xa' yalne che'n be."

Kwan naki'n le' men par yakè men tich Jesús
(Lc. 9:57-62)

¹⁸ No or une Jesús, nayax men nzhin naka'n plo nzo Me, orze' mile' Me mandad, ded Me kun rè men che'n Me xtu ro' lagún, ¹⁹ no ze' nguzubi tu maestr lo Jesús, tu xa' nilu' ley kwa'n mila' Dios lo Muisés, no nzhab xa':

—Maestr, nzhaklan yi'd kè'n tich go rè plo ya go.

²⁰ Orze' nzhab Jesús:

—Rè mbèèz kinu lizh, no rè miyin kinu yo che'n, per Xga'n Dios Me nu nak tu men yizhyuo, gat kinut ni plo ga'.

²¹ Orze' nzhab xtu men che'n Jesús:

—Gulèz go, galo laka nzhakacha zuza, orze' yi'dkè'n tich go.

²² Per nzhab Jesús:

—Tuli di'kè ticha, bila' ka'ch rè men, xa' nak nela men ngut ba', tsa' men ngut bixa'.

Mikwè'z Jesús tu yiubi nazhe'b le'n nits
(Mr. 4:35-41; Lc. 8:22-25)

²³ No or nkè Jesús le'n tu bark, rè men che'n Me nzha kun lè' Me. ²⁴ No or nzha la bixa' garol sao' nits, lè'chi nguro' tu yiubi nazhe'b le'n nits, no kun rè bol che'n nits, nila' yitlo bark le'ne, per lè' Jesús nax-naa, ²⁵ orze' ngwalixche men che'n Me Me, nzhab bixa':

—jLè'o, nala'to go ya'zyuo' no le'n nits!

²⁶ Orze' nzhab Jesús:

—jChon dox nizheb go? Kuba' nak por gat ñila go Dios be's.

Or midì'zh Me kure', ngwatsuli Me no mile' Me mandad par kwèz yiubi no nits, orze' rèi mia'n xe, ²⁷ orze' xe mia'n rè men che'n Me, no nzhab bixa' lo wech bixa':

—jPlo nzè xa' re' se? jHaxta yiubi no nits nzhon ro' xa'!

Chop men yezh Gadara xa' dox nzho mbi mal laxto'

(Mr. 5:1-20; Lc. 8:26-39)

²⁸ No or mizhin Jesús xtu ro' lagún, plo ña'n lazh men Gadara, ze' mizhè'l Jesús chop xa' nzho dox mbi mal laxto'; nguro' bixa' le'n panteón, no dox nayi'lazh bixa', kuze' ni tu men gat nidedt ze', ²⁹ lè'chi nguruzhiè bixa', nzhab bixa':

—jKwan nzhaklal linul no, Jesús Xga'n Dios? jChi nzè'l par baxzil no dub naga gal zhè or gab Dios xmod gak kun no?

³⁰ No gax laka ze' nzhin tu bèd kuch kiyao; ³¹ nalats midì'zh rè mbi kwa'n nzho laxto' rop rè men re' lo Jesús, nzhabe:

—Chi lè'l kutin no laxto' rè xa' re', neka bila' bi no laxto' rè kuch ba'.

³² Orze' nzhab Jesús:

—jBizè go!

Or nguro' rè mbi mal ze' laxto' rop miyi' ze', par ñai le'n rè kuch ze', lè'chi ña'ox'n rè ma, no ngula bima ro' tu bilè' plo nak ro' nits, ze' ngwap bima, ³³ no or une rè xa' kikina rè kuch ze' kure', mikè' bixa' karre, ña bixa'; no or mizhin bixa' yezh plo nzho bixa', midì'zh bixa' rè nak kwa'n une bixa', no xmod ngulo' Jesús rè mbi mal kwa'n nguio laxto' rop men ze', ³⁴ lè'chi rè nak men yezh ze' nguro' bixa' par nzhati' bixa' plo nzo Jesús; no or mizhin bixa' plo nzo Me, orze' mina'b bixa' ro' Jesús ze'.

9

Miliyak Jesús tu men nagakt win
(Mr. 2:1-12; Lc. 5:17-26)

¹ No or milo'x ngok rè kure', nkè Jesús le'n tu bark par nded Me xtu ro' lagún, orze' mizhin Me lazh Me. ² Ze' mizhinu pla miyi' tu men nzhakne nax xa' lo tu tapexk, no nagakt win xa'; no or une Jesús dox ñila rè

xa' re' Me, orze' nzhah Me lo men nzhakne ze':

—Bizak laxto' xga'n; lè' rë kwa'n nzè'b xkil mizhe' la lo Dios.

³ Lè'chi ze' nzhin pla maestr, xa' nilu' ley che'n Muisés, orze' xla'n nzhah bixa' lo wech bixa':

—jNayi' kwa'n midi'zh xa' re' par Dios!

⁴ Or une Jesús cho xigab kile' rë xa' re', tuli nzhah Me lo bixa':

—¿Chon tatu gat lè' kwa'n kile' go xigab?

⁵ ¿Kwan más jwals gapa?: “Lè' rë kwa'n nzè'b xkil lo Dios mizhe' la”, o gapa: “Waxche, no nguzè.” ⁶ No par ne go, na Xga'n Dios, no nak da tu men yizhyuo, mbaino kinun yalnazon par che'n rë kwa'n nzè'b xki men.

Orze' nzhah Me lo xa' nagakt win re':

—Waxche, gulits kwa'n naxal lo, no bizè lizhal.

⁷ Tuli ngwaxche xa' nagakt win ze', mbaino ña xa' lizh xa', ⁸ no rë xa' nzhin ze', or une bixa' kwa'n mile' Jesús, mizheb bixa' tuli, orze' nguzublo kidi'zh bixa', dox nazhon Dios mbaino niza' Dios yalnazon nka' rë men par le' bixa' kwa'n nazhon.

Jesús ngurezh Mateo

(Mr. 2:13-17; Lc. 5:27-32)

⁹ No or nguro' Jesús ze', une Me tu miyi' xa' lè Mateo, xa' nikan dimi che'n rey César, nzob xa' lo mes plo ñatix men dimi che'n rey; orze' nzhah Jesús lo xa':

—Dikè ticha.

Tuli ngwatsuli Mateo, nzhakè xa' tich Jesús. ¹⁰ No or nzob Jesús lo mes lizh Mateo, no kiyao bixa', lè'chi ze' mizhin nayax xa' nikan dimi che'n rey César, kun más rë xa' gat nile't kwa'n nezobni' lo ley che'n Muisés; rë bixa' nzob lo mes kun Jesús, mbaino kun rë men che'n Me. ¹¹ Or une rë men fariseo kure', orze' nzhah bixa' lo rë men che'n Jesús:

—¿Chon tutsa nzhao maestr che'n go kun rë xa' nikan dimi che'n rey César, no kun rë men nzè'b xki lo Dios?

¹² Or mbin Jesús kure', nzhah Me:

—Rë men gat nzhaknet, gat naki'nt xa' doctor, nab tsa rë xa' nzhakne naki'n doctor. ¹³ Kuze' bile' pa' go por tse'd go kwa'n nzhah widi'zh che'n Dios re': “Na nzhakla, lats laxto' go xtu men, ke par ne' go gon lon”, porke gat nzhahla par kwezha rë xa' nile' kwa'n nzhakla Dios; na nzhah par kwezha rë men nzè'b xki lo Dios, par la' bixa' rë kwa'n gat lè' nak bixa'.

Kwan nzhah or nizo men xlats men lo Dios

(Mr. 2:18-22; Lc. 5:33-39)

¹⁴ Orze' lo Jesús nguzubi pla rë men che'n Juan xa' nili'lèi' men le'n nits, par nzhah bixa':

—Lè' no, mbaino rë men fariseo, dox nizo no xlats no or nina'b no lo Dios; per rë men che'n go, gat nizot bixa' xlats bixa' par na'b bixa' lo Dios.

¹⁵ Orze' nzhah Jesús:

—¿Chi zak zo men xlats men, na'b men lo Dios, dub nzo xa' gak jwandang che'n ze'? Per or zhin zhè yubchi miyi' ze', orze'se lè' bixa' zo xlats, na'b bixa' lo Dios. ¹⁶ No yent cho cho' tlè' vestid kub par kè' xa' rëmiënd tu vestid go'x; porke nzhèlt lar kub kun lar go'x, porke xekt lar go'x, lè'i rëz; ¹⁷ no ni nako men vin kub le'n tu kwa'n go'x; porke lè' vin kub chèz kwa'n go'x ze', orze' rope nazu'tra'. Kuze' naki'n yo vin kub le'n tu kwa'n kubska, nes par rope zu'.

Xcha'p Jairo no tu una' kwa'n migal xab Jesús

(Mr. 5:21-43; Lc. 8:40-56)

¹⁸ Dub kidi'zh Jesús kure', lè'chi mizhin tu miyi' xa' nile' mandad xid rë men Israel, tuli ngo't kuslo xa' lo Jesús, nzhah xa':

—Lè' xcha'p nzè'b ngut, per chi lè' go yi'd mbaino xo'b go ya' go yek ne', lè' ne' ruban.

¹⁹ Orze' ngwatsuli Jesús, ñakè Me tich xa' ze' kun rë men che'n Me. ²⁰ No xid rë men ze' nza tu una', xa' nzhala tu dusen lin' nzhakne, nizak xa' kwa'n, orze' nguzubi xa' al tich Jesús par migal xa' xi' xab Me, ²¹ porke mile' xa' xigab: “Sol gala xi' xab Jesús namás, lè'da yak.” ²² Tuli mièk Jesús, no or une Me una' ze', nzhah Me:

—Xcha'p, bizak laxto'; nab tsa por ngway- ila da, lè'i niwen la.

Orze', niwen una'. ²³ No or mizhin Jesús lizh xa' nile' mandad ze', une Me kiyo'l la musk par yaka'ch bixa' mizhwin ye'n re', mbaino dox nibizhyè men, no kiyo' n bixa', ²⁴ orze' nzhah Jesús:

—Bizè go lizh go, porke gat lè't ngut mizhwin ye'n re', ka naxnaa mè'd.

Orze' mixizhnu rë men Jesús, ²⁵ per or ña rë men ze', nguio Jesús plo nax mè'd re', ngenzen Me ya' mè'd, orze' nguruban mè'd mbaino ngwaxche mè'd, ²⁶ no nguxo'bdi'zh kure' rë nak yezh kwa'n nzhin naka'n ze'.

Jesús miliyak chop men nikal lo

²⁷ No or nguro' Jesús ze', nzhakè chop men nikal lo tich Jesús, nibizhyè bixa' nzhah bixa':

—jBilats laxto' no, xga'n Dabi!

²⁸ No or nguio Jesús le'n tu yo', nguzubi rop xa' re' lo Jesús, orze' nzhah Jesús lo bixa':

—¿Chi ñila go, gak len yani lo go?

Orze' nzhah bixa':

—Lè' no ñila ka, lè' go gak ka le'i.

²⁹ Orze' migal Jesús zalo bixa', mbaino nzhah Me:

—Sa' gak kun go nela xmod ñila go da.

³⁰ Orze' ngwani zalo rop bixa', no chop- chon nzhah Jesús lo bixa':

—Yent cho lo gab go kure'.

³¹ Per mas nguro' bixa' ze', tuli mixo'b di'zh bixa'i rē yezh kwa'n nzhin naka'n ze', kwa'n mile' Jesús por lē' bixa'.

Jesús miliyak tu men nagakt di'zh

³² No kwanti gatsa di nguro' rop xa' miak zalo ze', orze' mizhinnu pla men tu miyi' nagakt di'zh lo Jesús, por nzho mbi mal laxto' xa', ³³ no or ngulo' Jesús mbi mal laxto' miyi' ze', tuli ka nguzublo kidi'zh xa', no rē men nzhin ze', xe mia'n bixa' tuli, no nzhab bixa':

—¡Lalta' gat ne men tu kwa'n se'ta' lazh men Israel!

³⁴ Per nzhab men fariseo:

—Lē' Mizhab kwa'n nile' mandad lo rē mbi mal, miza' yalnazon nka' miyi' ba', kuze' nzhak nigo' xa' mbi mal laxto' men.

Nilats laxto' Jesús rē men

³⁵ No se'ga' nikizē Jesús rē yezh no rē rranch, kilu' Me xmod nak widi'zh nazhon che'n Dios par yo men plo nile' Dios mandad, kilu' Mei le'n rē yo' plo nitse'd men Israel widi'zh che'n Dios, mbaino kiliyak Me rē lo yalyizh no yalne kwa'n nizak men. ³⁶ Or une Jesús rē men ze', dox milats laxto' Me bixa', porke yentra' cho gaknu bixa', ngwazha bixa' naban bixa', nak bixa' nela rē mbēkxi'l kwa'n niyent cho nikina ga', ³⁷ orze' nzhab Me lo rē men che'n Me:

—Walika, nzho nayax dox men yizhyuo, xa' nagat gon xti'zha, per che'ptsas men kinun, xa' nilu' widi'zh che'n Dios lo rē men, xa' nak nela tu yalgo'n kwa'n une la yats, no che'ptsas mos nzhin par litse. ³⁸ Kuze', naki'n na'b go lo Xuza, Me nak che'n rē yalgo'n re', par xē'l Me más mos par kane.

10

Mixē'l Jesús tu dusen men xa' le' zhi'n che'n Me

(Mr. 3:13-19; Lc. 6:12-16)

¹ No or ngurezh Jesús za tu dusen xa' mixē'l Me par le' rē zhi'n nazhon che'n Me, orze' miza' Me yalnazon nka' bixa' par ko' bixa' mbi mal laxto' men, no liyak bixa' men nizak wanei cho yalyizh, no cho yalne. ² Se' lē rē za tu dusen apost: xa' galo laka lē Simón Per, kun wech xa' xa' lē Ndres; no Jakob kun wech xa' Juan; xuz rop xa' re' lē Zebedeo; ³ mbaino Lip kun Bartolomé, no Max, kun Mateo xa' mikan dimi che'n rey César; mbaino Jakob xga'n Alfeo, no tu xa' lē Lebeo xa' nzhab ska men lē Tadeo; ⁴ mbaino Simón xa' nzē xid men Kananist, no Judas Iscariote, xa' michi Jesús lo rē men par ngut Me.

Jesús mixē'l za tu dusen men che'n par milu' bixa' xmod gak men, men che'n Dios

(Mr. 6:7-13; Lc. 9:1-16)

⁵ Or mixē'l Jesús za tu dusen men che'n Me par yalu' bixa' xmod gak men, men che'n Dios, kure' mile' Jesús mandad lo bixa', nzhab Me:

—Nayat go rē yezh plo nzho rē xa' gat lē't men Israel, no ni naya go lazh men Samaria. ⁶ Nabtsa wa go rē yezh plo nzho men Israel, rē xa' nak nela rē mbēkxi'l nguziwan dan ga', ⁷ par gab go lo bixa': "Bila' go rē kwa'n gat lē' nak go lo Dios; lē' zhē mizhin la gak go men che'n Dios." ⁸ No biliyak go rē men nzhakne, mbaino bile' go ruban rē men ngut, no biliyak go rē men nizak yalyizh lepra, mbaino gulutin go mbi mal laxto' rē men. Ka minen yalnazon re' ka' go; se'ska bile' go, ka bile' go rē kwa'n nazhon kun rē men rē plo ya go. ⁹ Nawei't go dimi or; no ni dimi plat, mbaino ni dimi kwa'n kob; ¹⁰ Yent kwan wei' go nez, no ni nawei' go chop nez xab go, no ni xtu nez yalyid che'n go nawei't go, mbaino ni tu bar wei't go, porke xa' nikē zhi'n, ñal za' men kwa'n gao xa'.

¹¹ 'No wanei plo zhin go, ze' gunabdi'zh go plo nzho tu men wen laxto'; lizh xa' ze' biya'n go haxta or ya go xtu plo. ¹² No or zhin go lizh xa' re', guzh go, lē' Dios le' ya rē bixa' wen, xa' nzho ze'. ¹³ No chi niwi' go, ñal ka bixa' rē widi'zh kwa'n nzhab go par lē' bixa', orze' lē' widi'zh ze' ya'n par lē' bixa'. Per chi gat ñal bixa' widi'zh nazhon re', orze' lē'i yēk ska lo go. ¹⁴ No chi nzho bixa' gat nzhaklat ya go lizh bixa', o ni gat nzhakla bixa' gon bixa' widi'zh kwa'n lu' go lo bixa'; or ya go xtu plo, guzhib go ni' go par gab rē zhen yuo ze'. Kure' gak nela tu señ ga', lē' bixa' nzē'b xki lo Dios. ¹⁵ Walika kwa'n nin, zhē gab Dios xmod gak kun rē men yizhyuo, más zakzi bixa' lo rē men yezh Sodoma no lo rē men yezh Gomorra.

Rē men yi' ne men che'n Jesús

¹⁶ ¡Bivi' go! Lē'da xēl go nela mbēkxi'l ga', xid rē men xa' nak nela ma nazhe'b ga'; kuze' gok go natsin nela mbē'l ga', per gok go nado' nela palom ga'. ¹⁷ No bikina go go lo rē men, porke lē' rē men chi go lo gustis, mbaino lē' bixa' kin go le'n rē yo' plo nitse'd men widi'zh che'n Dios, ¹⁸ no haxta wei' bixa' go lo rē xa' nak gobiernador, mbaino lo rē rey, por nak go men da; nes par nu rē xa' ba' gon xti'zha, no haxta rē men xa' gat lē't men Israel gon xti'zha. ¹⁹ Per or chi bixa' go lo rē xa' nile' mandad, nale't go xigab xmod di'zh go, o kwan kab go lo bixa', porke or di'zh go, Dios ka ne' xigab ka' go par gak di'zh go lo bixa' lē'tsa kwa'n ñal, ²⁰ porke gat lē't go di'zh lo bixa'; lē' Sprit che'n Dios Xuz go, di'zh por go.

²¹ Rē men da mis wech xa', chi xa' par gat xa'; no mis xuz xa' chi xin xa', mbaino mis xin xa' chi xuz xa' no xna' xa', par gat bixa'.

²² 'No rē men yizhyuo yi' ne go por nak go men da. Per xa' naro't nez da dubta' nak xa' men da, xa' re' gap yalnaban dubta' kun Dios. ²³ Chi tu rē men yezh ru'kē tich go, bizē go xtu yezh; walika kwa'n nin, ni naga lox go kizē go rē yezh che'n men Israel, lē' Xga'n Dios, Me nak tu men yizhyuo, yubre la xtu wēt.

²⁴ 'Yent cho tu men más tsak lo xa' nitse'd xa', mbaino se'ska, yent cho tu mos nado más tsak xa' lo xa' nile' mandad xa'. ²⁵ Kuze', nab tsa naki'n gak xa' nitse'd nela nak maestr che'n xa' ga', no rē mos nado lo xtu men, nab tsa ñal gak xa' nela men xa' nile' mandad lo xa'. No chi nidi'zh men na Mizhab, xa' lē Beelzebú, orze' se'ska di'zh men go.

Cho lo ñal zheb rē men
(Lc. 12:2-9)

²⁶ 'Kuze' nazhebt go di'zh go rē kwa'n mbin go nin, porke yent tu kwa'n naga'ch midizha lo go nagon men; mbaino yent tu kwa'n xla'n milun lo go naded nagon men. ²⁷ Rē kwa'n midizha lo go or ye'l, zhē bidi'zh goi lo men; mbaino rē kwa'n midi'zha xla'n lo go, guruzhiē goi naye dizde yek yo' lo rē men. ²⁸ Nazhebt go lo xa' nzhut men, porke nab tsa kwerp nzhut bixa', per alm che'n go nagakt gal xa'. Más wen nab tsa lo Dios bizheb go, porke Dios gak gut go, mbaino gak xē'l Dios go le'n gabil par dubta'.

²⁹ 'Lē' go nane ka, dox che'p tsak rē miyin ye'n or nido bine', per Dios nazhi' bima; no ni tu bima gat nzhat chi gat lē' por Dios Xuz goi. ³⁰ Per go, más nazhi' Dios go, haxta rē yich yek go, nane Dios pla. ³¹ Kuze' nazhebt go, porke más tsak go lo rē miyin.

Xa' di'zh, nak xa' tu men che'n Jesukrist lo rē men

(Lc. 12:8-9)

³² 'Kuze', wanei cho tu xa' di'zh lo rē men, lē' xa' nak tu men da, nu ska da gap lo Xuza Me nzho lo yibē', xa' re' nak tu men da; ³³ per xa' gab lo rē men, gat nilibe't xa' da, se'ska gapa lo Xuza, Me nzho lo yibē', gat nilibe'tska xa' ba'.

Jesús nile', nilē' men

(Lc. 12:51-53; 14:26-27)

³⁴ 'Nagabt go nzhalá par len kwin men wen yizhyuo re'; na nzhal par len lē' men, tu xa' kun xtu xa': ³⁵ Na nzhal par lē' miyi' kun xuz miyi', no una' lē' kun xna' una', mbaino xix una' lē' kun xna'ye'. ³⁶ Kuze' mis kun rē xa' lizh men, gak xa' yi' ne men.

³⁷ 'Men xa' más le' por xuz o por xna' ke por da, nazu't xa' ze' par gak xa' men da; mbaino xa' más le' por xga'n o por xcha'p ke por da, nazu't ska xa' gak xa' men da. ³⁸ No xa' tula por nak xa' men da, no naziyēl xa' zakzi xa', mbaino ni gat xa', nazu't ska xa'

re' gak xa' tu men da. ³⁹ Mbaino xa' nile' más por kwa'n yizhyuo re', nagakt ban xa' re' kun Dios; per xa' más nile' por kwa'n nak che'n Dios ke por kwa'n yizhyuo re', xa' re' ban kun Dios par dubta'.

Kwan nzhal tu men or nile' xa' tu kwa'n wen

(Mr. 9:41)

⁴⁰ 'Rē men, xa' niwi' wen lo go por nak go men da, lon niwi' xa' wen; no xa' niwi' wen lon, nu ska lo Xuza niwi' xa' wen, Me mixē'l da lo yizhyuo re'. ⁴¹ No tu men, xa' za' lizh, ya'n tu xa' nidi'zh por Dios, Dios za' kwa'n ka' xa' nak lizh ze', nela kwa'n nika' xa' nidi'zh widi'zh che'n Dios. Mbaino se'ska men, xa' niza' lizh, par ya'n tu men xa' nile' kwa'n nzhakla Dios, se'ska kwa'n gal xa' nak lizh ze', nela kwa'n nika' men xa' nile' kwa'n nzhakla Dios. ⁴² No wanei cho tu xa' za' che'p nits nayag go tu men ye'n, xa' nak tu men da; walika kwa'n nin, por nits kwa'n miza' xa', lē' xa' gal tu kwa'n nazhon.

11

Jesús mbaino Juan xa' nili'lēi' men le'n nits

(Lc. 7:18-35)

¹ No or milox nzhab Jesús lo za dusen men che'n Me xmod le' bixa' zhi'n nazhon che'n Me, orze' nguro' Me ze' par nzhalu' Me widi'zh che'n Dios rē yezh kwa'n ña'n lazh men Galilea. ² No Juan xa' nililēi' men le'n nits, dub nzho xa' lizhyi'b, mbin xa' rē kwa'n nazhon nile' Jesús, Me nak Krist, kuze' mixē'l xa' pla men che'n xa', ³ par ngwana'bdi'zh bixa' lo Jesús, chi lē'ka Jesús nak Krist, o kwēz bixa' zhin xtu men. ⁴ Orze' nzhab Jesús:

—Wayab go lo Juan rē kwa'n une go no rē kwa'n mbin go; ⁵ guzh go, rē' xa' nikal lo, niwi'; no rē men nagakt zē, nizē; mbaino rē xa' nizak yalyizh kwa'n lē lepra, nzhakwen; no rē xa' sord, nixa'l nzha; mbaino rē men ngut, niruban; no rē xa' yent kwan nzhap, lē' bixa' nzhon widi'zh nazhon che'n Dios, no niro' bixa' lo rē kwa'n nzē'b xki bixa' lo Dios. ⁶ ¡Dox wen nzha rē xa' nayot la', yila da!

⁷ No or ña rē xa' mixē'l Juan, orze' nguzublo kidi'zh Jesús kwent che'n Juan lo rē men, nzhab Me:

—Or ngwa go le'n yuo bizh, ¿cho une go ba'? ¿Chi une go tu men xa' nile' chop xigab or nile' xa' tu kwa'n, nela tu yaxtil kwa'n nikwin mbi rē lad? ⁸ Chi nangane go tu xa' sa', ¿cho ska xa' une gox? o, ¿une go tu xa' nak lar wen? Per rē xa' nzhak lar wen, nab tsa lizh rē rey nine men rē xa' ba'. ⁹ ¿Per cho ka une gox? ¿Chi une go tu profet, xa' nidi'zh por Dios? Na ni walika, más tsak xa' une go ba' lo tu profet, xa' nidi'zh por Dios, ¹⁰ porke

kwent che'n Juan re' nize't ley che'n Dios, plo nzobni':

Biwi', antis di yi'dal,

galo laka tu xa' xëla par kuxkwa' nez dedal.

¹¹ Walika kwa'n nin lo go, xid rë men yizhyuo, rë profet xa' midizh por Dios, Juan más tsak lo bixa'; per xid rë men da, plo nile' Dios mandad, xa' más che'p tsak, más tsak xa' re' lo Juan.

¹² 'Dizde zhë nguzublo kidi'zh Juan widi'zh che'n Dios haxta nalzhë re', nab tsa men xa' nile' tutsa xigab gak le' gan yo plo nile' Dios mandad; nab tsa rë xa' nile' jwers yo, nak che'ne. ¹³ Rë profet xa' midizh por Dios, no rë kwa'n nzobni' lo ley, haxta zhë che'n Juan namás midiy. ¹⁴ Ter yila go kure' o nayilat goi, or midizh Dios por rë profet che'n Me, xë'l Me Li, mbaino Juan nak xa' mize't Me orze'. ¹⁵ Chi lë' go kiyon kwa'n kinin, bizobyek goi.

¹⁶ 'Per nal, çkun cho chë'lala rë men nal? Nak bixa' nela pla rë mbwin nizob le'n nez plo nzhak xbi' par niyit bimbwin; se' nidi'zh bimbwin lo zipla rë mbwin kwa'n nzhin ze': ¹⁷ "çchon nanet go kit go kun no? Mbi'l no bizhi, no nangolni't go; mbaino mikë' no kant nalats, per nango'nt go", ¹⁸ porke mbi'd Juan, xa' nizo xlats nayax wëlt, par nidi'zh xa' lo Dios, mbaino gat nzhot xa' vin; no nzhab go: "Mbi che'n Mizhab nzho laxto' xa'." ¹⁹ Per na nzhalo lo go, nzhaqowa mbaino nzho'n, no ne go lon: "çchon nzhao doxal, no nzhol vin? jNo nichë'lal kun rë men xa' nikan dimi che'n rey César, mbaino kun rë xa' gat nile't kwa'n nzobni' lo ley che'n Muisés!" Per kwa'n nilun mbaino kwa'n nilu' Juan, nilu' lë'tsa lë' kwa'n nidi'zh no, por rë men nzhone no naban xa' xmod nidi'zh no.

Rë yezh plo nzho rë xa' nangayilat Jesukrist

(Lc. 10:13-15)

²⁰ Orze' nguzublo kidi'zh Jesús por rë kwan'gat lë' nak rë men xa' nzho rë yezh plo mile' Me nayax kwa'n nazhon, per nangala't bixa' rë kwa'n gat lë' nak bixa' lo Dios, kuze' nzhab Jesús:

²¹ —jZhe'b nalats nzha go, men yezh Korazín, no men yezh Betsaida! Chi lo rë men yezh Tiro, no lo rë men yezh Sidón, ngalen rë nak kwa'n nazhon kwa'n milen xid go, orze' rë men ze' ngayila da mbaino ngala' bixa' rë kwa'n gat lë' nak bixa' lo Dios, no ngak bixa' lar nagats, mbaino ngazob bixa' le'n kubde, par lu' bixa', lë' bixa' nizi, nzë'b xki bixa' lo Dios. ²² Kuze', or gab Dios xmod gak kun kad men yizhyuo, más zakzi Dios men yezh Korazín no men yezh Betsaida ke rë men yezh Tiro no yezh Sidón. ²³ No rë go men yezh Capernaúm, çchi nile' go xigab bi go lo yibë' plo nzho Dios? Gat lë't sa'i. Na

ni, jlë' go bi le'n bëll, porke chi yezh Sodoma ngalen rë kwa'n nazhon kwa'n milen lo go, orze' se'gaka ngabin yezh ze' haxta nalzhë re'. ²⁴ Kuze' nin lo go, zhë kwa'n gab Dios xmod gak kun rë men yizhyuo, más zakzi Dios go, lo rë men yezh Sodoma.

Dë' go lon par xax go
(Lc. 10:21-22)

²⁵ Orze' nzhab Jesús lo Xuz Me Dios:

—Dios, xkix Go, Payë', Me nile' mandad yibë' no yizhyuo, porke ngulu'ka'ch Go kure' lo rë xa' nzhak, no lo men natsin; mbaino ngulu'xo'b Goi lo rë men nado', xa' nak nela tu më'd ga'. ²⁶ Walikai Xuza, porke sa' ngokla Go.

²⁷ 'Lë' Xuza mila' rë kwa'n ya'n, no yent cho nili'be' Xga'n Xuza, nab tsa Xuza nilibe'; no yent cho nilibe' Xuza, nab tsa Xga'n Me nilibe', kun rë xa' ngule Xga'n Xuza, par libe' bixa' Xuza. ²⁸ Dë' go lon, rë go xa' ngwazha naban lo rë kwa'n nizak go; na le xax go loi. ²⁹ No bitse'd go le' go kwa'n nin, no bitse'd go xmod nak da, porke na nak tu men nado' laxto', mbaino nizine laxto'n go, orze' lë' alm che'n go xax lo rë kwa'n nizak go, ³⁰ porke rë kwa'n nika'ba lo go, naxax laka le' goi; no rë kwa'n nilan di'zh lo go, gat nagant le' goi.

12

Mikan men che'n Jesús triu zhë kwa'n nayi' kë men Israel zhi'n

(Mr. 2:23-28; Lc. 6:1-5)

¹ Tu zhë kwa'n nayi' kë men Israel zhi'n, nzhadet Jesús kun rë men che'n Me plo ngo'n men triu. No mer orze' nila'n bixa', orze' nguzublo kikib bixa' do che'n triu no ndao bixa'i. ² Per or une pla men fariseo kure', orze' nzhab bixa' lo Jesús:

—Biwi', lë' rë men che'nal kile' kwa'n gat ñalt le' bixa', zhë kwa'n nayi' kë men Israel zhi'n.

³ Orze' nzhab Jesús:

—çChi nagat go'l go plo nzobni' kwa'n mile' Dabi, tu or mila'n xa' kun rë men che'n xa'? ⁴ Nguio xa' le'n yo' che'n Dios, no ndao bixa' pan kwa'n niza' men par gon che'n Dios, no pan re' gat ñalt gao bixa'i, no ni rë men che'n xa'; nab tsa rë ngulë'i ñal gawe. ⁵ O, çchi nagat go'l go kwa'n nzobni' lo ley kwa'n mila' Dios lo Muisés, xmod nile' rë ngulë'i le'n yado', zhë kwa'n nayi' kë men Israel zhi'n? Mbaino gat nile't bixa' diskans zhë ze', no gat nayi'te par lë' bixa'. ⁶ Per na ni lo go, re' nzo tu xa' más tsak lo yado'. ⁷ Per go nazobyekt go widi'zh kwa'n nzobni' re': "Gat nzhaklata ne'u go gon Da; kwa'n nzhaklan, lats laxto' go tsa' men go." Per chi ngazobyek go widi'zh re', orze' nangakë't go kixu' men yent kwan nak. ⁸ Lë' Xga'n Dios Me nu nak tu men yizhyuo, gak gab Me lo rë

men, kwan ñal le' men, zhë kwa'n nayi' kè rë men Israel zhi'n.

Tu miyi' xa' mibizhya'
(Mr. 3:1-6; Lc. 6:6-11)

⁹ Or mila' Jesús rë men ze', nguio Me le'n tu yo' plo nitse'd men Israel widi'zh che'n Dios. ¹⁰ No ze', nzob tu miyi' xa' mibizh tu ya', no pla men Israel xa' nzhin ze', kikwa'n bixa' mod par kè' bixa' kixu' Jesús, kuze' nzhab bixa' lo Me:

—¿Chi nzhab ley che'n Muisés, gak liyakal tu men zhë kwa'n nayi' kè rë men Israel zhi'n?

¹¹ Orze' nzhab Jesús:

—Cho tu men xid go kinu tu mbëkxi'l, no chi lè' ma la le'n tu zo, zhë kwa'n nayi' kè go zhi'n, ¿gat lè'o ko' ma orze', chi tlè' ma zake zhë ze'? ¹² ¿Chi nanet go, más tsak tu men lo tu ma? Kuze', gak ka le' men kwa'n wen, ter zhë kwa'n nayi' kè go zhi'n.

¹³ Orze' nzhab Me lo xa' mibizh ya' ze':

—Bitsiga' ya'l.

No or mitsiga' xa' ya' xa', tuli miake, ngoke nela nak ka xtu ya' xa'. ¹⁴ Per or nguro' rë men fariseo ze', orze' midizh rë bixa' xmod le' bixa' par gut bixa' Jesús.

Jesús nak Me ngule Dios, le' rë kwa'n nzhakla Dios

¹⁵ Per or ngwanu laxto' Jesús kwan kile' rë men fariseo ze' xigab, tuli nguro' Me ze', no dox men nzhakè tich Me, mbaino miliyak Me rë lo yalyizh kwa'n nizak rë men ze', ¹⁶ no nu mile' Me mandad lo rë men, naxo'bdi'zht bixa' kwa'n nile' Me, ¹⁷ nes par ngok widi'zh kwa'n midizh Isaiás, tu xa' midizh por Dios chi tiemp or nzhab xa':

¹⁸ Biwi' go, lè' mos da re', xa' kwa'n ngulen, no xa' nazhi' da;

nizak laxto'n por lè' xa';

lè' Sprit da zan ka' xa',

par lu' xa' lo rë men xmod ko' Dios rë lo men lo rë kwa'n gat lè'.

¹⁹ Nachè'ro't xa' kun men,

no ni nakuzhië xa' lo men, mbaino ni nagon men chi xa' le'n nez.

²⁰ Gat naya't xa' kun rë men xa' che'ptsa ñila Dios,

mbaino nakubchit xa' men, xa' pe'n nzo lo Dios,

lè'la más chi xa' men lo Dios,

²¹ no rë men xa' gat lè't men Israel yila widi'zh che'n xa' re'.

Nzhab rë men fariseo, lè' Jesús nigo' mbi mal por Mizhab

(Mr. 3:19-30; Lc. 11:14-23; 12:10)

²² No ngwanu bixa' tu miyi' lo Jesús, tu xa' nzen tu mbi mal; nikal lo xa' mbaino mud xa'; orze' miliyak Jesús miyi' re', ngwani lo xa' no midizh xa'. ²³ No rë nak xa' nzhin ze',

xe miwi' bixa' tuli, orze' kina'bdi'zh bixa' lo wech bixa':

—¿Chi gat lè't xa' re' Xga'n Dabi?

²⁴ Or mbin rë men fariseo kure', orze' nzhab bixa':

—Lè' xa' re' nigo' mbi mal laxto' men por mandad che'n Beelzebú, yub Mizhab kwa'n nile' mandad lo rë mbi mal.

²⁵ Per lè' Jesús nane la cho xigab kile' bixa', orze' nzhab Me:

—Rë gobier, chi gat nzhin bixa' wen kun rë men che'n xa', lè' bixa' lè'; se'ska rë men yezh, chi gat nzhin bixa' wen, lè' bixa' lè'; mbaino se'ska rë men kun rë xa' lizh xa'.

²⁶ Se'ska, chi dil yub Mizhab, kun rë mbi mal che'n xa', lè' bixa' bil. ²⁷ No chi na nigo' mbi mal laxto' men por Beelzebú, xa' nak yub Mizhab, orze', ¿chi nu rë men che'n go nigo' mbi mal laxto' men por Beelzebú? Kuze', por di'zh yix go, lo mis men che'n go ne kwan ñal go. ²⁸ Per chi na nigo' mbi mal laxto' rë men por Sprit che'n Dios; kure' nilu', lè' Dios midihin la lo go, par lat Me go ya' Mizhab.

²⁹ ¿Xmod le' tu men, yo xa' lizh tu miyi' xa' dox nzhak nidil, par liwa'n xa' rë kwa'n kinu miyi' re'? Naki'n galo laka li'bdo' xa' miyi', par gak lat xa' rë che'n miyi' re'.

³⁰ 'Kuze', xa' gat nzhaknu da, xa' ze' nidil kuda; mbaino xa' gat nidi'zh xti'zha lo men, par gak men, men da, xa' ze' nichubla men lon. ³¹ 'Kuze' nin lo go, gak zhe' rë kwa'n nzé'b xki men lo Dios, no rë widi'zh gat lè' kwa'n nidi'zh men lo Dios. Per tu men nidi'zh kwa'n gat lè' por Sprit che'n Dios, ya nayotra' zhe' kwa'n nzé'b xki men re'. ³² No cho tu xa' di'zh Da gat lè', Na, Me nak Xga'n Dios mbaino nak Da tu men yizhyuo, gak zhe' kwa'n nzé'b xki xa' re'; per xa' di'zh tu kwa'n gat lè' tich Sprit che'n Dios, nayotra' zhe' kwa'n nzé'b xki men re', ni lo yizhyuo re' mbaino ni lo yizhyuo kwa'n laore yo.

Nili'be' men ya por xlë kwa'n niza'i

(Lc. 6:43-45)

³³ 'Chi lè'o kinu tu ya wen, xlë wenska za'i; per chi kinu go tu ya yent kwan zu', xlë zu'tska za'i. Nakbe' ya por xlë kwa'n niza'i.

³⁴ ¡Rë go nak nela rë mbè'l' nayi' ga! ¿Xmod di'zh go kwa'n wen, lè' go men nakap? Rë widi'zh kwa'n gat lè' kwa'n nzho laxto' go, kuze' niro' ro' go. ³⁵ Men wen, kwa'n wen nidi'zh xa', porke kwa'n wen nzho laxto' xa'; no men nakap, kwa'n nakap ska nidi'zh xa', porke kwa'n nakap nzho laxto' xa'. ³⁶ No walika kwa'n nin re', zhë kwa'n gab Dios xmod gak kun kad men yizhyuo, rë widi'zh kwa'n gat lè' kwa'n midizh bixa' dub miban bixa' yizhyuo re', rëi na'b Dios kwent lo bixa'. ³⁷ Por rë widi'zh kwa'n niro' ro' go, ne Dios xa' nak go, chi men wen go, o men nakap go.

Kina'b rë men nakap, le' Jesús tu kwa'n nazhon

(Mr. 8:12; Lc. 11:29-32)

³⁸ Orze' pla rë men fariseo kun pla rë maestr xa' nilu' ley che'n Muisés, nzhab bixa' lo Jesús:

—Maestr, nzhakla no, ne no le'l tu kwa'n nazhon.

³⁹ Orze' nzhab Jesús lo bixa':

—Minu la go lo Dios, mbaino nak go lo Dios nela rë xa' nile' burr tsa' ga'; kuze' kina'b go ne go tu kwa'n nazhon, per nanet goi. Nabtsa kwa'n mile' Dios nguzak profet Jonás ne go. ⁴⁰ Nela nguio Jonás laxto' mbél, chon ngubizh no chon yë'l, se'ska yo Xga'n Dios, Me nu nak tu men yizhyuo, chon ska ngubizh no chon ska yë'l, yo Me plo más na'ch le'n yuo. ⁴¹ No rë men yezh Nínive, or gab Dios xmod gak kun kad men yizhyuo, lë' nu bixa' zo par gab bixa' lo Dios kwa'n nak go, par más zakzi Dios go; porke rë men yezh Nínive ze', mila' bixa' rë kwa'n gat lë' nak bixa' lo Dios or ngwadi'zh Jonás widi'zh che'n Dios lo bixa'; no biwi' go, na kidi'zh lo go, no más tsak da lo Jonás. ⁴² No tu una' xa' mile' mandad lazhe men Seba, or gab Dios xmod gak kun kad men yizhyuo, lë' nu una' zo kun rë men nal re', par gab una' rë kwa'n nak go par más zakzi Dios go; porke dox zit nguro' una' lazhe una' par ngwayon una' rë widi'zh kwa'n nzhak Salomón; no biwi' go, na kidi'zh lo go, no más tsak da lo Salomón.

Mbi che'n Mizhab kwa'n ñëk xtu wëlt laxto' men

(Lc. 11:24-26)

⁴³ 'No or niro' tu mbi mal laxto' tu men, orze' niki'zëi mont plo ni nits niyen, kikwa'ne plo kwëze, no or gat ñayazhële plo kwëze, ⁴⁴ orze' nile'i xigab: "Lë'da yëkska lizha plo nguro'n." No or yëk mbi mal ze' laxto' men re', nak laxto' xa' nela le'n tu yo', plo nalo'b nambe ga', mbaino rë kwa'n le'ne nzhin chul, ⁴⁵ orze' ya mbi ze', yaka'i xtu gash mbi más nakap, par yo rëi laxto' men re'; orze' lë' men re' gak más nakap, ke lë'la xmod nak xa' galo. No se'ska zak rë men nakap, xa' nzhin lo yizhyuo nal re'.

Xna' Jesús kun rë wech Me

(Mr. 3:31-35; Lc. 8:19-21)

⁴⁶ Dub kidi'zh Jesús kure' lo rë men, lë'chi mizhin xna' Jesús kun rë wech Me, nzhin bixa' tich, nzhakla bixa' di'zh bixa' kun lë' Me. ⁴⁷ Orze' ngwayab tu men lo Jesús:

—Lë' xna' go no rë wech go nzo al tich, nzhakla bixa' di'zh bixa' kun go.

⁴⁸ Orze' nzhab Jesús lo xa' ze':

—¿Cho xna'n, no cho rë wecha?

⁴⁹ Orze' milu' Me rë men che' Me, xa' nizikë tich Me, no nzhab Me:

—Biwi' go, rë men re' nak xna'n no rë wecha, ⁵⁰ porke xa' nile' kwa'n nzhakla

Xuza, xa' ze' wecha, no bizana, mbaino xna'n.

13

Milu' Jesús kwan nzhak or nza'n men

(Mr. 4:1-9; Lc. 8:4-8)

¹ No zhë ze' nguro' Jesús le'n yo' ze' par ngwa Me ro' lagún; ze' nguzob Me. ² Por dox nayax men migan ze', nkë Jesús le'n tu bark, nguzob Me le'ne, no lë' rë men nzhin ro' nits. ³ Orze' midizh Me nayax kwa'n lo rë men ze' kun pura kwent, nzhab Me:

—Bingole, tu wëlt nza tu men, nzhaya'n lazhe triu lo yuo. ⁴ No or ngwache'ch xa'i, pla lazhe ngob le'n nez, ndao miyine. ⁵ No más lazhe ngob lo yuo ke; lwega' ngulëne, per niyent be's yuo ze'. ⁶ Or ngulen ngubizh, no or mina ngubizh nayi', mike'x ngubizhe por niyen luche; mibizhe. ⁷ No ziplai ngob le'n ya yich, per or miro'b ya yich, ngala't ya yich ngabane, orze' ngute. ⁸ Per ziplai ngob lo yuo wen, miro'be, no dox miza'i. Tu lazhe miza' tu gayo'i, xtu lazhe miza' chon gale, mbaino xtu lazhe miza' gal bichi'y. ⁹ ¡Chi lë' go mbine, bizobyekek go!

¿Kwan gab rë kwent re'?

(Mr. 4:10-12; Lc. 8:9-10)

¹⁰ Orze' nguzubi rë men che'n Me lo Me par nzhab bixa':

—¿Chon nidi'zh go kun pura kwent tsa lo rë men?

¹¹ Orze' nzhab Jesús lo rë men che'n Me:

—Nabtsa go mila' Dios, ne go kwa'n naga'ch kwa'n kinu Dios plo nile' Dios mandad; per rë xa' ba', nangala't Dios ngane bixa'i, ¹² porke rë xa' kwa'n nzhakla zobyeke, mbaino le' rë kwa'n nidizha, rë xa' re' xa' nzhaknu Dios par más zobyekek bixa'i; per rë xa' gat nzhaklat be's zobyekek kwa'n nidizha, haxta che'p tsa kwa'n nile' xa' xigab ya nane la xa', per lë'i yubchi lo xa'. ¹³ Kuze' midizha lo rë xa' ba' kun pura kwent tsa, par une bixa'i per nanganet bixa' kwane; mbaino par mbin bixa'i, per nangazobyekek bixa'i. ¹⁴ Kuze', par yek rë xa' ba' nza widi'zh kwa'n mizobni' Isaiás kwa'n nzhab se':

Ter más gon bixa'i, per nazobyekek bixa'i, no ter más ne bixa'i, per nanet bixa' kwane, ¹⁵ porke dox nad laxto' rë men re'.

No gat nzhont nza bixa'i;

no nak bixa' nela tu men nikal lo ga'.

No chi nangak bixa' sa', lë' bixa' nganei kun zalo bixa',

no ngon bixa'i kun nza bixa',

no ngazobyekek bixa'i dub la bixa',

orze' ngala' bixa' rë kwa'n gat lë' nak bixa',

par ngago' Dios bixa' lo rë kwa'n nazhe'b.

¹⁶ Per go, wen nza go por une goi, no wen nza go por mbin goi. ¹⁷ Walika kwa'n nin lo go, nayax xa' midizh por

Dios, mbaino nayax men, xa' mile' rë kwa'n nzhakla Dios, ngokla bixa' ngane bixa' rë kwa'n kine go, per nanganet bixa'i; mbaino ngokla bixa' ngon bixa' rë kwa'n kiyon go, per nangont bixa'i.

Nzhab Jesús kwan gab kwent che'n yalgo'n

(Mr. 4:13-20; Lc. 8:11-15)

¹⁸ Bin go xmod nak kwent che'n nzha'n men lazh triu ze'. ¹⁹ Or nzhon tu men widi'zh che'n Dios no gat nizobyekt xa'i, orze' laxto' men re' nak nela yuo le'n nez ze', porke or nzhon xa'i, gat fiat laxto' xa', kuze' nizhin Mizhab, nigo' Mizhab kwa'n mixë'n Dios laxto' xa'. ²⁰ No lazh kwa'n ngob lo yuo ke ze', nak rë men mbin widi'zh che'n Dios, no or mbin xa'i, nizak laxto' xa', ²¹ per yent be's luche, che'ptsax midiy. Se' nak rë men, or nizak xa' tu kwa'n nalats, o niyi' men nine xa' por nak xa' men che'n Dios; orze' por kure' tuli nila' xa' Dios. ²² No lazh kwa'n ngob le'n ya yich ze', nak rë men ngwayila widi'zh che'n Dios, per por dox nile' xa' xigab por rë kwa'n naki'n xa' yizhyuo re', mbaino por niwix xa' gap xa' dimi, kuze' ña'l laxto' xa' Dios; nak xa' nela tu ya kwa'n gat niza't xlë ga'. ²³ Per lazh kwa'n ngob lo yuo wen ze', nak rë xa' nzhon widi'zh che'n Dios, no nizobyek xa'i, orze' nile' xa' rë kwa'n nzhakla Dios; nak xa' nela tu yalgo'n kwa'n dox miza', nela tu do che'n triu ga' kwa'n miza' tu gayo' lazhe, no xtube miza' zichon gale, mbaino xtube miza' zikal bichi'y.

Kwent che'n triu mbaino yix kwa'n ngulen le'ne

²⁴ No midiy Jesús xtu kwent lo rë men ze', nzhab Me:

—Nu plo nile' Dios mandad nak nela tu miyi' kwa'n ngo'n lazh triu wen lo yuo che'n, ²⁵ no lë' rë men che'n xa' nax, lë'chi mizhin tu xa' nidil xa', par ngwaxë'n xa' yix kwa'n lë cizaña, xid rë triu ze', orze' ña xa'. ²⁶ No or miro'b triu, no miza'i do; orze' nu yix ze' nguluxo'b, ²⁷ orze' ngwayab rë mos lo xa' nak che'n triu ze': "Lë'o, ¿chi gat lë't nab tsa lazh triu mixë'n go? No nal, ¿plo nguro' yix kwa'n nzhi'b le'ne re'?" ²⁸ Orze' nzhab xa' nak che'ne: "Tu xa' niyi' nine da mixë'n kure'." No nzhab rë mos ze': "¿Chi nzhakla go yaki'b no yix kwa'n nazu't ba'?" ²⁹ Per nzhab xa': "Naki'bta' goi nal, napa' nu triu ki'b go. ³⁰ Más wen bila' go ro'be tutsa haxta or yats yalgo'n; orze' xëla go par kan go galo laka yix kwa'n nazu't ba', orze' li'b goi, le' go manojë par yëke; orze'se kan go triu no kichao' goi plo niguchao' go rë kwa'n."

Kwent che'n lazh mostas

(Mr. 4:30-32; Lc. 13:18-19)

³¹ No midiy Jesús xtu kwent lo rë men, nzhab Me:

—No nu plo nile' Dios mandad nak nela tu lazh win mostas kwa'n mixë'n tu xa' le'n yuo che'n. ³² Ter más win lazh mostas, lo rë lazh ya kwa'n nixë'n men, per or niro'be, lë'i más nzhak kwa'ro, lo rë ya kwa'n nzhi'b tutsa kun lë'i, no lo rë rram che'ne, ñü'd rë miyin, nixo'b yo che'n.

Kwent che'n levadur

(Lc. 13:20-21)

³³ No midiy Jesús xtu kwent, nzhab Me: —No se'ska nak plo nile' Dios mandad; nake nela levadur kwa'n nguzen tu una' par migoch una'i, le'n tu béd harin, par zubeche.

¿Chon nilu' Jesús widi'zh che'n Dios kun nab tsa kwent lo rë men?

(Mr. 4:33-34)

³⁴ Midiy Jesús rë nak kure' lo rë men kun nab tsa kwent; yent kwan ngadi'zh Me lo bixa' chi gat lë' kun kwente, ³⁵ par ngok rë kwa'n midiy tu xa' midiy por Dios or nzhab xa':

Kun pura kwent tsa dizha lo rë men,

Rë kwa'n naga'ch che'n Dios kwa'n kinu Me or ni naga ko Me yizhyuo.

Jesús nzhab kwan gab yix kwa'n nazu't, nzhi'b xid triu

³⁶ Or ngulunez Jesús rë men ze', nguio Me le'n yo', orze' nguzubi rë men che'n Me lo Me, par mina'bdi'zh bixa', kwan gab kwent che'n yix kwa'n nazu't ze'. ³⁷ Orze' nzhab Jesús:

—Xa' mixë'n lazh triu kwa'n wen ze' nak Xga'n Dios Me nu nak tu men yizhyuo, ³⁸ mbaino lë' yuo che'n Me nak rë men yizhyuo re'. Lazh triu wen ze' nak rë men che'n Dios, no lë' yix kwa'n nazu't ze' nak rë men che'n Mizhab. ³⁹ Lë' men kwan ngwaxë'n yix nazu't ze' nak Mizhab, mbaino lë' yalgo'n nak or gab Dios xmod gak kun kad men yizhyuo, mbaino rë xa' kan yalgo'n nak rë ganj che'n Dios. ⁴⁰ Nela nigan yix kwa'n nazu't par yëke, se'ta' gak kun rë xa' chigab walika men che'n Dios. ⁴¹ Na, Xga'n Dios, mbaino nak Da tu men yizhyuo, xëla rë ganj da, par ko' bixa' xid rë men da, rë men kwa'n nile' nzhap xtu men dol lo Dios, mbaino rë xa' naban ngokla ngwa xid rë men che'n Dios. ⁴² Rë men re' ko' rë ganj da par bi bixa' le'n bël che'n gabil, plo go'n bixa' no kwezh lëi bixa' por dox yalne. ⁴³ Orze'se rë men xa' nile' kwa'n nzhakla Dios, gak bixa' nela biani che'n ngubizh plo nile' Xuz bixa' Dios mandad. ¿chi lë' go mbin kure', bizobyek goi!

Kwent che'n kwa'n wen dox

⁴⁴ Plo nile' Dios mandad nak nela tu kwa'n dox tsak, nzhuka'che le'n yuo, no or ngwazhël tu miyi'y, nguluka'ch ska xa'i. Por dox nizak laxto' xa', miëk xa' lizh xa',

ngwato xa' rë kwa'n kinu xa' par nguzi' xa' dub yuo ze'.

Kwent che'n tu ke chul kwa'n dox tsak

⁴⁵ No nzhab Jesús:

—Nu plo nile' Dios mandad nak nela tu xa' nito no nizi', kikwa'n xa' ke chul. ⁴⁶ No or ngwachib xa' lo ke chul kwa'n dox tsak, orze' miëk xa' lizh xa', mito xa' rë nak kwa'n kinu xa' par nguzi' xa' ke tsak re'.

Kwent che'n yex kwa'n nizen mbël

⁴⁷ No nela tu yex kwa'n nizen rë lo mbël, se'ta' nak plo nile' Dios mandad. ⁴⁸ Or ñazhëi di mbël, nigo' mene ro' nits par nibe bixa' ma wen tsa, niguchao' bixa'. No lë' rë ma nazu', nigubi bixa'. ⁴⁹ Sa'ta' le' Dios kun rë men or gab Dios xmod gak kun kad men yizhyuo. Xë'l Me rë ganj che'n Me par kutin rë men nakap xid rë men wen, ⁵⁰ par bi rë men nakap ze' le'n bël che'n gabil. Ze' go'n bixa', haxta kwezh lëi bixa' por dox yalne.

Xid kwa'n wen nguro' kwa'n kub no kwa'n go'x

⁵¹ Orze' nzhab Jesús lo rë men che'n Me:

—¿Chi mizobyek go rë kwa'n midizha lo go re'?

Nkab bixa':

—Lë'i mizobyek ka no.

⁵² Orze' nzhab Jesús lo bixa':

—Wenkai. Chi tu xa' nane ley kwa'n mila' Dios lo Muisés, mbaino nizobyek xa' rë kwa'n nilun, xa' re' nak nela tu xa' nak lizh tu yo' ga'; xid rë kwa'n kinuchao' xa', nane xa' xmod le' xa' kun kwa'n kub mbaino kun kwa'n go'x.

Miëk Jesús yezh Nazaret plo miro'b Me

(Mr. 6:1-6; Lc. 4:16-30)

⁵³ Or milox midizh Jesús kure', nguro' Me ze'. ⁵⁴ Or mizhin Me yezh Nazaret plo nak lazh Me, tuli ka nguzublo Me milu' Me widizh che'n Dios lo rë men nzhin le'n yo' plo nitse'd bixa' widizh che'n Dios. Xe mia'n bixa' tuli por kwa'n milu' Jesús, orze' nzhab bixa':

—¿Plo mitse'd xa' re' kwa'n nzhak xa', no rë kwa'n nazhon kwa'n nile' xa'? ⁵⁵ ¿Chi gat lë't xa' re' xga'n xa' nichao' mes, no Mari lë xna' xa', no gat rë wech xa' lë Jakob, Che, Simón, no Judas? ⁵⁶ ¿No chi gat lë't rë bizan xa' nzo kun be re'? ¿Plo ska mitse'd xa' re' rë kwa'n nzhak xa'?

⁵⁷ No por nak bixa' sa', kuze' nangayilat bixa' widizh che'n Dios kwa'n milu' Jesús, per nzhab Jesús lo bixa':

—Rë plo, lë' men ñila ka tu xa' nidi'zh por Dios; per mis rë men lazh xa' no rë men lizh xa', nayilat kwa'n nidi'zh xa'.

⁵⁸ No por nangayila rë men ze'i, kuze' nangale't Jesús nayax kwa'n nazhon ze'.

14

Ngut Juan xa' nililë'i men le'n nits

(Mr. 6:14-29; Lc. 9:7-9)

¹ Le'n rë ngubizh ze' nak Herodes gobiernador lazh rë men Galilea, no mbin xa' rë kwa'n nzhudi'zh men por Jesús, ² kuze' nzhab Herodes lo rë men xa' nile' mandad che'n xa':

—Lë'la Juan xa' nililë'i men le'n nits nguruban, kuze' nile' xa' re' rë kwa'n nazhon ba'.

³ Porke lë' Herodes mile' mandad, ngwaga' Juan, mili'b xa' Juan kun kaden, orze' ngulo xa' Juan lizhyi'b por Herodias, una' che'n Lip wech xa', ⁴ por nzhab Juan lo Herodes: “Gat went ka'l una' che'n wechal.”

⁵ Orze' ngokla Herodes ngut xa' Juan, per nangale't xa'i por nizheb xa' lo rë men, porke lë' rë men nane, lë' Juan nidi'zh por Dios. ⁶ Per or ngol lani che'n Herodes, nguio xcha'p Herodias, mbilni' xid bixa', orze' nguio laxto' Herodes kun rë xa' kwa'n nzob lo mes kun lë' xa', xmod mbilni' una'.

⁷ Mize't xa' Dios or nzhab xa' lo una', lë' xa' za' wane'i kwan na'b una' lo xa'. ⁸ Per lë' xna' una' miki'l la una', kuze' nzhab una' lo Herodes: “Nzhaklan yi'dnu go yek Juan, le'n tu plat.” ⁹ No or mbin Herodes kure', miwin laxto' xa', per por lë' xa' mia'n la tutsa dilant lo rë men nzob kun lë' xa', lë' xa' za' wane'i kwan na'b una', kuze' nguziyël xa' za' xa' kwa'n nguna'b una', ¹⁰ orze' mile' xa' mandad, miro'g yek Juan le'n lizhyi'b, ¹¹ no ñadnu bixa' yek Juan, nzhoi le'n tu chë', par miza' bixa'i ka' una', orze' lë' una' miza'i ka' xna'. ¹² Orze' mizhin rë men che'n Juan par ngwats Juan, mbi'y xa' Juan par miga'ch xa', orze' ngwayab bixa'i lo Jesús.

Jesús miza' kwa'n ndao gai' mil miyi'

(Mr. 6:30-44; Lc. 9:10-17; Jn. 6:1-14)

¹³ Or mbin Jesús lë' Juan ngut, orze' nguro' Jesús ze' kun dub tu dusen men che'n Me, nkë Me le'n tu bark, nzha Me tu plo yent men. Per lë' rë men, or mbin bixa' plo nzha Me, rë yezh nguro' men, nzhakë bixa' ni' bixa', tich Jesús. ¹⁴ Or ngula Jesús bark, une Me, lë' tu béd men nzhin la ze', orze' milats laxto' Me men, miliyak Me rë men nzhakne xa' nzho xid rë men ze'. ¹⁵ Per or nzhalala ya'yë'l, nguzubi rë men che'n Me lo Me nzhab bixa':

—Ya cho gor la nal, no yent kwa'n nak dan re'. Guzh go lo rë men, bi bixa', yazi' bixa' kwa'n gao bixa' rë yezh win kwa'n nzhin naka'n re'.

¹⁶ Per nzhab Jesús:

—Gat naki'nt bi bixa'; iyub go biza' kwa'n gao bixa'!

¹⁷ Orze' nkab rë men che'n Me:

—Gat kinut no nayax kwa'n gao rë xa' re', nab tsa gai' pan kun chop mbël orze' no.

18 Orze' nzhab Jesús:

—Dinu goi re'.

19 Orze' mile' Me mandad, nguzob rè men ze' lo gozh, nguzen Me za gai' pan ze' kun rop mbèl ze', miwi' Me lo yibè', miza' Me xkix lo Dios. Orze' michi'x Mei, no miza' Mei ka' rè men che'n Me; par lè' bixa' ki'ze gao rè men. 20 No rè men ze' ndao haxta plo nguzhè bixa'. No mikan bixa' rè bilao kwa'n mia'n sobr; michizhè bixa' tu dusen kardor. 21 Rè xa' ndao re', nab tsa xa' miyi', paste gai' mil bixa', no ngalabt bixa' rè una' no rè mè'd.

Jesús nguzè lo nits

(Mr: 6:45-52; Jn: 6:16-21)

22 Or milox ngok rè kure', tuli mile' Me mandad, nkili rè men che'n Me le'n bark par kubner ga' bixa' xtu ro' nits plo lè Betsaida; mbaino lè' Jesús mia'n par une Me xnod ña rè men. 23 Or milox mire'chbe rè men ze', nkili Jesús yek yi' par nguna'b Me lo Dios. Nab Me nzo ze' or ngula la yè'l. 24 No dox la zit ñazè bark di plo mia'n Me, une Me labai-larei kikwin mbi bark por nzha bixa' nez nzè mbi. 25 No paste las tres garzi'l, nzhazè Jesús lo nits nez nzè bixa'. 26 Or une bixa' ñè'dzè Me lo nits, nguruzhiè bixa': "iTu komale!", por dox mizheb bixa'. 27 Tuli midizh Me, nzhab Me:

—iNazhebt go! iKa nail!

28 Orze' nzhab Per lo Me:

—iLè' go!, chi walika go kuba', gurezh go da yala lo go.

29 Orze' nzhab Me:

—iDè'x!

Tuli nguro' Per le'n bark, nguzublo nzhazè xa' nali laka lo Jesús, 30 per or une Per, dox naye nzo mbi, mizheb xa', no or nguzublo nzhaya'zyuo xa' le'n nits, orze' nguruzhiè xa', nzhab xa':

—iLè'ol, inala't go gat da!

31 Tuli nguzen Jesús ya' Per, nzhab Jesús:

—iChon tatu lo ya ñayil da?

32 No or unkè Me le'n bark kun Per, xega ngulèz mbi, 33 orze' nguzuxib rè men che'n Me lo Me, nzhab bixa':

—iWalika go nak Xga'n Dios!

Miliyak Jesús rè xa' nzhakne yezh Genesaret

(Mr: 6:53-56)

34 Or milox nded bixa' le'n nits ze', mizhin bixa' lazh men Genesaret. 35 Or mili'be' rè men yezh ze' Jesús, mixo'bdizh bixa', lè' Jesús mizhin ze', lo rè yezh kwa'n nzhin naka'n ze'. Orze' ngwanu men rè xa' nzhakne lo Jesús, 36 no dox nguna'b bixa' ziyèl Jesús, namás gal bixa' xi' xab Me, no rè xa' migale, miak bixa'.

15

¿Kwan nile', ña'n gat nambe men lo Dios?

(Mr: 7:1-23)

1 Yezh Jerusalén nzè pla men fariseo, kun pla men, xa' nilu' ley che'n Muisés; nguzubi bixa' lo Jesús, nzhab bixa':

2—iChon gat nize't rè men che'nal ya' bixa' or nzhao bixa'; gat nile't bixa' rè kostumbr kwa'n mila' rè men che'n be, xa' tiemp?

3 Orze' nkab Jesús:

—Nu ska go, iChon gat nile' go kwa'n nzobni' lo Yech che'n Dios, lè'la rè kostumbr che'n men tiemp nile' go?, 4 porke se' nzobni' lo Yech che'n Dios: "Gop kwent xuzal mbaino xna'l", mbaino: "Men ke xuz o xna', gat xa' re' tuli." 5 Per go nzhab: "Lè' men gat ka gab lo xuz o lo xna': Nagakt gaknun go; lè' rè kwa'n kinun, lè'i mizala par Dios", 6 namás par nile' go, gat naki'ntra' gaknu men xuz men o xna' men. Wen go par nile' go, natsaktra' kwa'n mile' Dios mandad. Más nile' go por rè kwa'n michao'yek rè men tiemp. 7 iTatu nazheb nak go, chigab walika men wen go! Kuze' ka, por go mizobni' Isaías widizh re' lo yech:

8 Rè men re'; ka lo ya nidi'zh bixa', nazhi' xa' da,

per le'n laxto' bixa', yent kwan nize'n bixa' por Da.

9 Yent kwan zu' nidi'zh bixa' nazhon Da, mbaino rè kwa'n nilu' bixa' lo men, pura kwa'n nichao'yek mene.

10 Orze' ngurezh Me rè men lo Me, nzhab Me:

—Bin go kure' no bizobyek goi: 11 Gat lè't por kwa'n nzhao men nile' ña'n gat nambe men lo Dios; por widizh kwa'n niro' ro' men, nile' ña'n gat nambe men lo Dios.

12 Orze' nguzubi rè men che'n Jesús lo Jesús, nzhab bixa':

—iChi une go, lè' rè men fariseo miyi' or mbin bixa' rè kwa'n midizh go?

13 Orze' nzhab Jesús:

—Rè ya kwa'n nangaxè'nt Xuza, Me nzho lo yibè', lè'i yi'b dub luche. 14 Nachè'lt go kun rè men ba'. Ter nak bixa' nela men nikal lo ga', per zak bixa' lè' bixa' lu' nez lo rè xa' nakao nak yek lo rè che'n Dios, per gakt lu' tu men nikal lo nez lo xtu xa' nikal lo, porke lè' rop bixa' yachin le'n tu ye'r.

15 Orze' nzhab Per:

—Bineo lo no kwan gab widizh ba'.

16 Orze' nzhab Jesús:

—iTaxa nu go, gat nizobyekt kure'? 17 iChi nanet go, kwa'n nzhao met nibi laxto' met, orze' niro' i or ña met bi'x? 18 Per rè widizh gat lè' kwa'n niro' ro' men, le'n laxto' men nzè; kure'se nile' ña'n gat nambe men lo Dios, 19 porke dizde le'n laxto' men nzè rè xigab gat lè' re': Rè kwa'n nzhut men men; no rè kwan' ban men kun tsa' xtu men o

kun xa' gat lè' tsa' men; mbaino rë kwa'n niliwa'n men; no rë kwa'n nile' niké' men kixu' men; mbaino rë kwa'n niye men Dios. ²⁰ Rë kure' nile', ña'n gat namba men lo Dios, no gat lè't por gao men dub be'd ya' mene.

Tu una' cananea dox ñila Dios
(Mr. 7:24-30)

²¹ Or nguro' Jesús ze', nzha Me al nez plo nzhin yezh Tiro no yezh Sidón. ²² Ze' nzho tu una' ben rë xa' cananea; or une una' Jesús, tuli nguzubi una' no nguruzhié una', nzhab una':

—¡Lè'o Xga'n Dabi, bilats laxto'u da! ¡Lè' tu mbi mal nzen xcha'pa, dox kizakziy una'!

²³ Per nangakabt Jesús lo una', orze' nguzubi rë men che'n Jesús lo Jesús par mina'b bixa' lo Me, nzhab bixa':

—Bichubla go una' ba', lè' una' nzadké tich be, nibizhyé una'.

²⁴ Orze' nzhab Jesús lo una' ze':
—Per Dios mixè'l da nab tsa par gaknun rë men Israel, xa' nak nela rë mbèkxi'l ma nguziwan dan ga'.

²⁵ Per nguzuxib una' re' lo Jesús, no nzhab una':

—¡Lè'o, kina'ba lo go, gaknu go da!

²⁶ Orze' nzhab Jesús:

—Gat ñalt kwe men yët lo xmè'd men, par za' xa'i gao mbèk.

²⁷ Per nkab una':

—Walika goi; per nu ka mbèk nikan rë biyo ye'n kwa'n nzhab xan mes, che'n xa' nak che'n ma.

²⁸ Orze' nzhab Jesús:

—¡Ay una'yo, luse dox ñilal da! Kwa'n una'bal ba', lè'i gak.

No mis orze', miak xcha'p una'.

Miliyak Jesús nayax men nzhakne

²⁹ Or nguro' Jesús ze', mizhin Me nez ro' lagún che'n men Galilea, orze' nké Me yek tu lom, ze' nguzob Me. ³⁰ No ze' migan dox nayax men lo Jesús. Xid rë men ze' nzho rë xa' nzhanu men nzhakne, xa' nagakt zë, xa' nikal lo, mbaino xa' nagakt di'zh, xa' ma'nk, no más rë men nzhakne; rë xa' re' mizhinu men lo Jesús, no rë bixa' miliyak Jesús. ³¹ Xe mia'n rë men tuli or une bixa' men nagakt di'zh, nzhud'i'zh; no men ma'nk uniwen; men nagakt zë, nizé; no men nikal lo, miwi'. Orze' nzhab rë men, dox nazhon Dios che'n rë men Israel.

Miza' Jesús kwa'n ndao tap mil miyi'
(Mr. 8:1-10)

³² Orze' ngurezh Jesús rë men che'n Me, nzhab Me:

—Nilats laxto'n rë men re', re' yon ngubizh nzhin bixa' lon, no gat kinut bixa' kwa'n gao bixa'. Gat nzhaklata bi bixa' xlat bixa', nzha ska yazha bixa' nez.

³³ Orze' nzhab rë men che'n Jesús:

—¿Per plo yaka' be kwa'n gao rë nak men re'? No plo nzhin be re', yent lizh mene.

³⁴ Orze' mina'bdi'zh Jesús lo bixa':

—¿Pla pan kinu go?

—Gazhtsai, no pla mbèl win —nkab bixa'.

³⁵ Or mile' Me mandad, nguzob rë men ze' lo yuo, ³⁶ nguzen Me za gazh pan ze' kun pla mbèl ze'. Or milox miza' Me xkix lo Dios por lè'i, michix Mei no miza' Mei, ka' rë men che'n Me, par ndi'z bixa'i gao rë men ze'. ³⁷ Rë men ndao haxta plo ngwazhè bixa', no or milox ndao bixa', mikan ra' bixa' zigazh kardor rë bilao kwa'n mila' bixa'. ³⁸ Rë xa' ndao ze', nab tsa xa' miyi', paste tap mil bixa', no ngalabt bixa' rë una' no ni rë mè'd. ³⁹ Orze' ngulunez Jesús rë men, no lè' Me nké le'n tu bark par nzha Me rë yezh kwa'n nzhin lazh men Magdala.

16

Mina'b pla men fariseo no pla men saduceo, le' Jesús tu kwa'n nazhon
(Mr. 8:11-13; Lc. 12:54-56)

¹ Nguzubi pla rë men fariseo kun zipla men saduceo lo Jesús, nzhakla bixa' zenbe' bixa' Me (wi' bixa' xmod nak Me), nabei chi walika Dios mixè'l Me; kuze' nzhakla bixa', lu' Jesús tu kwa'n nazhon le' Dios, ² orze' nzhab Jesús lo bixa':

—Or mizhèlyuo, chi naxne nilu' lo yibè', nzhab go: “Biwi', gat lè't kwa'n la yiu yé', lè' lo yibè' nilu' naxne”; ³ no or garzi'lnzhab go: “Biwi', nadedt lè' yiu la, dox nazhon nilu' xkao lo yibè'.” No chi nilibe' go rë señ kwa'n ño lo yibè', ¿chon nalibe'o rë kwa'n nazhon kile' Dios rë zhè re'? ⁴ Men nakap go, gat nile't go kwa'n nzhakla Dios, mbaino nal nzhakla go, ne go tu kwa'n nazhon le' Dios. Per nanet goi; nab tsa kwa'n nazhon kwa'n mile' Dios kun Jonás, ne go.

Orze' mila' Jesús rë men ze', nzha Me xtu plo.

Levadur che'n men fariseo
(Mr. 8:14-21)

⁵ Or nded Jesús kun rë men che'n Me xtu ro' lagún, no mia'l laxto' bixa' ngwei' bixa' kwa'n gao bixa', ⁶ orze' nzhab Me lo bixa':

—Ne go, nazen go levadur che'n rë men fariseo, no che'n rë men saduceo.

⁷ Orze' nzhab bixa' lo wech bixa':

—Ne xa' kuba' lo be, pas por nangayi'dnu be kwa'n gao bei.

⁸ Per nane la Jesús cho xigab kile' bixa', kuze' nzhab Me:

—¿Chon dox kile' go xigab por gat nzadnut go kwa'n gao be? ¡Dox wè' ñila go da! ⁹ ¿Chi gat zobyek go kwa'n nin ba'?, no, ¿chi mia'l la laxto' go kwan ngok kun gai' tsa pan no ngole ndao gai' mil men, mbaino zipla kardore mia'n sobr? ¹⁰ No, ¿chi nu mia'l laxto' go kwan ngok kun gazh tsa pan, no tap mil

men ndaowe, no pla kardore mia'n sobr?
 11 ¿Chon nanganut laxto' go kwa'n midizha lo go, gat lè't pan midizha? Kwa'n nin lo go, ne go nayè'de go rè kwa'n nak rè men fariseo no men saduceo; lè' bixa' nak nela levadur kwa'n nitsibech kwa'n ga'.

12 Orze' mizobyek bixa', gat lè't levadur che'n pan midì'zh Jesús; kwa'n midì'zh Me nak rè kwa'n nilu' rè men fariseo kun men saduceo lo más rè men.

*Nzhab Per, lè' Jesús nak Krist
 (Mr. 8:27-30; Lc. 9:18-21)*

13 Or mizhin Jesús kun rè men che'n Me yezh Cesarea plo nile' Lip wech Herodes mandad, orze' mina'bdi'zh Jesús lo rè men che'n Jesús, nzhab Me:

—¿Cho da nzhab men?

14 Orze' nzhab rè men che'n Me:

—Nzho men nidi'zh, go Juan xa' mili'lèi' men le'n nits; más bixa' nzhab, go Li; no xtu ben men nidi'zh go Jeremías, o xtu rè xa' midì'zh por Dios nzhal.

15 Orze' nzhab Jesús:

—Go ga', ¿cho da nile' go xigab?

16 Tuli mikab Simón Per, nzhab xa':

—Go Krist, Xga'n Dios, Me kinu yalnaban par dubta'.

17 Orze' nzhab Jesús:

—Wen nzhal, Simón xga'n Jonás; gat lè't men milu'i lol, lè' Xuza Me nzho lo yibè' milu'i lol. 18 Na ni, lèl rulè' Per (kwa'n gab ke ro), mbaino lo ke re' chaqwa yado' da xa' nak rè men da, no per ni Mizhab nale't gan chil yado' re'. 19 No lu zo lo rè men da: Rè kwa'n nzhaklal gak lo yizhyuo re', lè' Dios ziyèl le'i; no rè kwa'n gat nzhaklatal gak lo yizhyuo re', nagakte.

20 Orze' mile' Jesús mandad lo rè men che'n Me, par yent cho lo di'zh bixa', lè' Me Krist.

*Jesús nzhab, lè' Jesús gat
 (Mr. 8:31-9:1; Lc. 9:22-27)*

21 Dizde zhè ze' nguzublo Jesús midì'zh Jesús lo rè men che'n Jesús, naki'n ya Me yezh Jerusalén. Ze' zakzi rè men Me, rè xa' nak zhi'n lo rè men Israel, no kun rè ngulèi' xa' nile' mandad lo más rè ngulèi', mbaino kun rè xa' nilu' ley che'n Muisés; no nu nzhab Me:

—Lè' bixa' gut da, per ngubizh yon lè'da ruban.

22 Orze' ngulo' Per Jesús tu lad, nzhab Per:

—Lè' go, ¡Dios lats laxto' go! ¡Nayot la' Dios zak go rè kuba'!

23 Per mièk Jesús lo Per, nzhab Me:

—¡Chi lon Mizhab! ¡Ka nzhaklal chil da lo kwa'n gat lè'; kwa'n nzhaklal, gat lè't lo Dios nzèi; xigab che'n men kuba'!

24 Orze' nzhab Me lo rè men che'n Me:

—Chi nzhakla tu go yi'dké go ticha, bila' go kwa'n nzhakla go yizhyuo re', no biye

laxto' go ter gat go por nak go men da, orze'se di'ké go ticha. 25 Xa' nane gak men da por nizheb xa' gat xa', lè' xa' lox lo Dios; per xa' niye laxto' gat por nak xa' men da, lè' xa' ban dubta' lo Dios, 26 no, ¿kwan zu' par tu men, ter che'n xa' dub yizhyuo, per lo Dios lè' xa' lox? 27 Na, Xga'n Dios no nak Da tu men yizhyuo, nadedte lè' da yal xtu wèlt kun yalnazon che'n Xuza, no kun rè ganj che'n Me, orze' zan kwa'n gal kad men por rè kwa'n mile' bixa', wanei chi kwa'n wene o kwa'n nakape. 28 Walika kwa'n nin lo go, nzho pla go nzo re', naban gaka go lè' go ne or yala kun rè yalnazon Da par len mandad.

17

Or ngubixlo Jesús

(Mr. 9:2-13; Lc. 9:28-36)

1 Uded xo'p ngubizh, ngwanu Jesús Per, no Jakob, mbaino Juan wech Jakob, yek tu yi' ro. 2 Ze', ngubixlo Jesús dilant lo bixa': milu' lo Me nela biani che'n ngubizh ga', no xab Me bèo laka no ñaz bèle. 3 Lè'chi ¡dil, nguro'xo'b Li, rop xa' kun Muisés, kidi'zh bixa' kun Jesús. 4 Orze' nzhab Per:

—¡Lè' go, wen dox nzo be re'! Chi nzhakla go, chaq chon rranche re'; tube par go, xtube par Muisés, no xtube par Li.

5 Dub kidi'zh Per kure', lè'chi ¡dil, maska ña'zbèl tu xkao ngula yek bixa', ngwani dub plo nzhin bixa'; lè' n xkao ze' mien tu widi'zh kwa'n nzhab se':

—¡Xa' re' Xga'na, Xa' nazhi' da!, dox nizak laxto'n por lè' Xa'; ¡bin go ro' Xa'!

6 Or mbin yon men che'n Jesús widi'zh re', tuli ngo't kuslo bixa' lo yuo, dox mizheb bixa', 7 orze' nguzubi Jesús lo bixa', migal Me bixa', no nzhab Me:

—Waxche go, nanzhebt go.

8 Or ngulits bixa' lo bixa', yentra' cho nak, nab tsa Jesús nzo ze'. 9 No dub ñadla bixa' yek yi' ze', nzhab Me lo yon xa' re':

—Yent cho lo di'zh go kwa'n une go re', haxta or ruban Xga'n Dios, Me nu nak tu men yizhyuo.

10 Orze' minabdi'zh bixa' kure' lo Me:

—¿Chon nidi'zh rè xa' nilu' ley che'n Muisés, galo laka Li yi'd?

11 Orze' nzhab Jesús:

—Walika, galo Li yi'd, par le' xa' yèk rè men lo Dios, 12 per na ni lo go, lè' Li mbi'd la, no maska bixa' ngon ro' Li, lè'la mili'nu bixa' Li kwa'n nzhakla bixa'. Se'ska le' men kun Xga'n Dios, Me nu nak tu men yizhyuo.

13 Orze' mizobyek yon men che'n Me, ka Juan xa' mililèi' men le'n nits, mize't Me.

*Miliyak Jesús tu miyi' nzen tu mbi mal
 (Mr. 9:14-29; Lc. 9:37-43)*

¹⁴ Or mizhin Jesús plo nzhin nayax men, nguzubi tu miyi' plo nzo Jesús, no nguzuxib xa' lo Me, nzhab xa':

¹⁵ —Lë' go, bilats laxto'u xga'na, dox nalats kwa'n nizam xa', tutsa or nikao xa' maska ñëk xa'; nayax wëlt ñachin xa' plo nzhab xa' le'n bël o le'n nits. ¹⁶ Na mbi'dnu la xa' lo rë men che'n go, per nangale't bixa' gan, nganiwen xga'na.

¹⁷ Orze' nzhab Jesús:
—jTaxa nagat yila go rë kwa'n nin lo go!
jTatu nad go par yila go rë kwa'n nazhon che'n Dios! jDox kixek da lo go, nagat zobyek go rë kwa'n nin lo go!

Orze' nzhab Jesús:
—jDinu xmë'dal re'!
¹⁸ Orze' mile' Jesús mandad, ro' mbi mal ze' laxto' miyi' ze'; no tuli miak miyi' dizde zhë ze'. ¹⁹ Or nzo Me tu lad, nguzubi rë men che'n Me lo Me par nzhab bixa':

—jChon nangakt ngago' no mbi mal laxto' miyi' ze'?

²⁰ Orze' nzhab Jesús:
—Por ña-ñë'd xigab che'n go kun Diöse. Walika kwa'n nin lo go, chi kwa'n ñila go Dios ngak nela tu lazh mostas ga', or gab go lo yi' ba': “Yubchi, bizë xtu plo”, no lë'i yubchi, no yent cho tu kwa'n nagak le' go. ²¹ Lë' mbi mal kwa'n ngulon laxto' miyi' ze', nayot ro'i chi nana'b men lo Dios xche, no xlats men.

Jesús midì'zh xtu wëlt xmod gat Me
(Mr. 9:30-32; Lc. 9:43-45)

²² Dub nzho Jesús lazh men Galilea kun rë men che'n Me, nzhab Me lo bixa':

—Na, Xga'n Dios, nu nak Da tu men yizhyuo, lë' rë men zen da no wei' bixa' da lo rë xa' nile' mandad. ²³ Lë' bixa' gut da, per ngubizh yon, lë'da ruban.

Orze' dox miwin laxto' rë men che'n Me por kure'.

Dimi kwa'n nigan par yado'

²⁴ Or mizhin Jesús kun rë men che'n Me yezh Capernaúm, ze' nguzubi pla miyi' lo Per, rë xa' nikan dimi par yado', nzhab bixa':

—jTaxa chi gat niza't Maestr che'nal dimi par yado'?

²⁵ Nkab Per:
—Lë'i niza' ka Xa'.

Or nguio Per le'n yo', tuli ka nzhab Jesús:
—Di xigab che'nal Simón, jxmod nile' rë rey yizhyuo re'? jCho lo nikan bixa' dimi? jChi mis lo rë xin xa', o lo xa' rë mene?

²⁶ Orze' nzhab Per:
—Lo xa' rë mene.

Orze' nzhab Me:
—Kuze' nal, rë xin rey, gat naki'nt za' bixa' dimi ba', ²⁷ per par naki'xian be rë men ba', wa ro' nits, bi'y kwa'n nizenal mbël; no mbël

galo laka zenal, xa'lal ro' ma, ze' nzho tu pes, guzene par wati'x cheda mbaino che'nal.

18

jCho más tsak xid rë men che'n Dios?

(Mr. 9:33-37; Lc. 9:46-48)

¹ Mis orze', nguzubi rë men che'n Jesús, par mina'bdi'zh bixa' lo Me:

—jCho xa' más tsak xid rë men che'n Dios?

² Orze' ngurezh Jesús tu më'd, mizo Me më'd garol sao' plo nzhin bixa', ³ no nzhab Me:

—Walika kwa'n nin lo go, rë go, chi nachë'u xmod nak go, mbaino nagak go nela më'd re', orze' gakt yo go plo nile' Dios mandad. ⁴ Men xa' nado' laxto' lo Dios nela më'd re', xa' re' más tsak plo nile' Dios mandad, ⁵ no xa' chizhi' tu men, ter tu xa' yent kwan tsak par lo rë men nela më'd re', per por nak xa' tu men da, orze' kun na mile' xa'.

Zhe'b nalats nzha men, xa' le' zë'b xki xtu men lo Dios

(Mr. 9:42-48; Lc. 17:1-2)

⁶ No wanei cho tu men le' zë'b xki tu men da xa' yent kwan tsak par lo men, xa' le' kure' ñal gat xa' le'n nitsdo', dub nikili'b tu ke ro yën xa'. ⁷ Dox rë kwa'n gat lë' nzho yizhyuo, mbaino yent cho kwë'ze; wene namás par zë'b xki men lo Dios, jper zhe'b nalats nzha xa' nile', nzë'b xki xtu men lo Dios! ⁸ No chi por ya' go o ni' go nile' go tu kwa'n gat lë', par la' go widi'zh da, neka bicho' goi, porke más wen yent ya' go o tu ni' go yizhyuo re', per ban go wid nazhon kwa'n niza' Dios par dubta', ke par dub go bi le'n gabil par dubta'. ⁹ No chi por tu zalo go le' go kwa'n le' par la' go widi'zh da, neka gulo' goi; más wen ban go yizhyuo re' wid nazhon dub sa' go ke par dub nak go bi le'n gabil par dubta'.

Kwent che'n tu mbëkxi'l kwa'n nguziwan
(Lc. 15:3-7)

¹⁰ Biwi'u, par nale' go naya' lo rë men da, xa' chigab natsakt be's lo rë men, porke rë ganj kwa'n nikina bixa', zilita' ñayab rë kwa'n nizak bixa' lo Xuza, Me nzho lo yibë'. ¹¹ Na, Xga'n Dios, no nak Da tu men yizhyuo, mixë'l Dios Da par lo rë men nzë'b xki lo Dios par kon bixa' lo rë kwa'n nazhe'b nzho bixa'.

¹² No nzhab Jesús:

—jCho xigab che'n go? Chi tu men kinu tu gayo' mbëkxi'l, no chi nguziwan tu ma, jchi zila' xa' nzhin dub tap gal nzho chi'n bitap ma, par yakwa'n xa' ma nguziwan ze'? ¹³ No or yazhël xa' ma, kwa'n nanen, más zak laxto' xa' por ma re', ke par dub tap gal nzho chi'n bitap ma kwa'n nzhin ka lo xa'. ¹⁴ Se'ska Xuz go Me nzho lo yibë', gat nzhaklat Me yitlo ni tu rë men da, rë xa' chigab natsakt be's.

Biya'l laxto' go rë kwa'n gat lë' nile' xtu men lo go

(Lc. 17:3)

¹⁵ No chi lë' wech go mile' tu kwa'n gat lë' lo go, bidi'zh ropts go, guzh go gat lë't kwa'n mile' xa'. No chi mizi xa' kwa'n nak xa', orze' guzhë mile' go gan, gak yo xa' xid go xtu wëlt. ¹⁶ No chi nangazi xa' kwa'n nak xa', orze' gurezh go xtu men o xchop xa' par gon bixa' kwan ya'n go. ¹⁷ No chi nane xa' gon xa' kwa'n nak xa', orze' gurezh go rë men yado'; no chi ni sa' nane xa' zi xa' kwan nak xa', orze' nachë'lt ra' go kun lë' xa', no gop go khont xa' nela tu men gat nzhont widi'zh che'n Dios, o nela tu men nikan dimi che'n rey.

¹⁸ Walika kwa'n nin lo go; rë nak kwa'n nzë'b xki men, kwa'n ya'l laxto' go lo yizhyuo re', nu ska Dios ya'l laxto' rë nak kure'; no rë kwa'n gat lë' kwa'n naya'lt laxto' go che'n rë men yizhyuo re', nayu'bchitskai lo Dios lo yibë'.

¹⁹ No nu walika kwa'n nin re', chi chop go ya'n tutsa kwa'n yizhyuo re' par na'b goi lo Xuza Me nzho lo yibë', orze' lë' Me ne' kwa'n na'b go lo Me, ²⁰ porke plo nzo chop tsa go o chon go par na'b go tu kwa'n lo Xuza por nak go men Da, orze' ze' nzon kun go.

²¹ Orze' nguzubi Per lo Jesús, nzhab Per:

—Lë'o, ¿mási pla wëlt le' wecha kwa'n gat lë' lon, no naki'n ya'l laxto'n kwa'n mile' xa'? ¿Chi haxta gazh wëlte?

²² Orze' nzhab Jesús:

—Gat lë't sa'i; lë'i nak haxta nagakt lab met pla wëlte.

Kwent che'n tu xa' nanet ya'l laxto' kwa'n mile' men lo

²³ Plo nile' Dios mandad nak nela tu rey xa' nguna'b kwent plak nzë'b tuga' rë mos che'n xa'. ²⁴ No or nguzublo rey kina'b xa' kwent, ngwanu bixa' lo rey tu mos xa' nzë'b más di tu miyon pes pura kwa'n plat.

²⁵ No lë' mos re' gat kinut mos dimi par kix xa' rë kwa'n nzë'b xa', orze' mile' rey mandad, do mos re' nela tu ma ga' kun rë lizh xa', mbaino kun rë kwa'n kinu xa', por rë kwa'n nzë'b xa'. ²⁶ Orze' ngo't kuslo mos re', mile' xa' nalats lo rey, nzhab xa': "Lë'o, bilats laxto' go da, gulëz go xche'p, lë'da kix ka rë kwa'n nzë'ba lo go." ²⁷ Orze' milats laxto' rey xa', nzhab rey: "Bila' nakixtra'le, yentra' kwan nzë'bal lon", no miliya' rey xa'.

²⁸ Milox nguro' xa' re' lizh rey, lë'chi mizhë'l xa' xtu tsa' mos xa', nzë'b ne' re' lo xa' re' dimi kwa'n nile' men gan chon mbëo' garol nikë men zhi'n, per nguzen xa' yën ne' re', mitsi' xa'i no nzhab xa': "jixaxa udix kwa'n nzë'bal lon!" ²⁹ Orze' ngo't kuslo ne' re' lo xa', nalatsa mile' ne' lo xa', mbaino nzhab ne': "jilats laxto' go da, gulëz go xche'p, lë'da kix ka rë kwa'n nzë'ba lo go!" ³⁰ Per nangaziyëlt

xa', lë'la ngulo xa' ne' lizhyi'b haxta kix ne' kwa'n nzë'b ne' lo xa'. ³¹ Or une más rë mos che'n rey kure', dox miwin laxto' bixa', orze' ngwayab bixa'i lo rey. ³² Or mbin rey kure', orze'se miyi' rey no ngurezh rey mos nakap re', no nzhab rey: "jMos mal laxto', tatu nazhe'b nakal! Na mia'l laxto' rë kwa'n nzë'bal lon por miwi'n nalats mile'l lon. ³³ Nal ngalats ka laxto'l tsa' mosal ba' nela xmod milen kun lu ga'." ³⁴ No por dox miyi'xian rey, tuli michi xa' mos re' lo rë xa' nikina lizhyi'b par zakzi bixa' mos re' haxta kix mos re' rë kwa'n nzë'b mos.

³⁵ No nu nzhab Jesús:

—Se'ska linu Xuza Me nzho lo yibë', tuga' go, chi naya'l laxto' go rë kwa'n gat lë' nile' xtu men lo go, per naki'n le' goi kun dub laxto' go.

19

Jesús milu', gat ñalt lë' men kun tsa' men
(Mr. 10:1-12; Lc. 16:18)

¹ Or milox midizh Jesús rë kure', orze' nguro' Me lazh men Galilea, nzha Me lazh men Judea, xtu ro' you' Jordán nez plo nilen ngubizh. ² Tu béd men nzhakë tich Me; ze' miliyik Me rë men nzhakne xa' nzho xid rë men ze'. ³ Orze' nguzubi pla men fariseo lo Jesús par zenbe' bixa' Me (wi' bixa' xmod nak Me), kuze' nzhab bixa':

—Lo ley che'n Muisés, ¿chi zak la' tu miyi' tsa' xa' por wanei kwan tu kwa'n?

⁴ Per nzhab Jesús:

—¿Chi nagat go'l go lo Yech che'n Dios, plo nzobni', dizde galo laka, or ngulo Me rë kwa'n, Dios ngulo miyi' no una' par ban bixa' tutsa? ⁵ No nu se' nzobni' lo Yech che'n Dios: "Por una', lë' miyi' la' xuz no xna' par ban xa' tutsa kun tsa' xa', mbaino rop xa' gak tutsa men." ⁶ No gat lë'tra' chop xa', lë' xa' ngok tutsa men. Kuze', miyi' xa' mizo Dios tsa', nagaktra' lë' xa' kun tsa' xa'.

⁷ Orze' nzhab rë xa' re' lo Jesús:

—¿Chon ska mile' Muisés mandad: "Yats tu yech par za' miyi'y ka' una', nes gak la' xa' una'?"

⁸ Orze' nzhab Jesús:

—Por niyent kwan gon goi, kuze' nguziyël Muisés la' nzë'b go tsa' go, per or galo gat lë't sa'i. ⁹ Per na ni lo go, cho la' nzë'b una' che'n, no gat lë't por milibe' la una' miyi'y or naga ban una' kun miyi' re', no chi ban miyi' kun xtu una', nzë'b xki xa' lo Dios orze'. No nu ska, xa' ban kun una' re', nzë'b xki ska xa' lo Dios.

¹⁰ Orze' nzhab rë men che'n Jesús:

—Chi lë'i sa' nak kwent che'n men nzhap una', neka más wen nakwa'nt xa' una'.

¹¹ Orze' nzhab Jesús:

—Gat lë't rë go gak zobyek kure', nab tsa rë xa' mile' Dios gak zobyek, zobyek.

¹² Per nzho miyi' nagakt gap una', dizde or ngol xa', nak xa' sa'; no nzho miyi', nagakt gap una', por men mile' xa' sa'; mbaino nzho miyi' gakt ska gap una', par le' bixa' rë zhi'n nazhon che'n Dios kwa'n nile' bixa'. Kuze', xa' gak zobyek kure', lë' xa' zobyeke.

Una'b Jesú's ya rë më'd wen
(Mr. 10:13-16; Lc. 18:15-17)

¹³ No ngwanu rë men rë më'd lo Jesú's par xo'b Me ya' Me yek bimë'd, mbaino na'b Me ya' rë më'd wen, orze' nala't rë men che'n Me zubi rë më'd lo Me, ¹⁴ per nzhab Me lo rë men che'n Me:

—Bila' go yi'd rë më'd ba' lon, naka'nt go lo bimë'd, porke plo nile' Dios mandad, nak che'n rë men, xa' nak nela më'd ga'.

¹⁵ Or milo'x mixo'b Me ya' Me yek rë më'd ze', nzha Me xtu plo.

Tu miyi' xi, dox rrik
(Mr. 10:17-31; Lc. 18:18-30)

¹⁶ Lë'chi nguio lo Jesú's, mizhin tu miyi' xi, nzhana'bdi'zh miyi' lo Me, nzhab miyi':

—Maestr, ¿cho kwa'n naki'n len par nen, lë' da ban dubta' lo Dios?

¹⁷ Orze' nzhab Jesú's:
—¿Chon mina'bdi'zhal lon, kwan wen? Nabtsa Dios wen. Chi nzhaklal banal dubta' lo Dios, bile' rë nak kwa'n nzobni' lo ley che'n Muisés.

¹⁸ Orze' nzhab miyi' re':

—¿Cho pa' kwa'ne?

Mikab Jesú's:
—Nagutal men, nabantal kun una' gat lë' tsa'l, no naliwa'ntal, mbaino nakë'tal kixu' xa' yent kwan nak, ¹⁹ gop kwent xuzal mbaino xna'l, no bichizhi' xtu men nela lu ka.

²⁰ Orze' nzhab miyi' xi re':

—Rë kure' mile la, dizde or win da. ¿Kwan ra' más jwalt len?

²¹ Orze'se nzhab Jesú's kure':
—Chi walika nzhaklal gakal tu men nile' rëi lo Dios, bito rë nak kwa'n kinul, orze' biza'i, ka' rë xa' yent kwan kinu, nes gapal yalrrik lo yibë'; orze' dikë ticha.

²² Or mbin miyi' xi kure', dub niwin laxto' xa', ña xa', porke dox rrik xa'. ²³ Orze' nzhab Jesú's lo rë men che'n:

—¡Walika kwa'n kinin lo go, dox nagan, yo tu rrik plo nile' Dios mandad! ²⁴ Xtu wëlt nin lo go, más jwals ded tu kamey xan tu yaguj, ke par yo tu rrik plo nile' Dios mandad.

²⁵ Or mbin rë men che'n Me kure', xe mia'n bixa' tuli, orze' nzhab bixa' lo wech bixa':

—Chi lë'i sba', ipas yent cho men le' gan, ro' lo rë kwa'n nazhe'b nzho men!

²⁶ Orze' xe miwi' Jesú's lo bixa', no nzhab Jesú's:

—Par rë men, nzho kwa'n nagakt le' men; per Dios, yent cho tu kwa'n nagakt le' Dios.

²⁷ Orze' nzhab Per:

—Biwi'u, no mila' rë kwa'n, par nzadkë no tich go; nal, ¿kwan gal no por kure'?

²⁸ Mikab Jesú's:

—Walika kwa'n nin lo go, xtu yizhyuo kwa'n laore yo, or zob Xga'n Dios Me nu nak tu men yizhyuo, par le' Me mandad; no rë go xa' mbidkë ticha, se'ska zob za tu dusen go, par kube' go lo dub tu dusen ben men Israel. ²⁹ No rë xa' la' lizh, o wech, o bizan, o xuz o xna', o xmë'd, o yuo che'n; por nak xa' men da; no xtu gayo' wëlt más nayaxe gap xa' lo yizhyuo re'; no lo xtu yizhyuo kwa'n laore yo, ya nayotra' gat xa'. ³⁰ Per nayax xa' galo, xa' ze' gak xa' lult; no xa' lult gak xa' galo.

20

Kwent che'n pla mos

¹ Nu nak plo nile' Dios mandad nela tu xa' nak che'n tlë' yuo. Garzi'l laka nguro' xa', ngwakwa'n xa' mos par kë zhi'n lo yuo plo kinu xa' ya gub che'n xa', ² no mia'n xa' di'zh plak kix xa' ka' rë mos ze' tu ngubizh zhi'n; orze' mixë'l xa' rë mos ze' plo nzhi'b ya gub che'n xa'. ³ No mis zhë ze', paste las nueve garzi'l, xtu wëlt ngwa xa'. Or une xa' lo xbi', zipla xa' yent kwan kile', ka nzhin ze', ⁴ orze' nzhab xa' kinu zhi'n ze': "Nu go wa zhi'n plo nzhi'b ya gub da, na kix ka' go kwa'n ñal." Orze' nu bixa' nzha zhi'n. ⁵ No xtu wëlt ngwa xa' nak che'n yuo ze', paste nzhalal garol zhë, no nu ngwa xa' paste nzhalal las tres zhë, no se'ga' mile' xa'.

⁶ No lult or par lox la ngubizh, ngwa xa' paste las cinco guzhe ngwakwa'n xa' más mos kë nzhin che'n xa', lë'chi une xa' zipla xa' ka nzhin ze', orze' nzhab xa' kinu zhi'n re': "¿Chon dub zhë nzhin go re', yent kwan kile' go?" ⁷ Orze' nkab rë mos re': "Yent cho ngale' no par kë no zhi'n." Orze' nzhab xa' re': "Sas go, nu go wa zhi'n plo nzhi'b ya gub da." ⁸ No or mizhëlyuo, nzhab xa' nak che'n rë ya gub ze' lo mos xa' nile' mandad lo más rë mos: "Gurez'h rë mos par gudix ka' bixa'; guzublo kun rë xa' nguio lult lo zhi'n, orze' lult gudix ka' rë xa' nguio galo laka lo zhi'n." ⁹ Or nguzubi rë mos kwa'n nguio lo zhi'n paste las cinco guzhe, ngxo nka' bixa' kwa'n nzhas ka' tu men nikë zhi'n dub zhë.

¹⁰ Or nguzubi rë mos kwa'n nkë zhi'n dub zhë, mile' bixa' xigab, más ngax ka' bixa'; per tuga' bixa' ngxo ka' kwa'n nzhas ka' tu men tu ngubizh zhi'n. ¹¹ Kuze', or nxuzen bixa' dimi, nguzublo midizh bixa' gat lë' lo xa' nak che'n zhi'n ze', ¹² nzhab bixa': "Rë mos, xa' nkë zhi'n tutsa or, lal ndix go nka' no kun lë' bixa', mbaino dub zhë nkë no zhi'n no dub lo nëi'." ¹³ Orze' nzhab xa' nak che'n zhi'n lo tu rë xa' ze': "Wen da kun lu; ni tu kwa'n gat lë' milen kun lu. ¿Chi gat lë't sa' mia'n be, kixa ka'l che'n tu ngubizh

zhi'n? ¹⁴ Guzen kwa'n ngox ka'l ba', bizé; porke na nzhakla kixa ka' xa' nguio lult lo zhi'n nela kwa'n ndixa ka'l ga'. ¹⁵ Na gak le kwa'n nzhaklan kun dimi da, o, ¿chi niyi'l por wen da kun men?" ¹⁶ Kuze', xa' lult gak xa' galo, no xa' galo gak xa' lult.

Xtu wëlt midizh Jesús, lë' Me gat
(Mr. 10:32-34; Lc. 18:31-34)

¹⁷ Dub nzha Jesús nez yezh Jerusalén, lë'chi tu lad ngurezh Me za tu dusen men che'n Me, nzhab Me:

¹⁸ —Biwi' go, lë' be nzha yezh Jerusalén; na Xga'n Dios no nu nak da tu men yizhyuo; ba' lë' rë men chi da lo rë ngulëi' xa' nile' mandad lo más rë ngulëi', no lo rë maestr xa' nilu' ley che'n Muisés; orze' lë' bixa' na'b gat da. ¹⁹ No chi bixa' da lo rë men gat lë't men Israel; lë' rë xa' re' xizhnu da, no chël bixa'i ticha, mbaino kë' bixa' da lo krus; per ngubizh yon lë'da ruban.

Kwa'n nguna'b tu una' par rop xga'n xa'
(Mr. 10:35-45)

²⁰ Orze', lo Jesús nguzubi xna' rop xga'n Zebedeo, Jakob no Juan, tuli ngo't kuslo una' par na'b una' lë' Me tu kwa'n, ²¹ orze' nzhab Jesús lo una':

—¿Kwan nzhaklan len por lu?

Orze' mikab una':

—Or gak go rey, le' go mandad, nzhaklan zob tuga' xga'na re' kad ta' go.

²² Per nzhab Jesús:

—Nanet go kwan kina'b go; ¿chi zo go kwa'n nala kwa'n go'n?

Orze' mikab bixa':

—Lë'i' gak ka go no.

²³ Orze' nzhab Jesús:

—Ter go go kwa'n nala kwa'n go'n, per gat lë't na kube' cho zob kad ta'n; nab tsa Xuza nane cho rë xa' gak zob ta'n.

²⁴ Or mbin zichi' men che'n Jesús kure', orze' niyi' bixa' lo Jakob no lo Juan, ²⁵ per ngurezh Jesús za chi' xa' re' par nzhab Me:

—Lë' go nane ka, xmod nak rë xa' nile' mandad xid rë men gat lë't men Israel, dox naye nikë xa' men zhi'n; mbaino rë xa' ro, xa' nzho xid bixa', kwa'n nzhakla bixa' nilinu bixa' men, ²⁶ per go, nagakt go sa'; porke xa' nzhakla le' mandad xid go, xa' ze' gak nela tu mos ga' xid go; ²⁷ mbaino xa' nzhakla gak xa' galo xid go, xa' ze' gak xa' lult, nela tu mos nado lo xtu men ga', ²⁸ porke na ni, ter nak da Xga'n Dios, no nak da tu men yizhyuo; per nagaxë't Dios da par len mandad lo rë men; lë'da nzhah par len kwa'n ne bixa', mbaino haxta gat da por lë' bixa', par kixa rë kwa'n nzë'b xki bixa' lo Dios.

Jesús mile' miwi' chop men nikal lo
(Mr. 10:46-52; Lc. 18:35-43)

²⁹ Or nzharo' la Jesús yezh Jericó kun rë men che'n Me, no nayax men nzhakë tich Me; ³⁰ lë'chi ro' nez ze' nzob chop men nikal lo. Or mbin bixa' lë' Jesús nzhaded ze', tuli nguruzhië bixa':

—jLë' go, Xga'n Dabi, bilats laxto' go no!

³¹ Orze' niyi' rë men nguruzhyë bixa', per más naye nguruzhië bixa', nzhab bixa':

—jLë' go, Xga'n Dabi, bilats laxto' go no!

³² Orze' ngulëz Jesús, no ngurezh Me rop xa' nikal lo re', mbaino nzhab Me lo bixa':

—¿Kwan nzhakla go len kun go?

³³ Orze' mikab bixa':

—Lë' go, nzhakla no le' go yani lo no.

³⁴ No milats laxto' Jesús bixa', migal Me lo bixa', lë'chi tuli ngwanii, orze' nzhakë bixa' tich Me.

21

Nguio Jesús yezh Jerusalén nela tu rey ga'
(Mr. 11:1-11; Lc. 19:28-40; Jn. 12:12-19)

¹ Nzhazhin la Jesús yezh Jerusalén, per galo mizhin Me tu yezh win yezh kwa'n lë Betfagé; gax mont Olivos ña'ne. Ze' mixë'l Me chop men che'n Me, ² nzhab Me lo bixa':

—Wa go yezh win kwa'n nzhin nali laka re'; or zhin go plo nikido' tu burr gol kun tu burrit, bixëk go ma no di'nu go ma, ³ no chi na'bdi'zh tu men: “¿Plo wei' go burr ba'?", orze' guzh go: “Lë' Señor naki'n ma, no lë' xa' zhire ska ma lwegá”, orze' lë' xa' la' yi'dnu go ma,

⁴ nes ngok kwa'n midizh tu profet, xa' kwa'n midizh por Dios, or nzhab xa':

⁵ Guzh go lo rë men yezh Sion:

“Biwi'u; lë' rey che'n go nzë, tu xa' nado', Nzob xa' tich tu burrit.”

⁶ No ngwa rop men che'n Jesús ze', mile' bixa' nela xmod nzhab Jesús lo bixa', ⁷ ñadnu bixa' burr gol ze' kun xmë'd ma plo nzo Jesús, no mixo'b bixa' xab bixa' tich ma par nguzob Jesús ma. ⁸ Dox nayax men nzha ze', kiyix bixa' xab bixa' nez; nzho bixa' kicho' rram ya, par kiyix bixa'i plo nzhaded Jesús, ⁹ Rë xa' nzhubner plo nzha Jesús kun rë xa' nzhakë tich Me, kibizhyë bixa', nayë nzhab bixa':

—jPar dubta' yo Xga'n Dabi!

jWen nzha xa' mixë'l Dios!

jNo par dubta' nzho Me nzho lo yibë'!

¹⁰ No or nguio Jesús yezh Jerusalén, net men kwan le' men di tanta nizaklaxto' men, nzhab bixa' lo wech bixa':

—¿Cho xa' ba'?

¹¹ Mikab más rë men nzha kun lë' Me:

—Lë' Jesuce, xa' nidi'zh por Dios, no yezh Nazaret nzë xa', kwa'n ña'n lazh men Galilea.

Jesús ngulo'tin rë xa' nile' xbi' lo luwe
che'n yado'
(Mr. 11:15-19; Lc. 19:45-48; Jn. 2:13-22)

¹² Or nguio Jesús lo luwe che'n yado', ngulo'tin Me rè xa' nile' xbi' ze', no michix-che Me rè mes che'n rè xa' nichil dimi; no michixche Me rè plo nizob rè xa' nito palom, ¹³ orze' nzhab Me lo bixa':

—Se' nzobni': "Lè' lizha ñal gak plo na'b men Lon", iper go kile'i nela plo nibin wa'n ga'!

¹⁴ No ze' nguzubi rè xa' nikal lo, no rè xa' ko'j lo Jesús, no miliyak Me bixa', ¹⁵ orze' niyi' rè ngulè'i' xa' nile' mandad lo más ngulè'i'; kun rè xa' nilu' ley che'n Muisés or une bixa' rè kwa'n nazhon kwa'n kile' Jesús, no nu haxta rè mè'd kibizhyè, lo luwe che'n yado', midizh bimè'd: "iPar dubta' yo Xga'n Dabi!", ¹⁶ orze' nzhab rè xa' ze' lo Jesús:

—Biwi', çchi gat kiyontal kwan kidi'zh rè mè'd ba'?

—Lè'i kiyon ka —mikab Jesús— çchi nagat go'l go kwa'n nzobni' lo Yech che'n Dios?, widi'zh kwa'n nzhab:

Widi'zh che'n rè mbwin, No kun widi'zh che'n mèdo' kwa'n nzhochich,

Millè'l, nu bixa' midizh, nazhon Dios.

¹⁷ Orze' mila' Jesús rè men ze', nguro' Me ze', ña Me yezh Betania plo mite'd Me yè'l kun rè men che'n Me.

Mibizh ya nzhao'

(Mr. 11:12-14, 20-26)

¹⁸ No xtu riyè'l, dub se' ñè'd Me di yezh Jerusalen, lè'chi mbi'd tu yalnila'n Me. ¹⁹ No ro' nez une Me tu ya nzhao', no ngwatswi' Me, nabei chi nikè xlè loi per pura la nzhì'be, orze' nzhab Jesús:

—Ya nayotra' yi'd men gao men xlè lo ya re'.

No mis orze', tuli mibizh ya nzhao' ze'. ²⁰ Or une rè men che'n Jesús kure', mia'n xe bixa' tuli, no nzhab bixa':

—iTatu mibizh ya nzhao' re' tuli!

²¹ Orze' nzhab Jesús:

—Walika kwa'n nin lo go, chi lè' go ñila widi'zh che'n Dios, no nale't go chop xigab, orze' lè' nu go le' kwa'n milen kun ya nzhao' ba', no haxta gab go lo yi' ba': "Chi ba', bizè haxta le'n nits", no lè'i' gak. ²² Kuze' nin, rè kwa'n na'b go lo Dios, wayila goi namás, lè' Dios ne'i.

Minabdi'zh bixa', cho mixè'l Jesús

(Mr. 11:27-33; Lc. 20:1-8)

²³ Or milox midizh Jesús widi'zh re', nguio Me lo luwe che'n yado', no dub kilu' Me widi'zh che'n Dios ze', nguzubi rè xa' nile' mandad lo rè ngulè'i', kun rè xa' nzo lo rè men Israel, plo nzo Me, no nzhab bixa':

—çCho mile' mandadal kile'l rè kure'; no cho mixè'lal par le'le?

²⁴⁻²⁵ Orze' mikab Jesús:

—Nu da, na'bdi'zh ska tu kwa'n lo go. Bineo, çcho mixè'l' Juan xa' mili'lè'i' men le'n

nits? çChi Dios mixè'l' xa', o mene? No chi lè' go ne choi, orze' ganin, cho mile' mandad da, kilen rè kure'.

Orze' kidi'zh bixa' lo wech bixa':

—çChi gab be?: "Diose", orze' lè' xa' ne lo be: "çChon ska nangayila go Juan?"; ²⁶ no chi gab be: "Men mixè'l' xa'", nazhe'b be par be, porke rè men zak, Juan tu xa' midizh por Dios.

²⁷ Orze' mikab bixa' lo Jesús:

—Nanet no cho mixè'l' xa'.

Orze' nzhab Jesús:

—Nuska da, nanita cho mixè'l' da kilen rè kure'.

Kwent che'n tu xa' kinu chop xga'n

²⁸ Orze' nzhab Jesús:

—çXmod nile' go xigab por kure'? Tu miyi' kinu chop xga'n, nzhab xa' lo xga'n galo xa': "Xga'n, wa zhi'n lo yuo plo nzhì'b ya gub che'n be." ²⁹ Mikab xga'n xa': "iNayata!"; per guzhèla ze' xtu xigab mile' miyi', ngwa miyi'. ³⁰ No se' ska nzhab xuz bixa' lo xtu xga'n xa', per miyi' re' nzhab: "Lè'o, lè'da ya ka", no nangat miyi'. ³¹ No di lo rop miyi' re', çcho miyi' mbin ro' xuz?

Mikab bixa':

—Miyi' mile' xa' mandad galo lakai.

Orze' nzhab Jesús:

—Walika kwa'n nin lo go, rè xa' nikan dimi che'n Roma, kun rè una' le'n kai (kwa' gal), galo laka bixa' yo lo go plo nile' Dios mandad, ³² porke Juan xa' mili'lè'i' men le'n nits, mbi'dlu' lo go xmod ban go nali lo Dios, no nangont go ro' xa'; per rè xa' nikan dimi che'n rey kun rè una' le'n kai (kwa' gal), ngwayila bixa' xti'zh Juan. Per go, ter une go kure', per nangala't go rè kwa'n gat lè' kwa'n nak go orze' ngayila go xa'.

Kwent che'n pla mos nakap

(Mr. 12:1-12; Lc. 20:9-19)

³³ Gon go xtu kwent re': Nguio tu miyi', mixè'n ya gub lo yuo che'n; mitsao' xa' naka'n ro'i, no mizuxkwa' xa' tu plo tsi' xa' gub che'n xa', nu mizuxkwa' xa' tu plo ya par kina xa'i. Sa' mila' xa' par ga'n xtu mene, orze' nguro' xa' xche, nzhaxa' xtu lazh men. ³⁴ Or ngol tiemp miza'i, mixè'l' xa' nak che'ne pla mos par na'b xa' lo xa' ngo'ne ze' kwa'n ñal xa'. ³⁵ Per rè xa' ngo'n yuo che'n xa', nguzen bixa' rè mos ze'; tu mos michèl bixa'i tich, xtu mos mbit bixa', no xtu mos mbit bixa' kun ke. ³⁶ Orze' mixè'l' xa' nak che'n yuo ze', más nayax mos ke lè'la or galo, per sa' ska milinu bixa' rè mos ze'. ³⁷ Lult, mixè'l' xa' tugaka xga'n xa' kwa'n kinu xa', mile' xa' xigab: "Ro' xga'nase gon rè xa' ba'." ³⁸ Per or une rè xa' ngo'n yuo ze', xga'n xa' nak che'ne, nzhab bixa' lo wech bixa': "Xa' re' ya'nu rè kure'; cha'o gut be xa' nes ya'nu be rè che'n xa'." ³⁹ Orze' nguzen bixa' miyi' re', ngulo' bixa' miyi' le'n ya gub,

orze' mbit bixa' miyi'. ⁴⁰ No nal, or yë'd xa' nak che'n ya gub ze', ¿kwan li'nu xa' rë xa' ngo'n yuo che'n xa'?

⁴¹ Orze' nzhah bixa':

—Lë' xa' yë'd dub xian xa' par lo'x xa' rë men nakap kwa'n ngo'n yuo che'n xa', mbaino lë' xa' za' yuo ga'n xtu ben men; rë xa' re'se za' kwa'n ñal gal xa', kad or za' ya gub che'n xa'.

⁴² Orze' nzhah Jesús lo bixa':

—¿Chi nagat go'l go kure' kwa'n nzobni' lo Yech che'n Dios?:

Lë' ke kwa'n ngulubi rë xa' nichao' yo', lë'i ngok ke kwa'n nzen dub yo'; kure' mile' Dios par rë men wi' xe.

⁴³ Kuze' nin lo go, por gat nzhont go ro' xa' mixë'l Dios lou, nazotra' go kina go rë men che'n Dios; xa'la men zo, rë xa' nzhon ro' Dios. ⁴⁴ Mbaino ke kwa'n ngulubi go re', rë xa' yachin loi, lë' xa' xix; per chi lë'i gab yek tu men, de laka le'i xa'.

⁴⁵ Or mbin rë men, xa' nile' mandad lo ngulë'i, kun men fariseo, widi'zh re'; ngwanu laxto' bixa', par yek bixa' nzha kwa'n mid'i'zh Jesús. ⁴⁶ Mis orze' ngokla bixa' ngazen bixa' Jesús, per nangale't bixa'i por men mizheb bixa', porke rë men nzhin ze' zak, lë' Jesús nak tu profet, xa' nidi'zh por Dios.

22

Kwent che'n tu jwandang

¹ Xtu kwent mid'i'zh Jesús, nzhah Me:

² —Plo nile' Dios mandad nak nela tu rey xa' mile' jwandang che'n xga'n, ³ mixë'l xa' rë mos che'n xa' ngwane lo men par yi'd bixa' jwandang; per net bixa' ngayi'd bixa'. ⁴ Orze' xtu wëlt mixë'l rey ze' xtu ben mos che'n xa' par ngwayab: “Dë' go, lë' kwa'n gao be nzhin la; lë'dambit la rë ngo'n da kun rë ma más nacha', rëi nzhin la; kuze', dë' go lë' be lani.” ⁵ Per mile' bixa' naya'; nzho bixa' ngwa zhi'n lo yuo che'n, no nzho bixa' ngwa xbi', ⁶ no más bixa' nguzen rë mos che'n rey, ndin bixa' haxta mbit bixa' rë mos ze'. ⁷ Orze' niyi' rey no mixë'l rey rë sondad che'n xa' par ngwayut rë xa' nzhut men ze', no haxta lazr rë men nakap ze' mizë'k bixa'. ⁸ Lult nzhah rey lo rë mos che'n: “Lë' rëi nzhin la par le' be jwandang, per rë men xa' nak di'zh ngayi'd, gat ñalt bixa' kure'; ⁹ nalse wa go rë nez, waka'o cho la rë men yazhë'l go par yi'd bixa' jwandang.” ¹⁰ Orze' ngwa rë mos che'n rey, rë nez mikan bixa' dike men ngwazhë'l bixa', men wene o men nakape, haxta ngwazhë plo nzhin bixa' kile' bixa' jwandang. ¹¹ Per or nguio rey par ne xa' rë men nzhin lo mes, no une xa' tu men nzob ze', no gat nakt xa' lar kwa'n nzhak men lo jwandang, ¹² orze' nzhah xa' lo men ze': “Lë' mbe', ¿chi niye laxto'l nzol re', ter gat naktal lar kwa'n ñal gak men lo

jwandang?” Per yent kwan ngab xa' re' lo rey. ¹³ Orze' nzhah rey lo rë mos che'n xa': “Bili'b go ya' xa' no ni' xa', no gulo' go xa' tich lo nakao, plo go'n xa' haxta kwezh lëi xa' lo yalne”, ¹⁴ porke nayax men nibezh Dios par gak men che'n Me, per che'ptsa men nile' kwa'n nzhakla Me.

Nzhah Jesús, ñal kix men dimi che'n rey César

(Mr. 12:13-17; Lc. 20:20-26)

¹⁵ Or milox mid'i'zh Jesús kure', nguiubchi rë men fariseo plo nzo Jesús par mia'n bixa' di'zh, le' bixa' gab Me tu kwa'n gat lë', ¹⁶ kuze' tutsa mixë'l bixa' pla men che'n bixa' kun pla men che'n Herodes par nzhah rë xa' re' kure' lo Jesús:

—Maestr, nane no, lë'tsa lë' kwa'n nidi'zhal, no dox nzhakal nilu'l xmod nak nez che'n Dios; mbaino or nigobe' lo tu kwa'n, gat nibetal men. ¹⁷ Nal bine lo no, ¿xmod nak xigab che'nal? ¿Chi ñal kix no dimi kwa'n nzhax lo rey César, o gat ñalt gaxe?

¹⁸ Per lë' Jesús nane la xmod nak xigab che'n bixa' kure' nzhah Jesús:

—iMbël gox, chigab walika men wen go! ¿Chon nzhakla go zenbe' go da? (wi' go xmod nak da) ¹⁹ Bilu' go tu pes kwa'n nzhax lo rey César.

No milu' bixa' tu pes kwa'n lë denario, ²⁰ orze' minabdi'zh Jesús lo bixa':

—¿Cho nikë lo pes re', no cho lë nikë loi?

²¹ Orze' nzhah bixa':

—César nikë loi.

Orze' mikab Jesús:

—Ne goix, biza' go che'n César kwa'n nak che'n César, no biza' go che'n Dios kwa'n nak che'n Dios.

²² Or mbin bixa' kure', xe mia'n bixa' tuli, net bixa' kwan le' bixa', orze' mila' bixa' Jesús, ña bixa'.

Midi'zh Jesús, lë' men ruban

(Mr. 12:18-27; Lc. 20:27-40)

²³ Mis zhë ze', ngwa pla men saduceo lo Jesús, rë xa' nidi'zh: “Gat walit ruban men ngut”, ²⁴ orze' nzhah bixa':

—Maestr, lë' Muisés mila' di'zh lo no: “Chi lë' tu miyi' gat, no nangapt xa' më'd kun una' che'n xa', orze' lë' wech xa' naki'n ban kun lë' una' par gap xa' më'd por kwent che'n xa' ngut re'.” ²⁵ Mbaino nguio tu xa' xid no, ngop gazh wech; xa' galo ngop tu una', per ngut xa' no nangapt xa' më'd; orze' wech mirop xa' miban kun lë' una', ²⁶ per nu ska xa' re' ngut no nangapt ska xa' më'd kun lë' una'; no se'ska kun xa' mion, haxta kun za gazh xa', rë xa' ngut, ni tu xa' nangapt më'd; ²⁷ no lult, nu una' ngut. ²⁸ Or ruban bixa', ¿cho xa' ya'n kun lë' una'?, porke za gazh xa' miban kun lë' una'.

²⁹ Orze' mikab Jesús:

—Men migoch yek go, kuze' nagakt zobyek go rē kwa'n nzobni' lo Yech che'n Dios; no ni yalnazhon che'n Dios nanet go kwan. ³⁰ Or ruban men, yentra' cho ban kun una', no ni yentra' cho za' xcha'p ban kun miyi'; porke lē' bixa' gak nela rē ganj che'n Dios, Me nzho lo yibē'. ³¹ No por kwa'n ruban men ngut, ¿chi nagat go' go kwan midizh mis Dios or midizh Me se': ³² “Na nak Dios che'n Abraham, no Dios che'n Isaac, no Dios che'n Jakob?” Porke Dios, gat lē't Dios che'n rē mengute, lē' Dios nak Dios che'n rē men naban.

³³ Or mbin rē men nzhin ze' kure', xe mia'n bixa' por rē widi'zh kwa'n milu' Jesús.

Kwa'n más naki'n le' men

(Mr. 12:28-34)

³⁴ Or mbin rē men fariseo, lē' Jesús mitsao' ro' rē men saduceo ze', orze' migan bixa' lo Jesús, ³⁵ no xid rē xa' re', tu xa' nilu' ley mina'bdi'zh kure' lo Jesús par zenbe' xa' Me:

³⁶ —Maestr, ¿kwan más naki'n le' men xid rē kwa'n nzobni' lo ley?

³⁷ Nkab Jesús:

—“Bichizhi' Señor Dios che'nal kun dub laxto'l, kun dub lal, mbaino kun rē xigab che'nal.” ³⁸ Kure' kwa'n más naki'n le' men galo laka lo rēi; ³⁹ No kwa'n rop kwa'n naki'n le' men nak kure': “Bichizhi' xtu men, nela lu ka.” ⁴⁰ Rop gaka kure' más kwa'ro xid rē kwa'n nzobni' lo ley, mbaino xid rē kwa'n midizh rē profet, xa' midizh por Dios.

¿Cho Xuz Krist?

(Mr. 12:35-37; Lc. 20:41-44)

⁴¹ Dub nzhin rē men fariseo ze', mina'bdi'zh Jesús lo bixa', ⁴² nzhab Me:

—¿Xmod nile' go xigab, plo nzē Krist? ¿Cho Xuz Krist?

Nkab bixa':

—Dabi nzhak xuz Krist.

⁴³ Per nzhab Me:

—¿Chon midizh Dabi, por Sprit che'n Dios, or nzhab xa': “Lē' Krist, Me nile' mandad da”, porke yub Dabi nzhab:

⁴⁴ Lē' Dios nzhab lo Me nile' mandad da:

“Guzob ta'n lad direch haxta or len, che'ptsas (bi'ch laka) gak rē xa' nidilal, xan ni'?”

⁴⁵ Chi yub Dabi nzhab: “Krist Me nile' mandad da”, orze', ¿xmod gak Dabi Xuz Krist?

⁴⁶ No ni tu bixa' nangakt ngakab ni tu widi'zh lo Jesús, no dizde orze', yent ra' cho ngaye laxto' ngana'bdi'zh más kwa'n lo Jesús.

23

Jesús midizh kwa'n nak rē men fariseo, no rē xa' nilu' ley che'n Muisés

(Mr. 12:38-40; Lc. 11:37-54; 20:45-47)

¹ Orze' nzhab Jesús kure' lo rē xa' nzhin ze' no lo rē men che'n Me:

²—Rē xa' nilu' ley che'n Muisés, no rē men fariseo, nzhab bixa', lē' gaka bixa' nilu' nela xmod ñalkai. ³ Nin lo go, bin go widi'zh che'n bixa', no bile' go kwa'n ne bixa', per nagakt go nela lē' bixa'; nidi'zh bixa' tu kwa'n, no xa' kwa'n nile' bixa'. ⁴ Kwa'n nilu' bixa' lo men nak nela tu kwa'n dox ne' ga', no jwers wei' mene nzhakla bixa'; mbaino lē' bixa' ni ya' bixa' gat nigo bixa' ta'i par wei' mene. ⁵ Se' nile' bixa' par ña'n bixa' wen lo más rē men; no ño laxto' bixa', kē tu yech lo xchuzh bixa' plo nzobni' widi'zh che'n Dios; no nzhak bixa' lar no'l xlox, nes par gab men, walika men che'n Dios bixa'. ⁶ No ño laxto' bixa', galo laka bixa' zob plo nizob rē xa' tsak plo nzhak tu lani lo le'n rē yo' plo nitse'd men widi'zh che'n Dios. ⁷ No nu nzhakla bixa' zen men ya' bixa' du' lo men, mbaino gab men lo bixa': “Maestr”.

⁸ Per nzhab Jesús lo rē men che'n Me:

—Xid go, gat ñalt ne men Maestr lo go, porke tutsa wech rē go por nak go men da; no tutsa maestr kinu go, Me nak Krist.

⁹ No ni nagab go: “Pa”, lo tu men gat lē't xuz go, porke tutsa Xuz go kinu go, Me nzho lo yibē'. ¹⁰ No naziyé't go kulē men go: “Maestr”, porke tutsa Krist nak Maestr che'n go. ¹¹ Men xa' nzhakla gak xa' más tsak xid go, xa' ze' gak xa' le' kwa'n gab go, ¹² porke xa' nzhakla gak xa', xa' tsak; lē' Dios layēt xa'; per xa' gat nzhaklat gak xa', xa' tsak, lē' Dios le' gak xa' tu men tsak.

¹³ Orze' nzhab Jesús lo rē men nilu' ley mbaino lo rē men fariseo:

—¡Nal ne goi, go xa' nilu' ley, no go, men fariseo, chigab walika men wen go! Net go, xa'l go ro' pwert plo nile' Dios mandad par yo más rē men; no ni mis go nanet yo, mbaino ni nala' go yo xtu men, xa' nzhakla yo.

¹⁴ ¡Nal ne goi, go xa' nilu' ley, kun go men fariseo! ¡Tatu nazhe'b nak go! Nilat go lizh rē una' ngut xmiyi', no xche nile' go nina'b go lo Dios. Por nak go sa', más zakzi Dios go.

¹⁵ ¡Nal ne goi, go xa' nilu' ley kun go men fariseo, chigab walika men wen go! Nikizē go xtu ro' nitsdo' mbaino rē plo nzhin men par le' go gan tse'd men widi'zh che'n Dios nela go ga', no or milox mitse'd go bixa', más nzhak bixa' xin Mizhab lo go, kuze' galo laka bixa' bi le'n gabil lo go.

¹⁶ ¡Nal ne goi, go xa' nak nela tu men nikal lo ga'l, per nzhakla go lu' go nez lo xtu men. Nzhab go lo rē men, chi la' tu men di'zh, le' xa' tu kwa'n por yado', nzhab go, yent kwane ter nale't xa'i; per chi la' tu men di'zh le' xa' tu kwa'n por rē kwa'n gor che'n yado', orze'se naki'n le' xa'i, nzhab go. ¹⁷ ¡Taxa chi miao' yek go! ¿Chi gat ñanit lo go? ¿Kwan más tsak? ¿Chi rē kwa'n gor che'n yado'i, o yub yado' kwa'n nile' ña'n nazhon rē kuba'i? ¹⁸ No nu nzhab go, chi tu men mila' di'zh

le' xa' tu kwa'n por biko' che'n yado', gat naki'nt le' xa'i; per chi mila' xa' di'zh le' xa' tu kwa'n, por gon kwa'n nixo'b lo biko', orze'se naki'n le' xa' kwa'n mila' xa' di'zh. ¹⁹ ¡Miao' yek go mbaino nikal lo go! ¿Kwan más tsak? ¿Chi gone, o biko' kwa'n nile' fia'n gon nazhone?, ²⁰ porke xa' nila' di'zh, le' tu kwa'n por biko', gat lè't nab por biko' nidi'zh xa'i; nu por rē kwa'n nixo'b lo biko' nile' xa'i. ²¹ No rē xa' ze't yado' or nila' xa' di'zh le' xa' tu kwa'n, no gat lè't nab yado' kize't xa', nu Dios Me nak che'n yado' kize't xa'. ²² Mbaino rē xa' nize't yibē' or nila' xa' di'zh le' xa' tu kwa'n, gat nabt yibē' nize't xa'; nu plo nizob Dios, no haxta nu Dios, Me nizob ze' kize't xa'.

²³ ¡Nal ne goi, rē go xa' nilu' ley, kun rē go, men fariseo, chigab walika men wen go! Niza' go diezmo lo Dios che'n rē kwa'n nixē'n go: rē yix ment, no rē anís, mbaino rē kumin. Per gat nile't go rē kwa'n tsak re': le' go kwa'n ñal kun kad men, no lats laxto' go men, mbaino ban go nab tsa par Dios. Galo laka re' kure' ñal le' go kwa'n nzobni' lo ley per naya'lt laxto' go le' go rē más rē kwa'n menes tsak. ²⁴ ¡Ter nak go nela men nikal lo ga', per nzhakla go, go lu' nez che'n Dios lo más rē men! Nak go nela tu men nigo' tu nguru'zh le'n tu vas nits, per nanet xa' tu ma más kwa'ro niyēb xa'.

²⁵ ¡Nal ne goi, rē go xa' nilu' ley kun rē go xa' fariseo, chigab walika men wen go! Nizēt go tich vas no tich plat, no lē' yek go ngwazhēi di rē xigab liwa'n go, no naxekt go ka'n go lo kwa'n nzhakla kwerp che'n go. ²⁶ ¡Men fariseo, nikal lo go! Galo laka bizēt go le'n vas no le'n plat, nes par ya'n nambe tiche.

²⁷ ¡Nal ne goi, rē go xa' nilu' ley, kun rē go men fariseo, chigab walika men wen go! Nak go nela rē ba': chul nilu'i al tich, per al le'ne, ngwazhē di hues che'n yinto', kun más rē kwa'n gat nambe. ²⁸ Sa' nak go: al tich nilu' go nela men dox nile' kwa'n nzhakla Dios, no lo rē más men; per al le'n laxto' go, zhēi di kwa'n nikide go men, no rē kwa'n nayi'lazh go lo Dios.

²⁹ ¡Nal ne goi, xa' nilu' ley, kun go, men fariseo, chigab walika men wen go! Chul nizuxkwa' go rē ba' che'n rē profet xa' midí'zh por Dios nzhala, mbaino rē ba' che'n rē men xa' mile' rē kwa'n nzhakla Dios, par nitsila men bixa'. ³⁰ No nidi'zh go: "Chi ngak nzo la be rē zhē or miban rē xa' kwa'n midí'zh por Dios chi tiemp, ngala't be ngut men rē profet ze'." ³¹ Por nidi'zh go sa', kuba' nilu' tutsa nak go kun rē xa' mbit rē profet ze'. ³² Kuze', ¡bilo'x go kwa'n mizublo rē xuz go, xa' mbit rē men che'n Dios ze'!

³³ ¡Rē go nak nela mbē'l ga'! ¡Nzē go ben che'n mbē'l nayi'! Biwi' go xmod le' go gan, par nalox go le'n gabil. ³⁴ Kuze', lē' da xēl

rē profet da lo go, xa' nidi'zh por Dios, kun rē xa' dox nzhak, mbaino rē xa' kwa'n nilu' xti'zha lo go; per lē' go gut bixa', kē' go bixa' lo krus; no más bixa' chēl goi tich le'n rē yo' plo nitse'd men widi'zh che'n Dios; no nzho bixa' ru'kē go tich tu yezh, xtu yezh, ³⁵ nes par yek go xo'b Dios rē ren che'n rē men, xa' ngut por mile' bixa' rē kwa'n nzhakla Dios, dizde Abel haxta Zacarías, xga'n Berequíás, xa' ngut lo luwe che'n yado' plo nzob biko', por mandad che'n rē xuz go. ³⁶ Walika kwa'n nin lo go, Dios na'b kwent ren che'n rē xa' re' lo rē men nal re'.

Miwin laxto' Jesús por men yezh Jerusalén

(Lc. 13:34-35)

³⁷ ¡Yezh Jerusalén, yezh Jerusalén, rē men che'nal nzhut rē profet, xa' nidi'zh por Dios, no nigo' ke bixa' rē men nixē'l Dios lo bixa'! ¡Nayax wēlt, ngoklan tutsa ngazhina bixa', nela or niye'zh nguid rē xmē'd ma le'n xi'l ma, per naya' mile' bixa' lon! ³⁸ Nal ne bixa'i, lē' yado' che'nal ya'n nzē'b. ³⁹ Ya nanetra' bixa' da haxta or zhín zhē gab bixa': "¡Wen nzha xa' le' mandad lo be, xa' mixē'l Dios!"

24

Midi'zh Jesús, lē' yado' Jerusalén bil

(Mr. 13:1-2; Lc. 21:5-6)

¹ Or nzharo' Jesús le'n yado', nguzubi pla rē men che'n Me lo Me, nzhab bixa', tatu chul yado' re', kun más rē yo' che'ne, ² per nzhab Jesús:

—¿Chi niwi' go por chule? Walika kwa'n nin, lē' zhē zhín, ni tu rē ke kwa'n nakxao'we re', naya'nte tich weche; rēi bil.

Rē señ kwa'n gak or jwaltra' lox yizhyuo

(Mr. 13:3-23; Lc. 21:7-24; 17:22-24)

³ Or nzha bixa' yek lom kwa'n lē Olivos, dub nzob Jesús ze', lē'chi nguzubi nab rē men che'n Me lo Me, par nzhab bixa' lo Me:

—Bine go lo no, ¿pok gak rē kwa'n midí'zh go ba'?, no, ¿kwan pa' yo yizhyuo or nzhazhin la yē'd go xtu wēlt yizhyuo?, mbaino, ¿kwan pa' gak yizhyuo or nzhazhin la loxe?

⁴ Orze' nzhab Jesús:

—Neu nakide men go, ⁵ lē' nayax men yo xa' di'zh: "Na nak Krist", no nayax men kide bixa'. ⁶ Rē plo gon go kidil men, per yent kwan zheb go, lē' rē kure' naki' gak per jwalt ra' lox yizhyuo. ⁷ Lē' tu gubier dil kun xtu gubier, no tu yezh kun xtu yezh dil, mbaino rē plo yo yalwin no win xo. ⁸ Per laore lo yalne re', kwa'n yo yizhyuo re', nela yalne kwa'n nine tu una' gal xin ga'.

⁹ Lē' men zen go no wei' bixa' go lo rē gustis; lē' bixa' gut go, mbaino rē men yi' ne go por nak go men da. ¹⁰ Le'n rē zhē ze', nayax men da nayilat ra' bixa' da, mis lē' bixa' chi más bixa' par gut rē xa' nak zhi'n

bixa', mbaino yi' bixa' ne bixa' wech bixa'.
 11 No nu yo nayax men, xa' chigab walika tu profet xa' nidi'zh por Dios, mbaino kide bixa' nayax men. 12 No por dox yar rē xa' la' ley che'n Dios tu lad, por nayi'lazh bixa', kuze' nayax men la' nazinet ra' laxto' bixa' men. 13 Per xa' zo naye lo kwa'n ñila xa' Da dub nzhak rē kure', xa' re' gap yalnaban dubta' kun Dios, 14 no dub yizhyuo, yadi'zh men xmod yo men plo nile' Dios mandad, nes par gon rē lo ben mene, orze' lox yizhyuo.

Or gak kure', ñal kē' men karre

15 No nu nzhah Jesús:

—Se' mizobni' profet Daniel. Tu ngubizh lē' men yala' tu gon dox gat nambet le'n yado' che'n Dios plo más nazhon. Xa' go'l kure' naki'n zobyek xa'i. 16 Orze' rē men xa' nzhō lazhen Judea, naki'n kē' bixa' karre, bi bixa' dan, 17 no rē xa' nikē yek yo' le'n rē ngubizh ze', naza't la bixa' par ko' bixa' rē che'n bixa' le'n yo'; 18 no rē xa' nzo dan, naza't yubre bixa' lizh bixa' yaka' bixa' xab bixa'; 19 mbaino rē una' nakxin no rē una' naka' mē'do' rē zhē ze', zhe'b nalats nzha bixa'. 20 Bina'b go lo Dios par nagak kure' rē mbēo' nayag, no ni zhē kwa'n nayi' kē men zhi'n, 21 porke dox nazhe'b kwa'n ne men rē zhē ze', rē kwa'n lalta' nagat ne men dizde nguixkwa' yizhyuo, no ni nayora' ne mene. 22 Chi lē' Dios nakwē'zt ra' rē kure', rē zhē ze', orze' yot men le' gan loi; per lē' Dios le' kwē'ze, por rē xa' ngule Dios, nak men che'n Me.

23 'No chi cho ne lo go, le'n rē ngubizh ze': "Biwi' go; lē' Krist nzo re'", o "Lē' Krist ba'", nayilat goi. 24 Lē' nayax men yo, kide bixa' men, gab bixa' lē' bixa' Krist, no nu gab bixa', nidi'zh bixa' por Dios; haxta le' bixa' nayax rē kwa'n chigab nazhon par kide bixa' men, no haxta nu rē men xa' ngule Dios gak men che'n Me, nzho rriez kide bixa'. 25 Biwi' go, nes par or gak rē kure', non la goi (nane la goi). 26 Kuze', chi cho ne lo go: "Biwi'u, lē' Krist nzo le'n yuo bizh", nayilat goi; o chi ne bixa' lo go: "Biwi' go, lē' Me nzo le'n yo' re'", nayilat ska goi, 27 porke nela or nine men nzha' tu do'zi', niziniy tu lad no xtu lad lo yibē', se'ta' ne rē men or yala. 28 Nela or nine men tu plo nidal ngulbech, ze' sigur ka nax tu ma ngut.

Or yē'd Krist xtu wēlt yizhyuo

(Mr. 13:24-37; Lc. 21:25-33; 17:26-30, 34-36)

29 'Or lox rē yalzi kwa'n yo yizhyuo, orze' tuli ka kao lo ngubizh, no nazinit ra' mbēo', mbaino rē mbēi lo yibē' gab; no haxta xiz rē kwa'n nzhō lo yibē'. 30 Orze' luxo'b señ che'n Xga'n Dios Me nu nak tu men yizhyuo, rē ben men yizhyuo go'n di zheb or ne bixa' yala le'n xkao par len mandad lo rēi, kun

biani ro che'n yalnazhon da. 31 No or yen kwezh tu trompet nayē, xēla rē ganj Da par kan rē men ngulen dap lad lo yizhyuo, dizde tu ro' haxta xtu ro'.

32 'Or niwi' go lo ya nzhao' nzē bixiche, nane la go, lē' mbēo' nēi' nzhazhin. 33 No se'ga', or ne go kiyak rē kwa'n yizhyuo; lē' go nane la, lē'da nzhazhin la yal; nzo la ro' yo'. 34 Walika kwa'n nin lo go, rē kure' gak antis dike gat rē men xa' nzhō orze'. 35 Yibē' no yizhyuo lē'i lox; per widi'zh da, par dubta' yoi. 36 Per rē ngubizh or gak rē kwa'n yizhyuo, yent cho nanei; ni rē ganj yibē', no ni Na; tugaka Xuza nane poke.

37 'No nela rē zhē or miban Noé, se'ta' gak zhē or yala. 38 Le'n rē zhē ze', or naga la yiu nazhe'b, ndao men, ngu' men, ngok jwandang che'n men, no miza' men xcha'p men ngok jwandang che'n haxta zhē or nguio Noé le'n yo'ya, 39 no ni xigab nangale' bixa', lē'chi ngula yiu nazhe'b, milo'xe rē nak bixa'; se'ska rē men nal re', ni xigab nale' bixa', lē'chi ne bixa' ruxo'ba. 40 Le'n rē zhē ze', chop miyi' nzo dan; tu miyi' wēiñ, lē' xtu miyi' ya'n; 41 o chop una' kiyoi; tu una' wēiñ, lē' xtu una' ya'n.

42 'Kuze' bikina go go, porke nanet go, zhē or yala. 43 Per nane ka go, chi tu xa' nak lizh tu yo', nzhon xa' cho or yo wa'n lizh xa' yē'l, lē' xa' kina par yent cho liwa'n lizh xa'. 44 Kuze' bikina go go, porke lē'da yal zhē nale't go xigab.

Mos wen no mos nakap

(Lc. 12:41-48)

45 'Lē' go nane ka, tu mos nzhon di'zh no natsin; or nizo xa' nile' mandad mos re' par kina lizh xa', no za' mos re' kwa'n gao más tsa' mos xa'. 46 wen nzha mos re', or yēk xa' nile' mandad xa', lē' xa' ne, kile' ka mos re' kwa'n ñal le' xa'. 47 Walika nin lo go, lē' xa' la' rē nak kwa'n kinu xa' lizh xa' ya' mos. 48 Per chi lē' mos re' gak tu mos nakap, gab mos: "Lē' xa' nile' mandad da nayē'd gat", 49 orze' zublo mos za' lao' más rē tsa' mos xa', mbaino zo xa' xid rē nguy par gao xa' no go xa' kun rē nguy, 50 no xa' nile' mandad ze' yē'd or nale't mos re' xigab, 51 orze' dox zakzi xa' mos re', no xē'l xa' mos plo nzhō rē men nikide men; ze' go'n mos di yalne, haxta kwezh lēi mos.

25

Kwent che'n chi' una' ye'n

1 'No nu plo nile' Dios mandad nak nela kwent che'n chi' una' ye'n, xa' kinu kwa'n nizini kun aseit, par nzha bixa' jwandang. Dub kimbēz bixa' zhin miyi' xa' nak che'n jwandang ze', 2 gai' una' ye'n re', xa' naro'b laxto', mbaino zigai' una' ye'n, xa' natsin. 3 Rē una' ye'n, xa' naro'b laxto' re', nzhanu ka bixa' kwa'n nizini, per nangweit' bixa'

xche'p aseit part par yo le'n kwa'n nizini kwa'n nzen bixa'.⁴ Per rë una' natsin re', nzhanu bixa' kwa'n nizini no part ka nzhanu bixa' xche'p aseit.⁵ No por dox milë' xa' nak che'n jwandang re', orze' rë una' ye'n ze' nze' mikal' lo, no nguzen mikal' bixa'.⁶ Paste garol yë'l, mien nibizhyë tu men: "¡Biwi! go, lë' xa' nak che'n jwandang mizhin la! ¡Guro! rë go par kwín go kun lë' xa'!"⁷ Orze' rë una' ye'n ngwaxche, mitsinki bixa' kwa'n nizini re',⁸ orze' nzhah rë una' ye'n, xa' naro'b laxto' ze', lo rë una' natsin re': "Tatu wen gag go, ne' go che'p aseit che'n go ka' no, porke kwa'n kizini no re', nzadlox aseit le'ne."⁹ Orze' nzhah rë una' natsin ze': "Nane't noi, nzha ska nagale par no. Neka wazi' goi par go."¹⁰ No dub nzhazi' rë una' ze' orze' naro'b laxto' ze', lë'chi mizhin miyi' gag jwandang che'n ze', no za gai' una' natsin nguio le'n yo' kun lë' miyi', orze' miao' ro' yo'.¹¹ No guzhëla ze', mizhin rë una' ye'n, rë xa' naro'b laxto' ze', ro' yo'; orze' nzhah bixa': "¡Señor, señor! ¡Bixa! go ro' yo' yo' no!"¹² Orze' nzhah miyi' nak che'n jwandang ze': "Walika kwa'n nin, nalibe'ta' go."

¹³ Kuze' nzhah Jesús:

—Gok go natsin, porke nanet go cho zhë no ni or yala.

Kwent che'n dimi

¹⁴ 'No nu ska, plo nile' Dios mandad nak nela xmod mile' tu miyi'; jwaltra' di ro' xa' lazha xa' tu tiemp, ngurezh xa' rë mos che'n xa' par mila' xa' rë dimi che'n xa', kë rë xa' re' zhi'n kun lë'i.

¹⁵ 'Lo tu xa' mila' xa' gai' mile, no lo xtu xa' mila' xa' chop mile, mbaino lo xtu xa' mila' xa' tu mile; lo tu ga' rë mos mila' xa' dimi kwa'n zu'tsa bixa', orze' nzha xa' nak che'ne.¹⁶ No mos kwa'n mia'nnu gai' mile, tuli ka unkë xa' zhi'n kun lë'i, no mile' xa' gan xtu gai' mile.¹⁷ No sa' ska mos xa' mia'nnu chop mile, mile' xa' gan xchop mile.¹⁸ Per mos xa' mia'nnu tu miltsai, nde'n xa' tu ye'r le'n yuo par nguluka'ch xa' dimi che'n xa' nile' mandad lo xa'.

¹⁹ 'No dox la xche nzhai, lë'chi ñë'd xa' nile' mandad lo rë mos, orze' ngurezh xa' rë mos che'n xa' par mina'b xa' kwent lo tu ga' bixa'.²⁰ Galo laka, nded xa' mia'nnu gai' mile, miza' xa' zigai' mile kwa'n mile' xa' gan, no nzhah xa': "Lë'o, go mila' gai' mile lon, per biwi' go, lë' xtimi go mile' gan xtu gai' mile dimás."²¹ Orze' nzhah xa' nile' mandad lo xa': "Lë'ska lë' kwa'n mile'l, mos wenal mbaino nzhonal di'zh. Kun che'ptsai, wen mile'l; lë'da ne kwa'n más kwa'ro ka'l. Guded lizha, no bizak laxto' kuda."²² Orze' nded xtu mos xa' mia'nnu chop mile, nzhah xa': "Lë'o, go mila' chop mile lon, mbaino lë' xchop mil

xine re' kwa'n mile'i gan."²³ Orze' nzhah xa' nile' mandad lo xa': "Lë'ska lë' kwa'n mile'l, mos wenal mbaino nzhonal di'zh. Kun che'ptsai, wen mile'l; lë'da ne kwa'n más kwa'ro ka'l. Guded lizha, no bizak laxto' kuda."²⁴ Per or nded mos kwa'n mia'nnu tu mile, nzhah mos lo xa' nile' mandad re': "Lë'o, na nzhakbe' go, go nak tu men nina'b kwent dimás, no nilits go yalgo'n plo gat nzha'nt go, mbaino niguchao' go kwa'n gat lë' che'n go.²⁵ Kuze', mizheb da lo go, ngulu'chaa dimi che'n go le'n yuo, per nal lë'i re'."²⁶ Orze' nzhah xa' nile' mandad lo mos re': "¡Tatu nakapal mbaino jlojal! Chi lë'l nane, nak da tu men nina'b kwent dimás, no nilitsa plo gat nzha'nta, mbaino niguchao' kwa'n gat lë' cheda,²⁷ orze', ¿chon ska nanggol dimi da bank par ngale'i gan xine?"²⁸ Orze' nzhah xa' nile' mandad ze' lo más xa' nzhin ze': "Gulat go dub tu mil dimi ba' lo xa', no biza' goi ka' mos xa' kinu chi' mile ba',²⁹ porke xa' mile' lë'tsa lë' kun kwa'n mizan nka' xa', xa' ze' zan más nayaxe ka'; per xa' mile' gat lë' kun kwa'n mizan nka' xa', ter che'ptsa kwa'n kinu xa', lë'i kubchin lo xa'.³⁰ Orze' wala' go mos xa' nazu't re' al tich lo nakao, plo nzho yalnawin no yalne, haxta kwezh lëi mos."

Or gab Jesús xmod gak kun tu ga' men

³¹ 'Or yi'd Xga'n Dios, Me nu nak tu men yizhyuo, kun rë yalnazhon no kun rë ganj che'n Xuz Me, par zob Me plo nazhon,³² mbaino rë men yizhyuo kwín lo Me par lë' Me men che'n Me xid más rë men, nela nigo' men mbëkxi'l xid rë chib;³³ lë' lad direch che'n Me zhin Me rë men che'n Me xa' nak nela mbëkxi'l ga', no lë' lad skierd che'n Me zhin Me rë men xa' nak nela chib ga'.³⁴ Orze' gab rey lo rë xa' nzhin lad direch che'n Me: "Dë' go, porke go nak xa' niwi' Xuz wen lo, par gal go rë kwa'n kinu Me par go dizde or naga yuxkwa' yizhyuo,³⁵ porke or mila'n da, mine' go kwa'n ndaü; no or mizei' laxto'n, mine' go kwa'n ngu'n; mbaino or ngok da nela tu men nze' zit, mine' go tu plo mia'n da;³⁶ no or niyen xaba, mine' go kwa'n ngoka; no or ngokne da, mbi'dtswi' go ma da; mbaino or nguio'n lizhyi'b, mbi'dtswi' go lon."³⁷ Orze' gab rë xa' mile' kwa'n nzhakla Dios: "Lë'o, ¿pok une no mila'n go, no mine' no kwa'n ndao go?, o, ¿pok une no, mizei' laxto' go, no mine' no kwa'n ngu' go?,³⁸ mbaino, ¿pok une no nkizë go nela tu men zit ga' no mine' no tu plo mia'n go?, o, ¿pok mia'n go niyent xab go no mine' no kwa'n ngok go?,³⁹ o, ¿pok une no ngokne go, o nguio go lizhyi'b, mbaino mbi'dtswi' no ma go?"⁴⁰ Orze' lë' rey gab: "Walika kwa'n nin, rë kwa'n mile' go por tu rë wecha, xa' chigab natsakt be's, kun na mile' gol."

⁴¹ 'Orze' gab rey lo rè xa' nzhin lad skierd che'n Xa': "Chi go lon, go xa' nzhi'b de; bizè go plo ñol bèl kwa'n nayot yal, kwa'n ngokxao' par Mizhab no par rè ganj che'n xa', ⁴² porke or mila'n da, nangane't go kwa'n ngau; no or mizei' laxto'n, nangane't go kwa'n ngo'n; ⁴³ no nkizè'n nela tu men zit ga', no nangane't go tu plo ngayana; ngok jwalt xaba, no nangane't go lar ngaka; mbaino ngokne da no nguio'n lizhyi'b, nangayi'dtsi't go ma da." ⁴⁴ Orze' gab rè men ze': "Lè'o, ÷pok une no go mila'n go, o nizèi' laxto' go, o nkizè go nela tu men zit ga', u or ngok jwalt xab go, o ngokne go o nguio' lizhyi'b, mbaino ngaknut no go?" ⁴⁵ Orze' lè' rey gab lo bixa': "Walika kwa'n nin, por nangaknu go ni tu rè men nzhin re', xa' nile' kwa'n nzhapa, ter chigab natsakt xa' be's, no por mile' go sa' kun lè' bixa', kuna mile' goi." ⁴⁶ Rè men re' bi plo zakzi bixa' par dubta', mbaino rè xa' mile' kwa'n nzhakla Dios, lè' bixa' ban par dubta' kun Dios.

26

Mia'n bixa' di'zh xmod zen bixa' Jesús
(Mr. 14:1-2; Lc. 22:1-2; Jn. 11:45-53)

¹ Or milox midi'zh Jesús kure', nzhab Me lo rè men che'n Me:

² —Lè' go nane ka, nzhak jwalt chop ngu-bizh par gal lani Pask, mbaino lè' men chi da, na Xga'n Dios, no nak da tu men yizhyuo, par kè' men da lo krus.

³ Le'n rè ngubizh ze', lo luwe che'n Caifás, xa' nak yub ngulèi' ro, ze' migan rè ngulèi', rè xa' nile' mandad xid más rè ngulèi', no kun rè xa' kwa'n nilu' ley, mbaino kun rè xa' nzo lo rè men Israel, ⁴ par mia'n bixa' di'zh xmod zen bixa' Jesús xla'n par gut bixa' Me, no nu nzhab bixa':

⁵ —Nale't bei dub kiyak lani, par nachèldil be men.

Tu una' michob aseit nax yek Jesús
(Mr. 14:3-9; Jn. 12:1-8)

⁶ No or nzo Jesús yezh Betania, ngwatao Me lizh Simón xa' nguzak tu yalyizh kwa'n lè lepra. ⁷ Or nzo Jesús lo mes, mizhin tu una' kun tu bidr ónice kwa'n dox tsak; le'ne nzhob aseit kwa'n lè nardo kwa'n viv, no dox tsake, no michob una' rétsai yek Jesús. ⁸ Or une rè men che'n Jesús kure', niyi' bixa', no nzhab bixa':

—¿Chon mitsinu una' aseit ba? ⁹ Ngak ngado aseit nax ba' nayax dimi, orze' ngaga'z dimi ze', ngaka' rè men yent kwan nzhap.

¹⁰ Per or mbin Jesús kure', nzhab Me:

—¿Chon niyi' go lo una' re'? Dox tu kwa'n nzhon mile' una' por da; ¹¹ rè men yent kwan nzhap, zilita' yo bixa' xid go, per na gat lè't zilita' zon kun go. ¹² Kwa'n mile' una' re', or michob una' aseit nax yeka, mile'

xa'i par mizuxkwa' xa' kwerp da or ga'ch da. ¹³ Walika kwa'n nin; rè plo di'zh men widi'zh nzhon che'n Dios por da, nu ska kwa'n nzhon kwa'n mile' una' re' yèt, nes par rè men gon kwa'n mile' una' re'.

Ngox ka' Judas Iscariote par michi xa' Jesús

(Mr. 14:10-11; Lc. 22:3-6)

¹⁴ Orze', lè' Judas Iscariote, xa' nzhob xid za tu dusen men che'n Jesús, ngwa xa' lo rè ngulèi' ro, par chi xa' Jesús lo rè xa' re', ¹⁵ no nzhab Judas:

—¿Plak kix go kan nes chi'n Jesús lo go?

Undix rè xa' re' nka' Judas, gal bichi' pes kwa'n plat, ¹⁶ no dizde orze', mikwa'n Judas xmod, chi xa' Jesús lo rè men ze'.

Lult yè'l kwa'n ndao xche' Jesús kun za tu dusen men che'n Me

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ No zhè galo laka che'n lani Pask, or nzhao men Israel pan yent lewadur, orze' nguzubi rè men che'n Jesús, par nzhab bixa' lo Me, plo chao' bixa' kwa'n gao bixa' yè'l lani Pask. ¹⁸ Orze' nzhab Jesús:

—Wa go le'n yezh; ze' yazhè'l go tu miyi', no guzh go lo xa': "Lè' Maestr ne: Lè' or da nzhazhin la, no lizhal len lani Pask kun rè men da."

¹⁹ No mile' rè men che'n Me dike xmod nzhab Me; ze' michao' bixa' kwa'n gao bixa' yè'l ze', par le' bixa' lani Pask. ²⁰ Or ngula yè'l, nzo Jesús lo mes kun za tu dusen men che'n Me, ²¹ no dub kiyao bixa', nzhab Me:

—Walika kwa'n nin, yub tu rè go re', gak xa' chi da lo rè xa' gut da.

²² Orze' dox miwin laxto' bixa', nguzublo mina'bdi'zh tu ga' bixa' lo Jesús, nzhab bixa':

—Lè' go, ¿chi nai?

²³ Per nkab Jesús:

—Mís tu rè xa' kwa'n nikè pan che'n le'n kwa'n nzhagune. ²⁴ Lè' Xga'n Dios Me nu nak tu men yizhyuo, lè' Me gat nela xmod nzo bni' ka lo Yech che'n Dios, per, ¿zhe'b nalats nza men chi Me! Más wen nangalt xa' ze' yizhyuo re'.

²⁵ Orze' nzhab Judas, xa' kwa'n le' kure':

—Maestr, ¿chi nai?

Nkab Jesús:

—Mís lu nei.

²⁶ No dub kiyao bixa', nguzen Jesús pan, miza' Me xkix lo Dios, orze' michix Mei, no miza' Mei, ka' rè men che'n Me, mbaino nzhab Me:

—Kure' nak kwerp da; guzen goi, gao go.

²⁷ Orze' nguzen Me tu vas nits gub; se'ska miza' Me xkix lo Dios, no miza' Mei, ka' rè men che'n Me, nzhab Me:

—Gu' rè go kure'; ²⁸ kure' nak ren da kwa'n xon; por lè'i ya'n Dios di'zh lo rè men da par che' Dios rè kwa'n nzè'b xki nayax

men lo Me. ²⁹ Lë' da ni lo go, nago'tra' nits gub xtu wëlt nela xmod kiyo'ne nalre'; or go'ne xtu wëlt kun go plo nile' Dios mandad, xa'la mod gake.

Midi'zh Jesús, lë' Per gab, gat nili'be't xa' Jesús

(Mr. 14:26-31; Lc. 22:31-34; Jn. 13:36-38)

³⁰ Or milox mikë' bixa' tu kant che'n Salmo lo Dios, orze' nzha bixa' yek lom plo lë' Olivo, ³¹ orze' nzhah Jesús lo rè men che'n Me:

—Nal yë'l re', lë'u la' nzë'b da, porke se' nzobni' lo Yech che'n Dios: “Lë'da gut miyi' kwa'n nikina mbëkxi'l, no lë' rè mbëkxi'l re'chbe.” ³² Per or ruban da, lazh men Galilea kwëza yi'd go.

³³ Orze' nzhah Per:

—Ter rè xa' re', la' nzë'b go, per nase, nalata go.

³⁴ Orze' nzhah Jesús:

—Walika kwa'n nin lol, mis nal yë'l re', wëlt yon or lox gabal gat nili'be'tal da, orze' kë' tu nguid gai kant.

³⁵ Per garga'l nzhah Per:

—Ter tutsa gat da kun go, per nalata go! No se'ska nzhah rè bixa'.

Jesús mina'b lo Dios le'n huert plo lë Getsemani

(Mr. 14:32-42; Lc. 22:39-46)

³⁶ Lult ngwa bixa' tu plo lë Getsemani, ze' nzhah Jesús lo rè men che'n Me:

—Re'ga guzob go; lë' da nzhana'b lo Dios.

³⁷ No or nzhanu Me nab tsa Per, kun Jakob, mbaino Juan, orze' tuli nguzublo niyentra' jwers Me por tanta nizheb Me, no netra' Me kwan le' Me, ³⁸ orze' nzhah Me lo yon xa' re':

—Nazhe'b dox nizi da, nela tu men naxiat gai; biya'n go re', naga't go; bikina go da.

³⁹ Orze' nguzë Jesús xche'p dilant; ze' ngo't kuslo Me lo yuo, no mina'b Me lo Dios, nzhah Me:

—Xuza, par Lu rëi gak le'l. ¿Chi zak kubchil da lo rè kwa'n nzadkë ticha re'? Per gat lë't kwa'n nin kuze' gak, nab tsa kwa'n nzhaklale.

⁴⁰ Orze' nguiubre Jesús plo nzhin yon men che'n Me re'; per une Me, lë' yon xa' naxnaa la. Orze' nzhah Me lo Per:

—¿Chi nguzen la mika'l go? ¿Chi naxekt go ni tu rrat win tsa, ga'na go par kina go da? ⁴¹ Bikina go go no guna'b go lo Dios, par nayachin go lo che'n Mizhab. Le'n laxto' go nzhakla ka go che'n Dios, per kwerp che'n go gat nzhaklate.

⁴² Orze' ngwana'b Jesús xtu wëlt lo Xuz Me Dios, nzhah Me:

—Xuza, chi nagak ded rè kwa'n nazhe'b zaka re', gak kwa'n nzhaklal.

⁴³ Or nguiubre Jesús, xtu wëlt naxnaa la rè men che'n Me, porke dox nzë mika'l lo

bixa'. ⁴⁴ Orze' mila' Jesús naxnaa bixa', wëlt mion ngwana'b Me lo Xuz Me Dios, se'ga' nzhah Me. ⁴⁵ Lult miëk Me plo nzhin yon men che'n Me, nzhah Me:

—¿Taxa, se' gaka naxnaa go no kile' go diskans? Biwi' go, lë' or ngol la, lë' Xga'n Dios, Me nu nak tu men yizhyuo, lë' men chi Da lo rè men nzë'b xki lo Dios. ⁴⁶ Waxche go, cha' go, ro' be re'; biwi' go, lë' xa' chi da nzë la ba'.

Ngwaga' Jesús

(Mr. 14:43-50; Lc. 22:47-53; Jn. 18:2-11)

⁴⁷ Se'gaka kidi'zh Jesús kure', lë' chi mizhin Judas, yub tu xa' nzho xid za tu dusen men che'n Jesús, kun tu béd men; cho bixa' nzen spad no más bixa' nzen yarrot. Rè xa' re' nzë por mandad che'n rè ngulë'i ro no por rè xa' nzo lo rè men Israel. ⁴⁸ No xa' chi Jesús, nzhah ba', le' xa'i kun tu se'i: “Xa' chiro'n ta' kwats, xa' ze'i, guzen go xa'.”

⁴⁹ Or nguzubi xa' lo Jesús, nzhah xa':

—¡Mal maestr!

Orze' michiro' xa' ta' kwats Me, ⁵⁰ no nzhah Jesús lo Judas:

—Wech, kwa'n nzël, tuli bile'i.

Orze' nguzubi men, no nguzen bixa' Jesús, ⁵¹ lë' chi tu rè xa' nzo kun lë' Me, ngulo' spad che'n, micho' xa' nzha tu rè mos che'n ngulë'i ro, ⁵² orze' nzhah Jesús lo xa' re':

—Gulu'chao' spad che'nal, jbila'o unelail, porke rè xa' nidil kun spad, kun lë'skai gat xa'. ⁵³ ¿Chi nanetal, lë'da gak na'b lo Xuza, no tuli xë'l Me más di tu dusen mil ganj, par dil kun rè men re'? ⁵⁴ Per, ¿xmod ka gak widi'zh kwa'n nzobni' lo Yech che'n Dios, se'ka naki'n gak?

⁵⁵ Orze' nzhah Jesús lo men nayax ze':

—¿Chon nzë go kun spad mbaino kun yarrot? ¿Chigab tu men wa'n zen go? Zilita' nguzon lo luwe che'n yado', milun widi'zh che'n Dios lo go, no nangazent go da. ⁵⁶ Per rè kure' nzhak par gak rè kwa'n mizobni' rè profet, rè xa' midì'zh por Dios.

Orze', rè men che'n Jesús mikë' karre, mila' nzë'b bixa' Me.

Mizhin Jesús lo rè gustis men Israel, rè xa' más tsak

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Orze' mbi'y bixa' Jesús lo Caifás, ngulë'i ro; plo nzhin rè xa' nilu' ley, kun rè xa' nzo lo rè men Israel. ⁵⁸ No lë' Per zit-zit nzhakë tich Jesús, haxta mizhin xa' lo luwe che'n ngulë'i ro. Orze' nguzob Per xid rè xa' nikina yado', par kila'ch Per, nabei kwan pa' li'nu bixa' Jesús.

⁵⁹ Rè ngulë'i ro, no rè xa' nzo lo rè men Israel, mbaino rè gustis xa' más tsak, kikwa'n bixa' tu men, kë' kixu' Jesús, tu kwa'n ñal gat Me, par gut bixa' Me. ⁶⁰ Per yent kwan ngane bixa' nak Jesús, ter nayax men kikë'

kixu' Me. Per lult mizhin xchop xa' kwa'n nzhab:

⁶¹—Mbin no midi'zh xa' ba', nzhab xa': "Na chil yado' che'n Dios, mbaino chontsa ngubizh, kuxkwane xtu wëlt."

⁶²Orze' nguzuli ngulëi' ro, par nzhab xa' lo Jesús:

—¿Chon gat nikabal? Biwi', kwan kine rë xa' re' nakal.

⁶³Per yent kwa'n ngakab Jesús. Orze' minabdi'zh ngulëi' ro xtu wëlt, nzhab xa':

—Por Dios, Me naban par dubta', bine lo no, chi lu ka nak Krist, Xga'n Dios.

⁶⁴Orze' nzhab Jesús:

—Yub go ne dai. Per nin lo rë go, lë' go ne, Xga'n Dios, Me nu nak tu men yizhyuo; lë' Me zob lad direch che'n Dios, Me nile' mandad lo rë; mbaino ne go, lë' da yal le'n tu xkao lo yibë'.

⁶⁵Orze' michëz ngulëi' ro xab, nela tu señ, lë' Jesús midi'zh tu kwa'n nakap par lo Dios. Orze'se nzhab xa':

—Rë go mbin, lë' xa' midi'zh tu kwa'n nakap lo Dios. ¿Kwan ra' gakla be, ne men, xtu kwa'n nak xa' re'? Rë go mbin kwa'n midi'zh xa'. ⁶⁶Nal, ¿kwan ne go ñal xa'?

Orze' nkab rë men ze':

—Nzhap xa' dol, no ñal gat xa' por kuba'.

⁶⁷Orze' michuk bixa' lo Jesús, no ndin men Me; mitsao' bixa' lo Me orze' ndich men ro' Me, ⁶⁸no nzhab bixa':

—Chi walika lu nak Krist, ¡guro' divin cho ndinal, nabei!

Nzhab Per, gat nilibe't xa' Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹Dub kiyak rë kure', lë' Per nzob al tich, lo luwe, lë'chi nguzubi una' nak mos che'n ngulëi' ro lo Per, nzhab una':

—Nu ka lu, nikizë' kun Jesús, xa' nzë Galilea.

⁷⁰Per dilant lo rë nak men nzhin ze', nzhab Per lo una':

—¡Gat nuta' da! ¡Neta kwan kidi'zhal you!

⁷¹Or nguro' Per ro' yo', une xtu kriad che'n ngulëi' ro Per, nzhab una' lo más rë men nzhin ze':

—¡Lë' nu ka xa' re', nikizë kun Jesús Nazareno!

⁷²Per xtu wëlt mize't Per Dios, nzhab Per:

—Lë Dios, gat nilibe'ta' xa' ba'.

⁷³Guzhëla di ze', pla rë xa' nzhin ze' nguzubi lo Per, nzhab bixa':

—¡Walika, nukal nak tu rë men che'n xa' ba', porke dox nakbe'i di xmod nidi'zhal namás!

⁷⁴Orze' xtu wëlt mize't xa' Dios, nzhab xa':

—¡Lë Dios, walika, gat nilibe'ta' xa' ba'!

Lë'chi orze' mikë' nguid gai kant. ⁷⁵No mitsila Per kwa'n nzhab Jesús: "Walika kwa'n nin lol, mis nal yë'l re', wëlt yon or lox

gabal gat nili'be'tal da, orze' kë' tu nguid gai kant." Orze' nguro' Per ze', dox nzh'o'n Per.

27

Mbi'y bixa' Jesús lo Pilat

(Mr. 15:1; Lc. 23:1-2; Jn. 18:28-32)

¹Xtu riyë'l garzi'l laka, rë ngulëi' xa' nile' mandad kun rë xa' nzo lo rë men Israel, mikwa'n bixa' mod par gut bixa' Jesús.

²Nali'b Jesús mbi'y bixa' Me lo Pilat, xa' nak gobernador lo rë men Roma.

Judas Iscariote mbit yub xa' xa'

³Judas, xa' mito Jesús, or une xa' nzhab rë ngulëi' xa' nile' mandad, kun rë xa' nzo lo rë men Israel, lë' Jesús gat, dox mizine xa'i. Kuze' ngwazhireska xa' dub gal bichi' pes dimi plat lo rë xa' re', ⁴no nzhab Judas lo bixa':

—Dox nzë'b xkin lo Dios, por michi'n tu men lo go por dimi, tu xa' yent kwan nzë'b par ñal gat xa'.

Orze' nzhab rë xa' re':

—¡Tlë't no miki'lal! ¡Kuba' xkwentax!

⁵Or ngulubi Judas rë dimi ze' le'n yado', tuli ka ña xa', ngulo xa' do' yën xa', yub xa' mbit xa'. ⁶Orze' rë ngulëi' xa' nile' mandad lo más rë ngulëi', mikan bixa' dimi ze', orze' nzhab bixa':

—Dimi re' nzh'i'b de la, lë'i ngox ngut men; lo ley che'n be nzobni', nagakt yo dimi gat lë' plo nzh'o dimi che'n yado'.

⁷Orze' mia'n bixa' di'zh, kun dimi ze', zi' bixa' tlë' yuo plo lë, yuo che'n xa' nichao' rë kwa'n bitsi'n, par ga'ch rë men zit. ⁸Kuze' ngulolë men yuo ze', Yuo Ren, haxta zhë nalzhë, ⁹nes par ngok rë widi'zh kwa'n midi'zh profet Jeremías, tu xa' midi'zh por Dios, or nzhab xa': "Nguzen bixa' gal bichi' pes dimi plat, pres kwa'n nzhab rë men Israel tsak men Da. ¹⁰Kun dimi re', nguzi' bixa' yuo che'n xa' nichao' rë kwa'n bitsi'n, nela xmod mile' ka Dios mandad da."

Jesús lo Pilat

(Mr. 15:2-5; Lc. 23:3-5; Jn. 18:33-38)

¹¹Or michi bixa' Jesús lo Pilat, xa' nak gobernador, nzhab Pilat lo Jesús:

—¿Chi lu nak rey che'n rë men Israel?

Nkab Jesús:

—Yub go kine dai.

¹²No or kikë' rë xa' re' kixu' Jesús; rë ngulëi' xa' más nile' mandad, kun rë xa' nzo lo rë men Israel, yent kwan ngakab Me. ¹³Lult mina'bdi'zh Pilat lo Jesús, nzhab Pilat:

—Taxa, ¿chi gat kiyontal, dox kwa'n kine rë xa' re', nakal?

¹⁴Per yent kwan ngakab Jesús, orze' xe mia'n Pilat tuli, net xa' kwan le' xa'.

*Mina'b men, kē Jesús lo krus**(Mr. 15:6-20; Lc. 23:13-25; Jn. 18:38-19:16)*

¹⁵ No kad li'n or nzhal lani Pask, kinu Pilat tu kostumb, niliya' xa' tu men nzho lizhyi'b, dike xa' gab rē men. ¹⁶ No nzho tu miyi' lē Barrabás lizhyi'b, tu xa' dox nzho'b xti'zh nakap. ¹⁷ Or migan nayax men lo Pilat, par nabei, cho xa' liya' xa', kuze' nzhab Pilat lo rē xa' kikē' kixu' Jesús:

—¿Cho nzhakla go liyan? ¿Chi Jesús Barrabáze, o Jesús xa' lē Kriste?

¹⁸ Sa' nzhab Pilat porke ngwanu laxto' xa', lē' rē xa' nak zhi'n ze', michi Jesús por mal laxto' bixa'. ¹⁹ Dub nzob Pilat plo nile' xa' yalgustis, mixē'l una' che'n xa' tu abis lo xa', nzhab una': "Nale'tal ni tu kwa'n kun miyi', xa' nile' kwa'n nzhakla Dios ba'; por lē' xa', dox nazhe'b micha' laxto'n na'guxin."

²⁰ Per lē' rē ngulē'i, xa' más nile' mandad, kun rē xa' nzo lo rē men Israel, mile' bixa' gan, miki'l bixa' men, par na'b bixa' lo Pilat, liya' xa' Barrabás, no lē' Jesús, gab bixa' gat. ²¹ Orze' nzhab Pilat xtu wēlt lo rē men:

—Di lo rop xa' re', ¿cho xa' nzhakla go, liyan?

Nkab rē men:

—jBarrabáze!

²² Per nzhab Pilat:

—Bai kun Jesús, xa' nzhab go lē Krist, ¿xmod gak xa'?

Orze' rē men nkab:

—jKē xa' lo krus!

²³ Orze' nzhab Pilat:

—¿Per chon? ¿Kwan tu kwa'n gat lē' mile' xa' re'?

Per xtu wēlt nguruzhiē rē men:

—jKē xa' lo krus!

²⁴ Or une Pilat, yentra' kwan nzhon rē men, no haxta kun Pilat, niyi' la bixa', orze' mile' Pilat mandad ñē'd nits, nde'b ya' xa' dilant lo rē men, no nzhab xa':

—Gat lē't yeka xo'b kwa'n gat miyi' ba'; kuba' xkwent go.

²⁵ Orze' nkab rē men:

—jYek no xo'b kwa'n gat xa' ba', mbaino yek rē xmē'd no!

²⁶ Orze'se miliya' Pilat Barrabás, no lē' Jesús, mile' xa' mandad, ngurēle tich; mbaino michi xa' Jesús lo rē sondad che'n xa' par kē' bixa' Jesús lo krus. ²⁷ No mbi'y rē sondad Jesús ro' yalao kwa'n lē 'pretorio'. Ze' migan pas xo'p gayo' sondad román naka'n lo Jesús. ²⁸ Or ngulo' bixa' xab Jesús, migak bixa' Me tu lar naxne, chigab che'n tu rey ga'. ²⁹ No mizuxkwa' bixa' tu koron yich par mizob bixa'i yek Jesús, mbaino ngulo bixa' tu bar ya' Me lad direch, orze' nguzuxib bixa', kiyitnu bixa' Me, nzhab bixa':

—jRey che'n rē men Israel, par dubta' ban go!

³⁰ No michuk bixa' lo Jesús, mbaino mis bar kwa'n nzho ya' Me, mikē' bixa'i yek Me. ³¹ Or milox nguzhitnu bixa' Jesús, ngulo' bixa' lar naxne ze' yen Jesús, orze' migak ska bixa' Me xab Me, orze' ñanu bixa' Jesús par kē Me lo krus.

*Nkē Jesús lo krus**(Mr. 15:21-32; Lc. 23:26-43; Jn. 19:17-27)*

³² Or nzharo' bixa' ro' yezh, mizhē'l bixa' tu miyi' yezh Cirene xa' lē Simón, jwers mile' rē sondad, mbi'y xa' re' krus che'n Jesús. ³³ Orze' ñanu bixa' Jesús plo lē Gólgota. Widi'zh re' gab, Wes Yek Men Ngut. ³⁴ Ze' miza' bixa' vin kwa'n noch mirra par go Jesús; per or mile' Me prebe, nangot Mei. ³⁵ Orze' mikē' bixa' Me lo krus, no nguzhit bixa' di cho le' gan xab Me. ³⁶ Ze' nguzob rē sondad kicina par yent cho la Me lo krus. ³⁷ No yek krus che'n Jesús, mikē' bixa' por kwan ngut Me, no se' mizob bixa': "Xa' re' Jesus, rey che'n rē men Israel."

³⁸ No nu chop wa'n mikē' bixa' lo krus orze'; tu xa' lad direch, no xtu xa' lad izkierd che'n Jesús, ³⁹ No rē xa' nided ze', maska nikwin bixa' yek bixa', kidi'zh bixa' nakap lo Jesús, ⁴⁰ nzhab bixa':

—jLu kwa'n nidi'zh, chilal yado', no chontsa ngwizh, kuxkwa'le xtu wēlt; nal, bile' nagattal! Chi lē'i walika, nakal Xga'n Dios, nal, igula lo krus ba'!

⁴¹ Se'ska midizh rē xa' re' nakap lo Jesús: rē ngulē'i xa' nile' mandad, kun rē xa' nilu' ley, mbaino kun rē xa' nzo lo rē men Israel; nzhab bixa':

⁴² —Nayax men miliyak xa', per kun lē' xa' yent kwan gak le' xa'. No chi lē' xa' walika nak rey lo rē men Israel, jnal la xa' lo krus, nes par yila be xa'! ⁴³ Nidi'zh xa', ñila xa' Dios, nal nabei chi zaknu Dios xa' chi lē' Dios wali nazhi' xa'. ¿Gat lē' xa' nidi'zh, Xga'n Dios xa'?

⁴⁴ No haxta rop wa'n, xa' nikē lo krus tu ga' lad che'n Jesús, midizh nakap lo Me.

*Or ngut Jesús**(Mr. 15:33-41; Lc. 23:44-49; Jn. 19:28-30)*

⁴⁵ Dizde garol ngubizh nguzublo mikao dub yizhyuo, haxta las tres zhē midiy', ⁴⁶ no mis orze', paste las tres, naye nguruzhiē Jesús, nzhab Me:

—jEloi, Eloi!, ¿lama sabactani? (Widi'zh re' gab: jDios da! jDios da!, ¿chon mila' nzē'b go da?)

⁴⁷ No pla men nzhin ze' mbin widi'zh re'; orze' nzhab bixa':

—Bingole, Li kibezh xa' re', tu xa' mixē'l Dios nzhalo.

⁴⁸ Orze' tuli ngwa tu xa' ngwagazh tlē' sponj le'n vin ni; mizob xa'i yek tu yaxtil, orze' michi xa'i ro' Jesús par ngu' Mei, ⁴⁹ per nzhab más rē men:

—Bila' go nabei, chi ziyi'd Li gaknu xa'.

⁵⁰ Orze' xtu wëlt nguru'zhië Jesús, mizi' la Me, ngut Me. ⁵¹ Lë'chi ngurëzla lar nikë le'n yado' plo lë santuar, plo más nazhon, chop lë' ngoke tuli, di al ya haxta al yët; no miwin xo, ngo't bech le'n rë ke; ⁵² mixa'l le'n rë ba', nayax rë men che'n Dios nguruban, ⁵³ nguro' bixa' le'n ba', no dispwes di nguruban Jesús, nguio bixa' yezh Jerusalén, mbaino une nayax men rë xa' re'. ⁵⁴ Lë' capitán Roma kun rë sondad che'n xa', rë xa' kikina Jesús; or une bixa', lë' xo miwin kun más rë kwa'n kiyak, dox mizheb bixa', orze' nzhab bixa':

—Walika, Xga'n Dios miyi' re'.

⁵⁵ No nayax rë una', xa' ngoknu Jesús, dizde lazh men Galilea nza'dkë bixa' tich Me; zit nzhin bixa', kiwi' bixa' kwa'n nzhak ze'. ⁵⁶ Xid rë una' ze' nzo Mari Madalen, no Mari xna' Jakob mbaino xna' Che, kun xna' rë xga'n Zebedeo.

Miga'ch Jesús

(Mr. 15:42-47; Lc. 23:50-56; Jn. 19:38-42)

⁵⁷ Or nge, xa' yë'l, orze' mizhin tu miyi' rrik xa' lë Che, xa' nzë yezh Arimatea, no nu xa' men che'n Jesús. ⁵⁸ Ngwa xa' re' lo Pilat par ngwana'b xa' kwerp che'n Jesús, orze' mile' Pilat mandad, za' bixa'i, wei' Che. ⁵⁹ Or mila Che kwerp che'n Jesús lo krus, michël xa'i tu sab nambe kwa'n lë lar lino, ⁶⁰ orze' mika'ch xa' Me le'n tu ba' kub kwa'n nade'n le'n ke; orze' mitsao' xa' ro'i kun tu ke ro, no ña xa'. ⁶¹ No Mari Madalen kun xtu Mari, nzob bixa' ro' ba' plo miga'ch Jesús.

Xa' kikina ro' ba' plo miga'ch Jesús

⁶² Xtu riyë'l, or nded la zhë kwa'n nichao' rë men Israel kwa'n nzha'o bixa' lani Pask; rë ngulë'i' xa' nile' mandad lo más rë ngulë'i', kun rë men fariseo, ngwa bixa' lo Pilat, ⁶³ nzhab bixa':

—Lë'o, nitsila no, miyi' xa' nikide men ze', or naga gat xa', nidi'zh xa', ngubizh yon di gat xa', lë' xa' ruban. ⁶⁴ Kuze' nal, bixë'l go pla sondad che'n go par kina ro' ba', haxta za yon ngubizh; napa' ya rë men che'n xa', yaliwa'n kwerp che'n xa', orze' di'zh rë men che'n xa', lë' xa' nguruban. No kwa'n kide xa' men re', más gat lët' gake ke or galo.

⁶⁵ Orze' nzhab Pilat:

—Bi'y go dike rë sondad naki'n go, par kina haxta plo nzhakla go.

⁶⁶ Orze' ngwa bixa' ro' ba', no mikë' bixa' sey che'n gobier lo ke kwa'n miao' ro' ba' ze', mbaino mizhin bixa' rë sondad kikina ro' ba'.

28

Nguruban Jesús

(Mr. 16:1-8; Lc. 24:1-12; Jn. 20:1-10)

¹ Or nded zhë sabd ze' xtu riyë'l, Mari Madalen kun xtu Mari, ngwatswi' bixa' ro' ba' plo miga'ch Jesús. ² Lë'chi miwin tu xo ro,

ngulali tu ganj che'n Dios lo yibë', nguzubi ganj re' ro' ba', no mizubchi xa' ke kwa'n nayao' ro'i, orze' nguzob xa' lo ke ze'. ³ Nilu' lo ganj re' nela ki che'n tu do'zi' ga', mbaino xab xa', bëo laka nela yeg ga'. ⁴ Or une rë sondad xa' kikina ro' ba' ze' rë ganj re', dox nizheb bixa' maska nixiz bixa' haxta ngwachin bixa', mia'n bixa' nela men ngut ga'; ⁵ per nzhab ganj lo rë una' re':

—Nazhebt go, lë'da nane ka lë' go kikwa'n Jesús, Me ngut lo krus. ⁶ Yent ra' Me re', lë' Me nguruban la, nela xmod mid'i'zh ka Me lo go, ter dë' go, biwi' go plo nguxo'b Me. ⁷ Bizë go tuli, wayab goi lo rë men che'n Me, lë' Me nguruban; no or ya go lazh men Galilea, biwi' go, lë' Me nzhubner la lo go; ze' ne go Me, kimbëz la Me zhin go; kure' nzadnin lo go.

⁸ Orze' ña'oxo'n rë una' ze' nzhayab bixa'i lo rë men che'n Jesús; dox nizheb bixa' per nu ska dox nizak laxto' bixa' por kure'. ⁹ Lë'chi, nguru Jesús lo biuna' nez, no nzhab Me: "iWen ya go!", orze' nguzubi bixa' lo Jesús, nzhab bixa' lo Me nazhon Me, no nde'zh bixa' ni' Me, ¹⁰ orze' nzhab Jesús:

—Nazhebt go; wayab go lo rë wecha, ya bixa' lazh men Galilea; ba' ne bixa' da.

Kwa'n mid'i'zh rë xa' mikina ro' ba'

¹¹ Dub ña rë una' ze', lë'chi rë sondad xa' mikina ro' ba', nzha bixa' yezh Jerusalén, par ngwayab bixa' rë kwa'n ngok ro' ba', lo rë ngulë'i' xa' nile' mandad lo más rë ngulë'i'. ¹² Orze' ngwadi'zhnu rë ngulë'i' ze', rë xa' nzo lo rë men Israel, par mia'n bixa' di'zh xmod le' bixa', no ndix bixa' nayax dimi, nka' rë sondad ze', ¹³ mbaino nzhab bixa':

—Sa' guzh lo rë men: "Rë xa' nak men che'n Jesús, yë'l mbi'd bixa' or naxnaa no, miliwa'n bixa' kwerp che'n Jesús", ¹⁴ no chi lë' Pilat gon kure', la'u no dizhnu xa' par niyent kwan le' xa' kun go.

¹⁵ Orze' nguzen rë sondad ze' dimi, no mile' bixa' nela xmod nzhab ka rë xa' re'; no rë widi'zh kwa'n michao' yek rë men re', haxta zhë nalzhë, se'gaka nidi'zh men Israele.

Kwa'n mika'b Jesús lo rë men che'n Me

(Mr. 16:14-18; Lc. 24:36-49; Jn. 20:19-23)

¹⁶ Dub za chi' bitub men che'n Jesús, ngwa bixa' mont kwa'n ña'n lazh men Galilea, plo nzhab Jesús ya bixa'. ¹⁷ Or une bixa' Jesús, nzho bixa' nzhab lo Me, lë' Me nazhon, no nzho bixa' nangayilat chi lë' Mei. ¹⁸ No nguzubi Jesús lo bixa', nzhab Me:

—Nalse na nile mandad lo yibë' no lo yizhyuo; ¹⁹ kuze' wa go, gudi'zh go xti'zha lo rë lo ben men yizhyuo par gak bixa' men da, no bililë'i' go bixa' por lë Dios Xuz go, no por lë Xga'n Me, mbaino por lë Sprit che'n Dios; ²⁰ no nu bilu' go lo bixa', le' bixa' rë kwa'n

milen mandad lo go; no bitsila go, na nzo
kun rê men da dubta', haxta or lox yizhyuo.

Widi'zh nazhon che'n Jesukrist, kwa'n mizobni' Mark

Juan xa' nililëi' men le'n nits

(Mt. 3:1-12; Lc. 3:1-9, 15-17; Jn. 1:19-28)

¹ Se' nguzublo widi'zh nazhon che'n Dios por Jesukrist, Me nak Xga'n Dios. ² Lo yech che'n profet Isaías, tu xa' midi'zh por Dios chi tiemp, se' nzhab:

Biwi', nzhab Dios lo Xga'n Me, dilant lol xëla tu xa' di'zh por Lu, par kuxkwa' xa' nez dedal.

³ Lo yuo bizh, naye di'zh xa' re' lo rë men:

“Bizuxkwa' go nez che'n Dios, nali laka bile' go nez ro che'n Me.”

⁴ Kuze' nguio Juan le'n yuo bizh, nililëi' Juan men le'n nits, nu nzhab Juan:

—Bila' go rë kwa'n gat lë' nak go, orze' gokléi' go par lu' go, walika mila' go kwa'n nak go, nes par che' Dios rë kwa'n nzë'b xki go.

⁵ No rë men xa' nzë' lazh men Judea, kun rë men yezh Jerusalén, ngwa bixa' lo Juan, ngwaxo'bdol bixa', orze' mililëi' Juan bixa' le'n yo' Jordán. ⁶ No xab Juan nakxao' yich che'n kamey, mbaino nazi' tu yid laxto' xa'; no kwa'n nzhao xa' nak rë ma nela xanch ga' no mizhin ser. ⁷ No se' kidi'zh Juan widi'zh che'n Dios, nzhab Juan:

—Xa' nzadkë ticha más tsak xa' lon; no ni gat ñal da, zi' xa' da nela tu mos ga'. ⁸ Na mililëi' go kun nits, per xa' nzë' re' li'lëi' go kun Sprit che'n Dios.

Juan mililëi' Jesús le'n nits

(Mt. 3:13-17; Lc. 3:21-22)

⁹ Le'n rë ngubizh ze' nguro' Jesús yezh Nazaret, kwa'n ña'n lo yuo che'n men Galilea, par li'lëi' Juan Me you' Jordán, ¹⁰ no or nguro' Jesús le'n nits, une Jesús mixa'l lo yibë', no ngula Sprit che'n Dios yek Me nela tu palom ga'. ¹¹ Lë'chi nguro' tu widi'zh lo yibë' kwa'n nzhab:

—Lu Xga'na xa' nazhi' da; nizak laxto'n por Lu.

Ngokla Mizhab ngakide Jesús

(Mt. 4:1-11; Lc. 4:1-13)

¹² Orze' tuli mbi'y Sprit che'n Dios Jesús le'n yuo bizh. ¹³ Ze' nguio Me cho' ngubizh no cho' yë'l xid rë ma nazhe'b kwa'n nzho dan; ze' plo ngokla Mizhab ngakide Jesús, no lë' rë ganj che'n Dios miza' kwa'n naki'n Jesús.

Nguzublo Jesús kile' zhi'n nazhon che'n Xuz Me Dios

(Mt. 4:12-17; Lc. 4:14-15)

¹⁴ No or nzho Juan lizhyi'b, nguiubre Jesús par lazh men Galilea, plo kidi'zh Me widi'zh

nazhon che'n Dios par ne men xmod yo men plo nile' Dios mandad, ¹⁵ nzhab Me:

—Mizhin la zhë ne men xmod gak men, men che'n Dios; kuze' bila' go rë kwa'n gat lë' nak go, no wayila go widi'zh nazhon re'.

Ngurezh Jesús primer men che'n Me

(Mt. 4:18-22; Lc. 5:1-11)

¹⁶ No tu ngubizh dex nzhaded Jesús ro' lagún kwa'n ña'n lazh men Galilea, ze' une Me rop wech xa' re', Simón no Ndres; kigubi bixa' yex le'n nits par zen bixa' mbël, porke kure' zhi'n che'n bixa', ¹⁷ orze' nzhab Jesús:

—Di'kë go ticha, porke dizde nal, len, lë' go kan men lugar di mbël.

¹⁸ No tuli nzhakë bixa' tich Jesús or mbin bixa' kure', mila' bixa' yex che'n bixa'. ¹⁹ No xche'p dilant ze' une Jesús Jakob xga'n Zebedeo, no wech xa' Juan, rop xa' re' nzob le'n bark, kizuxkwa' bixa' yex che'n bixa', ²⁰ orze' tuli ngurezh Jesús bixa', mila' bixa' Zebedeo xuz bixa' le'n bark kun rë mos che'n xa', no lë' bixa' nzhakë tich Jesús.

Tu miyi' nzho tu mbi mal laxto'

(Lc. 4:31-37)

²¹ Or mizhin bixa' yezh Capernaúm, zhë kwa'n nayi' kë rë men Israel zhi'n, nguio Jesús le'n yo' plo nitse'd bixa' widi'zh che'n Dios, orze' nguzublo kilu' Me widi'zh che'n Dios lo rë men nzhin ze'. ²² Xe mia'n rë men ze' tuli por kwa'n kilu' Jesús, porke kidi'zh Me nela men nile' ka mandad ga', no tlë't nela rë men xa' nilu' leye. ²³ Lë'chi ze' nzo tu miyi', nzho tu mbi mal laxto', naye nguru'zhië miyi' re', nzhab xa':

²⁴ —¿Kwan nizakal kun no, Jesús kwa'n nzë' Nazaret? ¿Chi nzël par lo'xal no? ¡Na nane ka cho lu, Lu nak xa' Nazhon che'n Dios!

²⁵ Orze' nzhab Jesús:

—¡Kiex, bitsao' ro'l, no guro' laxto' miyi' re'!

²⁶ Orze' mile' mbi mal ze' mikao miyi' re', no nguru'zhyëi naye, orze' nguro'tine. ²⁷ Rë men xe mia'n por kwa'n ngok re', mbaino kidi'zh bixa':

—¿Kwan kure'? Kwa'n mile' xa' ba' nilu', lë' xa' nak tu xa' walika nile' mandad, porke, ¡haxta nu rë mbi mal nzhon ro' xa'!

²⁸ Orze' nayan laka nguxo'b di'zh, rë kwa'n nile' Me, rë yezh kwa'n nzhin naka'n lazh men Galilea.

Miliyak Jesús xna'zha'p Simón

(Mt. 8:14-15; Lc. 4:38-39)

²⁹ No or nguro' Me le'n yo' plo nitse'd men widi'zh che'n Dios, tuli nzha Me par lizh Simón plo nak ska lizh Ndres, no Jakob kun Juan nzha kun lë' Me. ³⁰ No lë' xa'zha'p Simón nax kun xlë', orze' lwegä' nzhab bixa'i lo Jesús. ³¹ Orze' nguzubi Jesús, nguzen Me ya' xa' una' re' par ngwaxche xa',

orze' tuli nguro' xlè' xa', mbaino lè' xa' miza' kwa'n ndao rè xa' re'.

Miliyak Jesús nayax men nzhakne
(Mt. 8:16-17; Lc. 4:40-41)

³² No mizhèl la lyuo ngwa'z la ngubizh, rè xa' yezh ze' ngwanu rè men nzhakne, no rè xa' kwa'n nzho mbi mal laxto' lo Jesús par yak bixa'. ³³ Rè bixa' migwa' ro' yo' plo nzo Jesús, ³⁴ orze' miliyak Jesús nayax rè xa' nizak rè lo yalyizh, no ngulo' Me mbi mal laxto' nayax men, per nangala't Jesús ngadi'zh rè mbi ze', porke nzhakbe'i cho nak Jesús.

Milu' Jesús widi'zh che'n Dios lo rè men yezh Galilea
(Lc. 4:42-44)

³⁵ No xtu riyè'l, garzi'l laka, nakao ra'; nguro' Jesús par nzhadi'zh Me tu lad lo Dios plo yent cho nak. ³⁶ No Simón kun rè xa' nzo kun lè' xa', nzhakwa'n bixa' Jesús, ³⁷ no or une bixa' plo nzo Me, nzhab bixa' lo Me:

—Rè men re' kizikwa'n go.

³⁸ Orze' nzhab Jesús:

—Cha'o nzha be rè yezh kwa'n ña'n gax re', par dizha widi'zh nazon che'n Dios rè ze'; par kuze' ka nzhal re'.

³⁹ Orze' nkizè Jesús rè yezh kwa'n ña'n lazh men Galilea, par ngwalu' Me widi'zh che'n Dios le'n rè yo' plo nitse'd men widi'zh che'n Dios, mbaino ngulo' Me rè mbi mal laxto' rè men.

Miliyak Jesús tu men xa' nizak yalyizh kwa'n lè lepra

(Mt. 8:1-4; Lc. 5:12-16)

⁴⁰ No ze' nguzubi tu men lo Jesús, xa' re' nizak yalyizh kwa'n lè lepra, no nguzuxib xa' re' par mina'b xa' lo Jesús, nzhab xa':

—Chi lè'o nzhaklai, gak liyak go da.

⁴¹ Dox milats laxto' Jesús xa' re', orze' migal Me xa', mbaino nzhab Me:

—Nzhaklan yakal; lè'l miakla.

⁴² No tuli mitlo yalyizh ze', mimbe xa'.

⁴³ No ngulunez Jesús xa', per dox nzhab Me lo xa':

⁴⁴ —Biwi', yent cho lo gable, nab tsa wa lo ngulè'i par ne xa'i, no biza' gon kwa'n nzobni' lo ley kwa'n mila' Dios lo Muisés por yalyizh che'nal kwa'n miak ba', par gon xtu mene.

⁴⁵ Per miyi' re', laore nguro' xa' nez, tuli ka mixo'bdì'zh xa'i, orze' rè plo mire'che, kuze' nangaktra' ngayo Jesús rè yezh dub niwi' men. Por kuba' mia'n Me plo yent cho nak, per ni kun ter, rè plo nguro' men, nzha bixa' lo Jesús.

2

Miliyak Jesús tu xa' nagakt win
(Mt. 9:1-8; Lc. 5:17-26)

¹ Nded pla ngubizh, nguiubre Jesús xtu wèlt yezh Capernaúm, no mbin rè men lè' Jesús nzho la yo', ² orze' lweg'a' dox men mig'an ze', haxta yentra' plo kwin bixa', haxta ni ro' yo' nagaktra' kwin bixa'; mbaino midì'zh Jesús widi'zh che'n Dios lo bixa'. ³ Ze' mizhinu tap miyi' tu men nzhakne, tu xa' nagakt win. ⁴ No por nagakt yo bixa' plo nzo Jesús por tanta men, kuze' nkili bixa' yek yo' par michil bixa'i par ngok mila bixa' miyi' re' nali laka plo nzo Jesús dub nax xa' lo kwa'n. ⁵ Or une Jesús dox ñila bixa' Me, kuze' nzhab Jesús lo xa' nagakt win re':

—Xga'n, lè' rè kwa'n nzè'b xkil mizhe' la lo Dios.

⁶ Per ze' nzob pla rè xa' nilu' ley, mile' bixa' xigab: ⁷ “¿Chon midì'zh xa' ba' sa'?” ¡Midì'zh xa' kwa'n nayi' par lo Dios, porke yent cho men gak che' kwa'n nzè'b xki xtu men! ¡Nabtsa Dios gak le'i!” ⁸ No lweg'a' ngwanu laxto' Jesús cho xigab kile' bixa', kuze' nzhab Jesús lo bixa':

—¿Chon kile' go xigab sa' le'n laxto' go?

⁹ ¿Kwan más jwals gapa lo xa' nzhakne rè? ¿Chi gapa: “Rè kwa'n nzè'b xkil, mizhe' la lo Dios”, o gapa: “Waxche, gulits kwa'n naxal lo, no guzè'?” ¹⁰ Nal par ne go, na nak Xga'n Dios mbaino nak da tu men yizhyuo, no mile' Dios mandad da par che'n rè kwa'n nzè'b xki men lo Dios —kuze' nzhab Jesús lo xa' nagakt win re'—, ¹¹ lol nin, waxche, gulits kwa'n ngo'tal lo, bizè lizhal.

¹² Orze' tuli ngwaxche miyi' re', no ngulits xa' kwa'n ngo't xa' lo, no ña xa', xe niwi' rè men nzhin ze', mbaino kidi'zh bixa': “¡Dox nazon Dios!” No nzhab bixa': “¡Lalta' gat ne be tu kure'!”

Jesús ngule Leví par gak xa' men che'n Me
(Mt. 9:9-13; Lc. 5:27-32)

¹³ Orze' nguro' Jesús par ngwa Me xtu wèlt, ro' lagún kwa'n ña'n lazh men Galilea; orze' mig'an tu béd men lo Jesús, no ze' nguzublo kilu' Me widi'zh che'n Dios lo bixa'. ¹⁴ No or nzhaded Me ze', une Me Leví xga'n Alfeo nzob plo nzhax dimi che'n gobier Roma. Orze' nzhab Jesús lo xa':

—Di'ké ticha.

Lè'chi tuli nzhakè xa' tich Jesús.

Jesús milu' chon nzhao Me kun rè xa' gat nzhont ley che'n Muisés

¹⁵ Uzhè'la di orze', nzob Jesús lo mes lizh Leví, kiyao Me kun nayax xa' nikan dimi che'n gobier Roma, no kun rè xa' gat nzhont ley; kiyao rè bixa' kun Jesús mbaino kun rè men che'n Me, no dox la nayax xa' nzhakè tich Jesús nzhin ze'. ¹⁶ Per or une rè men nilu' ley kun rè men fariseo, lè' Jesús kiyao kun rè xa' gat nzhont ley no kun rè xa' nikan dimi che'n gobier Roma, orze' nzhab bixa' lo rè men che'n Jesús:

—¿Chon kiyao xa' nitse'd go, kun rē men gat nzhont ley che'n Dios, mbaino kun rē xa' nikan dimi che'n gobier Roma?

¹⁷ Or mbin Jesús kure', nzhab Me:

—Rē xa' wen, gat naki'nt xa' doctor; sino ke nab tsa xa' nzhakne naki'n doctor; porke nangaxè'lt Dios da lo rē men yent kwan nak lo Dios; Dios mixè'l da lo rē men xa' nzè'b xki lo Dios.

Jesús milu' xmod zo men xlats men or na'b men lo Dios

(Mt. 9:14-17; Lc. 5:33-39)

¹⁸ No ngol tu ngubizh nzo xlats pla rē men che'n Juan xa' nili'lēi' men le'n nits, no pla rē men fariseo, par kina'b bixa' lo Dios, kuze' ngwa pla rē xa' plo nzo Jesús, mina'bdi'zh bixa' lo Me, nzhab bixa':

—Rē men che'n Juan mbaino rē men che'n rē xa' fariseo nizo bixa' xlats bixa' or nina'b bixa' lo Dios, per rē men che'nalse, gat nizot bixa' xlats bixa'.

¹⁹ Orze' nzhab Jesús:

—¿Taxa plo gon go, zo men xlats men lo jwandang, dub nzo xa' disposad ze'? ²⁰ Per or yalo jwandang or bi disposad, orze'se lē' bixa' zo xlats. ²¹ Yent cho kē' rremiend tu bistid go'x kun tlē' lar kub, porke lē' lar kub nido'p no nichēze bistid go'x, orze' más nakap nzhake. ²² No yent cho ko vin nax le'n tu pump go'x, porke lē'i chēz pump go'x, orze' zu't rope. Más wen ko men vin nax le'n pump kub.

Jesús nile' mandad zhē kwa'n nayi' kē men Israel zhi'n

(Mt. 12:1-8; Lc. 6:1-5)

²³ Tu ngubizh nzhaded Jesús tu plo nzhi'b triu, zhē kwa'n nayi' kē men Israel zhi'n. Orze', nguzublo rē men che'n Me kikib do che'ne, no kiyao bixa'i. ²⁴ No ze' nzhin pla men fariseo, nzhab lo Jesús:

—Biwi', ¿chon kile' rē men che'nal kuba', zhē kwa'n nayi' kē men Israel zhi'n?

²⁵ Per nzhab Jesús:

—¿Taxa, chi nagat go'l go kwa'n mile' Dabi tu wēlt, lē' xa' no rē men che'n xa', or niyent kwa'n gao bixa' no dox nila'n bixa'? ²⁶ Orze' miye laxto' xa' nguio xa' le'n yo' che'n Dios or nak Abiatar ngulēi' ro; ndao xa' pan kwa'n nab tsa ngulēi' nzhak nzhao; no nu rē men che'n xa' miza' xa' ndao.

²⁷ No nu nzhab Jesús:

—Zhē kwa'n nile' men diskans; Dios ngu-loi par ya men wen, no nangagot Diose par zakzi men por nile' xa' be's xigab. ²⁸ Kuze', na, Xga'n Dios, mbaino nak ska da tu men yizhyuo, no na nile' mandad zhē re'.

3

Miliyak Jesús tu men mibizh ya'
(Mt. 12:9-14; Lc. 6:6-11)

¹ No xtu wēlt nguio Jesús le'n yo' plo nitse'd men widi'zh che'n Dios; no ze' nzo tu miyi' xa' mibizh ya'. ² Xe kila'ch bixa' par nabei chi lē' Jesús liyak miyi' ze' zhē re', nes par gak kē' bixa' kixu' Jesús lo rē xa' nak zhi'n. ³ Orze' nzhab Jesús lo miyi' xa' mibizh ya' re':

—Watso, guzo garol sao' rē.

⁴ Mbaino nzhab Jesús lo rē más xa' nzhin ze':

—¿Kwan nzhab ley che'n Muisés gak le' met, zhē kwa'n nayi' kē men Israel zhi'n? ¿Chi tu kwa'n wene o tu kwa'n nakape? ¿Chi gaknu be tu men par nagat xa', o la' be gat xa'?

Per yent cho ngakab, xē mia'n bixa'.

⁵ Lē'chi miēk Jesús nayi', miwi' Me lo rē men nzhin naka'n ze', mbaino miwin laxto' Me por tanta mal laxto' bixa'; orze' nzhab Me lo miyi' ze':

—Bitsiga' ya'l.

No mitsiga' miyi'y, mbaino uni wene, ⁶ per or nguro' rē men fariseo al tich, orze' midi'zh bixa' kun rē men che'n Herodes, par xmod gut bixa' Jesús.

Tu bēd men nzhakē tich Jesús

⁷ Orze' nguiubchi Jesús kun rē men che'n Me, par nza Me ro' lagún kwa'n ña'n lo yuo che'n men Galilea. No nayax men Galilea, mbaino tu bēd men xa' nzē lazh men Judea, nzhakē bixa' tich Jesús. ⁸ No nu rē xa' nzē Jerusalén, kun rē xa' nzē lazh men Idumea, kun más rē xa' nzē xtu ro' you' Jordán, no haxta rē xa' nzē naka'n plo ña'n yezh Tiro no Sidón; rē men re' miza plo nzo Jesús, par gon bixa' rē kwa'n nile' Me. ⁹ Kuze' mile' Jesús mandad rē men che'n Me, par list yi'dnu bixa' tu bark, por tanta men, par nakotip men Me, ¹⁰ porke dox men miliyak Jesús, kuze' rē xa' nzhakne nila' kobi bixa' Jesús par gal bixa' ta' Jesús. ¹¹ Mbaino rē men xa' nzho mbi mal laxto' re', or une bixa' Jesús, ngo't kuslo bixa' lo Me, orze' nguruzhiē bixa', nzhab bixa': "¡Lu nak Xga'n Dios!" ¹² Per mile' Jesús mandad nadi'zhtra' bixa' cho nak Me lo rē men.

Ngule Jesús tu dusen men che'n Me, rē xa' le' mandad nela lē' Me

(Mt. 10:1-4; Lc. 6:12-16)

¹³ Orze' nkili Jesús yek tu lom, dizde ze' ngurezh Me cho xa' gak men che'n Me, orze' nguzubi bixa' lo Me. ¹⁴ Xid rē xa' ze' ngule Me tu dusen xa' kizē kun lē' Me, no par xē'l Me bixa', yadi'zh bixa' widi'zh che'n Dios lo rē men, ¹⁵ mbaino par le' bixa' mandad, ro' rē mbi mal laxto' rē men. ¹⁶ No dub tu dusen bixa' lē se': Simón, xa' nzhab Jesús lē Per; ¹⁷ no rop wech Jakob kun Juan, xga'n Zebedeo, xa' kwa'n ngulu'lē Jesús, Boanerges (widi'zh re' gab: Xga'n nguzi'); ¹⁸ no Ndrés, mbaino Lip, no Bartol, no Mateo, mbaino

Max, no xtu Jakob xga'n Alfeo, kun Tadeo, mbaino Simón xa' nzê xid men Kananist, ¹⁹ no nu Judas Iscariote, xa' chi Jesús lo rê men xa' gut Me.

Nzhab men, lè' Jesús nile' rë kwa'n por Mizhab

(Mt. 12:22-32; Lc. 11:14-23; 12:10)

²⁰ Or mizhin Jesús le'n tu yo' kun rê men che'n Me, orze' dox men migan xtu wêlt plo nzo Me, no por tanta men, haxta ni nangakt ngao Me kun rê men che'n Me. ²¹ Or mbin rê melizh Jesús kure', orze' ngokla bixa' ngazen bixa' Jesús, porke mile' bixa' xigab, pas nzhak miyizh xa' re'. ²² No nzê pla xa' dizde Jerusalén, xa' nilu' ley kwa'n mila' Dios lo Muisés, nzhab bixa':

—Lé' Beelzebú, mizhab xa' nile' mandad lo rê mbi mal, nile' nigo' miyi' re', rê mbi mal laxto' rê men.

²³ Orze' ngurezh Jesús rê xa' nilu' ley ze', par midizh Me kun kwent lo bixa', nes par zobyek bixa'i, nzhab Me:

—¿Xmod ko' Mizhab, xtu tsa' mbi mal xa', laxto' men? ²⁴ Chi tu yezh men nidil kun mis rê men che'n xa', orze' lè' bixa' lox. ²⁵ No chi dil mis men nzho tutsa' yo, tu xa' kun xtu xa', lè' bixa' lox. ²⁶ No chi dil Mizhab kun mis rê mbi mal che'n xa', lè' bixa' lox; orze' yentra' kwan gak le' xa'. ²⁷ No lizh tu miyi' xa' dox nzhak nidil, nagakt yo men par li'wa'n men rê kwa'n kinu xa'. Par gak liwa'n men che'n xa', naki'n galo laka li'b xa'. ²⁸ Walika kwa'n nin lo go re': Rë kwa'n gat lè' nile' men lo Dios, no rê kwa'n gat lè' nidi'zh men por Dios; rêi che' Dios. ²⁹ Per xa' nidi'zh gat lè' por Sprit che'n Dios, nayotra' zhe' che'n xa', lè' xa' nzê'b xki lo Dios par dubta'.

³⁰ Kure' nzhab Jesús, porke lè' bixa' nidi'zh: "Lé' Jesús kinu mbi che'n Mizhab."

Xna' Jesús no rê wech Me

(Mt. 12:46-50; Lc. 8:19-21)

³¹ Orze' mizhin xna' Jesús kun rê wech Me, al tich nzo bixa', orze' mixè'l bixa' gavis ya Jesús lo bixa'. ³² No dub kidi'zh Jesús lo rê xa' nzhin naka'n lo Me, lè'chi nzhab tu rê xa' ze':

—Lè'o; lè' xna' go no rê wech go, nzhin al tich; lè' bixa' kibe'zh go.

³³ Orze' mikab Jesús:

—¿Cho xa' nak xna'n, no rê wecha?

³⁴ Orze' miék Me lo rê men nzhin naka'n ze', no nzhab Me:

—Rë xa' re' nak xna'n, no rê wecha, ³⁵ porke rê xa' nile' kwa'n nzhakla Dios; xa' ze' nak wecha, no bizana, mbaino xna'n.

4

Kwent che'n xa' nzha'n triu

(Mt. 13:1-9; Lc. 8:4-8)

¹ Xtu wêlt nguzublo kilu' Jesús widi'zh che'n Dios lo rê men, ro' lagún kwa'n ña'n

lazh men Galilea. Ze' dox men migan plo nzo Jesús, orze' nkê Me le'n tu bark par ña Me xche'p al le'n nits. Orze' nguzob Me, no lè' rê men nzhin ro' nits. ² Orze' nguzublo Jesús, milu' Me nayax kwa'n lo bixa' kun pura kwent. Kuze' miza' Me kwent re', nzhab Me:

³ —Bin go kure'. Nguro' tu xa' nzhaya'n lazh triu nzhache'ch xa'i. ⁴ Or ngo'n xa'i, che'pe ngob le'n nez, ngula miyin loi ndao mai. ⁵ No xche'pe ngob lo yuo ke, no por niyen be's yuo ze', lwegaga' ngulene. ⁶ Per or ngulen ngubizh, migo'le; no por gat kinui be's luch, mibizhe. ⁷ No xche'pe ngob xid ya yich; no or miro'b rê ya yich re', nangala't rê kure' ngaro'be, kuze' nangaza'te. ⁸ Per máse ngob lo yuo wen, miro'be no miaxe; orze' dox miza'i. Nzhoi miza' gal bichi' lazhe, nzhoi miza' chon gal lazhe; mbaino nzhoi miza' haxta tu gayo' lazhe.

⁹ Orze' nzhab Jesús:

—Go kinu nzha par gone, bin goi.

¿Chon midizh Jesús kure'?

(Mt. 13:10-17; Lc. 8:9-10)

¹⁰ Or mia'n nab Jesús, rê xa' nzhin naka'n lo Me, kun za tu dusen men che'n Me xa' más nile' mandad, mina'bdi'zh bixa' lo Me, nzhab bixa':

—¿Kwan gab kwent kwa'n midizh go ba'?

¹¹ Orze' nzhab Jesús:

—Lo go nin rê kwa'n naga'ch che'n Dios kwa'n kinu Me plo nile' Me mandad; per lo rê xa' nzo al tich, kun pura kwent nilune lo bixa', ¹² porke,

Ter une bixa'i, per yent cho xigab ngale' bixa' por lè'i;

no ter mbin bixa'i, per nangazobyekt bixa'i. Kuze' nangala't bixa' rê kwa'n gat lè' nak bixa',

mbaino nangache't Dios rê kwa'n nzê'b xki bixa' lo Me.

Jesús midizh xmod nak kwent che'n men nzha'n triu

(Mt. 13:18-23; Lc. 8:11-15)

¹³ Orze' nzhab Jesús:

—¿Chi lè' go nangazob yekt kwent re'? Orze', ¿xmod zob yek go más kwa'n? ¹⁴ Men xa' nzha'n ze' nak xa' nidi'zh widi'zh che'n Dios. ¹⁵ No yuo le'n nez nak xa' mbin widi'zh che'n Dios, per por nangayilat xa'i, orze' lwegaga' ngwa Mizhab, mizubchi widi'zh che'n Dios kwa'n nzho laxto' xa'.

¹⁶ No yuo ke nak xa' mbin widi'zh che'n Dios, dub nizam laxto' xa', ¹⁷ per por gat ña laxto' xa' kun rê che'n Dios, kuze' or nizam xa' tu kwa'n, o nidi'zh men tich xa' por widi'zh che'n Dios, orze' nila' xa' Dios. ¹⁸ No yuo plo nzhi'b ya yich nak xa' nzhon widi'zh che'n Dios, ¹⁹ per por dox nile' xa' xigab por kwa'n naki'n xa', no por niwix xa' gap xa' máse, mbaino por más rê kwa'n nize'bla

xa'; kuze' yent cho kwent nak xa' men che'n Dios. ²⁰ Per yuo wen nak xa' nzhon widi'zh che'n Dios, no nile' xa' kwa'n nzhab Dios; no por mod niban xa', nak xa' nela yuo kwa'n miza' tu yalgo'n ro, nzhoi miza' gal bichi'y, nzhoi miza' chon gale, mbaino nzhoi miza' haxta tu gayo' lazhe.

*Kwent che'n tu ki
(Lc. 8:16-18)*

²¹ Nu nzhab Jesús:

—Yent cho tu men tsinki tu biani, orze' zob xa'i xan tu kaj o xan tu lo'n. Gat lè' xa' zobe al ya par ziniy dub le'n yo', ²² porke rë kwa'n naga'ch nilun lo go, lè'i xo'bdi'zh go lo men. ²³ Cho go nzhakla gon kwa'n nin, bizobyek goi.

²⁴ Mbaino nzhab Jesús:

—No bizobyek go kwa'n nin re': Chi lè' go gone, orze' más kwa'n gak zobyek go, ²⁵ porke xa' nile' kwa'n nzhapa, ngubizh kun ngubizh más kwa'n zobyek xa'; per xa' gat nile' kwa'n nzhapa, haxta rë kwa'n mbin xa' midizha, yubchi lo xa'.

Kwent che'n lazh tu kwa'n nixë'n men

²⁶ Mbaino nu nzhab Jesús:

—Plo nile' Dios mandad nak nela tu miyi' kwa'n ngo'n lazh triu lo yuo che'n. ²⁷ Ño xa' nzha' xa' no ñaxche xa'; mbaino ngaza't xa' kwent xmod ngulene no miro'b lazh kwa'n mixë'n xa' ze'. ²⁸ Lè' yuo nile' nilene, orze' niru'xo'b lai, no niru'xo'b doi, orze' niza'i lazhe. ²⁹ Mbaino or ngwagale miza'i lazhe, orze' lè' men ngo'ne, lwegä' nilits xa' rë kwa'n miza'i, porke ngol la tiemp yatse.

*Kwent che'n tu lazh mostás
(Mt. 13:31-32; Lc. 13:18-19)*

³⁰ Orze' nzhab Jesús:

—¿Kun kwan tutsa nak plo nile' Dios mandad?, o, ¿kun kwan chë'l lal bei, par ne be xmod nake? ³¹ Nake nela tu lazh mostás kwa'n mixë'n tu men lo yuo che'n, ter nake tu lazh kwa'n más kwa'n win, lo rë lazh kwa'n nzho yizhyuo. ³² Per or mixë'n xa'i, orze' miro'be, haxta ngoke tu ya más kwa'ro xid rë ya naye' kwa'n nzhi'b ze', haxta miyin michao' yo che'n lo rë rram che'ne.

¿Chon nilu' Jesús widi'zh che'n Dios kun kwent lo rë men?

(Mt. 13:34-35)

³³ Kun nayaxra' kwent milu' Jesús widi'zh che'n Dios lo rë men, par ne bixa' xmod nile' Dios kun rë men yizhyuo, haxta plo ngwazha bixa' mbin bixa'i. ³⁴ Kun pura kwenttsa nilu' Jesús widi'zh che'n Dios lo rë men, per nab tsa lo rë men che'n Me, nzhab Me kwan nzhab kad kwent.

*Mikwë'z Jesús tu yiwbi
(Mt. 8:23-27; Lc. 8:22-25)*

³⁵ No or nzhalä la yè'l, nzhab Jesús lo rë men che'n Me:

—Cha' go nzha be xtu ro' nits ba'.

³⁶ Orze' mia'n rë men nzhin ze', mbaino lè' rë men che'n Jesús ña bixa' le'n bark plo nzob la Jesús; no nu más rë bark che'n xtu ben men, ñakë tich Jesús. ³⁷ Dub nzha bixa' le'n bark, lè'chi tu yiwbi dox nguro'; no por tanta niwin nits, haxta nguioi le'n bark no nzhaya'z yo' le'n nits. ³⁸ No lè' Jesús naxnaa al xan bark, nako' Me lo tu almad. Lè'chi milixche bixa' Me, nzhab bixa':

—¡Maestr! ¿Chi yent kwan ña laxto'l, lè'be gat le'n nits?

³⁹ Orze' ngwaxche Jesús, mikwë'z Me mbi, no nzhab Me lo nits:

—¡Nawintra'! ¡Xe gulëz!

Orze' tuli ngulëz mbi, no rëi mia'n xe.

⁴⁰ Orze' nzhab Me lo rë men che'n Me:

—¿Chon dox nizheb go? ¿Chon naga yila go Dios?

⁴¹ Orze' dox mizheb bixa', no nzhab bixa' lo wech bixa':

—¿Cho xa' re'? ¡Haxta mbi no nits nzho ro' xa'!

5

Tu miyi' nzhak miyizh nzho Gadara

(Mt. 8:28-34; Lc. 8:26-39)

¹ Or mizhin bixa' xtu ro' lagún kwa'n ña'n lazh men Gadara, ² laore ngula Jesús bark, tuli nguzubi tu miyi' nzhak miyizh lo Me, zilita' nzho xa' re' le'n panteón no dox nzho mbi mal laxto' xa'. ³ Mbaino yent cho le' gan li'bdo' xa', ni kun kaden, ⁴ porke nayax wëlt mili'b ni' xa' kun kaden; no rë wëlt micho' xa'i, kuze' yent cho kek lo xa'. ⁵ Zhëy-yè'le nikizë xa' le'n panteón no le'n mont, mbaino nibizhyë xa', no nikë' xa' ke ta' xa'. ⁶ Per or une miyi' re' Jesús zitra', karre nguzubi xa' no nguzuxib xa' lo Me, ⁷ no naye nguru'zhië xa', nzhab xa':

—¡Yent kwan nizaka kun lu, Jesús Xga'n Dios, Me nzho lo yibë'l! ¡Kina'ba lol por Dios, nazakzital da!

⁸ Sa' midli'zh xa' por rë mbi mal kwa'n nzho laxto' xa', porke lè' Jesús kiyab lo xa':

—¡Mbi mal, guro' laxto' miyi' re'!

⁹ Mbaino nu mina'bdi'zh Jesús lo mbi mal ze':

—¿Xmod lè'l? —nzhab Jesús.

Orze' mikab mbi mal ze':

—Na lè legión, porke dox nayax no.

¹⁰ No nu dox kina'b rë mbi mal re' lo Jesús, par naxë'l Me rë mbi re' xtu lazh men. ¹¹ No gax laka ze', ta' tu lom; nzhin tu béd kuch, kiyao ma, ¹² no dox kina'b rë mbi mal ze' lo Jesús par ziyël Jesús biy laxto' rë kuch kwa'n nzhin ze'. ¹³ Orze' nguziyël Jesús, nguro' rë mbi mal ze' par ñai laxto' rë kuch ze', pas como tu chop mil ma; lè'chi nguzublo mikë' rë bima karre yek tu lom par ngob bima

haxta le'n barrank plo nzho nits; ze' ngut bima.

¹⁴ Or une rē xa' nikina kuch ze'i, karre ña bixa' par ngwayab bixa'i lo rē men yezh, mbaino lo rē men nzho dan. Orze', rē men ngwatswi' kwan ngok ze'. ¹⁵ Or mizhin bixa' lo Jesús, une bixa' xa' ngok miyizh ze', nzob la xa' no nak la xa' lar, no menaye la nilu' xa'; no xa' re', xa' nguio mbi mal laxto'; orze' rē men mizheb. ¹⁶ No rē xa' une kwa'n ngok kun xa' ngok miyizh re', mbaino kwa'n ngok kun rē kuch nzhin ze', kidi'zh bixa'i lo más rē men. ¹⁷ orze' nguzublo dox kina'b bixa' lo Jesús, par yubchi Jesús lo yuo che'n bixa'. ¹⁸ Or nzhaké Jesús le'n bark par bi Me, mbaino lē' miyi' kwa'n ngok miyizh ze', dox kina'b miyi' par ngaké miyi' tich Jesús, ¹⁹ per nangaziyélt Jesús, sino ke nzhab Jesús:

—Bizé lo rē men lizhal, no guzh rē kwa'n mile' Dios por lu, no xmod milats laxto' Diosal.

²⁰ Orze' ña miyi' ze', no nguzublo kiyab miyi' lo rē men kwa'n nzho rē yezh kwa'n ña'n lazh men Decápolis, kwa'n mile' Jesús por lē' xa'. No rē men niwi' lo miyi' re', xe mia'n bixa' tuli.

Xcha'p Jairo no tu una' xa' migal xab Jesús

(Mt. 9:18-26; Lc. 8:40-56)

²¹ Or nguiubre Jesús kun bark xtu wēt, al xtu ro' nits, ze' migan tu bēd men naka'n lo Jesús, ro' nits plo ngula Me bark ze'. ²² Ze' mizhin tu xa' lē Jairo, xa' nile' mandad le'n yo' plo nitse'd men widi'zh che'n Dios. Or une xa' Jesús, tuli nguzuxib xa' lo Me, ²³ mbaino dox nalats midí'zh xa' or kina'b xa' lo Jesús, nzhab xa':

—Lē' xcha'pa naxiat la; cha'o par xo'b go ya' go yek xcha'pa, par yak xcha'pa no par ban una'.

²⁴ Orze' nguziyél Jesús nzha bixa', no nu tu bēd men nzhaké, haxta kiche'p guchin bixa'.

²⁵ No xid rē men re', nzho tu una' nzhakne, nizak xa' kwa'n, nzhala tu dusen li'n. ²⁶ No dox la nguzakzi xa' por kwa'n mile' nayax doctor kun lē' xa', no ni kon ter milo'x xa' rē kwa'n kinu xa'; per yent kwa'n ngazu'í, lē'la más mixo' xa'. ²⁷ Or mbin xa', rē kwa'n nile' Jesús, orze' nguzubi xa' al tich Jesús, xid rē men ze', par migal xa' xab Me, ²⁸ porke mile' xa' xigab: "Namás gala xab xa' re', lē'da yak ka." ²⁹ No tuli nguléz kwa'n nizak una' no mize'n una' lē' una' miak la. ³⁰ Per lwegá, mizi Jesús, lē' yalnazon kwa'n kinu Me, miliyak tu men. Orze' miék Me lo rē men, nzhab Me:

—¿Cho migal xaba?

³¹ Orze' nzhab rē men che'n Me:

—Lē' go nane ka, dox men kiche'p go rē lad, no kinabdi'zh go, ¿cho migal go?

³² Per Jesús xe kiwi' Me naka'n, par ne Me, cho men migal ta' Me. ³³ Orze' dox nizheb una' haxta nizhiz una', no por mizi una' lē' una' miak, orze' nguzubi una' no nguzuxib una' lo Jesús, mbaino mixé'lro' una' rēi. ³⁴ Orze' nzhab Jesús:

—Xcha'p, por ngwayílal da, miakal. Bizé, nale'tra'l xigab.

³⁵ Stubi kidi'zh Jesús kun lē' una' re', lē'chi mizhin pla xa' nguro' lizh Jairo, nzhab xa' lo Jairo:

—Lē' xcha'pal ngut la; bila' nalicha'b'tra'l Maestr.

³⁶ Or mbin Jesús widi'zh re', lwegá nzhab Me lo Jairo:

—Nazhebtal, wayila da namás.

³⁷ No nangaziyél'tra' Jesús nga más men lizh Jairo; nab tsa Per, no Jakob, mbaino Juan wech Jakob nzha kun lē' Me. ³⁸ Or mizhin bixa' lizh Jairo, une Jesús dox nazhe'b kile' men, kibizhié bixa', kiyo'n bixa'. ³⁹ Or nguio Jesús, nzhab Me:

—¿Chon dox nazhe'b kile' go, kiyo'n go? Lē' mizhwin re', gat lē'ta' ngut mizhwin; ka naxnaa mizhwin.

⁴⁰ Orze' mixizhnu men Jesús, per Jesús mile' nguro' rē men, orze' mbi'y Me nab tsa rop xa' nak xine re', no kun yon men che'n Jesús, nguio bixa' plo nax mizhwin ngut re'. ⁴¹ Orze' nguzen Jesús ya' mizhwin, no nzhab Me:

—¡Talita kumi! (Widi'zh rē gab: Mizhwin, lē'da kini lol: "¡Waxche!")

⁴² Orze' tuli ngwaxche mizhwin kwa'n nzhap tu dusen li'n re', no nguzublo nguzé mizhwin, no rē men une kure', xe mia'n bixa' tuli. ⁴³ Orze' mile' Jesús mandad, yent cho lo gab bixa' kure'; no nzhab Me, za' bixa' kwa'n gao mizhwin re'.

6

Nguiubre Jesús yezh Nazaret, plo mixen Me

(Mt. 13:53-58; Lc. 4:16-30)

¹ Orze' nguro' Jesús ze' par ngwa Me yezh Nazaret plo mixen Me, no rē men che'n Me nzhaké tich Me. ² Or ngol zhé kwa'n nayi' ké men Israel zhi'n, orze' ngwalu' Jesús widi'zh che'n Dios le'n yo' plo nitse'd bixa' widi'zh che'n Dios. No rē xa' mbin kwa'n midí'zh Me, xe mia'n bixa' tuli por xmod nilu' Jesús widi'zh che'n Dios, orze' nzhab bixa' lo wech bixa':

—¿Plo ngwatse'd xa' re', dox kwa'n nzhak xa'? ¿Plo ngwatse'd xa' rē kwa'n nzhak xa' re', no rē kwa'n nazon nile' xa'? ³ ¿Per chi gat lē't xa' re' karpinter, xga'n Mari; no wech Jakob, no Che, no Judas, mbaino Simón? No, ¿chi gat lē't rē bizan xa' re', nzo kun be?

Kuze', nangayilat bixa' Me. ⁴ Orze' nzhah Jesús:

—Rè plo ñila men tu profet, xa' nidi'zh por Dios. Nabtsa rè men lazh xa', no rè melizh xa', mbaino rè xa' nzhin kun lè' xa' gat ñilat xa'.

⁵ Nangakt ngale' Jesús nayax zhi'n nazhon lazh Me. Nabtsa pla men nzhakne miliyak Me or mixo'b Me ya' Me yek bixa'. ⁶ No xe mia'n Jesús por tanta nad rè men lazh Me, par yila bixa' Jesús. No nkizè Jesús naka'n rè yezh win kwa'n nzhin ze', par milu' Me widi'zh che'n Dios.

Mixè'l Jesús tu dusen men che'n Me par yalu' bixa' widi'zh che'n Dios

(Mt. 10:5-15; Lc. 9:1-6)

⁷ Orze' ngurezh Me dub tu dusen men che'n Me, par mixè'l Me bixa' kad yezh, chop ga bixa'; no miza' Me yalnazon ka' bixa' par ko' bixa' mbi mal laxto' rè men. ⁸ orze' mile' Me mandad, yent kwa'n wei' bixa' nez; nab tsa tu bordón; no ni nawei' bixa' kwa'n gao bixa', no ni tu bols, no ni dimi; ⁹ no ni nawei' bixa' xtu nez yalyid, no ni xtu nez lar. ¹⁰ No nzhah Me:

—Wanei plo zhin go lizh tu men, biya'n go ze' haxta or ya go xtu yezh. ¹¹ No wanei cho yezh plo naziyèl bixa' gon bixa' kwa'n gab go; or ro' go ze', kwib go yuo xan xkalyid go, nela tu señ ga', ke lè' bixa' nzè'b xki lo Dios. (Kuze' walika kwa'n nin lo go, más zakzi rè men ze' lo rè men yezh Sodoma kun yezh Gomorra, or gab Dios xmod gak kun kad men yizhyuo.)

¹² Orze' nguro' bixa' par nzhadi'zh bixa' widi'zh che'n Dios lo rè men Israel, par la' rè men ze' rè kwa'n gat lè' nile' bixa' lo Dios. ¹³ Orze' ngulo' bixa' nayax mbi mal laxto' rè men, mbaino nayax men nzhakne mitsa' bixa' aseit, par miak rè men ze'.

Ngut Juan xa' nililè'i men le'n nits

(Mt. 14:1-12; Lc. 9:7-9)

¹⁴ No mbin rey Herodes rè kwa'n nile' Jesús no rè kwa'n nile' rè men che'n Me, porke rè plo nguxo'b di'zhe, kuze' nguio men nzhah:

—Pas Juan xa' nililè'i men le'n nits, nguruban, no nzhaknu Dios xa' par nile' xa' rè kwa'n nazhon ba'.

¹⁵ No zipla men nzhah:

—Li xa' ba'.

Mbaino zipla men nzhah:

—Xa' ba' xa' nak xtu xa' nidi'zh por Dios, xa' nguio nzhala.

¹⁶ No or mbin Herodes kwa'n nidi'zh men, orze' nzhah xa':

—Juan xa' ba'! ¡Na mile mandad miro'g yek xa', no nal nguruban xa'!

¹⁷ Se' midizh Herodes, porke mis lè' xa' mile' mandad ngwaga' Juan par mili'b xa' Juan kun kaden, no ngulo xa' Juan lizhyi'b,

por ro' Herodías, una' che'n wech xa' Lip, por ngok jwandang che'n Herodes kun lè' una', ¹⁸ porke nzhah Juan lo Herodes: “Gat ñilat, banal kun una' che'n wechal”, ¹⁹ kuze' xian re' kinu Herodías kun Juan, orze' mikwa'n una' mod par gat Juan, per nangakta' ngut una' Juan, ²⁰ porke Herodes nizheb nine Juan, porke nane Herodes dox wen rè kwa'n nile' Juan, mbaino nab tsa par Dios naban Juan. Kuze' nikina xa' Juan par niyent kwan zak Juan. No or mbin Herodes rè kwa'n nidi'zh Juan, orze' net xa' kwan le' xa', mbaino mizheb xa', per ño laxto' xa' nzhon xa' kwa'n nidi'zh Juan. ²¹ Per ngol tu ngubizh, ngwazhèl Herodías xmod gut xa' Juan. Or ngol lani che'n Herodes, miza' Herodes kwa'n gao rè men che'n xa', xa' nile' mandad, mbaino rè xa' nile' mandad lo rè sondad, no rè xa' más tsak yezh Galilea. ²² No plo kiyao rè xa' re', nguio xcha'p Herodías no kiyolni' una'. Orze' nguio laxto' Herodes kure', no rè xa' kwa'n nzob lo mes kun lè' xa', orze' nzhah Herodes lo una':

—Bina'b kwa'n nzhaklal lon, na nei.

²³ No haxta mize't Herodes Dios, za' xa' wanei kwan na' b una', mbaino haxta za' xa' garol rè kwa'n kinu xa' par lè' una'. ²⁴ Orze' nguro' una', nzhah una' lo xna' una':

—¿Kwan na'ba?

Orze' nzhah xa':

—Yek Juan xa' nililè'i men le'n nits nguna'b.

²⁵ Orze' lwega' ña ska una' plo nzob Herodes par nzhah una' kure':

—Nzhaklan nal re' tuli, ne' go yek Juan xa' nililè'i men le'n nits kan; le'n tu che'.

²⁶ Orze' dox miwin laxto' Herodes por Juan, per lè' xa' nzhablai lo Dios, no lo rè xa' ngurezh xa', kuze' nangakt ngab xa': “Gakte.” ²⁷ Orze' lwega' mile' rey Herodes mandad par nzha tu sondad che'n xa', nzhach'o' yek Juan le'n lizhyi'b, ²⁸ mbaino ñadnu xa' yek Juan le'n tu chè', miza' xa' ka' una', no lè' una' miza'i nka' xna' una'. ²⁹ Or mbin rè men che'n Juan kure', ngwaka' bixa' kw-erp che'n Juan par mika'ch bixa'i.

Miza' Jesús kwa'n ndao gai' mil miyi'

(Mt. 14:13-21; Lc. 9:10-17; Jn. 6:1-14)

³⁰ Orze' ñè'd rè apost, men che'n Jesús xa' más nile' mandad, migan bixa' lo Me, no midizh bixa' rè kwa'n nazhon kwa'n mile' bixa', no rè kwa'n milu' bixa', ³¹ orze' nzhah Me lo rè men che'n Me:

—Guro' go xid rè men ba'; cha' go nzha be plo yent cho nak, par le' go diskans che'p.

Porke dox men nzhin lo bixa', cho ña la, no cho laore nzè; kuze' ni nangak ngao bixa'. ³² Orze' ña Me kun rè men che'n Me le'n tu bark, plo yent cho nak. ³³ Per nayax men une nzha Jesús kun rè men che'n Me, no ngwanu laxto' bixa' plo nzha Jesús.

Orze', rë bixa' nzha ni' plo nzha Jesús, no galo bixa' mizhin plo zhin Me kun rë men che'n Me. ³⁴ Or ngula Jesús bark, une Me dox nayax men nzhin la, orze' milats laxto' Me rë men ze', porke nzhin bixa' chigab nela rë mbëkxi'l' kwa'n yent cho nikina ga'. Orze' nguzublo milu' Jesús nayax kwa'n lo bixa'. ³⁵ No nzhazhëlalayo, orze' nguzubi rë men che'n Me, nzhab:

—Yent kwa'n nak dan re', no cho or la nal.
³⁶ Más ñal guzh go lo rë men ba', bi bixa' lo rë xa' nzho dan mbaino lo rë xa' nzho yezh win, par yazi' bixa' kwa'n gao bixa'.

³⁷ Orze' nzhab Jesús:

—¡Biza' go kwa'n gao bixa'!

Orze' nzhab rë men che'n Me:

—¿Taxa nzhakla go yazi' no kwa'n gao bixa', kun dimi kwa'n nile' men gan chop gayo' ngubizh zhi'n?

³⁸ Orze' nzhab Jesús:

—Biwi' go pla pan kinu go.

No or milab bixa'i, orze' nzhab bixa':

—Kinu no ga'ytsa pan, no chop mbël.

³⁹ Orze' mile' Me mandad, nguzhin tu montón ga' bixa', lo gozh nayë'. ⁴⁰ No nguzhin montón bixa', por gayo' bixa', no por cho' bichi' ga' bixa', por montón. ⁴¹ Orze' nguzen Me za gai' pan ze' no rop mbël ze', no or miwi' Me lo yibë', no miza' Me xkix lo Dios, orze' michi'x Mei, no miza' Mei ka' rë men che'n Me, par ki'z rë men che'n Mei gao rë men ze'. No se'ga' mile' Me kun rop mbël ze'. ⁴² No rë men ndao haxta plo une ndao bixa'. ⁴³ No mikan bixa' rë bilao kwa'n mia'n sobr ndao rë men ze'; michizhë bixa' tu dusen kardor. ⁴⁴ No rë men ndao re', nab tsa rë xa' miyi', como gai' mil bixa'.

Jesús nguzë lo nits

(Mt. 14:22-27; Jn. 6:16-21)

⁴⁵ No lweg'a' mile' Jesús mandad, nkë rë men che'n Me le'n bark, par ñaner ga' bixa' xtu ro' nits plo lë Betsaida; no lë' Me mia'n tras par miwi' Me xmod ña rë men ze'. ⁴⁶ No or milox ña rë men ze', orze' nza Jesús le'n mont par nzhana'b Me lo Xuz Me Dios. ⁴⁷ No or ngula yë'l, lë' bark nzha la garol sao' nits, no lë' Jesús nzo gak ka lo yuo. ⁴⁸ No une Me rë men che'n Me, dox vid kitsé' bixa' bark kun ya' bixa', porke nzo dox mbi no kichë'l-lo bixa' mbi. No paste las tres or garzi'l, nzhazë Me lo nits plo nzhazë bixa'. No ngokla Jesús, ngazhubner lo bixa'. ⁴⁹ Per or une bixa', lë' Jesús nzhazë lo nits, mile' bixa' xigab: “¡Paste tu komale!”, kuze' haxta nguruzhië bixa', ⁵⁰ porke rë bixa' une Jesús, dox mizheb bixa', per lweg'a' midizh Jesús lo bixa', nzhab Me:

—¡Nazhebt go! ¡Ka nai!

⁵¹ Orze' nkë Jesús le'n bark, no ngulëz mbi. Orze' rë bixa' xe mia'n tuli por kure'. ⁵² Se' nguzak bixa', porke nagat zobyek bixa'

kwa'n mile' Jesús kun rë pan ze'; porke nayao' yek bixa'.

Miliyak Jesús pla men nzhakne yezh Genesaret

(Mt. 14:34-36)

⁵³ No or milox nded bixa' le'n nits, orze' mizhin bixa' par lazhe men Genesaret, orze' mikido' bixa' bark ro' nits. ⁵⁴ No or ngula bixa' bark, lweg'a' ngokbe' men Jesús, ⁵⁵ orze' rë men nzhin naka'n yezh ze', karre ñanu bixa' rë men nzhakne lo ya, plo mbin bixa' mizhin Jesús. ⁵⁶ Rë plo ña Jesús, ter yezh ro o yezh win, o haxta rë dan plo nzho men; le'n rë nez ñanu bixa' men nzhakne, no nina'b bixa' lo Jesús ke namás la' Jesús gal bixa' xab Jesús. No rë xa' kwa'n nigale ze', ñak bixa'.

7

¿Kwan nile', nzhak gat nambet men lo Dios?

(Mt. 15:1-20)

¹ Pla men fariseo kun zipla xa' nilu' ley kwa'n mila' Dios lo Muisés, nguzubi bixa' naka'n lo Jesús. Rë xa' re' nzë yezh Jerusalén. ² No une bixa', pla men che'n Jesús kiyao bixa' dub be'd ya' bixa' orze' midizh bixa': “Gat ñalte.” ³ (Se' mbi'd yek bixa', porke rë men fariseo, nela más rë men Israel xa' más delikad por ley che'n Muisés, dox nabe laxto' bixa'. Chi nazëtt xa' ya' xa', nagaot xa', par le' xa' rë kostumbr che'n rë xuz xa', xa' tiemp. ⁴ No or ñë'd xa' di lo xbi', nagaot xa' chi nagaz xa' galo, par le' xa' kostumbr che'n bixa'; mbaino más rë kostumbr kwa'n kinu bixa', nela nizët bixa' rë vas no rë jarr, mbaino rë traxt che'n xa' kwa'n yi'b brons; no haxta lo'n kwa'n nzha' bixa' nizët bixa'.) ⁵ Kuze' rë men fariseo kun rë xa' nilu' ley, mina' bdi'zh bixa' lo Jesús:

—¿Chon nzhao rë men che'n'al dub be'd ya' bixa', gat nile't bixa' rë kostumbr che'n rë men nzhala?

⁶ Orze' nzhab Jesús:

—¡Mbël gox! Walika kwa'n midizh Dios por Isaías por go or mizobni' Isaías kure': Rë men re'; nidi'zh bixa' nazhi' bixa' da, per niyent kwan nize'n bixa' kun laxto' bixa'.

⁷ Yent cho kwent nidi'zh bixa' nazhon Da; porke rë kwa'n nilu' bixa' por Da, pura che'n mene.

⁸ Porke go, tu lad nila' go che'n Dios, namás par nile' go kostumbr che'n men.

⁹ No nu nzhab Jesús:

—¡Walika natsin go par nitsinu go che'n Dios namás, par nile' go rë kostumbr che'n go!, ¹⁰ porke se' midizh Muisés: “Gop kwent xuzal mbaino xna'l”, no, “Cho xa' ke xuz xa' o xna' xa', ñal gat xa' ze'.” ¹¹ Per go nzhab: “Lë' men gak ka gab lo xuz o lo xna': Nagakt

gaknun lu, porke rē kwa'n kinun, lē'i mizala par Dios." ¹² Kuze' nala't go gaknu men xuz men o xna' men. ¹³ Por rē kostumbr che'n go, nile' go natsaktra' widi'zh che'n Dios, no nzo mas rē kwa'n, kwa'n nile' go.

¹⁴ Orze' ngurezh Jesús rē men, par nzhab Me:

—Bin rē go kure', no bizobyeq goi: ¹⁵ Gat lē't por kwa'n nzhao men o por kwa'n nzhomen, nzhak gat nambe men lo Dios, sino por kwa'n gat lē' nzhao laxto' mene. ¹⁶ Cho go nzob nzha, bin goi.

¹⁷ No or mila' Jesús rē nak men ze', nguio Me le'n yo', orze' nzhab rē men che'n Me lo Me:

—¿Kwan gab widi'zh kwa'n milu' go ba'?

¹⁸ Orze' nzhab Me:

—¿Taxa nu go, nagakt zobyek go kure'?

¿Chi gat nanet go, yent cho tu kwa'n nzhao men, nile' ña'n gat nambet men lo Dios?, ¹⁹ porke rē kwa'n nzhao men, gat nibite corazón che'n men, sino ke lē'i nibi laxto' men, orze' niro'skai or ña xa' bi'x.

Kure' nzhab Me, par zobyek mene, ke lē' rē kwa'n nzhao men, rēi nambe. ²⁰ No nzhab Me:

—Xigab gat lē' kwa'n niro' dizde laxto' men, kure' nile', nzhak gat nambet men lo Dios, ²¹ porke laxto' men niro' rē xigab gat lē' re': Rē xigab ban men kun kwaliskier xtu men, rē xigab liwa'n men che'n xtu men, no gut xa' men; ²² mbaino rē xigab zen men una' che'n xtu men, rē xigab gap men kwa'n dimás, rē xigab dox gat lē', rē xigab kide men xtu men, rē xigab ban men kun tu men xtu men, rē xigab wix men gap men kwa'n kinu xtu men, rē widi'zh nakap nidi'zh men Dios, rē xigab marian, mbaino rē xigab kwa'n yent yek. ²³ Rē kwa'n gat lē' re' niro' laxto' men, no por lē'i, ña'n gat nambet men lo Dios.

Tu una' zit mina'b, gaknu Jesús una' (Mt. 15:21-28)

²⁴ Di ze' nguro' Jesús par nzha Me lazhen Tiro mbaino par lazhen Sidón. Orze' nguio Me le'n tu yo' par nanet men Me, per nangakt ngayuka'ch Me. ²⁵ Lwega', mbin tu una', lē' Jesús nzhao ze'; no una' re' kinu tu mē'd una', nzhao tu mbi mal laxto' mē'd. Orze' mizhin una' lo Jesús, no ngo't kuslo una' lo Jesús. ²⁶ No una' re' tlēt men Israel xa', lē' xa' nzē yezh sirofenicia. Dox nguna'b una' lo Jesús par ko' Me mbi mal laxto' xmē'd una', ²⁷ orze' nzhab Jesús lo una':

—Bila' gao rē xmē'd Dios galo; porke gat ñalt, kubi men lo mbēk rē kwa'n kiyao rē xmē'd Dios.

²⁸ Orze' nzhab una':

—Walika goi Señor, per no ska ño mbēk xan mes plo nzhao rē xmē'd Dios, par gao ma rē biyo ye'n kwa'n nzhab lo yuo.

²⁹ Orze' nzhab Jesús:

—Por kwa'n nel re', bizē; nale'tra'l xigab, lē' mbi mal nguro' la laxto' xmē'dal.

³⁰ No or nguibre una' par lizh una', lē' xmē'd una' nax la lo lo'n, no lē' mbi mal nguro' la laxto' mē'd.

Miliyak Jesús tu men sord no gat niro'lant kwa'n nidi'zh xa'

³¹ Orze' nguro' Jesús lazhen Tiro, no nded Me lazhen Sidón mbaino lazhen Decápolis, par mizhin Me ro' lagún kwa'n ña'n lazhen Galilea. ³² Ze' ñanu pla men tu miyi' sord, no gat nirolant kwa'n nidi'zh xa'; no kwa'n dox mina'b bixa' lo Jesús, par xo'b Me ya' Me yek miyi' re'. ³³ Orze' ngulo' Jesús miyi' re' tu lad xid rē men, par ngulo Me bikwen ya' Me le'n nzha miyi' re', orze' michuk Me par migal Me lo luzh miyi' re' kun nzhuk che'n Me, ³⁴ orze' ngulits Me lo Me lo yibē', no mizi' laxto' Me, nzhab Me:

—¡Efata! (Widi'zh re' gab: "Bixa'l").

³⁵ No mis orze', mixa'l nzha xa' no nguruban luzh xa', midizh xa' klar laka. ³⁶ Orze' mila' Jesús di'zh, yent cho lo gab bixa'i; per ter mile' Jesús mandad, nadi'zht bixa'i, ngont bixa'i, más midizh bixa'i. ³⁷ Orze' dox xche mia'n kiwi' rē xa' nzhin ze' por kwa'n ngok re', orze' nzhab bixa':

—¡Rē kwa'n niliyak Jesús! Haxta rē men sord, nzhon kwa'n; mbaino rē men nagakt di'zh, nzhudi'zh xa'.

8

Miza' Jesús kwa'n ndao tap mil men (Mt. 15:32-39)

¹ Le'n rē ngubizh ze', migan tu bēd men xtu wēlt, no gat kinut bixa' kwa'n gao bixa'; orze' ngurezh Jesús rē men che'n Me par nzhab Me:

² —Dox nilats laxto'n rē men re', porke nzhala chon ngubizh nzhin bixa' lon, no gat kinut bixa' kwa'n gao bixa', ³ no chi xēla bixa', bi bixa' lizh xa', sin naga gao bixa', nzhoo rriez gu'zh bixa' nez, porke nzhao xa' nzē zit.

⁴ Orze' nzhab rē men che'n Me:

—Per, ¿xmod xa' met kwa'n nayax gao rē men re', plo niyent kwan nak re'?

⁵ Orze' minabi'zh Jesús pla pan kinu bixa', no nzhab bixa':

—Gazhe.

⁶ Orze' mile' Jesús mandad, zob rē men ze' lo yuo, no or nguzen Me za gazh pan, no miza' Me xkix lo Dios, orze' michix Mei no miza' Mei ka' rē men che'n Me par ki'z bixa'i gao rē men ze', no ndi'z bixa'i. ⁷ No nu pla mbēl win kinu bixa'; xtu wēlt miza' Me xkix lo Dios por lē'i, no mile' Me mandad, par ndi'z bixa'i xid rē men ze'. ⁸ Rē men ndao haxta plo une ndao bixa', no mikan bixa' rē bilao; gazh kardore. ⁹ Rē xa' ndao re',

paste como tap mil bixa'. Orze' ngulunez Jesús bixa'. ¹⁰ No lwegá' nkê Me bark kun rê men che'n Me, par nzha bixa' lazh men Dalmanuta.

Mina'b rê men fariseo, le' Jesús tu kwa'n nazhon por Dios

(Mt. 16:1-4; Lc. 12:54-56)

¹¹ Or mizhin bixa' ze', nu pla rê men fariseo migan lo Jesús, par michê'lro' bixa', porke nzhakla bixa', le' Jesús tu kwa'n nazhon kwa'n nzê lo yibê', par zenbe' bixa' Me (wi' bixa' xmod nak Me), chi Dios ka mixê'l Jesús. ¹² Orze' mizi' laxto' Jesús, no nzhab Me:

—¿Chon nina'b rê men re', ne xa' tu kwa'n nazhon? Per na ni, walika ni tu kwa'n nazhon nanet bixa'.

¹³ Orze' mia'n nzhin tsa rê men ze', lê' Jesús nkê bark xtu wêlt, par nzha Me al xtu ro' lagún.

Levadur che'n rê men fariseo

(Mt. 16:5-12)

¹⁴ No mia'l laxto' bixa' ngazi' bixa' más pan, namás tutsa pan nzadnu bixa' le'n bark. ¹⁵ Orze' nzhab Jesús lo rê men che'n Me:

—Bikina go go lo rê men fariseo, mbaino lo rê men che'n Herodes, kun levadur che'n bixa'.

¹⁶ Orze' kidi'zh rê men che'n Me:

—Pas, por gat nzadnu be pan, gao bei.

¹⁷ Per ngwanu laxto' Jesús kwan kidi'zh bixa', kuze' nzhab Me:

—¿Chon dox xigab kile' go, por gat nzadnu go pan? ¿Chi nagat zobyek go kwa'n nin re'? ¿Chon stubi nayao' yek go, par ne goi? ¹⁸ ¡No ter niwi' go, per gat ne goi; no nzob nzha go, per gat gon goi; mbaino nat laxto' go! ¹⁹ Or ndi'za gai' pan xid gai' mil men, ¿pla kardor rê kwa'n bilao mikan go?

Orze' nzhab bixa':

—Tu dusene.

²⁰ No nzhab Jesús:

—¿No or ndi'za gázh pan xid tap mil men, pla kardor rê kwa'n bilao mikan go?

Orze' mikab bixa':

—Gazhe.

²¹ Orze' nzhab Jesús:

—¿Taxa nagat zobyek goi orze'?

Miliyak Jesús tu men nikal lo

²² Orze' mizhin bixa' yezh Betsaida, ze' mizhinnu men tu xa' nikal lo, par nguna'b xa' gal Jesús kwerp che'n xa' nikal lo re'.

²³ Orze' nguzen Jesús ya' miyi' re', par ñanu Jesús xa' ro' yezh; orze' michuk Jesús lo xa', no mixo'b Me ya' Me lo xa' re', orze' minabdi'zh Jesús lo xa', nzhab Me:

—¿Chi nilu' la kwa'n lol?

²⁴ Orze' ngulits xa' lo xa', no nzhab xa':

—Nilu' la men lon, per nilu' bixa' nela rê ya ñazê ga'.

²⁵ Orze' xtu wêlt mixo'b Me ya' Me lo miyi' re', orze' mixa'l lo xa', haxta zit nilu' kwa'n lo xa', klar laka nilu' rê men lo xa'. ²⁶ Orze' mixê'l Jesús xa', ña xa' lizh xa', per nzhab Jesús:

—Ni nayubrera'l yezh plo nzhin rê men ba'.

Nzhab Per, lê' Jesús nak Krist

(Mt. 16:13-20; Lc. 9:18-21)

²⁷ Orze' nguro' Jesús kun rê men che'n Me, par nzha bixa' rê yezh win kwa'n ña'n lazh men Cesarea Filipino. Dub nzhazê bixa' nez, orze' minabdi'zh Jesús lo rê men che'n Me, nzhab Me:

—¿Cho da, nzhab men?

²⁸ Orze' nzhab bixa':

—Nzho xa' midi'zh, Lu Juan bautist; no más xa' nzhab, Lu Li; no zipla xa' nzhab, Lu nak xtu men midi'zh por Dios, xa' nzhala.

²⁹ Orze' nzhab Jesús xtu wêlt:

—Par go ga'; ¿cho da?

Orze' nzhab Per:

—Go nak Krist.

³⁰ Orze' mile' Jesús mandad lo rê men che'n Me, yent cho lo gab bixa' cho nak Me.

Jesús midi'zh xmod gat Me

(Mt. 16:21-28; Lc. 9:22-27)

³¹ Orze' nguzublo kilu' Jesús lo rê men che'n Me, nzhab Me:

—Na nak Xga'n Dios, no nu nak da tu men yizhyuo; por xigab che'n Dios, nayax men zakzi da. Rê xa' re' nayilat da: Rê xa' nzo lo rê men Israel, kun rê ngulêi' ro, mbaino kun rê xa' nilu' ley kwa'n mila' Dios lo Muisés. No lê' bixa' chi da lo men par gat da. Per ngubizh yon, lê'da ruban.

³² Rê kure' midi'zh Me klar laka, per orze' ngulo' Per Jesús tu lad, nzhab Per:

—¡Nadi'zhtra' go kuba'!

³³ Orze' miêk Jesús, niwi' Me lo rê men che'n Me, orze' miyi' Me lo Per, nzhab Me:

—¡Chi lon, Mizhab!, porke gat nile'tal xigab che'n Dios; pura che'n men nzho yekal.

³⁴ Orze' ngurezh Me rê men che'n Me, no rê men nzhin ze', par nzhab Me:

—Chi nzho tu go nzhakla yi'dkê ticha, nale't go kwa'n nzhakla go, no bi'y go krus che'n go par di'kê go ticha, ³⁵ porke xa' nzhakla kina vid che'n par naloxe, lê'i lox lo Dios; per xa' gat por da o por widi'zh nazhon kwa'n nilun, nayot lox xa' re' lo Dios, ³⁶ porke, ¿kwan zu' par tu men, le' xa' gan ter dub yizhyuo, per lo Dios lox xa'? ³⁷ No, ¿kwan za' tu men par naloxt xa' lo Dios?, ³⁸ porke cho rê men la' da, o la' xa' widi'zh nazhon da, dilant lo rê xa' mia'l laxto' widi'zh che'n Dios, rê xa' gat nzhont ro' Dios; nu ska da la bixa', or yala, kun

rë yalnazon che'n Xuza, no kun rë ganj nazon che'n Me.

9

¹ No nu nzhab Jesús:

—Walika kwa'n nin, pla xa' nzho xid rë men re', nagatta' bixa' chi naga ne bixa', xmod zhin zhë or luxo'b yalnazon che'n Dios par le' Me mandad.

Or ngubixlo Jesús

(Mt. 17:1-13; Lc. 9:28-36)

² No nded xo'p ngubizh, nzhanu Jesús nab tsa Per, no Jakob, mbaino Juan, tu lad yek tu yi' ro. No ze' mizhë' lo Jesús. ³ No xab Jesús milu' bëo laka no ñaz bële; no per ni tu men yizhyuo nale'ta' gan zët tu lar par ya'ne sa'. ⁴ No ze' ngurulo Li, rop xa' kun Muisés, no kidi'zh bixa' kun Jesús. ⁵ Orze' nzhab Per:

—jMaestr, wen dox nzo be re'! jBila' go chao' no chon rranç; tube par go, xtube par Muisés, no xtube par Li!

⁶ Porke dox mizheb rë men che'n Jesús re', kuze' net Per kwan di'zh xa'. ⁷ Orze' plo nzhin bixa', ngula tu xkao yek bixa', no mien tu widi'zh le'n xkao kwa'n nzhab:

—jXa' re' nak Xga'na xa' nazhi' da! jBin go ro' Xa'!

⁸ Orze' lweg'a' miwi' bixa' naka'n, yentra' cho ngane bixa', nab tsa Jesús nzo. ⁹ Or ñadla bixa' yek yi', orze' mile' Jesús mandad, yent plo di'zh bixa' kwa'n une bixa', haxta or ruban Me. ¹⁰ Orze' ngulu'chao' bixa'i laxto' bixa', no midi'zh bixa' entre lë' bixa', çkwan kwa'n ruban menx? ¹¹ Orze' minabdi'zh bixa' lo Jesús, nzhab bixa':

—çChon nidi'zh rë xa' nilu' ley kwa'n mila' Dios lo Muisés, galo laka Li yi'd?

¹² Orze' nzhab Jesús:

—Walika, lë' Li galo yi'd, no lë' xa' le' yëk rë men lo Dios, mbaino, çchon nzobni' lo Yech che'n Dios, lë' Xga'n Dios Me nu nak tu men yizhyuo, kwa'n dox zakzi xa', no nayilat men xa'? ¹³ Per na ni lo go, lë' Li mbi'd la, no rë men mile' kwa'n ngokla bixa' kun lë' xa', nela xmod nzobni' ka lo Yech che'n Dios, kwa'n nguzak xa'.

Miliyak Jesús tu mbwin nzho tu mbi mal laxto'

(Mt. 17:14-21; Lc. 9:37-43)

¹⁴ No or mizhin bixa' plo nzhin más rë men che'n Me, une Jesús lë' tu béd men nzhin la naka'n, no kichë'lro' pla rë men nilu' ley kun más rë men che'n Jesús. ¹⁵ No or une rë men Jesús, xe mia'n bixa', orze' karre nguzubi bixa' par uni' bixa' lo Jesús, ¹⁶ orze' nzhab Jesús:

—çKwan kichë'lro' go kun rë xa' ba'?

¹⁷ Orze' nzhab tu xa' xid rë men ze':

—Maestr, lë'da nzëdnu xmë'da lol, porke nzho tu mbi mal laxto' më'd, kwa'n nile' nagakta' di'zh më'd, ¹⁸ porke rë or nizen mbi

re' më'd, haxta niyixkaowe më'd no nigubiy më'd; orze' ñax bichi'n ro' më'd no nidao'lëi më'd, orze' niyëzh më'd; no mina'bla da lo rë men che'n'al par ngago' bixa' mbi mal re', per nangakta' ngale' bixa'i.

¹⁹ Orze' mikab Me, no nzhab Me:

—jMen xa' gat ñilat Dios! çHaxta pok zon kun go par yila go Dios? çHaxta pok xek da lo go? jDinu xmë'dalx!

²⁰ Orze' mbi'y bixa' mbwin lo Jesús; per or une mbi mal Jesús, orze' mile'i lweg'a' mikao mbwin, no ngwachin mbwin lo yuo, orze' maska ñaxyo mbwin, no ñax bichi'n ro' mbwin. ²¹ Orze' mina'bdi'zh Jesús lo xuz mbwin:

—çPlak nzha di nizak mbwin kure'?

Orze' nkab xuz mbwin:

—Dizde win mbwine. ²² No nayax wëlt nigobiy mbwin lo bël no le'n nits, par nzhak-lai gute mbwin; per chi zak le'l tu kwa'n, bilats laxto' go no, no goknu go no.

²³ Orze' nzhab Jesús:

—çChon nel: “Chi zak le'le”?; porke xa' ñila Dios, jre'i gak le' xa'!

²⁴ Orze' lweg'a' nguruzhië xuz mbwin, nzhab xa':

—jNa ñilaka lu; no goknu da, kwa'n nagak yilan!

²⁵ No une Jesús, tu béd men nzhazubi karre plo nzo Jesús, orze' nayi' midi'zh Jesús lo mbi mal ze', nzhab Me:

—jMbi che'n Mizhab kwa'n nile' nzhak sord men no nagakta' di'zh men, na kile' mandadal, gurutin laxto' mbwin re', no nayëkra'l xtu wëlt lo mbwin!

²⁶ Orze' nguru'zhië mbi mal ze', no mile'i mikao mbwin xtu wëlt, no nguzhibe mbwin dox naye, orze' nguro'i; no lë' mbwin mia'n nela tu men ngut ga', haxta rë men nzhin ze' nzhab: “Ngut mbwin.” ²⁷ Per Jesús nguzen ya' mbwin, ngoknu Me nguzuli mbwin. ²⁸ Or nguio Jesús le'n tu yo', orze' minabdi'zh rë men che'n Me lo nab Me, nzhab bixa':

—çChon nangakt ngago' no mbi mal ba', laxto' mbwin ba'?

²⁹ Nkab Jesús:

—Rë lo mbi mal kwa'n nak sa', nagakt ro'i chi nana'b men xche lo Dios.

Nzhab Jesús xtu wëlt xmod gat Me

(Mt. 17:22-23; Lc. 9:43-45)

³⁰ Or nguro' bixa' ze', nded bixa' par lazhe men Galilea; no nanet Jesús, gon rë men plo nzha Me, ³¹ porke lë' Me kilu' lo rë men che'n Me kwan zak Me, kuze' nzhab Me:

—Lë'da nak Xga'n Dios no nak da tu men yizhyuo; no lë' rë men zen da par chi bixa' da plo gat da; per ngubizh yon, lë'da ruban.

³² Per lë' rë men che'n Me, nangazobyekt bixa' widi'zh re', no nizheb bixa' ngan-abdi'zh bixa' kwane.

Milu' Jesús, cho más tsak
(Mt. 18:1-5; Lc. 9:46-48)

³³ Or mizhin bixa' yezh Capernaúm, no or nzhin la bixa' le'n yo', nzhab Me lo rē men che'n Me:

—¿Kwan kichē'l ro' go, or nzē be nez?

³⁴ Per yent cho ngakab; porke or nzē bixa' nez, mis lē' bixa' kichē'l ro', kidi'zh bixa', nabei cho gak xa' le' mandad xid bixa'.
³⁵ Orze' nguzob Jesús, no ngurezh Me dub tu dusen men che'n Me, orze' nzhab Me:

—Cho go nzhakla, gak xa' nile' mandad; xa' ze' gak xa' lult, no nela tu mos ga' gak xa' xid go.

³⁶ Orze' mizo Me tu mē'd lo bixa', no ndē'zh Me mē'd, nzhab Me:

³⁷ —Men niwi' wen lo mē'd win re' por nak mē'd re' men da, gat lē'ta' lo mē'de, sino ke lon miwi' xa' wen; mbaino xa' miwi' wen lon, gat lē'ta' lone, sino ke lo Xuza Me mixē'l da, miwi' xa' wen.

Xa' gat niyi' nine be, man che'n be ño xa'
(Lc. 9:49-50; Mt. 10:42)

³⁸ Orze' nzhab Juan:

—Maestr, une no tu xa' kigo' mbi mal, kize't xa' lē go. Orze' nzhab no lo xa', nale'tra' xa'i, porke gat lē't men che'n be xa'.

³⁹ Orze' nzhab Jesús:

—Bila' go kile' xa'i, porke yent cho tu xa' le' tu zhi'n nazhon por lēn, no guzhēla di orze', di'zh xa' gat lē' ticha, ⁴⁰ porke xa' gat niyi' nine be, man che'n be ño xa'. ⁴¹ No kwaliskier men ne' che'p nits go go, por nak go men da, walika nin, por kuze' lē' Dios za' tu kwa'n wen ka' xa'.

Kwan zak tu xa' le'; la' xtu men Dios
(Mt. 18:6-9; Lc. 17:1-2)

⁴² No nu nzhab Jesús:

—Wanei cho tu xa' le', ya'l laxto' xtu xa' Dios, tu xa' laore ngwayila da; más wen ya xa' le'n nitsdo', xo'b tu ke ro yēn xa', nes yachin xa' par gat xa'. ⁴³ No chi lē' ya'l nile' nizē'b xkil lo Dios; mejor bicho'i. Más wen gat kinutal rop ya'l, per banal dubta' kun Dios, ke par bil le'n bēl, rop lad ya'l, plo ñol bēl par dubta', ⁴⁴ plo nzhao miyēz men, no gat ñot nzhat ma; ni bēl gat ñalt. ⁴⁵ No chi lē' ni'l nile' nizē'b xkil lo Dios, más wen bicho'i. Más wen banal dubta' kun Dios kun tutsa ni'l, ke par bil plo gat ñalt bēl, kun rop lad ni'l, ⁴⁶ plo nzhao miyēz men, no gat ñot nzhat ma; ni bēl gat ñalt. ⁴⁷ No chi lē' zalol nile' nizē'b xkil lo Dios; más wen gulo'i, mbaino yol plo nile' Dios mandad kun tutsa zalol, ke par bil kun rop zalol plo ñol bēl par dubta', ⁴⁸ plo nzhao miyēz men, no gat ñot nzhat ma; ni bēl gat ñalt, ⁴⁹ porke lē' Dios xē'l bēl xid rē men, nela nigo men zed lo kwa'n gao men ga'. ⁵⁰ Lē' zed nizu'; per chi gat nazhi'y, yentra' kwan zu'i. Gok wen go nela zed ga', par kwin go wen, tu go kun xtu go.

10

Milu' Jesús, or nilē' men kun tsa' men
(Mt. 19:1-12; Lc. 16:18)

¹ Orze' nguro' Jesús yezh Capernaúm, nzha Me laz men Judea, xtu ro' you' Jordán. No ze', xtu wēlt, migan tu bēd men lo Jesús, no nguzublo Jesús, milu' Me widi'zh che'n Dios lo bixa' xtu wēlt, nela xmod nile' ka Me.
² Orze' nguzubi pla men fariseo minabdi'zh bixa' lo Jesús par zenbe' bixa' Me (wi' bixa' xmod nak Me), nzhab bixa':

—¿Chi zak lē' tu miyi' kun tsa' xa', lo ley kwa'n mila' Dios lo Muisés?

³ Orze' nzhab Jesús:

—¿Kwan mizobni' Muisés lo ley por kuba'?

⁴ Orze' nzhab bixa':

—Lē' Muisés minabdi'; chi tu miyi' lē' kun tsa', orze' gaxao' tu yech par yanu una', par gak la' miyi' una'.

⁵ Per nzhab Jesús:

—Sa' mizobni' Muisés por dox nakap go, ⁶ per dize or mizuxkwa' Dios yizhyuo, se' nzobni': "Dios ngulo miyi' no una'." ⁷ No nu nzobni': "Por una', lē' miyi' la' xuz no xna', ⁸ par ban xa' tutsa kun tsa' xa'."

No nu nzhab Jesús:

—No gat lē'tra' chop xa', lē' xa' ngok tutsa men. ⁹ Kuze', miyi' xa' mizo Dios tsa', nagak-tra' lē' xa' kun tsa' xa'.

¹⁰ No or ña la rē bixa' le'n yo', orze' mina'bdi'zh rē men che'n Jesús por kwa'n midi'zh Me re', ¹¹ orze' nzhab Me:

—Wanei cho la' nzē'b una' che'n, no ban xa' kun xtu una', nzē'b xki xa' lo Dios por kure'. ¹² No chi lē' una' la' tsa', no ban xa' kun xtu miyi', nzē'b xki ska xa' lo Dios por kure'.

Una'b Jesús lo Dios por rē mē'd
(Mt. 19:13-15; Lc. 18:15-17)

¹³ Orze' nzhanu men pla mē'd lo Jesús, par na'b Me lo Dios por lē' bimē'd; orze' ngala't rē men che'n Me. ¹⁴ Per or une Jesús kure', miyi' Me, orze' nzhab Me:

—Bila' go zubi mē'd lon, naka'nt go lo bimē'd, porke rē men nak nela rē mē'd, xa' ze' yo plo nile' Dios mandad. ¹⁵ No walika kwa'n nin, xa' nagak nela tu mē'd ga', nagakt yo xa' plo nile' Dios mandad.

¹⁶ Orze' ndē'zh Me rē mē'd, no mixo'b Me ya' Me yek bimē'd, par miza' Me yalnazhon che'n Me ka' bimē'd.

Tu miyi' xi, dox rrik

(Mt. 19:16-30; Lc. 18:18-30)

¹⁷ Or mer nzharo' Jesús nez par nzha Me xtu plo, karre mizhin tu miyi' xi, nguzuxib lo Jesús, mbaino minabdi'zh miyi' re':

—Maestr wen, ¿kwan naki'n len par gapa yalnaban dubta' lo Dios? —nzhab miyi'.

¹⁸ Orze' nzhab Jesús:

—¿Chon nel, wen da? Yent cho wen, nab tsa Dios wen. ¹⁹ Lu nane la rë ley che'n Dios: “Nagutal men, nabantal kun una che'n men, no naliwa'ntal, nakê'tal kixu' men, no nakidetal men par ka'l che'n xa'; mbaino gop kwent xuzal mbaino xna'l.”

²⁰ Orze' nzhab miyi' xi re':

—Maestr, rë kure' kilen, dizde win da.

²¹ Orze' miwi' Jesús lo miyi', michizhi' Me miyi', mbaino nzhab Me:

—Xtutsa kwa'n jwalt le'l: Bito rë nak kwa'n kinul, orze' biza'i, ka' rë men xa' yent kwan nzhap, nes par gapal rë kwa'n dox tsak lo yibê'; orze' di'kê ticha.

²² Or mbin miyi' re' kure', xe mia'n xa' tuli di miwin laxto' xa', orze' dox nalats ña xa', porke dox kwa'n nzhap xa', ²³ mbaino miwi' Jesús naka'n lo rë men che'n Me; no nzhab Me:

—jTatu nagan yo tu rrik plo nile' Dios mandad!

²⁴ Or mbin bixa' widi'zh re', xe mia'n rë men che'n Me tuli, no nzhab Jesús xtu wëlt:

—Bin goi xga'n, jtatu nagan yo tu rrik plo nile' Dios mandad! ²⁵ Más jwals ded tu kamey xan tu yaguj, ke par yo tu rrik plo nile' Dios mandad.

²⁶ Or mbin bixa' kure', más mia'n xe bixa', orze' nzhab bixa' lo wech bixa':

—Chi lë'i sa', ipas yent cho men gak ro' lo rë kwa'n nazhe'b kwa'n nzëdkê tich men! —nzhab bixa'.

²⁷ Orze' xe miwi' Jesús lo bixa', no nzhab Me:

—Par rë men, nzho kwa'n nagakt le' men; per Dios, yent cho tu kwa'n nagakt le' Dios.

²⁸ Orze' nguzublo nzhab Per:

—Biwi' go, no mila' rë kwa'n, par nzadkê no tich go.

²⁹ Nkab Jesús:

—Walika kwa'n nin lo go, rë xa' la' lizh, o wech xa', o bizan xa', o xuz xa' o xna' xa', o xmë'd xa', o yuo che'n xa', por ñila xa' da; ³⁰ per rë kwa'n mila' xa', xtu gayo' wëlt máse gap xa' mis yizhyuo re'; mbaino nu yi' men ne men xa' por da; no xtu yizhyuo kwa'n laore yi'd, lë' xa' ban par dubta'. ³¹ Per nayax xa' galo nal re', gak xa' lult laka; no xa' lult laka nal re', gak xa' galo laka.

Mion wëlt midi'zh Jesús, lë' Me gat

(Mt. 20:17-19; Lc. 18:31-34)

³² Or nza Jesús nez kun rë men che'n Me par yezh Jerusalén, nzhuben Me lo bixa'; orze' xe mia'n rë men che'n Me niwi' bixa' lo Me; mbaino nu rë men se'ga, dub nizheb bixa' nzadkê bixa' tich rë men che'n Me. Orze' ngurezh Jesús za tu dusen men che'n Me tu lad, nguzublo kidi'zh Me lo bixa' kwan zak Me, ³³ nzhab Me:

—Biwi'u, lë' be nza yezh Jerusalén plo zen bixa' da, par chi bixa' da lo rë ngulëi' ro,

no lo rë xa' nilu' ley; no lë' rë xa' re' gab, ñal gat da; orze' chi bixa' da lo rë men gat lë't men Israel par gut rë men re' da, ³⁴ mbaino xizhnu bixa' da, chuk bixa' lon, no kin bixa' da; orze' gut bixa' da, per ngubizh yon, lë'da ruban.

Kwa'n mina'b Jakob no Juan

(Mt. 20:20-28)

³⁵ Orze' nguzubi Jakob kun Juan xga'n Zebedeo lo Jesús, par nzhab bixa':

—Maestr, nzhakla no, le' go tu kwa'n na'b no lo go.

³⁶ Nkab Jesús:

—¿Kwan nzhakla go len por go?

³⁷ Orze' nzhab bixa':

—Or gak go rey, gap go rë kwa'n, ziyël go zob tuga' no, kad ta' go.

³⁸ Per nzhab Jesús:

—Nanet go kwan kina'b go. ¿Chi zo go kwa'n nala kwa'n go'n, no chi xek go ne go kwa'n nazhe'b kwa'n zak da?

³⁹ Orze' nkap bixa':

—Lë' no xek ka loi.

Per nzhab Jesús:

—Lë' go go ka kwa'n nala kwa'n go'n; mbaino lë' go zakka kwa'n nazhe'b kwa'n zak da, ⁴⁰ per par zob tuga' go ta'n, nagakta' nene; nab tsa Xuza kobe' (wi') cho zob kad ta'n.

⁴¹ Or mbin za chi' men che'n Jesús kure', orze' niyi' bixa' lo Jakob no lo Juan, ⁴² per ngurezh Jesús za chi' bixa' re' par nzhab Me:

—Nane ka go xmod nak rë xa' nile' mandad xid rë men gat lë't men Israel, dox naye nikê rë xa' re' men zhi'n; mbaino rë xa' ro xid rë men ba', mod nzhakla xa' nilinu xa' rë men. ⁴³ Per go, nagakt go sa'; men kwa'n nzhakla le' mandad xid go, xa' ze' gak nela tu mos ga' lo go, ⁴⁴ no xa' nzhakla gak xa' tsak xid go, xa' ze' gak xa' le' mandad che'n más go; ⁴⁵ lë'la na, nak da Xga'n Dios mbaino nak da tu men yizhyuo; gat nzhalta par len mandad lo rë men; lë'da nzhalt par len mandad che'n bixa', mbaino gat da por nayax men yizhyuo par ban bixa'.

Jesús miliyak tu men nikal lo

(Mt. 20:29-34; Lc. 18:35-43)

⁴⁶ Or mizhin bixa' yezh Jeriko no or nzharo' la Jesús yezh ze' kun rë men che'n Me, mbaino kun nayax men se'ga nzhakê tich Me, no ro' nez ze' nzob tu xa' nikal lo lë Bartimeo, xga'n tu xa' lë Timeo, kina'b xa' gon. ⁴⁷ Or mbin xa' nikal lo re', lë' Jesús nzë yezh Nazaret nzhaded ze', nguzublo kibizhië xa' re', naye nzhab xa':

—jJesús, Xga'n Dabi, bilats laxto' da!

⁴⁸ Orze' nzhab rë men: “jKiex, nakuzhiëtra'!!”, per más nayë nguruzhië xa', nzhab xa':

—jXga'n Dabi, bilats laxto' da!

⁴⁹ Lë'chi ngulëz Jesús, mbaino nzhab Me:

—Waka' go xa' ba'.

Orze' nzhab rē men lo xa' nikal lo re':

—¡Nazhebtal, watso; lē' Jesús kibežhal!

⁵⁰ Orze' xa' nikal lo re', ngulubi xa' lar kwa'n nzhob' tich xa', nayen laka ngwatso xa', mizhin xa' lo Jesús, ⁵¹ no minabdi'zh Jesús lo xa', nzhab Me:

—¿Kwan nzhaklal len pur lu?

Mikab xa' nikal lo re':

—Maestr, nzhaklan yani lon.

⁵² Orze' nzhab Jesús:

—Bizē, guzhē ngwani lol por ngwayilal da.

No mis orze', tuli ngwani lo xa' re', orze' nzhakē xa' tich Jesús.

11

Ngüio Jesús Jerusalén nela tu rey ga'

(Mt. 21:1-11; Lc. 19:28-40; Jn. 12:12-19)

¹ Dub nzhazhin Jesús yezh Jerusalén, nzhaded la Me ro' xchop yezh win kwa'n nzhin ze'; tube lē Betfagé, no xtube lē Betania, gax lom plo lē Olivos; orze' mixē'l Me chop men che'n Me, ² nzhab Me:

—Wa go yezh win kwa'n nilu' ba', lē' go zhin plo nikido' tu burrit kwa'n gat zob ni tu men; bixēk go ma no di'nu go ma, ³ no chi cho ne lo go: “¿Plo wei' go burrit ba'?”, orze' gab go: “Lē' Señor naki'n ma, per lwegá' yi'dla' no ma.”

⁴ Orze' ngwa bixa', no une bixa' burrit nikido' le'n nez ro' tu pwert, no mixēk bixa' ma. ⁵ Ze' nzo pla men, xa' nzhab:

—¿Chon kixēk go burrit ba'?

⁶ Orze' nzhab rē men che'n Jesús nela xmod nzhab ka Jesús lo bixa', kuze' mila' rē xa' re'. ⁷ Orze' ñano bixa' burrit re' lo Jesús, mbaino mixo'b bixa' xab bixa' tich ma no nguzob Jesús ma. ⁸ No dox men ndix xab dilant plo ded Jesús, no nzhob bixa' ndix rram la kwa'n micho' bixa' dan, ⁹ no xa' nzhala dilant, no rē xa' nzē tras, naye kibizhiē bixa', nzhab bixa':

¡Bidi'zh go wen nzha xa' mixē'l Dios!

¹⁰ ¡Wen nzha xa' nzē ben che'n xuz be Dabi par le' mandad lo be!

¡Bidi'zh go nazhon Dios, Me nzho lo yibē'!

¹¹ No or nguio Jesús yezh Jerusalén, ngwa Me yado'; no or miwi' Me rē plo, une Me rē kwa'n nzhak ze', orze' nzha Me kun dub tu dusen men che'n Me par yezh Betania, porke ya cho gor la.

Jesús mizhi'bde tu ya nzha'o' por niyent nzha'o' loi

(Mt. 21:18-19)

¹² No xtu riyē'l, or nguro' bixa' yezh Betania, orze' mbi'd nila'n Jesús, ¹³ no zitra', une Jesús tu ya nzha'o' nayē', no ngwatwi' Me, nabei chi nzo nzha'o' loi; no or mizhin Me xan ya, yent kwan nak loi, nab lai, porke

gat lē't tiemp kwa'n niza'i orze'. ¹⁴ Kuze' mizhi'bde Jesús ya nzha'o' ze', nzhab Me:

—Ya nayotra' yi'd men, gao men nzha'o' che'nal.

No kiyon rē men che'n Mei.

Jesús ngulo'tin rē xa' kile'xbi' lo luwe che'n yado'

(Mt. 21:12-17; Lc. 19:45-48; Jn. 2:13-22)

¹⁵ Or nguio bixa' yezh Jerusalén, mizhin Jesús lo luwe che'n yado'; orze' nguzublo kigo'tin Me rē xa' kile'xbi' no rē xa' kwa'n kizi' ze', mbaino michixche Me rē mes che'n rē xa' nichil' dimi che'n men, no plo nito men palom, no michixche Me plo nizob bixa'. ¹⁶ No nangala'tra' Jesús ngaded men kun kwa'n lo luwe ze'. ¹⁷ Orze' nguzublo kilu' Me lo rē men nzhin ze', nzhab Me:

—¿Chi nanet go, se' nzobni' lo Yech che'n Dios: “Lizha yi'd rē nak men yizhyuo, par yi'di'zh bixa' lon?” ¡Per go kile'i nela plo nibin rē wa'n ga'!

¹⁸ No or mbin rē ngulē'i ro kure', kun rē xa' nilu' ley, orze' mikwa'n bixa' mod par gut bixa' Jesús, porke or nilu' Me widi'zh che'n Dios, rē men ña'n xe. Kuze' nizheb bixa' nine bixa' Me. ¹⁹ No or nzhala yē'l, nguro' Jesús kun rē men che'n Me, yezh Jerusalén.

Ya nzha'o' mibizh

(Mt. 21:20-22)

²⁰ No xtu riyē'l ze', or garzi'l; dub nzha bixa' nez, une bixa', lē' ya nzha'o' ze' mibizh la, dub luche. ²¹ No Per mitsila or mizhi'bde Jesús ya ze', kuze' nzhab Me:

—Maestr, lē' ya nzha'o' kwa'n mizhi'bde go ze', ¡mibizhe biwi'ule!

²² Orze' nkab Jesús:

—Kuze' la nin, wayila go Dios. ²³ Walika kwa'n nin, wanei cho men gab lo yi' ba': “Chi ba', bizē le'n nitsdo'”, no nale't xa' chop xigab or gab xa'i, sino yila xa' rē kwa'n gab xa', orze' lē'i gak, lē' Dios le'i. ²⁴ Kuze' kinin, rē kwa'n na'b go lo Dios, wayila goi, lē'i gap go; lē'i zhin lo go. ²⁵ No or kina'b go lo Dios, biya'l laxto' go rē kwa'n nile' men lo go, nes par lē' Xuz go, Me nzho lo yibē', ya'l laxto' Me rē kwa'n nzē'b xki go lo Me. ²⁶ Per chi naya'l laxto' go rē kwa'n nile' men lo go, nu ska Xuz go, Me nzho lo yibē', naya'l laxto' Me rē kwa'n nzē'b xki go lo Me.

Minabdi'zh bixa', cho mile' mandad Jesús

(Mt. 21:23-27; Lc. 20:1-8)

²⁷ Orze' nguibre Jesús xtu wēlt yezh Jerusalén kun rē men che'n Me. No or nzo Me lo luwe che'n yado', lē'chi nguzubi rē ngulē'i ro lo Me, kun rē xa' nilu' ley, mbaino kun rē xa' nak zhi'n yezh, ²⁸ par nzhab bixa':

—¿Cho mile' mandadal kile'l rē kure', o cho mixē'lal par le'le?

²⁹ Orze' nkab Jesús:

—Nuska da nabdi'zh tu kwa'n lo go; no chi lè' go nei, orze' ganin cho mile' mandad da kilen rè kure'. ³⁰ Nal bine go, ¿cho mixè'l Juan, xa' mili'lè'i men le'n nits? ¿Chi Diose, o mene?

³¹ Orze' kidi'zh bixa' entre lè' bixa':

—Chi gab be: “Diose”, orze' lè' xa' ne lo be: “¿Chon ska nangayila go xa'?” ³² No por rè men, nazhe'b be par be, kuze' nagakt gab be: “Men mixè'l Juan”.

Porke rè men nidi'zh, walika Dios mixè'l Juan, ³³ kuze', se' mikab bixa' lo Jesús:

—Nanet no choi.

Orze' nzhab ska Jesús:

—Nuska da nanita, cho mixè'l da, kilen rè kure'.

12

Kwent che'n pla mos nakap

(Mt. 21:33-46; Lc. 20:9-19)

¹ Orze' nguzublo kidi'zh Jesús kun pura kwent lo rè men, nzhab Me:

—Nguo tu miyi', ngo'n ya gub lo yuo che'n; orze' mitsao' xa' naka'n ro' yuo che'n xa', mbaino mizuxkwa' xa' tu plo tsi' xa' gub che'n xa', no nu mizuxkwa' xa' tu plo ya par kina xa'i. Orze' miza' xa' med par ga'n xtu mene, mbaino nguro' xa' lazha xa', nzha xa' che'p. ² Or ngol tiemp za'i, mixè'l xa' nak che'n yuo ze' tu mos, par na'b mos lo xa' ngo'ne, kwa'n ñal gal xa'. ³ Per rè xa' ngo'n loi ze', lè'la migal bixa' mos, no ndin xa' mos, mbaino se'tsa mixè'l bixa' mos. ⁴ Orze' mixè'l xa' ze' xtu mos, per ngulè' bixa' yek mos re', no ngokla ngwa midì'zh bixa' lo mos. ⁵ Orze' mixè'l xa' ze' xtu mos, per mbit bixa' mos re'. Orze' mixè'l xa' más mos, per nzo mos ndin bixa' mbaino mbit bixa'.

⁶ “No xa' nak che'n yuo re', nab tsa xga'n xa' kinu xa', miyi' nazhi' xa'; orze' nzhab xa': “Lè'da xè'l tugaka xga'na kwa'n kinun re'; ro' xa' re'se, gon bixa'.” ⁷ Per rè xa' kwa'n ngo'n yuo re', or une bixa' miyi' re', nzhab bixa' lo wech bixa': “Xa' re' xa' ya'nu rè kure', cha'o gut bixa', par ya'nu be rè che'n xa'.” ⁸ Orze' nguzen bixa' xga'n xa' ze', mbit bixa' miyi', mbaino zit ngulubi bixa' miyi' re'.

⁹ No nu nzhab Jesús:

—Nal, ¿kwa'n le' xa' nak che'n yuo ze'? Lè' xa' yè'd par lo'x xa' rè men nakap kwa'n ngo'n yuo che'n xa', no lè' xa' za'i ga'n xtu ben men. ¹⁰ Taxa, ¿nanet go kwa'n nzobni' lo Yech che'n Dios?:

Lè' ke kwa'n ngulubi rè xa' nichao' yo', lè'i ngok ke galo laka kwa'n nzen dub yo'.

¹¹ Kure' mile' Dios, par tuli xe mia'n rè men.

¹² Orze' ngokla bixa' ngazen bixa' Jesús par ngayo Me lizhi'y'b, porke mizi bixa', par yek bixa' nzha widi'zh re'. Per mizheb bixa' por rè men nzhin ze', orze' ña bixa'.

Jesús midì'zh por kwa'n nzhas lo gubier César

(Mt. 22:15-22; Lc. 20:20-26)

¹³ Orze' mixè'l bixa' pla men fariseo lo Jesús par zenbe' bixa' Me (wi' bixas' xmod nak Me), no pla men che'n Herodes, par nabei chi zab Jesús tu kwa'n gat ñal, par gak kè' bixa' kixu' Jesús. ¹⁴ Orze' mizhin rè men re', nzhab bixa':

—Maestr, nane no, go nidi'zh pura kwa'n wali, gat ñot go man che'n ni tu men, no nali nidi'zh go xmod ñal ban men lo Dios. Bine go lo no, lo ley che'n be, ¿chi lè'ka kix be kwa'n nina'b César, o gat lè'te? ¿Chi ñal za' bei, o gat ñalte?

¹⁵ Per lè' Jesús nane la, ka kina'bdi'zh bixa'i, kuze' nzhab Me:

—¿Chon kizenbe' go da? Ka ta go tu pes le.

¹⁶ No miza' bixa'i, orze' nzhab Jesús:

—¿Cho nikè lo pes re', mbaino cho lè nikè loi?

Orze' nzhab bixa':

—César nikè loi.

¹⁷ Orze' nzhab Jesús:

—Ñal za' go che'n César kwa'n nak che'n César, no za' go che'n Dios kwa'n nak che'n Dios.

Orze' xe mia'n bixa' tuli por kwa'n nzhab Me.

Midì'zh Jesús xmod ruban men

(Mt. 22:23-33; Lc. 20:27-40)

¹⁸ Orze' nguzubi pla men saduceo lo Jesús, xa' nidi'zh: “Gat walit nzho xtu vid”, orze' minabdi'zh bixa' kure':

¹⁹ —Maestr, Muisés mizobni' lo ley: “Chi tu miyi' kinu una' mbaino gat xa' sin nangap xa' mè'd kun lè' una', orze' lè' wech xa' naki'n ban kun lè' una', par gap wech xa' tu mè'd por kwent che'n xa' ngut re'.”

²⁰ Mbaino nguio tu xa' ngop gazh wech; xa' galo ngok tsa' tu una' per ngut xa' sin nangap xa' mè'd; ²¹ orze' xa' mirop miban kun lè' una', per ngut ska xa', se'ga' nangapt ska xa' mè'd. No kun xa' mion, se'ska. ²² Kun za gazh xa' miban una' re', no kun ni tu xa' nangapta' xa' mè'd, mbaino rè xa' ngut. Lult, nu una' ngut. ²³ No or ruban bixa' xtu wèlt, di lo rè xa', ¿cho xa' ya'n kun lè' una'?, porke za gazh xa' miban kun lè' una'.

²⁴ Orze' nkab Jesús:

—Nagan go por nane go kwa'n nzobni' lo Yech che'n Dios, no ni yalnazon che'n Dios nanet go, ²⁵ porke or ruban men, yentra' cho ban kun una', no ni yentra' cho gak jwandang che'n; lè' bixa' gak nela rè ganj che'n Dios ga'. ²⁶ No por rè men ngut xa' ruban, taxa, ¿nanet go widi'zh kwa'n mizobni' Muisés lo yech, or mize't xa' tu ya yich zobyol? Dios nzhab lo Muisés: “Na nak Dios che'n Abraham, no Dios che'n Isaac, mbaino Dios che'n Jakob.” ²⁷ Kuze' nane be,

Dios re', gat lè't Dios che'n men ngute, sino lè' Me Dios che'n men naban. ¿Chi nagat zobyekt go kure'?

Xid rē kwa'n mizobni' Muisés, ¿cho kwa'n galo naki'n le' men?

(Mt. 22:34-40)

²⁸ Orze' nguzubi tu xa' nilu' ley, plo nzo Jesús. Or mbin xa' xmod midí'zh Jesús lo rē men ze', porke une xa', dox wen mikab Jesús; kuze' minabdi'zh xa':

—Xid rē kwa'n mizobni' Muisés, ¿cho kwa'n galo naki'n le' men?

²⁹ Orze' nkab Jesús, nzhab Me:

—Kure' galo laka naki'n le'l, men Israel: “Bine: tutsa Señor Dios che'nal nzho. ³⁰ Bichizhi' Señor Dios che'nal kun dub laxto'l, no kun dub la'l, no kun rē xigab che'nal, mbaino kun rē jwers che'nal.” ³¹ No kwan rop xid rē kwa'n nzobni' nak kure': “Bichizhi' xtu men nela lu ga.” Yentra' xtu kwa'n mile' Dios mandad, más kwa'ro lo rop kure'.

³² Orze' nzhab xa' nilu' ley ze' lo Jesús:

—Dox wen kwa'n nel ba', maestr; walika, tutsa Dios, no yentra' xtu Dios más lo Dios re'. ³³ No kwa'n chizhi' men kun dub laxto' men Dios, no kun rē xigab che'n men, mbaino kun rē jwers; no chizhi' men xtu men nela lè'ka xa', más tsake lo rē kwa'n zak men chigab walika nazhon par men, mbaino kun más rē gon niza' men lo Dios.

³⁴ Or une Jesús, lè' xa' re' mikab nela xmod ñale, orze' nzhab Jesús:

—Gat zitra' nzol par yol plo nile' Dios mandad.

No dizde orze', ya ni yentra' cho ngaye laxto', ngana'bdi'zh más kwa'n lo Me.

¿Plo nzē Krist?

(Mt. 22:41-46; Lc. 20:41-44)

³⁵ Dub kilu' Jesús widi'zh che'n Dios lo luwe che'n yado', lè'chi nzhab Me:

—¿Chon nidi'zh rē xa' nilu' ley, lè' Krist nak xga'n Dabi? ³⁶ Mbaino mis Dabi nzhab por Sprit che'n Dios:

Lè' Señor nzhab lo Xa' nile' mandad da:

“Guzob lad direch da, haxta or len, che'ptsa gak rē xa' nidilal xan ni'l.”

³⁷ Nal, ¿xmod nak lè' Krist nak xga'n Dabi?, porke mis Dabi nzhab: “Xa' re', Me nile' mandad da.” ¿Chon ska, nake xga'n Dabi?

No tu béd men kwa'n nzhin ze', ño laxto' bixa' xmod kidi'zh Jesús.

Midi'zh Jesús, xmod nak rē xa' nilu' ley

(Mt. 23:1-36; Lc. 11:37-54; 20:45-47)

³⁸ No dub kilu' Jesús widi'zh che'n Dios, nzhab Me:

—Bikina go go lo rē xa' kwa'n nilu' ley, lè' bixa' ño laxto' nzhak bixa' lar no'l; mbaino ño laxto' bixa', nini' men lo bixa' dub lo xbi'. ³⁹ Mbaino ño laxto' bixa' zob galo laka

bixa' plo nizob rē xa' ro, le'n yo' plo nitse'd men widi'zh che'n Dios; no nu plo nzhak tu lani galo laka bixa'. ⁴⁰ Mbaino niliwa'n bixa' che'n rē una' ngut xmiyi'; no par gab men, menaye bixa', xche nina'b bixa' lo Dios. Kuze', más nazhe'b kwa'n zak bixa' or gab Dios xmod gak kun kad men yizhyuo.

Tu una' ngut xmiyi', miza' gon

(Lc. 21:1-4)

⁴¹ Orze' nguzob Jesús dilant plo ñuchao' rē gon; xe kiwi' Me xmod kila rē men ze' gon, no tu béd men rrik kila nayax dimi.

⁴² Lè'chi mizhin tu una' ngut xmiyi', no prob xa'; orze' le'n ze' mila una' chop dimi kwa'n natsakt be's, ⁴³ orze' ngurezh Jesús rē men che'n Me, nzhab Me:

—Walika nin, una' prob kwa'n ngut xmiyi' re', par Dios, más nayaxe miza' una' ke rē xa' rrik ba'; ⁴⁴ rē xa' rrik ba' miza' kwa'n mia'n sobr lo bixa', per una' re', dub lo yalprob che'n xa', rē tsa dimi kwa'n kinu xa' par gao xa', miza' xa'.

13

Midi'zh Jesús, lè' yado' bil

(Mt. 24:1-2; Lc. 21:5-6)

¹ No or nzharo' Jesús lo luwe che'n yado', orze' nzhab tu rē men che'n Me:

—Maestr, biwi' go tatu kwa'ro yado' re'; no tatu nazhe'b rē ke nzho ta'i.

² Per nzhab Jesús:

—¿Chi niwi'l dox kwa'roi? Per zhín zhè ni tu ke che'ne naya'nte tich weche; rēi bil.

Señ kwa'n gak lo yibé', or nzhazhin lox yizhyuo

(Mt. 24:3-28; Lc. 21:7-24; 17:22-24)

³ Orze' nzha Me yek lom kwa'n lè Olivos, ze' nilu' laka yado', orze' nguzob Me, no za dap rē xa' re' mina'bdi'zh lo Me: Per kun Jakob no Juan mbaino Ndrés; nzhab bixa':

⁴ —Bine go lo no, ¿pok gak rē kure', no xmod lu' or nzhazhin la rē kure'?

⁵ Orze' nguzublo kidi'zh Jesús, nzhab Me:

—Bikina go go, par yent cho kide go, ⁶ porke dox men di'zh: “Na nak Krist”, no dox men kide bixa'.

⁷ No or gon go, laba'i-lare'i kidil men, nayat laxto' go; rē kure' gak galo laka, per stubi nilè'ra' lox yizhyuo. ⁸ Lè' tu gubier dil kun xtu gubier, no tu yezh kun xtu yezh; mbaino rē plo win xo, no yo yalwin. Kure' galo laka yalzi kwa'n zublo zak rē men yizhyuo.

⁹ Per bikina go go, lè' rē men zen go no chi bixa' go lo rē gustis, no kin bixa' go le'n rē yo' plo nitse'd men widi'zh che'n Dios; mbaino wei' bixa' go lo rē gobier no lo rē rey por nak go men da; kure' gak par di'zh go cho da lo bixa'. ¹⁰ No antis di lox yizhyuo, naki'n re'ch widi'zh nazhon che'n Dios lo rē ben men yizhyuo. ¹¹ Or zen bixa' go par wei'

bixa' go lo rë xa' nile' mandaz ze', no nale't go xigab xmod kab go lo bixa'; lë' Sprit che'n Dios di'zh por go. ¹²No lë' men chi mis wech men par gat wech xa', mbaino xuz men mis lë' xa' chi rë xin xa', no rë xin xa' chi xuz xa' par mis lë' bixa' le' gat rë melizh bixa'. ¹³Sa' li'nu nayax men go por nak go men da, per xa' xek lo rë kure', xa' ze' ban bid nazhon kwa'n niza' Dios.

¹⁴No or ne go, yo tu kwa'n dox gat nam-bet plo nzho yalnazhon che'n Dios (xa' go'l kure', lë' xa' zobyeke), orze' rë men nzho lazh men Judea, lë' bixa' yuka'ch dan; ¹⁵no rë men nzo yek yo', naza'tra' la bixa' par ko' bixa' rë che'n bixa'; ¹⁶mbaino xa' nzo dan, naza'tra' yubre xa' ni par yaka' xa' xab xa'. ¹⁷No zhë ze', jzhe'b nalats nzha rë una' nak xin, mbaino rë una' naka' më'd! ¹⁸Bina'b go lo Dios, par zhë zhin rë kure' nagakte rë mbëo' nayag. ¹⁹Dub di mizuxkwa' Dios yizhyuo, lalta', nagat zakzi men nela zak bixa' rë zhë ze', nab tsa orze'i; no ni nayo ra' ne men xtu kwa'n nela kwa'n yi'd ze'. ²⁰No chi xche di' rë kure', yent cho men yizhyuo ya'n naban, rë' xa' lox; per por nazhi' Dios rë men xa' ngule Me, la'ta' Dios di' rë kure' xche.

²¹'No chi cho ne lo go: "jBiwi!, lë' Krist nzo re'!", o "jBiwi!, lë' Krist nzo ba'!", nayilat goi, ²²lë' nayax men yo di'zh: "Na nak Krist", mbaino yo nayax men gab lo men: "Na nidizh por Dios", no le' bixa' rë señ nazhon par kide bixa' rë men; no nzho rriez kide bixa' nu rë men ngule Dios gak men che'n Dios. ²³Kuze' bikina go go; lë'da ni la rë kure' lo go nes par nzhon la goi.

Or yi'd Krist xtu wëlt yizhyuo
(Mt. 24:29-35, 42-44; Lc. 21:25-36)

²⁴No nzhab Jesús:

—Le'n rë ngubizh ze', or lox rë yalzi kwa'n nzho yizhyuo, orze' lo ngubizh kao, no lo mbëo' nayanitra', ²⁵mbaino gab rë mbël lo yibë'; no nu bil rë kwa'n nzen kwa'n nzho lo yibë'. ²⁶Orze' rë men ne, yala le'n xkao kun rë ganj che'n Xuza, mbaino kun rë yalnazhon da. ²⁷No xëla rë ganj che'n Xuza par kan rë men da xa' ngulen dap lad yizhyuo, dizde tu ro' yizhyuo haxta xtu ro' yizhyuo.

²⁸'Biwi' go xmod nak ya nzhao'; or nixi-che, orze' nane go, lë' biyi nzhazhin la. ²⁹Se'ga' or ne go, kiyak rë kwa'n nazhe'b re'; nane la go, lë'da nzhazhin la yal. ³⁰Walika kwa'n kinin, or zublo gak rë kure', rë men yizhyuo xa' mia'n naban orze', se'gaka naban bixa' or lox gak rë kure'. ³¹Yibë' no yizhyuo, lë'i lox; per rë widi'zh kwa'n kinin re', nadedte, rëi gak. ³²Per zhë ze', or zhin gak rë kure', yent cho nanei; ni rë ganj kwa'n nzho lo yibë', mbaino ni na; nab tsa Xuza Dios nanei. ³³Kuze' biwi' go kwan le'

go, no gok natsin go; porke nanet go or zhin rë kure'. ³⁴Rë kure' nak nela tu miyi' nguro' nzha lazh men. Antis di ya xa', mila' xa' tuga' rë mos che'n xa' par kina rë che'n xa', mbaino miika'b xa' lo tu rë mos re' kina ro' pwert. ³⁵No go nak nela rë mos re', bikina go; porke nanet go cho or yë'd xa' nak che'n yo' re', chi mizhëlalayuoi, o garol yë'le, o or nikë' nguid gay kante, o garzi'le; ³⁶nes par or yala de rreppent, yent kwan ya laxto' go. ³⁷No kwa'n nin lo go re', gat lë't par nab go nzhai, sino par rë men yizhyuo; igok natsin go!

14

Mia'n bixa' di'zh xmod zen bixa' Jesús
(Mt. 26:1-5; Lc. 22:1-2; Jn. 11:45-53)

¹Nzhak jwalt xchop ngubizh par gal lani Pask, zhë nzhao men pan kwa'n yent levadur. Lë' rë ngulë'i ro kun rë xa' nilu' ley, kikwa'n bixa' mod zen bixa' Jesús xla'n, par gut bixa' Me, ²mbaino kidi'zh bixa':

—Nale't bei zhë lani, par nayent kwan le' rë men.

Tu una' michob aseit nax yek Jesús
(Mt. 26:6-13; Jn. 12:1-8)

³No or nzo Jesús yezh Betania, ngwatao Me lizh Simón xa' lë "Lepros". Or nzob Jesús lo mes, mizhin tu una' kun tu bot win kwa'n nakxao' kun ke ónice, dox tsake; viv aseit nardo nzho le'ne. Orze' ngulë' una' kwa'n nzho aseit re', michob una'i yek Jesús. ⁴Per pla xa' nzhin ze', nangayot laxto' bixa'i, nzhab bixa' lo wech bixa':

—¿Chon mitsinu una' re' aseit ba'? ⁵Ngak ngado aseit ba' kwa'n tsak chi' mbëo' kë men zhi'n che'n men, par ngaga'z dimi ze', ngaka' rë men yent kwan nzhap.

Kuze', ndil bixa' una' ze'. ⁶Orze' nzhab Jesús:

—La' go, nadilt go una' re'; ¿chon kikixian go xa'?, porke dox wen tu kwa'n mile' xa' por da; ⁷rë men prob, zilita' yo bixa' xid go, gak gaku go bixa' or nzhakla go; per na gat lë'ta' dubta' zon kun go. ⁸Mbaino una' re', mile' kwa'n ngok mile' xa'; michob xa' aseit nax da, nes par or ga'ch da mile' la xa'i. ⁹No walika kwa'n nin; rë plo re'ch widi'zh nazhon che'n Dios, nu ka kwa'n mile' una' re' yët, par tsila bixa' una'.

Judas mito Jesús
(Mt. 26:14-16; Lc. 22:3-6)

¹⁰Orze', lë' Judas Iscariote, xa' nzho xid za tu dusen men che'n Jesús, ngwa xa' lo rë ngulë'i ro, par chi xa' Jesús lo rë xa' re'. ¹¹Or mbin bixa' kure', dox nizak laxto' bixa', no nzhab bixa', za' bixa' dimi ka' Judas. No dizde orze', nguzublo kikwa'n Judas mod, kiwi' xa' cho or za'i, par gak chi xa' Jesús.

Lult yè'l kwa'n ndao Jesús kun rē men che'n Me

(Mt. 26:17-29; Lc. 22:7-23; Jn. 13:21-30; I Co. 11:23-26)

¹² Mer ngubizh galo che'n lani pask, or nzhao men Israel pan kwa'n niyent levadur, zhè ze' niza' men Israel tu gon lo Dios, or nzhut bixa' tu mbëkxi'l. Orze' mina' bdi'zh rē men che'n Jesús, nzhab bixa': —¿Plo nzhakla go yachao' no kwa'n gao be nal yè'l re', lani Pask re'?

¹³ Orze' mixè'l Me chop men che'n Me, nzhab Me:

—Wa go le'n yezh; ba' ne go tu miyi' ñanu tu re' nits, no wakè go tich xa'. ¹⁴ Mbaino plo zhìn xa', guzh go lo xa' nak lizhe ze': “Lè' Maestr ne lol: ¿Plo nak yo' kwa'n ne'l, par gao kun rē men da, lani Pask re'?” ¹⁵ Orze' lè' xa' lu' tu yo' nzob yek al ya, naxene, no nazuxkwa' la le'ne; ze' bizuxkwa' go kwa'n gao be.

¹⁶ Orze' nzha rop men che'n Jesús par yezh; no rēi ngok nela xmod nzhab ka Jesús lo bixa'; ze' michao' bixa' kwa'n gao bixa' lani Pask. ¹⁷ No or ngula yè'l, mizhin Jesús ze', kun dub tu dusen men che'n Me. ¹⁸ No dub kiyao bixa' lo mes, nzhab Jesús:

—Walika kwa'n nin, mis tu rē go kiyao kuda re', chi da lo rē men par gut bixa' da.

¹⁹ No rē bixa' miwin laxto', orze' nguzublo minabdi'zh tuga' bixa' lo Jesús, nzhab bixa':

—¿Taxa le' go xigab nai?

²⁰ Orze' nzhab Jesús lo bixa':

—Mis tu rē xa' nzho xid tu dusen goi, xa' kwa'n kigazh pan le'n plap dai. ²¹ Na Xga'n Dios no nu tu men yizhyuo da; lè'da zak rē kwa'n nzobni' lo Yech che'n Dios, iper nazhe'b nalats nzha miyi' xa' chi da lo rē men! Más wen nangayot ngal xa' re'.

²² No dub kiyao bixa', nguzen Me pan, miza' Me xkix lo Dios, no michix Mei, miza' Mei ka' rē men che'n Me, orze' nzhab Me:

—Mbai go, kure' nak kwerp da.

²³ No nguzen Me tu vas nits gub, miza' Me xkix lo Dios, orze' miza' Mei ka' rē men che'n Me, rē bixa' ngu'y, ²⁴ mbaino nzhab Me:

—Kure' nak ren da kwa'n xon, par ya'n nayax men nambe lo Dios. ²⁵ Walika kwa'n nin, nago'tra' nits gub yizhyuo re'. Or go'ne xtu wèlt plo nile' Dios mandad, xa'la mode.

Nzhab Jesús, lè' Per gab, gat nili'be't Per Me

(Mt. 26:30-35; Lc. 22:31-34; Jn. 13:36-38)

²⁶ No or milox mikè' bixa' tu kant lo Dios, nguro' bixa' nzha bixa' yek lom kwa'n lè Olivos, ²⁷ orze' nzhab Me lo bixa':

—Rè go la' nzè'b da, porke se' nzobni' lo Yech che'n Dios: “Lè'da gut miyi' nikina mbëkxi'l, orze' lè' rē ma re'ch.” ²⁸ Per or ruban da, lazh men Galilea kwèza yi'd go.

²⁹ Orze' nzhab Per:

—Ter rē xa' re' la' nzè'b go; per na, nalat go.

³⁰ Per nzhab Jesús:

—Walika kwa'n nin, nal yè'l re', ni naga kè' nguid gai kant chop wèlt, lè'l gab chon wèlt gat nili'be'tal da.

³¹ Per garga'l nzhab Per:

—¡Per na nalat go ter nu da gat kun go! No se'ska nzhab rē bixa'.

Jesús mina'b lo Dios, plo lè Getsemani

(Mt. 26:36-46; Lc. 22:39-46)

³² Orze' ngwa bixa' tu plo lè Getsemani, ze' nzhab Jesús lo rē men che'n Me:

—Riga guzob go, lè'da nzhana'b lo Dios.

³³ Orze' nzhanu Me Per, no Jakob, mbaino Juan; orze' nguzublo niyentra' jwers Me por tanta nizheb Me, haxta netra' Me kwan le' Me, ³⁴ no orze' nzhab Me lo yon xa' re':

—Nzho tu yalnawin dox laxto'n, ya naxektra' da; biya'n go re' no bikina go; naga't go.

³⁵ Orze' nguzè Jesús xche'p dilant; ze' ngo't kuslo Me lo yuo, no mina'b Me lo Dios, chi lè'i gak le' Dios, nazhinz rē kwa'n zak Me orze'. ³⁶ Or kina'b Me lo Dios, nzhab Me:

—Payè', par go, rēi gak le' go. ¿Chi zak kubchi go da lo rē kwa'n nzè par da? Per gat lè't kwa'n nin, kuze' gak; sino kwa'n ne goi.

³⁷ Orze' mièk Me plo nzhin yon men che'n Me ze'; no mizhin Me, lè' yon xa' nax la. Orze' nzhab Me lo Per:

—Simón, ¿chi naxnal? Nangaxektal ni tu or, ngakinal. ³⁸ Bikina go no guna'b go lo Dios, par nayachin go lo che'n Mizhab. Le'n laxto' go nzhakla ka go che'n Dios, per kwerp che'n go gat nzhaklat che'n Dios.

³⁹ Orze' ngwa Jesús xtu wèlt, par ngwana'b Me lo Xuz Me Dios, mis kwa'n nzhab la Me. ⁴⁰ Or mièk Me xtu wèlt, lè' bixa' nax la, porke dox nzè mikal' lo bixa'; orze' net bixa' xmod kab bixa' lo Jesús. ⁴¹ No wèlt mion nzhab Me:

—¿Stubi nax go, kile' go diskans? Porke xa' chi da, ngox la nka'. Biwi' go, lè' or mizhin la, lè' Xga'n Dios Me nu nak tu men yizhyuo, yo ya' rē xa' nzè'b xki lo Dios. ⁴² Waxche go, cha'o, ro' be re'; biwi' go, lè' xa' chi da nzè la ba'.

Ngwaga' Jesús

(Mt. 26:47-56; Lc. 22:47-53; Jn. 18:2-11)

⁴³ Mis orze', stubi kidi'zh Jesús; lè'chi mizhin Judas, mis tu xa' nak tu dusen men che'n Me, kun tu béd men, nzho bixa' nzen spad mbaino yarrot. Rē xa' re' mixè'l rē ngulèi' ro, kun rē xa' nilu' ley, mbaino rē men Israel xa' nak zhi'n. ⁴⁴ No xa' le' entreg Jesús, nzhab xa' tu señ le' xa': “Xa' kwa'n chiro'n ta' kwats, xa' ze' guzen go no bi'y go xa'; no neo, nale' xa' gan.” ⁴⁵ Or mizhin Judas lo Jesús, lwegwa' nguzubi xa', nzhab xa':

—¿Ma go Maestr?

Orze' michiro' xa' ta' kwats Jesús, ⁴⁶mbaino nguzubi rè men par nguzen bixa' Jesús. ⁴⁷Orze' xtu rè xa' nzo ze', kun spad micho' xa' tu nzha mos che'n ngulèi' ro, ⁴⁸orze' midì'zh Jesús lo rè men ze':

—¿Chon nzè go kun spad mbaino kun yarrot? ¿Chigab tu men wa'n nzatsen go? ⁴⁹Zilita' nguzon xid go le'n yado', plo nidi'zha widi'zh che'n Dios; no nangazent go da. Per rè kure' nzhak par gak rè kwa'n nzobni' lo Yech che'n Dios.

⁵⁰Orze', rè men che'n Jesús mikè' karre, mia'n nab tsa Me. ⁵¹Per tu miyi' xi nzhakè tich Jesús, narèl xa' nab tsa tu sab, per nu xa' nguzen men, ⁵²per nguro'tin xa' ya' men, mia'ntsa sab che'n xa' ya' rè men ze', kache' xa' mile' xa' gan.

Mizhin Jesús lo rè gustis che'n men Israel, xa' más nile' mandad

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Orze' mbi'y bixa' Jesús lo ngulèi' ro; no ze' nzhin más ngulèi' kwa'n nile' mandad lo más ngulèi', kun rè men Israel xa' nak zhi'n, mbaino rè xa' nilu' ley kwa'n mila' Dios lo Muisés. ⁵⁴Per lé' Per ngwakè zit tich Jesús, haxta lo luwe che'n ngulèi' ro mizhin Per. Ze' nguzob Per xid rè xa' nikina yado', kibizh bixa' junt lo ki. ⁵⁵No rè ngulèi' ro, mbaino kun más rè gustis xa' más nile' mandad, kikwa'n bixa' cho men gab, nak Jesús tu kwa'n ñal gat Me, par gut bixa' Jesús; per yent kwan ngane bixa', nak Jesús. ⁵⁶No nayax men midì'zh kwa'n nak Jesús, per pura nikè bixa' di'zh, tu xa' kun xtu xa'. ⁵⁷No nzho xa' mikè' mbèl nzhab:

⁵⁸—Mbin no midì'zh xa': "Na chil yado' kwa'n michao' men, mbaino chontsa ngubizh kuxkwa'n xtube, per gat lè't kwa'n nichao' ya' mene."

⁵⁹Per ni kwa'n nzhab xa' re', gat nakte tutsa kun rè kwa'n nidi'zh más bixa'. ⁶⁰Orze' nguzuli ngulèi' ro, par nguzo xa' sao' rè men ze', orze' minabdi'zh xa' lo Jesús:

—¿Chon nanel kabal? ¿Kwan kine rè xa' re' nakal?

⁶¹Per yent kwan ngakab Jesús. Orze' minabdi'zh ngulèi' ro xtu wèlt, nzhab xa':

—¿Chi lu nak Krist, Xga'n Dios Me nidi'zh rè men nazon?

⁶²Orze' nzhab Jesús:

—Nai. No rè go ne, lè' Xga'n Dios, Me nu nak tu men yizhyuo; lè' Me zob lad direch che'n Dios Me nile' rèi; no yè'd Me le'n xkao lo yibè'.

⁶³Orze' michèz ngulèi' ro lar kwa'n nzho'b tich xa', nela tu señ ga' ke lè' Jesús midì'zh tu kwa'n gat lè' lo Dios. Orze' nzhab xa':

—¿Kwan ra' gakra be, ne men, xtu kwa'n nak xa' re'? ⁶⁴Rè go mbin, midì'zh xa' di'zh gat lè' lo Dios. ¿Kwan nile'u xigab ñal xa'?

No rè bixa', tutsa midì'zh bixa', ke ñal gat Jesús. ⁶⁵No nzho bixa' nguzublo michuk lo Jesús; no mitsao' bixa' lo Jesús kun tu lar, no mikè' bixa' puñet yek Jesús, orze' nzhab bixa':

—¿Bine cho mikè'i yekal!

No nu rè xa' nikina yado', mixa't bixa'i ta'ro' Jesús.

Lè' Per nzhab: "Gat nili'be'ta' Jesús"

(Mt. 26:69-75; Lc. 22:56-62; Jn. 18:15-18, 25-29)

⁶⁶No lè' Per nzob al yèt lo luwe, lè'chi mizhin tu una' nikè zhi'n che'n ngulèi' ro, ⁶⁷no or une una' lè' Per kibizh, xe miwi' una', nzhab una':

—Nuka lu, niki'zè kun Jesús Nazareno.

⁶⁸Orze' nzhab Per:

—¿A'al ¡Ni nanen kwan kidi'zhal!

Orze' nguro' Per ro' yo' al tich. (No lwega' mikè' tu nguid gai kant.) ⁶⁹No or une kriad Per xtu wèlt, nguzublo nzhab una' xid rè men nzhin ze':

—¿Nuka xa' re', tu xa' nikizè kun lè' bixa'!

⁷⁰Per xtu wèlt nzhab Per: "Nalibe'ta' xa' ba'", no uzhèla ze', rè xa' nzhin ze' nzhab bixa' lo Per:

—¿Sigur nukal nikizèl kun lè' bixa', porke lu nzè lazh men Galilea!

⁷¹Orze' nguzublo kize't Per Dios, nzhab Per:

—¿Dios zakzi da chi lè'da ka kini rè kure'!

⁷²Lè'chi mis orze', mikè' nguid gai kant xtu wèlt. Orze' mitsila Per kwa'n nzhab Jesús: "Antis di kè' nguid gai kant chop wèlt, lè'l gab chon wèlt: Gat nili'be'ta' xa' ba'." Orze' dox mbi'n Per.

15

Mbi'y bixa' Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

¹No riyè'l, garzi'l laka migan rè ngulèi' xa' nile' mandad lo más ngulèi', no kun rè men Israel xa' nak zhi'n, mbaino kun rè xa' nilu' ley, no kun más rè gustis xa' más nile' mandad; rè xa' re' tutsa midì'zh bixa'. Orze' mili'b bixa' Jesús par mbi'y bixa' Me lo Pilat. ²Orze' minabdi'zh Pilat lo Jesús, nzhab xa':

—¿Chi lu nak rey lo rè men Israel?

Orze' nzhab Jesús:

—Go nei.

³No rè ngulèi' xa' nile' mandad lo más ngulèi', por dox kixu' kikè' bixa' Jesús, ⁴kuze' xtu wèlt minabdi'zh Pilat, nzhab xa' lo Jesús:

—¿Chon nanel kabal ni tu kwa'n? Biwi', dox kwa'n ne bixa' nakal.

⁵ Per yent kwan ngakab Jesús, kuze' haxta net Pilat, xmod le' xa'.

Jesús o Barrabás

(Mt. 27:15-31; Lc. 23:13-25; Jn. 18:38-19:16)

⁶ No or nzhal lani Pask, kinu Pilat kos-tumbr, niliya' xa' tu men nzho lizhyi'b, dike cho men gakla rè men ro' lizhyi'b. ⁷ No tu miyi' lè Barrabás nzho lizhyi'b orze', kun zipla xa' mbit men kun lè' xa', or ngok tu dil kun gubier César. ⁸ Orze' mizhin rè men lo Pilat, nguna'b bixa', ziyèl Pilat ko' xa' tu men nela xmod nile' ka xa'. ⁹ orze' nzhah Pilat:

—¿Chi nzhakla go liyan xa' nak rey che'n rè men Israel?

¹⁰ Porke ngwanu laxto' Pilat, lè' rè ngulèi' ro xa' nile' mandad, michi Jesús por mbidios bixa'. ¹¹ Per lè' rè ngulèi' xa' nile' mandad ze', más mile' bixa' par nzhah rè men, liya' Pilat Barrabás mejor. ¹² Orze' minabdi'zh Pilat:

—¿Nal, kwan nzhakla go len kun xa' kwa'n nzhah go nak rey lo rè men Israel?

¹³ Orze' nzhah rè men, kibizhiè bixa':

—¿Bikè' xa' lo krus!

¹⁴ Orze' nzhah Pilat:

—¿Per kwan tu kwa'n nazhe'b mile' xa' re'?

Per rè men, xtu wèlt nguruzhiè bixa':

—¿Bikè' xa' lo krus!

¹⁵ No par ya'n Pilat wen kun rè men, miliya' xa' Barrabás, no dispwes di mile' xa' mandad ndin bixa' Jesús, orze' michi xa' Jesús lo men par kè' bixa' Jesús lo krus. ¹⁶ Orze' lè' rè sondad mbi'y Jesús lo luwe plo nzob palas, kwa'n lè 'pretorio.' Ze' migan pas como xo'p gayo' sondad román. ¹⁷ No mila bixa' tu lar naxne yèn Jesús, nela che'n tu rey ga'. Orze' mizuxkwa' bixa' tu koron yich, par mizob bixa'yek Jesús, ¹⁸ orze' nguzublo nibizhyè bixa', nzhah bixa':

—¿Wen nzha rey che'n rè men Israel!

¹⁹ Orze' mixa't bixa' ya yek Jesús, no michuk bixa' lo Me, mbaino nguzuxib bixa' par mile' bixa' nela nile' men kun tu rey ga' lo Me. ²⁰ No or milox mixizhnu bixa' Jesús, orze' ngulo' bixa' lar naxne ze' yèn Me, orze' migak ska bixa' xab ka Me, orze' ngulo' bixa' Jesús par kè' bixa' Jesús lo krus.

Or nkè Jesús lo krus

(Mt. 27:32-44; Lc. 23:26-43; Jn. 19:17-27)

²¹ No tu miyi' lè Simón, xa' nzè yezh Cirene, xa' nak xuz Lejandr no Ruf; ñè'd xa' di dan. Or nded xa' ze', orze' mile' rè sondad, mbi'y xa' krus che'n Jesús. ²² Orze' nzhanu bixa' Jesús plo lè Gólgota (Widi'zh re' gab, Yek Men Ngut). ²³ No nzhakla bixa' ngaza' bixa' vin kwa'n noch mirra, par go' Jesús, per nangot Mei. ²⁴ Orze' mikè' bixa' Jesús lo krus, orze' nguzhit bixa' di swert, par ne bixa', cho ya'n kun xab Jesús, no

kwan le' kad bixa'. ²⁵ Pas como las nueve garzi'l, mikè' bixa' Jesús lo krus. ²⁶ No mikè' bixa' tu letr por kwan ngut Jesús, kwa'n nzhah se': "Xa' re' rey che'n rè men Israel."

²⁷ No nu chop wa'n mikè' bixa' lo krus orze'; tu xa' lad direch, no xtu xa' lad izkierd che'n Jesús, ²⁸ par ngok tu widi'zh kwa'n nzobni' lo Yech che'n Dios kwa'n nzhah se': "No nu xa' nguio kwent, xid rè xa' kwa'n nzè'b xki lo Dios."

²⁹ No rè men nided ze', nidi'zh bixa' kwa'n gat lè', nikwin bixa' yek bixa', nzhah bixa':

—¿Taxa! ¡Lu kwa'n nidi'zh, chilal yado'; no chontsa ngubizh, kuxkwa'le! ³⁰ ¡Gula lo krus ba'; no mis lu, la'tal gatal!

³¹ Se'ska nzhah rè ngulèi' xa' nile' mandad, kun rè xa' nilu' ley kwa'n mila' Dios lo Muisés, mixizhnu bixa' Jesús; kidi'zh bixa' lo wech bixa':

—Nayax men miliyak xa'; per kun lè' xa', nangale't xa'i. ³² Chi lè' xa' walika nak Krist, no rey lo rè men Israel; ¡nzhakla no la xa' yub xa' lo krus, par ne noi, orze' yayila no xa'!

No haxta rop xa' nikè lo krus kun lè' Jesús, midì'zh bixa' gat lè' lo Me.

Or ngut Jesús

(Mt. 27:45-56; Lc. 23:44-49; Jn. 19:28-30)

³³ No or ngol garol ngubizh, dub yizhyuo mikao haxta las tres guzhe, ³⁴ no mis orze', midì'zh Jesús naye:

—¿Eloi, Eloi!, ¿lama sabactani? (Widi'zh re' gab: ¿Dios da, Dios da!, ¿chon mila' nzè'b go da?)

³⁵ No pla rè men nzhin ze' mbin widi'zh re'; nzhah bixa': "Bin go, lè' xa' kibezh Li, tu xa' mixè'l Dios nzhala." ³⁶ Orze' karre ngwa tu xa', migazh tlè' sponj le'n vin nala; orze' mili'b xa' yek tu ya, no michi xa'i ro' Jesús par ngo Mei, orze' nzhah xa':

—Bila' go, nabei chi ziyi'd Li, par la xa' lo krus.

³⁷ Per orze' naye nguru'zhiè Jesús, no mizi'la Me; ngut Me, ³⁸ lè'chi nguréz lar kwa'n nayao' le'n yado' plo dox nazhon; chop lè' ngoke tuli, dizde al ya haxta al yèt. ³⁹ No une capitán che'n rè sondad, xa' nzo gax lo Jesús, xmod ngut Jesús, orze' nzhah xa':

—Walika, Xga'n Dios miyi' re'.

⁴⁰ No nu ska pla rè una' kwa'n nzhin zit ze', une rè kure'. Xid rè una' re' nzo Mari Madalén, mbaino xtu Mari xna' Jakob xa' más xi, no xna' Che; no xtu una' lè Salomé.

⁴¹ Rè una' re', or stubi nzo Jesús Galilea, ngwakè bixa' tich Me, no mile' bixa' mandad che'n Jesús; no nu más rè una' nzhin ze', xa' kwa'n ngwakè tich Jesús par yezh Jerusalén.

Or migach Jesús

(Mt. 27:57-61; Lc. 23:50-56; Jn. 19:38-42)

⁴² No or ngwa'z ngubizh zhè Vier, nguzublo zhè bispr che'n sabd, zhè kwa'n

nayi' kë men Israel zhi'n, ⁴³ orze' tu miyi' lë Che, xa' nżë yezh Arimatea, no nak xa' tu xa' nak zhi'n xid rë gustis xa' más nile' mandad che'n men Israel, no nu miyi' re' kimbëz yo plo nile' Dios mandad; xa' re' mile' rriez, ngwa lo Pilat, par nguna'b xa' kwerp che'n Jesús. ⁴⁴ Orze' xe mia'n Pilat or mbin xa', lë' Jesús ngut la; orze' ngurezh xa' capitán che'n rë sondad kwa'n mikë' Jesús lo krus, par minabdi'zh xa', nabei chi walika ngut la Jesús. ⁴⁵ Or mbin xa': "Walikai", nzhab capitán, orze' miza' xa' kwerp che'n Jesús wei' Che. ⁴⁶ Orze' nguzi' Che tu lar yex; no or milox mila xa' kwerp lo krus, orze' michël xa' lar yex kwerp che'n Jesús, ngwaka'ch xa' le'n tu ba' kwa'n nade'n la le'n pura ke; no mitsao' xa' ro'i kun tu ke ro. ⁴⁷ No Mari Madalen kun xtu Mari xna' Che, une bixa' plo miga'ch kwerp che'n Jesús.

16

Jesús nguruban

(Mt. 28:1-10; Lc. 24:1-12; Jn. 20:1-10)

¹ Or nded zhë sabd ze', lë' Mari Madalen mbaino xtu Mari xna' Jakob, kun una' lë Salomé; ngwazi' bixa' aseit nax par chob bixa'i kwerp che'n Jesús. ² No primer zhë che'n sman, garzi'l laka laore ngulen laka ngubizh, nzha rë una' re' ro' ba'. ³ Dub nzha bixa' nez, nzhab tu una' lo xtu una':

—¿Cho gaknu be par kubchi ke, ro' ba' se?

⁴ Per or nzhazhin la bixa' gax, lë'chi une bixa', lë' ke ze' nax la tu lad. No dox kwa'ro ke ze'. ⁵ Or nguio bixa' le'n ba', une bixa' tu miyi' xi nak tu lar bëo laka, nzob lad derech; orze' dox mizhe'b biuna', ⁶ orze' nzhab miyi' xi re':

—Nazhebt go. ¿Chi Jesús Nazareno, Me nkë lo krus, kikwa'n go? Yentra' Me re', lë' Me nguruban la. Biwi' go plo nguxo'b Me. ⁷ Per nal bizë go, no wayab goi lo rë men che'n Me, mbaino lo Per; lë' Me kimbëz la lazhe che'n men Galilea; ze' ne go Me, nela xmod mila' ka Me di'zh.

⁸ Orze' nguro' rë una' ze' karre le'n ba', porke dox mizheb bixa' haxta nixiz bixa'; per yent cho lo ngab bixa'i nez, porke dox mizheb bixa'.

Ngurulo Jesús lo Mari Madalen

(Jn. 20:11-18)

⁹ No dispwes di nguruban Jesús garzi'l laka ngubizh galo che'n sman, orze' ngurulo Me galo laka lo Mari Madalen, una' kwa'n ngulo' Jesús gazh mbi mal laxto'. ¹⁰ Orze' lë' una' ngwayabe lo rë men che'n Jesús, porke dox niwin laxto' bixa'. ¹¹ No or mbin bixa', lë' Jesús nguruban, no lë' una' re' une Me; per net bixa' ngayila bixa'i.

Jesús ngurulo lo xchop men che'n

(Lc. 24:13-35)

¹² Dispwës di kure', ngurulo Jesús xtu mod lo xchop men che'n Me, or nzo bixa' dan. ¹³ Orze', rop xa' re' ngwayabe lo más bixa', per nangayilatska rë xa' ze'i.

Jesús ngurulo lo za chi' bitub men che'n

(Mt. 28:16-20; Lc. 24:36-49; Jn. 20:19-23)

¹⁴ Lult laka ngurulo Jesús lo za chi' bitub men che'n Me or nzob bixa' lo mes; orze' ndil Jesús bixa' por gat ñila bixa'i, por tanta nad bixa', nangayilat bixa' rë kwa'n nzhab, rë xa' une nguruban Me. ¹⁵ Orze' nzhab Jesús:

—Wa go dub yizhyuo, par wadi'zh go kwa'n nazhon che'n Dios re', lo kwantsa men. ¹⁶ Xa' yila da no gakké'i xa', lë' xa' gal vid nazhon kwa'n niza' Dios; per xa' nayila da, lë' Dios zakzi xa'. ¹⁷ No rë señ re' le' rë xa' ñila da: Por lën, kutin xa' mbi mal; di'zh xa' xtu ben di'zh kwa'n za' Dios ka' men; ¹⁸ no ter zen xa' mbë'l, o go xa' tu kwa'n nile' nzhat men, per yent kwa'n zak bixa'; no or xo'b bixa' ya' bixa' yek rë men nzhakne, lë' rë men ze' yak.

Jesús ña lo yibë'

(Lc. 24:50-53)

¹⁹ No or milox nzhab Me rë kure', orze' nkili Me lo yibë' par nguzob Me lad derech che'n Xuz Me Dios. ²⁰ No rë men che'n Me, nguro' bixa' rë plo, par ngwadi'zh bixa' widi'zh nazhon che'n Dios por Jesukrist. No lë' Me ngoknu bixa' por rë señ nazhon kwa'n mile' Me por lë' bixa'.

Widi'zh nazhon che'n Jesukrist kwa'n mizobni' San Luk

Mixë'l Luk tu yech lo Tioj

¹ Nayax men, xa' nak men che'n Jesukrist, mizuxkwa' la bixa' kwent che'n kwa'n mile' Dios xid be, ² no nela xmod milu' ka men dizde or galo, rë xa' kwa'n une kure' kun zalo bixa', no nu rë xa' kwa'n milu' widi'zh che'n Jesukrist lo men. ³ Kuze', nu ska da mile xigab kë'n rë kure' lo yech, or milox mina'b dizha, miwi'n wena-wen, xmod ngok kwent che'n Jesukrist, dizde or nagat gal Me, O Tioj, lu xa' dox tsak, ⁴ par ganel, walika widi'zh kwa'n milu' men lol, kwent che'n Jesukrist.

Midi'zh tu ganj che'n Dios lë' Juan gal, xa' lülë'i' Krist le'n nits

⁵ No or nak Herodes rey lo rë men Judea, nzho tu ngulë'i' xa' lë' Zacarias, tu xa' nzë ben che'n Abías, tu xa' tiemp. No una' che'n xa' lë' Sabel, una' re' nzë ben che'n ngulë'i' Aarón. ⁶ No wen nikizë bixa' lo Dios, mbaino nzhon bixa' ro' Dios, nile' bixa' rë kwa'n nzhab Señor. ⁷ Per gat kinut bixa' xin bixa', porke lë' Sabel nagakt gap më'd, mbaino rop bixa' ya ngwagal la.

⁸ Per ngol tu ngubizh, lë' ben tsa' ngulë'i' Zacarias ngol, le' zhi'n lo Dios, orze' Zacarias ngol xa' le' zhi'n lo Dios. ⁹ Le'n rë ngubizh ze', se' nak kostumbr che'n rë ngulë'i', lë' Zacarias ngol yo le'n yado', par lazh ya' lo Dios. ¹⁰ No dub kilazhya'l xa' lo biko', lë' nayax men nzhin tich, kina'b bixa' lo Dios. ¹¹ Lë'chi ngurulo tu ganj che'n Dios lo Zacarias, al nez lad direch che'n biko' plo nilazhya'l rë ngulë'i'. ¹² No or une Zacarias ganj re', net xa' kwan le' xa', dox mizheb xa'. ¹³ Orze' nzhab ganj:

—Zacarias, nazhebtal, porke lë' kwa'n guna'bal lo Dios, lë' Me mbin kai, lë' una' che'nal Sabel gap tu xmë'dal, mbaino ku'lël më'd Juan, ¹⁴ no dox zak laxto'l, mbaino zak laxto' rë men, or gal më'd re', ¹⁵ porke lë' më'd re', dox tu miyi' gak xa' lo Dios, no nayot go xa' kwa'n nile' nizuzh men, mbaino dub naga gal më'd re', lë' Sprit che'n Dios nzho la laxto' më'd. ¹⁶ No lë' më'd re', le' nayax men Israel, lë' bixa' la' kwa'n gat lë't nile' bixa', mbaino yëk bixa' lo Dios che'n bixa'. ¹⁷ Juan re' yi'd galo laka lo Señor kun mis poder kwa'n miza' Sprit che'n Dios nka' Li, tu xa' tiemp, par kwin xuz men wen kun xin xa', mbaino par rë men nayi' lazh, tse'd bixa' gon bixa' ro' rë xa' nile' kwa'n ñal, nes par zobyek men widi'zh che'n Dios, Me yë'd re'.

¹⁸ Orze' minabdi'zh Zacarias lo ganj ze':

—¿Xmod nen chi walika rë kwa'n kinel lon? Porke na dadgol la, no nu ska una' da mengol la.

¹⁹ Orze' nzhab ganj:

—Na lë' Gabriel, no nzon lo Dios par len mandad che'n Dios. Lë' Dios mixë'l da par dizha kulu, nzadnin tu widi'zh wen kwa'n le' zak laxto'l. ²⁰ No biwi', por nangayilal kwa'n nin lol, lë'l ya'n mud, nagaktra' di'zhal, haxta ke zhin zhë gak rë kure'.

²¹ No dub kiyak rë kure', no lë' rë men nzhin al tich kimbëz bixa' ro' Zacarias, no kile' bixa' xigab: “¿Chon zhe'b xche nzho xa' re' le'n yado'?” ²² No or nguro' Zacarias le'n yado', nangaktra' ngadi'zh xa' lo rë men. Orze' ngwanu laxto' rë men, lë' Dios milu' tu kwa'n lo xa' le'n yado', mbaino maska ya' Zacarias nzhak, kidi'zh xa' kun pura seña, orze' mia'n xa' mud.

²³ No or milox mitsa Zacarias rë ngubizh che'n xa' kwa'n nile' xa' zhi'n le'n yado', orze' ña xa' lizh xa'. ²⁴ No or nded rë ngubizh ze', lë' Sabel, una' che'n xa' nak xin la, no nangaro'tuna' lizh una' dub gai' mbëo', kile' una' xigab re': ²⁵ “Lë' Dios mile' kure' kuda, par naxizhnu ra' men da, por nagapa më'd.”

Tu ganj ngwayab lo Mari, lë' Jesús gal

²⁶ Nzha xo'p mbëo' di ngok kure', orze' mixë'l Dios ganj Gabriel tu yezh kwa'n lë' Nazaret, kwa'n ña'n lazh men Galilea, ²⁷ plo nzho tu una' ye'n lë' Mari, nzo xti'zh par ban kun tu miyi' lë' Che; miyi' re' nzë ben che'n rey Dabi. ²⁸ Nguiio ganj le'n yo' plo nzho Mari, orze' nzhab ganj:

—¿Mal Mari? ¿Dios niwi' wen lol, no Dios nzo kun lu!

²⁹ No or mbin Mari widi'zh re', net Mari xmod le' Mari, mile' Mari xigab: “¿Chon ne xa' ba' kure' lon?” ³⁰ Orze' nzhab ganj:

—Mari, nazhebtal, porke nazhon nzhal, lë' Dios niwi' lol. ³¹ Nal biwi', lë'l wei'xin, lë'l gap tu më'd xibiyl', mbaino ku'lël më'd JESÚS. ³² Dox tu miyi' tsak gak më'd re' lo Dios, mbaino lë' më'd re' rulë Xmë'd pa' Dios, Me nzho lo yibë', no lë' Señor Dios le', gak më'd re' rey, nela ngok Dabi ga', tu xa' kwa'n ngok mis ben më'd re'; ³³ par lë' më'd re' mandad par dubta' lo rë men Israel, no nayot lox le' më'd re' mandad.

³⁴ Orze' nzhab Mari lo ganj:

—¿Xmod gak kure', porke gat kinuta' miyi'?

³⁵ Orze' nzhab ganj:

—Lë' Sprit che'n Dios yi'd lol, mbaino kun poder che'n Dios, dubal yao' kun xkal che'n Me, kuze' lë' më'd gapal ba', rulë Xmë'd pa' Dios, më'd nazhon kwa'n le' rë tsa kwa'n nzhakla Dios. ³⁶ No biwi', nu ska tu bël ye'nal, xa' lë' Sabel, nzha la xo'p mbëo' naxxin xa', no ter mengol la xa', xa' kwa'n

nidi'zh men nagakt gap mè'd, ³⁷ porke par Dios, yent kwan nagakt le' Dios.

³⁸ Orze' nzhah Mari:

—Biwi' go, Dios nak Me nile' mandad da; le' Dios kuna nela xmod nel lon ba'.

Orze' ña ganj.

Ngwatsi' Mari ma Sabel

³⁹ No le'n rē ngubizh ze', nayan nzha Mari plo nzho Sabel, tu yezh kwa'n nzhin le'n rē yi', kwa'n ña'n lazh men Judea. ⁴⁰ No or nguio Mari lizh Zacarías, nzhah Mari:

—¿Mal, Sabel?

⁴¹⁻⁴² No or mbin Sabel widi'zh che'n Mari, tuli miwin mè'd laxto' Sabel, orze' mile' Sprit che'n Dios naye midì'zh Sabel lo Mari, nzhah una':

—Nazon nzhah mile' Dios, más ke lo rē una' nzho yizhyuo; mbaino nu nazon nzha xmè'dal lo Dios. ⁴³ ¿Cho da, par yi'dtswi' xna' Señor da, ma da?, ⁴⁴ porke biwi', or mbina midì'zhal, miwin xmè'da laxto'n di tanta nizak laxto' mè'd. ⁴⁵ Nazon nzhah, por ngwayilal gak rē widi'zh che'n Dios, kwa'n ne ganj lol.

⁴⁶ Orze' nzhah Mari:

Kun dub laxto'n, zan xkix lo Dios por nazon Me,

⁴⁷ no nizak laxto'n por Dios da, Me kwa'n ngulo' da lo rē kwa'n nzē'b xkin,

⁴⁸ porke Dios miwi' lon, ter nak da nela tu mos nado ga' lo Dios, tu men kwa'n natsakt tuli.

Per biwi', dizde nal ra', rē men kwa'n yo yizhyuo, di'zh nazon nzhan,

⁴⁹ porke lē' Dios Me kwa'n nzhak nile' rē kwa'n, mile' kwa'n dox kwa'ro kuda, no nazon lē' Me.

⁵⁰ No nilats laxto' Dios rē xa' nzhon ro' Dios, dizde xmè'd xa' haxta rē xa' gak ben che'n xa'.

⁵¹ Mile' Dios kwa'n nazon kun poder che'n Dios.

Mika'n Dios lo rē xigab che'n rē men nizi dox tsak,

⁵² no ngulutìn Dios rē xa' nile' mandad, par ngulo Dios rē men nado' xugar bixa'.

⁵³ No miza' Dios nayax kwa'n wen ka' rē men prob,

no lē' men rrik, mile' Dios mia'n bixa' se'tsa.

⁵⁴ Ngoknu Dios rē men che'n Dios, rē men Israel;

nangaya'lt laxto' Dios, lē' Dios nilats laxto' bixa',

⁵⁵ nela xmod mila' ka Dios di'zh lo rē xuz be, xa' tiemp;

lo Abraham, no lo rē xa' nzē' ben che'n xa'. ⁵⁶ No como chon mbēo' mia'n Mari lizh Sabel, orze' nguubre Mari, ña Mari lizh Mari.

Ngol Juan, xa' mililēi' Krist le'n nits

⁵⁷ No or ngol ngubizh gal xin Sabel, orze' ngol xin xa' tu mè'd xibiyi'. ⁵⁸ Or mbin rē xa' kwa'n nzho gax kun lē' una', no rē melizh una', lē' Dios milats laxto' una', orze' nu bixa' nizak laxto' kun lē' una'. ⁵⁹ No or nded xon ngubizh, ngwa bixa' lo mè'd, mikē' bixa' señ kwa'n lē' circuncisión ze' mè'd, no nzhakla bixa' ngarolē mè'd nela lē' xuz mè'd, Zacarías. ⁶⁰ Orze' nzhah xna' mè'd:

—Narulēt mè'd sa', lē' mè'd rulē Juan.

⁶¹ Orze' nzhah bixa':

—Per yent cho melizhal lē Juan.

⁶² Orze' minabdi'zh bixa' kun pura señ lo xuz mè'd, par gab xuz mè'd xmod rulē mè'd. ⁶³ Orze' mina'b xuz mè'd tlē' tab win, mizobni' xa': “Lē' mè'd lē Juan.” Orze' xe mia'n rē men tuli.

⁶⁴ Haxta orze', ngok midì'zh Zacarías, tuli ka nzhah xa': “¿Dox nazon Dios!” ⁶⁵ Orze' rē xa' nzhin xa' gax kun lē', mizheb bixa' tuli, no rē xa' nzho rē yezh kwa'n nzhin le'n rē yi' lazh men Judea, mbin bixa' rē kure'. ⁶⁶ No rē xa' ze', mile' bixa' xigab: “¿Kwan le' mè'd re' or ro'b mè'd?”, porke dox nazon kwa'n mile' Dios kun lē' mè'd.

Kant kwa'n mikē' Zacarías lo Dios

⁶⁷ Orze' mile' Sprit che'n Dios midì'zh Zacarías, nzhah xa':

⁶⁸ Dox nazon Dios che'n rē men Israel, yi'dgo' Me be, lo rē kwa'n nzē'b xki be.

⁶⁹ Lē' Dios xē'l tu xa' dox kinu poder xa' ko' be lo kwa'n nazhe'b.

Xa' re' yi'd ben che'n rey Dabi.

⁷⁰ Lē'i' gak nela xmod midì'zh Dios lo rē men che'n be, xa' ngok profet,

⁷¹ par lat Me be lo rē xa' nidil be, mbaino par ko' xa' be ya' rē xa' kwa'n niyi' nine be,

⁷² par ne be, lē' Dios se'gaka nilats laxto' rē xuz be, xa' tiemp,

mbaino par lu' Dios, lē' Me se'gaka nitsila kwa'n mila' Me di'zh lo bixa'.

⁷³ Se' mila' Dios di'zh lo xuz be Abraham, xa' tiemp.

⁷⁴ Lē' Dios lat be ya' rē men xa' niyi' nine be, par niyentra' kwan zheb be, le' be kwa'n nzhakla Dios,

⁷⁵ dub nabe laxto' be lo Dios, dub tiemp kwa'n naban be nali yizhyuo re'.

⁷⁶ No lu, xmè'da, lē'l rulē xa' midì'zh por Dios, Me kwa'n nzho lo yibē',

porke lo Señor yal,

par xa'lal nez che'n Señor,

⁷⁷ par le'l ne men che'n Dios, xmod nak nabantra' bixa' lo kwa'n gat lē',

par ro' bixa' lo rē kwa'n nzē'b xki bixa',

⁷⁸ porke por nazhi' Dios men no nize laxto' Me men.

Kuze', dizde al ya' lo yibē' yi'd Me, par yani laxto' men, nela or ñanilyuo xtu zhē ga',

79 par zini Me lo rē xa' naban lo yalzi che'n xki bixa', mbaino zini Me lo rē xa' nazubxax yalgut tich, par ku'nez Me be plo zi be chul.

⁸⁰No nzharo'b mē'd, no nzharo'b nu mē'd rē jwers, par nile' mē'd gan lo rē kwa'n gat lē'i, no pura rē plo yent men nguio xa', haxta zhē or ngurulo xa' lo rē men Israel.

2

*Ngol Jesús
(Mt. 1:18-25)*

¹No le'n rē ngubizh ze', Augusto César milē' mandad, zoblē rē nak men rē yezh plo nile' xa' mandad. ²Kure' ngok primer wēt milē' xa' zoblē men, or nak Cirenio gobiernador lazh men Siria. ³No kad men ngwazobni' lē plo ngol bixa'. ⁴Kuze' nguro' Che yezh Nazaret kwa'n ña'n lazh men Galilea, par nzha xa' yezh Belén, kwa'n ña'n lazh men Judea, plo ngol rey Dabi, porke ben che'n rey Dabi nzē Che. ⁵Junt ngwazobni' Che lē Che kun Mari, una' kwa'n nak di'zh gak tsa' xa', mbaino nakxin la Mari. ⁶No dub nzhin bixa' ze', ngol zhē kwa'n gal xin Mari. ⁷Or mizhin bixa' plo ya'n bixa', yentra' lugar ngaya'n bixa', kuze' ña bixa' plo nzhin ma, no ze' ngol xin Mari, mē'd galo, no michēl xa' lar mē'd, orze' ndix xa' mē'd plo nzhao ma.

Rē ganj che'n Dios mbaino rē xa' nikina mbēkxi'l

⁸No gax yezh Belén, or yē'l ze', nzhin pla men dan, xa' nikina mbēkxi'l. ⁹Lē'chi orze' ngurulo tu ganj che'n Dios lo bixa', no dub plo nzhin bixa' nkē tu biani kwa'n maska ña'zbēl che'n Señor, orze' dox mizheb bixa', ¹⁰per nzhab ganj lo bixa':

—Nazhebt go, no biwi' go, lē'da nzadni tu widi'zh wen lo go kwa'n le' dox zak laxto' rē nak men yizhyuo, ¹¹porke nalyē'l re', yezh che'n Dabi, ngol tu mē'd kwa'n nak Krist no Señor, Me kwa'n ko' men lo rē kwa'n nzē'b xki men lo Dios. ¹²Kure' nak nela tu señ ga', par ne go rē kwa'n kinin, lē'i walika; lē' go yazhēl mē'd, narēl mē'd lar, nax mē'd plo nzhao ma.

¹³Lē'chi orze', nguruxo'b tu bēd ganj lo yibē', kikē' kant lo Dios kwa'n nzhab se':

¹⁴¡Dox nazhon Dios, Me nzho lo yibē', no lo yizhyuo, mial laxto' Dios kun rē men, rē xa' kwa'n niwi' Dios wen lo!

¹⁵No or ña rē ganj lo yibē', orze' nzhab rē xa' niki'na mbēkxi'l ze' lo wech bixa':

—Chao' nzha be yezh Belén, par ne be rē kwa'n bi'dne ganj che'n Dios lo be re'.

¹⁶Orze' nzha bixa' nayen-nayen, no ngwazhēl bixa' Mari no Che, no mē'd ye'n nax plo nzhao ma. ¹⁷No or une bixa' mē'd ye'n, orze' miza' bixa' kwente lo Mari no lo Che,

por kwa'n ngwayab ganj lo bixa' por mē'd ye'n re'. ¹⁸No rē xa' kwa'n mbin kure', xe mia'n bixa' tuli, por rē kwa'n mid'i'zh rē xa' nikina mbēkxi'l re'. ¹⁹Mbaino Mari, rē kure' kiguchao' xa' laxto' xa', no kile' xa' xigab por lē'i. ²⁰Orze' rē xa' nikina mbēkxi'l ze', miēk bixa', mbaino kidi'zh bixa' nazhon Dios por rē kwa'n mbin bixa' no kwa'n une bixa', porke rēi ngok nela xmod nzhab ka ganj lo bixa'.

Or nguro'lē mē'd

²¹Or nzhap mē'd xon ngubizh, orze' ngwanu xuz mē'd, mē'd, par nkē señ plo naban mē'd; orze' ngulo'lē bixa' mē'd JESÚS, nela xmod nzhab ka ganj lo Mari, antis di wei'xin Mari. ²²No or miza ngubizh che'n Mari, or gak la yo Mari le'n yado', ya mimbe la kwerp che'n xa', nela xmod nzobni' lo ley kwa'n mila' Dios lo Muisés, orze' nzhanu bixa' mē'd yado' kwa'n nzob yezh Jerusalén, par lu' bixa' mē'd lo Dios. ²³Se' milē' bixa', porke se' nzobni' lo ley kwa'n mila' Dios lo Muisés: "Rē mē'd miyi' kwa'n galo laka gal, gak par Dios." ²⁴No miza' bixa' tu gon lo Dios, nela xmod nzobni' ka lo ley che'n Muisés; chop ngog o chop palom.

²⁵No le'n rē ngubizh ze', yezh Jerusalén nzho tu miyi' xa' lē Simeón. Nambe naban xa' lo Dios, nile' xa' rē nak kwa'n nzhab Dios, mbaino kimbēz xa' re', lē' Dios xē'l tu xa' lat rē men Israel, ya' rē xa' kwa'n nidil xa' kun lē'. No Lē' Sprit che'n Dios nzo kun lē' xa'. ²⁶Lē' Sprit che'n Dios milu' la lo xa', lē' xa' ne Krist, Me kwa'n xē'l Dios antis di gat xa'. ²⁷Kuze' mbiy' Sprit che'n Dios xa' le'n yado'. No or mbiy' xuz mē'd no xna' mē'd, mē'd le'n yado', par le' bixa' kun lē' mē'd rē kostumbr kwa'n nzobni' lo ley che'n Dios, ²⁸orze' nde'x Simeón mē'd, nzhab xa':

²⁹O Dios Señor da, yent kwane bila' gat da nal, porke lē'l milu'la kwan nel lon por Sprit che'nal,

³⁰porke lē'da unela xa' kwa'n ko' men lo rē kwa'n nzē'b xki men lo Dios,

³¹mē'd kwa'n mixē'lal lo rē nak men,

³²par le' mē'd, ne rē xa' gat lē't men Israel, xmod ko' Dios bixa' lo kwa'n nzē'b xki bixa' lo Dios.

No por mē'd re', rē men Israel ya wen.

³³No Che kun xna' Jesús, xe mia'n bixa' por rē kwa'n mid'i'zh Simeón por mē'd re'.

³⁴Orze' ngurez'zh Simeón yalnaza'k par Che no par Mari xna' Jesús, per nu nzhab Simeón lo Mari:

—Biwi', por mē'd re', nayax men Israel lox lo Dios, mbaino nu nayax bixa' por mē'd re', lē' bixa' ro' lo rē kwa'n nzē'b xki bixa' lo Dios; mbaino mē'd re' lu' lo rē men xmod nak xigab che'n Dios kun rē men, per nayax men le' naya', gaklat xa' gon xa' kwa'n di'zh

më'd re'. ³⁵ Kure' gak nela tu yalne, mbaino nela tu yalnawin dox par lu, Mari. Por më'd re', rube' xmod nak kad men, xa' wen no xa' nakap.

³⁶ No nu tu una' xa' lë Gan nzo ze'; tu una' kwa'n nidi'zh por Dios. Xa' re' nak xcha'p Fanuel, tu xa' nzë ben che'n Aser. No dox la ngwagal xa'. Di ngok jwandang che'n xa', gazhtsa li'n miban xa' kun xmiyi' xa', ³⁷ no or nzhap xa' tap gal nzho tap li'n, ngut xmiyi' xa'. Zhëy-yë'le nzho xa' yado'. Nzho or gat nzhaot xa' par nina'b xa' lo Dios. ³⁸ No mis orze', nguzubi xa' lë Gan re', orze' nguzublo miza' xa' xkix lo Dios, mbaino kidi'zh xa' por më'd re', no midi'zh xa', lë' Dios le', ro' rë men Jerusalén lo rë kwa'n nzë'b xki bixa' lo Dios, rë xa' kwa'n kimbëz gaku Dios bixa'.

Miëk bixa' yezh Nazaret

³⁹ No or milox mile' xuz Jesús, rë nak kwa'n nzobni' lo ley kwa'n mila' Dios lo Muisés, orze' miëk bixa' par lazh men Galilea, par ña bixa' yezh Nazaret, plo nak lazh bixa'. ⁴⁰ Orze' nzharo'b më'd, mbaino nzharo'b xigab che'n më'd; dox nzhak më'd che'n Dios mbaino nane më'd xmod nak tu men; no nilu', lë' Dios kiyaknu më'd.

Jesús nzho le'n yado'

⁴¹ No xuz Jesús kun xna' Jesús, rë li'n ña bixa' yezh Jerusalén, or nzhal lani Pask. ⁴² No or nzhap Jesús tu dusen li'n, ngwa rë bixa' lani yezh Jerusalén, nela xmod nile' ka bixa'. ⁴³ No or ngwalo lani ze', miëk xuz Jesús kun xna' Jesús, ña bixa' lizh bixa', no nanganet bixa', mia'n më'd yezh Jerusalén. ⁴⁴ Mile' bixa' xigab, ñë'd ka më'd xid rë xa' ñë'd bixa' kun lë', no dub tu ngubizh nguzë la bixa' nez, per or mikwa'n bixa' Jesús xid rë melizh bixa' no xid rë xa' nzhakbe' bixa', ⁴⁵ per nangazhëlt bixa' më'd. Orze' miëk bixa' yezh Jerusalén par nzhakwa'n bixa' më'd. ⁴⁶ Nzha chon ngubizh di niyent më'd, lë'chi ngwazhëlt bixa' më'd le'n yado'; nzob më'd xid rë xa' nilu' ley, kiyon më'd kwa'n kidi'zh bixa', no kinabdi'zh më'd rë kwa'n lo bixa'. ⁴⁷ No rë xa' kwa'n mbin kidi'zh më'd, xe mia'n bixa' tuli, por tanta natsin më'd, no dox natsin më'd lo rë kwa'n nikab më'd. ⁴⁸ No or une xuz më'd no xna' më'd plo nzo më'd; xe mia'n bixa' tuli; orze' nzhab xna' më'd:

—Xmë'da, ¿chon mile'l kure' kun no? jBiwi', xuzal no da kikwa'n no lu, no dox kile' no xigab che'nal!

⁴⁹ Orze' mikab më'd:

—¿Chon kikwa'n go da? Lë'da nile xigab, nane ka go lë'da naki'n le rë kwa'n nak che'n Xuza.

⁵⁰ Per nangazobyekt bixa' kwa'n midi'zh më'd. ⁵¹ Orze' ña më'd kun lë' bixa' lazh bixa', plo miban më'd, no mile' më'd rë

kwa'n nzhab bixa'. Per xna' më'd ngu-luchao' rë kure' laxto' xa'. ⁵² No nzharo'b më'd, no nzharo'b xigab che'n më'd, no kad ngubizh más nilu' nzo Dios kun lë' më'd, no rë men, wen niwi' bixa' lo më'd.

3

Widi'zh che'n Juan xa' mililë'i men (Mt. 3:1-12; Mr. 1:1-8; Jn. 1:19-28)

¹ Or nzha chi'n li'n nak Tiberio César rey lo rë men Roma, lë' Pons Pilat nak gobiernador lo rë men Judea; no Herodes nak gobiernador lo rë men Galilea; lë' wech xa' Lip nake lo rë men Iturea no lo rë men Traconite; mbaino lë' Lisaniás nak gobiernador lo rë men Abilinia. ² Le'n mis rë ngubizh ze', lë' Anás no Caifás nak ngulë'i ro. Orze' midi'zh Dios lo Juan, xga'n Zacariás or nzho xa' le'n yuo bizh. ³ Nguzublo Juan nded xa' rë yezh kwa'n ña'n plo nak you' Jordán, kiyab xa' lo rë men, naki'n la' bixa' rë kwa'n gat lë' nile' bixa', orze' gaklë'i bixa' le'n nits par lu', walika mila' bixa' kwa'n nak bixa', nes par che' Dios rë kwa'n nzë'b xki bixa'. ⁴ Kure' ngok nela xmod midi'zh ka Isaías, tu xa' midi'zh por Dios, or nzhab xa': Gon go tu men nzo le'n yuo bizh, kidi'zh xa' naye:

“Bizuxkwa' go laxto' go par yo Dios laxto' go, nale'tra' go kwa'n gat lë',

⁵ porke rë men nado', lë' Dios le' gak xa' men tsak,

per rë xa' nile' xigab dox tsak xa',

lë' Dios le', che'ptsa zi xa' lo men.

Rë men nikizë nez gat lë', naki'n ban xa' nali, no rë xa' di'zhyix, naki'n di'zh xa' kwa'n ñal, ⁶ mbaino rë men yizhyuo libe' xa' kwa'n xë'l Dios,

par ko' men lo rë kwa'n nazhe'b nzho bixa'.”

⁷ No or nzha men par gaklë'i men le'n nits lo Juan, per nzhab Juan lo bixa':

—jRë go, men nakap, xa' nak nela mbë'l naya' ga! ¿Cho ne lo go, nab por gaklë'i go, le' go gan lo kwa'n nazhe'b kwa'n xë'l Dios par rë men kwa'n nzë'b xki lo Me? ⁸ Nal bilu' go walika, mila' go rë kwa'n gat lë' nile' go. Mbaino nagabt go por nzë go ben che'n Abraham, xmë'd Dios go, porke Dios gak le' kun rë ke nzhin re', gake xa' nzë ben che'n Abraham, ⁹ porke rë go nak nela rë ya kwa'n nazu't ga'. Choze' biwi'u, lë' yi'b ya nzo la list par cho' haxta rë luch che'n rë nak ya kwa'n gat niza't xlë wen, orze' yubiy par yoi lo ki.

¹⁰ Orze' nzhab rë men lo Juan:

—Nal, ¿kwan naki'n le' no?

¹¹ Orze' nzhab Juan:

—Rë xa' kinu chop nez xab, naki'n za' xa' tube ka' xa' kwa'n gat kinute, mbaino xa' kinu kwa'n gao, naki'n ki'z xa'i, gao xtu xa' gat kinute.

¹² No ngwa pla xa' nikan dimi che'n gu-bier Roma lo Juan par gaklêi' bixa', mbaino nzhab bixa' lo Juan:

—Maest; no ga', çkwan naki'n le' no?

¹³ Orze' nzhab Juan:

—Guna'b go dimi kwa'n ñal na'b go namás, nana'bt goi di más.

¹⁴ No nu pla sondad gunabdi'zh, nzhab bixa':

—Mbaino no ga', çkwan naki'n le' no?

Orze' nzhab Juan:

—Nalat go dimi jwers lo men, no ni nakê' go kixu' men; mbaino bizak laxto' go kun kwa'n nzhax ka' go namás.

¹⁵ No nal, rê xa' kwa'n dox xigab nile', pok xê'l Dios Krist; mile' bixa' xigab paste lê' Juan nak Krist, ¹⁶ per nzhab Juan lo rê men:

—Walika, nililêi'ya men le'n nits namás, per xtu xa' yi'd más tsak lon. Per ni gat ñal da gak da tu mos che'n xa', porke yent kwan tsak da par lê' xa'. Xa' re' li'lêi' go kun Sprit che'n Dios, no kun bêl. ¹⁷ No lê' Me nzen la kwa'n par tsumbe Me triu, par ki'b Me yix le'ne. No kan Me triu par kuchao' Mei le'n yo', no lê' yix kwa'n yi'b le'ne, kubi Me le'n bêl kwa'n nayot yal.

¹⁸ Se' midî'zh Juan lo rê men, no kun más rê widî'zh par nzhab xa' xmod ko' Dios men lo rê kwa'n nazhe'b nzho men. ¹⁹ No nu ndil Juan Herodes, xa' nile' mandad lazh men Galilea, por kinu xa' Herodías, una' che'n wech xa' Lip, no por más rê kwa'n gat lê' kwa'n nak Herodes. ²⁰ No xid rê kwa'n gat lê' kwa'n mile' Herodes, mile' xa' xtu kure'; ngulo xa' Juan lizhyi'b.

Ngoklêi' Jesús le'n nits

(Mt. 3:13-17; Mr. 1:9-11)

²¹ No or kililêi' Juan men le'n nits, nu Jesús ngoklêi' lo Juan; no dub kina'b Jesús lo Dios, mixa'l lo yibê', ²² orze' milu' ngula Sprit che'n Dios yek Jesús nela tu palom ga', no mien tu widî'zh lo yibê' kwa'n nzhab se':

—Lu nak Xga'na, kwa'n nazhi' da; mbaino dox nizak laxto'n, niwi'n lol.

Ben che'n rê men re'nzê Jesús

(Mt. 1:1-17)

²³ Nzhap Jesús gal bichi' li'n or nguzublo nkê Jesús zhi'n nazhon che'n Dios. Nzhab men, lê' Che ngok xuz Jesús, lê' Elí ngok xuz Che.

²⁴ Lê' Matat ngok xuz Elí,

lê' Leví ngok xuz Matat,

lê' Melqui ngok xuz Leví,

lê' Jana ngok xuz Melqui,

lê' Che ngok xuz Jana,

²⁵ lê' Matatías ngok xuz Che,

lê' Amós ngok xuz Matatías,

lê' Nahum ngok xuz Amós,

lê' Esli ngok xuz Nahum,

lê' Nagai ngok xuz Esli,

²⁶ lê' Maat ngok xuz Nagai,

lê' Matatías ngok xuz Maat,

lê' Semei ngok xuz Matatías,

lê' Che ngok xuz Semei,

lê' Judá ngok xuz Che,

²⁷ lê' Joana ngok xuz Judá,

lê' Resa ngok xuz Joana,

lê' Zorobabel ngok xuz Resa,

lê' Salatiel ngok xuz Zorobabel,

lê' Neri ngok xuz Salatiel,

²⁸ lê' Melqui ngok xuz Neri,

lê' Adi ngok xuz Melqui,

lê' Cosam ngok xuz Adi,

lê' Elmodam ngok xuz Cosam,

lê' Er ngok xuz Elmodam,

²⁹ lê' Josué ngok xuz Er,

lê' Elieser ngok xuz Josué,

lê' Jorim ngok xuz Elieser,

lê' Matat ngok xuz Jorim,

³⁰ lê' Leví ngok xuz Matat,

lê' Simeón ngok xuz Leví,

lê' Judá ngok xuz Simeón,

lê' Che ngok xuz Judá,

lê' Jonán ngok xuz Che,

lê' Eliaquim ngok xuz Jonán,

³¹ lê' Melea ngok xuz Eliaquim,

lê' Mainán ngok xuz Melea,

lê' Matata ngok xuz Mainán,

lê' Natán ngok xuz Matata.

³² Lê' Dabi ngok xuz Natán,

lê' Isai ngok xuz Dabi,

lê' Obed ngok xuz Isai,

lê' Booz ngok xuz Obed,

lê' Salmón ngok xuz Booz,

lê' Naasón ngok xuz Salmón,

³³ lê' Aminadab ngok xuz Naasón,

lê' Aram ngok xuz Aminadab,

lê' Esrom ngok xuz Aram,

lê' Fares ngok xuz Esrom,

lê' Judá ngok xuz Fares,

³⁴ lê' Jakob ngok xuz Judá,

lê' Isaac ngok xuz Jakob,

lê' Abraham ngok xuz Isaac,

lê' Taré ngok xuz Abraham,

lê' Nacor ngok xuz Taré,

³⁵ lê' Serug ngok xuz Nacor,

lê' Ragao ngok xuz Serug,

lê' Peleg ngok xuz Ragao,

lê' Heber ngok xuz Peleg,

lê' Sala ngok xuz Heber,

³⁶ lê' Cainán ngok xuz Sala,

lê' Arfaxad ngok xuz Cainán,

lê' Sem ngok xuz Arfaxad,

lê' Noé ngok xuz Sem,

lê' Lamec ngok xuz Noé,

³⁷ lê' Matusalén ngok xuz Lamec,

lê' Enoc ngok xuz Matusalén,

lê' Jared ngok xuz Enoc,

lê' Mahalaleel ngok xuz Jared,

lê' Cainán ngok xuz Mahalaleel,

³⁸ lê' Enós ngok xuz Cainán,

lê' Set ngok xuz Enós,

lê' Adán ngok xuz Set,

lè' Dios ngok xuz Adán.

4

Ngokla Mizhab ngakide Jesús
(Mt. 4:1-11; Mr. 1:12-13)

¹ No dox nzho Sprit che'n Dios laxto' Jesús, nguiubre Jesús plo nak you' Jordán, no mbiy' Sprit che'n Dios Jesús le'n yuo bizh plo yent cho nak. ² Ze' nguio Jesús dub cho' ngubizh, mbaino yent kwan ngao Jesús. Per or nded rè ngubizh re', mila'n Jesús, no ngokla Mizhab ngazenbe' Jesús (ngawi' Mizhab xmod nak Jesús), ³ kuze' nzhab Mizhab:

—Chi walika nakal Xga'n Dios, guzh lo ke re' gake yèt.

⁴ Per nzhab Jesús:

—Se' nzobni' lo Yech che'n Dios: “Gat lè't nab kun yèt gak ban men, sino kun nab tsa rè widi'zh kwa'n niro' ro' Dios.”

⁵ Orze' ngwanu Mizhab Jesús yek tu yi' ro, no tu rratsa milu' Mizhab rè lazh men plo nzhin men yizhyuo, ⁶ orze' nzhab Mizhab lo Jesús:

—Na ne rè nak kure' ka'l, par le'l mandade, mbaino rè kwa'n tsak che'ne, porke na nile' mandade, no na zai ka' cho nzhaklan. ⁷ Chi lè'l ne nazon da, mbaino zuxibal lon, che'nal rëi.

⁸ Orze' nzhab Jesús:

—iChi lon Mizhab!, porke se' nzobni' lo Yech che'n Dios: “Nabtsa lo Dios Me nile' mandadal, zuxibal lo, mbaino gabal nazon.”

⁹ Orze' mbiy' Mizhab Jesús haxta yek laka yado' Jerusalén, no nzhab Mizhab:

—Chi lè'l walika nak Xga'n Dios, dizde re' wats haxta lo yuo, ¹⁰ porke se' nzobni' lo Yech che'n Dios:

Dios xè'l rè ganj che'n Dios par gankul mbaino kinal;

¹¹ mbaino zen rè ganj ya'l par nakè ke ni'l, nes par nayachinal.

¹² Orze' nzhab Jesús:

—Nuska nzob lo Yech che'n Dios: “Nagakta' le'l mandad lo Dios, jwers le' Dios tu kwa'n or nzhaklal.”

¹³ No or une Mizhab, nangakt ngakide xa' Jesús, orze' nguiubchi Mizhab che'p lo Jesús, haxta or le' xa'i xtu wèlt, orze' zubi xa'.

Nguzublo nikè Jesús zhi'n nazon che'n Dios

(Mt. 4:12-17; Mr. 1:14-15)

¹⁴ Orze' mièk Jesús lazh men Galilea, dox kile' Sprit che'n Dios kwa'n nazon kun Jesús, no rè yezh kwa'n nzhin naka'n ze', nzhon men kwa'n nile' Jesús. ¹⁵ No ñalu' Jesús widi'zh che'n Dios lo rè men plo nzob rè yo' plo nitse'd men widi'zh che'n Dios, kwa'n nzob kad yezh ze', mbaino dox wen ñët Jesús xid rè men.

Jesús nzo yezh Nazaret

(Mt. 13:53-58; Mr. 6:1-6)

¹⁶ Orze' ngwa Jesús yezh Nazaret plo mixen Me. No zhè kwa'n nayi' kè men Israel zhi'n, nguio Jesús le'n yo' plo nitse'd men widi'zh che'n Dios, nela xmod nile' ka' Dios, nguzuli Me par go'l Me widi'zh che'n Dios.

¹⁷ Orze' miza' men yech go'l Me, yech kwa'n mikè' profet Isaías, tu xa' kwa'n midizh por Dios; no or mixa'l Me loi, mbi'l Me plo nzobni' widi'zh re':

¹⁸ Lè' Sprit che'n Dios kiyaknu da, porke ngule Dios da par dizha widi'zh wen lo rè men prob;

no mixè'l Dios da par rè xa' nayao' yo', par kon bixa' lizhyi'b;

no rè xa' kwa'n nikal lo, lè' da le wi' bixa', mbaino kotina rè xa' nzho ya' Mizhab;

¹⁹ mbaino par dizha lo rè nak men:

“iMizhin la zhè ko' Dios men lo rè kwa'n nazhe'b kwa'n nzadkè tich men!”

²⁰ Orze' mitsao' Jesús lo yech, no miza' ska Mei ka' xa' niguchao'we, orze' nguzob Me. No rè xa' nzhin ze', xe niwi' bixa' lo Me, ²¹ orze' nzhab Jesús lo rè men nzhin ze':

—Mìs nal re' mizhin ngok rè widi'zh kwa'n nzobni', kwa'n milox mbin go re'.

²² Orze' rè men midizh wen por Jesús, no xe mia'n bixa' tuli por rè kwa'n wen midizh Jesús, orze' nzhab bixa' lo wech bixa':

—Gat xa' re' nak xga'n Che.

²³ Orze' nzhab Jesús:

—Sigur ka, lè' go ne widi'zh re' lon: “Doctor, biliwen mis lu”; no nu ne go: “Kwa'n mile'l Capernaúm yezh ye'n ba', se'ska bile'i lazhal re'.”

²⁴ Per nzhab Jesús:

—Walika da kwa'n nin re', rè xa' kwa'n nidi'zh por Dios, mis rè xa' lazh xa' nayilat kwa'n di'zh xa'. ²⁵ Mbaino walika, nayax una' kwa'n ngut xmiyi', nguio lazh men Israel zhè che'n Li, or nangalat yiu chon li'n garol, no dub rè ze' nguio yalwin, ²⁶ per nangaxè't Dios Li lo ni tu rè una' men Israel ze', sino ke nab tsa lo tu una' gat lè't men Israel mixè'l Dios Li, tu una' ngut xmiyi' xa' nzè yezh Sarepta, plo nile' lazh men Sidón mandad. ²⁷ No zhè che'n profet Eliseo, tu xa' midizh por Dios, nguio dox men Israel xa' nzhakne di yalyizh kwa'n lè lepra, no per ni tu rè xa' re' ngaliwent Eliseo; sino ke nab tsa Naamán miliwen Eliseo, tu men gat lè't men Israel, tu xa' nzè lazh men Siria.

²⁸ Or mbin rè men kure', rè xa' kwa'n nzhin plo nitse'd men widi'zh che'n Dios, dox miyi'xian bixa', ²⁹ orze' rè bixa' ngwatso par ngulo' bixa' Jesús haxta ro' yezh yek lom plo nzhin yezh re', par ze', ngache'p bixa' Jesús le'n barrank. ³⁰ Per nded Jesús xid bixa', ña Jesús.

Tu miyi' kwa'n nzho mbi mal laxto'
(Mr. 1:21-28)

³¹ Orze' ña Jesús yezh Capernaúm, plo nile' lazh men Galilea mandad. Ze' kilu' Jesús widi'zh che'n Dios lo rë men, rë zhë kwa'n nayi' kë men Israed zhi'n. ³² No xe ña'n rë men tuli, por xmod nilu' Jesús widi'zh che'n Dios, porke nilu' Me, lë' Me kinu poder che'n Dios par le' Me mandad. ³³ No le'n yo' ze' plo nitse'd men widi'zh che'n Dios, nzo tu miyi' kwa'n nzho mbi mal laxto'; naye nguruzhië xa', nzhab xa':

³⁴ —jBila' no! ¿Chon nzël lo no Jesús, xa' nzë yezh Nazaret? ¿Chi nzël par lo'xal no? ¡Lë'da nilibe'kal, lu nak Me Nazhon che'n Dios!

³⁵ Orze'se ngalatra' Jesús ngadi'zh mbi mal ze', nzhab Jesús:

—jNadi'zhtra'l; biliya' miyi' re'!

Orze' milichin mbi mal ze' miyi' re' lo rë nak men, mbaino nguro'i; yent kwan ngali'noi miyi' re'. ³⁶ Orze' rë nak xa' nzhin ze', xe mia'n bixa' tuli pur kure', no kidi'zh bixa', tu xa' kun xtu xa':

—¿Xmod nak rë widi'zh re'? ¡Porke kinu xa' poder par nile' xa' mandad lo rë mbi mal, mbaino niliya'i men!

³⁷ No rë yezh kwa'n nzhin naka'n ze', ñët kwa'n nile' Jesús.

Miliwen Jesús xna'zha'p Simón
(Mt. 8:14-15; Mr. 1:29-31)

³⁸ No or nguro' Jesús le'n yo' plo nitse'd men widi'zh che'n Dios, no ña Jesús lizh Simón, lë' xna'zha'p Simón nzhakne, dox nzho xlë' xa'; no mina'b bixa' lo Jesús par liwen Me xa' re', ³⁹ orze' nguzobda' Jesús plo nax me una' re', mbaino mile' Jesús mandad nguro' xlë', mbaino lweg'a ngwaxche xa' una' re' par miza' xa' kwa'n gao rë xa' re'.

Miliwen Jesús nayax men nzhakne
(Mt. 8:16-17; Mr. 1:32-34)

⁴⁰ Lë' ngubizh ngwa'z, lë' rë men nzhanu rë xa' nzhakne, nizak rë lo yalyizh, orze' migal Jesús tu ga' bixa', no rë bixa' miak. ⁴¹ No nu nayax men nzhakne nguro' mbi mal laxto', naye nguruzhië rë mbi ze' lo Jesús:

—jLu Xga'n Dios!

Per Jesús mid'i'zh nayi' lo rë mbi ze' par nakuzhiëtra'i, porke lë' rë mbi ze' nzhakbe', lë' Jesús nak Krist.

Kidi'zh Jesús widi'zh che'n Dios lazh men Galilea

(Mr. 1:35-39)

⁴² Or ngwanilyuo, nguro' Jesús yezh ze' par nza Me plo yent cho nak, per rë men kikuwa'n Me, no or ngwazhël bixa' Me, gat nzhaklatra' bixa' bi Me xtu plo, ⁴³ per nzhab Jesús:

—Per más rë yezh plo nzhin men, naki'n yalun widi'zh che'n Dios, kwa'n le' zak laxto'

men par gon bixa' xmod yo bixa' plo nile' Dios mandad, porke par kure' mixë'l Dios da yizhyuo re'.

⁴⁴ No se' nikizë Jesús, ñalu' Jesús widi'zh che'n Dios le'n rë yo' kwa'n nzob lazh men Judea, plo nitse'd men widi'zh che'n Dios.

5

Nazhon ngwaga' nayax mbël
(Mt. 4:18-22; Mr. 1:16-20)

¹ No ngol tu ngubizh, nzo Jesús ro' lagün kwa'n lë Genesaret. No nayax men mizhin ze' haxta kiche'p bixa' Jesús por tanta men nzhakla gon widi'zh che'n Dios. ² No ze' une Jesús nzob chop bark ro' nits, yent cho nak le'ne. Lë' rë xa' nak che'ne kizët yex, kwa'n nizen bixa' mbël. ³ Orze' nkë Jesús le'n tu rë bark re' kwa'n nak che'n Simón, no mina'b Jesús lo Simón, chi Simón xche'pe par le'n nits, orze' nguzob Jesús le'ne, ze' nguzublo kilu' Jesús widi'zh che'n Dios lo rë men. ⁴ No or milox mid'i'zh Jesús lo rë men nzhin ze', orze' nzhab Me lo Simón:

—Bi'y bark más al xan, plo más na'ch nits; ba' kubi go yex che'n go, zen go mbël.

⁵ Orze' nzhab Simón:

—Maestr, dub yë'l kile' no por zen no mbël, no per ni tu ma gat zen no, per lë' go nei, lë'da kubi yex da re'.

⁶ No or ngulubi bixa'i le'n nits, dox mbël nguzen bixa', haxta nila'rëz yex che'n bixa', por tanta lë' ma ngwaga'. ⁷ Orze' milu' bixa' señ lo más rë xpen bixa', rë xa' nzho le'n xtu bark, par gaknu bixa'. Orze' ngoknu bixa', no michizhë bixa' rop bark haxta mer ngaya'zyo'i le'n nits, por tanta zhë. ⁸ No or une Simón Per kure', orze' nguzuxib xa' lo Jesús, nzhab xa':

—Yubchi lon, Señor, porke lë'da tu men dox nzë'b xki lo Dios.

⁹ Porke Simón Per, no rë xa' kwa'n nzhin kun lë' xa', dox mizheb bixa' por tanta mbël ngwaga'. ¹⁰ Mbaino rop xga'n Zebedeo, Jakob no Juan, rë xa' nikë zhi'n kun Simón, nu bixa' mizheb; per nzhab Jesús lo Simón:

—Nazhebtra'l. Dizde nal re', lë'l kan tu béd men, nela mbël kwa'n nguzenal ba'.

¹¹ Orze' ngulo' bixa' bark che'n bixa' le'n nits, mila' bixa' rëi, par nzhakë bixa' tich Jesús.

Jesús miliwen tu men nizak yalyizh kwa'n lë lepra

(Mt. 8:1-4; Mr. 1:40-45)

¹² No tu wëlt nzo Jesús tu yezh kwa'n nzhin ze', lë'chi ze' mizhin tu miyi' kwa'n nizak tu yalyizh lë lepra, dub nak xa' nizake. Or une xa' Jesús, ngo't kuslo xa' lo yuo tuli lo Jesús, orze' guna'b xa' lo Jesús, nzhab xa':

—Señor, chi lë'o nzhaklai, gak tsumbe go da lo yalyizh re'.

¹³ Orze' mitsiga' Jesús ya', migal Me xa' nzhakne re', orze' nzhab Me:

—Nzhaklan mbel lo yalyizh re'.

Mbaino mis orze', miak xa' nzhakne re',
¹⁴ orze' nzhab Jesús:

—Yent cho lo di'zhle, maska wa lo ngulëi', par rël xa' lu, no za'l gon kwa'n na'b xa' par ya'n nambe kwerp che'nal, nela xmod nzobni' lo ley kwa'n mila' Dios lo Muisés, nes par ne ngulëi', lë'l mimbe la.

¹⁵ Per zilita' nêt kwa'n nile' Jesús, no dox men nibin par gon widi'zh che'n Jesús, no par liwen Jesús rë xa' nzhakne. ¹⁶ Per ña Jesús rë plo yent cho nak, par nidi'zh Me lo Dios.

Miliwen Jesús tu men nagakt win
(Mt. 9:1-8; Mr. 2:1-12)

¹⁷ No ngol tu ngubizh, dub kilu' Jesús widi'zh che'n Dios lo rë men; ze' nzob rë men fariseo kun rë xa' nilu' ley. Rë xa' re' nzë rë yezh che'n rë men Galilea, no rë yezh che'n rë men Judea, mbaino nzhob bixa' nzë yezh Jerusalén. No dox kinu Jesús yalnazon che'n Dios, par liwen Me men nzhakne. ¹⁸ Lë'chi nzhanu pla miyi' tu men nzhakne lo ya, tu xa' nagakt win. No nzhakla bixa' ko bixa' xa' re' le'n yo' plo nzo Jesús, ¹⁹ per nagakt yo bixa' por tanta men nzhin al le'n. Kuze' nkë bixa' yek yo', mixa'l bixa' tu plo par mila bixa' xa' nzhakne re' nali laka plo nzo Jesús. ²⁰ Or une Jesús, dox ñila rë xa' re' Jesús, orze' nzhab Me lo xa' nzhakne re':

—Lë' you, rë kwa'n nzë'b xkil lo Dios, lë'i mizhe' la.

²¹ Orze' rë men, rë xa' nilu' ley kun rë men fariseo nguzublo kile' bixa' xigab: “¿Cho xa' re'? Tatu nakap kidi'zh xa' Dios, porke yent cho gak che' rë kwa'n nzë'b xki men lo Dios. ¡Nabtsa Dios gak le'!”

²² Per lë' Jesús nane la kwan kile' bixa' xigab, kuze' nzhab Me:

—¿Chon tatu xigab dox kile' go por kwa'n nzhapa ba'? ²³ ¿Kwan más jwals gapa: “Lë' rë kwa'n nzë'b xkil lo Dios mizhe' la”, o gapa: “Waxche, bizë lizhal”? ²⁴ Pwes par ne go, Lë'da nak Xga'n Dios no nak da tu men yizhyuo; Lë' Da kinu yalnazon par che'n rë kwa'n nzë'b xki men lo Dios.

Orze' nzhab Me lo xa' nzhakne re':

—Lë'da kini lol, waxche, gulits kwa'n naxal lo ba', orze' bizë lizhal.

²⁵ Lwegga' ngwaxche xa' nzhakne re' lo rë men, ngulits xa' kwa'n nax xa' lo, orze' ña xa', mbaino kidi'zh xa' nazon Dios. ²⁶ No rë men, xe mia'n bixa' tuli, no nzhab bixa':

—¡Dox nazon Dios!

No nu por tanta mizheb bixa', nzhab bixa':

—Nal une be, mile' Dios rë kwa'n gat ne be.

Jesús ngurezh Leví

(Mt. 9:9-13; Mr. 2:13-17)

²⁷ Or milox ngok rë kure', nguro' Jesús, no une Me tu men nikan dimi che'n rey César, tu miyi' lë Leví, nzob xa' plo ñatix men dimi che'n rey, orze' nzhab Jesús lo xa' re':

—Dikë ticha.

²⁸ Orze' ngwatso Leví, mila' xa' rë kwa'n kinu xa' ze', nzhakë xa' tich Jesús. ²⁹ Orze' mile' Leví tu lani lizh xa' par Jesús, no nu nayax xa' nikan dimi che'n rey César, tutsa plo nzob bixa' kun Jesús lo mes, mbaino kun más rë xa' kwa'n nichë'l Leví. ³⁰ Per pla rë men fariseo, kun rë xa' kwa'n nilu' ley; nguzublo kidi'zh bixa' nakap lo rë men che'n Jesús, nzhab bixa':

—¿Chon kiyao go kiyo go, kun rë xa' nikan dimi che'n rey César, mbaino kun rë xa' gat nzhakt ley kwa'n mila' Dios lo Muisés, rë xa' ba' más nzë'b xki lo Dios?

³¹ Orze' nzhab Jesús:

—Rë men wen gat naki'n ya xa' lo doctor, nab tsa men nzhakne naki'n ya. ³² Na, gat nzhalta par kwezha rë xa' nile' kwa'n nzhakla Dios; na nzhalt par kwezha rë xa' nzë'b xki lo Dios, par la' bixa' rë kwa'n gat lë' nak bixa'.

Minabdi'zh pla xa' lo Jesús, ¿chon gat nizo men che'n Jesús xlats bixa' lo Dios?

(Mt. 9:14-17; Mr. 2:18-22)

³³ Minabdi'zh pla bixa' lo Jesús, nzhab bixa':

—¿Chon nayax wëlt gat nzhao rë xpen Juan, or nina'b bixa' lo Dios, no se'ga' rë men che'n rë men fariseo, per rë xpenal, zilita' nzhao bixa' no nzhob bixa'?

³⁴ Orze' nzhab Jesús:

—¿Chi zak gab go jwers, nagaot rë men, rë xa' kwa'n nzë' jwandang, dub nzhak jwandang che'n miyi' kwa'n nzo xti'zh re'? ³⁵ Per or zhin zhë, yubchi miyi' re' xid rë xpen miyi', orze'se nagaot bixa'.

³⁶ Nuska midi'zh Jesús tu kwent re', nzhab Me:

—Yent cho tu men cho' tlë' xab kub xa', par kë' xa' remiend tu xab go'x xa'; porke nzhë'lt kwa'n kub kun kwa'n go'x.

³⁷ Mbaino yent cho tu men ko bin kwa'n laore nguro' le'n tu yeg go'x; porke lë' bin kwa'n laore ngokxao' chëz yeg go'x ze', orze' lë'i xo. ³⁸ Kuze' ñal ko men bin kwa'n laore nguro' le'n yeg kub, par yent chi gake. ³⁹ No yent cho xa' mië' la nzhob bin kwa'n nayan, gakla xa' go xa' kwa'n nax, porke lë' xa' gab: “Más nix kwa'n nayan.”

6

Mikan men che'n Jesús triu zhë kwa'n nayi' kë men Israel zhi'n

(Mt. 12:1-8; Mr. 2:23-28)

¹ No tu ngubizh kwa'n nile' men Israel diskans, nzhaded Jesús kun rē men che'n Me plo nzha'n men triu. No por nila'n bixa', nguzublo kikib bixa' do che'ne, no kigo' bixa' lazhe par kiyao bixa'i, ² orze' nzhah pla men fariseo lo bixa':

—¿Chon nile' go kwa'n gat ñal, zhē kwa'n nayi' kē men Israel zhi'n?

³ Orze' nzhah Jesús:

—¿Chi nagat go'l go plo nikē kwa'n mile' Dabi tu zhē or mila'n xa' kun rē xpen xa'?, ⁴ or nguio xa' le'n yo' che'n Dios par ndao xa' pan kwa'n miza' men par gon lo Dios, no ngwatao xa'i no miza' xa'i gao rē xpen xa', no lē' pan ze' nab tsa rē ngulēi' gak gawe.

⁵ No nu nzhah Jesús lo bixa':

—Na Xga'n Dios mbaino nak da tu men yizhyuo, kinun poder par len mandad, kwan ñal le' men zhē kwa'n nayi' kē men Israel zhi'n.

Tu miyi' kwa'n ngut tu lad ya', lad direch
(Mt. 12:9-14; Mr. 3:1-6)

⁶ Or ngol xtu zhē kwa'n nayi' kē men Israel zhi'n, nguio Jesús le'n yo' plo nitse'd men widi'zh che'n Dios, no nguzublo kilu' Jesús widi'zh che'n Dios lo rē men nzhin ze'. Ze' nzo tu miyi' kwa'n ngut tu lad ya' lad direch. ⁷ No ze', nzo pla xa' nilu' ley kun rē men fariseo, kila'ch bixa', nabei chi liwen Jesús xa' re', zhē kwa'n nayi' kē men Israel zhi'n, nes par kinu bixa' tu kwa'n gab bixa', nak Jesús. ⁸ Per lē' Jesús nane la cho xigab kile' rē men re', kuze' nzhah Jesús lo miyi' nzhakne re':

—Watsuli, guded garol tsao' re'.

Orze' ngwatsuli miyi' re', nguzubi xa' lo Jesús. ⁹ Orze' nzhah Jesús lo rē men kila'ch ze':

—Nzhaklan nabdi'zha tu kwa'n lo go: ¿Kwan más ñal le' met zhē kwa'n nayi' kē men Israel zhi'n? ¿Chi tu kwa'n wene o tu kwa'n male? ¿Chi ko' be tu men lo tu kwa'n nazhe'b nizak xa', o la' be gat xa'?

¹⁰ Orze' miwi' Jesús lo rē xa' nzo naka'n plo nzo Me, mbaino nzhah Me lo miyi' ngut ya' re':

—Bitsiga' ya'l.

Orze', mitsiga' miyi' ya' miyi', mbaino mi-ake. ¹¹ Per rē xa' nilu' ley kun rē men fariseo nded niyi'xian bixa', orze' nzhah bixa' lo wech bixa': "Nal, ¿kwan li'nu be Jesús?"

Ngule Jesús tu dusen apost che'n Me
(Mt. 10:1-4; Mr. 3:13-19)

¹² Le'n rē ngubizh ze', ngwa Jesús yek tu yi' par guna'b Me lo Dios, orze' dub yē'l guna'b Me lo Dios. ¹³ Or ngwanilyuo, ngurezh Me rē xa' kizikē tich Me, no xid rē xa' re' ngule Me tu dusen rē xa' ngulo'lē Me apost. ¹⁴ Tu rē xa' re' lē Simón, xa' kwa'n nu ngurulē Me Per; no xtu xa' lē Ndrēs, wech Simón; no Jakob mbaino Juan; no Lip, no

Tol; ¹⁵ orze' Mateo no Max; mbaino Jakob xga'n Alfeo; no Simón xa' nguio xlad men Kananist; ¹⁶ no Judas, xga'n Jakob; mbaino xtu Judas Iscariote, kwa'n michi Jesús lo rē men kwa'n mbit Me.

Milu' Jesús widi'zh che'n Dios lo nayax men

(Mt. 4:23-25)

¹⁷ Or ngula Jesús yek yi' ze' kun rē men che'n Me, orze' ngulēz Me lo tu lach, no ze' miza tu bēd xa' kizikē tich Me, mbaino nu nayax xa' nze' rē yezh che'n lazhe men Judea no rē xa' nze' yezh Jerusalén, kun nayax xa' nzho ro' nitsdo' che'n yezh Tiro mbaino kun rē men yezh Sidón. Rē men re' nzhin par gon bixa' widi'zh che'n Jesús no par liwen Jesús yalyizh che'n bixa'; ¹⁸ no miak rē xa' kwa'n nzhakne por mbi mal. ¹⁹ Kuze' rē nak men ze' nzhakla namás gal xa' kwerp che'n Jesús, porke kwerp che'n Jesús niro' rē yalnazon kwa'n niliwen rē men nzhakne.

Kwa'n walika tsak lo Dios

(Mt. 5:1-12)

²⁰ Orze' miwi' Jesús lo rē men che'n Me, nzhah Me:

—Rē go, xa' prob nal re', wen nzha go; porke lē' go ya nzho la ya' Dios.

²¹ 'No go, xa' nila'n nal re', wen nzha go, porke lē' Dios ne' kwa'n na'b go lo Me.

'No go, xa' nzho'n nal re', wen nzha go, porke kaxche'pta lē' go zak laxto'.

²² 'No wen nzha go, go xa' niyi' men nine nal re', no or nigotin xa' go xid bixa', no or niye xa' go, no nidi'zh xa' go, rē kwa'n gat walit nak go, por nak go men da. ²³ Bizak laxto' go zhē ze', haxta wats go, porke lē' Dios ne' tu kwa'n tsak ka' go por rē kwa'n nilinu men go; porke sa' ska nguzak rē profet, rē xa' kwa'n midi'zh por Dios chi tiemp.

²⁴ 'Per zhe'b nalats nzha go, rē go xa' rrik nal re'; porke lē' go kinu la rē kwa'n gap go par dubta'.

²⁵ 'No zhe'b nalats nzha go, rē go xa' ndao la haxta plo une, porke lē' zhē zhin, lox go di yalnila'n.

'Mbaino zhe'b nalats nzha rē go, xa' nizak laxto' nal re', per lē' zhē zhin, lē' go go'n di yalnawin haxta plo nagakra'i.

²⁶ 'Zhe'b nalats nzha go, por nidi'zh men dox tsak go nal re'; porke sa' ska midi'zh men lo rē xa' kwa'n chigab walika profet che'n Dios, per ka mbēle.

Chizhi' be rē xa' niyi' nine be

(Mt. 5:38-48; 7:12)

²⁷ 'Per rē go xa' nzhon kwa'n nin, bichizhi' go rē xa' nidil go, no bile' go wen lo rē xa' niyi' nine go; ²⁸ no guna'b go lo Dios, ya bixa' wen, rē xa' kwa'n nizhi'bde go, mbaino nu bina'b go lo Dios por rē xa' kwa'n nile' nakap lo go. ²⁹ No cho tu xa' kē' tube ta' ro' go,

bila' go ter nu xtu lad kë' xa'i, no chi cho lat chiket che'n go, bila' go wei' xa' ter nu kamis che'n go. ³⁰ Xa' na'b tu kwa'n lo go, biza' goi, mbaino xa' zen tu kwa'n nak che'n go, nagabt go lo xa' zhire ska xa'i. ³¹ Bile' go kun rë men nela xmod nzhakla go le' men kun go.

³² No chi nazhi' go nab tsa rë men kwa'n nazhi' go, çxmod le' go tu kwa'n wen chi nak go sa'?, porke haxta rë men más nzé'b xki, nak sa'. ³³ No chi nile' go wen lo nab tsa rë xa' nile' wen kun go, çxmod le' go tu kwa'n wen chi nak go sa'?, porke haxta rë men más nzé'b xki, nak sa'. ³⁴ Mbaino chi lë' go le' prext kwa'n ka' nab tsa rë men xa' zak go nilu' ka kixe, orze', çxmod le' go tu kwa'n wen chi le' go sa'?, porke nu ska haxta rë men más nzé'b xki, nile' bixa' prext kwa'n ka' guchin bixa', orze' kimbëz bixa' zhire ska xa' ze'i. ³⁵ Per rë go, ñal chizhi' go rë xa' nikwa'n dil kun go, no bile' go wen; no bile' go prext kwa'n ka' men sin nakwëz go kix xa'i, nes par ne' Dios tu kwa'n dox tsak ka' go, no par lu' go nak go xmë'd Dios, Me kwa'n nzho lo yibë', porke Dios nazhi' haxta rë xa' gat niza't xkix lo Dios, no rë xa' minu la yentra' kwan tsak, nazhi' Dios. ³⁶ Kuze', naki'n lats laxto' go xtu men nela Xuz go Dios nizine laxto' Me go.

Nadi'zhtal kwan ñal xtu men
(Mt. 7:1-5)

³⁷ Nagabt go kwan ñal tu xa' nzhap dol, nes par nale' Dios kix go kwa'n nak go; mbaino nana'bt go zakzi Dios tu men por kwa'n nak xa', nes par Dios nazakzit ska go por xmod nak go. Más wen biya'l laxto' go kwa'n nile' men lo go, nes par Dios che' rë kwa'n nzé'b xki go. ³⁸ No biza' go kwa'n ka' men, nes par Dios xilazh mase ka' go, haxta ya'n sobre; nela xmod niza' goi ka' men, se' ska ne' Diöse ka' go.

³⁹ No nu miza' Jesús tu kwent re':

—çChi zak tu men nikal lo, lu' xa' nez lo xtu xa' nikal lo? çGat rop bixa' yachin le'n tu zo?
⁴⁰ No yent cho tu men más nzhak lo maestr che'n xa', sino ke or lox tse'd xa', lë' xa' gak nela xa' kwa'n milu'i lo xa'.

⁴¹ çChon niwi'l por tu kwa'n nak xtu men, mbaino lë' rë kwa'n más nazhe'b nakal gat niwi'tal? Kure' nak nela tu yix win kwa'n nzho lo wechal, no lë' yix ro kwa'n nzho lol gat niwi'tal. ⁴² çChon nzhabal lo wechal: "Bila' kon yix win kwa'n nzho lol re'", no chi gat nizital, más tu kwa'ro nzho lol? çTatu nazhe'b nakal, chigab walika men wenal! Mejor galo laka ngulo' kwa'n nzho lol ba', nes par gak ko'l kwa'n nzho lo wechal ba'.

Nakbe' ya por xlë' kwa'n niza'i
(Mt. 7:17-20; 12:33-35)

⁴³ No yent cho tu ya wen za' rë xlë' nazu't, mbaino ni rë ya kwa'n nazu't, za' xlë' wen,

⁴⁴ porke kad ya nakbe' por xlë' kwa'n niza'i, porke gat nikan't men nzhao' le'n ya yich, no yent cho cho' tu rosim gub lo tu ya zhiu'.

⁴⁵ Lë' menaye nidi'zh pura rë kwa'n ñal, porke kwa'n wen nzho laxto' xa'; mbaino lë' men nakap nidi'zh pura kwa'n gat lë', porke kure' nzho laxto' xa', porke kwa'n nzho laxto' men, kuze' nidi'zh men.

Chop simient
(Mt. 7:24-27)

⁴⁶ No nzhab Jesús:

—çChon nine go lon: "Señor, Señor", mbaino gat nile't go kwa'n nin? ⁴⁷ Nal nin lo go, xmod nak men kwa'n nizubi lon, mbaino nile' xa' kwa'n nzhapa. ⁴⁸ Nak xa' nela tu men michao' tu yo'. Galo laka nde'n xa' na'ch lo ke, ze' michao' xa' simient che'ne. No or miro'b you', dub jwers nkë nits ta' yo' re', no per ni nangawine, porke lë'i nzob lo ke. ⁴⁹ Per xa' nzhon zizha namás, no gat nile't xa' kwa'n nzhapa, nak xa' nela tu xa' michao' tu lizh plo pura yuo, gat nayet nzobe, porke nangachao't xa'i kun simient. No or miro'b you', dub jwers nkë nits ta'i, orze' michil nitse.

7

Miliwen Jesús mos che'n tu men Roma, tu xa' nile' mandad lo tu gayo' sondad
(Mt. 8:5-13)

¹ No or milox midizh Jesús lo rë men, orze' ña Me yezh Capernaúm. ² Yezh re' nibëz tu xa' nile' mandad lo tu gayo' sondad román, kinu xa' tu mos che'n xa', no dox nazhi' xa' mos re'; mbaino nzhakne ne', mer gat ne'. ³ Or mbin xa' nile' mandad re', kidi'zh men nikizë Jesús gax ze', orze' mixë'l xa' pla xa' nzo lo men Israel, par ngwayab bixa' yi'd Jesús, liwen mos che'n xa' re'. ⁴ No or mizhin rë xa' re' plo nzo Jesús, garga'l kiyab bixa':

—Cha'o ña be par gaknu go xa' nile' mandad ze', ⁵ porke dox nazhi' xa' re', rë be men Israel; mbaino lë' xa' re' mizuxkwa' tu yo' plo nitse'd be widi'zh che'n Dios yezh re'.

⁶ Orze' nzha Jesús kun lë' bixa'. Per or nzhazhin la bixa' gax lizh xa' re', orze' mixë'l xa' nile' mandad re' pla rë xa' kwa'n nichë'l xa' par ngwayab bixa' lo Jesús:

—Señor, zit go gat lë', porke gat ñalta da par yi'd go lizha. ⁷ Kuze' ni nangaye laxto'n ngayal yuba lo go; namás bile' go mandad por xti'zh go, yak mos da. ⁸ Porke nu ka da, nzhona ro' xa' nile' mandad lon, no kinu ska men nilen mandad or gapa lo tu xa': "Wa", lë' xa' ya; no or gapa lo xtu xa': "Dë", lë' xa' yë'd. Mbaino or gapa lo tu mos da, le' xa' tu kwa'n, lë'i le' xa'.

⁹ No or mbin Jesús widi'zh re', xe mia'n Me, orze' miwi' Me lo rë xa' nzhakë tich Me, no nzhab Me:

—Walika kwa'n nin lo go, per ni tu men Israel gat nen yila widi'zh da nela xa' re'.

¹⁰ No or nguiubre rē xa' kwa'n mixē'l xa' nile' mandad re', lē' mos che'n xa' miak la.

Jesús mile' nguruban xga'n tu una' ngut xmiyi'

¹¹ No xtu riyē'l, nza Jesús tu yezh kwa'n lē Naín kun rē men che'n Me, no nayax men nzhakē tich Me. ¹² No or nzhazhín Jesús ro' yezh re', lē'chi une Me nzhaka'ch men tu yinto'. No yinto' re', tutsa miyi' nak xga'n tu una' kwa'n ngut xmiyi'. No dox men yezh ze' nzhaka'ch bixa' xga'n una' re'. ¹³ No or une Jesús una' re', milats laxto' Me una', orze' nzhab Me lo una':

—Nago'ntra'l.

¹⁴ Orze' nguzubi Jesús, migal Jesús ta' kwa'n nzhob' yinto' lo, orze' xe ngulēz rē xa' nzhanu yinto', orze' nzhab Jesús lo yinto':

—Miyi' xi, lē'da ni lol: jWaxchel

¹⁵ Orze' nguzob miyi' xa' ngut re', mbaino nguzublo kidi'zh miyi', orze' nzhab Jesús lo xna' miyi': “Lē' xga'nal re'.” ¹⁶ No or une rē men kure', mizheb bixa', orze' nguzublo kidi'zh bixa' dox nazhon Dios, mbaino nzhab bixa':

—jDox tu profet ro, xa' nidi'zh widi'zh che'n Dios, mizhin lo be!

No nzhab bixa':

—jNzatsiwi' Dios rē men che'n Dios!

¹⁷ No rē xa' nzē lazh men Judea kun rē xa' nzhon naka'n rē yezh kwa'n ña'n ze', mbin bixa' kwa'n mile' Jesús.

Rē men kwa'n mixē'l Juan

(Mt. 11:2-19)

¹⁸ No rē xpen Juan ngwayab lo Juan, rē kwa'n nile' Jesús xid rē men, no or ngurezih Juan chop xpen xa', ¹⁹ orze' mixē'l xa' rop rē xa' re' par wayab bixa' lo Jesús: “¿Chi lu ka nak Krist, kwa'n nak di'zh yi'd lo no, o kwēz no yi'd xtu xa'?” ²⁰ No or mizhin rop xpen Juan re' plo nzo Jesús, orze' nguzubi bixa', nzhab bixa':

—Lē' Juan xa' nililē'i' men le'n nits, mixē'l no par nabdi'zh no lol, ¿chi lu ka nak Krist kwa'n nak di'zh yi'd, o kwēz no yi'd xtu xa'?

²¹ No mis orze', dox men nzhakne kiliwen Jesús, no nu rē xa' nizak yalnawin, no rē xa' nzhon mbi mal laxto', no haxta rē xa' nikkal lo, mile' Jesús miwi' bixa', ²² orze' nzhab Jesús lo rē xpen Juan:

—Wayab go lo Juan rē kwa'n une go, no rē kwa'n mbin go. Guzho go, lē' rē men nikkal lo, niwi'; no rē men nagakt zē, nizē; no rē xa' nizak yalyizh kwa'n lē lepra, nimbe bixa'; no rē men sord, nixa'l nza; no rē men ngut, niruban; mbaino rē men prob*, kiyon

widi'zh nazhon che'n Dios. ²³ jNo nazhon nza men yila da dubta'!

²⁴ No or ña rē xa' mixē'l Juan, orze' nguzublo kidi'zh Jesús kwent che'n Juan lo rē men, nzhab Me:

—¿Cho xa' kwa'n ngwatsi' go lo, plo nak yuo bizh ze'? ¿Chi lo tu xa' ña-ñē'd xigab che'ne, nela yix kwa'n nzhuwe'i' mbi rē plo?

²⁵ No chi gat lē't kuba' une go, ¿kwan ska une go orze'? ¿Chi une go tu miyi' nak lar wen? Per nane ka go, cho rē xa' kwa'n nzhak lar wen, rē xa' ze' nzhon lizh rē rey, plo nzhon bixa' mod nzhakla bixa'. ²⁶ ¿Per cho ska xa' ngwatsi' go lo? ¿Chi ngwatsi' go lo tu men nak profet, xa' nidi'zh por Dios? Na ni, lē' xa' kwa'n ngwatsi' go lo re', más tsak xa' ke lo tu profet, ²⁷ porke kwent che'n Juan re', nidi'zh Yech che'n Dios or nzhabe se': Biwi', lē Da xē'l xa' di'zh xtizha dilant lol, par kuxkwa' xa' laxto' rē men par gon bixa' ro' Dios.

²⁸ Nin lo go, xid rē men yizhyuo, nangayota tu xa' más tsak lo Juan. Per rē xa' más natsakt, xid rē xa' nzhon plo nile' Dios mandad, nak rē xa' kwa'n más tsak lo Juan.

²⁹ Or mbin rē nak men kure', rē xa' kwa'n mililē'i' Juan le'n nits, no haxta rē men nikan dimi che'n rey, milibe' bixa', dox ñal kwa'n nile' Dios. ³⁰ Per rē men fariseo no rē xa' nilu' ley, mile' bixa' naya' lo rē kwa'n ngokla Dios par lē' bixa', porke nangazyēlt bixa' ngaklē'i' bixa' xmod nzhab Juan. ³¹ Orze' nzhab Jesús lo rē xa' ze':

—¿Xmod gapa nak rē men nal; nela kun cho chēla bixa'? ³² Nak bixa' nela rē mbwin, kwa'n nzhin le'n nez plo nzhak xbi', kiyab mbwin lo wech mbwin kwa'n nzhin ze': “¿Chon nanet go ngoln'i' go or kiyol' no bizhi, no ni nango'nt go or kikē' no kant nalats?”

³³ Porke mbi'd Juan, xa' nililē'i' men le'n nits, gat nzhawt xa' yēt no gat nzhon xa' bin, no nzhab go: “Mbi mal nzhon laxto' xa'.” ³⁴ No or nzhala, nak da Xga'n Dios mbaino nak da men yizhyuo, nzhawwa no nzhon, no ne go: “Biwi', nzhao cho'l, mbaino nzhon cho'l kwa'n, no nichē'lal kun rē men nikan dimi che'n rey no kun rē men más nzhob' xti'zh nzē'b xki.” ³⁵ Per bitsila go, rē xa' kwa'n ñila widi'zh che'n Dios, nilu' walika nazhone por xmod naban bixa'.

Ngwatao Jesús lizh Simón, tu men fariseo

³⁶ No ngurezih tu men fariseo Jesús, par gao Jesús lizh xa'; orze' ngwa Jesús, no or nguio Me lizh xa', nguzob Me lo mes. ³⁷ No yezh ze' nzhon tu una' kwa'n más nzhob' xti'zh dox nzē'b xki. Or mbin una', lē' Jesús nzhatao lizh men fariseo re', orze' mizhinnu una' tu bot win zhēi di aseit nax, mbaino tsak doxe, haxta nu bot kwa'n nzhon

* 7:22 Widi'zh “prob” re', par lo widi'zh grieg, chon kwa'n gabe: 1. men yent kwa'n kinu par ban; 2. men natsakt, nile' rē men rrajón lo; 3. men nado'.

re', dox tsak. ³⁸ No or nguzo una' xan ni' Jesús, dub kiyon' una', orze' migazh una' kun nits nzho'n una' ni' Me, no dub kichiro' una'i, kitsibizh una'i kun yich yek una'; no nu micho'n una' aseit nax ni' Me. ³⁹ No or une xa' fariseo ze' kure', xa' kwa'n ngurezlh Jesús lizh, mile' xa' xigab: "Chi lè' xa' re' walika nak tu profet, xa' nidi'zh por Dios, lè' xa' nganu la, cho una' kwa'n kigal ni' xa', tu una' zhe'b nzè'b xki." ⁴⁰ Orze' nzhah Jesús lo xa' fariseo re':

—Simón, nzhaklan ganin tu kwa'n lol.

Orze' nzhah Simón:

—Bineu xkwane, Maestr:

⁴¹ Orze' nzhah Jesús:

—Nguio chop men, nzè'b dimi lo tu xa' kwa'n nile' prexte. Tu xa' nzè'b dimi kwa'n nile' men gan tu li'n garol lo pura zhi'n, lè' xtu xa' nzè'b dimi kwa'n nile' men gan, pas como chop mbè'o', di lo zhi'n. ⁴² No nangale't rop xa' gan ngayix bixa'i lo xa' nak che'ne, orze' milats laxto' xa' nak che'n dimi ze' rop xa' ze'.

Orze' nzhah Jesús:

—¿Di lo rop xa' ze', cho xa' más nazhi' xa' kwa'n nak che'n dimi ze'?

⁴³ Orze' nzhah Simón:

—Zaka, xa' kwa'n más nayax dimi nzè'b ze'i.

Orze' nzhah Jesús:

—Lè'ka kwa'n nel.

⁴⁴ Orze' miwi' Jesús lo una' ze', mbaino nzhah Me lo Simón:

—¿Chi niwi'l lo una' re'? Or nguio'n lizhal, nangane'tal nits par yèt ni'n, per lè' una' re' migazh ni'n kun nits nzho'n xa', no mitsibizh xa'i kun mis yichyek xa'. ⁴⁵ Nangachiro'tal ta' kwatsa or mizhi'na lizhal, per una' re', dizde mizhin xa' lon, kichiro' xa' ni'n, no haxta nal stubi kichiro' xa'i. ⁴⁶ Nangacho'btal aseit nax yeka, per lè' una' re' micho'be ni'n. ⁴⁷ Kuze' nin lol, lè' ré kwa'n zhe'b nzè'b xki una' re', mizhe' la lo Dios, porke dox nazhi' xa' Dios. Per men kwa'n nagat za' kwent cho pa' xtol xa' niche' Dios, che'p tsa nazhi' xa' re' Dios.

⁴⁸ Orze' nzhah Jesús lo una' re':

—Lè' ré kwa'n nzè'b xkil lo Dios, lè'i mizhe' la.

⁴⁹ Orze' ré xa' kwa'n nzhin lo mes ze', nguzublo kiyab bixa' lo wech bixa':

—¿Cho xa' re'? ¡Haxta nu ré kwa'n nzè'b xki men lo Dios, niche' xa'!

⁵⁰ Per nu nzhah Jesús lo una' re':

—Por ngwayilal da, lè'l nguro' la lo ré kwa'n nazhe'b nzadkè tichal. Nal, dub bizè, bizak laxto'.

8

Rè una' kwa'n ngoknu Jesús

¹ No dispwés di ngok ré kure', nikizè Jesús kun dub tu dusen men che'n Me, nayax

yez h no ré rranch win, kidi'zh Jesús widi'zh nazhon che'n Dios par xmod gak men, men che'n Dios. ² No nu zipla una' ngoknu Jesús. Xid ré una' re' nzho una' kwa'n miliwen Jesús yalyizh che'n, kun zipla una' kwa'n ngulo' Jesús mbi mal laxto'. Tu ré una' re' lè' Mari Madalén; una' kwa'n nguro' gazh mbi mal laxto'. ³ No xtu ré una' re' lè' Juan xa' nak una' che'n Chuza, miyi' kwa'n nzo lo ré kwa'n nak che'n gobiernador Herodes; no xtu una' re' lè' San; no nguio más ré una' kwa'n ngoknu Jesús kun ré kwa'n nak che'n biuna'.

Kwent che'n xa' nzha'n

(Mt. 13:1-9; Mr. 4:1-9)

⁴ No nayax men kwa'n nzhò ré yezh kwa'n nzhin naka'n ze', nguro' bixa' par ngwatsi' bixa' lo Jesús, no or migan nayax men plo nzo Jesús, orze' miza' Jesús kwent che'n men nzha'n triu, nzhah Me:

⁵ —Nguro' tu miyi', nzhaya'n xa' laz h triu, no or miche'ch xa' lazhe, plai ngob le'n nez, no milo men loi, mbaino ndao miyine. ⁶ No mase ngob lo yuo ke, no or ngulene, lwega' mibizhe, porke yent gop ze'. ⁷ No mase ngob le'n ya yich, no ngulene junt kun ré ya yich, no ngala't ya yich ngaro'be, orze' ngute. ⁸ No xche'pe ngob lo yuo wen, orze' miro'be, no dox miza'i. Tu lazhe miza' xtu gayo'i dimás.

No or milox midì'zh Jesús kure', orze' naye midì'zh Me, nzhah Me:

—¡Chi lè'l mbine, bizobyekel!

¿Chon midì'zh Jesús kwent re'?

(Mt. 13:10-17; Mr. 4:10-12)

⁹ Orze' minabdi'zh ré men che'n Me lo Me, nzhah bixa':

—¿Kwan gab kwent kwa'n miza' go ba'?

¹⁰ Orze' nzhah Jesús:

—Lo go nin ré kwa'n naga'ch kwa'n kinu Dios plo nile' Dios mandad; per lo más men nidizha kun pura kwent lo bixa', par ne bixa'i, per nangalibe't bixa'i; no par gon bixa'i, per nangazobyekt bixa'i.

Kiyab Jesús kwan gab kwent che'n men nzha'n

(Mt. 13:18-23; Mr. 4:13-20)

¹¹ No nzhah Jesús:

—No nal, lè'da ni lo go kwan gab kwent ba'. Lè' widi'zh che'n Dios nak nela laz h kwa'n nzha'n men. ¹² Lè' laz h triu kwa'n ngob le'n nez, nak nela tu men kwa'n mbin widi'zh che'n Dios, per ña Mizhab nizubchiy laxto' xa', par nayila xa'i, no par naro' xa' lo kwa'n nazhe'b nzho xa'. ¹³ No lè' kwa'n ngob lo yuo ke, nak nela men mbin widi'zh che'n Dios, no ngwayila xa'i, nizak laxto' xa', per gat nzot xa' naye lo che'n Dios. Ñila xa'i che'p, per or nizak xa' tu kwa'n nazhe'b, orze' nila' xa' Dios. ¹⁴ Mbaino lè' laz h triu kwa'n ngob le'n ya yich, nak ré

men mbin widi'zh che'n Dios, per che'p ga' che'p ga', ña'l laxto' xa'i, por rë xigab kwa'n nile' xa', xmod ban xa', mbaino por ño laxto' xa' le' xa' kwa'n nzhakla xa', no por niwix xa' gap xa' dimi; kuze' gat nile't xa' kwa'n nzhakla Dios le' xa'. ¹⁵ Mbaino lë' lazh triu kwa'n ngob le'n yuo wen, nak nela men kwa'n mbin widi'zh che'n Dios kun dub laxto' xa', no ngwayila xa'i, no mia'ne laxto' xa'. Mbaino ter nizak xa' rë kwa'n nazhe'b, per nile' xa' rë kwa'n nzhakla Dios le' xa'. Orze' nak xa' nela tu ya xlë, kwa'n dox niza' xlë wen.

Kwent che'n tu biani

(Mt. 4:21-25)

¹⁶ No nu nzhab Jesús:

—Yent cho tsinki tu biani no tsao' xa' loi, o zob xa'lo yuo xan lo'n, sino ke al ya zob xa'i, par ziniy lo rë xa' yo le'n yo', ¹⁷ porke yent tu kwa'n naga'ch, naro' al tich; no ni kwa'n xla'n, naded gon men, sino ke rëi ro' al tich.

¹⁸ 'Kuze', biwi' go xmod le' go, por rë kwa'n nidizha lo go; porke rë xa' kwa'n nzhakla zobyek, mbaino le' rë kwa'n nidizha, rë xa' re' xa' nzhaknu Dios, par más zobyek bixa'i; per xa' gat nzhaklat be's zobyek kwa'n nidizha, haxta che'p tsa kwa'n nile' xa' xigab, ya nane la xa', per lë'i yubchi lo xa'.

Rë wech Jesús kun xna' Me

(Mt. 12:46-50; Mr. 3:31-35)

¹⁹ Orze' nza xna' Jesús, kun rë wech Jesús plo nzo Me, per nangakt ngazubi bixa' lo Me, porke dox nayax men nzhin ze', ²⁰ orze' ngwayab tu men lo Jesús:

—Lë' xna' go mbaino rë wech go nzo al tich, nzhakla bixa' di'zh bixa' kun go.

²¹ Per nzhab Jesús:

—Lë' xna'n mbaino rë wecha, nak rë xa' kwa'n nzhon widi'zh che'n Dios, mbaino nile' bixa' kwa'n nzhakla Dios.

Mikwë'z Jesús tu yiubi nazhe'b le'n nits

(Mt. 8:23-27; Mr. 4:35-41)

²² Tu ngubizh, nkë Jesús le'n tu bark kun rë men che'n Me, no nzhab Me:

—Chao' nza be xtu ro' nits.

Orze' nza bixa'. ²³ No or nza la bixa' le'n nits, no nguzen mika'l Jesús, lë'chi nguzublo tu yiubi nazhe'b le'n nits, orze' nguzublo nguio nits le'n bark, no mer ya'zyo'i. ²⁴ Orze' ngwalixche bixa' Jesús, nzhab bixa':

—jMaestr, Maestr, lë' bark nzhakla ya'zyo' le'n nits!

Orze' ngwaxche Jesús, no naye mid'i'zh Me lo mbi, no lo rë bol che'n nits, no ngulëz yiubi, xe mia'n rëi. ²⁵ Orze' nzhab Jesús lo rë men che'n Me:

—Ñal más yila go da.

Per rë bixa' mizheb, no xe mia'n bixa' tuli, orze' nzhab bixa' lo wech bixa':

—¿Cho xa' re'? jHaxta lo mbi, no lo nits nidi'zh xa', mbaino nzhone kwa'n nzhab xa'!

Tu men lazh men Gadara tu xa' nzo nayax mbi mal laxto'

(Mt. 8:28-34; Mr. 5:1-20)

²⁶ Orze' mizhin bixa' lazh men Gadara, kwa'n nzhin xtu ro' nits dilant lazh men Galilea. ²⁷ No or ngula Jesús bark, orze' nguzubi tu men yezh ze' lo Jesús, tu xa' kwa'n dox nzhala nzo mbi mal laxto'. No kache' xa', mbaino ni gat nzo xa' lizh xa', le'n panteón nzo xa'. ²⁸ No or une xa' Jesús, nguzuxib xa' lo Jesús, no naye nguruzhië xa', nzhab xa':

—¿Kwan nizakal kuda, Jesús Xga'n Dios, Me nzo lo yibë'? jKina'ba lol, zakzital da!

²⁹ Se' nzhab mbi mal ze' lo Jesús, porke lë' Jesús mile' mandad, par liya' mbi mal ze' miyi' re'. Nayax wëlt, nilinu rë mbi re' miyi' re' kwa'n nzhaklai, no ter nili'b men ya' xa', no ni' xa' kun kaden, no ter nikina men xa' par nayent plo ya xa', per nicho' xa' kaden, nixëk xa', orze' nizhinu rë mbi mal xa', plo niyent cho nak. ³⁰ Orze' nzhab Jesús lo xa' re':

—¿Xmod lël?

Orze' nzhab xa':

—Lë'da lë Legión.

Se' nzhab xa', porke dox nayax mbi mal nzo laxto' xa'. ³¹ No nzhab rë mbi mal ze' lo Jesús:

—Naxë'lta! no, plo nazhe'b na'ch no nakao.

³² No ze' nzhin nayax kuch, kiyao ma ta' tu lom, no guna'b rë mbi mal ze', la' Jesús biy le'n rë kuch kwa'n nzhin ze', orze' nguziyël Jesús. ³³ Orze' nguro' rë mbi mal laxto' miyi' re', par ñai le'n rë kuch, orze' mikë' bima karre, ngula bima ro' bilë' plo nak ro' nits, ze' ngwap rë kuch.

³⁴ No rë xa' kwa'n kikina rë kuch re', or une bixa' kure', mikë' bixa' karre, ngwayab bixa' lo rë men yezh ze', no lo rë xa' nzo dan. ³⁵ Orze' rë men ngwatswi', por kwan mbin xa' ngok re'; or mizhin men plo nzo Jesús, une bixa' miyi' kwa'n nzhak miyizh ze', lë' xa' wen la, mbaino nak xab la xa', nzob xa' xan ni' Jesús, orze' rë men mizheb tuli. ³⁶ No rop xa' kwa'n une, xmod uniwen xa' kwa'n ngok miyizh ze', mid'i'zh bixa'i, lo más rë men kwa'n ngwatswi' ze', ³⁷ kuze' guna'b rë nak men, kwa'n nzo rë yezh kwa'n ña'n lazh men Gadara, nzhab bixa', ro' Jesús ze', porke dox nizheb bixa' lo Jesús. Orze' nkë Jesús le'n bark, par ña Me kun rë men che'n Me. ³⁸ No miyi' kwa'n miliya' mbi mal ze', guna'b xa' lo Jesús, yakë xa' tich Jesús; per nzhab Jesús lo xa':

³⁹ —Biyëk lizhal, no guzh lo rë men, rë kwa'n mile' Dios kun lu.

Orze' ña miyi' ze', dub lazhen men Gadara, midizh xa', lè' Jesús miliwen xa'.

Xch'ap Jairo no tu una' kwa'n migal xab Jesús

(Mt. 9:18-26; Mr. 5:21-43)

⁴⁰No or mièk Jesús di xtu ro' nits, rë men nzhin ze', nizak laxto' or mizhin Jesús lo bixa', porke lè' bixa' kimbèz lo la. ⁴¹Lè'chi, ze' mizhin tu xa' lè' Jairo, nak xa' tu men xa' nile' mandad le'n yo' plo nitse'd men widi'zh che'n Dios, orze' tulí nguzuxib xa' xan ni' Jesús, kina'b xa' ya Jesús lizh xa', ⁴²porke mer gat, tutsa xcha'pye'n xa' kwa'n nzhap xa', nzhap la mè'd tu dusen li'n.

No dub nzha Jesús lizh mè'd re', nayax men nzhakè tich Me, haxta kigotip men Jesús. ⁴³Xid rë men re', nzho tu una' kwa'n nzhakne, nzhala tu dusen li'n nizak xa' kwa'n. Milo'x xa' rë kwa'n kinu xa', lo rë doctor, no yent cho doctor ngaliwen xa'. ⁴⁴No nguzubi una' re' al tich Jesús, par migal una' punt xab Me, no mis orze' ngulèz ren kwa'n nizak una'. ⁴⁵Orze' nzhap Jesús:

—¿Cho migal ta'n?

Rë men nzhap, yent cho migale, orze' nzhap Per:

—Maestr, ka rë men kitao'w go, no kiche'p xa' go rë lad. ¿Chon kinabdi'zh go: “Cho migal da”?

⁴⁶Per garga'l nzhap Jesús:

—Nzho ka cho migal ta'n, lè' da mizi, por yalnazhon kwa'n kinun, lè' tu men miak.

⁴⁷No or une una' re', nagaktra' ka'ch una' kure', maska nixiz una', nguzuxib una' xan ni' Jesús, no mixè'l ro' una' lo rë men, nzhap una':

—Na migal punt xab Jesús, mbaino lwegal miak da.

⁴⁸Orze' nzhap Jesús:

—Xch'ap, lè'l ngokwen la por ngwayilal da, nal bizè, no bizak laxto'.

⁴⁹Stubi ra' kidizh Jesús, orze' mizhin tu xa' kwa'n nzho lizh Jairo, nzhap xa' lo Jairo:

—Lè' mizhwin che'nal ngut la; bila' nayi'dnutra'l Maestr.

⁵⁰No or mbin Jesús kure', orze' nzhap Me lo Jairo:

—Nazhebtal, na gaku mizhwin, lè' mizhwin che'nal yak ka.

⁵¹No or mizhin bixa' lizh Jairo, yentra' cho ngala' Jesús ngaded al le'n, nab tsa Per no Jakob mbaino Juan no xuz mizhwin, kun xna' mizhwin nguio al le'n. ⁵²No maska kiyo'n rë men di yalnawin, kigal bixa' laz bixa' por mizhwin re', per nzhap Jesús lo rë men:

—Nagontra' go; gat lè't ngut mizhwin, lè' mizhwin ka naxnaa.

⁵³Per kixizhnu rë men Jesús, porke nane bixa' lè' mizhwin ngut la. ⁵⁴Orze' nguzen Jesús ya' mizhwin, no naye nzhap Me:

—jMizhwina, waxche!

⁵⁵Orze' nguruban mizhwin, no tuli ngwaxche mizhwin; mbaino mile' Jesús mandad, za' bixa' kwa'n gao mizhwin re'. ⁵⁶Orze' xe mia'n rop xa' nak xine re' tuli, per mile' Jesús mandad, yent cho lo di'zh bixa' kwa'n ngok re'.

9

Mixè'l Jesús tu dusen apost che'n Me par kè xa' zhi'n nazhon che'n Dios

(Mt. 10:5-15; Mr. 6:7-13)

¹No mizhin Jesús dub tu dusen men che'n Me, par miza' Me yalnazhon nka' bixa', par le' bixa' mandad lo rë mbi mal, mbaino par liwen bixa' rë men nzhakne; ²no mixè'l Jesús bixa' par di'zh bixa' lo rë men, xmod gak men, men che'n Dios, no par liwen bixa' rë lo yalyizh, ³mbaino nzhap Jesús lo bixa':

—Yent kwa'n wei' go nez; nawei'to go ni tu bar, ni tu bols, no ni yët, mbaino ni dimi, no lar nak tsa go bi'y go namás. ⁴No or zhin go kwalisquier tu lizh men, plo wi' bixa' wen lo go, ze' biya'n go haxta or ya go xtu plo, ro' go ze'. ⁵No wanei tu plo nawi' men wen lo go, guro' go ze', guzhi'b go ni' go lo rë men yezh ze', nela tu señ ga', lè' bixa' mile' naya' lo Dios.

⁶Orze' ngwa bixa' rë nak yezh win, kwa'n nzhin naka'n ze', midizh bixa' widi'zh nazhon che'n Dios, no miliwen bixa' rë men nzhakne.

Ngut Juan xa' nililè'i men le'n nits

(Mt. 14:1-12; Mr. 6:14-29)

⁷Or mbin gobiernador Herodes rë kwa'n kile' Jesús, orze' dox xigab nguzob yek Herodes, porke nzho men nidi'zh, lè' Juan nguruban, ⁸más men nidi'zh ka profet Li nguruban, mbaino nzho men nidi'zh, ka tu rë profet xa' tiemp nguruban, ⁹per nzhap Herodes:

—Na mile' mandad, miro'g yek Juan, ¿per cho ska xa' kwa'n nidi'zh men, xa' nzhona nile' rë kuba'?

Kuze' dox nzhakla Herodes ne xa' Jesús.

Jesús miza' kwan gao gai' mil men

(Mt. 14:13-21; Mr. 6:30-44; Jn. 6:1-14)

¹⁰No or mièk rë apost, miza' bixa' kwent lo Jesús rë nak kwa'n mile' bixa', orze' nzhanu Jesús bixa' tu lad di ro' yezh kwa'n lè' Betsaida. ¹¹Per or mbin rë men plo nzha Jesús, rë bixa' ngwakè. No milats laxto' Me rë men ze'. Midizh Jesús lo bixa', xmod gak bixa' men che'n Dios, no miliwen Jesús rë nak men nzhakne nzho xid bixa'. ¹²No or nzhazhèlyuo, dub tu dusen men che'n Jesús, nguzubi bixa' lo Me, nzhap bixa':

—Bi rë men re', guzh go, par yakwa'n bixa' plo ga' bixa', no kwa'n gao bixa', ya bixa' rë rranch no rë yezh kwa'n ña'n gax re', porke plo nzhin be re', yent kwan nak.

¹³ Per nzhab Jesús:

—jBiza' go kwa'n gao rë men re'!

Orze' nzhab bixa':

—Gai'tsa yët kinu no, no choptsa mbël, o çchi yazi' no kwa'n gao rë men re'?

¹⁴ Nzhin ze' pas tu gai' mil men nab tsa miyi'. Per nzhab Jesús lo rë men che'n Jesús:

—Guzh go zob rë men, cho' bichi'ga' bixa' bizhin go.

¹⁵ Orze' mile' bixa' nguzob men. ¹⁶ Orze' nguzen Jesús za gai' yët kun rop mbël ze', miwi' Me lo yibë' miza' Me xkix lo Dios por kwa'n gao bixa', orze' michi'x Mei, miza' Mei ka' rë men che'n Me, par lë' bixa' ki'ze gao rë men. ¹⁷ Rë nak men ze' ndao, haxta plo ngwazhë bixa'; no or milox ndao bixa', mikan rë men che'n Jesús, tu dusen kardor kwa'n mia'n sobr lo kwa'n ndao bixa'.

Midì'zh Per, lë' Jesús nak Krist

(Mt. 16:13-19; Mr. 8:27-29)

¹⁸ No ngol tu ngubizh, nab Jesús kina'b lo Dios, no rë men che'n Me nzhin kun lë' Me, orze' nzhab Me lo bixa':

—çCho da nzhab men?

¹⁹ Orze' nzhab rë men che'n Me:

—Pla men nidi'zh, lu nak Juan xa' nililëi' men le'n nits, más men nidi'zh, lu nak Li, no nzho men nidi'zh lu nak tu rë profet xa' timp nguruban.

²⁰ Orze' nzhab Jesús lo bixa':

—Mbai go ga', çcho da par go?

Orze' nzhab Per:

—Go nak Krist Me mixë'l Dios.

Nzhab Jesús: "Lë' Da gat"

(Mt. 16:20-28; Mr. 8:30—9:1)

²¹ Orze' dox mika'b Jesús, nadi'zht bixa' kure', ²² No nzhab Me:

—Na Xga'n Dios no nak da tu men yizhyuo, dox naki'n zakzi da; mbaino nayilat rë xa' kwa'n nak zhi'n, xid rë men Israel da, no ni rë xa' nile' mandad lo rë ngulëi', mbaino ni rë xa' kwa'n nilu' ley, nayilat da; no mis rë xa' re' le' mandad gat da, per ngubizh yon lë'da ruban.

²³ No nzhab Jesús lo rë nak men nzhin ze':

—Chi tu go nzhakla gak xpena, naki'n ya'l laxto' go rë kwa'n nzhakla go le' go, par le' go kwa'n nzhaklan, mbaino nazolia'zht go (le't go naya') or naki'n zakzi go, haxta ter gat go por da, ²⁴ porke xa' gat nzhaklat gak xa' men da par le' xa' kwa'n nzhakla xa', orze' mila' xa' kwa'n ban xa' par dubta' lo Dios; per xa' la' kwa'n nzhakla xa' le' xa', por nak xa' men da, orze' lë' xa' ban par dubta' lo Dios, ²⁵ porke, yent kwan zu' par tu men, ka' xa' rë nak kwa'n nzho yizhyuo, por mile' xa' kwa'n nzhakla xa', no or gat xa', lë' xa' lox lo Dios par dubta'. ²⁶ Chi tu go le' naya' lon no lo rë widi'zh da, nu ska da le naya', nawi'ta' lo go, or yala kun biani da kwa'n más ke ngubizh, mbaino kun

biani che'n Xuza, no che'n rë ganj nazhon che'n Dios. ²⁷ No walika kwa'n nin lo go, nzho pla xa' xid go nalre', nagata' xa' antis dike ne bixa', xmod nile' Dios mandad kun yalnazon che'n Me.

Ngubixlo Jesús lo pla men che'n Me

(Mt. 17:1-8; Mr. 9:2-8)

²⁸ Nzha xon ngubizh di midì'zh Jesús kure', orze' nzha Me yek tu yi' par na'b Me lo Dios, no nzhanu Me Per kun Juan no Jakob. ²⁹ No or kina'b Me lo Dios, orze' ngubixlo lo Me; no xa'b Me milu' bëo laka, no ña'zbele. ³⁰ Lë'chi nguruxo' b xchop miyi', kidi'zh bixa' kun Jesús. Tu xa' re' Muisés, no xtu xa' Li. ³¹ No nzhin bixa' le'n tu biani maska ña'zbele, kidi'zh bixa' rë kwa'n mizhin la zak Jesús yezh Jerusalén. ³² No Per kun xchop xa' kwa'n nzo kun lë' xa', dub nzë mika'l lo bixa', mixek bixa' nanga't bixa', no une bixa' biani kwa'n maska ña'zbele che'n Jesús, kun xchop xa' kwa'n nzo kun Jesús re'; ³³ no or nguubchi rë xa' ze' lo Jesús, orze' nzhab Per lo Jesús:

—Maestr, jzhe'b wen nzhin be re'! Bila' go chao' no chon yo' yix; tube par go, xtube par Muisés, no xtube par Li.

Se' midì'zh Per porke gat naya't Per par di'zh Per. ³⁴ No dub kidi'zh Per, mbi'd tu xkao, ngulai plo nzhin yon bixa', orze' mizheb bixa' nzho bixa' le'n xkao re', ³⁵ no mbin bixa' le'n xkao re', nguro' tu widi'zh kwa'n nzhab se':

—jXa' re' nak Xga'na Me nazhi' da, no Me ngulen nak Krist; bile' go kwa'n ne Me!

³⁶ No or milox mbin bixa' widi'zh ze', une bixa' lë' nab Jesús nzo, orze' nab bixa' nane kure', le'n rë ngubizh ze', yent cho lo ngadi'zh bixa' kwa'n une bixa'.

Ngulo' Jesús mbi mal laxto' tu miyi' xi

(Mt. 17:14-21; Mr. 9:14-29)

³⁷ No xtu riyë'l, or ngula bixa' yek lom ze', nayax men nzhachëlo Jesús, ³⁸ lë'chi xid rë men re' nguro' tu miyi' nibizhyë naye, nzhab xa' lo Jesús:

—Maestr, kina'ba lol, liwenal xmë'da re', porke tutsa mbwin re' nzhapa. ³⁹ Nizen tu mbi mal mbwin, nikuzhië' mbwin, no nile'i dox nixiz mbwin, no niro' bichi'n ro' mbwin, orze' pe'n nila'i mbwin. ⁴⁰ Dox la nzhapne lo rë xpenal par ko' bixa' mbi mal re', per nangale't bixa' gan ngaro'i.

⁴¹ Orze' nzhab Jesús lo rë men ze':

—jTaxa nagat yila go kwa'n nin lo go! jTatu nad go par yila go rë kwa'n wen che'n Dios! jDox kixek da lo go, nagat zobyek go kwa'n nin lo go!

Orze' nzhab Jesús:

—jDinu xmë'dal re'!

⁴² No or nguzubi mbwin lo Jesús, milichin mbi mal re' mbwin, mbaino maska nixiz mbwin; per ngulo' Jesús mbi mal re' laxto'

mbwin, miliwen Jesús mbwin, orze' nzhab Jesús lo xuz mbwin: "Lè' xmè'dal re'".⁴³ No rè men xe mia'n bixa' tuli, or une bixa' yalnazon ro kwa'n mile' Dios.

Jesús midì'zh xtu wèlt lè' Me gat
(Mt. 17:22-23; Mr. 9:30-32)

Dub niwi' rè men kwa'n mile' Jesús, orze' nzhab Jesús lo rè men che'n Me:

⁴⁴ —Bizobyek go kure', no naya'lt laxto' goi: Na nak Xga'n Dios, no nak da tu men yizhyuo, lè' men chi Da lo rè men niyi' nine da par gut bixa' Da.

⁴⁵ Per nangazobyekt bixa' kwa'n nzhab Jesús, porke stubi gat xa' yek bixa', par ne bixa' kwane; mbaino nu nizheb bixa' nabdì'zh bixa', kwan gab widì'zh ba' lo Jesús.

Midi'zh men che'n Jesús: "¿Cho más tsak?"
(Mt. 18:1-5; Mr. 9:33-37)

⁴⁶ No nguzublo kichèlro' rè men che'n Jesús par nabei, ¿cho xa' gak más xa' tsak xid bixa'?,⁴⁷ per lwegá' mizi Jesús cho xigab kile' bixa', orze' nguzen Me tu mè'd win, no mizo Me mè'd ta' Me,⁴⁸ orze' nzhab Me:

—Men kwa'n niwi' wen lo mè'd win re' por nak mè'd men da, pwes lon niwi' xa' wen; no xa' kwa'n niwi' wen lon, lo Xuza, Me mixè'l da, niwi' xa' wen lo. Kuze' men yent kwan tsak xid go, xa' ze' xa' más tsak lo go.

Xa' gat niyi'tnine be, lad che'n be nzho xa'
(Mr. 9:38-40)

⁴⁹ Orze' nzhab Juan lo Jesús:

—Maestr, une no tu xa' kigotin mbi mal laxto' tu men por lèl, no nzhab no lo xa' nale'tra' xa', porke gat nikizèt xa' kun be.

⁵⁰ Orze' nzhab Jesús:

—Bila' go kile' xa', porke xa' gat niyi' nine be, lad che'n be nzho xa'.

⁵¹ No or nzhazhin la zhè, bi Jesús lo yibè', mbaino ter nane la Me rè kwa'n zak Me yezh Jerusalén, per tutsa xigab mile' Me, lè' Me ya ka yezh Jerusalén,⁵² orze' mixè'l Me pla men che'n Me par ya bixa' tu rè yezh lazh men Samaria, yakwa'n bixa' plo ya'n bixa' kun lè' Me.⁵³ Per rè men Samaria, nangaza't bixa' plo ya'n Jesús kun rè men che'n, porke nane bixa', lè' Jesús kile' xigab ya par yezh Jerusalén.⁵⁴ Orze' nzhab Jakob kun Juan lo Jesús:

—Señor, ¿chi ziyèl go na'b no lo Dios, gab bèl lo yibè', par lo'xe rè men re'?

⁵⁵ Orze' mièk Jesús, miwi' Me lo bixa', orze' nzhab Jesús:

—iNanet go cho rè mbi mal nzo lo go, par kidì'zh go kuba!⁵⁶ Na Xga'n Dios, no nu tu men yizhyuo da, nangayalta par loxa men; na nzhah, par kon men lo rè kwa'n nazhe'b, nzadkè tich men.

Orze' ña bixa' xtu yezh win.

Kwan naki'n le' men par gak bixa' men che'n Jesús

(Mt. 8:19-22)

⁵⁷ Or nzha bixa' nez, nzhab tu miyi' lo Jesús:

—Señor, nzhaklan yi'dkè'n tichal, rè plo yal.

⁵⁸ Orze' nzhab Jesús:

—Lè' mbèz kinu ma lizh ma, no lè' rè miyin kinu yo che'n, per na Xga'n Dios, mbaino nak da tu men yizhyuo, per gat kinuta' ni plo ga'n.

⁵⁹ No nzhab Jesús lo xtu xa':

—Di'kè ticha.

Orze' nzhab xa' re':

—Señor, bila' go galo laka nzhakacha xuzá.

⁶⁰ Orze' nzhab Jesús:

—Kwa'n más naki'n le'l nal re', wadi'zh lo rè men, xmod gak bixa' men che'n Dios, no bila' yaka'ch rè xa' nak nela mengut ga', tsa' mengut bixa'.

⁶¹ Xtu men nzhab lo Jesús:

—Señor, nzhaklan yi'dkè'n tichal, per bila' galo, yayapne lo rè xa' lizha.

⁶² Orze' nzhab Jesús:

—Nagakt gak men tu men che'n Dios, or nak xa' nela tu men nzha'n, xa' nazu't. Xa' kwa'n nile' rrèi yuo mbaino yèk xa' al tich xa', orze' lè' rrèi che'n xa' xub.

10

Mixè'l Jesús chon gal nzho chi' xa'yadi'zh widì'zh che'n Dios

¹ Or milox midì'zh Jesús rè kure', ngule Jesús zi xchon gal nzho chi' men par mixè'l Me chop ga' bixa' nez plo ya Me, rè yezh no rè plo nak di'zh ya Me,² no nzhab Jesús lo bixa':

—Walika, dox nayax yalgo'n, per rè xa' nikan yalgo'n, pla tsa bixa'; kuze' bina'b go lo xa' nak che'n yalgo'n par xè'l xa' más xa' kan yalgo'n.³ Wa go nàl, biwi' go lè'da mixèl go, nela mbèkxi'l xid rè xa' nak nela ma nazhe'b ga'.⁴ Naweit' go ni tu bols, no ni dimi, ni xtu nez yalyid che'n go; no ni nakwèz go nez, di'zhnu go men.⁵ Or yo go lizh tu men, galo laka se' guzh go: "Dios le', kwin men chul xa' nzho re'."⁶ No chi ze' nzho men, xa' ño laxto' wi' Dios wen lo xa', orze' lè' kwan midì'zh go ya'n par lè' xa'; per chi nayo laxto' xa', wi' Dios wen lo xa', orze' lè' kwa'n nazhon kwa'n midì'zh go, naya'nte lo xa'.⁷ Biya'n go yo' plo wi' men wen lo go, no dao go no gu' go rè kwa'n ne' xa', porke xa' nikè zhi'n, ñal gax ka' xa'; no naya'nt go tu yo' xtu yo', mbaino tutsa plo biya'n go haxta or ro' go, ya go xtu plo.⁸ No or zhìn go yezh plo wi' men wen lo go, dao go kwa'n ne' xa',⁹ no biliwen go rè nak men nzhakne nzho ze', no guzh go lo men, le' zhè mizhin

la, gak xa' men che'n Dios. ¹⁰ Per chi zhin go tu yezh plo nawil' men wen lo go, guro' go nez, no guzh go: ¹¹ "Haxta zhen yuo laz go, kwa'n nkê ni' no, nal lè'i kwib no par ne go, lè' go mile' naya' lo Dios; per bin go kure', lè' zhè mizhin la gak rē men, men che'n Dios, per go nagakt goi." ¹² Kuze' kinin lo go, or gab Dios xmod gak kun kad men yizhyuo, más zakzi rē men yezh re', ke rē men yezh Sodoma.

Rē yezh kwa'n nzho rē men xa' gat ñilat Jesukrist

(Mt. 11:20-24)

¹³ No nu nzhab Jesús:

—¡Zhe'b nalats nzha go, men yezh Corazín, kun rē men yezh Betsaida! Dox mile' Dios kwa'n nazhon xid go, ¡per yent kwan ngazu'i par go! No chi rē men yezh Tiro kun rē men yezh Sidón ngane rē yalnazhon ba', orze' lè' bixa' ngayila Dios, no ngak bixa' lar nagats, no ngazob bixa' le'n kubde, par lu' bixa', lè' bixa' nizi, nzè'b xki bixa' lo Dios. ¹⁴ Kuze', or gab Dios xmod gak kun kad men yizhyuo, más zakzi Dios go, ke rē men yezh Tiro kun yezh Sidón. ¹⁵ No rē go, men yezh Capernaúm, ¿chi nile' go xigab, bi go lo yibè' plo nzho Dios? Per nabit go, sino ke, ¡lè' go bi le'n gabil!

¹⁶ Orze' nzhab Jesús lo rē men che'n Me:

—Rē xa' yila kwa'n di'zh go, orze' na ngwayila xa'; mbaino xa' nangayilat kwa'n di'zh go, orze' na nangayilat xa'; no xa' nangayilat da, orze' nangayilat xa' Xuza, Me kwa'n mixè'l da.

Or nguiubre za chon gal nzho chi' men

¹⁷ No za chon gal nzho chi' xa' kwa'n mixè'l Jesús, nguiubre bixa', nizak laxto' bixa', nzhab bixa':

—Señor, haxta rē mbi mal nzhon ro' no, or nize't no lè go.

¹⁸ Orze' nzhab Jesús lo bixa':

—Walikai, porke na une lè' Mizhab ngob lo yibè', nela tu do'zi' ga'. ¹⁹ Biwi' go, na mine' kwa'n ka' go par le' go mandad lo rē mbi mal, kwa'n nak nela mbè'l nayi' ga' mbaino nela nixguy nayi' ga', nes par le' go, che'ptsa (bi'ch laka) gak Mizhab lo go, mbaino yent kwa'n zak go. ²⁰ Per nazakt laxto' go por nzhon mbi mal ro' go; más wen bizak laxto' go, lè' lè go nzobni' la lo yibè'.

Nizak laxto' Jesús

(Mt. 11:25-27; 13:16-17)

²¹ Orze' mile' Sprit che'n Dios, dox nizak laxto' Jesús, orze' nzhab Me:

—Payè', dox nazhonal, Lu Me nile' mandad lo yibè' no lo yizhyuo, porke nguluka'chal rē kure' lo rē men natsin, no lo rē men nzhak; mbaino milu'le lo rē xa' nak nela mè'd ga'. Sa' mile'l Payè', porke sa' nguiob laxto'l.

²² Orze' nzhab Jesús lo rē men nzhin ze':

—Lè' Xuza mine' rē nak kwa'n kinu Me kan. Mbaino yent cho nane cho Da, nab tsa Xuza nanei. No yent cho nane cho nak Xuza, nab tsa Da nanei, no nab tsa rē xa' nzhaklan lun, cho nak Xuza, lè' bixa' nei.

²³ Orze' mièk Jesús, no miwi' Me lo nab tsa rē men che'n Me, orze' nzhab Me:

—Wen nzha go, por milu' Dios lo go, rē nak kwa'n kiyak nal re', ²⁴ porke nin lo go, nayax rē profet, xa' midizh por Dios chi tiemp, kun rē xa' ngok rey; dox ngokla bixa' ngane bixa' kwa'n une go nal re', per nanganet bixa'i; no ngokla bixa' ngon bixa', kwa'n mbini go nal re', per nangont bixa'i.

Kwent che'n tu men Samaria

²⁵ Lè'chi nguzubi tu xa' nilu' ley lo Jesús, par zenbe' xa' Jesús (wi' xa' xmod nak Jesús), nabei chi walika nzhak Me, kuze' nzhab xa':

—Maestr, ¿xmod len par ban da dubta' lo Dios?

²⁶ Orze' nzhab Jesús:

—¿Kwan nzobni' lo ley, mbaino xmod nizobyekle?

²⁷ Orze' nzhab xa' nilu' ley ze':

—“Bichizhi' Dios che'nal, dub laxto'l, no kun dub lal, mbaino kun rē jwers che'nal, no kun rē xigab che'nal. No bichizhi' xtu men nela lu ka.”

²⁸ Orze' nzhab Jesús:

—Wenka kwa'n nel; chi lè'l le' kuba', lè'l ban lo Dios par dubta'.

²⁹ Per xa' nilu' ley ze', nzhakla namás par gab men, dox nzhak xa', kuze' nzhab xa':

—¿Cho xa' ñal chizhi' da, nela da ka?

³⁰ Orze' nzhab Jesús:

—Tu miyi' nguro' yezh Jerusalén par nzha xa' yezh Jericó, no nez nguro' pla wa'n lo xa', kwa'n milat rē che'n xa', haxta xab xa'; no ndin wa'n xa', orze' pe'n nak xa' mila' wa'n xa'. ³¹ Orze', lè'ska nez plo nax xa' re', nded tu ngulè'i, no or une ngulè'i miyi' miwe' re', maska nded nka'n ngulè'i, ña ngulè'i. ³² Se'ska xtu xa' kwa'n nzhaknu ngulè'i, or une xa', lè' miyi' re' naxbi, nu ska xa' maska nded nez xa', ña xa'. ³³ Per nded xtu xa' nez ze', tu xa' nzè' laz men Samaria. Or une xa', miyi' naxbi re', milats laxto' xa' miyi' re', ³⁴ orze' nguzubi xa' lo miyi' re', no mile' xa' rumed plo miwe' xa' re' kun aseit no kun bin; no michèl xa' lar plo miwe' xa' re', orze' mixo'b xa' miyi' re', tich ma che'n xa', par mbiy' xa' xa' re' tu plo ya'n xa'; ze' mikina xa' miyi' re'. ³⁵ No xtu riyè'l, ngulo' xa' kwa'n nile' tu men gan, che'n chop ngubizh lo zhi'n, miza' xa'i ka' xa' nak che'n yo' ze', orze' nzhab xa': “Bikina miyi' re', no chi lè'l le' gaxt más dimi por lè' xa', or yubren, kixne.”

³⁶ Orze' nzhab Jesús lo xa' nilu' ley re':

—No nal, di lo yon xa' re', ¿cho xa' kwa'n michizhi' xa' kwa'n undin wa'n ze', nela lè'ka xa'?

³⁷ Orze' nzhab xa' nilu' ley re':

—Xa' kwa'n milats laxto' men kwa'n ndin wa'n ze'i.

Orze' nzhab Jesús lo xa':

—Bizè, no sa' ska bile'.

Jesús ngwatsi' ma Mart, no ma Mari

³⁸ No or nzha Jesús nez kun rè men che'n Me, mizhin Me tu yezh win, ze' nibèz tu una' lè Mart, no ngurezh una' Jesús lizh una'. ³⁹ Mart kinu tu bèl lè Mari. Or mizhin Jesús, nguzubi Mari xan ni' Jesús par kiyon Mari kwa'n kidi'zh Jesús, ⁴⁰ per Mart dox ñen laxto' xa', kilè' xa' rè kwa'n ro' yarde, kuze' nguzubi Mart, nzhab Mart lo Jesús:

—Señor, ¿chi gat niwi'tal?, lè' bèla mila' nab da ro' yarde re'. ¿Guzh, gaknu una' da!

⁴¹ Orze' nzhab Jesús:

—¡Mart, Mart, dox ñen laxto'l, mbaino ña-ñè'dal por rè kwa'n kilè'! ⁴² Per nzho tutsa kwa'n más naki'n le'l, no Mari kilè' la kure', no yent cho kubchiy lo xa'.

11

Milu' Jesús xmod naki'n na'b men lo Dios
(Mt. 6:9-15; 7:7-11)

¹ No ngol tu zhè, nzo Jesús tu plo, kina'b Me lo Dios; no or milox guna'b Me, nzhab tu rè men che'n Me:

—Señor, bitse'd no par xmod na'b no lo Dios, nela xmod mitse'd Juan rè xpen Juan ga'.

² Orze' nzhab Jesús:

—Or na'b go lo Dios, se' guzh go: Xuz no, Me nzho lo yibè', dox nazhon lèl. Nzhaklan zhin zhè, le'l mandad lo yizhyuo re',

nela xmod nile'le lo yibè' ga'.

³ Bine' kwa'n gao no nalzhè.

⁴ Biche' rè kwa'n nzè'b xki no lol, porke nu ka no ña'l laxto' rè kwa'n gat lè' nile' men lo no.

No nala'tal wei' rè kwa'n no, rè kwa'n le', nzè'b xki no Lol,

sino ke gulo' no lo rè kwa'n gat lè'.

⁵ No nu nzhab Jesús:

—Gab be, tu go kinu tu xa' nichè'l go, no zhin xa' lizh go garol yè'l, mbaino ne xa' lo go: “Wech, le'l prext chon yèt kan; ⁶ porke nzè'b mizhin tu xa' nichèla lizha, mbaino yent kwa'n kinun par zhina lo xa'.” ⁷ No dizde le'n yo', lè' xa' ne lo go: “Nakixiantal da mbee'; lè' da mitsa'o la ro' yo', mbaino lè'da nax la kun rè xmè'da, nayaxcheta' nen kwa'n ka'l.” ⁸ Nin lo go, yaxchet xa' por nichè'l xa' kun go, sino ke lè' xa' yaxche no ne' xa' kwa'n naki'n go, par nalixolt ra' go xa'.

⁹ Kuze' nin lo go, sa' bina'b go kwa'n lo Dios, no lè' Dios ne'i; mbaino sa' bikwa'n

go kwa'n lo Dios, no lè' go yazhèle; no sa' ska gurezh go ro' yo', mbaino lè'i xa'l, par zhin kwa'n nzhakla go, ¹⁰ porke xa' nile' se' or nina'b xa' kwa'n lo Dios, lè' Dios za'i; no xa' nile' sa', or nikwa'n xa' tu kwa'n, lè' xa' yazhèle; mbaino xa' nile' sa' or kwezh xa' ro' yo', lè'i xa'l par zhin kwa'n nzhakla xa'.

¹¹ O, ¿chi nzho tu go kinu tu mè'd, chi ziye la go za' go tu ke gao mè'd, or nina'b mè'd tu yèt lo go? O, ¿chi ziza' go tu mbè'l, or nina'b mè'd tu mbèl gao mè'd lo go? ¹² O, ¿chi ziye laxto' go za' go tu nixguy or nina'b mè'd tu ngo, gao mè'd lo go? ¹³ No ter men nakap go, per nane go niza' go kwa'n wen, par xmè'd go; no ter nak go sa', ¡Dios nazolia'zht (le't Dios naya') or na'b go Sprit che'n Dios par yo laxto' go, por nded nazhi' Dios go!

Jesús no Beelzebú

(Mt. 12:22-30; Mr. 3:19-27)

¹⁴ Kigo' Jesús tu mbi mal, laxto' tu miyi' xa' mia'n mud por mbi re'. Or nguro'i, nguzublo midì'zh xa' re', no rè xa' une kure', xe mia'n bixa' tuli. ¹⁵ Per pla men nzhab:

—Lè' xa' ba' nigo' mbi mal laxto' men, por mandad che'n Beelzebú, xtu lè Mizhab, xa' kwa'n nile' mandad lo rè mbi mal.

¹⁶ Mbaino lè' más men, guna'b xa' lo Jesús, le' Me tu kwa'n nazhon, par ne bixa', nabeli, chi walika Dios mixè'l Jesús. ¹⁷ Per lè' Jesús nane la, kwan kilè' bixa' xigab, orze' nzhab Me:

—Rè lazh men plo nile' tu gobier mandad, no or gat nzhin bixa' wen, orze' zhin xtu ben xa' nzè xtu plo, lè' bixa' lo'x ze'; mbaino rè lizh men plo gat nzhin men wen, lè' bixa' lè'. ¹⁸ No se'ska, chi mis yub Mizhab, dil kun rè mbi mal che'n xa', orze', nagaktra' le' Mizhab rè kwa'n nile' xa'. Kuba' nin lo go, porke lè' go kidi'zh mbèl, ne go, lè'da nigo' mbi mal, por mandad che'n Beelzebú. ¹⁹ No chi lè' go ne, lè' da nile' mandad che'n Beelzebú, orze', lo mis go kidi'zh nu rè xpen go, nigo' mbi mal laxto' rè men, por mandad che'n Beelzebú. Kuze' mis rè xpen go ne kwan ñal go, por mbèl go. ²⁰ Per na nigo mbi mal laxto' rè men por mandad che'n Dios; kure'se nilu', lè' Dios mizhin la lo go par lat Me go lo Mizhab, ²¹ porke or nzho tu miyi' kwa'n dox naye, no kinu xa' yi'b par kina xa' lizh xa', orze' yent cho liwa'n rè kwa'n kinu xa'. ²² Per chi zhin xtu xa' más naye lo xa' re', no dil bixa'; xa' más naye ze' le' gan, lat rè yi'b kwa'n kinu xa' re' lizh xa', orze' xa' mile' gan ze', ki'z rè kwa'n ngulat xa' par ka' rè men che'n xa'.

²³ Kuze', xa' gat nzhaknu da, xa' ze' nidil kuda; mbaino xa' gat nidi'zh xtizha lo men, par gak men, men da, xa' ze' nichubla men lon.

Mbi mal kwa'n ñubre xtu wèlt plo nguro'
(Mt. 12:43-45)

²⁴ 'No or niro' tu mbi mal laxto' tu men, orze' nikizêi mont plo ni nits niyen, nikwa'ne plo kwêze; no or gat ñayazhêle plo kwêze, orze' nile'i xigab: "Lê'da yubre ska lizha plo nguro'n." ²⁵ No or nguubre mbi ze' laxto' men re', nak laxto' xa' nela le'n tu yo', nalo'b nambe ga', mbaino rê kwa'n le'ne nzhin chul, ²⁶ orze' ya mbi ze', yaka'i xtu gazh mbi más nakap, par yo rêi laxto' men re'; orze' lê' xa' re' gak más nakap, ke lê'la ngok xa' or galo.

Rê xa' walika nzha wen

²⁷ No or dub kidi'zh Jesús rê kure', lê'chi nguro' tu una' xid men, naye nguruzhiê una', nzhab una':

—jWen dox nzha una' kwa'n mizol yizhyuo re', xa' kwa'n mine' chich ngu'!

²⁸ Per nzhab Jesús:

—jMás wen nzha rê xa' nzhon widi'zh che'n Dios, mbaino nile' bixa' kwa'n nzhab Dios!

Rê men xa' minu la lo Dios kina'b, le' Jesús tu kwa'n nazhon

(Mt. 12:38-42; Mr. 8:12)

²⁹ No más men nzhagan plo nzo Jesús, orze' nguzublo kidi'zh Me, nzhab Me:

—Rê men nal re', minu la bixa' lo Dios, mbaino nzhakla bixa', ne bixa' tu kwa'n nazhon nile' Dios, per nab tsa kwa'n mile' Dios kun Jonás ne bixa',³⁰ porke nela kwa'n nguzak Jonás ga' une rê men yezh Nínive, ke lê' Dios mixê'l Jonás lo bixa', se'ska kwa'n zak da, na xa' nak Xga'n Dios mbaino nak da tu men yizhyuo, par ne rê men nal re', lê' Dios mixê'l da. ³¹ Or zhin zhê kwa'n gab Dios, xmod gak kun kad men yizhyuo, orze' tu una' xa' mile' mandad, lo rê xa' nguio plo ña'n lazh men, kwa'n nguzhin al nez al yêt, una' re' zo par gab una' kwan ñal rê men nal re'; porke dizde zit nguro' una', par ngwayon una' rê widi'zh che'n Salomón, porke Salomón ngok tu men dox nzhak. Per na kidi'zh lo go, no más tsak da lo Salomón. ³² No rê men yezh Nínive, nu bixa' zo zhê ze', par gab bixa' kwan ñal rê men nal re', porke men yezh Nínive mila' bixa' rê kwa'n nakap nak bixa' lo Dios, or mbin bixa' kwa'n mid'i'zh Jonás lo bixa', mbaino na, más tsak da lo Jonás.

Biani che'n men

(Mt. 5:15; 6:22-23)

³³ No nzhab Jesús:

—No yent cho tsinki tu biani, orze' zob xa'i tu plo naga'ch, o zob xa'i le'n tu kaj; sino ke lê' xa' zobe al ya, par ziniy lo rê xa' yo le'n yo' ze'. ³⁴ Lê' sprit che'n men nak nela tu biani ga' par dub men. No chi lê' sprit che'nal wen, dubal ñani orze'; per chi lê' sprit che'nal nzhakne, orze' dubal nzo lo nakao. ³⁵ Neo, napa' yal biani kwa'n kinu go

ba', orze' ya'n go lo nakao. ³⁶ Per chi dub le'n laxto'l nikê biani, orze' gahal nela tu biani ga' par ziniy lo más rê men.

Nzhab Jesús, zhe'b nalats nzha rê men fariseo, mbaino rê xa' nilu' ley

(Mt. 23:1-36; Mr. 12:38-40; Lc. 20:45-47)

³⁷ No or milox mid'i'zh Jesús rê kure', orze' ngurezh tu men fariseo Jesús par gao Me lizh xa'. Orze' ngwa Jesús. No or nguio Jesús le'n yo', nguzob Me lo mes. ³⁸ No men fariseo re', xe mia'n xa' tuli por nangale't Jesús rê kwa'n mila' rê me tiemp che'n men Israel, por nangazê't Jesús ya' Me or gao Me, ³⁹ per nzhab Jesús:

—Rê go men fariseo, nizêt go tich bas no tich plat, lê' laxto' go nzho rê xigab kwa'n niliwa'n go, no rê kwa'n gat lê' nak go. ⁴⁰ jNakao nak yek go! ¿Chi nanet go, Dios mizuxkwa' rê kwa'n al tich, mbaino nu ska rê kwa'n al le'n? ⁴¹ Más wen biza' go kwa'n kinu go, ka' rê men yent kwan kinu, nes ya'n nambe laxto' go lo Dios orze'.

⁴² jDox mal nzha go, men fariseo!, porke niyix go rê diezmo che'n menta, no che'n rrud, mbaino che'n rê nak kwa'n nayê', kwa'n nzha'n go; mbaino kun rê men gat nile't go kwa'n ñal, mbaino ni gat nazhi' go Dios mbaino ni rê men. Per kure' galo laka naki'n le' go, orze' le' go rê kuba'.

⁴³ jDox nazhe'b kwa'n zak go, men fariseo!, porke ño laxto' go, nizob go plo nizob men tsak, le'n yo' plo nitse'd men widi'zh che'n Dios, mbaino ño laxto' go, lo más men, zen men ya' go, kun rop lad ya' xa'.

⁴⁴ jDox nazhe'b kwa'n nzadkê tich go, rê go xa' nilu' ley, kun rê go men fariseo, chigab walika men wen go! Lê' go nak nela ba' che'n yinto' kwa'n mizhê' la, ter nilo men tiche.

⁴⁵ Orze' nzhab tu xa' kwa'n nilu' ley:

—Maestr, nu par yek no nzha kwa'n mid'i'zhal ba'.

⁴⁶ Orze' nzhab Jesús:

—jNu par go, xa' nilu' ley, nazhe'b mal nzha go!, porke nzhab go lo más men, wei' xa' kwa'n ne' dox, kwa'n naxekt men lo; no go, ni gat nikwin goi.

⁴⁷ jLê' go kixe!, porke nizuxkwa' go rê ke, nile' go par tsila men rê profet, xa' tiemp, rê xa' kwa'n mbit mis rê xuz go xa' tiemp. ⁴⁸ Kuba', nilu' tutsa nak go kun rê xuz go, xa' tiemp, por rê kwa'n mile' bixa'; lê' bixa' mbit rê profet, no mis go nizuxkwa' rê ke par nile' go nitsila men rê profet re'. ⁴⁹ Kuze', mid'i'zh Dios por rê kwa'n nane la Dios gak, nzhab Dios: "Lê'da xêl rê profet, no rê apost, par di'zh bixa' por Da, per pla rê xa' re' gut go, no zipla bixa' rukê go tich."

⁵⁰ Mbaino nu nzhab Jesús:

—Kuze' nal, lo rë go, Dios ne xmod gak kun go, por rë ren che'n rë profet, xa' ngut por Dios, dizde or mizuxkwa' Dios yizhyuo, ⁵¹ dizde ren che'n Abel no haxta ren che'n Zacarías, xa' ngut lo luwe plo nak biko' che'n Dios, nadedta' lë' Dios na'b ka kwent che'n rë xa' re', lo rë go.

⁵² 'Rë go xa' nilu' ley, jdox mal nzha go!, porke lë' go kinu la kwa'n xa'l go, plo nzho rë kwa'n nak che'n Dios, per naya' nile' go par yo go, mbaino nika go par yo xtu men.

⁵³ Or nguro' Jesús ze', rë men fariseo no rë xa' kwa'n nilu' ley, dox gat lë' mizi bixa', porke ngwaxo'b rë kwa'n nak bixa', orze' nguzublo kikixian bixa' Jesús, kinabdi'zh bixa' más kwa'n, ⁵⁴ par ngadi'zh Jesús tu kwa'n gat ñal, nes par ngaza' gab bixa' tu kwa'n nak Jesús.

12

Milu' Jesús xmod nak or mbël men

¹ No or migan nayax dox men, plo nzo Jesús, por mil bixa', haxta kigotip bixa' wech bixa', orze' nguzublo Jesús galo laka midizh Me lo rë men che'n Me, nzhab Me:

—Bikina go go lo rë men fariseo, napa' nu go ye'd xmod nak bixa'; porke nak bixa' chigab men walika nzhon ro' Dios, ² porke yent ni tu kwa'n naga'ch midizha lo go nagon men; mbaino yent ni tu kwa'n xla'n milun lo go naded nagon mene. ³ No rë nak kwa'n nidi'zh go lo nakao, zhë laka gon mene; no rë kwa'n nidi'zh go xla'n le'n yo', lë' xtu men kuzhyëi dizde yek yo' al ya.

Cho lo naki'n zheb men

(Mt. 10:28-31)

⁴ No nzhab Jesús:

—Kinin lo go, rë go xa' nichëla; nazhebt go ne go xa' nzhut men, porke nab tsa kuba' gak le' xa'. ⁵ Per na ni cho lo más ñal zheb go: Lo Dios bizheb go, porke lë' Dios, dispwés di gat men, Dios gak le' mandad, yo men le'n bël. Nab tsa lo Dios bizheb go.

⁶ 'Nane ka go, dox che'p tsak rë miyin ye'n or nido bine', per nikë ka laxto' Dios bine'. ⁷ No chi lë' Dios nikë laxto' miyin ye'n, zchi nanet go, más nazhi' Dios go?, porke haxta rë yich yek go nane Dios pla. Kuze' nazhebt go, porke lo rë miyin, go más tsak.

Xa' kwa'n nzhab lo rë men, nak xa' tu men che'n Jesukrist

(Mt. 10:32-33; 12:32; 10:19-20)

⁸ 'Kidizha lo rë go, xa' kwa'n xë'lro' lo rë men: “Na men che'n Jesús”, nu ska da, xa' nak Xga'n Dios nu nak da tu men yizhyuo, gapa lo rë ganj che'n Dios: “Lë' xa' ba' nak tu men da”, ⁹ per xa' naxë'lro' lo rë men, nak xa' tu men da, orze', nu ska da gap lo rë ganj che'n Dios: “Gat lë'ta' men da xa' ba'.”

¹⁰ 'No chi di'zh men tu kwa'n gat lë' por da, mbaino na nak Xga'n Dios nu nak da tu

men yizhyuo, per Dios che' kwa'n nzë'b xki xa' re' por kure'; per tu xa' di'zh kwa'n gat lë' por Sprit che'n Dios, nayotra' zhe' kwa'n nzë'b xki xa' por kure'.

¹¹ 'No or chi men go lo rë xa' kwa'n nile' mandad le'n rë yo' plo nitse'd men widizh che'n Dios, o lo rë xa' nak nela rey ga', o lo rë xa' nak nela gobernador ga', o lo rë gustis xa' más nile' mandad; per le't go xigab xmod kab go lo bixa', o kwan di'zh go lo bixa', ¹² porke or di'zh go lo bixa', lë' Sprit che'n Dios ne lo go xmod di'zh go lo bixa'.

Rik nazhab

¹³ No xid rë men nayax ze', nguro' tu xa' nzhab lo Jesús:

—Maestr, guzh lo wecha, ne' tlë' yuo kwa'n mila' xuzax par gal da.

¹⁴ Per nzhab Jesús:

—Lë' you, yent cho mizo da xid go, par kobe'n o par ki'za kwa'n xid go.

¹⁵ Nu nzhab Jesús:

—Bikina go go, nawixt go gap go más kwa'n di lo rë kwa'n naki'n go, lo yizhyuo re', porke gat lë'ta' ba' nzë yalnaban par men.

¹⁶ Orze' miza' Jesús kwent re' lo bixa', nzhab Me:

—Nguio tu men rrik, mbaino rë yuo che'n xa' nded miza'i, ¹⁷ orze' mile' xa' rrik re' xigab: “jNeta kwan len, porke gat kinuta' plo kuchau rë yalgo'n re!” ¹⁸ Guzhë la ze' mile' xa' xigab: “jNeka kwan len! Lë'da chil lizha par chau tu kwa'n más kwa'ro, par kuchau rë yalgo'n re', mbaino rë kwa'n kinun.” ¹⁹ Orze' mile' xa' xigab: “Nalse nzho kwa'n gauwax nayax li'n; xchë nakëtra' zhi'n; gau mbaino go'n, nazhon nzhan.” ²⁰ Per nzhab Dios lo xa': “jChi miao' yekal kwan kile'! Nanetal, nal yë'l re', lë'l gat, no rë kwa'n kinuchao'wal ba', zpar choi?” ²¹ Sa' nizak men nitsiyar yalrrik yizhyuo re', per lo Dios, yent kwan kinu xa'.

Dios nikina men che'n Me

(Mt. 6:25-34)

²² Orze' nzhab Jesús lo rë men che'n Me:

—Kuze' nin lo go, le't go xigab por kwa'n gao go par ban go, no ni por xab go kwa'n gak go, ²³ porke más tsak bid che'n go lo kwa'n gao go; no más tsak kwerp che'n go lo xab go. ²⁴ Biwi' go lo rë nga, gat nzha'nt ma mbaino gat nikanat ma yalgo'n, per lë' Dios niza' kwa'n nzha ma; mbaino go, jmás tsak go ke rë miyin! ²⁵ O, zcho tu go por dox nile' go xigab, gak ro'b go zigarol metr dimás? ²⁶ No chi ni tu kwa'n win nagakt le' go, orze', zchon nile' go xigab por rë kwa'n nagan, rë kwa'n nagakt le' go?

²⁷ 'Biwi' go xmod niro'b ye', nabe nilu'i nabé, nela tu men or nzhak xa' tu lar chul ga'; no nin lo go, ni rey Salomón, nanga-bet xa' nela xmod nabé nilu' tu ye' ga'.

28 No chi lè' Dios nile', chul nilu' rë ye' che'n rë yix dan, kwa'n nixek tutsa ngubizh, orze' nibizhe, orze' nikan mene par yêke, or nichao' bixa' pan par nzha bixa', pwes Dios más gak libe' go ke nela xmod nilu' tu ye' ga'. Çchon gat ñilat go be's, lè' Dios ne' kwa'n gak go? 29 Nin lo go, nale't go xigab por kwa'n gao go, no ni por kwa'n go go, 30 porke rë men yizhyuo, dox nile' bixa' xigab por rë kure'; per go kinu Xuz go, Me kwa'n nane la, lè' go naki'n rë kure'. 31 Mejoj bile' go xigab, kwa'n go, galo laka rë kwa'n nazhon che'n Dios, orze' Dios zilazh rë kwa'n naki'n go yizhyuo re'.

Xmod gap men kwa'n dox tsak lo yibé'
(Mt. 6:19-21)

32 'Rë go, xa' dox nazhi' da, nale't go be's xigab, porke lè' Xuz be Dios ne' rë kwa'n naki'n be. 33 Kuze' bito go rë kwa'n kinu go yizhyuo re', par za' goi ka' rë men gat kinui, nes par gap go yalnaza'k kwa'n nayot lox lo yibé', porke ba', yent cho liwa'ne, mbaino ni nagao mbêze, 34 porke plo kinu go kwa'n tsak, ze' nzo xigab chego.

Zo be list

35-36 'Guzo go list, nala't go yal biani che'n go, nela xmod nile' rë mos, xa' kimbëz yé'd miyi' xa' gak jwandang che'n, nes par or zhin xa' re', lwega' xa' rë mos ro' pwert. 37 Wen nzha rë mos xa' nzo list kikina, or yé'd xa' kwa'n nile' mandad bixa'. Walika nin lo go, lè' xa' le' zob rë mos lo mes, no mis xa' nile' mandad re', ki'z kwa'n gao rë xa' re' lo mes. 38 Wane'i, ter garol yé'l yé'd xa' re', o garzi'l lakai, per yazhél' xa' rë mos kikina ka bixa', orze' nazhon nzha rë mos re'. 39 Bin go kure': Chi tu xa' nak lizh tu yo', nzhon la cho or yo wa'n lizh xa', sigurka nala't xa' yo wa'n lizh xa'. 40 Nuska go, naki'n zo go list; porke na yal, or nale't go xigab.

Mos nzhon di'zh mbaino mos yent kwan nzhon

(Mt. 24:45-51)

41 Orze' minabdi'zh Per lo Jesús, nzhab xa':

—Señor, çchi nab par yek no nzha kuba', o nu par rë men nzhai?

42 Orze' nzhab Jesús:

—Mos nzhon di'zh mbaino natsin, xa' re' nizo xa' nile' mandad par kina lizh xa', mbaino rë che'n xa', no par za' mos re', kwa'n gao más tsa' mos xa', or nila'n rë xa' re'. 43 Wen nzha mos nzhon di'zh, or yé'd xa' nile' mandad, or ne xa' lè' mos re' kile' ka kwa'n nzhab xa'. 44 Walika kwa'n nin lo go, lè' xa' nile' mandad re', la' rë nak kwa'n kinu xa', par kina mos kwa'n nzhon di'zh re'. 45 Per chi lè' mos re' le' xigab: "Lè' xa' nile' mandad yé'd gaat xa' lizh xa'", orze' zubro kin xa' rë mos miyi' no rë mos una', no

gao dox xa' mbaino go xa'i haxta zuzh xa', 46 orze' lè' xa' nile' mandad re', yé'd or nale't mos re' xigab, orze' chix xa' mos re' tuli, nela nzhak kun rë mos xa' gat nzhon di'zh.

47 'No mos xa' nane la, kwan nzhakla xa' nile' mandad xa', per gat nile't xa' por le' xa'i, orze' dox kin xa' mos re', haxta plo nagakra'i; 48 per mos xa' nile' rë kwa'n gat ñal, sin nane mos, chi ñal zakzi mos por lè'i, por kuba' che'ptsak zakzi mos. Xa' kwa'n mila' Dios nayax kwa'n lo, pwes nayax ska kwa'n na'b Dios kwent lo xa' por kure'; mbaino xa' kwa'n mizo Dios par le' mandad, nu ska lo xa' na'b Dios kwent nayax kwa'n.

Jesús nile' nilé' men
(Mt. 10:34-36)

49 No nzhab Jesús:

—Na nzhal nela tu men kwa'n tsinki yizhyuo re'; ¡oj zinkigai nzhaklan! 50 Naki'n de'da lo tu kwa'n nazhe'b, mbaino dox trixt nizi da, haxta or lox de'da lo kwa'n nazhe'b re'. 51 Çchi nile' go xigab nzhal par len, kwín men wen yizhyuo re'? Per gat lè't sa'i; na nzhal par len lè' men, 52 porke re' par dilant, gai' xa' nzho le'n tu yo', lè' bixa' lè'; chon xa' dil kun chop xa', no chop xa' dil kun chon xa'. 53 Lè' xuz xa' kun xga'n xa', no lè' xga'n xa' kun xuz xa'; no lè' xna' xa' lè' kun xcha'p xa', no xcha'p xa' lè' kun xna' xa'; lè' xix xa' lè' kun xna'ye' xa', no lè' xna'ye' xa' lè' kun xix xa'.

Gat nizobyekt men kwa'n nile' Dios
(Mt. 16:1-4; Mr. 8:11-13)

54 Nu nzhab Jesús lo nayax men:

—Or ne go nzhakxao' xkao al ya, orze' nzhab go: "Lè' yiu la", mbaino nila ka yiu; 55 no or nzhakidan mbi dizde al yèt, orze' nzhab go: "Lè' nè'i' gak", no sa' ka nzhake. 56 ¡Tatu nazhe'b nak go, chigab walika men wen go! No chi lè' go nilibe' señ lo yibé' no lo yizhyuo; orze', çchon gat nizobyek go rë kwa'n nile' Dios nal re'?

Chul guzhin go kun rë xa' niyi' nine go
(Mt. 5:25-26)

57 'No, çchon naw'i mis go, kwan rë kwa'n ñal le' go? 58 Chi ne tu xa' nzhap go dol por tu kwa'n mile' go, no wei' xa' go lo gustis por kure', no dub nzha go lo gustis, bikwa'n go mod par tsiyal go laxto' xa', par nachi xa' go lo gustis, porke lè' gustis le' mandad yo go lizhyi'b; 59 porke sigur ka, nara't go lizhyi'b haxta ke kix go rë kwa'n nzé'b go.

13

Rë men naki'n la' mod nakap nak men

1 Orze' nguzubi pla men lo Jesús par nzhab xa': "Lè' Pilat mbit pla men Galilea, no migoch xa' ren che'n rë men re', kun ren che'n rë ma, kwa'n miza' rë men re' gon lo Dios." 2 Orze' nzhab Jesús:

—¿Kwan gab go nal? Ngut rē men ba' por más nzē'b xki bixa', lo más rē men lazh xa', men Galilea. ³ Per gat lē't sa'i. No chi lē' go nala' rē kwa'n nakap nak go lo Dios, lē' go lox ska. ⁴ ¿Kwan gab go?, or ngut dub chi'n bichon men, or nguuxche torr Siloé yek bixa', ¿gab go por más nzē'b xki bixa'i, lo más rē men yezh Jerusalén, por nguzak bixa' kuba? ⁵ Per gat lē't sa'i. No chi lē' go nala' xmod nak go lo Dios, lē' nu ska go lox.

Ya nzhao' kwa'n yent xlē lo

⁶ Orze' mid'i'zh Jesús kwent re' lo rē men, nzhab Me:

—Nguio tu miyi' kinu tu ya nzhao' xid rē ya gub che'n xa', no ngwatsi' xa' chi nzo xlē loi, per yent kwan ngaza'i. ⁷ Orze' nzhab xa' lo xa' nikina ya xlē che'n xa': "Biwi', nzha chon li'n, ñidkwana xlē lo ya re', no gat yazhēl da ni tu xlē loi. Más wen bicho'i, porke yent por kwan nzobe lo yuo re'." ⁸ Orze' nzhab xa' nikina ya xlē re': "Señor, bila' nzobe nal li'n re', lē'da tsiyēch yuo xane, no kon bone, ⁹ par ne be chi ziza'i xlē. No chi naza'i, orze' ro'ge."

Miliwen Jesús tu una', zhē nile' men diskans

¹⁰ Ngol tu ngubizh, kwa'n nile' men Israel diskans, lē' Jesús kilu' widi'zh che'n Dios le'n yo' plo nitse'd bixa' widi'zh che'n Dios. ¹¹ No ze' nzo tu una' kwa'n nzhakne nzhala chi'n bichon li'n, nzho tu mbi mal laxto' xa', no nile'i bech xa', gakt li xa'. ¹² Or une Jesús una' re', ngurezh Jesús una', nzhab Me:

—Una', lē'l miak la lo yalyizh che'nal.

¹³ No mixo'b Me ya' Me tich una', orze' lwega' mili una', no nguzublo kidi'zh una' nazhon Dios. ¹⁴ Per xa' nile' mandad le'n yo' ze', niyi' xa' por miliwen Jesús una' re', zhē kwa'n nayi' kē men Israel zhi'n, orze' nzhab xa' nile' mandad lo rē men nzhin ze':

—Nzho xo'p ngubizh kwa'n kē men zhi'n, nab tsa rē ngubizh re' ñal yi'd go par gak wen go; yi'dt go zhē re'.

¹⁵ Orze' nzhab Jesús lo xa' re':

—iTatu nazhe'b nak go, chigab walika men wen go! ¿Chi gat nixēkt go ngo'n che'n go, o burr che'n go zhē nile' men diskans, par za' go nits go ma?, ¹⁶ porke una' re' n'zē ben che'n Abraham, per lē' Mizhab mile' ngokne una' chi'n bichon li'n; no nal, ¿chi nayi' ngok wen una' re', zhē kwa'n nayi' kē men Israel zhi'n?

¹⁷ No or nzhab Jesús rē kure', rē xa' nile' mandad kwa'n nikwa'n dil kun Jesús, mit-ula bixa', per más men mizak laxto' or une bixa', rē kwa'n nazhon nile' Jesús.

Kwent che'n tu lazh win mostás
(Mt. 13:31-32; Mr. 4:30-32)

¹⁸ Orze' nzhab Jesús:

—¿Kwan tu kwa'n nak nela xmod nile' Dios mandad lo rē men che'n Me, no kun kwan chē'l bei? ¹⁹ Nake nela tu lazh win mostás ga', kwa'n mixē'n tu miyi', lo yuo plo kinu xa' rē ya xlē che'n xa', no miro'be, no ngoke tu ya ro, haxta miyin michao' yo rram che'ne.

Kwent che'n levadur
(Mt. 13:33)

²⁰ Nu nzhab Jesús:

—¿Kwan xtu kwa'n nak nela xmod nile' Dios mandad lo rē men che'n Me? ²¹ Nake nela levadur kwa'n nguzen tu una', no migoch una'i, le'n gal biga'i kil harín kwa'n mitsibeche rē harín re'.

Pwert nayaa
(Mt. 7:13-14, 21-23)

²² Or nzha Jesús nez Jerusalén, kilu' Me widi'zh che'n Dios le'n rē yezh, no rē rranch plo nzhaded Me, ²³ no nguro' tu men minabdi'zh lo Jesús, nzhab xa':

—Señor, ¿chi che'p tsa men ro' lo rē kwa'n nazhe'b kwa'n nzadkē tich bixa'?

Orze' nzhab Jesús:

²⁴—Dox pe'n le' men gan, yo men plo nile' Dios mandad. Nake nela or nided men ro' tu pwert dox nayaa ga'. Bile' go jwers, yo go ro' pwert re', porke nin lo go, nayax men gakla yo ro' pwert re', per che'p tsa men yo.

²⁵ No lult, lē' xa' nak che'n yo' kwa'n kinu pwert nayaa re', yaxche tsao' ro' yo', no rē go ya'n al tich, orze' kwezh go ro' yo', gab go: "Señor, bixa'l go ro' yo'", per lē' xa' ne lo go orze': "Yent cho nzhak da go." ²⁶ Orze' gab go lo xa': "iPer nzho ka cho nzhak no go! Lē' be tutsa ndao, mbaino tutsa ngu' be, no go milu' widi'zh che'n go lo no, le'n rē nez che'n lazh be." ²⁷ Orze' ne xa' lo go: "Lē'da ni la, yent cho nzhak da go; i'rē go xa' nile' kwa'n gat lē', chi go lon!" ²⁸ Ze' go'n go, no dao' ley go or ne go Abraham, Isaac, Jakob, no rē profet xa' mid'i'zh por Dios chi tiemp, nzho bixa' plo nile' Dios mandad, no lē' go nzhin al tich, ²⁹ porke lē' rē lad yizhyuo, yi'd men, par zob xa' lo mes, plo nile' Dios mandad par gao bixa'. ³⁰ No biwi' go, nzho xa' nile' go xigab, más tsak nal re', per más dispwés, xa' ze' gak xa' menes tsak; no xa' nile' go xigab menes tsak nal re', xa' ze' gak xa' más tsak dispwés.

Mbi'n Jesús por yezh Jerusalén
(Mt. 23:37-39)

³¹ No mis zhē ze', mizhin pla men fariseo, nzhab lo Jesús:

—Chi, bizē laba'; porke lē' Herodes nzhakla gutil.

³² Orze' nzhab Jesús:

—Wa go wayab go lo xa' nizi dox ya ba', se' ne Jesús: "Biwi', nalzhē, no yē', kubchin mbi mal laxto' rē men, no liwena rē men nzhakne; no ngubizh yon loxa rē zhi'n da."

³³ No ter sa' nile' Herodes xigab kun na, per lè'da naki'n ka ya nez da dub nalzhè re', no yè' mbaino wizh par len rè kwa'n naki'n len; porke nagatta' da ni xtu rè plo, nab tsa Jerusalén naki'n gat da, porke nab tsa ba', nzhut men rè xa' kwa'n nixè'l Dios par nidi'zh widi'zh che'n Me.

³⁴ 'iMen Jerusalén, men Jerusalén, go kwa'n nzhut rè profet, no nigo ke go rè men kwa'n nixè'l Dios lo go! 'iNayax wèlt ngoklan ngazhina junt rè go, nela nguid niye'zh rè xmè'd le'n xi'l ga', per nangazyèlt go! ³⁵ Per biwi' go, lè' yado' che'n go ya'n nzè'b, mbaino zit ya'n go di lo Dios; no nanetra' go da más, haxta zhín zhè kwa'n gab go: "iWen nzha xa' kwa'n mixè'l Señor!"

14

Miliwen Jesús tu men ngwazhè di ki

¹ No ngol tu zhè kwa'n nayi' kè men Israel zhi'n, ngwatao Jesús lizh tu men fariseo, xa' nile' mandad, no rè men zhín ze' kila'ch bixa', nabei kwan le' Jesús. ² Se' kile' bixa' porke lo Jesús nzo tu miyi' nzhakne, ngwazhè di ki. ³ Orze' minabdi'zh Jesús lo rè xa' nilu' ley, no lè' rè men fariseo kwa'n nzhín ze', nzhab Jesús:

—¿Chi zak liwena tu men nzhakne, zhè kwa'n nayi' kè men Israel zhi'n, o nagakte'?

⁴ Per yent kwan ngakab bixa'. Orze' nguzen Jesús ya' xa' re', mbaino miliwen Jesús xa', orze' nzhab Me lo xa': "Bizè lizhal." ⁵ Mbaino lo rè men fariseo ze' nzhab Jesús:

—No chi tu go kinu tu xin, o tu ngo'n, no chi ngula ma le'n zo, ter zhè kwa'n nayi' kè men Israel zhi'n, orze', ¿chi nako't go ma wegwa'?

⁶ Orze' yent kwan ngakab bixa' lo Jesús.

Rè xa' nzha jwandang

⁷ No or une Jesús, rè xa' kwa'n ngwane xa' lo par nzè jwandang, or nizhín bixa', nibe bixa' plo nizob pura xa' ro par zob bixa', orze' nzhab Jesús:

⁸ —Or kwezh tu men go ya go tu jwandang, nazobt go plo nizob rè men xa' ro, nzha ska zhín xtu xa' más tsak lo go, ⁹ no xa' ngurezhu go re' zubi lo go par ne xa': "Watso par zob xa' re'", no orze' lè' go tula, mbaino haxta tras zob go. ¹⁰ Más wen haxta tras zob go or kwezh men go, orze' lè' xa' ngurezhu go ne lo go: "Guded lare' weech, le' ñal zobal", orze' rè men xa' nzobal kun lè' lo mes, lè' bixa' le' kasal, ¹¹ porke xa' kwa'n nzhakla le' men kas, per ni nawi' men lo xa'; mbaino xa' kwan' gat nizi ya, lè' men le' kas xa'.

¹² Orze', nzhab Jesús lo xa' kwa'n ñanu Jesús lizh xa':

—Or za'l tu kwa'n gao men, nakwezhtal xa' nichè'lal, ni wechal, ni melizhal, ni tu men rriik; porke lè' rè xa' re', se'ska le' bixa'

kun lu, par kix bixa'i lol. ¹³ Mejor or za'l tu kwa'n gao men, gurezhu rè xa' prob, rè xa' ma'nk, no rè xa' ne ni', mbaino rè xa' nikal lo, ¹⁴ par yal wen; porke rè xa' re', nagakt kixe lol; per Dios ne' tu kwa'n ka'l or ruban rè men xa' nile' kwa'n nzhakla Dios.

Kwent che'n tu xche' ro

¹⁵ Or mbin tu rè xa' kwa'n nzob lo mes ze' kure', orze' nzhab xa' lo Jesús:

—iNazhon nzha rè xa' gao plo nile' Dios mandad!

¹⁶ Orze' nzhab Jesús:

—Nguio tu miyi' miza' tu xche' ro gao rè men, orze' mile' xa' mandad yi'd nayax men. ¹⁷ Or ngol or gao bixa', mixè'l xa' nile' mandad ze' tu mos che'n xa', par nzhab xa' lo rè men xa' nak di'zh yi'd: "Dè' go nal, porke lè' ye'n ya nzhín la." ¹⁸ Per rè bixa' tutsa mia'nkè bixa' di'zh. Xa' galo nzhab: "Milox nguzin tlè' yuo, lè'da nzha za wèlt loi. Le' dispense, nagakt yala." ¹⁹ No xtu xa' nzhab: "Lè'da nguzi' gai' nez ngo'n, lè'da nzhale' preb ma; le' dispense, nagakt yala." ²⁰ No lè' xtu xa' nzhab: "Lè' jwandang da laore ngok laka; kuze' nagakt yala." ²¹ No or mièk mos ze', nzhab xa' rè kure' lo xa' za' kwa'n gao men re'. Orze' dox niyi'xian xa', no nzhab xa' lo mos ze': "Le' purad, le'n rè nez ro che'n yezh re', no rè bered, par waka' rè men xa' prob, no rè xa' ma'nk, mbaino rè xa' nikal lo, no rè xa' ko'j." ²² Guzhèl la ze' nzhab mos: "Señor, lè'da mile la kwa'n mile'l mandad, per stubi nzho lugar." ²³ Orze' nzhab xa' nile' mandad re': "Wa le'n rè nez, mbaino wa ro' rè yalo, no jwers guzh yi'd rè men, par yazhè lizha. ²⁴ Kuze' nin lo go, ni tu rè xa' kwa'n ngurezha galo ba', gaoxche't lizha."

Xmod nak tu men walika men che'n Jesukrist

²⁵ No dox nayax men nzhakè tich Jesús, orze' mièk Me, miwi' Me lo bixa', nzhab Me:

²⁶ —Chi nzho tu go nzadkè ticha, no más nile' go por xuz go, o por xna' go, o por tsa' go, o por xmè'd go, o por wech go, o por bizan go, o nile' go más por rè kwa'n nile' go xigab; no chi más nazhi' go rè kuba' lon, orze' nagakt gak go tu men da. ²⁷ Mbaino nu chi tu go nzadkè ticha, no nizheb go zakzi go o gat go por nak go men da; no chi sa' nak go, pwes nagakt gak go men da. ²⁸ O chi nzho tu go nile' xigab kuxkwa' go tu yo' nayax pis, ¿gat galo laka zob go par le' go xigab, plak dimi gal par yaloi?, ²⁹ porke chi zob go nab tsa simient che'ne, nalo'xt go kuxkwa' goi, orze' lè' rè men xizhnu go, ³⁰ gab bixa': "Biwi', nangakt ngalo'x xa' ngazuxkwa' xa' lizh xa'." ³¹ O chi tu rey nzhakla dil kun xtu rey, ¿gat galo laka naki'n le' xa' xigab, chi zixek chi' mil sondad che'n xa' lo gal mil sondad che'n xtu rey xa' nidil xa'? ³² No chi

niwi' xa' naxekt xpen xa', orze' antis di ke yi'd xtu rey par dil xa', lè' xa' xè'l abis par kwèz dil. ³³ Se'ska, chi nzho tu go xa' nak men da, per más nazhi' go rë kwa'n lon, rë kwa'n kinu go ba', pwes nagakt gak go men da.

Or gat nazhi'ra' zed

(Mt. 5:13; Mr. 9:50)

³⁴ Nu nzhab Jesús:

—Wen zed, per chi gat nazhi'ra'i, ¿xmod dao'we zed? ³⁵ Nazu'tra'i ni par yuo, no ni par bon. Orze' mejor re'che. Chi lè' go mbin kure', bizobyek goi.

15

Kwent che'n tu mbèkxi'l nguziwan

(Mt. 18:10-14)

¹ Rë men xa' nikan dimi che'n rey, no rë men xa' kwa'n nzho'b xti'zh más nzè'b xki lo Dios, nguzubi bixa' lo Jesús par gon bixa' kwa'n kidi'zh Jesús. ² Kuze' rë men fariseo no rë xa' nilu' ley, dox nakap kidi'zh bixa' tich Jesús, nzhab bixa':

—Lè' xa' re' nichè'l kun rë men xa' más nzè'b xki lo Dios, mbaino nu nzhao xa' kun rë men re'.

³ Kuze' midi'zh Jesús kwent re' lo bixa', nzhab Me:

⁴ —Chi nzho tu go kinu tu gayo' mbèkxi'l, no or ziwan tu ma, ¿chi nala't go dub tap gal nzho chi'n bitap ma re' dan, par yakwa'n go ma nguziwan re', haxta ke yazhèl go ma? ⁵ No or yazhèl go ma, nizak laxto' go, yi'dnu go ma yèn go; ⁶ no or zhin go lizh go, kan go rë xa' nichè'l go, no rë xa' nzho go gax kun lè', no gab go lo bixa': “Bizak laxto' go kuna; porke lè'da ngwazhèl la mbèkxi'l da ma nguziwan ze'.” ⁷ Nin lo go, se'ska más nzho yalnizak laxto' lo yibè', or nizi tu men xmod nak xa' lo Dios, par ban xa' nela xmod nzhakla Dios, ke por dub tap gal nzho chi'n bitap men xa' nizi, yent kwan nak, nambe laxto' lo Dios.

Kwent che'n tu dimi miziwan

⁸ Se'ga' tu una' kwa'n kinu chi' pes kwa'n plat, no miziwan tube, orze', ¿chi nakè't xa' tu biani, no lo'b xa' dub le'n yo', par kwa'n xa'i nambe, haxta ke yazhèl xa'i? ⁹ No or yazhèl xa'i, kan xa' rë xa' nichè'l xa', no rë xa' nzho gax plo nzho xa', gab xa': “Bizak laxto' go kun na, porke lè'da ngwazhèl la dimi da, kwa'n nguziwan ze'.” ¹⁰ Nin lo go, se'ga' nizak laxto' rë ganj che'n Dios, or nizi tu men xmod nak xa' lo Dios, par ban xa' nela xmod nzhakla Dios.

Kwent che'n tu miyi' naya'lazh lo xuz

¹¹ No nu midi'zh Jesús kwent re' lo rë men, nzhab Me:

—Nguio tu miyi', kinu chop xga'n, ¹² miyi' más win nzhab lo xuz: “Lè'o Pa, nzhaklan

ne'u kwa'n gal da.” Orze' ndi'z xuz bimiyi' kwa'n ñal kad bixa'. ¹³ No xche'p dispwés, miyi' win re', mikan rë nak kwa'n nak che'n, orze' nzha xa' zit xtu lazhen. Ze' mile' xa' gaxt rë nak che'n xa' lo rë kwa'n gat lè', miban xa' nela xmod nzhakla xa'. ¹⁴ Or milo'x la xa' rë che'n xa', no plo nzho xa' nguio tu yalwin dox, orze' nguzublo ngok jwalt kwa'n lo xa'. ¹⁵ Orze' mikwa'n xa' zhi'n lo tu men yezh ze', xa' ze' mixè'l xa' plo nax yuo che'n xa' re', par za' xa' kwa'n gao kuch. ¹⁶ No por tanta nila'n xa', nzhakla xa' ngao xa' kwa'n ro' kuch, porke yent cho za' kwa'n gao xa'. ¹⁷ Lult mile' xa' xigab: “¿Dox nayax mos kinu xuz, no di sobr nzho kwa'n gao bixa', mbaino na, gat da di yalwin re'! ¹⁸ Neka lè'da yèk lo xuz, gapa lo xa': Payè', milen kwa'n gat lè' lo Dios mbaino lo go. ¹⁹ Nal gat ñalt ro'lè da xga'n go; biwi' go lon nela lo tu mos che'n go.” ²⁰ Orze' nguzen miyi' nez, ñè'd miyi' par lo xuz miyi'.

‘No jwaltra' di zhin miyi' lo xuz miyi', lè' xa' une la miyi'. Orze' milats laxto' xa' miyi', karre ngwachè'lo xa' xga'n xa', nde'x xa' yèn miyi', no michiro' xa' ta' kwats miyi'. ²¹ Orze' nzhab miyi' lo xuz miyi': “Payè', milen kwa'n gat lè' lo Dios, mbaino lo go, gat ñaltra' da ro'lè da xin go.” ²² Per nzhab xuz miyi' lo rë mos xa' nguzi' xa': “Karre waka' go lar más kwa'n wen, no bigak goi xga'na re', no ngulo go yani ya' xa', no bikè' go kwa'n ni' xa', ²³ no waka' go bicerr kwa'n más nacha', no bit go ma par gao be, no le' be lani, ²⁴ porke lè' xga'na re', milen xigab ngut la xa', no nal, nguiubre xa' naban xa'; miziwan xa', per nal ngwazhèl xa'.” Orze' mile' bixa' lani.

²⁵ Per xga'n galo xa' re' nzo dan, no or ñè'd xa' par lizh xa', mbin xa' kiyo'l musk, no kiyolni' men, ²⁶ orze' ngurezh miyi' re' tu mos, par minabdi'zh xa': “¿Kwan kile' rë men ba'?” ²⁷ Orze' nzhab mos: “Lè' wechal mièk, no lè' xuzal mile' mandad ngut bicerr más nacha', porke lè' wechal nguiubre wen, mbaino yent kwa'n nizak xa'.” ²⁸ Per maska miyi' re' ngazak laxto', lè'la niyi' miyi' re', net xa' ngayo xa' le'n yo'. Orze' nguro' xuz miyi', par mila xa' yek miyi' ngayo miyi' le'n yo', ²⁹ per nzhab miyi' lo xuz miyi': “Biwi', pla li'n nzha nikèn zhi'n lol, no dubta' nzhona kwa'n nel, no per ni tu chib ye'n gat ne'l par gau kun rë xa' nichèla, ³⁰ per lè' xga'nal mbée' nguiubre re', mile' gaxt rë kwa'n miza'l ka' xa', lo rë una' le'n kai (kwa' gal), jno nal mile'l mandad, ngut bicerr kwa'n más nacha'!” ³¹ Orze' nzhab xuz miyi': “Xga'na, lu dubta' nzol kun na; no rë kwa'n kinun, che'nle. ³² Per nalre', ñal ngok lani, nizak laxto' be, porke lè' wechal re' ngut, per nguruban xa'; miziwan xa', per nal, ngwazhèl xa'.”

16

Kwent che'n tu mos xa' nile' mandad

¹ No midi'zh Jesús kure' lo rë men che'n Me:

—Nguio tu miyi' rrik, kinu xa' tu xa' nikina rë che'n xa', no ngwayab zipla mos che'n miyi' re': "Xa' nikina rë che'nal ba', gat lë't kile' xa'." ² Orze' ngurezh xa' rrik re' miyi' re' par nzhab xa': "¿Chi wali gat lë't kile'l kun rë cheda? Bite'd kwent rë kwa'n kile'l, porke nakinatra'l rë cheda." ³ Orze' mile' xa' nikina re' xigab: "¿Xmod len nal, lë' xa' nile' mandad da re' milat zhi'n lon? No naxekt da ga'na yuo, no nitulan na'ba karida." ⁴ ¡Ah! Ne ka kwan len, par kwezh men da lizh xa', or niyenra' zhi'n kën." ⁵ Orze' ngurezh xa' nikina re', tuga' rë xa' nzë'b lo xa' nile' mandad xa'; nzhab xa' lo xa' galo laka mizhin: "¿Plak nzë'bal lo xa' nile' mandad da?" ⁶ Orze' nzhab xa' re': "Lë'da nzë'b tu gayo' barril aseit." Orze' nzhab xa' nikina re': "Lë' yech kwa'n nzë'bal re', karre nguzob, bizuxkwa' xtu yech, bizob cho' bichi' tsa barril aseit nzë'bal." ⁷ Orze' nzhab xa' lo xtu xa' nzë'b: "Lu ga', ¿plak nzë'bal?" Orze' nzhab xa' ze': "Tu gayo' dabed triu." Orze' nzhab xa' nikina re': "Lë' yech kwa'n nzë'bal re', bizuxkwa' xtu yech, bizob tap galtsa dabed loi." ⁸ No or une xa' rrik re', lë' mos xa' gat nite'd kwent kumplet re', dox natsin por xmod mile' xa', orze' nzhab xa' rrik re' lo mos re': "Dox natsinal."

Kuze' nzhab Jesús:

—Porke rë men yizhyuo re', nzho xa' más natsin lo rë kwa'n nile' xa' kun rë men, ke xmod nile' rë men xa' nidi'zh, nilibe' Dios.

⁹ No nin lo go, bikwa'n go xmod chë'l go kun rë men yent kwan nzhap, kun yalrrik kwa'n gat lë' kwa'n nzho yizhyuo re'. No or lox yalrrik lo go, lë' Dios wei' go plo yo go par dubta'.

¹⁰ No men xa' nile' wen lo tu kwa'n che'p, pwes nu ska lo kwa'n nayax nile' xa' wen; mbaino xa' nile' kwa'n gat lë' lo tu kwa'n che'p, nu ska lo kwa'n nayax le' xa' kwa'n gat lë'. ¹¹ No, chi nile' go kwa'n gat lë' lo rë kwan tsak lo yizhyuo re', orze', nagabt go, lë' Dios la' yalrrik kwa'n nidi' par dubta' par kina go. ¹² No chi gat nile' go xmod ñal kun rë kwa'n nak che'n xtu men, orze', ¿xmod zhin rë kwa'n nak che'n go?

¹³ Yent cho tu mos gak kë zhi'n lo chop xa' nile' mandad xa', porke tu xa' re' yi' mos ne mos, no lë' xtu xa' chizhi' mos; o ro' tu rë xa' re' gon mos, no lo xtu xa' le' mos naya'. Kuze' nagakt chizhi' men Dios no orze' chizhi' men dimi nela tu dios ga'.

¹⁴ Orze' mixizhnu rë men fariseo Jesús, porke dox nazhi' bixa' dimi, ¹⁵ orze' nzhab Jesús lo bixa':

—Mis go nidi'zh wen go lo rë men; per lë' Dios nane ka xmod nak laxto' go; porke rë kwa'n zak men dox tsak, per par Dios nikap laxto' Diose.

Ley che'n Muisés mbaino plo nile' Dios mandad

¹⁶ No nzhab Jesús:

—Haxta zhë che'n Juan, une naki'n mile' men kwa'n nzhab ley mbaino rë widi'zh kwa'n midi'zh rë profet. Dizde orze', nzhon men xmod yo men plo nile' Dios mandad, no jwers nile' men par yo men ze', ¹⁷ per más jwals lox yibë' no yizhyuo ke par ded tu rë kwa'n nzobni' lo ley; sino ke rëi gak.

Jesús milu' kwan nzhak or nile' tu men kun tsa' xa'

(Mt. 19:1-12; Mr. 10:1-12)

¹⁸ No chi tu miyi' lë' kun una' che'n xa', no ban xa' kun xtu una', orze' nzë'b xki miyi' re' lo Dios por lë'i; mbaino miyi' kwa'n ban kun una' kwa'n milë' kun xmiyi' re', nzë'b xki ska xa' re', por kure'.

Rik no Lásaro

¹⁹ Nguio tu men rrik, dox nabe xa', no pura lar wen nzhak xa'; no zilita' nile' xa' lani, no dox kwa'n kar nizi' xa' par nile' xa' lani. ²⁰ No nguio tu men prob, xa' lë Lásaro, dub kwerp che'n xa' nzhaz lai; mbaino ro' pwert che'n rrik re' ñanu men xa' par nizob xa' ze'. ²¹ No haxta rë kwa'n nzhab xan mes che'n rrik niwix xa' gao xa', no rë mbëk nizubi mizup ta' xa' re'. ²² Per ngol tu ngubizh, ngut Lásaro, no mbiy' rë ganj che'n Dios Lásaro plo nzho Abraham; mbaino nu ska rrik ngut no miga'ch xa'. ²³ No dizde le'n gabil plo nzho rrik, naxektra' xa' di yalne; no ngulits xa' lo xa' dizde zit une xa' Abraham no Lásaro nzo kun Abraham. ²⁴ Orze' nguruzhië rrik: "¡Xuzza Abraham!, bilats laxto' da, bixë'l Lásaro par gazh xa' yek bikwen ya' xa' kun nits, par gazh luzha, porke naxektra' da le'n bël re'." ²⁵ Per nzhab Abraham: "Xga'na, bitsila dox wen mibanal, no lë' Lásaro dox nalats miban; no nal, milox yalnalats kwa'n une xa', per lu kine kwa'n nazhe'b nal. ²⁶ Mbaino nu ska garol tsao' plo nzo go, no plo nzo no, nided tu barrank kwa'n yent cho nane plak na'ch. Kuze', rë xa' kwa'n nzho re', nagakt yi'd xa' ba', no ni rë xa' kwa'n nzho ba', nagakt yi'd xa' re'." ²⁷ Orze' nzhab rrik: "Kina'ba lol xuzza Abraham, xë'lal Lásaro lizh xuzza, ²⁸ plo kinun gai' wecha, nes par nayi'd bixa' plo nazhe'b nizakzi men re'." ²⁹ Per nzhab Abraham: "Lë' bixa' kinu ka ley kwa'n mila' Dios lo Muisés, no rë kwa'n midi'zh rë profet; rë kuba' ñal gon bixa'." ³⁰ Orze' nzhab rrik: "Nagont bixa' ro' rë xa' ba', xuzza Abraham; naki'n ruban tu xa', par yayab rë kure' lo rë wecha, par la' bixa' rë

kwa'n gat lè' nak bixa', mbaino ban bixa' nela xmod nzhakla Dios." ³¹ Per nzhab Abraham: "Per chi gat ñila bixa' rë widi'zh che'n Muisés, no rë widi'zh che'n rë profet, rë xa' kwa'n midi'zh por Dios, nayot yila bixa'i, ter tu men ngut ruban, yadi'zhe lo bixa'."

17

Milu' Jesús lo rë men che'n Me xmod ñal ban bixa'

(Mt. 18:6-7, 21-22; Mr. 9:42)

¹ No nu nzhab Jesús lo rë men che'n Me:
—Nagakt ka'n men lo kwa'n nile' nzë'b xki men lo Dios, per dox nazhe'b nza men xa' le', nzë'b xki xtu men lo Dios. ² Mejr wei' Dios xa' re' tuli, ke par le' xa', nzë'b xki xtu men lo Dios, tu xa' laore ngwayila Dios. ³ Kuze', biwi' go, chi tu wech go le' tu kwa'n gat lè' lo go, guzh go lo xa' nale'tra' xa'i; no chi mbin xa'i, orze' biya'l laxto' go kwa'n mile' xa' lo go. ⁴ No ter gazh wëlt le' xa' kwa'n gat lè' lo go tu ngubizh, per dub gazh wëlt yubre xa' lo go ne xa': "Nale'tra'ne", orze' biya'l laxto' go kwa'n mile' xa' lo go.

Kwan nzhak or ñila men Dios

⁵ Orze' nzhab rë apost lo Señor:
—Maestr, goknu go no par más yila no Dios, par le' no rë kwa'n nazhon nela xmod nile' go ga'.

⁶ Per nzhab Jesús:
—Ter we'tsa ñila go Dios, nela xmod win laz tu mostás ga', orze' gak gab go lo tu ya ro ba': "Yubchi ba', bizë le'n nitsdo'", no lè'i gon kwa'n gab go.

Kwan ñal le' tu mos

⁷ 'Gab be, kinu tu rë go tu mos xa' nzha'n dan, o nikina xa' ma che'n go; no or yë'd mos di dan, nagabt go lo xa': "Guded, guzob gawal", ⁸ sino ke lè' go gab: "Biké' kwa'n lol, par bichao' kwa'n gau, orze' kol kwa'n gau no kwa'n go'n; no lu nalta' gawal no gol." ⁹ No ni xkix naza't go lo mos, por rë mandad kwa'n mile' mos re'. ¹⁰ Se'ska go, or lox le' go rë kwa'n mile' Dios mandad go, orze' ñal gab go: "No nak mos xa' niyent kwan zu', porke nab tsa kwa'n ñal le' no, mile' no."

Miliwen Jesús za chi' miyi' xa' nizak lepra

¹¹ Or nza Jesús yezh Jerusalén, nded Me sao' rë yezh kwa'n ña'n laz men Samaria, mbaino sao' rë yezh kwa'n nzhin laz men Galilea. ¹² No or nzhazhin Me ro' tu yezh, ngwachë'l lo Me chi' miyi' xa' nizak tu yalyizh kwa'n lë lepra, per haxta zit nzo bixa' lo Jesús, ¹³ orze' nguruzhië rë xa' re', nzhab bixa':

—Jesús, Maestr, bilats laxto' go no!
¹⁴ No or une Jesús bixa', nzhab Jesús:
—Wa go lo rë nguléi', par rël xa' go.

Mbaino di nza bixa' nez, lè' bixa' ngokwen la lo yalyizh che'n bixa'. ¹⁵ Or une tu rë xa' re', lè' xa' miak la; orze' nguiubre xa' lo Jesús, kidi'zh xa' naye, dox nazhon Dios, ¹⁶ mbaino ngo't kuslo xa' xan ni' Jesús par miza' xa' xkix lo Me; no xa' re' nzë yezh Samaria. ¹⁷ Orze' nzhab Jesús:

—Per, ¿chi gat lè't za chi' go mimbe lo yalyizh che'n go? ¿Ma ska zi yë' bixa'? ¹⁸ ¿Chi nab tsa miyi' xa' nzë zit re', nguiubre par miza' xkix lo Dios?

¹⁹ Orze' nzhab Jesús lo xa' re':
—Watsoli no bizë; lè'l mimbe la por ngwayilal da.

Xmod lu' rë zhë or le' Dios mandad
(Mt. 24:23-28, 36-41)

²⁰ Orze' minabdi'zh rë men fariseo lo Jesús, xmod lu' rë zhë, or le' Dios mandad lo yizhyuo; orze' nzhab Jesús:

—Or zhin rë zhë le' Dios mandad, gat lè't kwa'n lu' zhine lo rë men, ²¹ no ni yent cho gab: "Lè'i re'", o "Lè'i ba'", porke lè' Dios kile' la mandad xid rë men nzo nal re'.

²² Orze' nzhab Jesús lo rë men che'n Me:
—Lè' zhë zhin, lè' go galka ne, ter tutsa ngubizh che'n rë zhë or yala, per nayot ne goi.

²³ 'No lè' rë men di'zh: "Lè'i re'", o "Lè'i ba'", per nayat go, no ni nayakë go tich bixa', ²⁴ porke lè' zhë yala lu', nela or nikë tu do'zi' ga', nizinij tu lad no xtu lad lo yibë'. ²⁵ Per galo ñal, zakzi dox da, no rë men nal re' le' naya'lon. ²⁶ No nela xmod ngok rë zhë che'n Noé, se'ga' gak zhë or yala, na Xga'n Dios no nak da tu men yizhyuo.

²⁷ 'Le'n rë zhë che'n Noé, ndao men ngu' men, mikwa'n bixa' una', ngok jwandang che'n bixa'; haxta or mizhin zhë nguio Noé le'n yo'ya, une mile' bixa' rë kuba', orze' ngula yiu nazhe'b milo'xe rë bixa'. ²⁸ No se'ga' ngok le'n rë zhë kwa'n miban Lot; ndao men ngu' men, nguzi' bixa' mito bixa', ngo'n bixa', no michao' bixa' yo'. ²⁹ Per or nguro' Lot yezh Sodoma, ngula bèl no kubde ki lo yibë', par milox rë nak men ze'. ³⁰ Se'ska gak zhë or ruxoba lo rë men, na Xga'n Dios no nak da tu men yizhyuo.

³¹ 'Zhë ze', tu xa' nzo yek yo' naza't la xa' par ko' xa' che'n xa' le'n yo'; o tu xa' nzo dan, naza't yëk xa' lizh xa'. ³² Bitsila go kwa'n nguzak una' che'n Lot. ³³ Xa' gat nzhaklat gak xa' men da, par le' xa' kwa'n nzhakla xa', orze' mila' xa' kwa'n ban xa' par dubta' lo Dios; per xa' la' kwa'n nzhakla xa' le' xa' por nak xa' men da, orze' lè' xa' ban par dubta' lo Dios.

³⁴ 'Nin lo go, yë'l ze' or yala, nax chop xa' lo tutsa lo'n, lè' tu xa' bi, no lè' xtu xa' ya'n. ³⁵ O chop una' kiyo tutsa; lè' tu una' wëj, lè' xtu una' ya'n. ³⁶ No zhë ze', chop miyi' nzo dan; tu miyi' bi, lè' xtu miyi' ya'n.

³⁷ Orze' minabdi'zh bixa' lo Jesús, nzhab bixa':

—Señor, ¿plo gak rē kure'?

Orze' nzhab Jesús:

—Rē go nane, plo nidal ngulbech, ze' naxbi ma ngut. Sa' gak or yala: Rē men ne or zhin rē kure'.

18

Kwent che'n tu una' ngut tsa', mbaino che'n tu jwes nakap

¹ Midi'zh Jesús kwent re', par milu' Me xmod ñal na'b men che'n Me rē wēlt lo Dios, par nacha'b bixa', ² nzhab Jesús lo rē men:

—Le'n tu yezh nguio tu jwes kwa'n gat nzhont nzho Dios, no niyent cho nzhon xa' nzhho, ³ mbaino mis yezh ze' nzhho tu una' ngut tsa'; zilita' ña una' lo jwes re' par le' jwes yalgustis kun xa' nidil una' kun lē'. ⁴ No tu tiemp xche, net jwes ngaknu una' re', no lult mile' jwes xigab: “Ter gat nzhonta nzhho Dios, no yent cho nzhona nzhho, ⁵ per dox nicha'b da ñi'd una' re' lon garga'l; mejor len kwa'n ne xa' par nayi'dra' xa' lon, no par nakixianra' una' re' da.”

⁶ Orze' nzhab Jesús:

—Bin go kwa'n nzhab jwes naya' re';

⁷ orze', ¿chi nale't Dios yalgustis por rē xa' ngule Dios par gak men che'n Me, xa' nina'b zhēy-ye'le lo Dios? ¿Chi xche par le' Diose? ⁸ Per na ni lo go, lē' Dios le'i lwega'. Per or yala, ¿chi yazhēlra' da rē men da, xa' ñila len yalgustis, kun rē xa' nidil bixa'?

Kwent che'n tu men fariseo no tu men nikan dimi che'n rey

⁹ No midi'zh Jesús kure', lo pla men xa' nidi'zh, mis lē' bixa' dox nzhon bixa' ro' Dios, per rrajón bixa' lo más rē men:

¹⁰ —Nguio chop miyi', ngwa bixa' le'n yado' par guna'b bixa' lo Dios. Tu xa' fariseo, lē' xtu xa' nikan dimi che'n rey. ¹¹ Xa' fariseo re', dub nzuli xa', guna'b xa' lo Dios, se' nzhab xa': “O Dios; xkixal porke gat nakt da nela más rē men; rē men wa'n, no rē men kwa'n nile' kwa'n gat lē', no rē xa' nika' men gat lē't tsa'; no ni gat nakt da nela men nikan dimi che'n rey re'; ¹² na nizo xlatsa chop ngubizh le'n sman, no nizan diezmo che'n rē nak kwa'n nilen gan.” ¹³ Per xa' kwa'n nikan dimi che'n rey ze', zit nguzo xa', no mlayēt xa' lo xa', maska kiké' xa' i laz xa', no nzhab xa': “¡O Dios, bilats laxto' da, lē'da tu men nzē'b xki lol!”

¹⁴ Orze' nzhab Jesús:

—Nin lo go, or ña men nikan dimi ze' lizh, miwi' Dios lo xa', nela lo tu men yent kwan nzē'b ga'; per lo men fariseo re', nangawi't Dios wen, porke rē xa' mis lē' nidi'zh nzhon ro' Dios, lē' xa' tula; per xa' kwa'n nilibe' xmod nak, lē' Dios le', gak xa' tu men tsak.

Jesús midi'zh ya rē mē'd wen

(Mt. 19:13-15; Mr. 10:13-16)

¹⁵ Nu nzhanu men, haxta rē mē'do', par gal Jesús bimē'd, per or une rē men che'n Jesús kure', nangala'tra' bixa' ngwei' rē men mē'd lo Jesús, ¹⁶ per ngurezhe Jesús rē mē'd, mbaino nzhab Me lo rē men che'n Me:

—Nakat go yi'd rē mē'd lon; porke men nak nela tu mē'd ga', xa' re' yo plo nile' Dios mandad. ¹⁷ Walika kwa'n nin lo go; xa' kwa'n nagak nela tu mē'd ga', plo nile' Dios mandad nayot xa'.

Tu miyi' rrik xa' xi

(Mt. 19:16-30; Mr. 10:17-31)

¹⁸ Orze' tu xa' nile' mandad, minabdi'zh lo Jesús, nzhab xa':

—Maestr wen, ¿kwan len par ban da par dubta' lo Dios?

¹⁹ Orze' nzhab Jesús:

—¿Chon nel wen da? Yent cho wen, nab tsa Dios wen. ²⁰ Lu nane la rē kwa'n nzhab ley: “Naka'tal una' gat lē't tsa'l, nagutal men, naliwa'ntal, nakē'tal kixu' xtu men yent kwan nzē'b, no gop kwent xuzal mbaino xna'l.”

²¹ Orze' nzhab miyi' rrik re':

—Rē nak kuba' milela dizde or win da.

²² Or mbin Jesús kure', orze' nzhab Me:

—Nzho xtu kwa'n jwalt le'l: Bito rē nak kwa'n kinul, orze' gudi'ze ka' rē men prob, par gapal kwa'n tsak lo yibē', orze' di'kē ticha.

²³ Per or mbin miyi' rrik rē kure', dox trixt mizi xa', porke dox rrik xa'. ²⁴ No or une Jesús, xmod mizi miyi' re', orze' nzhab Me:

—¡Dox nagan par tu men rrik ziyēl xa' le' Dios mandad xa'! ²⁵ Más jwals ded tu kamey xan tu yaguj, ke par yo tu rrik plo nile' Dios mandad.

²⁶ Orze', rē xa' kwa'n mbin kure', nzhab bixa':

—Chi lē'i sa', ¡pas yent cho ro' lo kwa'n nazhe'b kwa'n nzhho met!

²⁷ Orze' nzhab Jesús:

—Par rē men, nzhho kwa'n nagakt le' men; per Dios, yent cho tu kwa'n nagakt le' Dios.

²⁸ Orze' nzhab Per lo Jesús:

—Biwi' go, lē' no mila' rē nak kwa'n kinu no, par nzadkē no tich go.

²⁹ Orze' nzhab Jesús:

—Walika kwa'n nin lo go, rē xa' mila' lizh, o xuz, o xna', o wech, o bizan, o una', o xmē'd, par yo xa' plo nile' Dios mandad; ³⁰ no dub ban xa' yizhyuo re', más nayax kwa'n gap xa', ke rē kwa'n mila' xa' par nzadkē xa' ticha, mbaino lē' xa' ban par dubta' lo Dios.

Xtu wēlt, nzhab Jesús, lē' Me gat mbaino lē' Me ruban

(Mt. 20:17-19; Mr. 10:32-34)

³¹ Ngurezh Jesús tu lad, za tu dusen men che'n Me par nzhab Me:

—Biwi'u, lè'be nzha yezh Jerusalén, plo gak rë kwa'n zaka, rë kwa'n nzobni' lo yech por rë profet, xa' midi'zh por Dios; ³² lè' rë men chi da lo xtu ben men, xa' gat lè't men Israel, no kitnu rë men re' da, mbaino ke bixa' da, no chuk bixa' lon. ³³ Mbaino lè' bixa' chèle ticha, orze' gut bixa' da; per ngubizh yon lè'da ruban.

³⁴ Per rë men che'n Me ngazobyekt bixa' widi'zh re'; porke nagakt zobyek bixa'i, porke nake rë kwa'n nanet bixa' kwan.

Miliwen Jesús tu xa' nikal lo
(Mt. 20:29-34; Mr. 10:46-52)

³⁵ Or nzhazhin Jesús gax yezh Jericó, ze' nzob tu xa' nikal lo ro' nez, kina'b xa' gon.

³⁶ Or mbin xa' re', nzhaded nayax men ze', minabdi'zh xa': “¿Cho rë xa' ze' ga?”

³⁷ Orze' nzhab men lo xa':

—Lè' Jesús xa' nzé yezh Nazaret nzhaded re'.

³⁸ Orze' naye nguruzhië xa' nikal lo re', nzhab xa':

—jJesús, Xga'n Dabi! jbilats laxto' da!

³⁹ Orze' rë xa' nzha dilant, nzhab bixa' lo xa' nikal lo re': “jKiex, bitsao' ro'!” , per más naye nzhab xa':

—Xga'n Dabi, jbilats laxto' da!

⁴⁰ Orze' nguléz Jesús, mile' Me mandad ñè'd xa' nikal lo re' lo Me, orze' nzhab Jesús lo xa':

⁴¹ —¿Kwan tu kwa'n nzhaklak gagnun lu?

Orze' nzhab xa' nikal lo re':

—Señor, nzhaklan yani lon.

⁴² Orze' nzhab Jesús:

—jGuzhë ngwani lol!, por ngwayilal da.

⁴³ Orze' lweg'a ngwani lo xa', no nzhakë xa' tich Jesús, mbaino kidi'zh xa' dox nazhon Dios; no rë xa' une kure', nu bixa' kidi'zh nazhon Dios.

19

Jesús no Zaqueo

¹ Or mizhin Jesús ro' yezh Jericó, no or nzhaded Me le'n yezh, ² ze' nibéz tu men rrik xa' lè' Zaqueo; tu xa' nile' mandad lo rë men nikan dimi che'n rey. ³ Dox nzhakla xa' re' libe' xa' Jesús, per nagakte por tanta nayax men nzhaded ze', no nu por dox win xa'. ⁴ Orze' mikë' Zaqueo karre, nkë xa' lo tu ya kwa'n lè' sicómoro, dilant plo ded Jesús. ⁵ No or nzhaded Jesús ze', miwi' Me al ya', une Me Zaqueo, orze' nzhab Me:

—Zaqueo, karre gula ba', porke nal, naki'n yana lizhal.

⁶ Orze' nayan ngula Zaqueo, nizak laxto' xa' ñanu xa' Jesús. ⁷ Or une rë men kure', rë xa' nguzublo kidi'zh nakap tich Jesús, nzhab bixa':

—jBiwi'ulel, lè' Jesús ya'n lizh tu men dox nzé'b xki lo Dios.

⁸ Orze' nguzuli Zaqueo lo Jesús, nzhab xa':

—Biwi' Señor; lè'da za garol kwa'n kinun, ka' rë men prob; no chi miliwana che'n tu men, por mikiden xa', nal lè'da zhireskai tap wèlt más nayaxe.

⁹ Orze' nzhab Jesús:

—Nalzhë re', lè' rë xa' lizh go, lè' go ro' lo rë kwa'n nazhe'b nzadkë tich go, porke nukal nzé ben che'n Abraham. ¹⁰ Na nak Xga'n Dios, no nak da tu men yizhyuo, nzhala par nzakwana, rë xa' kilox lo rë kwa'n nzé'b xki xa' lo Dios, par kon bixa' lo rë kwa'n nazhe'b, kwa'n nzadkë tich bixa'.

Kwent che'n rë xa' kwa'n nguzen dimi
(Mt. 25:14-30)

¹¹ Rë kwa'n kidi'zh Jesús kiyon men, no nu midi'zh Jesús tu kwent re', porke lè' Jesús gax la nzo Me par yezh Jerusalén, no rë men xa' nzhakë tich Me mile' bixa' xigab, ngane bixa' di repent, ngarulo xmod le' Dios mandad dub yizhyuo, ¹² kuzé' nzhab Jesús:

—Nguio tu miyi' xga'n tu xa' ro, ngwa xa' xtu lazh men zit, par gak xa' rey lo rë melazh xa' or yubre xa'. ¹³ No antis di ya xa', ngurezh xa' chi' mos che'n xa' par miza' xa' tu tant ga' dimi ka' kad bixa', orze' nzhab xa': “Gukë go zhi'n kun dimi re', haxta or yala.” ¹⁴ Per rë melazh xa', niyi' nine xa', no or nzha xa' gak rey re', mixë'l rë men lazh xa' pla xa' kwa'n nguzhubner ngwayab lo xa' más nile' mandad: “Gat nzhaklat no gak xa' re' rey lo no.” ¹⁵ Per or miëk xa' re' lazh xa', lè' xa' nak la rey; orze' ngurezh rey re' rë mos che'n xa' kwa'n miza' xa' dimi ze', par ne xa' plak mile' tuga' xa' gan. ¹⁶ Xa' galo nguzubi, nzhab: “Señor, lè' xtimi go mile' gan chi' wèlt más nayaxe.” ¹⁷ Orze' nzhab rey lo xa' re': “Dox wen mile'l, kun che'p tsa kwa'n milan lol, mos wenal. Nal lè'l le' mandad lo chi' yezh.” ¹⁸ Orze' nguzubi mos rop, nzhab: “Señor, lè' dimi che'n go mile' gan gai' wèlt xtu tante.” ¹⁹ Orze' nu lo xa' re' nzhab rey: “Nal lè'l le' mandad lo gai' yezh.” ²⁰ Per xtu mos nguzubi, nzhab: “Señor, lè' xtimi go re', lè'da nguluchawë lo tu pañit; ²¹ porke mizheb da lo go, go nak tu men nina'b kwent dimás; porke nina'b go kwa'n gat niza' go, mbaino nikan go kwa'n plo gat nzhant go.” ²² Orze' nzhab rey: “jMinu la xigab che'nal! Nal nele por kwa'n nel ba'. Chi lè'l nane ka, na tu men nina'b kwent dimás, mbaino nina'ba kwa'n gat nizan, no nikana kwa'n plo gat nzhana.” ²³ orze', ¿chon nangagotal dimi da bank, par or ngayala, ngazene kun xine?” ²⁴ Orze' nzhab rey lo rë men nzhin ze': “Bilat go dimi lo xa' re', no biza' goi, ka' xa' kwa'n mile' gan zichi'y dimás.” ²⁵ Orze' nzhab rë xa' nzhin ze': “Señor, xa' ba' kinu la zi chi'y más.” ²⁶ Orze'

nzhab rey: “Pwes nin lo go, xa' kinu lai, mase ka' xa'; per xa' gat kinui, haxta kwa'n nile' xa' xigab kinu xa', ro' ya' xa'.” ²⁷ Orze' nzhab rey: “Nu rë xa' kwa'n gat nzhaklat gak da rey lo ba', waka' go bixa', no bit go bixa', dilant lon.”

Nguio Jesús le' n'yezh Jerusalén nela turey (Mt. 21:1-11; Mr. 1:1-11; Jn. 12:12-19)

²⁸ No or milox midizh Jesús rë kure', orze' nzha Jesús par nez Jerusalén. ²⁹ No or nzhazhin la Me gax plo nzhin rë r ranch kwa'n lë Betfagé no Betania, kwa'n ña'n gax plo ña'n lom kwa'n lë Olivo, orze' mixë'l Jesús chop men che'n Me, ³⁰ nzhab Me lo bixa':

—Wa go r ranch kwa'n nzhin ba', ba' ne go tu burrit nikido', no nagat zob ni tu men tich ma; bixëk go ma no di'nu go ma, ³¹ no chi nabdi'zh tu men: “¿Chon kixëk go burrit ba'?” orze' guzh go: “Lë' Señor naki'n ma.”

³² Orze' nzha rop xa' re', mbaino se'ka ngoke, nela xmod nzhab ka Jesús lo bixa', ³³ no or kixëk bixa' burrit re', orze' nzhab rë xa' nak che'n ma:

—Lë' go, ¿chon kixëk go burr ye'n ba' ga'?

³⁴ Mikab rop xa' re':

—Lë' Señor naki'n ma.

³⁵ Orze' ngwala' bixa' ma lo Jesús, no mixo'b bixa' xab bixa' tich ma, mbaino mizob bixa' Jesús tich ma. ³⁶ Dub nzhazë ma nzob Jesús tich ma, no rë men ndix bixa' xab bixa' plo ded Jesús. ³⁷ Or nzhalayët la Me, tich lom kwa'n lë Olivo, plo nilu' la yezh Jerusalén, orze' rë men che'n Me nguzublo kibizhië bixa' di nizak laxto' bixa', kidi'zh bixa' dox nazhon Dios, por rë kwa'n nazhon une bixa', mile' Dios, ³⁸ nzhab bixa':

—¡Wen nzha rey xa' mixë'l Dios! ¡Mial laxto' Dios kun rë men!, mbaino rë men yizhyuo ñal di'zh: “¡Lë' Dios nazhon mbaino wen!”

³⁹ Orze' xid rë men re', nzhab pla men fariseo:

—¡Maestr, guzh lo rë men che'nal, di'zhtra' bixa', lu nak rey!

⁴⁰ Per nzhab Jesús:

—Nin lo go, chi lë' rë men re' la', nadi'zhtra', orze', ¡lë' rë ke di'zh por lë' bixa'!

⁴¹ Or nzhazhin Jesús gax yezh Jerusalén, or une Mei, mbi'n Me por lë', ⁴² nzhab Me:

—¡Men yezh Jerusalén, oj nal zhë re', gak libe' go Me kwa'n le', yal laxto' Dios kun go!, per nela xmod nak go nal re', nagakt libe' go Me, ⁴³ porke zhin zhë, lë' rë men kwa'n niyi' nine go, kurrall le' bixa' go, par yent plo le' go gan, ⁴⁴ mbaino rë go gut bixa', yent kwan zine laxto' bixa' go, mbaino lo'x bixa' yezh che'n go, ni tu ke naya'nte tich weche, rë kwa'n ngokxao'we, porke nangalibe't go, zhë mbi'dtswi' Dios go.

Jesús mitsumbe yado'

(Mt. 21:12-17; Mr. 11:15-19; Jn. 2:13-22)

⁴⁵ No dispwés di kure', ña Me plo nak lo luwe che'n yado' yezh Jerusalén, orze' nguzublo kigotin Me rë xa' nito, no rë xa' nizi' ze', ⁴⁶ no nzhab Me:

—Se' nzobni': “Lë' lizha nak plo nidi'zh men Lon”, ¡per go kile'i nela plo nibin rë wa'n ga', par lat xa' che'n rë men!

⁴⁷ No zilita' nilu' Jesús widi'zh che'n Dios, lo luwe che'n yado', per rë xa' kwa'n nile' mandad lo rë ngulë'i, no rë xa' nilu' ley, kun rë xa' nak zhi'n yezh; kikwa'n bixa' mod par gut bixa' Jesús, ⁴⁸ per nangakt le' bixa'i, porke rë men yezh ze', dubla bixa' nzhon bixa' rë kwa'n nidi'zh Jesús.

20

Minabdi'zh bixa', cho mixë'l Jesús

(Mt. 21:23-27; Mr. 11:27-33)

¹ No ngol tu ngubizh, nzo Jesús lo luwe che'n yado', kilu' Me widi'zh che'n Dios lo rë xa' nzhin ze', orze' ze', mizhin rë xa' nile' mandad lo rë ngulë'i, no rë xa' nilu' ley, kun rë xa' nak zhi'n yezh, ² nzhab rë xa' re' lo Jesús:

—Bine lo no, ¿kwan nakal par kile'l rë kure', mbaino cho mixë'lal par le'le?

³ Orze' nzhab Jesús:

—Nuka da, nabdi'zh tu kwa'n lo go, no bine goi: ⁴ ¿Cho mixë'l Juan par lilë'i Juan men le'n nits? ¿Chi Diose, o mene?

⁵ Orze' nguzublo kidi'zh bixa' lo wech bixa':

—Chi gab be: “Lë' Dios mixë'l Juan”, orze' lë' xa' ne lo be: “¿Chonska nangayila go xa'?”

⁶ No chi gab be: “Men mixë'l Juan”, orze' lë' rë men re' koke be, porke rë men zak, lë' Juan ngok tu profet, xa' midizh por Dios.

⁷ Orze' nzhab bixa':

—Nanet no cho mixë'l Juan.

⁸ Orze' nzhab Jesús lo bixa':

—Nuska da, nanita cho mixë'l da kilen rë kure'.

Kwent che'n rë mos mal laxto'

(Mt. 21:33-44; Mr. 12:1-11)

⁹ Orze' midizh Jesús kwent re', lo rë men nzhin ze', nzhab Me:

—Tu miyi' mixë'n tu pedas ya gub, orze' miza' xa' i med lo rë men ga'ne; orze' nguro' xa' tu tiemp xche. ¹⁰ Or ngol tiemp miza'i, mixë'l xa' nak che'n ya gub re', tu mos che'n xa' par na'b xa' lo rë men ngo'ne, kwa'n gal xa'. Per rë xa' ngo'ne re', ndin bixa' mos re', no mizhire bixa' mos re' nab ya' mos. ¹¹ Orze' mixë'l xa' xtu mos, no nu ska mos re' ndin bixa', no che'ptsas mile' bixa' ne', no mizhire bixa' mos re', nab ya' ska mos. ¹² Orze' mixë'l xa' mos yon; nu ska xa' re' mitsiwe' bixa', no ngulutin bixa' mos re' al tich.

¹³ Orze' mile' xa' nak che'n ya gub re' xi-gab: “¿Kwan len nal? Mejor yub xga'na xëla,

xa' nazhi' da, pas ro' xa' re'se gon bixa'." 14 Per or une rē men ngo'n yuo re', xga'n xa' kwa'n nak che'ne, tutsa mia'n bixa' nzhab bixa': "Xa' re' nak che'n rē; chao' gut be xa', par ka' be rē nak kure'." 15 Orze' ngulutin bixa', xga'n xa' nak che'ne al tich, par mbit bixa' miyi' re'.

Orze' nzhab Jesús lo rē men nzhin ze':
—Nal, ¿kwan le' xa' nak che'n ya gub re'? 16 Lē' xa' yē'd par lo'x xa' rē xa' kwa'n ngo'n ya gub che'n xa', mbaino lē' xa' za'i ga'n xtu ben men.

No or mbin rē men nzhin ze' kure', nzhab bixa':

—iKuba'se nayot gak!
17 Per or miwi' Jesús xe lo bixa', nzhab Me:
—Aja, kwan gab widi'zh kwan nzobni' re'x:

Lē' ke kwa'n ngulubi rē xa' nichao' yo', zak bixa' nazu'te,
per lē'i' ngok ke galo laka, kwa'n nzen dub yo'.

18 No rē men yachin lo ke re', lē'i' gut xa'; no chi lē' ke re' gab yek tu men, lē'i' ta'ch xa'.

Ñal za' men che'n rey kwa'n nak che'n rey
(Mt. 21:45-46; 22:15-22; Mr. 12:12-17)

19 Rē xa' nile' mandad lo rē ngulē'i', no rē xa' nilu' ley; mis orze' ngokla bixa' ngazen bixa' Jesús, porke mizi bixa' par yek bixa' nzha kwa'n mid'i'zh Jesús. Per nangakt ngale' bixa'i, porke nizheb bixa' lo más rē men nzhin ze'. 20 Kuze', mixē'l' bixa' pla miyi' kwa'n le', chigab walika nzhakla bixa' ne bixa' tu kwa'n, per ka namás par la'ch bixa'i, par ne bixa' gab Jesús tu kwa'n gat ñal, par za' chi bixa' Me lo gobier che'n men Roma. 21 Orze' kuze' nzhab bixa' lo Jesús:

—Maestr, nzhon no kwa'n nidi'zh go, no kwa'n nilu' go, pura kwa'n ñale; no gat nibet go men or nile' go tu kwa'n par men; no nilu' go gon men ro' Dios nela xmod nzhakla ka Dios. 22 Lē'o, ¿kwan ne go? ¿Chi lē'ka kix met dimi che'n reyse, o gat lē'te?

23 Per lwegā' mizi Jesús cho xigab kile' bixa'; orze' nzhab Me:

—¿Chon kizenbe' go da (kiwi' go xmod nak da)? 24 Gulo' go tu pes, par ne be xmod nake. No bineu, ¿cho nikē loi, mbaino cho lē kinui'?

Orze' nzhab bixa':
—César nikē loi.

25 Orze' nzhab Jesús:
—Ne goix, biza' go che'n César kwa'n nak che'n César; mbaino che'n Dios kwa'n nak che'n Dios.

26 No nangaktra' ngakab bixa' lo rē men; xe mia'n bixa' tuli por xmod nkab Jesús.

¿Chi ziruban men ngut?
(Mt. 22:23-33; Mr. 12:18-27)

27 Orze' nguzubi pla men saduceo lo Jesús, no rē xa' re' gat ñilat chi walí ruban men ngut, minabdi'zh bixa' kure':

28 —Maestr, lē' Muisés mizob lo yech, or gat tu miyi' no la' xa' una' che'n xa', mbaino nangapt xa' mē'd kun lē' una', orze' wech xa' naki'n ban kun una' re' par gap xa' ngut re' mē'd kun lē' una'. 29 Pwes nguio gazh miyi' tutsa wech; xa' galo ngot tsa' tu una', no ngut xa' sin nangap xa' mē'd. 30 Xa' mirop se'ga', 31 no wech mion xa' se'ska, haxta za gazh bixa' ngut, sin nangapt bixa' mē'd kun lē' una' re'. 32 No lult, nu ska una' re' ngut. 33 No nal, or ruban bixa', ¿cho xa' gak che'n una' re'?, porke za gazh bixa' miban kun lē' una'.

34 Orze' nzhab Jesús:
—Yizhyuo re', miyi' kun una' niban bixa',

35 per rē men xa' wi' Dios, ñal ban xtu yizhyuo kwa'n kinu Dios, or ruban bixa', nagaptra' bixa' una', ni nagak jwandang che'n bixa', 36 porke orze', nayotra' gat bixa', lē' bixa' gak nela ganj che'n Dios ga', no gak bixa' xmē'd Dios porke nguruban bixa'.

37 No par yila go lē' rē men ngut ruban, ¿chi nagat go'l go, kwa'n mid'i'zh Dios lo Muisés, or une Muisés tu ya yich nzobyo'l? Lē' Dios nzhab: "Na nak Dios che'n Abraham, no Dios che'n Isaac, mbaino Dios che'n Jakob." 38 Rē widi'zh re' nilu', lē' Dios gat nakt Dios, Dios che'n rē men ngut; lē' Dios nak Dios che'n rē men naban; porke lo Dios rē men naban.

39 Orze' nzhab pla maestr xa' nilu' ley:
—Maestr, dox wen kwa'n mid'i'zh al.

40 Orze' nangayetra' laxto' bixa', ngan-abdi'zh bixa' más kwa'n lo Jesús.

¿Cho nak Xuz Krist?
(Mt. 22:41-46; Mr. 12:35-37)

41 Orze' nzhab Jesús:
—¿Xmod nzhab men, lē' Krist nak xga'n Dabi?, 42 porke mis Dabi mizob lo libr che'n Salmos widi'zh re':

Lē' Señor nzhab lo Señor da:
"Guzob lad direch da plo más tsak,
43 haxta ke len, che'p'tsa (bi'ch laka) gak rē xa' nidilal kun lē'."

44 Orze', ¿xmod gak Krist Xga'n Dabi?, porke mis Dabi nzhab: "Lē' Krist nak Señor da."

Jesús nzhab lo rē men che'n Me,

wi' bixa', nagakt bixa' nela rē xa' nilu' ley ga'

(Mt. 23:1-36; Mr. 12:38-40; Lc. 11:37-54)
45 No dub kiyon rē men kwa'n kidi'zh Jesús, orze' nzhab Me lo rē men che'n Me:

46 —Neu kun rē xa' nilu' ley, napa' ke'd bixa' kwa'n nak bixa' go. Lē' bixa' ño laxto' nzhak bixa' pura lar wen, mbaino ño laxto' bixa', or nini' men lo bixa', kun rop lad ya' men zen men ya' bixa', mbaino lo rē men ño laxto' bixa' le' men se' kun lē' bixa'; no nizob bixa' pura plo nizob rē men tsak, le'n yo' plo nitse'd men widi'zh che'n Dios, mbaino lo rē

lani, se'ska nile' bixa'. ⁴⁷No nilat bixa' haxta lizh una' ngut xmiyi'. No chigab walika men che'n Dios bixa', xche nidi'zh bixa' lo Dios; kuze' más zakzi Dios bixa'.

21

Gon kwa'n miza' tu una' ngut xmiyi'
(Mr. 12:41-44)

¹Dub nzo Jesús lo luwe che'n yado' kun rë men che'n Me, lë'chi ngulits Me lo Me, une Me xmod kiza' rë men rrik gon, kila bixa'i le'n alkansí che'n yado', ²no nu une Jesús tu una' ngut xmiyi', no prob una'; mila una' chop tsa dimi win kwa'n dox che'p tsak le'n alkansí ze', ³orze' nzhab Jesús lo rë men che'n Me:

—Walika kwa'n nin lo go, más kwa'n miza' una' ba' ke más rë men ba', ⁴porke rë xa' ba', kwa'n mia'n sobr lo xa', miza' bixa' gon, per una' re'se, dub niyente nizak una', miza' una' gon, rë tsa dimi kwa'n kinu una' par gao una'.

Midi'zh Jesús, lë' yado' bil
(Mt. 24:1-2; Mr. 13:1-2)

⁵No pla rë men che'n Jesús, kidi'zh bixa' xmod ngokxao' yado', no tatu chul rë ke nzho ta'i, no rë dimi kwa'n ngoknu men, par milu'i chul, orze' nzhab Jesús:

⁶—Lë' tu zhë zhìn, lë' rë nak kwa'n kiwi' go lo rë, ley bil; ni tu ke kwa'n nakxao'we, ya'nte tich weche.

Rë kure' gak antis di lox yizhyuo
(Mt. 24:3-28; Mr. 13:3-23)

⁷Orze' minabdi'zh bixa', nzhab bixa':
—Maestr, ¿pok gak rë kure'? No, ¿xmod lu' rë zhë mizhin la gak rë kure'?

⁸Orze' nzhab Jesús:
—Biwi' go par yent cho kide go, porke nayax men yi'd, ded bixa' nela da ga', di'zh bixa' lo men: “Na nak Krist”; mbaino nu di'zh bixa': “Mizhin gaxla zhë lox yizhyuo”, per nayilat go bixa'. ⁹No or gon go kidil rë gobier, kun tsa' gubier bixa', no or kidil men kun mis gubier che'n bixa', nazhebt go kwa'n dox; porke rë kure' galo laka gak, per jwaltra' lox yizhyuo.

¹⁰No nzhab Jesús:

—Lë' tu lazh men dil kun xtu lazh men, no tu gubier dil kun xtu gubier, ¹¹no dox rë xo ro win nayax plo, rë zhë ze', no yo yalwin no yalyizh; mbaino lo yibë' lu' rë kwa'n nazhe'b, no rë se'n nazhe'b dox.

¹²“No antis di ke gak rë kure”, lë' men zen go par zakzi bixa' go, no chi bixa' go lo rë xa' nile' mandad le'n yo' plo nitse'd men widi'zh che'n Dios; no ko bixa' go lizhyi'b; no haxta chi xa' go lo rë xa' más nile' mandad, haxta lo rë rey no lo rë gobiernador, por nak go men da, ¹³nes par za' di'zh go xtizha lo rë men. ¹⁴Kuze', nale't go xigab kwan di'zh go lo bixa', ¹⁵porke no gane xigab ka' go,

par xmod kab go lo bixa'; mbaino ni tu bixa' gakt kab lo kwa'n di'zh go lo bixa'. ¹⁶Per go, haxta rë xuz go, no rë xna' go no rë wech go, mbaino rë melizh go, no rë xa' nichë'l go; mis rë xa' re' chi go lo rë men, par gut bixa' pla go; ¹⁷no rë nak men yi' ne' go por nak go men da; ¹⁸no ter zak go rë kure', per Dios kina ka go. ¹⁹Por ñila go da dub kizak go rë kure', kuze' le' go ban par dubta' lo Dios.

²⁰Or ne go, naka'n ro' yezh Jerusalén nzhin sondad, nane la go mezhin la loxe, ²¹orze' lë' rë men Judea, ñal yuka'ch bixa' le'n rë mont, no rë xa' nzho yezh Jerusalén, ñal ro' bixa'; no rë xa' nzhin dan, ñal nayëkra' bixa' lizh bixa', ²²porke zhë re', gak zhë kwa'n gab Dios xmod gak kun rë men Israel, par gak rë kwa'n nzobni' lo ley che'n Muisés mbaino rë kwa'n mikë' rë xa' midi'zh por Dios chi tiemp. ²³¿zhe'b nalats, nzha rë una' xa' nak xin rë zhë ze', no rë una' xa' naka' më'd orze', porke dox nazhe'b kwa'n yi'd yizhyuo rë zhë re'; no rë men yezh re', dox kwa'n nazhe'b ne bixa'! ²⁴No gat bixa' kun spad, no más bixa' wei' men, par gak bixa' mos nado lo xtu men, lo más rë lazh men; no yezh Jerusalén, rë men xa' gat lë't men Israel, gak che'ne mbaino le' mandade, per lë' zhë zhìn, nagaktra'i che'n bixa', mbaino nale'tra' xa' mandade.

Or yubre Xga'n Dios xtu wëlt
(Mt. 24:29-35, 42-44; Mr. 13:24-37)

²⁵No nzhab Jesús:

—No yo nayax se'n lo ngubizh, no lo mbëo', no lo rë mbël. Mbaino lo yizhyuo, rë lazh men yo yalnazhe'b, net men kwan le' men por dox naye nibezh nitsdo' kiyite. ²⁶Lë' rë men te'dyë'l por tanta zhe'b, por rë kwa'n gak yizhyuo re'; porke haxta rë kwa'n nzen rë kwa'n nzho lo yibë', lë'i ro' xlugare. ²⁷Orze' rë men yizhyuo ne, lë' Xga'n Dios xa' nak ska tu men yizhyuo yi'd le'n tu xkao, mbaino kun biani kwa'n nizini nayi' dox, no dox kinu Me jwers par lë' Me mandad no par le' Me rë kwa'n, kwa'n niyent cho gak le'. ²⁸Or zubro gak rë kure', list guzo go, gulits go lo go lo yibë', porke ya nzhazhin la, ro' go lo rë kwa'n nazhe'b, mbaino ban go kun lë' Me.

²⁹No midi'zh Jesús kwent re':

—Biwi' go lo ya nzha'o', no lo más rë ya; ³⁰or ne go nzhaxichla rë rram che'ne, lë' go niza' kwent, lë' mbëo' nëi' nzhazhin la; ³¹no se'ga', or ne go, kiyak rë kure'; nane la go, nzhazhin la zhë, le' Dios mandad dub yizhyuo.

³²Walika kwa'n nin lo go, rë kure' gak antis dike gat rë men xa' nzho orze'. ³³Yibë' no yizhyuo lë'i lox; per rë kwa'n nidizha, rëi lë'i zhìn gak.

³⁴Bikina go go, nala't go yo rë xigab laxto' go, kwa'n le' wei' go lo rë kwa'n nzhakla

kwerp che'n go, no lo rē xigab ña-ñē'd yek go, xmod pa' le' go yizhyuo re', no di repent zhin zhē nazhe'b re' lo go, ³⁵ porke zhē re' zhin jdi! lo rē nak men nzhin yizhyuo, nela or nizen tramp mizin ga', yaga' men loi. ³⁶ Kuze' list guzou biwi'u, no guna'b go zilita' lo Dios, par le' go gan lo rē kwa'n nazhe'b yi'd yizhyuo re', mbaino par yent kwan zheb go, or zhin go lo Xga'n Dios, Me nu nak tu men yizhyuo.

³⁷ Or zhē, nilu' Jesús widi'zh che'n Dios lo luwe che'n yado', mbaino lē' yē'l, ña Me mont kwa'n lē Olivo. ³⁸ No rē men nibin garzi'l laka lo luwe che'n yado', par gon bixa' kwa'n nidi'zh Jesús.

22

Mia'n bixa' di'zh xmod gut bixa' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Nzhazhin la lani Pask, or nzhao rē men Israel pan kwa'n niyent levadur; ² no rē xa' nile' mandad lo rē ngulē'i, no rē xa' nilu' ley, mia'n bixa' di'zh gut bixa' Jesús xla'n, nes par naxo'b mene yek bixa', porke nizheb bixa' gon mene. ³ Orze' nguio Mizhab laxto' Judas Iscariote, mis tu rē xa' kwa'n nak tu dusen men che'n Jesús. ⁴ Ngwa xa' re' lo rē xa' nile' mandad lo rē ngulē'i, mbaino lo rē xa' nile' mandad rē xa' nikina yado', par midizhnu Judas rē xa' re', xmod chi Judas Jesús lo bixa'. ⁵ Orze' nizak laxto' rē xa' re', no mia'n bixa' di'zh, kix bixa' ka' Judas por kure'. ⁶ Orze' nguziyē! Judas. No dizde orze', nguzublo kikwa'n Judas mod par chi xa' Jesús lo rē xa' re', tu or kwa'n nayent men lo Jesús.

Lult xche' kwa'n ndao Jesús

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Mizhin zhē kwa'n nzhal lani Pask, or nzhao men Israel pan kwa'n niyent levadur; zhē re' nzhut men tu mbēkxi'l. ⁸ Orze' mixē'l Jesús Per kun Juan, nzhab Me: —Wa go, wachao' go kwa'n gao be lani pask re'.

⁹ Orze' nzhab bixa' lo Jesús:

—¿Plo nzhaklal yachao' noi?

¹⁰ Orze' nzhab Jesús:

—Biwi' go, or zhin go yezh Jerusalén, ze' zhē'l go tu miyi' kwa'n ñanu tu re nits, wakē' go tich xa' haxta or zhin xa' lizh xa', ¹¹ orze' gab go lo xa' kwa'n nak che'n yo' ze': “Lē' Maestr ne: ¿Lu' go plo gao Maestr kun rē men che'n Maestr nal lani re'?” ¹² Orze' lē' xa' lu' tu kwart ro lo go, kwa'n nzob xtu pis ya, no rē kwa'n nzhin la le'ne; orze' ze' bichao' go kwa'n gao be. ¹³ Orze' ngwa bixa', no se'ka ngoke nela xmod nzhab ka Jesús lo bixa', orze' ze' michao' bixa' kwa'n gao bixa' lani pask re'.

¹⁴ No or ngol or, nguzob Jesús lo mes kun rē apost che'n Me, ¹⁵ orze' nzhab Me:

—¿Dox nzhapa gan gao be lani Pask re', antis di zakzi da mbaino gat da!, ¹⁶ porke nin lo go, nayotra' gaun lani pask re'; haxta or le' Dios mandad, orze' gaune xtu xēlt.

¹⁷ Orze' nguzen Me tu bas, miza' Me xkix lo Dios, nzhab Me:

—Gu' go kure', no gudi'z goi xid rē go, ¹⁸ porke lult nal go'n nits gub yizhyuo re'. Or go'ne xtu wēlt plo nile' Dios mandad, xa'la mode.

¹⁹ Orze' nguzen Me pan, miza' Me xkix lo Dios, orze' michi'x Mei, no miza' Mei ka' rē men che'n Me, orze' nzhab Me:

—Kure' nak kwerp da kwa'n zan por rē go; se' bile' go dubta', nela xmod kilen re', par tsila go da.

²⁰ No se'ska mile' Me, or milox ndao xche' bixa', nguzen Me kwa'n nzho bin, orze' nzhab Me:

—Bin re' nak di nueb, kwa'n mila' Dios di'zh par rē men da, ze' Dios yalnazon ka' bixa', por ren da kwa'n xo por rē go.

²¹ 'Per biwi'u, xa' chi da lo rē men, lē' xa' nzob kuda lo mes re'. ²² Na, Xga'n Dios mbaino nak da tu men yizhyuo; nak la di'zh zakzi da, per xa' kwa'n chi da lo rē men, jnazhe'b mal nzha xa' re'!

²³ Orze' nguzublo kidi'zh rē men che'n Me: “¿Cho xa' kwa'n nzho xid be, gak xa' kwa'n le' kure'?”

Kichēlro' rē men che'n Jesús par nabei cho le' mandad xid bixa'

²⁴ No rē men che'n Me nguzublo kichēlro' bixa', par nabei cho gak xa' le' mandad xid bixa', ²⁵ orze' nzhab Jesús lo bixa':

—Rē xa' nak rey lo rē men gat lē't men Israel, dox nile' bixa' provech rē men re'; mbaino rē más rē xa' nile' mandad lo rē men re', mis lē' bixa' nidi'zh dox wen nile' bixa' rē kwa'n. ²⁶ Per go, nale't go sa'. Mejor cho go nzhakla le' mandad, go ze' gak xa' más win; no xa' nizo dilant, nak nela tu mos ga'. ²⁷ No, ¿cho más nile' mandad? ¿Chi men nizob lo mese, o xa' nichu kwa'n gao mene? ¿Chi gat lē't xa' nizob lo mese? Per na, nak xid go nela tu men nichu kwa'n lo men ga'.

²⁸ 'No go, dubta' nguzo go kuna, or nguzaka rē kwa'n milinu men da. ²⁹ Kuze', nela mine' Xuza poder par len mandad, se'ska nene ka' go par le' go mandad, ³⁰ nes par gao go, no go go lo mes da, plo nilen mandad; no zob go plo le' go mandad lo za tu dusen ben men Israel.

Midi'zh Jesús, lē' Per gab, gat nilibe't Per Jesús

(Mt. 26:31-35; Mr. 14:27-31; Jn. 13:36-38)

³¹ No nu nzhab Señor:

—Simón, Simón; biwi' lè' Mizhab guna'b par nabej, cho go le' xa' gan ko' xa' lon, nela xmod nitsumbe men triu ga', ³² per na guna'b lo Dios por lu, par nala'l yilal da; no or yèkal lon, goknu rë wechal par zo bixa' naye lo Dios.

³³ Orze' nzhab Per:

—Señor, ter lizhyi'b yo'n kun go, no haxta ter gat da kun go.

³⁴ Orze' nzhab Jesús:

—Nin lol Per; antis di ke kè' gai kant, lè' gab chon wèlt gat nilibe'tal da.

Nzhazhin or gat Jesús

³⁵ Orze' nzhab Jesús:

—Or mixèla go, nin yent kwa'n wei' go nez; ni tu bols, ni kwa'n nigo go dimi che'n go, ni yalyid che'n go, no, ÷chi ngok jwalt tu kwa'n lo go?

Orze' nzhab bixa':

—Yent kwan ngak jwalt lo no.

³⁶ Orze' nzhab Jesús:

—Per nal nin lo go, xa' kinu bols, wei' xa'i; no xa' kinu dimi, wei' xa'i; no xa' gat kinu spad, to xa' kwa'n nzhak xa' par zi' xa' tube, ³⁷ porke nin lo go, nak la di'zh gak rë kwa'n nzobni' por da, widi'zh kwa'n nzhab: “Nu xa' nzho xid rë xa' más nzè'b xki lo men.” Walika rë kwa'n nzob lo yech por da, lè'i gak.

³⁸ Orze' nzhab rë men che'n Jesús:

—Señor, biwi' go, lè' chop spad re'.

Orze' nzhab Jesús:

—Une lai, nadi'zhtra' go.

Mina'b Jesús lo Dios plo lè Getsemani

(Mt. 26:36-46; Mr. 14:32-42)

³⁹ Orze' nguro' Jesús nela xmod nile' ka Me, nzha Me mont plo lè Olivos, nu rë men che'n Me, nzhakè tich Me. ⁴⁰ No or mizhin Me ze', nzhab Me lo rë men che'n Me:

—Bina'b go lo Dios, par nayachin go lo kwa'n gat lè'.

⁴¹ Orze' nguruya' Jesús tu lad di plo nzhin rë men che'n Me, zit nela plo nichizhin men tu ke ya' men ga'; ze' nguzuxib Me, par kina'b Me lo Dios, ⁴² nzhab Me:

—Payè', chi nzhaklal, gulo' da lo kwa'n nazhe'b re'. Per gat lè't kwa'n nin gak, sino kwa'n nzhaklale.

⁴³ Orze' nguruxo'b tu ganj lo yibè', par miza' jwers ka' Jesús. ⁴⁴ No nazhe'b niwin laxto' Jesús nela tu men naxiat ga', orze' más naye kina'b Me lo Xuz Me; no nits nzhaknei' Me ngob lo yuo, rë lan ro nela ren ga'. ⁴⁵ Or milox guna'b Jesús, ngwatso Me ña Me lo rë men che'n Me, orze' rë men che'n Me naxnaa por dox niwin laxto' bixa', ⁴⁶ orze' nzhab Jesús lo bixa':

—÷Chon naxnaa go? Waxche go, no guna'b go lo Dios, par nayachin go lo kwa'n gat lè'.

Or ngwaga' Jesús

(Mt. 26:47-56; Mr. 14:43-50; Jn. 18:2-11)

⁴⁷ Stubi kidi'zh Me, lè'chi mizhin tu béd men, no xa' kwa'n lè Judas, mis tu rë xa' kwa'n nzho xid tu dusen men che'n Jesús, dilant laka xa' re', orze' nguzubi xa' lo Jesús par michiro' xa' ta' kwats Jesús, ⁴⁸ orze' nzhab Jesús:

—Judas, na Xga'n Dios no nak da tu men yizhyuo, no ÷chi par chil da lo rë men re', chiro'l ta' kwatsa?

⁴⁹ No rë men che'n Jesús, or une bixa' kure', nzhab bixa':

—Señor, ÷dil no kun spad?

⁵⁰ No tu rë men che'n Jesús, micho' tu nzha mos che'n ngulèi' ro, lad direch, ⁵¹ orze' nzhab Jesús lo rë men che'n Me:

—jBila' go, unelai!

Orze' migal Jesús nzha mos ze', no lwega' miliwen Jesuze. ⁵² No nzhab Jesús lo rë xa' kwa'n nile' mandad, no lo rë ngulèi'; mbaino lo rë xa' nikina yado', no lo rë xa' nak zhi'n, rë xa' kwa'n nzè par zen Jesús:

—÷Chon nzatsen go da kun spad no kun yarro? Chigab tu wa'n nzatsen go. ⁵³ Rë ngubizh nguzon kun go le'n yado', no nangazent go da; per nalyè'l re' nak or che'n go, no or che'n Mizhab.

Nzhab Per, gat nilibe't Per Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Orze' nguzen bixa' Jesús, ñanu bixa' Me lizh ngulèi' ro; no lè' Per zit-zit nzhakè Per tich rë men ñanu Jesús. ⁵⁵ No or mizo'l bixa' tu ki lo luwe, orze' nguzob bixa' naka'n par bizh bixa', mbaino nu Per nguzob xid bixa'. ⁵⁶ No tu una' kwa'n nikè zhi'n ze', nzob gax plo kichè' Per, xe miwi' una' lo Per, orze' nzhab una':

—jNuka miyi' re' nikizè kun Jesús!

⁵⁷ Orze' mika'ch Per, nzhab Per:

—Wi'le una', nalibe'ta' xa' ba'.

⁵⁸ Guzhèl la di ze', xtu xa' nzhab lo Per:

—jNuka lu nak tu xpen xa' ba'!

Per nzhab Per:

—A'a mbee', gat nakt dai.

⁵⁹ No dispwés, pas nzha tu or, lè'chi xtu xa' kiyab garga'l:

—jSigurka, nu ka xa' re' nikizè kun xa' ba', porke nu ka xa' re' nzè lazh men Galilea!

⁶⁰ Orze' nzhab Per lo xa' re':

—Per mbee', jnaneta kwan kidi'zhal!

No stubi kidi'zh Per kure', lè'chi mikè' tu gai kant, ⁶¹ orze' mièk Jesús, miwi' lo Per, orze' mitsila Per kwa'n nzhab Señor: “Chon wèlt gabal: Gat nilibe'tal da, antis di kè' nguidgai kant.” ⁶² Orze' nguro' Per tich, dox nzho'n Per.

Mixizhnu bixa' Jesús

(Mt. 26:67-68; Mr. 14:65)

⁶³ Rê xa' kíkina Jesús, dub kiyin bixa' Me, kixizhnu bixa' Me, ⁶⁴ nu mitsao' bixa' lo Jesús, no nzhab bixa':

—jBine, cho kiyinal nabeil!

⁶⁵ No nu nzhab bixa' más kwa'n gat lè' lo Jesús par nde bixa' Me.

Mbiy' bixa' Jesús lo rè gustis, xa' más nile' mandad

(Mt. 26:59-66; Mr. 14:55-64; Jn. 18:19-24)

⁶⁶ No or ngwanilyuo, migan rè xa' nak zhi'n yezh, no rè xa' nile' mandad lo rè ngulèi', mbaino rè xa' nilu' ley, no mbiy' bixa' Jesús plo nzhin rè gustis xa' más nile' mandad, ze' minabdi'zh bixa' lo Me, nzhab bixa':

⁶⁷—Bine lo no, chi lu ka nak Krist.

Orze' nzhab Jesús:

—Chi nin: “Nakai”, nayilat goi, ⁶⁸ no chi nabdi'zha tu kwa'n lo go, nanet goi. ⁶⁹ Per dizde nal re', lè' Xga'n Dios, xa' nak ska tu men yizhyuo, zob lad direch che'n Dios, Me kwa'n nile' rè kwa'n.

⁷⁰ Orze' rè bixa' minabdi'zh, nzhab bixa':

—¿Chi lu ka nak Xga'n Dios?

Orze' nzhab Jesús:

—Go kine nai.

⁷¹ Orze' nzhab bixa':

—Gat naki'ntra' be, más men ne kwa'n lo be. Pwes mis be mbin kwa'n midì'zh xa'.

23

Mbiy' bixa' Jesús lo Pilat

(Mt. 27:1-2, 11-14; Mr. 15:1-5; Jn. 18:28-38)

¹ Orze', ngwatso rè bixa', ñanu bixa' Jesús lo Pilat. ² Ze' michao' bixa' di'zhyix, nzhab bixa':

—Lè' xa' re' kikide men lazh no, no ne xa', gat ñalt ga dimi che'n rey César; no nidi'zh xa', lè' xa' nak Krist, mbaino nu nak xa' rey nidi'zh xa'.

³ Orze' nzhab Pilat lo Jesús:

—¿Chi lu ka nak rey che'n rè men Israel?

Orze' nzhab Jesús:

—Go kine nai.

⁴ Orze' nzhab Pilat lo rè xa' nile' mandad rè ngulèi', no lo más rè men nzhin ze':

—Neule, na miwi', yent kwan nak xa' re' par ganin, lè' xa' nzhap dol.

⁵ Per más naye kibizhiè bixa', nzhab bixa':

—Xa' re' kiki'l rè nak men Judea kun rè kwa'n kilu' xa'. Dizde kun rè men Galilea nguzublo xa', no nal, haxta re' kile' xa'i.

⁶ No or mbin Pilat rè kure', minabdi'zh xa':

—¿Chi lazh men Galilea nzè miyi' ba'?

⁷ Orze' nzhab rè men ze':

—Walikai, men Galilea xa'.

No or mbin Pilat, lè' Jesús nzè plo nile' Herodes mandad, orze' mixè'l Pilat Jesús lo

Herodes, no lè' Herodes le'n rè ngubizh ze', mer nzo xa' yezh Jerusalén. ⁸ No or une Herodes Jesús, dox nizak laxto' xa', porke nzhala, nzhakla Herodes ne xa' Jesús por rè kwa'n nzhon xa' nile' Jesús; kuze' nzhakla xa' ne xa' le' Jesús tu señ nazhon. ⁹ Nayax dox kwa'n minabdi'zh Herodes lo Jesús, per yent kwa'n ngakab Jesús. ¹⁰ Rè xa' nile' mandad lo rè ngulèi', no rè xa' nilu' ley nzhin ze', dox kikè' bixa' kixu' Jesús. ¹¹ Orze' Herodes no rè sondad che'n xa', nguzhitnu bixa' no mixizhnu bixa' Jesús; migak bixa' tu lar wen Jesús, kwa'n nzhak rey; orze' mixè'l'ska xa' Jesús lo Pilat xtu wèlt. ¹² No mis zhè ze', michè'l Pilat no Herodes, porke nzhala ze', lè' bixa' nidil.

Nzhab rè men, gat Jesús

(Mt. 27:15-26; Mr. 15:6-15; Jn. 18:39—19:16)

¹³ Orze' mikan Pilat rè xa' nile' mandad lo rè ngulèi', no rè xa' nak zhi'n yezh, mbaino rè men yezh, ¹⁴ orze' nzhab Pilat lo bixa':

—Biwi'u, go michi xa' re' lon, no ne go, lè' xa' kichèldil men, per na minabdi'zh lo xa' lo rè nak go; no ni tu kwa'n ne go nak xa', gat walit. ¹⁵ No nu ska Herodes nane, gat nzhapt xa' dol, kuze' mixè'l Herodes xa' lon xtu wèlt, ne goi nal, yent kwa'n nzè'b xa' par ñal gat xa'. ¹⁶ Nal re', dispwè di rèle tich xa', lè' xa' liyan.

¹⁷ No rè lani Pask, niliya' Pilat tu men nzho lizhyi'b, ¹⁸ per rè bixa' nguruzhiè:

—jNaliya't go xa' re', biliya' go Barrabás!

¹⁹ No lè' Barrabás nzho lizhyi'b por michèldil xa' men yezh, no por mbit xa' men. ²⁰ Per Pilat ngokla ngaliya' Jesús, no nzhab xa' i xtu wèlt, ²¹ per rè men ze' garga'l nguruzhiè bixa', nzhab bixa':

—jBikè' go xa' lo krus! jBikè' go xa' lo krus!

²² No wèlt yon nzhab Pilat lo bixa':

—Per, ¿kwan tu kwa'n mal mile' xa' re'? Na miwi', yent kwan nak xa', par ñal gat xa'. Nal re', lox rèle tich xa', orze' liyan xa'.

²³ Per más naye kibizhiè bixa': “jBikè' go xa' lo krus!”, haxta ke mile' bixa' gan kwa'n nzhakla bixa'. ²⁴ Orze' nguziyèl Pilat kwa'n mina'b bixa', ²⁵ no miliya' Pilat, xa' kwa'n michèldil men no xa' kwa'n mbit men, porke xa' re' ngokla bixa'; orze' michi Pilat Jesús lo rè men, par mile' bixa' kwa'n nzhakla bixa' kun lè' Me.

Nkè Jesús lo krus

(Mt. 27:32-44; Mr. 15:21-32; Jn. 19:17-27)

²⁶ Or ñanu bixa' Jesús plo gat Me, nez nguzen bixa' tu miyi' xa' lè' Simón, xa' nzè lazh men Cirene, se' ñè'd xa' re' di dan, no mile' bixa' mbiy' xa' re' krus che'n Jesús yèn xa', nzhakè xa' tich Jesús. ²⁷ Nayax men nzhakè, no nayax una' nzho'n naye, di

yalnawin por kwa'n kizak Jesús. ²⁸ Orze' mièk Jesús lo rè una' ze', nzhab Me:

—Rè go una' Jerusalèn, nago'nt go por na; mejor bi'n go por mis go no por rè xmè'd go, ²⁹ porke biwi'u, lè' zhè zhin gab men: “Wen nzha rè una' kwa'n nangant mè'd, no rè una' kwa'n nangayot ngaza' chich ngo mè'd.” ³⁰ Orze' gab men lo rè yi': “Gob yek no”, no lo rè lom: “Bitsao' no”, ³¹ porke chi kun tu ya nayè' nile' bixa' kure', no nal kun ya bizh, çkwan le' bixa' kun lè'i?

³² No nu ñanu bixa' chop men mal, par nu bixa' gat kun Jesús. ³³ No or mizhin bixa' lugar kwa'n lè Kalaber, ze' mikè' bixa' Jesús lo krus; mbaino xchop men mal ze', tu xa' lad direch, no xtu xa' lad skierd che'n Jesús. ³⁴ Orze' nzhab Jesús lo Dios:

—Payè', biche' go kwa'n nzè'b xki rè men re', porke nanet bixa' kwan kile' bixa'.

No rè sondad nguzhit bixa', par cho le' gan xab Jesús, ³⁵ no rè men nzhin ze' niwi'; no haxta pla rè xa' nak zhi'n mixizhnu bixa' Jesús, nzhab bixa':

—iNayax men miliwen xa' ba', nal nabei, chi walika nak xa' Krist, xa' kwa'n ngule Dios, pwes ñal mis lè' xa' le', nagat xa'!

³⁶ Nu rè sondad mixizhnu Jesús, nguzubi bixa' kiza' bixa' nits yi'n binagr go Jesús, ³⁷ no nzhab bixa':

—Chi lè'i lu nak rey lo rè men Israel, jibile', nagattal!

³⁸ No lo tu tab, nkè tu widi'zh yek krus che'n Me kun letr grieg, no letr latin, mbaino letr hebreo. Se' nzhabe: “Xa' re' nak rey che'n rè men Israel.” ³⁹ No tu rè miyi' xa' nikè lo krus, xa' mal ze', midizh xa' kwa'n gat lè' lo Jesús, nzhab xa':

—iPwes lu nak Krist! jibile' nagatta'l, mbaino nu no nala'tal gat!

⁴⁰ Per xtu xa' kwa'n nikè xtu lad ta' krus, nzhab xa' lo xa' ze':

—çChi gat nizhebtal ninel Dios, ter sa' kizakzil? ⁴¹ Be ñalkai kizakzi be por kwa'n mile' be, per xa' re', yent cho tu kwa'n mal mile' xa'.

⁴² Orze' nzhab xa' re' lo Jesús:

—Jesús, bitsila go da or yè'd go, le' go mandad.

⁴³ Orze' nzhab Jesús:

—Sigurka, mis nal re', lè' yo kuna lo yibè'.

Or ngut Jesús

(Mt. 27:45-56; Mr. 15:33-41; Jn. 19:28-30)

⁴⁴ Pas como garol ngubizh nguzublo mikao dub lo yizhyuo, midiy como chon or; ⁴⁵ mikao lo ngubizh, no ngurèz lar kwa'n nikè le'n yado', garolta' ngoke, ⁴⁶ orze' naye guna'b Jesús lo Dios, nzhab Me:

—iPayè'! jLe'n ya'l, lan sprit da!

Or milox midizh Jesús kure', ngut Me.

⁴⁷ No or une xa' nile' mandad lo rè sondad

román, kwa'n ngok re', midizh xa' nazhon Dios, nzhab xa':

—Walika, yent kwan nzè'b miyi' re'.

⁴⁸ No rè xa' kwa'n nzhin ze', or une bixa' kwa'n ngok re', ña bixa' maska kiyich bixa' laz bixa' por tanta nalats kure'. ⁴⁹ Per rè xa' kwa'n nilibe' Jesús, no rè una' kwa'n nkizè tich Jesús dizde or nkizè Me laz men Galilea, zit nzo bixa', kiwi' bixa'.

Or miga'ch Jesús

(Mt. 27:57-61; Mr. 15:42-47; Jn. 19:38-42)

⁵⁰ No nzho tu miyi' lè Che, nu xa' nak zhi'n xid rè gustis xa' más nile' mandad lo rè men Israel. Dox wen miyi' re', no menaye xa'. ⁵¹ Gat nut xa' re' nzho lad che'n rè xa' mbit Jesús, porke nu ka miyi' re', kimbèz or zhin zhè le' Dios mandad. No yezh Arimatea nzè xa' re', kwa'n ña'n laz men Judea. ⁵² Miyi' re' ngwa lo Pilat, par guna'b xa' kwerp che'n Jesús par ga'che. ⁵³ No or mila xa' kwerp che'n Jesús lo krus, orze' michèl xa' lare', orze' ngwaka'ch xa' Jesús le'n tu ba' pura ke, plo nagat ga'ch ni tu men. ⁵⁴ No zhè re', zhè kwa'n nichao' xa' kwa'n, par zublo zhè kwa'n nayi' kè men Israel zhi'n, no mer gal or kwa'n zublo zhè re'. ⁵⁵ No rè una' kwa'n nkizè tich Jesús dizde laz men Galilea, ngwatsi' bixa' ro' ba', par une bixa' xmod nzho'b kwerp che'n Jesús. ⁵⁶ Or mièk rè una' re' par lizh, michao' bixa' aseit nax par ko bixa'i kwerp che'n Jesús; orze' mile' bixa' diskans ngubizh ze', nela xmod nzobni' ka lo ley kwa'n mila' Dios lo Muisés.

24

Nguruban Jesús

(Mt. 28:1-10; Mr. 16:1-8; Jn. 20:1-10)

¹ No primer zhè che'n sman, garzi'l laka ngwa rè una' ro' ba', no nzhanu bixa' aseit nax kwa'n michao' bixa', no nzho zipla una' xid bixa'. ² No une bixa', lè' ke kwa'n nayao' ro' ba', nax la tu lad; ³ no or nguio bixa' le'n ba', une bixa' yentra' kwerp che'n Señor Jesús, ⁴ orze' xe mia'n bixa' tuli por kure', lè'chi, jdi! nguruxo'b chop miyi' plo nzhin bixa', maska ñaz bèl xab rop miyi' re'. ⁵ No por tanta mizheb rè una' re', haxta lo yuo ngo't kuslo biuna', no nzhab rop miyi' ze':

—çChon kikwa'n go Me naban xid rè men ngut? ⁶ Yentra' Me re', lè' Me nguruban. Bitsila go xmod midizh Me lo go, or stubi nzo Me laz men Galilea, ⁷ or midizh Me: “Na nak Xga'n Dios, no nak ska da tu men yizhyuo, lè' men kwa'n más nzè'b xki lo Dios zen da, mbaino kè' bixa' da lo krus; per ngubizh yon, lè' da ruban.”

⁸ Orze' mitsila rè una' ze' widi'zh che'n Jesús.

⁹ No or mièk bixa' di ro' ba', ngwayab bixa' rè kure' lo za chi' bitub men che'n Jesús,

no lo más rē xa' kwa'n nzhin ze'. ¹⁰ Rē una' kwa'n ngwayab rē kure' lo rē apost nak Mari Madalén, no Juan, mbaino Mari xna' Jakob, no kun zipla ra' una'. ¹¹ Per rē miyi' re', xa' nak men che'n Jesús, mile' bixa' xigab, gat lē't xti'zh menaye rē kwa'n ngwayab rē una' re', kuze' nangayilat bixa'i. ¹² Per orze' nguro' Per, karre nzha Per ro' ba', no or ndixni xa' le'n ba', une Per, nab tsa lar kwa'n ngurēl Jesús nax tsa ze'. Lwega' miēk Per, net xa' kwan le' xa' por kwan ngok re'.

*Kwa'n ngok nez yezh Emaús
(Mr. 16:12-13)*

¹³ No mis zhē ze', nzha chop men che'n Jesús yezh kwa'n lē Emaús, ze' ña'n chi' bitub kilómetro par yezh Jerusalén. ¹⁴ Dub nzha rop xa' re' nez, kiza' bixa' kwent lo wech bixa', rē kwa'n ngok yezh Jerusalén. ¹⁵ No dub kidi'zh bixa' rē kure', lē'chi nguzubi Jesús, ñazē Jesús kun lē' bixa'. ¹⁶ Per mitsao' Dios lo rop xa' re', par nangalibe' bixa' choi, ¹⁷ orze' nzhab Jesús lo bixa':

—¿Kwan kidi'zh go dub nzē go nez?

Orze' ngulēz bixa', dub niwin laxto' bixa', ¹⁸ orze' nzhab tu xa' lē Cleofas:
—¿Chi nab tsa lu nzē zit, nanetal kwa'n laore ngok laka yezh Jerusalén ba'?

¹⁹ Orze' nzhab Jesús lo bixa':

—¿Per kwan ngokx?

Orze' nzhab bixa':

—Lē' Jesús xa' nzē yezh Nazaret, tu xa' mid'i'zh por Dios; milu' xa' kwa'n dox poder che'n Dios kinu xa', por rē kwa'n mile' xa', no por rē kwa'n mid'i'zh xa'. Rē kure' milu', walika mixē'l Dios xa', no milibe' mene. ²⁰ No rē xa' nile' mandad lo rē ngulē'i', no rē xa' nzo lo no, michi bixa' Jesús, lo rē xpen gubier Roma, par mile' bixa' mandad, ngut Jesús, mbaino mikē' bixa' Jesús lo krus. ²¹ Mbaino, no kimbēz, lē' xa' re' xa' mixē'l Dios, par ko' rē men Israel ya' xtu ben rē men nakap; no nalre' nzhala chon ngubizh ngok rē kure'. ²² No nu pla una' xa' nikizē kun no, mile' bixa' mia'n xe no tuli, nal garzi'l re', or ne bixa' ngwa bixa' ro' ba'; ²³ une bixa' yentra' kwerp che'n Jesús le'n ba', mbaino nu nguruxo'b chop ganj lo bixa' kwa'n nzhab: "Lē' Jesús nguruban." ²⁴ No ngwatsi' pla rē xpen no ro' ba', no nu bixa' une, nela xmod mid'i'zh ka rē una' ze', per nanganet bixa' Jesús.

²⁵ Orze' nzhab Jesús:

—iDox naxeen go par zobyek go rē kwa'n, no nazhe'b nen par yila go rē kwa'n mid'i'zh rē profet, xa' mid'i'zh por Dios nzhala! ²⁶ No, ¿chi gat naki'nt zakzi Krist, zak Krist rē nak kure', antis di ke ruxo'b Me le'n biani ro, par le' Me mandad?

²⁷ Orze' nguzublo kidi'zh Jesús, dizde kwent che'n Muisés, haxta kwent che'n rē

profet xa' mid'i'zh por Dios. Mid'i'zh Me rē nak plo nzobni' kwent che'n Me. ²⁸ No or nzhazhin bixa' tu yezh win kwa'n nzha bixa', mile' Jesús nela tu men nzha más zit ga', ²⁹ per mikwē'z bixa' Jesús, nzhab bixa':

—Más wen biya'n go kun no, porke nzhazhēlalyuo, lē' yē'l nzađla la.

Orze' nguio Jesús par ya'n Jesús kun lē' bixa'. ³⁰ No or nguzob bixa' lo mes par gao bixa', orze' nguzen Me pan, miza' Me xkix lo Dios, orze' michi'x Mei no miza' Mei ka' rop xa' re'. ³¹ Orze' mixa'l lo bixa', milibe' bixa' Jesús; per mitlo Jesús lo bixa'. ³² Orze' nzhab tu xa' lo xtu xa':

—Kuze' ka, mizi be tu kwa'n le'n laxto' be, or kidi'zh Me rē kwa'n nzobni' lo yech lo be.

³³ Mís orze' miēk bixa' par yezh Jerusalén, plo nzhin za chi' bitub men che'n Jesús kun más rē men, ³⁴ no nzhab más rē xa' nzhin ze':

—Walika, nguruban Señor, porke nuka lo Per ngurulo Me.

³⁵ Orze' mid'i'zh rop xa' re', rē kwa'n nguzak bixa' nez, no xmod ngokbe' bixa' Jesús, or michi'x Jesús pan lo bixa'.

Ngurulo Jesús lo rē men che'n Me

(Mt. 28:16-20; Mr. 16:14-18; Jn. 20:19-23)

³⁶ No stubi kidi'zh bixa' kure', lē'chi ngurulo Jesús, nguzo Me garol tsa'o plo nzhin bixa', no nzhab Me:

—Chul guzhin go.

³⁷ Orze' dox mizheb bixa', no mile' bixa' xigab, paste tu mbi che'n tu men ngut une bixa', ³⁸ orze' nzhab Jesús:

—¿Chon nizheb go?, no, ¿chon kwan kile' go xigab le'n laxto' go, ke gat lē't dai? ³⁹ Biwi' go ya'n no ni'n; lē'i na ka. Bigal go da par ne goi; porke lē' tu mbi che'n tu men ngut, gat kinute bē'l no ni wes, per na biwi'u, lē'i kinun.

⁴⁰ No or milox nzhab Me kure', milu' Me ya' Me no ni' Me, ⁴¹ per rē men che'n Me stubi gat ñilat bixa'i, por tanta nizak laxto' bixa'; net bixa' kwan le' bixa', orze' nzhab Jesús:

—¿Kwan tu kwa'n kinu go gao be re'?

⁴² Orze' miza' bixa' tlē' mbēl kwa'n ngu'y lo ki, no che'p mizhin ser, ⁴³ no nguzen Jesuze no ndao Mei lo rē bixa', ⁴⁴ orze' nzhab Me:

—Rē kwa'n nguzaka re', lē'i ni ka lo go or stubi nzon kun go; naki'n gak rē kwa'n nzobni' lo ley kwa'n mila' Dios lo Muisés por da, no rē kwa'n mid'i'zh rē profet, rē xa' kwa'n mid'i'zh por Dios, mbaino rē kwa'n nzobni' lo Salmos.

⁴⁵ Orze' mile' Jesús mixa'l yek bixa', par zobyek bixa' rē kwa'n nzobni' lo Yech che'n Dios, ⁴⁶ no nzhab Jesús lo bixa':

—Se' nzobni': Lè' Krist naki'n zakzi, per ngubizh yon lè' Me ruban; ⁴⁷ no nu nzobni', naki'n re'ch widi'zh che'n Me, par gon rë men xmod nigo' Me men lo kwa'n nzë'b xki men lo Dios chi lè' men chë' xmod nak men lo Dios, mbaino yila bixa' Krist; galo laka yezh Jerusalén zublo gon men kure'. ⁴⁸ Rë go nak xa' mbin kure', no une go rë kwa'n ngok por da; ⁴⁹ no biwi'u, nal lè'da xë'l kwa'n ne' Xuza ka' go; per biya'n go yezh Jerusalén, haxta or yo Sprit che'n Dios laxto' go.

Jesús ña lo yibë'

(Mr. 16:19-20)

⁵⁰ Orze' ñanu Jesús rë men che'n Me haxta yezh Betania, no ngulits Me ya' Me, guna'b Me ya rë men che'n Me wen, ⁵¹ no dub kidi'zh Jesús kure', nkili Me lo yibë' haxta mitlo Me. ⁵² No dispwés di miza' rë men che'n Me xkix lo Dios, orze' miëk bixa' yezh Jerusalén, dox nizak laxto' bixa'. ⁵³ No zilita', rë zhë nizo bixa' yado', nidi'zh bixa' nazhon Dios no niza' bixa' xkix lo Me.

Widi'zh nazhon che'n Jesukrist, kwa'n mizobni' Juan lo yech

Lë' Widi'zh che'n Dios ngok tu men

¹ Ni naga yo yizhyuo, lë' Widi'zh che'n Dios ya nzho la; no kun Dios nzho Widi'zh ze' no yub Dios nak Widi'zh ze'. ² Dizde orze', lë' Me re' ya nzho la kun Dios. ³ Por lë' Me re' ngulo Dios rë nak kwa'n, orze' rëi nguio; no chi gat lë' por lë' Me re'i, yent kwan ngayo. ⁴ Por lë' Me re' nzho yalnaban kun Dios par rë men, no lë' yalnaban kwa'n kinu Me re' nak ki par rë men. ⁵ Lë' ki re' nizini lo nakao, mbaino nagakt tsiyal nakao ki re'.

⁶ Nguio tu xa' nguru'lë Juan. Dios mixë'l xa' re' ⁷ par mid'i'zh xa' kwent che'n Me nak Ki re', par yila rë men widi'zh che'n Me re' por kwa'n mid'i'zh Juan lo men. ⁸ Gat lë't Juan nak Ki re', per mbi'd Juan par milu' xa' lo men cho xa' nak Ki re'. ⁹ Ki kwa'n nizini lo rë men yizhyuo re', lë' Ki re' nzhazhin la gax yizhyuo re'.

¹⁰ Lë' Me nak Ki re', miban Me yizhyuo re', no por Me re' nguio yizhyuo re'; per rë men yizhyuo nangalibe't bixa' Me nak Ki re'. ¹¹ Mbi'd Me re' lo rë men Israel, xa' nak melazh Me, per rë men re' nangalibe't bixa' Me nak Ki re'. ¹² Per par rë xa' ñila widi'zh che'n Me no rë xa' nzhon ro' Me re', mile' Me ngok bixa' xmë'd Dios. ¹³ Rë xa' re' Dios mile' bixa' xmë'd Dios; per or ngol rë xa' re', nangalnut bixa' kure', sino por xigab che'n Dios mile' Dios bixa' xmë'd Dios.

¹⁴ Kuze' lë' Me nak Widi'zh re' ngol nela xmod nzhalka tu men se'ga, no miban Me re' xid no, no une no yalnazon che'n Me, yalnazon kwa'n nab tsa Me nak Xga'n Xuz be Dios. No milu' Me haxta plo nazhi' Dios be mbaino xmod pa' nak Dios.

¹⁵ Juan mid'i'zh lo rë men por kwent che'n Jesús; se' mid'i'zh Juan naye lo rë men:

—Lë' Me re', Me mizeta lo go or nin: “Lë' Me nzadkë ticha re' más tsak lon, porke ni naga gal da, lë' Me nzho la.”

¹⁶ Mile' Me, kad no kinu yalnaban nela lë' Me ga', no tich guchin kwa'n nazhon nixë'l Me par no zilita'. ¹⁷ Por Muisés mile' Dios milibe' men Ley; per por Jesukrist, mile' Dios milibe' be dox nazhi' Dios be, no xmod pa' nak Dios. ¹⁸ Lalta' yent cho gat ne Dios; nab tsa Xga'n Dios nane, Me nak yub Dios no Me nzho tutsa kun Dios; lë' Me re' milu' lo be xmod nak Dios.

Nzhab Juan lo rë men cho nak Jesús

(Mt. 3:11-12; Mr. 1:7-8; Lc. 3:15-17)

¹⁹ Xa' nzo lo rë men Israel xa' nzho yezh Jerusalén, mixë'l bixa' pla ngulë'i' kun pla

levita par mina'bdi'zh bixa' cho nak Juan.

²⁰ Orze' tuli nzhab Juan lo bixa':

—Gat lë't da nak Krist xa' nak di'zh yi'd.

²¹ Orze' nzhab bixa' lo Juan:

—¿Cho ska lux, mbaino kwan nakal? ¿Chi lu profet Li, xa' mid'i'zh por Dios nzhala?

Orze' nzhab Juan:

—Gat lë't dai.

Orze' nzhab bixa' xtu wëit:

—¿Chi lu profet xa' nzobni' lo Yech che'n Dios, xa' nak di'zh yi'd ze'?

Orze' unkab Juan:

—Gat lë't dai.

²² —¿Orze' cho ska lux, mbaino kwan ka nakalx? —nzhab bixa' —porke lë' no naki'n yayab noi lo rë xa' mixë'l no. Kuze', bine cho lux.

²³ Orze' nzhab Juan:

—Na nak tu xa' nibizhyë naye le'n yuo bizh, nela xmod mid'i'zh ka profet Isaías por Dios: “Bitsimbe go laxto' go par yila go Dios.”

²⁴ No rë xa' mina'bdi'zh ze', men fariseo bixa'. ²⁵ Orze' nzhab bixa' lo Juan:

—No chi gat nakal ni Krist, no ni Li, no ni profet xa' nak di'zh yi'd ze', ¿chon ska nililë'i'yal men le'n nits orze'?

²⁶ Orze' nzhab Juan:

—Na nililë'i' men nab tsa le'n nits, per xid go nzo tu xa' gat nilibe't go; ²⁷ xa' re' nzadkë ticha, per natsakt da par lë' xa'; no ni gat ñal gak da tu mos che'n xa'.

²⁸ Kure' ngok ro' you' Jordán plo nililë'i' Juan men le'n nits, kwa'n ña'n yezh Betania, al nez plo nilen ngubizh.

Jesús, Me nak Mbëkxi'l che'n Dios

²⁹ No xtu riyë'l, une Juan lë' Jesús nzhazhin plo nzo Juan, orze' nzhab Juan lo más rë men nzhin ze':

—jBiwi' go! Me re' nak Me ngule la Dios par gat Me nela tu mbëkxi'l ga', nes par kubchi Me rë kwa'n nzë'b xki rë men yizhyuo lo Dios. ³⁰ Me re' Me mizeta lo go or nin: “Ticha nzadkë xtu xa' más tsak lon, porke or naga gal da, lë' Me re' ya nzho la”, ³¹ per naneta kwan nak Me re'; na nzhal par lilë'i'ña men Israel le'n nits, par libe' bixa' cho Me re'.

³² No nzhab Juan:

—Na une, ngula Sprit che'n Dios lo yibë'i yek Me re' nela tu palom ga', no ngulëz palom ze' yek Me. ³³ Naneta kwan nak Me, per Dios, Me mixë'l da lilë'i'ña men le'n nits, ne lon: “Or nel, lë' Sprit che'n Dios la lo yibë'i yek tu xa', orze' xa' re' lilë'i' men kun Sprit che'n Dios”, ³⁴ No une lon, se' ngok; kuze' nidizha, Me re' nak Xga'n Dios.

Rë men re' nak xa' galo laka ngule Jesús par gak men che'n Me

³⁵ No xtu riyé'l, nzo Juan kun choptsa men che'n xa', ³⁶ no ze' une xa' xtu wèlt lè' Jesús nzè nez plo nzo bixa', orze' nzhab Juan:

—jBiwi' go! Lè' Me ba' nak Me ngule la Dios gat nela tu mbèkxi'l ga' par kubchi Me rè kwa'n nzè'b xki rè men lo Dios.

³⁷ No or mbin rop men che'n Juan kwa'n midì'zh Juan, tuli ngwakè bixa' tich Jesús. ³⁸ Orze' mièk Jesús no une Me, lè' bixa' nzhakè tich Me, orze' nzhab Jesús:

—¿Chon nzadkè go ticha?

Orze' nzhab bixa':

—Maestr; ¿plo nzhol?

³⁹ Orze' nzhab Jesús:

—Cha'o par ne goi.

Orze' ngwatsi' bixa' plo nzho Jesús. Ze' mia'n bixa' porke nzhazhèlalyuo, pas las cutro orze'.

⁴⁰ Di lo rop rè xa' kwa'n mbin kwa'n midì'zh Juan por Jesús, tu rè xa' re' lè' Ndres, wech Simón Per, kuze' ngwakè bixa' tich Jesús. ⁴¹ Orze' mikwan' Ndres wech Ndres, xa' lè' Simón par nzhab xa':

—Lè' no mizhè'l Me nak Mesías ze' (widì'zh kwa'n gab Krist).

⁴² Orze' mbi'dnu Ndres wech xa' Simón plo nzo Jesús; no or une Jesús Simón, nzhab Me:

—Lu lè' Simón, xga'n Jonás; per nal lè'l ru'lè' Cefas (widì'zh kwa'n gab Per).

Jesús ngurezh Lip kun Natanael

⁴³ No xtu riyé'l, mile' Jesús xigab ya Me par lazh men Galilea; zhè ze' mizhè'l Me Lip, orze' nzhab Me:

—Di'kè' ticha.

⁴⁴ No Lip re' nak tu men yezh Betsaida, lo mis plo nak lazh Ndres kun Per. ⁴⁵ No or mizhè'l Lip Natanael, lweg'a' nzhab xa' lo Natanael:

—Lè' no mizhè'l Me kwa'n nize't ley kwa'n mila' Dios lo Muisés no Me kwa'n mize'tska rè men nzhala xa' midì'zh por Dios; Me re' nak Jesús, xga'n Che, xa' nzè yezh Nazaret.

⁴⁶ Orze' nzhab Natanael:

—¿Taxa yezh Nazaret rozi' tu men wen?

Orze' nzhab Lip:

—Dè' re' par nel Me.

⁴⁷ No or une Jesús nzhazubi Natanael plo nzo Me, orze' nzhab Me:

—Re' nzè tu xa' Israel, tu xa' walika nile' kwa'n nzhakla Dios, tu xa' gat nikidet men.

⁴⁸ Orze' nzhab Natanael lo Jesús:

—¿Xmod nilibe'l da?

Orze' nzhab Jesús:

—Lè' da une la lu xan tu ya nzhao' or naga yi'dnu Lipal lon.

⁴⁹ Orze' nzhab Natanael:

—Maestr; ¡lu nak Xga'n Dios, mbaino nakal rey lo rè men Israel!

⁵⁰ Orze' nzhab Jesús:

—¿Chi por nin lol, unen lu xan ya nzhao', kuze' ñilal da? Re' par dilant, lè'l ne más kwa'ro lo kure'.

⁵¹ No nu nzhab Jesús:

—Walika kwa'n nin lo go, lè' go ne, xa'l lo yibè', no ne go rè ganj che'n Dios maska nikiya-nilayèt yek Xga'n Dios, Me nu nak tu men yizhyuo.

2

Jesús mile' ngubixlo nits, ngoke vin

¹ Chon ngubizh nzha di ngok kure', nguio tu jwandang yezh Caná kwa'n ña'n lazh men Galilea. No ze' nzo xna' Jesús, ² mbaino nu lo Jesús no lo rè men che'n Me ngwane bixa' par ngwa jwandang ze'. ³ No or milox vin kwa'n kiyo rè men lo jwandang ze', orze' nzhab xna' Jesús lo Me:

—Milox kwa'n kiyo rè men re'.

⁴ Orze' nzhab Jesús:

—Lè' go una', ¿chon kine go kuba' lon? Gat gal or da.

⁵ Orze' nzhab xna' Jesús lo rè xa' nizhin ye'n lo rè men:

—Bile' go rè kwa'n ne Jesús lo go.

⁶ Ze' nzhin xo'p re ke kwa'n nzho nits kwa'n nizen rè men Israel par nzhak namba bixa' lo Dios. No kad tu rè re' re' nzhuwe'ye pas tu gayo' litr nits. ⁷ Orze' nzhab Jesús lo rè xa' nizhin ye'n lo men:

—Bichizhè go rè re ba' di nits.

Orze' michizhè ro' bixa' rèi, ⁸ orze' nzhab Jesús lo bixa':

—Nal wala' go che'pe lo xa' kwa'n nzo kile' mandad lo jwandang ba', par le' xa' prebe.

Orze' ngwala' bixa'i. ⁹ Orze' mile' xa' nile' mandad lo jwandang re' preb che'p nits kwa'n ngubixlo ngok vin re', per nanet xa' re' plo nguro' vin re', nab tsa rè xa' nizhin ye'n lo men nane kure'. Orze' ngurezh xa' nile' mandad lo jwandang re' miyi' xa' nzhak jwandang che'n re', ¹⁰ par nzhab xa':

—Rè men galo laka vin wen nzho bixa', no or nilox niza' bixa'i go men, orze' nigo' bixa' vin korriant; per lu se, lult laka ngulo'l vin kwa'n más wen.

¹¹ Kure' galo laka yalnazon kwa'n mile' Jesús yezh Caná kwa'n ña'n lazh men Galilea, par milu' Me xmod nak yalnazon che'n Me; kuze' haxta nu rè men che'n Jesús ngwayila bixa' Me nas.

¹² Dispwés di kure', orze' nzha Jesús kun xna' Me, kun rè wech Me mbaino kun rè men che'n Me, par yezh Capernaúm; ze' mia'n bixa' pla ra' ngubizh.

Jesús ngulo'tin rè xa' nile' xbi' lo luwe che'n yado'

(Mt. 21:12-13; Mr. 11:15-18; Lc. 19:45-46)

¹³ No lè' lani Pask che'n men Israel nzhazhin la, par tsila bixa' yè'l kwa'n mile'

Dios ngut dox nayax men egipto; lani ze' nzha Jesús par yezh Jerusalén. ¹⁴ No or mizhin Me le'n yado' ro ze', une Me, ze' nzhin rë xa' nile' xbi' lo luwe che'n yado', nito bixa' ma: ngo'na, mbëkxi'la, mbaino paloma; no rë xa' nich'i' dimi che'n rë men zit. ¹⁵ Or une Jesús kure', orze' mizuxkwa' Me tu bins kun do' par ngulo'tin Me rë men re' al tich kun rë ma che'n bixa'; no zhaga' miche'ch Me dimi che'n rë xa' nich'i' dimi re', no haxta rë mes che'n bixa' michixche Me. ¹⁶ No lo rë xa' nito palom ze' nzhab Me:

—¡Gulo'tin go rë kure'! ¡Nale't go lizh Xuza nela plo nzhak xbi' ga'!

¹⁷ Orze' mitsila rë men che'n Me rë widi'zh kwa'n nzobni' lo Yech che'n Dios kwa'n nzhab se': "Niyi'xian da por kwa'n kile' men kun lizhal; lë'da gat por lë'i." ¹⁸ Orze' pla men Israel xa' nak zhi'n, mina'bdi'zh lo Jesús, nzhab bixa':

—¿Kwan tu kwa'n nazhon le'l lo no par ne no, walika kinul kwa'n par le'l mandad, par le'l rë kure'?

¹⁹ Orze' nzhab Jesús:

—Bichil go yado' re', no zixchon ngubizh lë'da zuxkwa' skai xtu wëlt.

²⁰ Orze' nzhab rë men Israel ze':

—Por cho' bixo'p li'n nguiuxkwa' yado' re', mbaino lu ne, ¡chon tsa ngubizh kuxkwa'le xtu wëlt!

²¹ Per yado' kwa'n midizh Jesús lo rë men Israel ze' nak yub kwerp che'n Me. ²² Kuze', or nguruban Jesús, mitsila rë men che'n Me widi'zh re', no ngwayila bixa' kwa'n nzobni' lo Yech che'n Dios no rë kwa'n midizh Jesús.

Jesús nane xmod nak rë men

²³ No or nzo Jesús yezh Jerusalén dub kiyak lani Pask che'n rë men Israel, nayax men ngwayila widi'zh che'n Me porke une bixa' rë se'n nazhon kwa'n mile' Jesús ze'. ²⁴ Per nangayilat Jesús rë men ze', porke nane Me xmod nak rë men. ²⁵ Gat naki'nt Me cho gab xmod nak tu men lo Me, porke lë' Jesús ya nane la cho xigab nile' rë men.

3

Jesús no Nicodemo

¹ Nguio tu men fariseo xa' lë Nicodemo, no nile' xa' mandad xid rë men Israel. ² Miyi' re', or yë'i' ngwatswi' xa' lo Jesús, nzhab xa':

—Maestr, nane no, Dios ka mixë'l go par tse'd'go no, porke yent cho tu men gak le' rë zhi'n nazhon kwa'n nile' go re' chi gat nzo Dios kun lë' xa'.

³ Orze' nzhab Jesús:

—Walika kwa'n ganin lol, men nagal xtu wëlt, nagakt yo xa' plo nile' Dios mandad.

⁴ Orze' nzhab Nicodemo:

—Per, ¿xmod gal tu men xtu wëlt, tu xa' ya ngwagal la? ¿Chi zak yo xa' laxto' xna' xa' par gal xa' xtu wëlt?

⁵ Orze' nzhab Jesús:

—Walika kwa'n nin lol re', men nagal kun nits no kun Sprit che'n Dios, nagakt yo xa' plo nile' Dios mandad. ⁶ Or nzhah rë men yizhyuo, men se'ga bixa' namás; per rë xa' nzhah xtu wëlt por Sprit che'n Dios, men che'n Dios bixa'. ⁷ Naya'ntal xe por widi'zh re': "Rë men naki'n gal xtu wëlt." ⁸ Lë' mbi nzo rë plo, no ter nzhonal nzhaxe, per nanetal plo nzëi no plo ñai. Kuze' rë men se'ga nagakt zobyek bixa' xmod nzhah tu men por Sprit che'n Dios.

⁹ Orze' nzhab Nicodemo xtu wëlt:

—¿Taxa xmod nzhak kure' kun rë men?

¹⁰ Orze' nzhab Jesús:

—Taxa, lu dox nzho'b xti'zhal por dox nzhakal nilu'l Ley lo rë men Israel, mbaino, ¿chi nanetal kure' re'? ¹¹ Walika kwa'n nin, lë' no nidi'zh kwa'n nane no, no nidi'zh no kwa'n une no, per gat ñilat go kwa'n nidi'zh no. ¹² Chi gat ñilat go or nidizha rë kwa'n nzho yizhyuo re', orze', ¿xmod yila go or dizha rë kwa'n nzho lo yibë'? ¹³ Yent cho gat ya lo yibë', nab tsa Me ngulali lo yibë' nane kure', no Me re' nak Xga'n Dios; mbaino nak ska Me tu men yizhyuo. ¹⁴ No nela xmod ngulitsya Muisés tu mbë'l yi'b le'n yuo bizh ga', se'ska litsya men Xga'n Dios lo krus, Me nak ska tu men yizhyuo, ¹⁵ per rë xa' yila da, lë' bixa' ban par dubta' kun Dios.

Xmod nazhi' Dios rë men yizhyuo

¹⁶ Kwa'dox nazhi' Dios rë men yizhyuo, kuze' tugaka Xga'n Me kwa'n nzhap Me mixë'l Me yizhyuo re', nes par re' xa' yila Xga'n Dios, nayot lox bixa' lo Dios, sino ke lë' bixa' ban par dubta' kun Dios, ¹⁷ porke nangaxë'la' Dios Xga'n Dios lo rë men yizhyuo re' par gab Xga'n Me kwan nak bixa', sino par kubchi Xga'n Me rë kwa'n nzë'b xki bixa' lo Dios, kuze' mixë'l Dios Xga'n Me. ¹⁸ Men xa' yila Xga'n Dios, nana'bta' Dios kwent lo xa' por kwa'n nzë'b xki xa' lo Dios; per xa' gat ñilat Xga'n Dios, men re' kix rë kwa'n nzë'b xki xa' por nangayilat xa' tugaka Xga'n Dios kwa'n nzhap Dios. ¹⁹ Rë xa' gat ñilat Xga'n Dios, nzë'b xki la bixa' lo Dios, no por nile' bixa' kwa'n gat lë', kuze' or mbi'd Me nak Ki lo rë men yizhyuo, más nguio laxto' bixa' zo bixa' lo nakao ke par zo bixa' lo Ki che'n Dios, ²⁰ porke rë xa' gat nile't rë kwa'n milu' la Dios lo bixa', kuze' gat nzhaklat bixa' zubi bixa' lo Ki che'n Dios par nayaxo'b kwa'n nak bixa'. ²¹ Per lë' rë men, xa' walika nile' rë kwa'n milu' la Dios lo bixa', nizubi bixa' lo Ki che'n Dios, par lu', lë' rë kwa'n nile' bixa', nzë lo Dios.

Lult kwa'n midizh Juan plo nzë Jesús

²² Dispwés di ngok kure', orze' ngwa Jesús kun rë men che'n Me lazh men Judea plo mia'n bixa' pla ra' ngubizh, no nu rë men

che'n Jesús mililèi' rē men Judea le'n nits. ²³ Mbaino lè' Juan kililèi' men le'n nits yezh Enón, gax plo ña'n yezh Salim, porke dox nikè nits ze', no rē xa' nzha lo Juan, ze' ngoklèi' bixa'. ²⁴ No or mile' Juan rē kure', stubi gat yo Juan lizhyi'b, ²⁵ per pla rē men che'n Juan michè'lro' bixa' kun más rē men Israel por xmod nimbe men lo Dios kun nits, ²⁶ orze' ngwayab rē men che'n Juane lo Juan, nzhab bixa':

—Maestr, chi nitsilal miyi' kwa'n nguzo kun lu xtu ro' you' Jordán, xa' kwa'n midizhal más tsak lol ze', nal nu xa' kililèi' men le'n nits, no rē men ñakè' tich xa'.

²⁷ Orze' nzhab Juan:

—Yent cho gak le' tu kwa'n nazhon chi gat nzo Dios kun lè' xa'. ²⁸ Mis go mbin kwa'n midizha, gat lè't da nak Krist Me yi'd. Per Dios mixè'l da nzhalo lo Me. ²⁹ Porke lo tu jwandang, lè' xa' gak jwandang che'n ze', men ze' nak xa' más tsak; mbaino lè' men nichè'l xa' kwa'n nzo ta' xa', dox nizak laxto' xa' nzhon xa' chi miyi' xa' nzhak jwandang che'n. No se'ta' nizak laxto'n por miyi' ba'. ³⁰ Nal, rē zhi'n nazhon kwa'n nile' miyi' ba' naki'n re'che rē plo, per rē zhi'n nazhon kwa'n nilen, naki'n loxe.

Me nzè lo yibè'

³¹ No nzhab Juan:

—Me nzè lo yibè', Me ze' más tsak lo rē men yizhyuo; mbaino xa' nzè yizhyuo re', nab tsa rē kwa'n yizhyuo re' nane xa'. Per Me nzè al ya, Me re' nane rēi, ³² mbaino nidi'zh Me rē kwa'n nane Me no rē kwa'n nzhon Me, per yent cho ñila kwa'n nidi'zh Me. ³³ No chi yila tu men kwa'n nidi'zh Me nzè lo yibè', orze' men ze' nane, walika kwa'n nidi'zh Dios, ³⁴ porke xa' mixè'l Dios par le' zhi'n nazhon che'n Dios yizhyuo re', nab tsa widi'zh che'n Dios nidi'zh xa', porke Dios miza' rē tsa yalnazon che'n Dios nka' xa' re' por Sprit che'n Dios. ³⁵ Lè' Xuz be Dios nazhi' Me Xga'n Me, no rē tsa kwa'n kinu Me miza' Me yanu Xga'n Me. ³⁶ Men yila Xga'n Dios, xa' ze' par dubta' ban xa' kun Dios; per xa' gat ñila Xga'n Dios, nabant xa' lo Dios, sino ke kwa'n kimbèz par lè' xa' nak yalzi kwa'n nazhe'b dox kwa'n xè'l Dios par rē men xa' nzè'b xki lo Dios.

4

Jesús no tu una' Samaria

¹ Or mbin Jesús, lè' rē men fariseo nane, más nayax men kinu Me mbaino nililèi' Me, mbaino lè' Juan más che'p men kinu nidi'zh bixa', ² no ter gat lè't yub Jesús nililèi' men len nits sino rē men che'n Mei, ³ kuze' nguro' Jesús lazh men Judea, par ña ska Me lazh men Galilea. ⁴ No par zhin Me lazh men Galilea, naki'n ded Me lazh men Samaria. ⁵ Or mizhin Me tu yezh kwa'n lè' Sicar, kwa'n

ña'n lazh men Samaria, plo nax tlè' yo kwa'n mila' tu xa' tiemp lè' Jakob par xga'n xa' Che, ⁶ ze' nzob tu zo kwa'n nde'n Jakob. No tanta ngwazha Jesús di nguzè Me, ro' zo ze' nguzob Me che'p, mbaino paste garol zhè orze'. ⁷⁻⁸ No lè' rē men che'n Jesús nzha bixa' le'n yezh par nzhazi' bixa' kwa'n gao bixa'. Lè'chi mizhin tu una' Samaria nzhaka' nits ro' zo ze', orze' nzhab Jesús lo una':

—Ne'l che'p nits go'n.

⁹ No lè' rē men Israel gat nichè'lt bixa' kun rē men Samaria, kuze' nzhab una' ze':

—¿Chon kina'b go nits go lon, go men Israel, mbaino na men Samaria?

¹⁰ Orze' nzhab Jesús:

—Per chi nel kwan niza' Dios ka' men, no chi libe'l cho xa' kina'b nits lol, orze' lè'l na'b nits gol lo xa', kwa'n le' banal par dubta'.

¹¹ Orze' nzhab una' ze':

—Señor, per yent kwan kinou par ko'u nits, mbaino dox na'ch nzho nits le'n zo re'; ¿plo kinuo nits ne'u go'n kwa'n le', ban da par dubta'? ¹² ¿Chi más tsak go lo xuz no Jakob xa' tiemp ze'? Porke lè' xa' mila' zo re' par no, no re' ngu' xa' nits no rē xin xa', mbaino rē ma che'n xa'.

¹³ Orze' nzhab Jesús:

—Rē xa' nzho nits le'n zo re', lè' xa' zèi' laxto' xtu wèlt, ¹⁴ per rē xa' go nits kwa'n zan, nayotra' zèi' laxto' xa', porke nits kwa'n zan go xa', gake le'n laxto' xa' nela plo nilen nits ga', no le'i ban xa' kun Dios par dubta'.

¹⁵ Orze' nzhab una' re':

—Lè' go, ne'u nits ze' go'n par nazèi'ra' laxto'n, no par nayi'dkara' da nits re'.

¹⁶ Orze' nzhab Jesús:

—Bizè, waka' tsa'l, orze' yi'dskal xtu wèlt.

¹⁷ Per nzhab una':

—Gat kinuta tsa'n.

Orze' nzhab Jesús:

—Walika kwa'n nel, ¹⁸ porke nzha la gai' tsa'l nzhayapal, mbaino miyi' kwa'n kinul nal re', gat lè't ska tsa'le.

¹⁹ Or mbin una' widi'zh re', nzhab una':

—Lè' go, walika nak go tu men nidi'zh por Dios. ²⁰ Rē xa' tiemp, xa' ngok xuz no, xa' miban re', nguzuxib bixa' lo Dios le'n yi' re'; per rē go men Israel, nidi'zh go, nab tsa yezh Jerusalén naki'n zuxib men lo Dios.

²¹ Orze' nzhab Jesús:

Una', wayila kwa'n nin; lè' zhè zhin, lè' go zuxib lo Dios Xuz no, gat naki'ntra' ya go yi' ba', no ni gat naki'n ya go yezh Jerusalén. ²² Nal, net go cho lo nizuxib go; per no men Israel, nane ka no cho lo nizuxib no, porke xid rē men Israel yi'd Me ko' rē men lo kwa'n nazhe'b kwa'n nzho bixa'. ²³ Per lè' zhè zhin, no lè' zhè ze' mizhin la, rē men xa' walika men che'n Dios, por Sprit che'n Dios lè' bixa' zuxib lo Me walika Dios; porke por Sprit che'n Dios libe' bixa', xmod ka

nak Dios. Sa' nzhakla Dios zuxib men lo Me. ²⁴ Dios nak sprit, no xa' zuxib lo Dios naki'n le' xa'i por Sprit che'n Dios, porke sa' nzhakla Dios le' men.

²⁵ Orze' nzhab una':

—Lê'da nzhonka lê' Mesías yi'd, widi'zh re' gab Krist; or y'i'd Me re', orze' ne Me rê kwa'n lo no.

²⁶ Orze' nzhab Jesús:

—Na xa' ze', xa' kidi'zh kun lu nal re'.

²⁷ Lê'chi orze' nguibre rê men che'n Jesús, no xe miwi' bixa', lê' Jesús kidi'zh kun tu una', per ni yent cho ngaye laxto' ngana'bdi'zh kwan nzhakla una' ba' o kwan kidi'zh Jesús kun lê' una', ²⁸ orze' mila' una' ree che'n una' par nzhayab una' lo rê men:

²⁹ —jDê'ule, ne go tu miyi', xa' ne rê kwa'n nak da! ¿Pas xa' re' Krist, xa' nak di'zh yi'd?

³⁰ Orze' nguro' rê men yezh ze', nzhatswi' bixa' plo nzo Jesús.

³¹ Dub nza rê men ze' plo nzo Jesús, orze' nzhab rê men che'n Me lo Me:

—Maestr, dao go nal.

³² Per nzhab Jesús:

—Na kinu ka kwa'n gau, kwa'n nanet go kwan.

³³ Orze' kina'bdi'zh rê men che'n Me lo tu xa' kun xtu xa':

—Taxa, ¿chi nzho cho mbi'dla' la kwa'n gao Me?

³⁴ Per nzhab Jesús:

—Kwa'n gau re' nak, len rê kwa'n nzhakla Me mixê'l da, no loxa len rê kwa'n ne Me.

³⁵ Lê' go nidi'zh, zitap mbê'o' par za' yalgo'n; per na ni lo go, biwi' go, lê' yalgo'n une la par yatse. ³⁶ Xa' nikan yalgo'n, nzhax ka' xa'; no yalgo'n kwa'n nikan xa', lê'i nak ban men kun Dios par dubta', nes par xa' nza'n mbaino xa' nilits yalgo'n, lal nizak laxto' bixa'.

³⁷ Kuze' walika kwa'n nzhab di'zh: “Xa' cho nza'n no xa' cho nikan yalgo'n.” ³⁸ Na mixê'l go par kan go yalgo'n plo nanga'nt go, yent cho zhi'n mizoi lo go; xa' men ngo'ne per go ngulits yalgo'n loi, par bien che'n go.

³⁹ No nayax men yezh Sica, kwa'n ña'n laz men Samaria, ngwayila bixa' widi'zh che'n Jesús por widi'zh kwa'n nzhab una' re' lo men: “Ne xa' rê kwan nak da.” ⁴⁰ Kuze', or mizhin nayax men Samaria plo nzo Jesús, nzhab bixa' ya'n Jesús kun lê' bixa', orze' mia'n Jesús ze' chop ngubizh kun rê men ze', ⁴¹ no ngwayila ra' más men Jesús, rê xa' nzhoh ze', or mbin bixa' kwa'n midizh yub Jesús, ⁴² mbaino nu nzhab bixa' lo una' ze':

—Nalse ngwayila noi, gat lê't por nab kwa'n nele, sino ke por mis no mbin kwa'n midizh Me, walika Me re' nak Krist, Me niza' yalnaban par dubta' ka' men.

Jesús milyak xga'n tu xa' nak zhi'n che'n gobier

⁴³ Unded chop ngubizh, orze' nguro' Jesús laz men Samaria par nza Me laz men Galilea, ⁴⁴ porke mis lê'ka Me nzhab kure': “Tu men nidi'zh por Dios, nayilat men laz xa' kwa'n nidi'zh xa'.” ⁴⁵ No or mizhin Me laz men Galilea, rê men yezh ze' miwi' wen lo Me, porke rê men re' une rê kwa'n mile' Jesús Jerusalén or ngok lani Pask, porke nu ka rê men re' ngwa lani orze'.

⁴⁶ Orze' miék ska Jesús yezh Caná laz men Galilea, plo mile' Jesús ngubixlo nits, ngoke vin, ze' nzo tu xa' nak zhi'n che'n gobier, no kinu xa' tu xga'n xa' nzhakne nzho yezh Capernaúm. ⁴⁷ Or mbin xa' re', lê' Jesús ñê'd di laz men Judea par mizhin Me laz men Galilea, orze' ngwakinez xa' Jesús, no dox una' ba' ya Jesús lizh xa', par liwen Me xga'n xa', porke pe'n nak xga'n xa'. ⁴⁸ Orze' nzhab Jesús:

—Go haxta neu tu kwa'n nilu' no tu kwa'n nazhon, orze' yayilao da.

⁴⁹ Orze' nzhab xa' nak zhi'n ze':

—Lê' go, bikên laxto' go, napa gat xga'na.

⁵⁰ Orze' nzhab Jesús:

—Biyék lizhal, lê' xga'nal miak la.

Orze' ngwayila xa' re' kwa'n nzhab Jesús, orze' ña xa', ⁵¹ no jwaltra' di zhin xa', lê' rê mos che'n xa' ngwakinez la xa' par nzhab bixa':

—jKarril! jLê' xmê'dal miak la!

⁵² Orze' mina'bdi'zh xa', cho or nguzublo miak xga'n xa', orze' nzhab mos:

—Na'g, como la una zhê, nguro' xlê'.

⁵³ Orze' mitsila xa' nak xmê'de re', mer orze' nzhab Jesús lo xa': “Lê' xga'nal miak la”, orze' dub lizh xa' ngwayila Jesús. ⁵⁴ Kun kure' mirop kwa'n nazhon mile' Jesús, or nguro' Me laz men Judea, par miék Me laz men Galilea.

5

Jesús milyak tu xa' gakt win zhê kwa'n nile' rê men Israel diskans

¹ Or milox ngok rê kure', nguio tu lani che'n rê men Israel, kuze' nza Jesús yezh Jerusalén. ² No yezh Jerusalén ze', nikê tu tank nits gax laka plo lê Puert che'n mbêkxi'l; tank re' lê Betzata kun widi'zh che'n men hebreo, mbaino kinui gai' corredor. ³ Ro' rê corredor ze' nzhin nayax men nzhakne, men nikal-lo, no men ko'j, mbaino rê men mibizh tu plo; ze' nax bixa' kimbêz bixa' or win nits le'n tank ze', ⁴ porke kad pok nilali tu ganj che'n Dios par nikwin ganj ze' nits kwa'n nzhoh le'n tank, no men galo laka ño dub niwin nits, ñak xa' wane'i cho yalyizh nizak xa'. ⁵ No ze' nax tu miyi' nzhakne nzhala galbichi' bixon li'n. ⁶ Or une Jesús nax xa' ze', lê' Jesús nane la, dox nzhala nzhakne xa', orze' nzhab Jesús lo xa':

—¿Chi nzhaklal yalqal?

⁷ Orze' nkab xa':

—Lè' go, yent cho gaknu da yo'n le'n tank or niwin nits, kad or nzhaklan yo'n, xtu xa' ño galo lon.

⁸ Orze' nzhab Jesús:

—Waxche, gulits kwa'n naxal lo, no bizè.

⁹ Orze' lwegá' miak miyi' ze', ngulits xa' kwa'n ngo't xa' lo, no nguzublo nguzè xa', mbaino zhè ze', zhè kwa'n nayi' kè men Israel zhi'n. ¹⁰ Orze' nzhab pla men Israel lo miyi' miak re':

—Nalzè, zhè nile' met diskans, kuze' gat ñalt wei'yal kwa'n ngo'tal lo ba'.

¹¹ Orze' nzhab miyi' ze' lo bixa':

—Xa' miliyak da, ne lon: “Gulits kwa'n naxal lo ba', no bizè.”

¹² Orze' mina'bdi'zh bixa':

—¿Cho xa' ne lol: “Gulits kwa'n ngo'tal lo ba', no bizè”?

¹³ Per miyi' re' nanet xa' cho miliyak xa', porke lwegá' nguzè'b Jesús xid rè men nzhin ze'. ¹⁴ Guzhèla ze', mizhè'l Jesús miyi' re' le'n yado', orze' nzhab Jesús lo xa':

—Biwi', lè'l miak la nal, nale'tra'l kwa'n gat lè' lo Dios, par nazakal xtu kwa'n más nazhè'b.

¹⁵ Orze' ña miyi' ze', no ngwayab xa'i lo rè men xa' nzo lo rè men Israel, lè' Jesús miliyak xa'. ¹⁶ No por kuze', ngokla bixa' ngazen bixa' Me, por miliyak Me men zhè kwa'n nile' rè men Israel diskans, ¹⁷ per nzhab Jesús lo bixa':

—Lè' Xuza nu zhè re' nikè Me zhi'n, kuze' nu da nikè zhi'n zhè re'.

¹⁸ Por kwa'n nzhab Jesús re', más ngokla rè men Israel ze', ngagal bixa' Me, gat lè't nab por nikè Me zhi'n zhè kwa'n nile' rè men Israel diskanse, sino ke nu por nzhab Me: “Lè' Dios nak Xuza”, mbaino nu Me nile' rè kwa'n nile' Dios.

Xga'n Dios nile' mandad nela Xuz Me ga'

¹⁹ Orze' nzhab Jesús:

—Walika kwa'n nin lo go, nagakt le' Xga'n Dios ni tu kwa'n xigab yek, nab tsa nile' Me rè kwa'n niwi' Me nile' Xuz Me, no rè kwa'n nile' Xuz Me nile' Me. ²⁰ Lè' Xuz Me nazhi' Me, kuze' rè kwa'n nile' Xuz Me, nilu' Xuz Me lo Me, mbaino lè' Xuz Me laore lu' kwa'n más nazhon lo Me, kwa'n le' ya'n xe go tuli, ²¹ no nela nile' Xuz Me niruban rè men, par niza' Dios yalnaban ka' bixa', se'ska niza' Xga'n Dios yalnaban ka' men, xa' nzhakla Me za' Mei, ²² no Xuz Me nagabt kwan ñal rè men por kwa'n nzè'b xki bixa', sino ke lo Xga'n Me mila' Me kure', par lè' Xga'n Me gab kwan gak kun tu ga' rè men por kwa'n nzè'b xki bixa', ²³ nes par rè men gap kwent kwa'n nidi'zh Xga'n Dios nela xmod nzhap men kwent yub pa' Dios, Me mixè'l Me re'. No xa' nazo'b di'zh kwa'n nidi'zh Xga'n Dios, gat lè't kun Xga'n Dios mile' xa' kure' sino ke kun yub pa' Diöse.

²⁴ No nzhab Jesús:

—Dox wali kwa'n nin, xa' gon kwa'n nidizha, mbaino yila xa' Me mixè'l da, por kure' ban xa' kun Dios par dubta'. No nana'btra' Dios kwent lo xa' por kwa'n mile' xa'. No nale'tra' xa' kwa'n gat lè' par nalox xa' lo Dios, sino ke zubro ban xa' kun Dios. ²⁵ Pwes walika kwa'n nin lo go, lè' zhè zhin, mbaino lè' zhè ze' mizhin la, lè' rè men xa' nzo zit lo Dios, lè' bixa' gon widi'zh che'n Xga'n Dios, no rè xa' yila widi'zh che'n Xga'n Me re', por kure' lè' bixa' ban par dubta' kun Dios. ²⁶ Nela xmod kinu Dios yalnazon par niza' Me yalnaban ka' men par dubta', se'ska miza' Dios yalnazon re' ka' Xga'n Me, par nile' Xga'n Me ban men dubta' kun Dios. ²⁷ Mbaino nu mizo Dios Xga'n Me par na'b Xga'n Dios kwent lo rè men yizhyuo por rè kwa'n nzè'b xki bixa', no nu por nak Xga'n Dios tu men yizhyuo. ²⁸ Nawit' go lon xe por rè kwa'n kidizha lo go re', porke lè' zhè zhin, lè' rè xa' nzho le'n ba' gon widi'zh che'n Xga'n Dios, ²⁹ orze' ruban bixa', no rè xa' mile' kwa'n wen, lè' bixa' ban par dubta' kun Dios; per rè xa' mile' kwa'n gat lè', lè' bixa' ruban par dubta' zakzi bixa'.

Walika Dios mixè'l Krist

³⁰ No nzhab Jesús:

—Nagakt len ni tu kwa'n xigab yeka, nab tsa nilen nela xmod ne Xuza lon. Kuze' nali nigobe'n xmod nak men, porke gat nile'ta' kwa'n nzhaklan, sino kwa'n nzhakla Xuza, Me mixè'l da, kuze' nilen. ³¹ Chi por xigab yeka nidizha, pues gat walit kwa'n nidizha orze', ³² per nzho xtu Me nidi'zh por na, mbaino nanen, walika rè kwa'n nidi'zh Me por da. ³³ Lè' go mixè'l men par ngwana'bdi'zh bixa' lo Juan, no walika kwa'n midi'zh Juan por da. ³⁴ Per na gat naki'nt da di'zh men cho da; nin cho da lo go par ro' go lo rè kwa'n nazhè'b nzho go. ³⁵ Rè widi'zh kwa'n milu' Juan lo go ngok nela tu ki kwa'n nizini lo nakao ga'; mbaino por kwa'n milu' Juan lo go re', che'pta mizak laxto' go mile'i. ³⁶ Per na kinu kwa'n más nilu' cho da, mbaino más tsake lo rè kwa'n milu' Juan: Rè zhi'n nazhon kwa'n nilen, tutsa nake kun rè zhi'n nazhon kwa'n mika'b Xuza len. Kure' nilu', Xuza mixè'l da. ³⁷ No Xuza Me mixè'l da, lè' Me midi'zh la cho da, no ter naga gon go chi Me, no ni naga ne go Me. ³⁸ Kun ro' go nidi'zh go ñila go Dios, per gat niguchao't go widi'zh che'n Me laxto' go, porke gat ñilat go da, mbaino lè' Me mixè'l dax. ³⁹ Lè' go niwi' laka go kwa'n nzho'l go lo Widi'zh che'n Dios, nes par gab go, sa' yazhèl go xmod ban go dubta' kun Dios, mbaino rè kwa'n nzho'l go ze', na ka nize'te; ⁴⁰ per nanet go yila go da par len ban go dubta' kun Dios. ⁴¹ Par na, yent kwan tsak di'zh men wen da, ⁴² per por

nilibe'n go, wenawen nanen, gat nazhi't go Dios. ⁴³ Mbaino Me re' nak Xuza, Me mixé'l da lo go, per nanet go yila go da; lè'la cho la xtu ñila go, xa' nidi'zh kwa'n xigab yek xa' lo go. ⁴⁴ jKuze' ka, gat ñila go daxl, porke dox ño laxto' go di'zh men lè' go wen; per gat nikwa'nt go xmod ya'n go wen kun Dios, ter lè'gaka nab Me nak Dios. ⁴⁵ Nagabt go nal, na gap lo Xuza rë kwa'n nak go. Per yub Muisés gab kwan nak go, ter nile' go xigab, Muisés ko' go lo rë de kwa'n nzadkë tich go. ⁴⁶ Chi walika ngayila go kwa'n mizobni' Muisés, orze' nu ska da ngayila go, porke na nize't kwa'n mizobni' Muisés, ⁴⁷ per por gat wali ñila go kwa'n mizobni' Muisés, kuze' nu da, gat ñilat go kwa'n nidizha.

6

Jesús miza' kwa'n ndao rë men, nab tsa miyi' paste gai' mil bixa'

(Mt. 14:13-21; Mr. 6:30-44; Lc. 9:10-17)

¹ Or milox midi'zh Jesús rë kure', ña Jesús xtu ro' lagun kwa'n ña'n lazh men Galilea, plo nu nzhab men lë lagun che'n men Tiberias. ² No nayax men nzhakë tich Me, porke une bixa' rë kwa'n nazhon mile' Me, miliyak Me rë men nzhakne, ³ orze' nkili Jesús yek tu yi', ze' nguzob Me kun rë men che'n Me; ⁴ no mer la gal lani Pask kwa'n nile' rë men Israel. ⁵ Or une Jesús dox men nzhakë tich Me, orze' nzhab Me lo Lip:

—¿Plo zi' be kwa'n gao rë men re'?

⁶ Kizenbe' Me Lip par nabei kwan gab xa' (kiwi' Me xmod nak Lip), porke lè' Jesús nane la kwan le' Me, ⁷ orze' nzhab Lip:

—Ni di dimi kwa'n le' men gan chop gayo' ngubizh lo zhi'n nagalte zi' met kwa'n gao rë men re'.

⁸ No tu men che'n Jesús xa' lë Ndres wech Simón Per, nzhab xa' lo Jesús:

⁹—Tu mbwin nzo re' kinu gai' pan sebad, mbaino chop mbël, per, ¿chi zal kure' par rë men re'?

¹⁰ Orze' nzhab Jesús lo rë men che'n Me:

—Guzh go lo rë men ba' zob.

Mbaino dox nzhi'b yixyé ze', orze' rë men nguzob, no nab tsa xa' miyi' paste gai' mil bixa', ¹¹ orze' nguzen Jesús za gai' pan ze'; or milox miza' Me xkix lo Xuz Me Dios, orze' miza' Mei ka' rë men che'n Me, par ndi'z bixa'i xid rë men nayax ze', no se'ska mile' Jesús kun rop mbël ze'; rë men ndao haxta plo ngwazhë bixa', ¹² no or unela ndao bixa', orze' nzhab Jesús lo rë men che'n Me:

—Bikan go rë bilao kwa'n mia'n ba', par yent kwan nu.

¹³ Orze' mikan bixa' rë bilao kwa'n mia'n lo kwa'n ndao bixa', michizhë bixa' tu dusen kardor win. ¹⁴ Or une rë men re' kwa'n mile' Jesús, orze' nzhab bixa' lo wech bixa':

—Walika, profet xa' re', xa' nidi'zh por Dios, mbaino xa' nak di'zh zhin yizhyuo re'.

¹⁵ No lè' Jesús nane la, lè' rë men ze' nzhakla, ter nane Me, lè' bixa' wei' Me par gak Me rey lo bixa'. Kuze' nguiubchi Me lo bixa', ña Me yek yi', ze' mia'n nab Me.

Jesús nguzë lo nits

(Mt. 14:22-27; Mr. 6:45-52)

¹⁶ No or ngula yè'l, ngulayët rë men che'n Jesús ro' lagun, ¹⁷ ze' nkë bixa' le'n tu bark par ña bixa' xtu ro' nits nez yezh Capernaüm, per ngula la yè'l orze', no lè' Jesús nagat yubre Me lo bixa', ¹⁸ lè'chi orze' nguro' tu mbi ro le'n nits plo ña bixa', ¹⁹ no ñazë la bixa' paste gai' o xo'p mil metr le'n nits, lè'chi une bixa' Jesús, ñëdzë Me lo nits, nzhazhin Me lo bixa', orze' mizheb bixa', ²⁰ per nzhab Jesús lo bixa':

—jKa nai, nazhebt go!

²¹ Orze' dox nizak laxto' bixa' nguio Jesús le'n bark kun lè' bixa', orze' lwegä' mizhin bixa' yezh plo nzha bixa'.

Rë men nzhakla ne Jesús

²² No xtu riyë'l, lè' rë xa' nzhin xtu ro' nits plo nguro' rë men che'n Jesús ze', une bixa', lè' rë men che'n Jesús ña le'n tugaka bark kwa'n nzob ze', per nangabit Jesús kun rë men che'n Me, ²³ no kwantgatsa orze', mizhin zipla bark kwa'n nzë yezh Tiberias, no ze' ña'n gax laka plo miza' Jesús pan ndao rë men nayax ze', or miza' Me xkix lo Dios por lè'i. ²⁴ No or une rë men ze', yent Jesús no ni rë men che'n Me, orze' nkë rë men re' le'n pla bark par nzhakwa'n bixa' Jesús al nez yezh Capernaüm.

Jesús nak pan kwa'n nile' ban men dubta' kun Dios

²⁵ No or mizhin bixa' xtu ro' nits, ze' mizhë'l bixa' Jesús, orze' nzhab bixa':

—Maestr, ¿pok ka mizhinal re'?

²⁶ Orze' nzhab Jesús lo bixa':

—Walika kwa'n nin lo go, kikwa'n go da por ndao go haxta plo une go; no gat lè't por une go cho ka dai, por zhi'n nazhon kwa'n une go milen ba'. ²⁷ Nale't go be's xigab por kwa'n nzhao go yizhyuo re', sino ke bile' go xigab por kwa'n nayot lox, kwa'n le' ban men dubta' kun Dios. Kwa'n gao go re' nak kwa'n ninen ka' go, na nak Xga'n Dios no nak ska da tu men yizhyuo, porke lè' Xuza Dios milu' la lo rë men cho ka da.

²⁸ Orze' mina'bdi'zh rë men ze':

—¿Xmod le' no par le' no kwa'n nzhakla Dios?

²⁹ Orze' nzhab Jesús:

—Nabtsa kwa'n nzhakla Dios le' go, yila go Me kwa'n mixë'l Dios yizhyuo re'.

³⁰ Orze' mina'bdi'zh bixa' lo Jesús, nzhab bixa':

—¿Kwan tu kwa'n nazhon le'l lo no, nes yila no lu?, mbaino, ¿cho pa' zhi'n wen lé'l par no? ³¹ Rê xuz no xa' nzhala, ndao bixa' pan kwa'n lê maná or nguzê bixa' le'n yuo bizh, nela xmod nzobni' ka lo Yech che'n Dios: "Dios miza' pan kwa'n ngula lo yibê', ndao bixa'."

³² Orze' nzhab Jesús:

—Walika kwa'n nin lo go, gat lê't Muisés miza' pan kwa'n ngula lo yibê' ndao bixa', sino ke lê' Xuza Dios miza'i; per nal, lê' Xuza Dios miza' kwa'n walika pan kwa'n nzê lo yibê', ³³ porke lê' pan kwa'n nzê lo yibê' re', pan re' niza' yalnaban ka' rê men yizhyuo.

³⁴ Orze' nzhab bixa' lo Jesús:

—Lê' go, ne'u pan re' gao no dubta'.

³⁵ Orze' nzhab Jesús:

—Lê'da nak pan kwa'n niza' yalnaban; rê men xa' gak men da, nayotra' la'n bixa'; mbaino rê men xa' yila da, nayotra' zê'i laxto' bixa', ³⁶ per lê'da ni la, ter nane go cho da, per nayilat go da. ³⁷ Rê men xa' ngule Xuza gak men da, lê' bixa' yi'd lon; mbaino xa' yi'd lon, nayot zhê kubchin xa' lon. ³⁸ Nzhala lo yibê', gat lê't par len kwa'n nzhaklan yizhyuo re'i, sino nzhala par len kwa'n nzhakla Xuzai, Me nzho lo yibê'. ³⁹ No kure' nak kwa'n nzhakla Xuza, Me mixê'l da: Rê men xa' ngule Xuza gak men da, nayot lox ni tu bixa' lo Dios; na le ruban rê bixa' or yala xtu wêlt, ⁴⁰ porke kure' nak xigab che'n Xuza Me nzho lo yibê': Rê men xa' nilibe' cho da no ñila bixa' da, lê' bixa' ban dubta' kun Dios, mbaino len ruban bixa' or yala xtu wêlt.

⁴¹ Orze' por kwa'n nzhab Jesús: "Na nak pan kwa'n nzê lo yibê'", nguzublo kidi'zh rê men Israel, gat lê' por Jesús, rê xa' nak zhi'n, ⁴² nzhab bixa':

—¿Chi gat lê't Jesús re', xga'n Che? Be nilibe' ka xuz xa' re' no xna' xa'. ¿No chon kidi'zh xa', lê' xa' nzê lo yibê'?

⁴³ Orze' nzhab Jesús lo bixa':

—Nadi'zhtra' go da gat lê'. ⁴⁴ Ni tu go nagak gat gak men da, chi gat lê' Xuza Me mixê'l da yi'dnu go lon; mbaino rê xa' nak men da, na le ruban bixa' or yala xtu wêlt, ⁴⁵ porke se' ka mizobni' rê xa' midizh por Dios: "Dios tse'd rê men." Kuze', rê men xa' nzhon ro' Dios no tse'd bixa' lo Me, rê xa' ze' gak men da. ⁴⁶ Gat lê't por nin kure' kidizha, nzho cho ya une la lo Xuza; nab tsa Xga'n Dios Me nzê lo yibê', une Xuz. ⁴⁷ Walika kwa'n nin lo go; xa' yila da, xa' ze' kinu la yalnaban dubta' kun Dios. ⁴⁸ Na nak pan kwa'n niza' yalnaban par rê men, xa' yila da. ⁴⁹ Ter ndao rê xuz go xa' tiemp, pan kwa'n lê maná or nkizê bixa' le'n yuo bizh, no ngut ka bixa'; ⁵⁰ per rê men xa' gao yub pan kwa'n nzê lo yibê' re', nayotra' gat bixa'. ⁵¹ No na nak pan kwa'n nzê lo yibê' re', kwa'n niza' yalnaban par dubta' ka' men; no xa' gao pan re', lê' xa'

ban dubta' kun Dios, no pan kwa'n zan gao men re' nak kwerp da kwa'n zan par rê men yizhyuo.

⁵² Orze' rê xa' nzhin ze', xa' nzo lo rê men Israel, nguzublo kichê'lro' mis lê' bixa', nzhab bixa' lo wech bixa':

—¡Taxal, ¿xmod ne' xa' re' kwerp che'n xa' gao be?

⁵³ Orze' nzhab Jesús:

—Walika kwa'n nin lo go, chi lê' go nagao kwerp che'n Xga'n Dios, Me nak ska tu men yizhyuo, no chi nago go ren che'n Me, nabant go dubta' kun Dios. ⁵⁴ Rê xa' gao kwerp da no go xa' ren da, men re' kinu yalnaban dubta' kun Dios; mbaino len ruban xa' or yala xtu wêlt, ⁵⁵ porke lê' kwerp da nak wali pa' pan kwa'n gao rê men, no ren da nak kwa'n wali pa' naki'n go rê men. ⁵⁶ Men xa' gao kwerp da mbaino go xa' ren da, men re' dubta' zo kun na, no na kun lê' xa'. ⁵⁷ Lê' Xuza, Me mixê'l da yizhyuo re', kinu yalnaban par dubta', no por lê' Me kinun yalnaban. Se'ska, rê men xa' gao kwerp da, dubta' kinu xa' yalnaban por da. ⁵⁸ Kure' nak pan kwa'n nzê lo yibê', no gat nakte nela pan maná kwa'n ndao rê xuz go, xa' nzhala or nkizê bixa' le'n yuo bizh, mbaino ngut ka bixa'. Per xa' gao pan kwa'n nzê lo yibê' re', xa' re' ban dubta' kun Dios.

⁵⁹ Rê kure' midizh Jesús or kilu' Me widi'zh che'n Dios le'n yo' plo nitse'd rê men Israel widi'zh che'n Dios, kwa'n nzob yezh Capernaúm.

Widi'zh kwa'n nile' niban men dubta' kun Dios

⁶⁰ No or mbin rê men che'n Jesús widi'zh re', nzhab bixa':

—Dox nagan widi'zh re' par zobyek mene; pas yent cho gak zobyeke.

⁶¹ Or une Jesús, lê' rê men che'n Me kidi'zh gat lê' por kwa'n midizh Me, kuze' nzhab Me:

—¿Chi por kwa'n midizha ba', nzho go la', nayilatra' go da? ⁶² ¿Per chi ne go, kilin plo nzho'n or naga yala yizhyuo re'? ⁶³ Lê' Sprit che'n Dios niza' yalnaban ka' men; chi gat lê' por Sprite, yent kwa'n zu' kwerp che'n men; no widi'zh kwa'n nin lo go nzê por Sprit che'n Dios, mbaino nile'i niban men dubta' kun Dios. ⁶⁴ Per xid go stubi nzho zipla go xa' gat ñilat widi'zh kwa'n nidizha.

Lê' Jesús nane la dizde or galo, cho rê xa' gat ñilat rê kwa'n nidi'zh Me, mbaino cho xa' chi Me par gat Me, ⁶⁵ orze' nzhab Jesús:

—Kuze' nin lo go, yent cho gak, gak men da chi gat lê't por Xuza zhin bixa' lon.

⁶⁶ No dizde orze' nayax rê xa' nzhakê tich Jesús, mila' bixa', nangakêtra' bixa' tich Me.

⁶⁷ Orze' mina'bdi'zh Jesús lo za tu dusen men che'n Me, nzhab Me:

—Mbaino go ga', orze', ¿chi nu go la' da?

⁶⁸ Lè'chi orze' nzhah Simón Per:

—Señor, ¿cho tich yaké no?, porke nab gaka go kinu widi'zh kwa'n nile' ban men dubta' kun Dios, ⁶⁹ porke no ngwayila la go, mbaino nane ka no, go nak Krist, Me Nazhon che'n Dios.

⁷⁰ Orze' nzhah Jesús:

—Ter na ngule za tu dusen go, iper tu go, nzho Mizhab laxto'!

⁷¹ Kure' midì'zh Jesús por Judas, xga'n Simón Iscariote; porke lè' Judas nak xa' michi Jesús par ngut Me, no ter nu Judas nzho xid za tu dusen men che'n Me.

7

Rè wech Jesús ngayilat bixa' Jesús

¹ Or milox midì'zh Jesús rè kure', nikizé Jesús lazh men Galilea; no gat nzhaklat Jesús yo Me lazh men Judea, porke ze' rè xa' nak zhi'n Israel kikwa'n bixa' Me par gut bixa' Me, ² no nzhazhin gax la lani che'n rè men Israel, or nizuxkwa' bixa' rranch, ³ orze' nzhah rè wech Jesús lo Me:

—Naya'ntal re'; wa lazh men Judea, par nu rè men che'nal xa' nzhin ba', ne bixa' rè zhi'n nazhon kwa'n nile'l ba', ⁴ porke or nzhakla tu men xo'b xti'zh xa', gat nile't xa' che'n xa' naga'ch; kuze' chi lè'l kile' rè zhi'n ba', bile'i lo rè nak men yizhyuo.

⁵ Se' nzhah bixa', porke ni tu rè wech Jesús, gat ñilat bixa' Jesús. ⁶ Orze' nzhah Jesús lo bixa':

—Par go rè or wen, per par na gat gal or yan lani. ⁷ Rè men yizhyuo re', gat niyi't bixa' nine bixa' go; per na niyi' bixa' nine bixa', por nidizha rè kwa'n gat lè' nile' bixa'. ⁸ Go wa lani ba'. Na nayat, porke gat gal or yan.

⁹ No or milox midì'zh Jesús kure', ngulèzra' Me xche'p lazh men Galilea.

Nzo Jesús lani kwa'n lè "La rranch"

¹⁰ No or nzha la rè wech Jesús lani ze', orze' nu Jesús ngwa lani re' xla'n, ¹¹ no rè xa' nak zhi'n Israel, kikwa'n bixa' Jesús lo lani ze', nzhah bixa':

—¿Ma miyi' ze' re'?

¹² Xid rè men ze', rè mod nize't bixa' Jesús, nzho bixa' kidi'zh: “Wenka Jesús”, mbaino más bixa' kidi'zh: “A'a, nikide xa' ze' men.”

¹³ Ter rè men kize't xmod nak Jesús, per xla'n kidi'zh bixa'i por nizheb bixa' lo rè men xa' nzo lo rè men Israel, ¹⁴ per mer garol la nzha lani, lè'chi nguio Jesús le'n yado', nguzublo Me kilu' Me widi'zh che'n Dios lo rè men nzhin ze', ¹⁵ orze' rè men Israel xa' nile' mandan nzhin ze', xe mia'n bixa' tuli no nzhah bixa':

—¿Plo mitse'd kure', tatu nazhe'b nzhak xa', rēi nane xa', mbaino nangat xa' skwel?

¹⁶ Orze' nzhah Jesús:

—Rè widi'zh kwa'n nilun lo go, gat lè't chedai; che'n Dios Me mixé'l dai. ¹⁷ Chi nzho tu men nzhakla, le' kwa'n nzhakla Dios; orze' ne xa' plo nzè kwa'n nilun lo go; chi lo Diose, o por xigab yekai. ¹⁸ Men xa' nidi'zh por mis lè' xa', nidi'zh xa' par yèt xa' wen namás; per xa' nikwa'n di'zh men wen por xa' mixé'l xa' yizhyuo re', xa' ze' se nidi'zh nab tsa kwa'n nzhakla xa' mixé'l xa', no yent cho widi'zh mbèl nzho laxto' xa'. ¹⁹ No, ¿chi nangane't Muisés ley, ka'o? Mbaino, ¿chon ni tu go gat nile't kwa'n nzobni' lo ley? No, ¿chon nzhakla go gut go da orze'?

²⁰ Orze' nzhah rè men nzhin ze':

—¡Tu mbi mal nzenal! ¿Kwan nidi'zhal? ¿Cho nzhakla gutal?

²¹ Orze' nzhah Jesús:

—Por milen tu kwa'n nazhon, zhè kwa'n nile' go diskans, kuze' rè go niwi' nayi' lon. ²² Per nu go nile' zhi'n, ter zhè kwa'n nayi' kè men Israel zhi'n. Lè' Muisés mizobni' lo ley, naki'n kè' go señ kwerp che'n xga'n go (ter gat lè't Muisés ngulo ley re', sino ke rè xuz go xa' nzhalala nguloi), no ter zhè re' nile' go kure', niké' go señ plo nak xa' miyi'. ²³ No chi par le' go kwa'n nzobni' lo ley, niké' go señ kwerp che'n men, ter zhè kwa'n nile' go diskans; orze', ¿chon niyi' go por miliyaka tu men mis zhè re'? ²⁴ Nadi'zht go kwan nak tu men por xmod nilu' xa' namás, sin naga ne go, chi walika nzhap xa' dol.

Jesús midì'zh plo nzè Me

²⁵ Orze' nguzublo mina'bdì'zh pla men yezh Jerusalén, nzhah bixa':

—¿Chi gat lè't xa' ba', xa' kikwa'n rè xa' nak zhi'n, par gut bixa' miyi' ba'? ²⁶ No kidi'zh miyi' lo rè nak men, mbaino yent kwan nzhah rè xa' nak zhi'n lo xa'. ¿Pas nu rè xa' nak zhi'n ba', ngwayila la, lè' miyi' ba' nak Krist? ²⁷ Per be nane ka plo nzè miyi' ba'; per or yi'd xa' nak Krist, yent cho nane plo yi'd xa'.

²⁸ No mer kilu' Me widi'zh che'n Dios le'n yado', lè'chi mbin Me kwa'n nzhah rè xa' re', orze' naye midì'zh Me, nzhah Me lo rè xa' nzhin ze':

—Go, ter niwi' go lon, per nanet go cho da, mbaino ni nane go plo nzhalala. Per gat nzhalta por xigab yeka, sino ke nzho ka tu Me mixé'l da, no Me re' Me ñal yila go; ter gat nilibe't go Me. ²⁹ Per na nilibe' ka Me, porke lo Me nguro'n, no lè' Me mixé'l da.

³⁰ Orze' ngokla pla rè men ze' ngazen bixa' Jesús, per ni tu bixa' nangayet la ngale'i, porke gat gal or che'n Me, ³¹ per nayax men nzhin ze' ngwayila bixa' Jesús, no nzhah bixa':

—Taxa, ¿chi másra' rè kwa'n nazhon le' Krist or yi'd Krist ke lo xa' re'?

Mixé'l rè men fariseo pla men par ngazen bixa' Jesús

³² No or mbin rē men fariseo kwa'n kidi'zh rē men, orze' rē men fariseo ze' kun rē ngulēi' xa' nile' mandad, mixē'l' bixa' pla xa' nikina yado' par ngazen bixa' Jesús, ngago bixa' Me lizhyi'b, ³³ orze' nzhah Jesús lo rē xa' ze':

—Xche'ptsa nzon kun go, lē'da bi' la lo Me mixē'l' da yizhyuo re'; ³⁴ lē' go kwa'n da per nayazhē'lt go da, porke nagakt yi'd go plo yo'n.

³⁵ Orze' nguzublo kina'bdi'zh bixa' lo wech bixa', nzhah bixa':

—¿Plo bi xa' re', mbaino nayazhēlt be xa'? ¿Pas plo nzhin rē men Israel, xa' nzhoh lazh men grieg bi xa', par lu' xa'i lo rē xa' ze'? ³⁶ ¿Kwan gab widi'zh kwa'n ne kure' lo be: “Lē' go kwa'n da per nayazhē'lt go da, porke nagakt yi'd go plo yo'n”?

You' kwa'n niza' yalnaban

³⁷ No lult zhē lani ze', nak zhē kwa'n más tsak, no zhē ze' dox naye mid'i'zh Jesús lo rē men Israel xa' nzhin ze', nzhah Me:

—iCho go nizēi' laxto', yi'd go lon par go go nits kwa'n niza' yalnaban par dubta! ³⁸ Nela xmod nzobni' ka lo Yech che'n Dios, laxto' xa' yila da, gak nela le'n tu you' plo nilen nits kwa'n niza' yalnaban par dubta'.

³⁹ Sa' mid'i'zh Jesús par nzhah Me xmod gak kun rē xa' yila Me, lē' Sprit che'n Dios yo laxto' bixa'; porke nagata' xē'l' Dios Sprit che'n Dios, porke lē' Jesús nagata' bi lo yibē'.

Mile' Jesús milē' men

⁴⁰ No pla rē xa' nzhin ze', or mbin bixa' rē kwa'n mid'i'zh Jesús, orze' nzhah bixa':

—Walika miyi' ba' nak xa' nidi'zh por Dios, xa' nak di'zh yi'd, nela xmod nzobni' ka lo Yech che'n Dios.

⁴¹ No más bixa' nzhah:

—Lē'ka Me ba' nak Krist, Me kimbēz be yi'd.

Per zipla men nzhah:

—Per gat lē't xa' ba' nak Krist, porke nagakt yi'd Krist lazh men Galilea, ⁴² porke lo Yech che'n Dios nzobni', lē' Krist naki'n yi'd ben che'n Dabi, no yezh Belén naki'n gal Me, plo ngok ska lazh rey Dabi.

⁴³ No por kuze', rē men nzhin ze', ziyēn xigab mile' bixa' por Jesús. ⁴⁴ Nzhoh bixa' ngokla, ngakē' Jesús lizhyi'b, per ni tu bixa' nangayet laxto' ngale'i.

Rē xa' nak zhi'n nangayilat bixa', lē' Jesús nak Krist

⁴⁵ Orze' miēkska rē xa' nikina yado' ze', plo nzhin rē men fariseo, no kun rē xa' nile' mandad lo rē ngulēi', orze' mina'bdi'zh rē xa' re', nzhah bixa':

—¿Chon nangayi'dnu go miyi' ze'?

⁴⁶ Orze' nzhah rē xa' nikina yado' ze':

—iYent cho nidi'zh nela xa' re' ga!

⁴⁷ Orze' nzhah rē men fariseo ze':

—¿Chi nu go mila' mikide xa' ba' go? ⁴⁸ Porke nagat yila tu rē xa' nzo lo no xa' ba', no ni tu rē xa' fariseo, nagate. ⁴⁹ iPer rē men re', rē bixa' nanet kwan nzobni' lo ley, kuze' rē bixa' nzhi'bde!

⁵⁰ No Nicodemo, xa' ngwatsi' lo Jesús or yē'l, nu xa' re' nak tu men fariseo no nzhoh xa' xid rē men ze'; orze' nzhah xa':

⁵¹ —Per lo yech che'n be nzobni', nagakt kē' be kixu' tu men sin naga ne be kwan mile' xa'.

⁵² Orze' ndil bixa' Nicodemo, nzhah bixa':

—iO nul nzē lazh men Galilea! Biwi' lo Yech che'n Dios par nel, lē' yezh Galilea, lalta' nagat rozi' tu xa' nidi'zh por Dios.

Kwent che'n tu una' kwa'n ngwaga' kun xtu miyi'

⁵³ Orze' kad bixa' ña lizh bixa'.

8

¹ Mbaino lē' Jesús nzhah par dan kwa'n lē' Olivo. ² No xtu riyē'l, garzi'l laka nzhah Jesús le'n yado' xtu wēlt, orze' nguzubi rē men lo Me; orze' nguzob Jesús ze' no nguzublo Me kilu' Me widi'zh che'n Dios lo rē men ze', ³ lē'chi mizhin pla xa' kwa'n nilu' ley kun zipla men fariseo, no nzhanu bixa' tu una' lo Jesús kwa'n ngwaga' kun xtu miyi', no mizo bixa' una' ze' garol sao' lo más rē men nzhin ze', ⁴ orze' nzhah bixa' lo Jesús:

—Maestr, lē' una' re' ngwaga' kun xtu miyi', ⁵ no lo ley kwa'n mila' Muisés lo be, rē una' kwa'n nak sa' naki'n gat kun ke; no lu ga', ¿kwan nel?

⁶ Se' mid'i'zh bixa' par ne bixa' nabe'i, xmod kab Jesús lo kure', nes par gak gab bixa' lo rē xa' nile' mandad, lē' Jesús nzē'b xki. Orze' nguzobda' Jesús lo yuo par kē' Me letr kun bikwen ya' Me, ⁷ no como stubi kina'bdi'zh bixa' lo Jesús, orze' nguzuliska Me par nzhah Me:

—Xa' nzo xid go, xa' yent kwan nzē'b xki lo Dios, xa' ze' galo laka kē' tu ke.

⁸ Orze' nguzobda' Me xtu wēlt lo yuo par mikē' Me más kwa'n. ⁹ Or mbin rē xa' re' kwa'n mid'i'zh Jesús, orze' mizi bixa', lē' bixa' nzē'b xki lo Dios, orze' nguzublo tuga' bixa' ña, galo laka rē xa' más ngwagal orze' lult rē xa' xi, lult mia'n nab tsa Jesús kun una' ze'. ¹⁰ No or nguzuli Jesús, nzhah Me lo una' ze':

—Una', ¿ma rē xa' michil lon ze'? ¿Chi yent ni tu rē xa' ne, lē'l' nzē'b xki?

¹¹ Orze' nzhah una' re' lo Jesús:

—Lē' go, yent ni tu bixa'.

Orze' nzhah Jesús:

—Ni na, gat nita lē'l' nzē'b xki; nal bizē, per ya nale' tra'le.

Jesús nak Ki par rē men yizhyuo

¹² Jesús mid'i'zh lo rē men xtu wēlt, nzhah Me:

—Lê'da nak ki par rë men yizhyuo re'; xa' yi'dkë ticha, lê' xa' gap ki kwa'n le', dubta' ban xa' kun Dios, no nayot zhë ban xa' lo nakao.

¹³ Orze' nzhab rë men fariseo:

—Per yubal kidi'zh por lu, kuze' yent cho yila kwa'n nidi'zhal.

¹⁴ Orze' nzhab Jesús:

—Ter yuba nidi'zh por da, per walika kwa'n nidizha; lê' da nane ka plo nzhala no nane ka plo bi'n; per go nanet go plo nzhala no ni nane go plo bi'n. ¹⁵ Lê' go nigobe' xmod nak men di xmod nzë yek go, per na gat nigobe'ta xmod nak men kun mis xigab da, ¹⁶ per chi kobe'n xmod nak men, orze' na lei nela xmod ñal kai, porke gat nabta' nzo par lene, sino ke rop no nzo kun Xuza, Me mixë'l da. ¹⁷ Haxta nu lo ley che'n go nzobni', or chop men nidi'zh tutsa kwa'n, orze' kwa'n nidi'zh rop xa' re', lê'i walika. ¹⁸ Mbaino na, walika kwa'n nidizha por da, no Xuza Me mixë'l da, nu ska Me nidi'zh, walika kwa'n nidizha.

¹⁹ Orze' mina'bd'i'zh bixa':

—¿Ma xuzal nal?

Orze' mikab Jesús:

—Go gat nilibe't go da, no ni Xuza gat nilibe't go. No chi ngalibe' go cho da, nu ska Xuza ngalibe' go orze'.

²⁰ Rë widi'zh re' mid'i'zh Jesús dub kilu' Me widi'zh che'n Dios le'n yado', nez plo nzob kwa'n nila men gon; no yent cho ngazen Jesús, porke nagat gal or gut bixa' Me.

Plo bi'n nagakt bi go

²¹ Orze' nzhab Jesús xtu wëlt:

—Lê'da bi', no lê' go kwa'n da, per lê' go lox lo Dios por naban go lo rë kwa'n gat lê'; no plo bi'n, nagakt bi go.

²² Orze' nzhab rë men Israel, xa' nak zhi'n:

—¿Taxa mis lê' xa' gut xa'? ¿Chon nzhab xa': "Plo bi'n nagakt bi go"?

²³ No nu nzhab Jesús:

—Go nak men xa' nzhak kwa'n nzho yizhyuo re' namás, per na nzhak rë kwa'n nzho lo yibë'; kuze' nin lo go, lê' go nak men yizhyuo re', per na gat lê't men yizhyuo re' da. ²⁴ Kuze' nin lo go, lê' go lox lo Dios por naban go lo rë kwa'n gat lê'; no chi lê' go gat ñila cho da, lê' go lox lo Dios.

²⁵ Orze' mina'bd'i'zh bixa':

—¿Cho lux? —nzhab bixa'.

Orze' nzhab Jesús:

—Lê'da ñilai lo go, dizde or galo laka. ²⁶ Nzho dox kwa'n ganin lo go por rë kwa'n gat lê' kwa'n nak go; no Me mixë'l da, walika kwa'n nidi'zh Me nak go, no rë widi'zh kwa'n nidizha lo rë men, Me mixë'l da nei lon.

²⁷ Per nanganut laxto' bixa', yub Dios mid'i'zh Jesús or nzhab Me, lê' Xuz Me mixë'l Me, ²⁸ kuze' nzhab Jesús:

—Or lox le' go rë kwa'n nzhakla go le' go kun Xga'n Dios, Me nak ska tu men yizhyuo, orze' ne go cho da, no yent kwan gak len por mis da, nab tsa nilun lo go kwa'n milu' Xuza lon, ²⁹ porke Me mixë'l da nzo tutsa kun na; no gat nila't Xuza naba, porke zililita' nilen kwa'n nzhakla Me gak, no kwa'n ño laxto' Me.

³⁰ No or milox mid'i'zh Jesús kure', dox nayax men ngwayila Me.

Xmod nak rë men che'n Dios, no rë men che'n Mizhab

³¹ Orze' nzhab Jesús lo rë men Israel, xa' ñila Jesús:

—Chi lê' go ban dubta' nela xmod midizha lo go, orze' walika nak go men da, ³² mbaino lê' go libe' Yub pa' Dios, Me walika Dios; orze' nagaktra' go nela mos nado lo xtu men ga'.

³³ Orze' nzhab rë men Israel ze':

—Lê' no nzë ben che'n Abraham, no lalta' gat, gak no nela mos nado lo ni tu men; no ¿chon nel, nagaktra' no mos nado lo xtu men?

³⁴ Orze' nzhab Jesús:

—Walika kwa'n nin, rë xa' naban lo kwa'n gat lê', lê'i nile' mandad lo bixa', nela xmod nile' tu men mandad lo tu mos che'n men.

³⁵ Tu xa' nak mos nado lo xtu men, naya'nt xa' lizh xa' nikë xa' zhi'n che'n dub tiemp ban xa'; nab tsa xga'n pa' xa' nile' mandad ze', ya'n lizh xuz dub tiemp ban xa'. ³⁶ No chi lê' Xga'n Dios le', ro' go lo kwa'n gat lê', walika kwa'n nin, nagaktra' go nela tu mos nado lo xtu men. ³⁷ Na nane ka, lê' go nzë ben che'n Abraham, per nzhakla go gut go da, por gat ñila go kwa'n nidizha. ³⁸ Mbaino rë kwa'n nidizha lo go, lo Xuza mitse'dai; no sa' ska go, nile' go rë kwa'n mitse'd go lo xuz go.

³⁹ Orze' nzhab bixa' lo Jesús:

—Per no se, ¡Abraham nak xuz no!

Orze' nzhab Jesús:

—Chi lê' go walika nzë ben che'n Abraham, orze' ñal ban go nela xmod miban Abraham ga', ⁴⁰ mbaino dubta' midizha lo go nela xmod nzhakla Dios, mbaino dub sa' nzhakla go gut go da; ¡per Abraham nangayot ngak xa' sa'! ⁴¹ Rë kwa'n nile' xuz go kuze' nile' go.

Orze' nzhab bixa':

—Gat lê't chola men nak xuz no; ¡nab tsa Dios nak Xuz no!

⁴² Orze' nzhab Jesús:

—Chi lê'i walika Dios nak Xuz go, orze' lê' go ngachizhi' da, porke Dios mixë'l da, nzon kun go re'; no gat lê't tli nzhala, Dios ka mixë'l da yizhyuo re'. ⁴³ Gat nizobyekt go widi'zh da por gat nzhaklat go gon goi. ⁴⁴ Lê' yub Mizhab nak xuz go, por nile' go kwa'n nzhakla xa'. Lê' Mizhab nak tu xa' nzhut

men dizde or nguio yizhyuo, no lalta' gat nzhudizht xa' kwa'n wali. Or nikè' xa' mbèl, orze' nilu' kwan nak xa'; pura kwa'n mbèl nidi'zh xa' porke lè' xa' niki'l men nidi'zh men kwa'n mbèl. ⁴⁵ Ter kidizha kwa'n wali, per gat ñilat goi. ⁴⁶ ¿Cho tu go gak ne, kwan tu kwa'n nak da? No chi nidizha kwa'n wali, orze', ¿chonska gat ñila go da? ⁴⁷ Xa' nak men che'n Dios, nzhon xa' widi'zh che'n Dios, per go, gat nzhot go widi'zh che'n Dios, kuze' gat lè't men che'n Dios go.

Ni naga gal Abraham, lè' Krist nzho la

⁴⁸ Orze' nzhab rë men Israel ze':

—¡Walika kwa'n ne no: Lu tu men Samaria, mbaino nzhak miyizhal, mbi mal nzho laxto'! ¿Kwan nidi'zhal?

⁴⁹ Orze' nzhab Jesús lo bixa':

—Ni tu mbi mal gat nzhot laxto'n, no nab tsa nidizha pura kwa'n wen por Xuza; per go gat nzhot go nzho'n. ⁵⁰ Na gat nikwanta' di'zh men wen ticha, per nzho xtu Me nzhakla di'zh men wen por da, no Me re' ñal kobe' (wi') xmod nak da. ⁵¹ Dox wali kwa'n nin lo go, xa' yila widi'zh da, nayot gat xa'.

⁵² Orze' nzhab rë men Israel ze':

—¡Nalse walika, nzho mbi mal laxto'! Abraham no rë xa' midizh por Dios, ngut ka bixa', no nel lo no: “¡Men xa' yila widi'zh da nayot gat xa'!” ⁵³ ¿Chi más tsakal lo xuz no Abraham orze'? Lè' xa' ngut, no más rë xa' nidi'zh por Dios nzhala, no lu, ¿cho nile'l xigab nakal?

⁵⁴ Orze' nzhab Jesús:

—Chi mis da nidizh wen da, orze' natsakt kwa'n nidizha; per Me nidi'zh wen por da nak Xuza; yub Me kwa'n nidi'zh go nak Dios che'n go, ⁵⁵ per nangayot ngalibe' go Me, per na nilibe' ka Me. No chi nin lo go, gat nilibe'ta' Me, mbèl da orze' nela go ga'. Per na ni, lè'da nilibe' ka Me, no nilen kwa'n mika'b Me lon. ⁵⁶ Abraham xa' ngok xuz go nzhala, dox mizak laxto' xa' or mbin xa' zhin zhè yala, no une xa'i, orze' más mizak laxto' xa'.

⁵⁷ Orze' nzhab rë men Israel ze' lo Jesús:

—Nagat gapal ni cho' bichi' li'n, ¿no nidi'zhal, unel Abraham?

⁵⁸ Orze' nzhab Jesús:

—Dox wali kwa'n nin lo go, ni naga gal Abraham, lè'da nzho' la.

⁵⁹ Orze' nguzen bixa' ke par kè' bixa'i ta' Jesús, per nguiuka'ch Jesús lo bixa', orze' nguro' Jesús le'n yado'.

9

Jesús mile' ngwani lo tu men nikal-lo, dizde or ngol

¹ No or nzhaded Jesús tu plo, une Me tu miyi' ngolnu nikal-lo, ² orze' mina'bdi'zh rë men che'n Me lo Me, nzhab bixa':

—Maestr, ¿chon dizde ngol miyi' ba' nikal-lo xa'? ¿Chi por dol che'n xuz xa'i o por che'n xna' xa'i; o por mis xtol xa'i?

³ Orze' nzhab Jesús:

—Gat lè't por xtol xa'i, no ni gat lè' por che'n xuz xa'i, no ni gat lè' por che'n xna' xa'i; lè'i nak par ne men, yalnazonh che'n Dios por xa' re'. ⁴ Dub ñani zhè, naki'n le' be zhi'n nazonh che'n Dios, Me mixè'l da, porke or nzhala yè'l, yentra' cho gak le' zhi'n; ⁵ dub nzon yizhyuo re', lè'da nak Ki kwa'n nizini lo rë men yizhyuo.

⁶ Or milox midizh Jesús kure', michuk Me lo yuo, no kun nzhuk re' michao' Me che'p ben, orze' mitsa' Mei zalo miyi' re', ⁷ orze' nzhab Me:

—Wazèt lol kun nits le'n tank kwa'n lè Siloé (widi'zh kwa'n gab: “Mixè'l xa”).

No ze' ngwazèt xa' nikal-lo re' lo xa', no or mièk xa' plo nzo Jesús, lè' lo xa' ñani la. ⁸ No rë xa' nzho gax kun lè' xa', no rë xa' nilibe' xa' nina'b xa' gon, nzhab rë men re' lo wech bixa':

—¿Chi gat lè't miyi' re' xa' nizob nina'b gon ze'?

⁹ Nzho xa' nzhab:

—Lè' xa'i.

No más bixa' nzhab:

—Gat lè't xa'i, per se'ta' nilu' xa'.

Per yub miyi' re' nzhab:

—Na ka xa' ze'.

¹⁰ Orze' minabdi'zh rë men ze' lo miyi' re':

—¿Xmod ska ngwani lol ga'?

¹¹ Mikab miyi' ze', nzhab xa':

—Lè' xa' lè Jesús ze', michao' che'p ben no mitsa' xa'i zalon, orze' ne xa': “Wazèt lol kun nits le'n tank kwa'n lè Siloé.” No ngwan ze', mizeta lon, lè'chi tuli ngwani lon.

¹² Orze' nzhab rë xa' re':

—¿Ma xa' ze' nal?

Per nzhab xa' ngwani lo re':

—Naneta da ma xa'.

Minabdi'zh pla men fariseo xmod ngwani lo miyi' nikal-lo ze'

¹³ Orze' mbi'y bixa' miyi' xa' ngwani lo ze' lo rë men fariseo, ¹⁴ no zhè kwa'n mitsa' Jesús ben lo miyi' kwá'n nikal-lo ze', ngoke tu zhè kwa'n nile' rë men Israel diskans.

¹⁵ Orze' minabdi'zh rë men fariseo ze' lo miyi' xa' ngwani lo re': “Xmod ngok ngwani lol”, nzhab bixa'. Orze' nzhab miyi' re':

—Mitsa' Jesús ben zalon, orze' mizètai, no nal nzhak niwi'n.

¹⁶ No nzhab pla men fariseo ze':

—Xa' mile' kure', gat lè't men che'n Dios xa', porke gat nzhot xa' nzho zhè kwa'n nile' be diskans.

Per más bixa' nzhab:

—No chi lè' xa' ba' nzè'b xki lo Dios, orze' nagakt le' xa' tu rë kwa'n nazonh ba'.

Kuze' ngok chop mod mile' rë men ze' xigab. ¹⁷ Kuze' xtu wëlt mina'bdi'zh bixa' lo miyi' ngwani lo re':

—Nal lu, por ngwani lol, ¿kwan nel por xa' re'?

Nkab miyi' re':

—Xa' re' nak tu xa' nidi'zh por Dios.

¹⁸ Kuze' rë men Israel ze' nangayilat bixa', chi walika mikal-lo xa' re' por niwi' xa' nal, haxta ngurezh bixa' xuz xa' re' no xna' xa', ¹⁹ no mina'bdi'zh rë men fariseo ze', nzhab bixa':

—¿Chi xga'n go miyi' re', xa' nidi'zh men, ngolnu nikal-lo? ¿Mbaino xmod ngok niwi' xa' nal?

²⁰ Orze' nzhab rop xa' nak xga'ne ze':

—Walika xga'n no xa' re', no nane no, ngolnu xa' kure', ²¹ per nanet no xmod ngok miwi' xa', no ni nane no cho mile' miwi' xa'. Una'bdi'zh go lo miyi', lë' xa' plo la, yub xa' gak ne lo go, cho mile' ngwani lo miyi'.

²² Sa' mid'i'zh rë xa' nak xga'ne ze', porke nizheb bixa', lë' rë xa' nile' mandad xid rë men Israel mia'n la di'zh, lë' bixa' kutin rë men le'n yo' plo nitse'd bixa' widi'zh che'n Dios, chi cho gon bixa' di'zh, lë' Jesús nak Krist. ²³ Kuze'la, se' nzhab rop xa' nak xga'ne ze': "Bina'bdi'zh go lo mbe, porke lë' mbe plo la." ²⁴ Orze' ngurezh rë xa' fariseo ze' miyi' kwan'ngok nikal-lo ze' xtu wëlt par nzhab bixa':

—Bine kwa'n wali lo no, no lo Dios, porke no nane, lë' miyi' ba' nzë'b xki la lo Dios por gat nzhon xa' nzho zhë ro.

²⁵ Orze' nzhab xa' ngwani lo ze':

—Naneta mblë go, chi wali nzë'b xki xa' lo Dios o gat walite; nab tsa kwa'n nanen, lë'da ngol gat ñanit lon, no nal niwi'n.

²⁶ Per xtu wëlt minabdi'zh bixa', nzhab bixa':

—¿Kwan ka mile' xa' kun lu? ¿Xmod mile' xa' par ngwani lol?

²⁷ Orze' nzhab xa' ngwani lo ze':

—Lë'da ni lai lo go, per gat ñilat goi. ¿Chon nzhakla go nine xtu wëlt?, o, ¿kwan nu go nzhakla, gak go men che'n xa'?

²⁸ Orze' gat lë't mikab bixa' lo miyi' re', nzhab bixa':

—¡Lu nak xpen miyi' ba', per no nak men che'n Muisés!, ²⁹ porke no nane ka, Dios mid'i'zh lo Muisés, per xa' re', ¡ni nane no plo nzë xa'!

³⁰ Orze' nzhab miyi' re':

—¿Kwan kure' nalx? ¡Nanet go plo nzë xa' re', per mile' xa' ngwani lon! ³¹ Mbai rë be nane ka, Dios gat nzhont kwa'n nidi'zh men kwa'n nile' kwa'n gat lë'; nab tsa nile' Dios kwa'n nina'b men xa' nzhon ro' Dios. ³² Lalta' gat gon men, yo tu men le' yani lo xtu men nikal-lo dizde or ngol. ³³ No chi gat lë' Dios mixë'l miyi' re', orze' nagakt le' xa' ni tu rë zhi'n nazhon re'.

³⁴ Orze' nzhab bixa' lo miyi' re':

—¡Lu, por nzë'b xkil lo Dios, kuze' dizde ngolal nikal-lol! No nal, ¿ti lu nzhakla tse'dal no che'n Dios?

Kuze' ngulo'tin bixa' miyi' re' le'n yo' plo nitse'd bixa' widi'zh che'n Dios.

Men xa' gat nilibe't Dios

³⁵ No or mbin Jesús, ngulo'tin bixa' miyi' xa' ngwani lo ze', le'n yo' plo nitse'd bixa' widi'zh che'n Dios, no or ngwazhë'l Jesús miyi' xa' ngwani lo re', orze' mina'bdi'zh Jesús lo xa':

—¿Chi ñilal Xga'n Dios, xa' nu nak tu men yizhyuo?

³⁶ Orze' nzhab miyi' re':

—Lë' go, bine go lon, cho xa' ze' par yilan xa'.

³⁷ Nkab Jesús:

—Niwi'l lo xa' ze' nal; kun lë' xa' kidi'zhal; na xa' ze'.

³⁸ Lë'chi nguzuxib miyi' re' lo Jesús, nzhab xa':

—Lë' go, na ñila go.

³⁹ Orze' nzhab Jesús:

—Na nzhah yizhyuo re' par kobe'n xmod nak men, nes par rë xa' nikal-lo, lë' bixa' yani lo; no rë xa' yak ñani lo; lë' bixa' ya'n nela men nikal-lo ga'.

⁴⁰ No pla rë men fariseo xa' nzo kun Jesús ze', or mbin bixa' widi'zh re', orze' nzhab bixa' lo Jesús:

—¿Kwan gabal, nikal-lo no orze'? Per gat nikalt lo no.

⁴¹ Orze' nzhab Jesús lo bixa':

—Chi zi go, nak go nela tu men nikal-lo ga', nagapt go dol lo Dios orze', porke lë' Ki che'n Dios zini lo go; per por zak go ñani lo go nal, kuze' net go zubi go lo Ki che'n Dios, no se'gaka ña'n go lo kwa'n nzë'b xki go lo Dios.

10

Jesús nak nela tu baxtor ga'

¹ Orze' nzhab Jesús:

—Walika kwa'n nin lo go; xa' gat ño ro' kurrall plo nzho rë mbëkxi'l, wa'n xa' ze'.

² Per xa' ño ro' kurrall, xa' ze' nak xa' walika xa' nikina rë mbëkxi'l. ³ No lë' xa' nikina ro' kurrall, nixa'l xa'l par ño xa' nikina rë mbëkxi'l ze', no nilibe' rë mbëkxi'l ze' chi baxtor che'n bima. No or nigo' xa' bima, nibezh xa' tuga' rë mbëkxi'l ze' kun lë bima.

⁴ No or nilox nigoche xa' rë mbëkxi'l ze', orze' nizhubner xa' lo bima, orze' rë ma ñakë tich xa', porke nilibe' bima chi xa'. ⁵ Per tu xa' gat nilibe't rë mbëkxi'l ze', nayakët bima tich xa', lë'la karre nikë' bima lo xa', gat nzhakbe't bima chi xa'.

⁶ Mid'i'zh Jesús kure' par nabei chi nganu laxto' bixa' kwan gab widi'zh re', per nanga-zobyekt bixa'.

Jesús nak baxtor wen

⁷ Orze' nzhab Jesús xtu wëlt:

—Walika kwa'n nin, na nak nela ro' kurrall plo ño rë xa' nak nela mbëkxi'l da ga'.
⁸ Rë xa' mbi'd lo go or naga yala lo go, ngok bixa' nela rë men wa'n ga', no nela rë men nzhut men ga'; per rë men da xa' nak nela mbëkxi'l ga', une bixa' gat lë't Dios mixë'l rë men ze'.
⁹ Na nak nela ro' kurrall ga', no rë xa' ño le'n kurrall che'n Dios por na, lë' bixa' ro' lo kwa'n nazhe'b kwa'n nzhobixa', no gak bixa' nela rë mbëkxi'l ma ño no niro' le'n kurrall par nzhao ma yix nayë'.
¹⁰ Per rë xa' nzë namás par liwa'n, no par chil xa' rë men da xa' nak nela mbëkxi'l ga'; per na nzhall par nen yalnaban kwa'n nayot lox par go.
¹¹ Lë'da nak baxtor xa' nazhi' rë ma che'n, mbaino ter gat da por lë' bima,
¹² per rë xa' nikë zhi'n nab tsa por dimi, or nine xa' lë' tu ma nazhe'b nzë, orze' nila' nzë'b xa' rë mbëkxi'l, nikë' xa' karre, porke gat lë't xa' xa' nak che'n ma; orze' nizen ma nazhe'b ze' rë mbëkxi'l, mbaino más ma nire'chbe orze'.
¹³ Men nzhax ka' ze', nikë' xa' karre or nine xa' ma nazhe'b ze', nila' nzë'b xa' rë mbëkxi'l, lë' xa' nile' por dimi namás.

¹⁴ Orze' nzhab Jesús:

—Nase nazhi' rë mbëkxi'l da, no nilibe'n rë ma da; mbaino rë ma da, nilibe' ska rë ma da.
¹⁵ Se'ska nilibe' Xuza da, no nilibe'n Xuza; mbaino ter gat da por rë men da, xa' nak nela mbëkxi'l ga'.
¹⁶ Mbaino kinun más men, xa' nak nela mbëkxi'l, ma naga yo le'n kurrall da; kuze' naki'n nu bixa' yakan; no gon bixa' kwa'n gapa par kwin bixa' tutsa kun más rë men da xa' nzhobixa' le'n kurrall da, mbaino tutsa da kina rë bixa'.

¹⁷ 'Lë' Xuza Dios nazhi' da, por niye laxto'n gat da, par ruban da xtu wëlt.
¹⁸ Yent cho men gak gut da chi lë'da naziyël gat da. Zak len gat da, mbaino zak len ruban da. Kure' nak kwa'n ne Xuza len.

¹⁹ No or mbin rë xa' nile' mandad xid rë men Israel xtu wëlt rë widi'zh re', orze' xtu wëlt chop mod ngok xigab che'n rë bixa',
²⁰ nzhobixa' nzhab:

—¿Chon nzhon go kwa'n nidi'zh xa' ba'?
 ¡Ka mbi mal nzen xa' ba', kuze' nzhak miy-izh xa'!

²¹ Per más bixa' nzhab:

—¡Wenka xa', porke nagakt di'zh tu xa' nzhobixa' mbi mal laxto' sa'! ¿No xmod liyak tu xa' nzhobixa' mbi mal laxto' tu men nikal-lo?

Rë men Israel, xa' nile' mandad, nangayilat bixa' Jesús

²² Le'n rë zhë ze', mer rë mbëo' nayag, or nzhall lani kwa'n nile' bixa' gazob li'n che'n yado' yezh Jerusalén,
²³ dub nikizë Jesús ro' yado' gax laka Ro' Pwert che'n Salomón,
²⁴ no ze' migan nayax men xa' nile' mandad xid rë men Israel, naka'n plo nzo Jesús, par nzhab bixa':

—¿Pok ka nel lo no cho lux? Chi lu nak Krist, naka'chtal; binei lo no tuli.

²⁵ Orze' nzhab Jesús:

—Lë'da ni lai lo go, per gat ñilat go da; por rë zhi'n nzhon kwa'n nilen por mandad che'n Xuza nilu', cho ka da,
²⁶ per gat ñilat go da, porke gat lë't men da go.
²⁷ Rë xa' nak men da, nzhon bixa' widi'zh da mbaino nilibe'n bixa', no ñi'dkë bixa' ticha;
²⁸ mbaino len, ban bixa' kun Dios par dubta', no ni nayora' zhë lox bixa' lon, no yent cho kubchi bixa' lon.
²⁹ Lë' Xuza michi bixa' lon, no lë'gaka Me más kwa'ro lo rë kwa'n nzhobixa', no yent cho gak kubchi rë men da lo Me.
³⁰ Lë' Xuza Dios no na, tutsa nak no.

³¹ Xtu wëlt, nguzen rë men Israel ze' ke par ngakë' bixa' i ta Jesús,
³² per nzhab Jesús lo bixa':

—Por mandad che'n Xuza milen rë zhi'n nzhon xid go; no nal, ¿por cho tu rë zhi'n nzhon re' nzhakla go gut go da kun ke?

³³ Orze' nzhab rë men Israel ze':

—Nakot no kel por ni tu rë kwa'n nzhon mile'l ba', sino por midizhal kwa'n gat lë' lo Dios; nzhahal, nakal yubska Dios, mbaino jmen yizhyuolx!

³⁴ Per nzhab Jesús lo bixa':

—¿Chi gat lë't lo ley che'n go nzobni' widi'zh re': "Na ni, lë' go nak dios"?
³⁵ Nane be, par dubta' wali kwa'n nzobni' lo Ley che'n Dios, yent cho gak chë'i. Men miza' Dios widi'zh re', nzhab Me, xa' re' nak nela Dios ga'.
³⁶ No chi lë' Dios ngule da par mixë'l Me da yizhyuo re', orze', ¿chon nidi'zh go, midizha kwa'n gat lë' lo Dios, por midizha, nak da Xga'n Dios?
³⁷ No chi lë'da gat nile rë kwa'n nzhakla Xuza gak, orze' bila' go nayilat go da;
³⁸ per chi nilene, ter nayilat go da, namás biwi' go por rë kwa'n nilen, par ne goi no par zobyek go, lë'da tutsa nak kun Xuza, no tutsa nak ska Xuza kun na.

³⁹ Orze' xtu wëlt ngokla bixa' ngazen bixa' Jesús, per mile' Jesús gan ya' bixa'.
⁴⁰ Orze' miëk Jesús par xtu ro' you' Jordán, plo mililë'i' Juan men le'n nits, ze' mia'n Jesús che'p,
⁴¹ no ze', nayax men ngwatswi' lo Jesús, kidi'zh bixa':

—Ter nangale't Juan ni tu rë zhi'n nzhon, per rë kwa'n midizhal Juan por miyi' re', lë'i walika.

⁴² No ze' nayax men ngwayila Jesús.

11

Ngut Lásaro

¹ Ngol tu zhë, ngokne tu miyi' xa' lë Lásaro, no yezh Betania nzë xa' kun Mari no Mart, bizan xa'.
² Mari una' ze' michob aseit ni' Jesús no mitsibizh una'i kun yich yek una'.

³Rop una' re' nak bizan Lásaro, mixë'l biuna' razón lo Jesús, nzhab bixa':

—Lë' go, lë' xa' nichë'l go ze', nzhakne.

⁴No or mbin Jesús kure', nzhab Me:

—Yalyizh re' nale'te gat Lásaro par dubta', sino lë'i zu' par ne men, xmod nak yalnazon che'n Dios, mbaino yalnazon che'n Xga'n Me.

⁵No dox nazhi' Jesús Mart, no Mari, mbaino Lásaro. ⁶No or mbin Me, lë' Lásaro nzhakne, ngulëz Me xchop ngubizh plo nzo Me, ⁷no or nded rop zhë ze', orze' nzhab Jesús lo rë men che'n Me:

—Cha'o nza be xtu wëlt laz men Judea.

⁸Orze' nzhab rë men che'n Me lo Me:

—Maestr, nal laka ngokla rë men Israel xa' nzho ze', ngut bixa' go kun ke, ⁹no nal xtu wëlt nzhakla go ya go ze'?

⁹Orze' nzhab Jesús:

—¿Chi gat lë't tu dusen or kinu tu ngubizh? No tu xa' nizë or zhë, ni por más nayachint xa', porke ñani plo nizë xa', ¹⁰per xa' nizë lo nakao, lë' xa' yachin, porke gat kinut xa' biani.

¹¹No nu nzhab Jesús:

—Lë'da nzhalexche Lásaro, xa' nichë'l be ze', lë' xa' naxnaa.

¹²Orze' nzhab rë men che'n Me:

—Lë' go, chi lë' xa' naxnaa, lë' xa' yak ka orze'.

¹³Nzhab Jesús kure' por ngut Lázaro, ter mile' rë men che'n Me xigab, naxnaa ka Lásaro, ¹⁴orze'se tuli nzhab Jesús:

—Lë' Lásaro ngut, ¹⁵no nizak laxto'n por gat nzon ze', más wene par go, par más yila go da. Nal cha' go, nza be lo xa'.

¹⁶Orze' lë' Max, xa' nidi'zh men kwach ze', nzhab xa' lo más rë men che'n Jesús:

—Cha'o nza be, par nu be gat kun lë' xa'.

Jesús nak Me, nile' niruban men

¹⁷No or mizhin Jesús yezh Betania, nza la tap ngubizh dí miga'ch Lázaro. ¹⁸No yezh re' ña'n paste chon kilómetro dí yezh Jerusalén, ¹⁹no nayax men xa' nzë laz men Judea ngwatswi' bixa' ma Mart kun Mari, par tsiyal bixa' laxto' rë una' re' por yalnawin che'n bizan bixa'. ²⁰Or mbin Mart, lë' Jesús nzhazhin la gax ze', orze' nzhakinez una' Jesús, mbaino lë' Mari mia'n yo'. ²¹Nzhab Mart lo Jesús:

—Lë' go, chi ngak re' nzou, nangatta' bizana, ²²per ter gat nzou orze', lë'da nane ka, lë' Dios le' rë kwa'n na'b go lo Me.

²³Orze' nzhab Jesús:

—Lë' bizanal ruban ka.

²⁴Orze' nzhab Mart:

—Na nane ka, lë' bizana ruban zhë lult, or ruban rë men ngut, yizhyuo re'.

²⁵Orze' nzhab Jesús:

—Na nile niruban men, mbaino nilen, niban men dubta' kun Dios; no xa' yila da,

ter ngut la xa', lë' xa' ruban ka, ²⁶no rë xa' naban nalre', mbaino ñila bixa' da, nayot gat xa' par dubta'. ¿Chi ñilal kure'?

²⁷Orze' nzhab Mart:

—Na ñila ka Go. Go nak Krist, Xga'n Dios, Me nak di'zh yi'd yizhyuo re'.

Mbi'n Jesús ro' ba' che'n Lásaro

²⁸No or milox midizh Mart kure', orze' miëk una' lizh una', no xla'n ngurezh una' Mari bël una', par nzhab una':

—Lë', lë' maestr nzo re', kibezh Me lu.

²⁹No or mbin Mari kure', tuli ngwa una' lo Jesús. ³⁰No lë' Jesús stubi nagat yo Me ro' yezh, ñë'dzë Me plo ngwakinez Mart Me, ³¹no pla rë men Israel xa' nzhatsiyal laxto' Mari ze', or une bixa' nzha Mari, nu bixa' nzhakë, mile' bixa' xigab pas ro' ba' nzha una' re', nzhayo'n una'. ³²Or mizhin Mari lo Jesús, tuli nguzuxib una' lo Me, no nzhab una':

—Lë' go, chi ngak nzo go re', nangatta' bizana.

³³No or une Jesús nzho'n Mari kun rë men Israel xa' nzë kun lë' una', orze' dox gat lë' mizi Jesús, mbaino miwin laxto' Me, ³⁴orze' nzhab Jesús:

—¿Plo mika'ch go xa'?

Nkab bixa':

—Al re'i, wi'gole.

³⁵Orze' mbi'n Jesús, ³⁶no kidi'zh rë men Israel xa' nzhin ze':

—Biwi'ule, tatu nazhi' xa' Lásaro.

³⁷Per más bixa' kidi'zh:

—Xa' ba' mile' ngwani lo tu xa' dizde or ngol nikal-lo; ¿taxa, chi nangakt ngale' xa' tu kwa'n par nangatta' Lásaro?

Nguruban Lásaro

³⁸Orze', xtu wëlt dox gat lë't mizi Jesús, no nguzubi Me haxta ro' ba' che'n Lásaro, le'n tu ba' kwa'n nak pura ke, mbaino nayao' ro'i kun tu ke ro, ³⁹no nzhab Me:

—Gure go ke ba'.

Per nzhab Mart bizan yinto' re':

—Lë' go, guzhë nila' xa' re', porke nza la tap ngubizh miga'ch xa'.

⁴⁰Orze' nzhab Jesús:

—Lë'da ni la lol, chi lë'l yila da, lë'l ne yalnazon che'n Dios.

⁴¹Ngure bixa' ke orze', no miwi' Jesús al ya' lo yibë', nzhab Me:

—Xuza, kinin xkixal por mbinal kwa'n mina'ba lol. ⁴²Na nane ka, rë or nzhonal kwa'n nina'ba lol, per por rë xa' nzhin re' kinin kure', par yila bixa', Lu ka Me mixë'l da.

⁴³No or milo'x midizh Me kure', orze' naye nzhab Jesús:

—¡Lásaro, gurutin ba'!

⁴⁴Nguro' xa' ngut re' le'n ba' orze', dub xa' narë'l lar, mbaino nali'b ya' xa' no ni' xa', no nayao' lo xa' kun xtu lar, orze' nzhab Jesús:

—Bixëk go xa' no bila' go bi xa'.

Mia'n di'zh rë xa' nak zhi'n gut bixa' Jesús
(Mt. 26:1-5; Mr. 14:1-2; Lc. 22:1-2)

⁴⁵ Kuze' nayax men Israel xa' ngwakë tich Mari, ngwayila bixa' Jesús, or une bixa' kure', ⁴⁶ per zipla bixa' ngwayab lo rë men fariseo rë kwa'n mile' Jesús, ⁴⁷ orze' migan rë ngulëi' ro xa' nile' mandad lo más rë ngulëi', kun rë men fariseo par mikan bixa' rë jwes, xa' más nile' mandad, orze' nzhah bixa':

—¿Xmod le' be nal? ¡Dox rë kwa'n nazhon kile' mbe ba'!, ⁴⁸ no chi la' be, lë' rë men yila miyi' ba', orze' lë' rë men Roma, xa' nak zhi'n xid be, yi'dchil yado' che'n be mbaino lo'x bixa' rë men lazh be.

⁴⁹ No xid rë xa' nzhin ze', nzho tu ngulëi' lë Caifás, xa' nak ngulëi' ro li'n ze', orze' nzhah xa' re':

—Rë go, yent kwan nane go, ⁵⁰ ¿chi gat nile't go xigab, más wen gat tutsa men ke par lox rë men lazh be?

⁵¹ Per Caifás nangadi'zht xa' kure' por mis xigab yek xa', sino ke Dios mile' nzhah xa'i, por nak xa' ngulëi' ro li'n ze', kuze' nzhah xa', naki'n gat Jesús par nalox rë men Israel, ⁵² no gat lë't par nalox nab rë men Israele, nu par nalox rë men che'n Dios xa' nzhin dub yizhyuoi, nes par gak bixa' tutsa ben men. ⁵³ Orze', dizde zhë ze', nguzublo kikwa'n rë men Israel ze' mod gut bixa' Jesús.

⁵⁴ Kuze', nangakizëtra' Jesús xid rë men Israel xa' nak zhi'n ze', sino ke nguro' Me lazh men Judea, nzha Me tu yezh kwa'n lë Efraín, kwa'n ña'n gax le'n yuo bizh; ze' mia'n Me kun rë men che'n Me, ⁵⁵ no xplatsa ngubizh jwält antis di gal lani Pask che'n rë men Israel, kuze' rë men yezh Israel, nzha bixa' yezh Jerusalén par mbe bixa' lo Dios antis de gal lani, nela xmod nzobni' lo ley ga'. ⁵⁶ Dub nzhin rë men ro' yado', ze' kikwa'n bixa' Jesús, kidi'zh bixa' lo wech bixa':

—¿Chi neuse, pas nayi'dt miyi' ze' nal lani re'?

⁵⁷ No lë' rë men fariseo kun rë xa' nzo lo rë ngulëi', mia'n bixa' di'zh, chi tu men ne Jesús, naki'n yayab xa'i lo rë men xa' nzo lo más rë men par yatsen bixa' Jesús.

12

Tu una' kwa'n michob aseit ni' Jesús
(Mt. 26:6-13; Mr. 14:3-9)

¹ Nzhak jwält zixo'p ngubizh par gal lani Pask, orze' ngwa Jesús tu yezh kwa'n lë Betania, plo nzho Lásaro, miyi' kwa'n mile' Jesús nguruban ze'. ² No ze' mizuxkwa' bixa' tu kwa'n ndaoxche' bixa' kun Jesús; lë' Mart mizhine lo bixa', no nu Lásaro nak tu rë xa' nzob lo mes par gao xche' kun Jesús, ³ orze'

nguzen Mari pas garol litr aseit kwa'n viv kwa'n lë nardo, no dox tsake, no nix ni'xla'i; orze' michob una' ni' Jesús, no kun yich yek una' mitsibizh una'i, mbaino dub le'n yo' ze' mixla'i. ⁴ Orze' lë' Judas Iscariote, xa' nak tu rë men che'n Jesús, no xa' re' xa' kwa'n chi Jesús par gat Me, orze' nzhah xa':

⁵ —¿Chon nangado nits nax re' kwa'n tsak dimi kwa'n nile' men gan chon gayo' ngubizh zhi'n, par ngaga'z dimi re' ka' rë men yent kwan nzhah?

⁶ Per gat lë't por nilats laxto' Judas rë men prob nzhah Judas kure', sino por lë' xa' niguchao' dimi kwa'n nigan, no nu niliwa'n xa'i, ⁷ kuze' nzhah Jesús:

—Bila' chob una' re' i ni'n, lë' xa' kinuchao' aseit re' par zhë or ga'ch da. ⁸ Rë men prob, zilita' yo bixa' xid go, per na gat lë't dubta' nzon kun go.

Midi'zh bixa' nu Lásaro gut bixa'

⁹ No dox nayax men Israel mbin, lë' Jesús nzho yezh Betania, kuze' ngwa bixa' ze', per gat lë't nab Jesús nzhatsi' bixa' ma, nu par ne bixa' Lázaro, xa' mile' Jesús, nguruban ze', ¹⁰ orze' lë' rë ngulëi' xa' nile' mandad lo más rë ngulëi', mia'n bixa' di'zh nu Lásaro gut bixa', ¹¹ porke por xa' re' namás, dox nayax men Israel ngwayila Jesús.

Jesús nguo yezh Jerusalén nela tu rey ga'
(Mt. 21:1-11; Mr. 11:1-11; Lc. 19:28-40)

¹² Nayax men ngwa lani yezh Jerusalén, no xtu riyë'l mbin men lë' Jesús nzhazhin la yezh re', ¹³ orze' ngwakinez bixa' Me, micho' bixa' la che'n ya yin par ndi'x bixa'i nez plo ded Jesús, no nguruzhië bixa' naye, nzhah bixa':

—¡Guzh go nazhon Dios! ¡No wen nzha xa' mixë'l Dios nak rey lo rë men Israel!

¹⁴ Orze' mizhë'l Jesús tu burrit, no nguzob Me tich ma, nela nzobni' ka lo Yech che'n Dios:

¹⁵ Nazhebt go men yezh Sion; biwi' go, lë' rey che'n go nzë, nzob xa' tich tu burrit.

¹⁶ Or galo laka, nanganut laxto' rë men che'n Jesús kwa'n ngok re', per or nguruban Jesús, orze' miza' bixa' kwent, lë'i ngok porke lë'i nzobni' la lo Widi'zh che'n Dios kwa'n zak Jesús. ¹⁷ No rë men kwa'n une, or mile' Jesús nguruban Lázaro le'n ba', kidi'zh bixa'i xid men rë kwa'n ngok, ¹⁸ kuze' nguro' nayax men yezh Jerusalén par ngwakinez bixa' Jesús por mile' Jesús tu kwa'n nagat ne men, ¹⁹ orze' nzhah rë men fariseo lo wech bixa':

—¡Bivi'u, yent kwan gak le' be par ka'n be lo men! ¡Yub ka bixa' nzhakë tich xa' ba'!

Kikwa'n pla rë men grieg Jesús

²⁰ Xid rë xa' nzë lani Pask kwa'n gal yezh Jerusalén, nu pla men grieg nzë xid rë men

ze'. ²¹ Nguzubi rë men grieg re' lo Lip, xa' nzë yezh Betsaida kwa'n ña'n lazh men Galilea, par mina'bd'i'zh bixa' lo Lip, nzhab bixa':

—Lë' go, ¿xmod le' no ne no Jesús?

²² Mbaino ngwayab Lipe lo Ndrés, orze' rop bixa' ngwayabe lo Jesús, ²³ orze' nzhab Jesús:

—Ngol la or libe' men cho ka nak Xga'n Dios, Me nu nak tu men yizhyuo. ²⁴ Walika kwa'n nin lo go, chi lë' tu lazh triu nayo lo yuo no chi nayao' yoi, nalënte, mbaino naza'te; per chi yao' yoi no lëne, orze' lë'i za'. ²⁵ Men xa' naban xigab yek yizhyuo re', lë' xa' yitlo lo Dios; per xa' naban xmod nzhakla Dios yizhyuo re', xa' ze' ban kun Dios par dubta'. ²⁶ Chi nzho cho go nzhakla gag men da, naki'n yi'dkë go ticha; no plo yo'n, nu go yo ze'; no cho go nile' zhi'n da, lë' Xuza Dios di'zh wen por go ze'.

Midi'zh Jesús xmod gat Me

²⁷ 'No dox nakwan niza da nal re'; ¿no kwan gapa nal? ¿Chi zapa?: "Xuza, gulo' Go da lo rë kwa'n nazhe'b re'." Per na nane ka, por rë kure' ka nzhalala yizhyuo re'. ²⁸ Xuza, bile' go par di'zh men, dox nazhon go.

Lë'chi mbin rë xa' nzhin ze' tu widi'zh kwa'n nguro' lo yibë', nzhab se':

—Lë'da mile lai, per lë'da lei xtu wëlt, lë' men di'zh nazhon da.

²⁹ No rë xa' mbin kure', rë xa' nzhin ze', nzhab: "Nguzi' kure'", no más bixa' nzhab: "Ka tu ganje." ³⁰ Orze' nzhab Jesús:

—Gat lë't par da mbin go widi'zh re'; par go kai, ³¹ mbaino nalse mizhin la zhë, gab Dios xmod gag kun rë men yizhyuo re'; no nalse lë' Dios kutin xa' nile' mandad yizhyuo re'. ³² No na, or kë' bixa' da lo krus, orze' kwantsa men kana par da.

³³ Kure' midi'zh Me par nzhab Me xmod gat Me, ³⁴ orze' nzhab rë men:

—No nane, lë' lo ley nzobni': "Lë' Krist nayot gat, lë' Me ban par dubta'." No, ¿chon nidi'zhal, lë' Xga'n Dios Me nu nak tu men yizhyuo, naki'n kë lo krus? ¿No cho nak Xga'n Dios xa' kize'tal re'?

³⁵ Orze' nzhab Jesús:

—Stubi nzo Me nak Ki re' kun go, per kaxche'p nzo Me re' kun go. Kuze' guzë go lo biani che'n Me lë'ga nzo Me kun go; napa zë go lo nakao, porke xa' nizë lo nakao, nanet xa' plo nizë xa'. ³⁶ Wayila go Me nak Ki re' lë'ga' nzo Me kun go, par gag go men che'n Me, xa' nzhin lo biani.

No or milox midi'zh Me widi'zh re' lo rë men Israel ze', nguibchi Me lo bixa'.

Por chon nangayilat rë men Israel Jesús

³⁷ No ter nayax kwa'n nazhon milu' Jesús lo rë men Israel, per ni se' nangayilat bixa' Jesús, ³⁸ par ngok ka kwa'n mizobni' Isaías lo yech, kwa'n nzhab:

Dios da, ¿cho ngwayila widi'zh che'n be, no cho lo milu' go yalnazon che'n go?

³⁹ Kuze' nangakt ngayila bixa'i, porke nu se' mizobni' Isaías lo yech:

⁴⁰ Dios mile' nagakt lu'i lo go,

no nu mile' Dios, ngok nad laxto' go;

par nagak ne goi, no par nayila goi kun dub laxto' go;

par ngayëk go lon, orze' ngache'n rë kwa'n nzë'b xki go,

no rë kwa'n nzadkë tich go.

⁴¹ Mikë' Isaías widi'zh re' porke lë' Dios milu' la rë yalnazon che'n Jesús, mbaino rë kwa'n le' Me.

⁴² No ter se' unkë lo yech, per nayax men Israel ngwayila bixa' Jesús, haxta nu pla rë xa' nzo lo bixa' ngwayilai, per nangadi'zht bixa'i lo rë men porke nizheb bixa' lo rë men fariseo, napa' kutin rë xa' re' bixa' le'n yo' plo nitse'd bixa' widi'zh che'n Dios, ⁴³ porke rë xa' ngwayilai re', más ño laxto' bixa' ya'n bixa' wen kun men, ke par ya'n bixa' wen kun Dios.

Widi'zh che'n Jesús kube' kwan nak men

⁴⁴ Orze' midi'zh Jesús naye:

—Rë xa' ñila da, gat lë't nab da ngwayila xa'; nu Xuza Me mixë'l da, ngwayila bixa'.

⁴⁵ Or nzon xid go, nak nela yub Xuza, Me mixë'l da, nzo kun go. ⁴⁶ Na nak Ki lo rë men yizhyuo re'; xa' yayila da, nakizëtra' xa' lo nakao, ⁴⁷ no cho xa' nzhon widi'zh da, per gat nile't xa' kwa'n nzhapa, nana'bta kwent lo bixa', porke gat nzhalta par kobe'n kwan

nak men yizhyuo re'; nab tsa nzhalala par kon men lo rë kwa'n nazhe'b kwa'n nzadkë tich men. ⁴⁸ Men xa' nzhab yent kwane rë kwa'n nidizha, nzho ra' cho kobe' (wi') kwan nak xa', lë' rë widi'zh da kobe'i, or zhin zhë gab Dios xmod gag kun kad men. ⁴⁹ Porke gat lë't por xigab yeka kinin kure', lë'ka Xuza Dios ne lon kwan ñal dizha, no kwan ñal lun.

⁵⁰ No nanen, lë' widi'zh che'n Xuza Dios, nile' niban men par dubta' lo Dios. Kuze' nidizha lo go, rë kwa'n mile' Xuza mandad gon go.

13

Jesús mizët ni' rë men che'n Me

¹ Nzhazhin gax la lani Pask, lë' Jesús nane la, nzhazhin la zhë bi Me yizhyuo re' par yëk ska Me lo Xuz Me. Dub mbi'd Jesús yizhyuo re', kun dub la Me michizhi' Me rë men che'n Me haxta zhë ña Me. ² Or kijao xche' Jesús kun rë men che'n Me, ze' nzob Judas Iscariote, xga'n Simón, no lë' Mizhab migoch la yek xa' par chi xa' Jesús lo rë men Israel xa' nak zhi'n.

³ Per lë' Jesús nane la, lë' Xuz Me Dios mila' la rëi ya' Me, no nane Jesús, Dios mixë'l Me, no lë' Me yëk ska lo Dios. ⁴ Or dub kijao Jesús lo mes, ngwatsuli Me, orze' ngulo' Me kaxkem che'n

Me, no nguzen Me tu lar, mili'b Mei laxto' Me, ⁵ orze' ngulo Me che'p nits le'n tu chë', nguzublo Me kizët Me ni' rë men che'n Me, no kun lar ze' kitsibizh Me ni' tuga' bixa'.

⁶ No or mizhin Me lo Simón Per, nzhab Per:

—Lë' go, ¿taxa Go zët ni'n?

⁷ Orze' nzhab Jesús:

—Nal nanetal kwa'n kilen, per lë'l zobyek ka kwane.

⁸ Orze' nzhab Per:

—¡Nase lata zët go ni'n!

Per nzhab Jesús:

—Chi lë' Da nazët ni'l, nagaktal men da.

⁹ Orze' nzhab Simón Per:

—¡Lë' go, nazëta' go nab ni'n, nu ya'n nu yeka bizët go!

¹⁰ Orze' nzhab Jesús:

—Rë xa' laore ngoz, gat naki'ntra' gaz xa' xtu wëlt, nab tsa ni' xa' naki'n yët; lë' rë go nambe la, ter gat lë't rë nak goi.

¹¹ Midì'zh Me, gat lë't rë nak bixa' nambe; lë' Me nane la cho chi Me lo rë xa' nile' mandad. ¹² No or milox mizët Jesús ni' rë nak men che'n Me, orze' ngok Me kaxkem che'n Me, no nguzobska Me, orze' nzhab Me:

—¿Chi mizobyek go kwan milen kun go?

¹³ Lë' go nine lon: “Maestr”; mbaino nine go, na nile mandad go; no walika go nak dai. ¹⁴ Pwes chi lë'i Da nak Maestr che'n go, mbaino xa' nile' mandad lo go, no dub sba' mizeta ni' go; no se'ska ñal zët go ni' rë men Da. ¹⁵ Na milu lo go, xmod ñal le' go, par nu go le' kwa'n milen. ¹⁶ Go nane ka, yent cho tu mos nado más tsak xa' lo xa' nguzi' xa'; mbaino ni tu xa' ña mandad natsakt más lo xa' nixë'l xa'. ¹⁷ Chi lë' go zobyek kure', mbaino le' goi, dox wen ya go.

¹⁸ 'Gabt go por rë go kidizha kure'; na nili'be' ka rë xa' ngulen, per naki'n gak widi'zh kwa'n nzobni' lo Yech che'n Dios por Da: “Men nzhao kun na, men ze' niyi' nine da.” ¹⁹ Kure' nin lo go, lë'ga' naga gak rë kure', nes par or gake, orze' yila go, na nak xa' nzhapa nak da. ²⁰ Walika kwa'n nin lo go, xa' le' wen lo men Da, lon mile' xa'i; mbaino xa' le' wen lon, lo Xuza mile' xa'i, Me mixë'l da.

Jesús midì'zh, lë' Judas chi Me lo rë xa' nile' mandad

(Mt. 26:20-25; Mr. 14:17-21; Lc. 22:21-23)

²¹ No or milox midì'zh Jesús kure', dox niwin laxto' Me, no tuli nzhab Mei:

—Walika kwa'n nin lo go, mis tu rë go re', chi da lo rë xa' nile' mandad.

²² Orze' nguzublo niwi' rë men che'n Jesús lo wech bixa', per nanet bixa' par cho yek nzha kure'. ²³ No tu rë men che'n Jesús, xa' dox nichë'l Me kun lë', nzob kiyao gax ta' Me, ²⁴ orze' milu' Simón Per tu señ lo xa' re',

par na'bdi'zh xa' re' lo Jesús, cho ka xa' ze', ²⁵ orze' nguzubi xa' re' xche'p gax ta' Jesús, par nzhab xa':

—Lë' go, ¿cho ka xa' ze' ga'?

²⁶ Orze' nzhab Jesús:

—Lë'da gagh tlë' pan, no zane ka' xa', xa' ze'i orze'.

Orze' migazh Jesús tlë' pan, no miza' Mei nka' Judas, xga'n Simón Iscariote. ²⁷ No or milox ndao Judas tu bok pan re', orze' nguio Mizhab laxto' xa', kuze' nzhab Jesús lo Judas:

—Kwa'n nile'l xigab le'l, bile'i tuli.

²⁸ Per ni tu rë men che'n Jesús, xa' nzhin kiyao xche' ze', nangazobyekt bixa', chon midì'zh Jesús lo Judas se', ²⁹ no por lë' Judas nak xa' niguchao' dimi, kuze' mile' zipla bixa' xigab, pas nzhab Jesús, zi' Judas más kwa'n gao bixa' par zhë lani, o ki'z xa' dimi ka' rë men prob, ³⁰ no or milox ndao Judas bok pan re', tuli nguro' xa', no yë'l la orze'.

Jesús mila' xtu mod ban men

³¹ No or nguro' la Judas, orze' nzhab Jesús lo más rë men che'n Me, xa' mia'n ze':

—Mizhin zhë, rulo yalnazhon kwa'n kinu Xga'n Dios, Me nu nak tu men yizhyuo; mbaino por Xga'n Dios, rulo yalnazhon che'n Dios, ³² no chi lë' Xga'n Dios lu' xmod nak yalnazhon che'n Dios, nu ska Dios lu' xmod nak yalnazhon che'n Xga'n Me; no lu' Mei tuli. ³³ Rë xmë'da, nin lo go, kaxche'p'tsa nzon kun go; lë' go kwa'n da, per nela nzhap ka lo rë xa' nile' mandad lo rë men Israel, se'ska nin lo go nal: Nagakt bi go plo bi'n. ³⁴ Lë'da lu xtu mod ban go: Bichizhi' go wech go. Nela xa nazhi' da go ga', se' bichizhi' go tu go kun xtu go. ³⁵ Chi lë' go chizhi' tu go kun xtu go, orze' lë' rë men yizhyuo ne, lë' go nak men da.

Midì'zh Jesús, lë' Per ka'ch, nilibe' Per Jesús

(Mt. 26:31-35; Mr. 14:27-31; Lc. 22:31-34)

³⁶ Orze' mina'bdi'zh Simón Per lo Jesús, nzhab xa':

—Lë' go, ¿plo biu?

—Plo bi'n, —nzhab Jesús— nagakt yi'dkë'l ticha nalre', per zhin zhë, lë'l yi'dkë ticha.

³⁷ Orze' nzhab Per:

—Lë' go, ¿chon nagakt yi'dkë'n ticha go nalre'? ¡Wane kwane lë'da re', ter gat da por go!

³⁸ Orze' nzhab Jesús:

—¿Chi walikal, ter gatal por da? No kwa'n nanen, ni naga kè' gai kant, chon wëlt ka'chal, gabal, nalibe'ta'l da.

14

Jesús nak nez par zhin men lo Dios

¹ Orze' nzhab Jesús lo bixa':

—Nawint laxto' go; wayila go Dios no wayila go da. ² Plo nak lizh Xuza, nzho dox plo yo go, no chi gat lè' se' nake, naganita lo go; lè'da yazuxkwa' plo yo go. ³ Or lox zu'xkwa'n plo yo go, lè'da yèk ska par yi'dkan go, nes tutsa plo yo be. ⁴ No lè' go nane la plo niro' nez par bi'n.

⁵ Orze' nzhah Max lo Jesús:

—Lè' go, nanet no plo biu; no, çchon ne go, lè' no nane la nez?

⁶ Orze' nzhah Jesús:

—Lè'da nak nez, no por na gak libe' men Dios, mbaino por na, gap men yalnaban kun Dios par dubta'; kuze' nab tsa por na gak zhin go plo nzho Xuza Dios. ⁷ Chi lè' go nilibe' da, nu ska Xuza nili'be' go; no nal ra' re' nili'be' go Me, no lo Me kiwi' go nal re'.

⁸ Orze' nzhah Lip lo Me:

—Lè' go, bilu'o Xuz be Dios lo no; nes yentra' kwan ne no lo go.

⁹ Orze' nzhah Jesús:

—çTaxa Lip, dox nzhala nzon kun go?, no, çchi stubi nagat li'be'l da? Men xa' une da, yub Xuza une xa'. çChon nzhaklal, lun Xuza Dios lon? ¹⁰ çChi gat ñilatal, tutsa no kun Xuza, no lè' Xuza Dios tutsa Me kun na? Rè kwa'n nin lo go, no rè kwa'n une go milen, nangaletne xigab yeka; lè' Xuza, Me tutsa no kun lè', lè' Me nile' kun na rè kwa'n nzhakla Me gak. ¹¹ Wayila go, lè'da tutsa kun Xuza Dios, no lè' Xuza Dios tutsa kun na; chi naga yila go da, wayila go da por rè kwa'n une go, milen. ¹² Walika kwa'n nin lo go, xa' yila da, lè' xa' le' mis rè kwa'n nilen; no haxta más rè kwa'ro le' xa' ze', porke lè'da bi' plo nzho Xuza. ¹³ Na le rè kwa'n na'b go lo Xuza por nak go men da, nes par lun xmod nak yalnazon che'n Xuza. ¹⁴ Na le rè kwa'n na'b go por lèn.

Mila' Jesús di'zh, xè'l Me Sprit che'n Dios

¹⁵ Nzhah Me:

—Chi lè'o nazhi' da, lè'o le' kwa'n nin. ¹⁶ Na na'b lo Xuza, par xè'l Me Sprit che'n Me par gaku go lo rè kwa'n, mbaino zo Me kun go par dubta'. ¹⁷ Lè' Sprit che'n Dios re' lu' kwan pa' nak che'n Dios. Per rè men yizhyuo, gat ñilat xa' rè kwa'n nzè por Sprit che'n Dios, porke gat ñilat xa' kwa'n gat nilu' lo xa', kuze' gakt libe' xa' Sprit che'n Dios. Per go, nilibe' ka Me, nzo Me kun go, mbaino yo Me laxto' go. ¹⁸ Nalata nab go nela tu mè'd wizèb ga', lè'da yèk ska xtu wèlt lo go. ¹⁹ No kaxche'p, lè' rè men yizhyuo re', nanetra' bixa' da; per go, lè' go ne ka da, porke ter gat da, lè'da ruban ska; mbaino or gat go, lè'da le, nu ska go ruban. ²⁰ No zhè yala ze', lè' go ne, tutsa no kun Xuza; no tutsa go kun na, mbaino tutsa nak da kun go. ²¹ Xa' nzhak widi'zh da, no nile' xa' kwa'n nzhapa, walika nazhi' xa' ze' da; no xa' kwa'n nazhi'

da, lè' Xuza chizhi' ska xa', no na chizhi' xa' ze', no lun lo xa' cho ka nak da.

²² Orze' xtu Judas (xa' gat lè't Iscariote) nzhah xa' lo Jesús:

—Lè' go, çchon nab tsa lo no, lu' go cho nak go, no gat nut lo más rè men yizhyuo re'?

²³ Orze' nzhah Jesús:

—Chi cho xa' nazhi' da, lè' xa' le' kwa'n nzhapa, orze' lè' Xuza chizhi' xa' ze', mbaino yo no laxto' xa' ze'. ²⁴ Per xa' gat nazhi' da, gat nzhont xa' kwa'n nzhapa. Rè widi'zh kwa'n nin lo go re', gat lè't chedai, che'n Xuzai, Me mixè'l da yizhyuo re'. ²⁵ Lè'ga' nzon kun go, kinin kure' lo go. ²⁶ Lè' Xuza xè'l Sprit che'n Me yo laxto' go, por nak go men da; lè' Sprit che'n Dios lu' lo go rè kwa'n jwaltra' ne go, nu par tsila go rè kwa'n ninin lo go dizde or galo. ²⁷ Lè' go ya'n, per lè'da le chul zi laxto' go; no kwa'n len zi go chul re' gat nakte nela xmod nizi rè men yizhyuo, xa' nzho chul. Nawint laxto' go, mbaino ni nazheb go. ²⁸ Nal, lè' go mbin la kwa'n nin, lè'da bi', per lè'da yèk ska. No chi lè' go walika nazhi' da, lè' go zak laxto' mbin go, lè'da ña plo nzho Xuza, no lè' Me más tsak lon. ²⁹ Lè'da kini la rè kure' lo go nal re', nes par or gake, orze' yila go rè kwa'n ni la. ³⁰ Yentra' kwan ganin lo go nal re', lè' xa' nile' mandad yizhyuo re' nzè la, per yent kwan gak le' xa' kun na. ³¹ Per ñal ka gake se', par ne rè men yizhyuo, lè'da nazhi' Xuza no nilen rè kwa'n nine Me. Nal cha' go, yubchi be re'.

15

Jesús nak nela tu ya gub ga'

¹ Nzhah Jesús:

—Na nak nela xan tu ya gub ga', lè' Xuza nak xa' nikinai. ² Lè' rè men da nak nela ya'i ga'. No chi tu rè ya'i re' naza' xlè por nzè'b nale lo yuo, orze' lè' xa' nikinai litse par nabei chi ziza'i; no rram kwa'n kiza', lè' xa' tsimbei par za'i más. ³ No lè' rè go mimbe la por rè widi'zh kwa'n midizha lo go. ⁴ Biwi' go dubta' lon, nes nuska da wi' lo go. Tu rram ya gub nagakt za'i nabe chi gat lè' por xane. No se'ska go, nagakt le' go zhi'n nazon da chi lè' go nawi' lon.

⁵ No nzhah Jesús:

—Na nak nela xan tu ya gub ga', no lè' go nak nela ya'i ga'. Men dubta' wi' lon, orze' tutsa gak da kun men ze', no xa' ze' dox za' xlè, nela ya gub ga'; no chi lè' go nawi' lon, yent kwan tsak rè kwa'n le' go lo Dios. ⁶ Men nawi' lon dubta', orze' lè' xa' gak nela rram bizh che'n tu ya gub ga' kwa'n zu' par yol namás.

⁷ Chi lè' go dubta' wi' go lon, no chi zilita' nile' go kwa'n milun lo go; orze' una'b go kwa'n nzhakla go lo Xuza, no lè' Me ne'i.

⁸ Or nile' go kwa'n nzhakla Dios, orze' nilu'

walika men da go, no por kure', lè' rē men di'zh nazhon Xuza Dios. ⁹ Nela xmod nazhi' Xuza da, se'ska nazhi' da go; no se' ga', bile' go dubta' tu go kun xtu go. ¹⁰ Chi dubta' le' go kwa'n nzhaklan, orze' ne go xmod nazhi' da go, nora nanen xmod nazhi' Xuza da por nilen kwa'n nzhakla Xuza.

¹¹ 'Nin kure' lo go par dox zak laxto' go, nela nizak laxto'n ga'. ¹² Kure' nin lo go le' go: Bichizhi' go tu go kun xtu go, nela xmod nazhi' da go ga'. ¹³ Yalnazhi' más kwa'ro nak, ziyél tu men gat xa' por xa' niché'l xa'. ¹⁴ Lè' go nak xa' nichéla chi lè' go le' kwa'n nzhaklan, orze' nak go xa' nichéla. ¹⁵ Nanitra' lo go mos, porke xa' nguzi' tu mos, gat nidi'zht xa' lo ne' rē kwa'n nile' xa'. Lè'da kulè go, xa' nichéla, porke nidizha lo go, rē kwa'n ne Xuza lon. ¹⁶ Gat lè't go ngule da; na ngule go; kwa'n kina'ba lo go, gak go nela rē ya kwa'n niza' nayax dox xlè dubta', nes par lè' Xuza, ne' rē nak kwa'n na'b go lo Me, por nak go men da. ¹⁷ Kure' kina'ba lo go le' go: Bichizhi' go tu go kun xtu go.

Rē men yizhyuo, xa' gat nilibe't Dios, yi' neo

¹⁸ 'Chi lè' rē men yizhyuo yi' ne go, bitsila go, galo laka kun na mile' bixa'i. ¹⁹ Chi ngak lal go kun rē men yizhyuo, orze' lè' bixa' chizhi' go nela nazhi' bixa' rē men che'n bixa'. Per por ngulen go xid bixa', kuze' niyi' bixa' nine bixa' go. ²⁰ Bitsila go kwa'n nin lo go re': "Ni tu mos nado lo xtu men, natsakt más lo xa' nile' mandad xa'." Chi ngurukè bixa' ticha par zakzi bixa' da, nu ska kun go le' bixa'i; no chi mile' bixa' kwa'n nzhapa, nu ska kwa'n gab go le' bixa'. ²¹ Rē kure' le' bixa' kun go, por nak go men da, porke gat nilibe't bixa', Me mixé'l da.

²² 'Chi ngayila bixa' da or nzhapa, na Me mixé'l Dios, orze' nangazé'bxkit bixa' lo Dios. Per por nangayila bixa' da, kuze', gakra' ka'ch bixa', lè' bixa' nzé'b xki lo Dios; ²³ no rē xa' niyi' nine da, nu ska Xuza niyi' bixa' nine bixa'. ²⁴ Yent cho dol ngap bixa' chi nangane bixa' ngalen ni tu rē zhí'n nazhon kwa'n niyent cho gat le' xid bixa'. Per une bixa'i, no lè'la niyi' bixa' nine bixa' da no Xuza. ²⁵ Se' ka nak bixa' par ngok widi'zh kwa'n nzobni' lo ley che'n bixa' kwa'n nzhab: "Yent por kwan niyi' bixa' nine bixa' da." ²⁶ Per or yi'd Sprit che'n Dios, Me xéla par gaku go, lè' Me di'zh cho nak da. Lo Xuza ro' Sprit re', no pura che'n Dios di'zh Sprit re'. ²⁷ No nu ska go di'zh cho da, porke dízde or nguzublon kilun widi'zh che'n Dios, nzo go kuda.

16

¹ Lè'ga naga zakzi go, ni ga' da rē kure' lo go por nak go men da, nes par or zhin rē kure' lo go, naye zo go lo kwa'n ngwayila go

da, ² porke lè' zhé zhin, lè' bixa' ko'tin go le'n plo nibin go nitse'd go widi'zh che'n Dios; no zhin zhé, lè' bixa' gut go, gab bixa' por kuze' zak laxto' Dios. ³ Se' le'nu bixa' go, por gat nilibe' bixa' Xuza no na. ⁴ Kure' nin lo go, par or gak rē kure', orze' tsila go, lè'da ni lai lo go.

Kwa'n nile' Sprit che'n Dios

'Nanganita kure' lo go or galo, lè'da nzo ka kun go; ⁵ nal, lè'da bi' la lo Xuza, Me mixé'l da yizhyuo re'; per yent cho ngane lon: "¿Plo bi go?" ⁶ Lè'la miwin laxto' go por mbin go kure'. ⁷ Per walika kwa'n nin re'; más wen ya go chi bi'n. No chi nabi'n, nayi'dt Sprit che'n Dios lo go, Me gaku go lo rē kwa'n. Chi lè'da bi', lè'da xél Me par yo Me laxto' go. ⁸ Or yi'd Sprit che'n Dios lo rē men yizhyuo re', lè' Me kobe' (wi') cho nzhap dol, no cho yent kwan nak, mbaino gab Sprit che'n Dios xmod gak kun xa' nzhap dol ze'. ⁹ Rē xa' gat ñila da, xa' ze' nzé'b xki lo Dios; ¹⁰ per da gat nzé'b xkita, kuze' lè'da bi' plo nzho Xuza, no nanetra' go da. ¹¹ No xa' nzhap dol ze', xa' nile' mandad yizhyuo re', lè' xa' kix rē kwa'n nak xa', kuze' nayotra' le' xa' mandad yizhyuo re'.

¹² 'Dox kwa'n nzhora' ganin lo go, per xekt go gon gwi rēi nal re', ¹³ per or yi'd Sprit che'n Dios, lè' Me lu' lo go, rē kwa'n nzhakla Dios gon go. Gat nidi'zht Sprit che'n Dios kwa'n xigab yek Me, lè' Me nidi'zh nab tsa kwa'n nzhakla Xuza Dios, par di'zh Me lo go rē kwa'n naga gak. ¹⁴ Lè' Sprit che'n Dios le', di'zh men da wen, porke lè' Me ka' rē cheda par lu' Mei lo go. ¹⁵ Rē che'n Xuza nak cheda; kuze' midizha lo go, lè' Sprit che'n Dios ka' rē cheda par lu' Me xmod nake lo go. ¹⁶ Xche'ptsa nanetra' go da, lè't ne go da xche'p.

Ya nawintra' laxto' rē men che'n Jesús, lè' bixa' zak laxto'

¹⁷ Orze' nzhap pla rē men che'n Jesús lo wech bixa':

—¿Kwan gab widi'zh re' kwa'n ne Jesús lo be: "Xche'ptsa nanetra' go da, lè't ne go da xche'p", mbaino, "Lè'da bi' lo Xuza?" ¹⁸ ¿Kwan gab widi'zh kwa'n ne xa': "Kaxche'p", re'? Nazobye'kt be kure'.

¹⁹ No nane Jesús, lè' bixa' nzhakla na'bdí'zh lo Me por kwa'n midí'zh Me ze', orze' nzhap Me:

—¿Chi nzhakla go gon go kwan gab kwa'n nin lo go ze'? ¿Chi kuba' kina'bdí'zh go lo wech go? ²⁰ Kwa'n nanen, lè' go go'n, no win laxto' go, no lè' rē men yizhyuo zak laxto'; per lè' yalnawin kwa'n zak go ba', lè'i gak yalnizak laxto' go. ²¹ Tu una' or gal xin una', kun yalne nzhap una' mè'd; per or ngol la mè'd, di nizak laxto' xa' ña'l laxto' xa' yalne ze' por niwi' xa' lo mè'd. ²² Se' ska go nal re', nzho yalnawin laxto' go, per or yala lo

go xtu wëlt, orze' lè' go zak laxto' ne go da, no yalnizak laxto' go re', yent cho kubchiy lo go. ²³ No rè zhè ze', yentra' kwan na'b go lon. Walika kwa'n nin lo go re', lè' Xuza Dios ne' rè kwa'n na'b go lo Me, por nak go men da. ²⁴ Haxta nal, nagat na'b go lo Me por lèn; nal bina'b goi par zhine lo go, nes par zak laxto' go.

Jesukrist mile' gan lo rè men yizhyuo

²⁵ 'Lè' da midì'zh kure' lo go nela xmod nak tu kwa'n ga', per zhin zhè ya nadizhtra' se' lo go, tuli ganin xmod nak rè che'n Xuza lo go. ²⁶ Zhè ze' gat naki'ntra' na'ba tu kwa'n lo Xuza por go; yub go na'be lo Me por nak go men da, ²⁷ porke yub Xuza nazhi' go, no por nazhi' go da, kuze' nazhi' Xuza go, no por ñila go, lè' Me mixè'l da. ²⁸ Nzhala lo yizhyuo re', lè' Xuza mixè'l da; nal lè' da la ska yizhyuo re' par ña ska lo Xuza.

²⁹ Orze' nzhab rè men che'n Jesús lo Me:

—Nalse tuli ne goi lo no, gat kidi'zht goi xtu mod; ³⁰ nalse nane no, gat naki'ntra' na'bdi'zh no tu kwa'n lo go, porke rèi nane la go; kuze' ñila no, lè' Dios mixè'l go yizhyuo re'.

³¹ Orze' nzhab Jesús:

—¿Haxta nalse ngwayila go da? ³² Lè' or ngol la, lè' rè go re' chbe, la' nzè'b go da; per naya'nta' naba, lè' Xuza nzo ka kuda. ³³ Nin kure' lo go par zi go chul, porke lè' go nak tutsa kuda. Lo yizhyuo re', lè' go ded lo rè kwa'n gat lè', per nazhebt go, na mile' la gan lo rè kwa'n gat lè' nzhò yizhyuo re'.

17

Kina'b Jesús lo Xuz Me por rè men che'n Me

¹ No or milox midì'zh Jesús rè widì'zh re', orze' miwi' Me lo yibè' no nzhab Me:

—Payè', lè' or ngol la: Nalse bilu' Go lo rè men tugaka Xga'n go kinu yalnazon, par lu' Xga'n go lo rè men, Go gaka kinu yalnazon. ² Go mizo Da par gapa kwan ñal le' rè men, mbaino par zan yalnaban par dubta' ka' rè men, xa' ngule Go gak men Da. ³ Kure' nak ban men par dubta'; libe' men, Go gaka nak Dios, mbaino na, nak Jesukrist, Me mixè'l Go lo yizhyuo re'.

⁴ 'Por milèn rè kwa'n ne Go yizhyuo re', kuze' milun lo rè men, tugaka Go Dios nazon. ⁵ Payè', nalse bilu' Go lo rè men, tugaka Xga'n Go kinu yalnazon tutsa kun Go, yalnazon kwa'n kinu be or ni naga zuxkwa' yizhyuo.

⁶ 'Lè' da milu xmod nak Go lo rè men xa' mine' Go nak men Da lo yizhyuo re'; men che'n Go bixa' mbaino mine' Go bixa' gak men da, no nile' bixa' rè kwa'n ne Go. ⁷ Nal une bixa' lè' rè kwa'n kinun, Go mine'i; ⁸ porke milun lo bixa' rè widì'zh kwa'n ne

Go lon. No por une bixa', walika Go mixè'l Da, kuze' ngwayila bixa' Da.

⁹ 'Nal kina'ba lo Go por lè' bixa'; gat nina'bta por rè men yizhyuo re', sino por nab tsa rè xa' mine' Go gak men Da, porke men che'n Go bixa'. ¹⁰ Rè kwa'n kinun nak che'n Go, no rè che'n Go nak chedaska; no nilu' xmod nak yalnazon da por rè men da re'.

¹¹ 'Nal ya nazotra' más yizhyuo re', per lè' bixa' kwin ra' lo yizhyuo re'. No dub yala lo Go Payè', Go gaka Me Nazhon, bikina Go bixa' kun yalnazon che'n Go, kun mis yalnazon che'n Go kwa'n mine' Go unkan, par kwin bixa' tutsa nela Go no na ga'. ¹² Dub di nguzon kun lè' bixa' yizhyuo re', mikinan bixa' kun mis yalnazon che'n Go kwa'n mine' Go unkan, no ni tu bixa' nangaro' nez che'n Go, sino nab tsa xa', xa' nak la di'zh lox lo Dios, milox; nes ngok rè kwa'n nzobni' lo Yech che'n Go.

¹³ 'No nal, lè' da yal ska lo Go, no nin rè kure' dub nzon yizhyuo re', par se' dubta' zak laxto' rè men da, nela xmod nizak laxto'n ga'. ¹⁴ Na milu widì'zh che'n Go lo rè men Da re', kuze' niyi' men yizhyuo nine bixa', porke gat nikizètra' bixa' nela más rè men yizhyuo, nela Da, gat nileta kwa'n nile' men yizhyuo. ¹⁵ Gat kina'bta' lo Go, ko' Go bixa' yizhyuo re'; kwa'n kina'ba kina Go bixa' lo Mizhab. ¹⁶ No nela Da gat lè't xa' yizhyuo Da, se'ska lè' bixa' gat lè't men yizhyuo bixa'. ¹⁷ Bile' Go gak bixa' nab tsa par Go kun widì'zh che'n Go kwa'n milun lo bixa'; lè' widì'zh che'n Go nilu' xmod nak Go. ¹⁸ Nela mixè'l Go da lo rè men yizhyuo, se'ska nixèla bixa' xid más rè men yizhyuo. ¹⁹ Dub Da minen par len nab tsa zhi'n nazon che'n Go, nes par nab tsa rè zhi'n nazon che'n Go le' bixa'. ²⁰ No gat kina'bta' nab tsa por rè men da re'; lè' da kina'b lo Go por rè xa' laore yila widì'zh da por rè men da re', ²¹ par gak bixa' tutsa. Payè', kina'ba par rè bixa' gak tutsa kun be, nela Go kun na ga' nak be tutsa. Nzhaklan gak bixa' tutsa, par se' yila rè men yizhyuo, lè' Go mixè'l da yizhyuo re'. ²² Na miza yalnazon kwa'n mine' Go unkan, par nka' bixa', par gak bixa' tutsa men, nela nak da kun Go ga'; ²³ na kun lè' bixa', no Go kun na, par se' gak bixa' tutsa, no se' ne rè men yizhyuo, lè' Go mixè'l da yizhyuo re', no nazhi' Go bixa' nela nazhi' Go da ga'.

²⁴ 'Payè', Go mine' bixa' gak men Da, no kina'ba yo bixa' lomìs plo yo'n, par ne bixa' yalnazon kwa'n mine' Go unkan, porke nazhi' Go da dizde or ni naga yuxkwa' yizhyuo. ²⁵ Payè', Go nile' rè kwa'n nali; men yizhyuo, gat nilibe't bixa' Go, per na nilibe'ka Go, no nu rè xa' mine' Go gak men Da, lè' bixa' nane ka, Go mixè'l da. ²⁶ Lè' da mile la, milibe' bixa' cho Go, no lè' i le ra', par

chizhi' bixa' más men nela nazhi' Go da ga', no nu par ban bixa' tutsa kun xigab kwa'n kinun.

18

Nguzen rë xa' nak zhi'n Jesús

(Mt. 26:47-56; Mr. 14:43-50; Lc. 22:47-53)

¹No or milox midì'zh Jesús rë widì'zh re', orze' nguro' Me kun rë men che'n Me par nzha bixa', nded bixa' xtu ro' yux kwa'n lë Cedrón. Ze' nzhi'b tu béd ya kwa'n lë olib, ze' mia'n bixa'. ²No Judas, xa' chi Jesús lo rë men Israel xa' nak zhi'n, nane xa' plo nzhi'b rë ya ze', porke ze' nayax wëlt nzhaya Jesús kun rë men che'n Me par nibin bixa' ze'. ³Orze', ze' mizhin Judas kun tu béd sondad román, kun zipla xa' nikina yado'; rë men re' nzë ze' por mandad che'n rë ngulëi' xa' nile' mandad lo más rë ngulëi', no por mandad che'n rë men fariseo. Nzhanu bixa' kwa'n nizini lo bixa' mbaino kun rë bël yer, no nu nzhanu bixa' kwa'n dil bixa'. ⁴Per lë' Jesús nane la rë kwa'n gak, orze' mina'bdi'zh Me lo rë men ze', nzhab Me:

—¿Cho kikwa'n go?

⁵Mikab rë men ze':

—Lë' Jesús xa' nzë yezh Nazarete.

Lë'chi nzhab Jesús:

—Na xa' ze'.

Mbaino nu Judas xa' chi Jesús lo rë men ze', nzho xid rë xa' re', ⁶no or nzhab Jesús: "Nai", no orze' lwegá' miëk bixa' al tich bixa', no ngwachin bixa'. ⁷Orze' xtu wëlt nzhab Jesús lo bixa':

—¿Cho kikwa'n go?

Mikab rë men ze':

—Jesús xa' nzë yezh Nazarete.

⁸Per nzhab Jesús lo bixa':

—Lë'da ni lai lo go, nai. Lë'i na kikwa'n go; bila' go bi rë men re'.

⁹Rë kure' ngok nes ngok rë widì'zh kwa'n midì'zh Jesús, or nzhab Me lo Xuz Me: "Rë xa' mine' Go gak men da, ni tu bixa' nangaro't nez che'n Go." ¹⁰No lë' Simón Per kinu tu spad, orze' ngulo' xa'i, no micho' xa' tu lad direch nzha tu xa' lë Malco, mos che'n ngulëi' ro, ¹¹orze' nzhab Jesús lo Per:

—Guluchao' spad ba' plo nzhoi; no chi lë' Xuzá nzhakla de'da lo kwa'n nazhe'b re', lë'i de'da.

Jesús nzo lo Anás, xa' nak xa'zha'p ngulëi' ro

(Mt. 26:57-58; Mr. 14:53-54; Lc. 22:54)

¹²No lë' rë sondad, kun xa' nile' mandad lo bixa', mbaino kun rë xa' nikina yado', nguzen bixa' Jesús, mili'b bixa' Me, ¹³orze' mbi'y bixa' Jesús galo laka lo Anás, xa' nak xa'zha'p Caifás, xa' nak ngulëi' ro le'n li'n ze'. ¹⁴Nzhab xa' lë Caifás re' lo rë men Israel,

más wen gat tutsa miyi' re' ke par gat dub yezh men.

Nzhab Per, gat nilibe't xa' Jesús

(Mt. 26:69-70; Mr. 14:66-68; Lc. 22:55-57)

¹⁵Lë' Simón Per kun xtu men che'n Jesús, nzhakë bixa' tich Jesús, no lë' xtu men che'n Jesús ze', nilibe' ngulëi' ro xa', kuze' ngok nguio xa' re' lo luwe che'n ngulëi' ro, plo ñanu men Jesús, ¹⁶no lë' Per mia'n al tich, gax ro' pwert; per men che'n Jesús xa' nilibe' ngulëi' ro ze', midì'zhnu xa' re' xa' nikina ro' pwert, par mila' xa' nguio Per. ¹⁷Orze' mina'bdi'zh una' kwa'n nikina ro' puert ze' lo Per, nzhab una':

—¿Chi gat nutal nak tu rë men che'n miyi' ba'?

Mikab Per:

—A'a, gat nut da.

¹⁸No ze' nzo pla rë mos che'n ngulëi' ro kun rë xa' nikina yado', kizo'l bixa' tu ki por dox nayag, par kichë' bixa'; orze' nu Per nguzubi, kichë' xid rë xa' re'.

Mina'bdi'zh Anás, kwan nak Jesús

(Mt. 26:59-66; Mr. 14:55-64; Lc. 22:66-71)

¹⁹Orze' nguzublo kina'bdi'zh Anás lo Jesús, kwan nak rë men che'n Me, mbaino xkwan nilu' Me. ²⁰Unkab Jesús:

—Midì'zha lo rë nak men, no zilita' milune le'n rë yo' plo nibin rë men Israel, par nitse'd bixa' widì'zh che'n Dios, no haxta le'n yado' milune; nangalutne xla'n. ²¹¿Chon kinabdi'zh go lon? Bina'bdi'zh go lo rë xa' mbin rë kwa'n midizha, no lë' bixa' ne lo go kwan milun lo bixa', porke lë' bixa' mbine.

²²No or milox midì'zh Jesús kure', orze' mikë' tu xa' nikina yado' ze' tube ro' Me, no nzhab xa':

—¿Chi sa' kabal lo xa' nak ngulëi' ro ba'?

²³Unkab Jesús:

—Chi midizha tu widì'zh kwa'n gat ñal dizha, bine go kwane; per chi midizha kwa'n ñal ka dizha, ¿chon mikë' goi ro'n?

²⁴Orze' mixë'l Anás Jesús nali'b do' Me lo Caifás, xa' mer ngulëi' ro.

Xtu wëlt nzhab Per, gat nilibe't xa' Jesús

(Mt. 26:71-75; Mr. 14:69-72; Lc. 22:58-62)

²⁵Stubi nzo Simón Per ze', kichë' xa', lë'chi mina'bdi'zh rë xa' ze' lo Per, nzhab bixa':

—¿Chi gat nutal nak tu rë men che'n miyi' ba'?

Unkab Per:

—A'a, gat nut da.

²⁶Lwegá' mina'bdi'zh tu mis rë mos che'n ngulëi' ro, tu mos kwa'n nak melizh Malco, xa' micho' Per nzha ze', nzhab xa':

—jLê'i lu ka unen nikizê kun mbe ba', plo nzhi'b ya olib!

²⁷ Orze' xtu wêlt nzhab Per:

—jGat lê't nai!

Lê'chi mikê' nguid gai kant.

Jesús nzo lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ No di lizh Caifás, ze' ñanu bixa' Jesús par yalao plo nzob gobernador, no ya nzhani-lyuo la orze'; per nangayot rê men Israel le'n yalao, porke nayi'y nzhab ley che'n bixa', napa' nagakt gao bixa' lani Pask ze'. ²⁹ Kuze' nguro' Pilat al tich par mina'bdi'zh xa' lo rê men ze', nzhab xa':

—¿Kwan nzhab go nak xa' re'?

³⁰ Orze' nzhab rê men ze':

—No chi yent kwan nak xa', nangayi'dnut no xa' lo go.

³¹ Per nzhab Pilat:

—Bi'y mis yub go xa', par kube' go kwan ñal xa', nela xmod nzhab ley che'n go.

Orze' nzhab rê men xa' nzo lo rê men Israel ze':

—jLo ley che'n go, nagakt gut no ni tu men!

³² Sa' midizh bixa' par ngok rê widi'zh kwa'n midizh Jesús xmod gat Me. ³³ Orze' ña ska Pilat le'n yalao xtu wêlt, par ngurezh xa' Jesús, nzhab xa' lo Me:

—¿Chi walika lu nak rey che'n rê men Israel?

³⁴ Unkab Jesús:

—¿Chi mis lu kina'bdi'zh kuba', o nzho cho xtu men nei lol?

³⁵ Orze' nzhab Pilat:

—¿Chi nu da nak tu men Israelex par nel kuba' lon? Men lazhal kun rê ngulêi' xa' nile' mandad lo más ngulêi'; lê' rê xa' re' nzadnul lon. ¿Kwan mile'lx?

³⁶ Nkab Jesús:

—Yalgobier da gat lê't kwa'n yizhyuo re'i; no chi ngake kwa'n yizhyuo re', orze' lê' rê men da ngadil par nangazen rê men Israel da, per yalgobier kwa'n kinun, gat lê't kwa're'i.

³⁷ Orze' nzhab Pilat:

—Ah, ¿chi reyal orze'?

Unkab Jesús:

—Lu ne, lê'da rey; lê'da ngol par nzhala yizhyuo re', no par dizha kwa'n wali. No rê xa' nzhon widi'zh wali kwa'n nidizha, orze' nile' bixa' kwa'n nzhapa.

³⁸ Per nzhab Pilat:

—¿Cho ka ne kwa'n walix?

Nguziyêl Pilat, gat Jesús

(Mt. 27:15-31; Mr. 15:6-20; Lc. 23:13-25)

No or milox midizh Pilat widi'zh re', nguro' xa' xtu wêlt par midizh xa' lo rê men Israel, nzhab xa':

—Na ngurêl, yent kwan nak miyi' re', ³⁹ per go kinu kostumbr, nina'b go, niliyan

tu men nzho lizhyi'b, dub nzhak lani Pask. ¿Cho nzhakla go liyan? ¿Chi liyan rey che'n rê men Israel?

⁴⁰ Lê'chi rê bixa' nguruzhiê:

—jNaliya't go miyi' ba'! jMás wen biliya' go Barrabás!

No ter nak Barrabás tu xa' nichêldil men kun gubier.

19

¹ Orze' mile' Pilat mandad, ndin bixa' Jesús, ² no mizuxkwa' rê sondad ze' tu koron yich, mbaino mizo'b xa' i yek Jesús, mbaino mixo'b bixa' tu kap kuroy yind tich Jesús, nela nile' men kun tu rey ga', ³ orze' nguzubi bixa' lo Jesús par nzhab bixa':

—jRey che'n rê men Israel, par dubta' banal!

Mbaino mikê' bixa'i ro' Me. ⁴ Xtu wêlt nguro' Pilat al tich, lo rê men Israel xa' nzhin ze', par nzhab xa':

—Biwi' go, lê'da zo xa' lo go par ne goi, na ngurêl, yent kwan nak miyi' re'.

⁵ Orze' nguro' Jesús lo rê men ze', nzob koron yich ze' yek Me, mbaino nzho'b kap yind ze' tich Me, orze' nzhab Pilat:

—jBiwi'ul jLê' miyi' re' re'!

⁶ No or une rê ngulêi' ro ze' Jesús, kun rê xa' nikina yado', nguzublo nguruzhiê bixa':

—jBikê'u xa' lo krus! jBikê'u xa' lo krus!

Orze' nzhab Pilat:

—Bi'y go xa', no go bikê' xa' lo krus; na ngurêl, yent kwan nak xa' re'.

⁷ Per nzhab rê men Israel ze' lo Pilat:

—jLo ley che'n no nidizh, ñal gat xa', porke lê' xa' nidizh, Xga'n Dios xa'!

⁸ Or mbin Pilat kure', más mizheb xa'; ⁹ nguio xa' xtu wêlt le'n yalao par xtu wêlt mina'bdi'zh xa' lo Jesús, nzhab xa':

—¿Plo ka nzêl?

Per nangakabt Jesús, ¹⁰ orze' nzhab Pilat:

—¿Chon gat nikabal lon? ¿Chi nanetal, na gak le mandad kêl lo krus, mbaino gak len mandad, liya' bixa' lu?

¹¹ Per nzhab Jesús:

—Nagakt le'l ni tu yalgustis kun na chi lê' Dios naziyêl; xa' michi da lol, más nzê'b xli xa' ze' ke lu.

¹² No dizde orze', mikwa'n Pilat mod par ngaliya' xa' Jesús, per lê' rê men Israel más naye nguruzhiê bixa' lo Pilat:

—jChi lê'l liya' miyi' ba', nagaktal xa' kwa'n nichêl! César, porke rê men xa' gak rey, chi gat lê't César kubi xa', xa' ze' nak xa' nidil kun César!

¹³ No or mbin Pilat kure', nguro' xa' kun Jesús al tich no nguzob xa' plo nile' xa' yalgustis, plo lê' kun widi'zh grieg, Enlosado, no lê' kun widi'zh hebreo lêi, Gabata (kun xtu widi'zh kure' gab, Plo Nax Ke Wen). ¹⁴ Lê' zhê ze' nak zhê kwa'n nizuxkwa' men kwa'n

par lani Pask, no pas mer garol zhê orze',
lê'chi ngwayab Pilat lo rê men Israel ze':

—¡Biwi' go, lê' rey che'n go re'!

¹⁵ Orze' naye nguruzhiê bixa':

—¡Gulutin go xa' ba! ¡Gulutin go xa' ba!

¡Bikê' go xa' lo krus!

Per nzhab Pilat:

—¿Taxa kê'n rey che'n go lo krus?

Orze' nzhab rê kwa'n nak ngulê'i ro ze':

—¡Yentra' cho xtu rey kinu no, nab tsa César!

¹⁶ Mbaino michi Pilat Jesús lo bixa', par kê' bixa' Jesús lo krus, orze' ñanu bixa' Me.

Mikê' bixa' Jesús lo krus

(Mt. 27:32-44; Mr. 15:21-32; Lc. 23:26-43)

¹⁷ No mile' bixa' mis Jesús mbi'y krus che'n Me yên Me, par nzhanu bixa' Jesús plo lê Kalaber (kun widi'zh hebreo lêi Gólgota),¹⁸ ze' mikê' bixa' Jesús lo krus, no nu xchop men mikê' bixa' lo krus; tu ga' xa' kad lad che'n Me. ¹⁹ No yek krus che'n Jesús, mile' Pilat mandad nkê widi'zh kwa'n nzhab se': "Jesús xa' nzê yezh Nazaret, rey che'n rê men Israel." ²⁰ Nayax men Israel mbi'l widi'zh re', porke plo mikê' bixa' Jesús lo krus, gax ña'ne par yezh Jerusalén, no rê widi'zh ze' nzobni'y kun widi'zh hebreo, no kun widi'zh latín, mbaino kun widi'zh grieg.²¹ No por kure' nzhab rê ngulê'i ro che'n rê men Israel lo Pilat:

—Nakê'tal sa': "Xa' re' nak rey che'n rê men Israel", neka bizob: "Xa' re' nidi'zh, nak xa' rey lo rê men Israel."

²² Per nzhab Pilat:

—Kwa'n mikê'n, sa' ya'ne.

²³ No or milox mikê' rê sondad Jesús lo krus, orze' mia'n bixa' kun xab Jesús kwa'n al tich, mile' bixa'i tap lê' par tlê'gai' nka' bixa'; no nu xab Jesús kwa'n al le'n, lê túnica, nguzen bixa'i, no lê'i gat nadibt, tutsa lê' nakxao' lar ze',²⁴ orze' nzhab rê sondad ze' lo wech bixa':

—Nachêzt be lar re'; neka kit be par ne be, cho ya'n kun lê'i,

Sa' mile' bixa' par ngok rê widi'zh kwa'n nzobni' lo Yech che'n Dios plo nzobni': Michêz bixa' xaba par mia'n bixa' kun lê'i, no nguzhit bixa' par mia'n bixa' kun túnica da.

Kure' mile' rê sondad,

²⁵ per xan krus plo nikê Jesús, nzo xna' Me mbaino nzo bêl xna' Me, no nzo Mari tsa' Cleofas, no nu Mari Madalén nzo ze'.²⁶ Kuze', or une Me xna' Me, nzo xna' Me gax laka kun tu rê men che'n Me xa' más nichê'l Me, orze' nzhab Me lo xna' Me:

—Una', lê' xga'nal ba'.

²⁷ Mbaino lo xa' ze' nzhab Me:

—Lê' xna'l ba'.

No dizde orze' mbi'y xa' ze', xna' Me lizh xa'.

Ngut Jesús

(Mt. 27:45-56; Mr. 15:33-41; Lc. 23:44-49)

²⁸ No or milox rê kure', lê' Jesús ya nane la, lê' rêi ngok la, no nes par lox gak rê widi'zh che'n Dios kwa'n nzobni' por lê' Me, kuze' nzhab Jesús:

—Nizê'i laxto'n.

²⁹ No ze' nzo tu jar nits gub ni, orze' yek tu ram ya kwa'n lê hisopo, michêl bixa' tlê' lar xi'l, orze' mikê' bixa' kure' le'n jar re', no michi bixa'i ro' Jesús. ³⁰ Or milox ngu' Jesús kure', orze' nzhab Me:

—Lê' rêi milox la ngok.

Orze' mirek Me lo yuo, miza' Me alm che'n Me lo Xuz Me Dios.

Tu lans ta' koxti che'n Jesús

³¹ Lê' zhê ze' nak zhê kwa'n nizuxkwa' men kwa'n par lani Pask, per lê' rê xa' nak zhi'n lo rê men Israel, gat nzhaklat bixa' ya'n kwerp che'n Jesús, mbaino kwerp che'n xchop rê miyi' ze' lo krus, mer zhê kwa'n gal lani ze', porke zhê ze' nak zhê más tsak par rê men Israel. Kuze' mina'b bixa' lo Pilat, par ki'ch bixa' ni' rê xa' nikê lo krus ze', nes par gat ga' bixa', no la ga' bixa' lo krus mis zhê ze'.³² Orze' ngwa rê sondad par ndi'ch bixa' ni' galo laka xa' kwa'n nkê lo krus ta' Jesús, no sa' ska mile' bixa' kun xtu xa' kwa'n nkê xtu lad ta' Jesús,³³ per or nguzubi bixa' plo nikê Jesús, une bixa', lê' Jesús ngut la. Kuze' nangayi'cht bixa' ni' Me,³⁴ per tu rê sondad ze' ndid tu lans ta' koxti che'n Jesús, orze' lwega' nguro' ren kun nits plo ndid xa' kure'.³⁵ No xa' midizh kure', lê' xa' une loi, no walika kwa'n une xa' no kwa'n nidi'zh xa', nes par nu go, yilai.³⁶ Se' ngok nes par ngok widi'zh re' kwa'n nzobni' lo Yech che'n Dios kwa'n nzhab se': "Ni tu wes che'n Me nangacht." ³⁷ No xtu plo se' nzobni': "Une men or nguzhid bixa' kun lans ta' Me."

Miga'ch Jesús

(Mt. 27:57-61; Mr. 15:42-47; Lc. 23:50-56)

³⁸ Or milox ngok kure', orze' ngwa Che xa' nak tu men yezh Arimatea lo Pilat par mina'b xa' lo Pilat, wei' xa' kwerp che'n Jesús, mbaino nguziyêl Pilat. No Che re' nak tu men che'n Jesús, per yent cho lo nzhabt xa'i por nizheb xa' lo rê xa' nak zhi'n lo rê men Israel. ³⁹ No nu Nicodemo xa' ngwadi'zhnu Jesús tu or yê'l, nzhanu xa' kwa'n nixla' nax mbaino noche kun mirra mbaino áloe; no naga'i nzhi'bra' gal bichi' kil. ⁴⁰ Orze' Che kun Nicodemo mila bixa' kwerp che'n Jesús, no michêl bixa' lare, mbaino ngulo bixa' kwa'n nixla' nax ze'

kwerp che'n Me. Se' nile' rë men Israel or nika'ch bixa' men. ⁴¹ No plo mikë' bixa' Jesús lo krus, nzhi'b tu béd ya, no ze' naxxao' tu ba' plo ni tu men nagat ga'ch. ⁴² Ze' mika'ch bixa' Jesús, porke ña'ne gax laka plo nké Me lo krus, mbaino nu mizhin gax la lani che'n rë men Israel, kuze' nayan laka mika'ch bixa' Me.

20

Nguruban Jesús

(Mt. 28:1-10; Mr. 16:1-8; Lc. 24:1-12)

¹ No zhë galo laka che'n sman, dox garzi'l, nakao ra' ngwa Mari Madalen ro' ba' plo miga'ch Jesús, orze' une xa', lë' ke kwa'n nayao' ro' ba', nax la tu lad. ² Orze' karre miék una' plo nzho Simón Per kun xtu men che'n Jesús xa' más niché'l Me, nzhab una':

—¡Pas nzho cho ngulo' kwerp che'n Señor che'n be le'n ba', no ñanu xa'í, mbaino yent cho nane plo ñanu xa'í!

³ Orze' nzhatwi' Per kun xtu xa' nak men che'n Jesús ze' ro' ba'. ⁴ Karre nzha rop bixa' ro' ba', per galo laka xa' ze' mizhin ro' ba' lo Per. ⁵ Orze' ndixni xa' le'n ba', une xa' nax nab tsa lar kwa'n ngurël Jesús ze', per nangayot xa' le'n ba'. ⁶ No gax tich xa' re' mizhin Simón Per, no tuli nguio Per le'n ba', orze' une xa' nab tsa lar ze' nax, ⁷ no nu une xa', lar kwa'n ngurël yek Jesús or miga'ch Me, naxtsai tu lad, chul laka nayë'che gax plo nax lar kwa'n ngurël Jesús. ⁸ Orze' nu xa' kwa'n mizhin galo laka ze' nguio le'n ba'. Or une xa' rë kure', ngwayila xa'í. ⁹ Ter nzobni' lo Yech che'n Dios, lë' Jesús naki'n ruban, per nagat zobyek bixa' kure'. ¹⁰ Orze' ña rë men che'n Me ze' par lizh bixa'.

Ngurulo Jesús lo Mari Madalen

(Mr. 16:9-11)

¹¹ No lë' Mari mia'n ro' ba', kiyo'n xa'; no dub kiyo'n xa', ndixni xa' le'n ba', ¹² orze' une xa', chop ganj nak lar bëo laka; tu xa' nzob plo una yek Jesús, mbaino xtu xa' nzob plo una ni' Me. ¹³ Lë'chi minabdi'zh rop ganj re' lo Mari, nzhab bixa':

—Una', ¿chon kiyo'nal?

Unkab Mari:

—Kiyona porke naneta cho ñanu kwerp che'p Señor da, no naneta plo ngwala' bixa'í.

¹⁴ No laore milox midizh Mari kure', lë'chi miék xa' al tich xa', no une xa', lë' Jesús nzo ze', per nangalibe't xa' chi Jesuze, ¹⁵ orze' nzhab Jesús lo xa':

—Una', ¿chon kiyo'nal? ¿Cho kikwa'nal?

Per lë' Mari mile' xigab, xa' nikina rë ya nzhi'b ze' xa' re', kuze' nzhab Mari lo xa' re':

—Lë' go, chi go mbi'y kwerp che'n Señor da, bineu plo ngwala' goi, par yakane.

¹⁶ Lë'chi nzhab Jesús:

—¡Mari!

Orze' miék Mari, milibe' Mari Jesuze, no kun widi'zh hebreo midizh Mari:

—¡Rabuni! (widi'zh kwa'n gab Maestr).

¹⁷ Orze' nzhab Jesús:

—Nazenta'l da, porke lë'da laore bi' plo nzho Xuza, per bizë no guzhe lo rë men da, lë'da bi' plo nzho Xuza, Me nak ska Xuz go; lo Dios da, Me nak ska Dios che'n go.

¹⁸ Orze' ngwayab Mari Madalene lo más rë men che'n Jesús, nzhab xa', lë' xa' une Jesús, mbaino nzhab xa' rë kwa'n nzhab Jesús lo xa'.

Ngurulo Jesús lo rë men che'n Me

(Mt. 28:16-20; Mr. 16:14-18; Lc. 24:36-49)

¹⁹ No mis zhë ze', or mizhël la lyuo, zhë galo laka che'n sman, nzhin rë men che'n Jesús le'n yo', naye nayao' ro'í por nizheb bixa' lo rë men Israel, xa' nak zhi'n. Lë'chi nguio Jesús ze' plo nzhin rë men che'n Me, no nguio Me garol sao' plo nzhin bixa', no nzhab Me:

—¡Dios le' ya go wen!

²⁰ No or midizh Me kure', orze' milu' Me ya' Me plo nguzob rë klab ze', no ta' laxto' Me plo ndid xa' lans, orze' dox nizak laxto' rë men che'n Me or une bixa' Me. ²¹ Kuze' xtu wëlt nzhab Jesús:

—¡Dios le' ya go wen! Mbaino nela mixë'l Xuza da, se'ska xëla go.

²² Orze' milabi Me lo rë men che'n Me, no nzhab Me:

—Yo Sprit che'n Dios laxto' go, ²³ nes par or gab go, gat nzë'bkkitra' tu men, orze' Dios miche' la rë kwa'n nzë'b xki xa' re'; per rë xa' kwa'n gab go, nache't Dios kwa'n nzë'b xki xa', orze' sa' ka gake.

Une Max, walika nguruban Jesús

²⁴ Lë' Max nak tu xa' nzho xid dub tu dusen men che'n Jesús, no nu nzhab men lë xa': "Xa' kwach", no gat nzot Max kun lë' bixa' or ngurulo Me lo bixa', ²⁵ kuze' nzhab bixa' lo Max:

—Lë'no une Señor che'n be.

Per unkab Max:

—Chi nanen plo ngwa klab ya' Me, no chi nakon bikwen ya'n ze', mbaino chi nayo ya'n plo ndid xa' lans, nayilatne.

²⁶ Or nded xon ngubizh, xtu wëlt migan rë men che'n Jesús le'n yo' ze', orze' nu Max nzho xid bixa', no naye nayao' ro' yo', orze' nguio Jesús ze', no nguio Me garol sao' plo nzhin bixa', orze' nzhab Me lo bixa':

—¡Dios le' ya go wen!

²⁷ Tuli ka nzhab Jesús lo Max:

—Di'nu bikwen ya'l re', no biwi' ya'n; no di'nu ya'l ta' laxto'n re'. Nagaktra'l tu xa' nen par yilai, sino gok tu xa' ñila da.

²⁸ Mikab Max orze':

—¡Go nak Señor da, mbaino Dios da!

²⁹ Nzhab Jesús:

—Por unel rē kure', ngwayilal da. Per rē xa' ñila da ter gat ne xa' da, orze' nazhon nzha rē xa' re' kun Dios.

¿Por kwan mizob Juan kure' lo yech?

³⁰ Dilant lo rē men che'n Me, nayax ra' kwa'n nazhon mile' Jesús kwa'n gat zobni't lo yech re', ³¹ per rē kwa'n nzobni' lo yech re', lē'i' nzobni' par yila go, lē' Jesús nak Krist, Xga'n Dios; no por yila go Me, lē' go ban par dubta' kun Dios.

21

Jesús ngurulo lo za gazh men che'n Me

¹ Nzha pla ra' ngubizh di ngok rē kure', ngurulo Jesús xtu wēlt lo rē men che'n Me, plo nīkē lagún kwa'n ña'n lazh men Tiberias. Se' ngurulo Me. ² Rē nak rē xa' re' nzhin: Simón Per, no Max xa' nzhah men lē Kwach, kun Natanael xa' nzē yezh Caná kwa'n ña'n lazh men Galilea, no nu rop xga'n Zebedeo kun xchop rē men che'n Jesús. ³ Nzhah Simón Per lo bixa':

—Lē'da nzhatsen mbēl.

Unkab rē xa' ze':

—Nu no ya kun lu.

Orze' nzha bixa' le'n tu bark, per yē'l ze', ni tu mbēl nangazent bixa'. ⁴ No ya znēnilyuo la, lē'chi ro' lagun ze' ngurulo Jesús, per nangalibe't rē men che'n Me chi lē' Mei. ⁵ Mina'bdi'zh Jesús lo bixa', nzhah Me:

—Lē' go xga'n, ¿chi nagat zen go ni tu mbēl?

Unkab bixa':

—Ni tu ma.

⁶ Orze' nzhah Jesús:

—Gulubiu yex lad direch ta' bark, lē' go zen ma.

Sa' mile' bixa', no haxta ni naxekt bixa' ngago' bixa' yex mbēl ze' le'n nits por dox zhēi di mbēl. ⁷ Orze' tu men che'n Jesús xa' más nichē'l Jesús, nzhah xa' lo Per:

—¡Lē'la Señor che'n be xa' ba'!

No or mbin Simón Per, lē'i' Jesús, tuli ngok xa' xab xa' kwa'n ngulo' xa' par unké xa' zhī'n, tuli ngula xa' le'n nits, nzha xa' lo Jesús. ⁸ No zipla rē men che'n Me, ñē'd bixa' le'n bark, kizubxax bixa' yex kwa'n zhē di mbēl, no plo ñē'd bixa' par ro' yuo bizh, nzhoi pas tu gayo' metr. ⁹ No or ngula bixa' bark ze', une bixa', nzhin la ki ze', no kiyay mbēl loi no pan. ¹⁰ Orze' nzhah Jesús lo bixa':

—Dinou pla mbēl kwa'n laore nguzen go ba'.

¹¹ Kuze' nkē Simón Per le'n bark par mizubxax xa' yex kwa'n nzho mbēl ze' haxta ro' nits, mbaino zhēi di mbēl ro; nzho paste tu gayo' nzho cho' bichi' bichon ma le'ne; no ter dox nayax mbēl per nangarēzt yex ze'. ¹² Orze' nzhah Jesús lo bixa':

—Dē'u gaosi'l go.

No ni tu rē men che'n Me, nangayetla, ngab: “¿Cho go ga'?” Lē' bixa' nane la, lē'i' lē' Me. ¹³ No tuli nguzubi Jesús lo bixa', miza' Me pan par gao rē men che'n Me; no se' ga' miza' Me mbēl par gao rē men che'n Me. ¹⁴ Kure' nak wēlt mion ngurulo Jesús lo rē men che'n Me dizde or nguruban Me.

Midi'zh Jesús kun Simón Per

¹⁵ No or milox ndaosi'l bixa', orze' mina'bdi'zh Jesús lo Simón Per, nzhah Me:

—Simón, xga'n Jonás, ¿chi más ka nazhi'l da lo rē men re'?

Orze' nzhah Per:

—Señor; Go nane ka, nichēla kun Go.

Nzhah Jesús orze':

—Bikina rē men da, xa' nak nela mbēkxi'l ye'n ga'.

¹⁶ Wēlt rop mina'bdi'zh Jesús, nzhah Me:

—Simón, xga'n Jonás, ¿chi walipa' nazhi'l da?

Orze' nzhah Per:

—Señor; go nane ka, lē'da nichēl ka kun Go.

Orze' nzhah Jesús:

—Bikina rē men da, xa' nak nela mbēkxi'l ga'.

¹⁷ No wēlt mion, mina'bdi'zh Jesús lo Per, nzhah Me:

—Simón, xga'n Jonás, ¿chi walikal nichē'lal kuna?

Orze' miwin laxto' Per por nzhah Jesús kure', orze' nzhah Per:

—Lē'i' walika Señor; rēi nane Go, lē' Go nane ka lē'da nichēl ka kun Go.

Orze' nzhah Jesús:

—Bikina rē men da xa' nak nela mbēkxi'l ga'. ¹⁸ Walika kwa'n nin lol, or xil, nzhah xabal par yal plo nzhaklal; per or gakal mengol, chí'lal ya' no xtu men gak xabal, wei' xa' lu plo gat nzhaklatal.

¹⁹ Kure' midi'zh Jesús lo Per, par midi'zh Me xmod gat Per, mbaino por kuba' di'zh men, lē' Dios nazhon. Orze' nzhah Me lo Per:

—Di'kē ticha.

Kwent che'n tu men che'n Jesús, xa' más nichē'l Me

²⁰ No or miēk Per, une Per nzhakē men che'n Jesús xa' más nichē'l Me tich bixa'. Xa' re' nguzobkē ta' Jesús or lult ndao xche' Me kun rē men che'n Me, no xa' re' xa' kwa'n nzhah lo Jesús: “Señor, ¿cho chí go lo rē men?” ²¹ No or une Per xa' re', orze' nzhah Per lo Jesús:

—Lē'o, ¿xmod yazē xa' re' ga'?

²² Orze' nzhah Jesús lo Per:

—Chi nzhaklan se'gaka ban xa' re' haxta or yala xtu wēlt, ¿kwane par lu ga'? Lu di'kē ticha namás.

²³ No widi'zh re' mire'ch xid rë men che'n Jesukrist, mile' bixa' xigab, lë' men che'n Jesús re', nayot gat xa', per lë' Jesús gat nzhabt, nayot gat xa', sino ke nzhab Me: “Chi nzhaklan ban xa' re' haxta or yala xtu wëlt, ¿kwane par lu ga'?”

²⁴ No mis men che'n Jesús re', midi'zh rë kure', no mis lë' xa' mizobni'y lo yech; no nane be, walika rë kwa'n mizobni' xa'.

²⁵ No mile' Jesús nayaxra' rë kwa'n nazon kwa'n gat nzobni't lo yech re', no chi ngazobni' rëi, nagalt dub yizhyuo par kwin rë libr plo ngazobni' rë kure'.

Rë kwa'n mile' rë apost che'n Jesukrist

Nzhab Jesukrist lo rë men che'n Me, lë' Sprit che'n Dios yo laxto' bixa'

¹ Tioj, xa' nichëla, lo primer yech kwa'n mixëla lol, mizobni'n rë kwa'n mile' Jesús, no rë kwa'n milu' Me, dizde or galo laka, ² haxta zhë kwa'n ña Jesús lo yibë'. No antís di bi Me, por Sprit che'n Dios milu' Jesús lo rë apost, rë kwa'n naki'n le' bixa', rë xa' kwa'n ngule Me. ³ No dispwés di ngut Jesús, milu' Me lë' Me nguruban. No dub cho' ngubizh, nayax wëlt ngurulo Jesús lo rë men che'n Me, par ne bixa', walika, nguruban Me. No nu milu' Me xmod nile' Dios mandad lo rë men. ⁴ No or stubi nzo Jesús kun rë apost, mile' Me mandad, naro't bixa' yezh Jerusalén, nzhab Me:

—Gulëz go, zhin rë kwa'n mila' Xuza di'zh par go, no kure' yanila lo go. ⁵ Walika, lë' Juan mililëi' men kun nits, per go, zipla ngubizh lë' go gaklëi' kun Sprit che'n Dios.

Jesús ña lo yibë'

⁶ Orze', rë xa' nzhin kun Jesús, guna'bdi'zh bixa' lo Me, nzhab bixa':

—Señor, ¿chi mizhin la gaknul no, rë no men Israel, nes par yubre mis tu rë no re' le' mandad lazh no?

⁷ Orze' nzhab Jesús:

—Gat ñalt ne go zhë o tiemp kwa'n nab tsa Xuza nane, porke lë' Me nile' mandad. ⁸ Per or yo Sprit che'n Dios laxto' go, orze' gaknu Me go par yalu' go xtizha rë plo. Galo laka, zublou yezh Jerusalén, no rë yezh kwa'n ña'n lazh men Judea, mbaino dub lazh men Samaria, orze' dub yizhyuo.

⁹ No or milox midí'zh Jesús rë widi'zh re', nkili Me yibë'; no dub niwi' lo rë xa' nzhin ze', mítlo Me le'n tu xkao, no nanganetra' bixa' Jesús. ¹⁰ No dub kiwi' bixa' lo yibë' xmod ña Jesús, lë'chi nguruxo'b chop ganj nak lar bëo laka, plo nzhin bixa', ¹¹ orze' nzhab rop ganj ze':

—Men Galilea, ¿chon xe kiwi' go lo yibë'? Lë' Jesús Me nguuzo xid go ba', no Me kwa'n une go ña lo yibë' nal, nela xmod une go ña Jesús nal re', se'ska yubre Me xtu wëlt.

Nguio Matías xlugar Judas

¹² Orze' miëk bixa' par Jerusalén dizde yek lom kwa'n lë Olivos, no lom ze' ña'n gax ro' yezh Jerusalén, nela tu tant kwa'n nila' ley che'n Muisés, zë men zhë kwa'n nile' men Israel diskans. ¹³ Or mizhin bixa' yezh Jerusalén, ña bixa' kwart al ya yek yo' chop pis. Ze' nzo Per, no Jakob, no Juan, mbaino Ndres, no Lip, no Max, no Tol, mbaino Mateo, no Jakob xga'n Alfeo, kun Simón xa'

nguio xlad men cananist, no Judas wech Jakob. ¹⁴ Rë xa' re', dubta' nibin bixa' par nina'b bixa' lo Dios, kun rë una', mbaino kun rë wech Jesús, no kun Mari xna' Jesús.

¹⁵ No le'n rë ngubizh ze', nguuzo Per garol tsa'o' plo nzhin bixa', como tu gayo' nzhogal men che'n Jesús, orze' nzhab Per lo bixa':

¹⁶ —Nin lo go wech no bizan, men Israel; rë kwa'n ngok re', midí'zh la Dabi por Sprit che'n Dios, or midí'zh Dabi kwent che'n Judas, xa' mile' entreg Jesús lo rë xa' nguuzen Me. ¹⁷ No Judas, mis tu rë xpen be ngok xa', mbaino mile' xa' tutsa zhi'n kun be, ¹⁸ per nguuzen xa' dimi kwa'n ngox ka' xa' por mal kwa'n mile' xa', no kun dimi re' nguuzi' xa' tlë' yuo, orze' ngula xa' al yek xa', no ngurez laxto' xa', nguro' rë xtrip xa'. ¹⁹ No or mbin rë men yezh Jerusalén, se' ngok, kuze' ngulo'lë bixa' yo ze' Acéldama, widi'zh re' gab, yo ren, ²⁰ porke se' nzobni' lo yech kwa'n lë Salmos:

Ya'n nzë'b lizh xa';

yent cho yo le'ne,

mbaino:

Xtu xa' yo xlugar xa'.

²¹ 'No nal, naki'n kwe be lo mis tu rë xa' kwa'n nkizë kun be, rë ngubizh kwa'n nguuzinu Señor Jesús be, par yo xlugar Judas.

²² No naki'n nkizë xa' re' kun be dizde zhë kwa'n mililëi' Juan men le'n nits, haxta or ña Jesús lo yibë'; par gaknu xa' re' be, di'zh be lo rë men, lë' Jesús nguruban.

²³ Orze' ngule bixa' chop miyi', tu xa' kinu chop lë; tu lë xa' lë Che Barsabás, xtube lë Justo. No xtu miyi' lë Matías.

²⁴ Orze', se' mina'b bixa' lo Dios:

—O Señor, Lu kwa'n nzhakbe' laxto' rë nak men; bilu' cho miyi' kwa'n kwel, lo rop xa' re', ²⁵ par zen xa' zhi'n re', gak xa' apost, le' xa' rë zhi'n kwa'n mila' Judas, par ña Judas lugar plo ñal xa'.

²⁶ Orze' nguzhit bixa' dado, par ne bixa' cho ya'n xlugar Judas. No lë' Matías ngol swert, nguio xid za chi' bitub apost che'n Jesukrist.

2

Or nguio Sprit che'n Dios laxto' rë men che'n Jesukrist

¹ Or mizhin ngol lani Pask, tutsa junt nzhin rë men che'n Jesukrist le'n tu yo', ² no di repent, ngurez tu rruuid naye kwa'n nzë lo yibë', nela tu mbi naye dox ga', nguioi dub le'n yo' plo nzhin bixa'. ³ Orze' al ya yek kad bixa', nguluxo'b tuga' bël kwa'n nak nela luzh men ga'. ⁴ Orze' nguio Sprit che'n Dios laxto' rë bixa', no nguuzublo kidi'zh bixa' rë lo widi'zh, nela xmod nzhakla Sprit che'n Dios, di'zh bixa'.

⁵ No le'n rë ngubizh ze', yezh Jerusalén nzhin nayax men Israel, rë xa' kwa'n nzhon

widi'zh che'n Muisés; rë plo nguro' bixa' par nzë bixa' lani Pask yezh Jerusalén. ⁶ Or mbin men rruid ro re', migan rë nak bixa' ze'; no xe kiwi' bixa', mbaino net bixa' chon, porke kad bixa' kiyon kidi'zh rë men che'n Jesukrist widi'zh kwa'n ngolnu bixa'. ⁷ No por net bixa' kwan le' bixa' por kwa'n kiyak re', orze' kidi'zh bixa':

—Per rë men re' nzë lazh men Galilea. ⁸ Mbaino, çchon ska kiyon be kidi'zh bixa' widi'zh kwa'n ngolnu kad be?, ⁹ porke re' nzhin rë men nzë lazh men Partia, no xa' nzë lazh men Media, no xa' nzë lazh men Elam, mbaino xa' nzë lazh men Mesopotamia, no xa' nzë lazh men Judea, mbaino xa' nzë lazh men Capadocia, no xa' nzë lazh men Ponto, no rë men xa' nzë lazh men Asia; ¹⁰ no xa' nzë lazh men Frigia, no xa' nzë lazh men Panfilia, mbaino xa' nzë lazh men Egipto, no xa' nzë lazh men Libia kwa'n nzhin gax lazh men Cirene, kwa'n ña'n lo yuo che'n men Africa; no rë men yezh Roma, rë xa' kwa'n nzho re'. No nzho bixa' kwa'n gat lë't men Israel per nzhon bixa' widi'zh che'n Muisés, kun rë xa' dizde ngol, nak men Israel. ¹¹ No nzho xa' nzë lazh men Creta, mbaino xa' nzë lo yuo Arabia; mbin no kidi'zh bixa' yalnazhon che'n Dios kun widi'zh kwa'n nidi'zh kad no.

¹² No rë bixa' net bixa' kwan le' bixa' xigab, orze' kinabdi'zh tuga' bixa' lo wech bixa', nzhab bixa':

—çKwan kure' nal?

¹³ Per nzho men kixizhnu rë men che'n Jesukrist, nzhab bixa':

—Ka nizuzh rë xa' ba'.

Midi'zh Per lo rë men

¹⁴ Orze' ngwatso Per kun za chi' bitub men che'n Jesukrist, par midi'zh Per naye, nzhab Per:

—Biwi' go men Judea, no rë xa' nzho yezh Jerusalén; bin go widi'zh kwa'n ganin lo go nal re'. ¹⁵ Gat nizuzht rë xa' re', nela xmod nile' go xigab ga', porke garzi' nal, laore las nueve, ¹⁶ sino ke rë kwa'n kiyak re', lë'i midi'zh la profet Joel, or midi'zh xa' se' por Dios:

¹⁷ Rë zhë lult, se' gak, nzhab Dios, lë'da xë'l Sprit da, par yo laxto' rë lo men, no xga'n xa' kun xcha'p xa', lë'da le di'zh bixa', rë kwa'n nagat gak.

Mbaino len, rë xa' xi kwa'n nzho xid bixa', lë' bixa' ne rë kwa'n, no rë men ngol, lë' bixa' cha' laxto'.

¹⁸ No xëla Sprit da yo laxto' rë men da;

miyi'y no una'i, no di'zh bixa' por na.

¹⁹ Al ya lo yibë' ne go, gak rë kwa'n ya'n xe men tuli,

no lo yizhyuo ne go rë se'n, no ren, no bël, mbaino zhen.

²⁰ No gak nakao lo ngubizh; no lo mbëo' lë'i lu' nela ren ga'.

Naki'n rë kure' gak antis di ke zhin zhë che'n Señor,

or lu' Me biani che'n Me kwa'n maska ña'zbël,

no gab Me xmod gak kun kad men, zhë kwa'n ne men, lalta' rë kwa'n nagat ne men.

²¹ No rë xa' nibezh lë Dios or nina'b bixa' lo Dios,

lë' Dios kubchi rë kwa'n nzë'b xki bixa'.

²² No nu nzhab Per:

—Rë go, men Israel; bin go widi'zh kwa'n nin re'. Lë' Dios milu' la lo go, cho nak Jesús kwa'n nzë Nazaret, por rë zhi'n nazhon kwa'n mile' Jesús, zhi'n kwa'n mile' mia'n go xe; no por rë se'n nazhon kwa'n mile' Jesús lo go. Lë' Dios miza' poder ka' Jesús, mbaino mis go une la rë kure'. ²³ Per lë' miyi' re', por rë xigab che'n Dios, no por rë kwa'n nzhakla Dios gak, nguzen go miyi', no mikë' go xa' lo krus, mbit rë men mal xa'. ²⁴ Per mile' Dios nguruban xa', ngulo' Dios xa' ya' la mwert, porke nangakt ngakwë'z la mwert xa' re' par dubta', ²⁵ porke Dabi midi'zh la kwent che'n Jesús, or nzhab Dabi: Zilita' unen nzol dilant lon, Señor, porke Lu nzo lad direch da, par niyet kwan zheb da.

²⁶ Kuze', nizak laxto'n, mbaino ro'n nikë' kant dub nizak laxto'n,

porke lu le', ruban da or gat da.

²⁷ No nala'tal ya'n da le'n ba',

no ni nala'l yëb kwerp da, por nak da tu xpenal kwa'n más nzhon ro'l.

²⁸ Milu'l xmod ban da par dubta', no nile'l, nizak laxto'n, or nzol kuda.

²⁹ No nzhab Per:

—Lë' go wech, walika kwa'n nin; nzhala ngut rey Dabi, mbaino miga'ch xa', no ba' che'n xa' nane be plo nax, haxta zhë nalzhë.

³⁰ Dabi ngok profet, midi'zh xa' por Dios, mbaino nane Dabi, lë' Dios mila' di'zh lo xa', lë' Dios le' rey lo mis tu rë xa' nzë ben che'n xa' kwa'n ngurulé Krist, par zob xlugar xa'.

³¹ Milu' Dios rë kure' lo rey Dabi, kuze' nzhab xa', lë' Krist ruban, no ni nala' Dios ya'n alm che'n Krist le'n ba', no ni nala' Dios, yëb kwerp che'n Krist.

³² Kuze' mile' Dios, nguruban Jesukrist; no nak no men che'n Me kwa'n une ngut Me, no une no nguruban Me.

³³ Ngurezlh Dios Jesukrist, ña Me lo yibë'. No ba' nzob Jesukrist lad direch che'n Dios, plo nile' Me mandad. No miza' Dios Sprit che'n Dios nka' Jesukrist par rë men che'n Me, porke se' mila' Dios di'zh par Jesukrist. No nal, Jesukrist mixë'l Sprit che'n Dios par nguio laxto' no, lë'i rë kwa'n une go, no rë kwa'n mbin go nal re'.

³⁴ No Dabi, nangakilit lo yibë', per lë' Dabi nzhab por Dios:

Nzhab Dios lo Señor da:

“Guzob lad direch da,

³⁵ haxta zhin zhè len, che'ptsá (bi'ch laka)
gák rē men dilant lol,
rē xa' kwa'n nidilal kun lē'.”

³⁶ Orze' nzhab Per:

—Bin goi, men Israel, lē' go rē xa' kwa'n miké' Jesukrist lo krus. Lē' Dios mizo Jesukrist lo be, par gák Me Señor che'n be, mbaino Krist; Me kwa'n mixé'l Dios.

³⁷ Or mbin bixa' kure', orze' dox mizi bixa' nzé'b xki bixa' lo Dios, orze' nzhab bixa' lo Per, no lo zipla apost:

—¡Lé'o wech!, ¿kwan naki'n le' no nal?

³⁸ Orze' nzhab Per:

—Bila' go rē kwa'n nakap nile' go lo Dios, no nu gokléi' go le'n nits nela xmod mile' ka Jesukrist mandad, no che' Dios rē kwa'n nzé'b xki go, no ne' Dios Sprit che'n Dios yo laxto' go, ³⁹ porke par go mila' Dios di'zh kure', no par rē xmé'd go, mbaino par xtu ben rē men zit, haxta par rē xa' kwezh Dios par gák men che'n Dios.

⁴⁰ No se' midí'zh Per, no kun más rē widí'zh, par miza' Per kusej, nzhab Per:

—Guro' go xid rē men nakap kwa'n nzho nalre', par nagal go yalzi kwa'n zak bixa'.

⁴¹ No rē xa' ngwayila widí'zh che'n Dios kwa'n midí'zh Per, ngokléi' bixa'. Zhè ze', migan pas chon mil men, par nguio bixa' xid más rē men che'n Jesukrist. ⁴² No dubta', nikizé rē xa' re', nela xmod mítse'd rē apost bixa', no nguzhin bixa' wen, no nu nzhao bixa' lizh kad wech bixa', mbaino junt nina'b bixa' lo Dios.

Xmod miban rē xa' galo laka kwa'n ngok men che'n Jesukrist

⁴³ No por rē señ nazhon kwa'n nile' Dios por rē apost, rē men nizheb lo Dios, no wen nidí'zh bixa' por Dios. ⁴⁴ No rē xa' kwa'n ngwayila widí'zh che'n Dios por Jesukrist, tutsa nzhin bixa', no tutsa kinu bixa' rē kwa'n. ⁴⁵ No mito bixa' rē kwa'n nak che'n bixa', par ndí'z bixa' dimi, ka' rē xa' kwa'n naki'ne, rē xa' kwa'n nzho xid bixa'. ⁴⁶ No zilita' nigan bixa' le'n yado', no tutsa xigab nile' bixa'. No nigan bixa' lizh kad wech bixa' par nzhao bixa' junt, mbaino nizak laxto' bixa', nile' bixa'. ⁴⁷ No nidí'zh bixa' dox nazhon Dios, no wen nidí'zh rē men tich bixa', por Jesukrist. No kad zhè nile' Señor ñar men yado', rē xa' kwa'n kibezh Dios par ché' Dios xmod naban bixa', mbaino za' Dios kwa'n nazhon ka' bixa'.

3

Miak tu miyi' ko'j

¹ Ngol tu zhè, nzha Per kun Juan yado', paste las tres guzhe, or kwa'n nina'b men lo Dios. ² No ro' pwert yado' kwa'n lē Chul, ze' nizob tu miyi' kwa'n nagakt zē dizde ngol

xa'. Zilita' ñanu men xa' ro' yado' ze', par nina'b xa' gon lo rē xa' ña yado'. ³ Or une xa' ko'j re', lē' Per no Juan nzhayo le'n yado', orze' guna'b xa' gon lo rē xa' re'. ⁴ Orze' miwi' Per kun Juan lo xa' re', nzhab Per lo xa':

—Biwi' lo no.

⁵ Orze' list kimbèz xa' re', mile' xa' xigab zen xa' tu kwa'n ya' rē xa' re', ⁶ orze' nzhab Per lo xa':

—Gat kinuta' plat ni or, par kwa'n kinun, lē'i nen ka'l: Por yalnazon che'n Jesukrist Me nzé yezh Nazaret, ¡ngwatsuli no gadzé!

⁷ Orze' nguzen Per ya' xa' re' lad direch par nguzo xa', no lwega' mili ni' xa', nka'i jwers, ⁸ orze' nguzuli xa' ko'j re' no ngwats xa' tuli, no nguzublo nguzé xa', orze' nguio xa' kun Per no kun Juan le'n yado'; maska ñats xa', no kidi'zh xa':

—¡Dox nazhon Dios!

⁹ No rē xa' nzhin ze', une bixa' nguzé xa' ko'j re', mbaino kidi'zh xa' dox nazhon Dios. ¹⁰ Orze' xe mia'n rē men tuli, net bixa' kwan le' bixa' por kwa'n une bixa', porke nane men, lē' xa' re' nikan gon, no nizob xa' ro' pwert yado' kwa'n nzhab men lē Chul.

Milu' Per widí'zh che'n Dios por Jesukrist le'n yado'

¹¹ Per net xa' miak re' liya' xa' Per no Juan, no rē men nzhin ze', xe niwi' bixa', no karre nguzubi bixa' ro' pwert che'n Salomón, plo nzhin rē xa' re'. ¹² Or une Per kure', orze' nzhab xa' lo rē men ze':

—Men Israel, ¿chon xe mia'n go tuli por kwa'n ngok re', no niwi' go lo no, nela chí-gab yub no miliwen miyi' re', no nguzé xa' por mis poder che'n no, o por dox nzhon no ro' Dios, kuze' miak xa' re'? ¹³ Kure' ngok por Dios che'n Abraham, che'n Isaac, che'n Jakob, mbaino Dios che'n más rē xtit be. Lē' Dios re' milu' dox nazhon Jesús, Me mile' rē kwa'n ngokla Dios, mbaino Me kwa'n michi go lo Pilat. No or ngokla Pilat ngaliya' Jesús, nangazyélt go. ¹⁴ Maska go ngazyélt ngaliya' Pilat Jesús, Me nazhon no Me nile' rē kwa'n nzhab Dios, lē'la guna'b go, liya' Pilat men nzhut men, ¹⁵ mbaino mbit go Jesús, Me kwa'n niza' yalnaban par dubta' ka' men, por mile' Dios nguruban Jesús, mbaino une no, lē' Me nguruban. ¹⁶ ¿Chi niwi' go lo xa' re', no chí nilibe' go xa'? Lē' yalnazon che'n Jesukrist miliwen xa' re', por ngwayila xa' Jesukrist. Kuze' miak ni' xa', kwa'n milox une go nal re'.

¹⁷ No nzhab Per:

—Nal wech, lē'da nane la; ni go mbaino ni rē xa' nile' mandad lo go, nanet go kwan mile' go or mbit go Jesús. ¹⁸ Per se' ngoke, porke se' nzobni' lo Yech che'n Dios kwa'n miké' rē profet, rē xa' kwa'n midí'zh por Dios chí tiemp, ke lē' Krist naki'n zakzi, Me

kwa'n mixè'l Dios, nes par ngok rë kwa'n mile' Dios xigab. ¹⁹ Kuze' nal, bila' go rë kwa'n nakap kile' go lo Dios, par kubchi Dios rë kwa'n nzè'b xki go lo Dios, no par tsumbe Dios laxto' go, no rë xigab che'n go, ²⁰ par xè'l Dios rë tiemp kwa'n le' go diskans. Xè'l Dios Jesukrist, Me kwa'n mbin la go dizde or galo. ²¹ Per nal, lè' Jesukrist nzho lo yibè', haxta zhin zhè, le' Dios gak kub rë kwa'n nzho nal, nela xmod midì'zh ka Dios por rë profet, rë xa' tiemp dox, rë xa' kwa'n nkizè nambe lo Dios, ²² porke nzhala ze', walika nzhab Muisés: "Lè' Señor Dios che'n go, le' gak tu xa' profet xid go, nela da ga'. Naki'n gon go ro' xa' re' dike kwa'n ne xa', ²³ porke rë xa' naziyèl gon kwa'n gab profet re', lè' Dios kubchi xa' lo rë men che'n Dios, par lox xa'."

²⁴ No nzhab Per:

—Dizde profet Samuel par dilant, rë profet xa' midì'zh por Dios, midì'zh la bixa' kwa'n nzhak nal re'. ²⁵ Lè' go nzè ben che'n rë profet, rë xa' kwa'n midì'zh por Dios, no par go rë kwa'n mila' Dios di'zh par rë xuz be xa' nzhala, kun Abraham, or nzhab Dios lo xa': "Por tu xme'dal, rë ben men yizhyuo ya wen." ²⁶ No or mile' Dios nguruban Jesukrist, galo laka lo go mixè'l Dios Jesukrist, par le' Dios ya go wen, nes par la' go, nale'tra' go kwa'n gat lè'.

4

Milu' Per kun Juan widì'zh che'n Dios lo rë gustis xa' más nile' mandad

¹ No stubi kidì'zh Per kun Juan lo rë men nzhin ze', lè'chi mizhin pla ngulèi', no kun rë xa' nikina yado', no kun zipla xa' lè saduceo. ² Niyi' bixa' por kilu' Per kun Juan lo rë men, lè' rë men ngut ruban, porke Jesukrist nguruban. ³ Kuze' nguzen bixa' Per kun Juan, par ngulo bixa' rë xa' re' lizhyi'b haxta xtu riyè'l, porke orze' nzhazhèlalyuo. ⁴ Per dox nayax men kwa'n mbin widì'zh che'n Dios por Jesukrist kwa'n midì'zh Per, no ngwayila bixa'i. Nabtsa men miyi' miza como gai' mil bixa' zhè ze'.

⁵ Xtu riyè'l, yezh Jerusalén nguzhin rë xa' nile' mandad, kun rë xa' kwa'n nak zhi'n, mbaino rë xa' nilu' ley; ⁶ no Anás xa' nile' mandad lo rë ngulèi', kun Caifás, no Juan, no Jand, no rë nak melizh ngulèi' ro'; nguzhin bixa' ze'. ⁷ Orze' mile' bixa' mandad ñè'd Per kun Juan, no miyi' kwa'n miak re', par nguzo yon xa' re', garol tsao' plo nzhin bixa'. Orze' nzhab bixa' lo Per no lo Juan:

—¿Cho che'n mandad kile' go rë kure'?, o, ¿cho mixè'l go par kile' goi'?

⁸ Orze' midì'zh Per lo bixa' por Sprit che'n Dios, nzhab Per:

—Nin lo rë go, xa' nile' mandad no, no lo rë go xa' nak zhi'n: ⁹ Lè' go kinabdi'zh xmod

uniwen xa' ngokne re' par ne go, xmod ngokwen xa'. ¹⁰ Lè' no nei lo go, no lo rë men Israel. Mikè' go Jesukrist Me nzè yezh Nazaret lo krus, per mile' Dios nguruban Me. Por lè Jesukrist, miak xa' re', xa' nzo lo go re', yent kwa'n nizak xa' nal. ¹¹ Gat ñilat go Jesukrist. Lè' Me nak nela tu ke ga', kwa'n nibe men kwa'n nichao' yo'. Lè' go ngulubi ke re', per lè' Dios mile' nak Jesukrist nela primer ke che'n simient ga'. ¹² Yent cho xtu xa' gak liwen be; xid rë xa' kwa'n mixè'l Dios, nab tsa xa' re', xa' ngule Dios par gak ko' be lo rë kwa'n nzè'b xki be.

¹³ Or mbin bixa' kwan midì'zh Per, xe mia'n bixa', porke nangazhebt Per kun Juan, midì'zh bixa' rë widì'zh re'. Orze' kidì'zh rë xa' nile' mandad ze' lo rë wech bixa': "Per nane be, nangat rë xa' re' skwel, no men se'ga bixa'." Orze' mitsila bixa' lè' rë xa' re' nki'zè kun Jesukrist, ¹⁴ kuze' nangadi'zhtra' bixa', porke une bixa', lè' miyi' re' miak. ¹⁵ Orze' mile' rë ngulèi' mandad, nguro' Per tu lad kun Juan, no kun miyi' xa' miak re', par midì'zh nab bixa'. ¹⁶ Orze' kidì'zh entre lè' bixa', nzhab bixa':

—¿Kwan lè' be nal kun rë mbe re'?, porke rë men Jerusalén mbin la yalnazon kwa'n mile' Dios kun miyi' re'. No nagakt gab be: "Gat walite", porke lè' rë men mbin lai. ¹⁷ Per par nare'chra' xti'zh Jesús xtu plo, mejor lè' be che'b yon bixa', par nadi'zhra' bixa'i ni xtu plo.

¹⁸ Orze' ngurezhe bixa' Per kun Juan, nzhab bixa':

—Nadi'zhtra' go xti'zh Jesús, no ni naze't go lè Jesús ni xtu plo.

¹⁹ Per nzhab Per kun Juan lo rë ngulèi' ze':

—Bine go lo no, ¿cho ro' más ñal gon no? ¿Chi ro' goi, o ro' Diose?, ²⁰ porke no naka'cht no kwa'n une no, mbaino kwa'n mbin no.

²¹ No une rë ngulèi' ze', yentra' kwan ngak ngale' bixa' kun Per no kun Juan. Orze' midì'zh bixa' nayi' par ngazheb yon xa' re'. Orze' miliya' bixa' Per no Juan, mbaino xa' miak re', porke rë men yezh Jerusalén nidi'zh dox nazhon Dios, por kwa'n mile' Dios kun miyi' re'. ²² No miyi' kwa'n miliwen Dios re', nzhap la xa' más di cho' li'n.

Mina'b men che'n Jesukrist gaknu Dios bixa'

²³ No or miliya' rë xa' nak zhi'n Per no Juan, mbaino xa' miak re', orze' ña bixa' plo nibin más rë men che'n Jesukrist. Ze' midì'zh bixa' rë kwa'n midì'zh rë ngulèi' ro, no rë kwa'n midì'zh más rë xa' nak zhi'n, lo bixa'. ²⁴ Or mbin rë men che'n Jesukrist rë widì'zh re', orze' junt guna'b bixa' tutsa kwa'n lo Dios, nzhab bixa':

—O Dios Señor che'n no, Lu kwa'n mizuxkwa' yibè', no yizhyuo, mbaino nitsdo', no rë kwa'n nzhin loi. ²⁵ Lu mile'

midì'zh Dabi xti'zhal por Sprit che'nal, kuze' mikè' xa' widì'zh re':

¿Chon tatu nazhe'b nile' rē men gat lē't men Israel,

niyi' bixa' nine bixa' Dios?

¿Chon nile' rē men Israel xigab kwa'n niyent yek,

dil bixa' kun Dios?

²⁶ Migan rē rey yizhyuo, kun rē xa' nak zhi'n rē yezh,

tutsa nguzhin bixa' par dil bixa' kun Lu Señor,

no kun Krist, Me kwa'n mixē'l Señor.

²⁷ 'Lē' widì'zh re' ngok, porke yezh re', lē' Herodes no kun Pons Pilat, no kun rē men Israel, mbaino kun rē xa' gat lē't men Israel, migan bixa' re' par dil bixa' kun Lu Dios, no kun Xga'n nazhonal kwa'n mixē'lal,

²⁸ nes par mile' bixa' rē kwa'n mile'lal xigab gak, porke se' ngoklal. ²⁹ Nal biwì', O Señor, rē kwa'n gat lē' kwa'n midì'zh bixa', zakzi bixa' no. Per lē' no le' zhi'n che'nal. Kuze', kina'b no lol, gakkul no, par xek no, no nazhebt no di'zh no xti'zhal lo rē men. ³⁰ No bilu' yalnazon che'nal, par gak wen men nzhakne, como tu señ lē'l nzo kun no; no bile' rē kwa'n ña'n men xe, por lē' Xga'nal Jesús, Me nambe laxto' no nazhon.

³¹ Or milox mina'b bixa' lo Dios, miwin tu xo dub le'n yo' plo nzhin bixa'. Orze' más nguio Sprit che'n Dios laxto' bixa', no dubta' nangazhebt bixa' midì'zh bixa' widì'zh che'n Dios por Jesukrist rē plo.

Junt kinu bixa' rē kwa'n

³² Rē bixa' kwa'n ñila widì'zh che'n Dios por Jesukrist, tutsa nizi bixa', no tutsa nile' bixa' xigab. Yent cho gab: "Che'n naba kure'", sino ke che'n rē bixa' tu kwa'n.

³³ Ngoknu Dios rē apost par midì'zh bixa' walika nguruban Jesukrist, no dox ngoknu Dios rē bixa'. ³⁴ No yent cho tu xa' kwa'n ngok jwalt tu kwa'n lo, porke rē xa' kwa'n kinu yuo o yo', mito bixa'i, ³⁵ orze' dimi ze' nzhuweì' bixa'i lo rē apost, orze' rē xa' re' niyi'ze lo kad xa' naki'ne. ³⁶ No nguio tu miyi' xa' lē' Che, tu xa' nzē lazhen men Chipre, kwa'n nzhin tsao' nitsdo'. Nak xa' tu men Levita, no rē apost ngulo'lē' xa' Bernabé; widì'zh re' gab: Men nitsiyal laxto' men. ³⁷ No lē' Bernabé mito tlē' yuo che'n xa', orze' ngwala' xa' dimi kwa'n midoi lo rē apost.

5

Ananías no Safira

¹ Per nguio tu miyi' xa' lē' Ananías, no tsa' xa' lē' Safira, no mito bixa' tlē' yuo che'n bixa'. ² Per mia'nnu bixa' xche'p dimi che'n yuo, no nane lo una' che'n xa' kure', lē' más dimi ngwala' xa' lo rē apost. ³ Orze' nzhab Per lo xa':

—Ananías, ¿chon mila'l ngulo Mizhab xigab gat lē't yekal? ¿Chon nzhaklal ngakidel Sprit che'n Dios?, mia'nal kun xche'p dimi kwa'n mitol yuo, ⁴ porke antis dike ngatol yuo, ¿chi gat lē't che'nle? No or nguzenal dimi, ¿chi gat lē't lu nile' mandate? Orze', ¿chon mila'l mbi'd xigab re' yekal, kikè'l mbèl?, porke gat lē't men kikidel, sino Diöse.

⁵ Or mbin Ananías widì'zh re', kwa'n nzhab Per, orze' ngwachin xa' no ngut xa' tuli. No rē men kwa'n mbin kure', rē bixa' mizheb. ⁶ Lwega' nguzubi pla miyi' xi, no michèl bixa' lar xa' ngut re', orze' ngwaka'ch bixa' xa' re'.

⁷ Nzha como chon or di ngok kure', lē'chi mizhin tsa' xa', xa' lē' Safira, net xa' kwan ngok. ⁸ Orze' nzhab Per lo una':

—Bine lon, ¿chi sa'ka mito go yuo che'n go, nela xmod ne xmiyi'l?

Orze' nzhab una':

—Sa' kai.

⁹ Orze' nzhab Per:

—¿Chon tutsa mia'n go par kide go Sprit che'n Dios? Biwì', lē' rē xa' kwa'n ngwaka'ch xmiyi'l ñē'd la ro' pwert ba'. No nal, nuskal yaka'ch bixa'.

¹⁰ No mis orze' ngwachin Safira xan ni' Per, ngut una'. No or mizhin rē xa' xi re', une bixa' lē' una' re' ngut la, orze' ngwaka'ch bixa' una' lo mis plo miga'ch xmiyi' xa'.

¹¹ Orze' rē men che'n Jesukrist dox mizheb bixa', no kun rē men yezh, or mbin bixa' kure'.

Mile' Dios nayax rē kwa'n nazhon, kwa'n mile' mia'n men xe

¹² Por rē apost, mile' Dios nayax señ nazhon kun rē kwa'n mile' mia'n men xe. No migan rē men che'n Jesukrist le'n corredor che'n Salomón. ¹³ Nzho nayax men yezh Jerusalén kwa'n nangayet laxto' ngabin kun rē men che'n Jesukrist, ter dox wen nidi'zh rē men yezh tich rē xa' re'. ¹⁴ No le'n rē ngubizh ze', mile' Dios niza nayax xa' ñila widì'zh che'n Dios por Jesukrist, miyi'y no una'i. ¹⁵ No haxta ngulo' men, rē xa' nzhakne lo lo'n par le'n nez, par gal namás xkal che'n Per lo bixa', or ded Per, par yak bixa'. ¹⁶ No nayax men kwa'n nzē rē yezh kwa'n nzhin naka'n yezh Jerusalén, mizhinnu bixa' men nzhakne, no rē xa' nzho mbi mal laxto'. No rē bixa' miak.

Per no Juan xtu wèlt ndil men bixa'

¹⁷ Orze' ngulè'i ro kun rē xa' nichè'l xa', rē xa' kwa'n lē' saduceo, dox niyi'xian bixa' por ¿chon ñakè dox men tich rē apost? ¹⁸ Kuze' nguzen bixa' rē apost, par mikè' bixa' rē xa' re' lizhyi'b. ¹⁹ Per or yè'l ze', ngwa tu ganj che'n Dios mixa'l ro' lizhyi'b, par nguro' rē apost, orze' nzhab ganj lo bixa':

²⁰—Wa go lo rē men yado', par wadi'zh go lo bixa', lē' Dios nichè' mod niban men.

²¹ Or mbin bixa' kure', garzi'l laka ngwa bixa' yado' par ngwadi'zh bixa' widi'zh che'n Dios por Jesukrist lo rē men nzhin ze'.

No ngulēi' ro', no kun rē xa' kwa'n nichē'l xa', ngurezh bixa' rē xa' nak gustis kwa'n más tsak par mizhin bixa' tu junt. Orze' mile' bixa' mandad lo rē xa' nikina lizhyi'b, par yaka' bixa' rē apost, rē xa' nzhō lizhyi'b re'. ²² Per or mizhin bixa' ro' lizhyi'b, une bixa' yentra' cho nak; orze' nguiubre' bixa', mile' bixa' abis, nzhab bixa':

²³ —Or mizhin no ro' lizhyi'b, no ro' pwert che'ne naye ka nayao', no rē sondad kwa'n nikina, lē' bixa' nzhin ka; or mixa'l no ro' pwert, yentra' cho nak.

²⁴ Or mbin ngulēi' roi, kun rē xa' nile' mandad lo rē xa' nikina yado', mbaino kun más rē ngulēi' xa' nile' mandad lo xtu ben rē ngulēi'; orze' net bixa' haxta plo zhin rē kure', ²⁵ orze' mizhin tu miyi', nzhab:

—Lē' rē xa' kwa'n ngulo go lizhyi'b ze', lē' bixa' nzo la le'n yado', kilu' bixa' xti'zh Jesús lo rē men.

²⁶ Orze' xa' kwa'n nile' mandad, ngwa xa' yado' kun rē sondad che'n xa', par ngwaka' bixa' rē apost. Per nangayint bixa' rē xa' re', porke nizheb bixa', napa' ko men ke bixa'. ²⁷ No or fiē'dnu bixa' rē apost, mizo bixa' rē xa' re' lo rē gustis xa' más nile' mandad, orze' nzhab ngulēi' ro':

²⁸ —ÇChi nangont go kwa'n ne no, nadi'zhtra' go xti'zh Jesús lo rē men? Mbaino nal, jlo rē men yezh Jerusalén kilu' go xti'zh Jesús! No nikē' go kixu' no, nidi'zh go, jno mbit Jesús!

²⁹ Orze' nzhab Per, kun más rē apost, lo bixa':

—Naki'n gon be ro' Dios, más ke ro' men. ³⁰ Dios, Me ngwayila rē xtit be, me tiemp, mile' nguruban Jesukrist, mis Me kwa'n mbit go, mile' go nkē Me lo krus. ³¹ No mizo Dios Jesukrist lad direch che'n Dios, par le' Jesukrist mandad lo rē be, no par ngulo' Jesukrist be lo rē kwa'n nzē'b xki be, no par yēk rē men Israel lo Dios, nes par che' Dios rē kwa'n nzē'b xki be. ³² Une no rē nzhin mile' Dios, kuze' nidi'zh noi lo rē men. No Sprit che'n Dios nile' kwa'n nazhon kun rē señ por no. No men xa' nzhon ro' Dios, niza' Dios Sprit che'n Dios, yo laxto' bixa'.

³³ Or mbin rē ngulēi', kun rē xa' nak zhi'n, widi'zh re', dox miyi'xian bixa', no haxta ngokla bixa' gut bixa' rē apost re'. ³⁴ Per orze' ngwatsuli tu miyi' xa' lē Gamaliel, tu xa' fariseo kwa'n nilu' ley kwa'n mila' Dios lo Muisés, no rē men nidi'zh: "Dox nzhak xa' re'." Orze' nzhab Gamaliel: "Ro' rē apost tu rrat al tich." ³⁵ Orze' nzhab Gamaliel lo rē ngulēi', no lo más men xa' nzhin ze':

—Rē go, men Israel; bile' go xigab xmod le' go kun rē miyi' re', ³⁶ porke bitsila go, nzhala, nguio tu miyi' xa' lē Teudas; nzhab

xa' nak xa' tu men xa' nile' mandad, ngop xa' como tap gayo' men, xa' nguzukē tich xa', per or ngut xa', rē xpen xa' mire'ch, milox bixa'. ³⁷ No le'n rē ngubizh che'n sens, se'ska nguio xtu xa' lē Judas kwa'n nzē Galilea. Nuska xa' ngop nayax xa' nguzukē tich xa', per or ngut xa', rē ska xpen xa' mire'ch, orze' milox bixa'. ³⁸ Kuze' nin lo go; bila' go nzhin rē miyi' re', yent kwan le' go lo bixa', porke chi yek bixa' nguro' rē kuba', lē'i yitlo. ³⁹ Per chi zhi'n nazhon che'n Dios kile' bixa', nagakt kwē'z goi, neu namás, nzha ska kun Dios kidil go.

⁴⁰ No rē bixa' mbin ro' Gamaliel. Orze' ngurezh bixa' rē apost, no mile' bixa' mandad ngurēle tich rē apost, mbaino mile' bixa' mandad, ke ya nadi'zhtra' bixa' widi'zh che'n Jesús. Orze' miliya' bixa' rē apost. ⁴¹ Or nguro' rē apost xid rē xa' nak zhi'n ze', no por ngurēle tich bixa' por Jesukrist, dox nizak laxto' bixa'. ⁴² No zilita', le'n yado', no rē lizh men, fiadi'zh bixa' widi'zh nazhon che'n Dios por Jesukrist rē plo.

6

Ngule bixa' pla miyi' par gaknu rē men yado'

¹ Le'n rē ngubizh ze', miza nayax men che'n Jesukrist. Per nguzublo kichēlro' rē men che'n Jesukrist, xa' nidi'zh widi'zh grieg, lo xtu ben xa' kwa'n nidi'zh widi'zh hebreo, nzhab rē xa' grieg re':

—ÇChon lē' rē una' hebreo xa' ngut xmiyi', más nayax kwa'n nzhao biuna' niga'z, no lē' rē una' grieg, xa' ngut ska xmiyi', más che'pe nzhab bixa'?

² Orze' dub tu dusen apost, mikan bixa' rē men che'n Jesukrist, orze' nzhab bixa':

—Gat lē't la' no, yadi'zh no widi'zh che'n Dios por Jesukrist, par ki'z no kwa'n gao rē men. ³ Kuze', naki'n kwe go gazh miyi' xid go, rē xa' nidi'zh men wen tich, no rē xa' kwa'n nilu' ka nzhō Sprit che'n Dios laxto', mbaino rē xa' nzhak par le' bixa' zhi'n re'. ⁴ Mbaino lē' no zilita' na'b no lo Dios, no yalu' no widi'zh che'n Dios por Jesukrist lo rē men.

⁵ No nguio laxto' rē men che'n Jesukrist kure', orze' ngule bixa' tu miyi' xa' lē Teb. Miyi' re', dox ñila xa' widi'zh che'n Jesukrist, mbaino dox nzhō Sprit che'n Dios laxto' xa'. No ngule bixa' xtu xa' lē Lip, kun Prócoro, mbaino Nor, no Timón, no xtu xa' lē Par-menás, no Kulás. Xa' re' nzē yezh Antioquia, gat lē't men Israel xa', per nzhon xa' ley kwa'n mila' Dios lo Muisés antis di gak xa' tu men che'n Jesukrist. ⁶ Orze' ngwanu men che'n Jesukrist rē miyi' re' lo rē apost, par guna'b bixa' lo Dios par gaknu Dios rē miyi' re', orze' mixo'b rē apost ya' bixa' yek kad rē xa' re', par gaknu Dios bixa'.

⁷ Mbaino más men kiyon widi'zh che'n Dios por Jesukrist, no más nayax men che'n Jesukrist miza yezh Jerusalén, no nayax ngulëi' ngok men che'n Jesukrist.

Michi bixa' Teb lo rë gustis, xa' más nile' mandad

⁸ No dox nilu' nzo Dios kun Teb; por Teb, nile' Dios dox kwa'n nazhon xid rë men, rë kwa'n nile' ña'n men xe, mbaino por rë kwa'n nile' xa', nilu' lë' Dios nzo kun lë' xa'.⁹ Per michë'ro' pla rë men kun Teb, no rë men re' nak xa' nzë plo lë' Kapi che'n rë men libr la. Xid rë men re' nzho xa' nzë yezh Cirene, no nzho xa' nzë yezh Alejandria, mbaino nzho xa' nzë laz men Cilicia kun zipla bixa' kwa'n nzë laz men Asia.¹⁰ No ni tu kwa'n nagakt kab bixa' lo Teb, porke dox nzhak Teb nidi'zh por Sprit che'n Dios.¹¹ Orze' ndix rë men re', ka' pla miyi' par mikë' bixa' kixu' Teb, nzhab bixa' mid'i'zh Teb tu kwa'n gat lë' por ley kwa'n mila' Dios lo Muisés, no por Dios.¹² Se' mile' bixa' par miyi'xian rë men yezh ze'. Orze' mizhin pla xa' nak zhi'n kun zipla xa' nilu' ley che'n Muisés, par nguzen bixa' Teb. Orze' ngwala' bixa' Teb plo nzhin rë gustis xa' más nile' mandad.¹³ No lo rë gustis re' mizo bixa' pla miyi' kwa'n mikë' kixu' Teb, nzhab rë miyi' re':

—Xa' re', zilita' dox nakap nidi'zh xa' tich yado' nazhon che'n Dios, mbaino nidi'zh xa' gat lë' tich ley kwa'n mila' Dios lo Muisés.¹⁴ No mbin no mid'i'zh miyi' re': “Lë' Jesús xa' nzë Nazaret, chil yado' re', mbaino kubchi xa' rë kostumbr kwa'n mila' Muisés lo be.”

¹⁵ Orze', rë xa' kwa'n nile' mandad ze', xe mia'n bixa', niwi' bixa' lo Teb, no nilu' lo Teb nela lo tu ganj che'n Dios ga'.

7

Widi'zh kwa'n mid'i'zh Teb lo rë xa' nile' mandad

¹ Orze' minabdi'zh ngulëi' kwa'n más nile' mandad, nzhab xa' lo Teb:

—¿Chi walika, sa' mid'i'zhal?

² Orze' mikab Teb, nzhab Teb:

—Rë go dad, mbaino wech, bin go rë kwa'n ganin lo go; lë' Dios Nazhon, ngurulo Me lo xuz be Abraham, or nzho xa' laz men Mesopotamia, or antis di yo xa' laz men Harán.³ Per nzhab Dios lo Abraham: “Guro' lazhal no bila' rë melizhal, par yal plo ganin.”⁴ Orze' nguro' Abraham laz men Caldea, par yo xa' laz men Harán. No ze' plo ngut xuz xa'. Orze' ñadnu Dios Abraham lo yuo plo nzho be nal re'.⁵ Per nangaza't Dios ni tlë' yo ngal Abraham, ni plo zo tu ni' xa'. Per nzhab Dios, yuo ze' ka' rë men kwa'n gak ben che'n Abraham. No stubi, yent xin Abraham orze'.⁶ Per nzhab

Dios lo Abraham: “Lë' rë xa' gak ben che'nal gak men zit, laz xtu ben men plo gak bixa' mos nado lo xtu men, lë' bine' le' zhi'n ter nane bine' lo rë men ze', no zakzi rë men ze' bixa', como tap gayo' li'n.”⁷ No nu nzhab Dios lo Abraham: “Per lë'da zakzi rë men xa' zakzi rë men kwa'n yi'd ben che'nal, no kon bixa' ya' rë xa' ze', par zuxib bixa' lon lo yuo re'.”

⁸ No nzhab Teb:

—Mila' Dios di'zh lo Abraham. Mile' Dios mandad nkë señ kwerp che'n xa', no por señ re' nilu', walika mila' Dios di'zh par Abraham. No or ngol tu xga'n Abraham kwa'n ngurulé Isaac, no or nzhab Isaac xon ngubizh, mikë' Abraham señ re' kwerp che'n Isaac. Se'ska mile' Isaac kun xga'n Isaac kwa'n lë Jakob, no se'ga' mile' Jakob kun rë xga'n xa', rë xa' kwa'n ngok xuz dub tu dusen ben men Israel.

⁹ Per xid xga'n Jakob kwa'n ngok rë xuz be, nguo tu xa' lë Che, no lë' rë wech xa' ngok mbidios, mito bixa' Che lo tu xa' mbiy' Che laz men Egipto; per Dios nzo kun Che.¹⁰ Or nguzak Che rë kwa'n nalats dox laz men Egipto, mile' Dios ngok Che tu men dox nzhak, mbaino tu men kwa'n dox wen niwi' Faraón lo, kuze' mizo Faraón Che par le' xa' mandad dub laz men Egipto, no haxta nu mile' Che mandad rë nak kwa'n kinu Faraón.

¹¹ No or mizhin tu yalwin dox rë yezh che'n rë men Egipto, no rë yezh che'n rë men Canaán, orze' rë xuz be, xa' nzhal, dox nguzakzi bixa', yent kwa'n gao bixa'.¹² Per or mbin Jakob, nzho kwa'n gao men laz men Egipto, orze' mixë'i' Jakob pla xga'n xa' ze', primer wëlt.¹³ No or mirop wëlt ngwa bixa', orze' nzhab Che lo bixa', lë' Che nak wech bixa', orze' milibe' Faraón melizh Che.¹⁴ Orze' dispwés, mile' Che mandad, ñë'd Jakob, xuz Che, no rë melizh xa', par Egipto, no di lo rë bixa' nak bixa' chon gal nzho chi'n men.¹⁵ Orze' ña Jakob laz men Egipto, ze' ngut xa' kun más rë xuz be, xa' tiemp.¹⁶ Orze' más bixa' mbiy', wes che'n rë xa' kwa'n ngut re', par miga'che lo yuo Siquem, kwa'n nguzi' Abraham, lo rë xin Hamor plo nak yezh Siquem.

¹⁷ No or nza como tap gayo' li'n nzho rë xuz be xa' tiemp laz men Egipto, nela xmod mila' Dios di'zh par Abraham, no miar dox bixa' ze',¹⁸ orze' nguo xtu rey Egipto xa' gat nilibe't Che, nanet xa' kwan mile' Dios por Che.¹⁹ Lë' rey re' mile' nakap lo rë xuz be. Mile' rey mandad, ngulubi bixa' rë nak më'do' xiby'i' kwa'n laore ngol, par nayar ra' bixa'.²⁰ Le'n rë ngubizh ze' ngol Muisés, no Dios nguo laxto' më'd. No chontsa mbë'o' mixë'n xuz më'd, më'd.²¹ No or mila' nzë'b bixa' Muisés, lë' xcha'p Faraón mixë'n më'd, nela tu xmë'd xa' ga'.²² Sa'

ngok mitse'd Muisés rë nak kwa'n nzhak men Egipto, no ngok xa' tu miyi' dox natsin lo rë kwa'n midizh xa', no lo rë kwa'n mile' xa'.

²³ 'No or nzhap la Muisés cho' li'n, mbi'd yek xa', ngwatsi' xa', ma rë melazh xa', rë men Israel. ²⁴ No or une Muisés, kizakzi tu men Egipto tu rë men Israel, orze' ngwalat xa' xa' ze', mbaino migal Muisés xa' re', ²⁵ porke mile' Muisés xigab, pas nganu ka laxto' men Israel, lë' Dios lat bixa' por Muisés, per nanganut laxto' bixa'i. ²⁶ No xtu riyë'l une Muisés, kidil chop men Israel, orze' nzhab Muisés lo bixa': "¿Chon kidil go?, gat went mis kun wech go dil go." ²⁷ Orze' nguzubi xa' nzhap dol re', miche'p xa' Muisés, nzhab xa': "¿Cho mizol par le'l mandad lo no, no par kube'l xid no? ²⁸ Pas nzhaklal galal da, nela xmod migalal men Egipto na'g ze'." ²⁹ Or mbin Muisés kure', mikë' xa' karre, ña xa' lazh men Madián; ze' miban xa', no ngok xa' tu men kwa'n nžë xtu plo xid rë men ze', mbaino ngop xa' chop xga'n xa' ze'.

³⁰ 'Or nded cho' li'n, lo yuo bizh che'n mont Siná nguruxo'b tu ganj le'n bël che'n tu ya yich zobyol, ³¹ no xe miwi' Muisés or une xa' ya nzobyol ze', orze' nguzubi xa' más gax par wi' xa' kwane, orze' midizh Dios lo xa', nzhab Dios: ³² "Na nak Dios che'n rë xuzal: Dios che'n Abraham, Dios che'n Isaac, no Dios che'n Jakob." Orze' nguzublo nixiz Muisés di zhe'b, nangalistra' xa' lo xa'. ³³ Orze' nzhab Dios: "Bila xkalyidal ni'l, porke plo nzol, dox nazhone. ³⁴ Walika lë'da une xmod kizakzi rë men Egipto rë men da, no mbina rë yalne kwa'n kizakzi bixa'. Kuze' nzhala par gakkun bixa'. Nal, dë' re', par xëla lu Egipto."

³⁵ 'No Muisés re', xa' gat nzhaklat bixa', or nzhab bixa': "¿Cho mizol par le'l mandad lo no, o par kube'l xid no?", no xa' re', xa' mixë'l Dios como xa' le' mandad no xa' kwa'n gakkun bixa' por ganj kwa'n nguruxo'b le'n ya yich nzobyol ze'. ³⁶ No por Muisés, mile' Dios nayax señ nazhon lazh men Egipto, mbaino ro' nitsdo' Naxne, mbaino lo yuo bizh plo nded bixa' dub cho' li'n. ³⁷ No mis Muisés re' nzhab lo rë men Israel: "Xid go kwe Dios tu miyi', xa' gak profet, di'zh xa' por Dios nela da ga', no naki'n gon go ro' xa' re'." ³⁸ No Muisés re', xa' kwa'n nguio xid rë men che'n Dios plo nguzhin bixa' lo yuo bizh, no midizhnu xa' ganj yek yi' kwa'n lë Siná. Ze' mbin xa' widizh che'n Dios, Dios Me nilu' xmod ñal ban be, no widizh re' mite'd xa' lo be.

³⁹ 'Per rë xuz be xa' nzhala, no maska bixa' ngon ro' Muisés, lë'la ngokla bixa' ngayëk bixa' xtu wëlt par lazh men Egipto. ⁴⁰ Mbaino nzhab bixa' lo Aarón, or ngwa Muisés xche yek yi' Siná: "Bizuxkwa' go pla

dios par lu' nez lo no, porke Muisés re' kwa'n ngulo' no lazh men Egipto, nanet no ma xa'." ⁴¹ Orze' michao' bixa' tu winab kwa'n nak nela tu bicerr ga', no mbit bixa' rë ma par miza' bixa' gon lo winab ze', par mile' bixa' tu lani por kwa'n michao' mis lë' bixa'. ⁴² Kuze' mila' Dios, nguzuxib bixa' haxta lo rë kwa'n nzhlo lo yibë', nela xmod nzobni' lo yech kwa'n mikë' rë profet, xa' midizh por Dios, se' mizobni' bixa':

Go men Israel, ¿chi mbit go rë ma par Da?

¿Chi mine' go ren che'n rë ma,

dub cho' li'n kwa'n mite'd go lo yuo bizh?

⁴³ Per lë'la yën go mbiy' go yo' yid plo nzob winab che'n Moloc,

no plo nzob winab che'n mbël kwa'n lë Renfán,

rë winab kwa'n mis go michao' par midizh go nazhone.

Kuze' lë'da chubla go, lë' go bi más zit ke lazh men Babilonia.

⁴⁴ 'No lo yuo bizh plo nzhin bixa', kinu rë xuz be, xa' nzhala, tu yo' yid, kwa'n ngok yado' che'n bixa'. Le'n ze' midizh bixa' lo Dios, nela xmod nzhab Dios lo Muisés, le' bixa'. ⁴⁵ Yo' yid ze' mia'nnu rë xuz be, xa' nzhala, or nguzhin bixa' lo yuo Canaán. Orze' Josué mia'n xlugar Muisés, no por Josué, ngulat bixa' yuo ze' lo rë men nzhin Canaán. No dub nguio rë xuz be lo yuo Canaán, guna'b bixa' lo Dios le'n yo' yid ze', haxta or ngok Dabi rey lo bixa', une guna'b bixa' lo Dios le'n yo' yid ze'. ⁴⁶ Por wen miwi' Dios lo rey Dabi, kuze', nzhab Dabi lo Dios: "Nzhaklan kuxkwa'n tu lugar par lu, Dios che'n Jakob." ⁴⁷ Per Salomón mizuxkwa' yado' che'n Dios, ⁴⁸ ter yo' kwa'n nichao' men, gat naki'nta' Diose par yo Dios, nela xmod nzhab ka tu profet, xa' midizh por Dios:

⁴⁹ Yibë' nak plo nzo'ba, par nilen mandad, no lo yizhyuo nak plo nizo ni'n.

¿Xmod nak yo' kwa'n kuxkwa' go par da?

O, ¿ma lugar kwa'n ne' go par len diskans?,

⁵⁰ porke na mizuxkwa' rë kure', yizhyuo no yibë'.

⁵¹ No nu nzhab Teb:

—Per go, ¿zhe'b nad yek go! Nangont go widizh che'n Dios, porke nayao' nza go no laxto' go. Dubta' gat nzhont go kwa'n midizh Sprit che'n Dios, no nak go nela ngok rë xuz go, xa' nzhala. ⁵² Mizakzi rë xuz go rë profet, xa' midizh por Dios. Haxta mbit rë xuz go rë xa' kwa'n mila' widizh re': "Lë' Dios xë'l tu Xa' kwa'n le' rë kwa'n gab Dios." No nal, Xa' re' mbi'd la, ¿per michi go Xa' lo rë xa' kwa'n mbit Xa'! ⁵³ No go re', xa' kwa'n mia'nnu ley kwa'n miza' ganj che'n Dios lo Muisés, per nangale't go kwa'n nzhakla ley.

Mbit bixa' Teb

⁵⁴ Or mbin bixa' widi'zh re', dox niyi'xian bixa', haxta mitao' lëi bixa' por kwa'n nzhah Teb. ⁵⁵ Per lë' Teb, nzho dox Sprit che'n Dios laxto' xa', no miwi' xa' lo yibë', une xa' biani che'n Dios, maska ña'zbële, no Jesukrist nzo lad direch che'n Xuz Me Dios, ⁵⁶ orze' nzhah Teb lo bixa':

—|Biwi' gol, lë'da niwi' lë' lo yibë' naxa'l; no lë' Xga'n Dios Me kwa'n nak ska tu men yizhyuo, nzo la direch che'n Dios.

⁵⁷ Orze', naye ngurezhië' rë men nzhin ze', no mitsao' bixa' nzha bixa', orze' rë bixa' tutsa mile' bixa' xigab, nguxo'b bixa' tich Teb, ⁵⁸ orze' ngulo' bixa' Teb ro' yezh, par nguluke bixa' Teb; no rë xa' kwa'n mbin kwa'n nzhah Teb re', ngulo' bixa' kaxkem che'n bixa', no ngwala' bixa'i lo tu miyi' xi xa' lë Saulo. ⁵⁹ No dub bigo' ke bixa' Teb, naye mid'i'zh Teb lo Dios, nzhah Teb:

—O Señor Jesús, bi'y alm da.

⁶⁰ Orze' nguzuxib Teb, nzhah Teb naye:

—|O Señor, nana'btal kwent lo bixa' por rë yalki kwa'n kile' bixa' nal re'!

Or milox mid'i'zh Teb kure', ngut xa'.

8

Saulo mizakzi rë men che'n Jesukrist

¹ Tutsa nak xigab che'n Saulo kun rë xa' mbit Teb. Mis zhë re', nguzublo nguza-kzi dox rë men che'n Jesukrist xa' nzho yezh Jerusalén. Orze' nzho bixa' mire'ch par rë yezh kwa'n ña'n lazh men Judea, no más bixa' ña rë yezh kwa'n ña'n lazh men Samaria; no nab tsa rë apost mia'n yezh Jerusalén. ² No pla rë men xa' nzhon ro' Dios, mika'ch bixa' kwerp che'n Teb, no dox mbi'n bixa' por Teb.

³ Per Saulo nguzublo kizakzi rë men xa' nak men che'n Jesukrist, rë xa' kwa'n nzho yezh Jerusalén; ño xa' yo' por yo', una'i miyi'y nizubxax xa', mbaino nigo xa' men lizhyi'b.

Milu' men che'n Jesukrist widi'zh nazhon che'n Dios lazh men Samaria

⁴ No lë' rë men che'n Jesukrist kwa'n mire'ch ze', kidi'zh bixa' widi'zh nazhon che'n Dios por Jesukrist rë plo. ⁵ Tu xa' ze' lë Lip, ngwa xa' tu rë yezh kwa'n ña'n lazh men Samaria; ze' nguzublo kidi'zh xa' widi'zh che'n Jesukrist lo rë men ze'. ⁶ No rë men yezh ze', tutsa plo nigan bixa' par nzhon bixa' rë widi'zh kwa'n nidi'zh Lip, por rë señ nazhon kwa'n nine bixa' nile' Dios por Lip. ⁷ Miak nayax xa' nzho mbi mal laxto', no or niro' rë mbi ze', haxta naye nibizhyëi; no nayax men xa' nagakt win ñak bixa', mbaino nayax men xa' nagakt zë nizë bixa'. ⁸ Kuze' dox nizak laxto' rë men yezh ze'. ⁹ No yezh Samaria re', nzho tu miyi' xa' lë Simón, dizde nzhala, nzhak xa' kwa'n mal, no nikide xa' rë men yezh re', nidi'zh

xa' lë' xa' dox nzhak. ¹⁰ Rë men yezh ze', dizde më'd win haxta rë mengol, xe nine bixa' kwa'n nile' Simón, no nidi'zh bixa':

—Xa' re'se, kinu poder che'n Dios.

¹¹ No dizde nzhala, nazhe'b nile' rë men lo xa', por rë señ kwa'n nile' xa' por nzhak xa' kwa'n mal, ¹² per or mid'i'zh Lip lo rë men, xmod yo bixa' ya' Dios, mbaino xmod ban bixa' bid kwa'n niza' Jesukrist, no ngway-ila bixa'i, ngoklëi' bixa' le'n nits, miyi'y no una'i. ¹³ No nu ska Simón, xa' nzhak kwa'n mal re', ngwayila widi'zh re', orze' ngoklëi' xa' le'n nits, no ñakë xa' tich Lip rë plo ña Lip, mbaino xe ña'n xa' tuli or nine xa' rë kwa'n nazhon kwa'n nile' Dios por Lip.

¹⁴ Or mbin rë apost, rë xa' kwa'n mia'n yezh Jerusalén, lë' nu rë men Samaria ñila widi'zh che'n Dios por Jesukrist, orze' mixë'l bixa' Per kun Juan yezh Samaria re'. ¹⁵ Or mizhin Per kun Juan ze', mina'b bixa' lo Dios por rë xa' nzhin ze', xa' ñayila widi'zh che'n Jesukrist, par yo Sprit che'n Dios laxto' bixa', ¹⁶ porke stubi gat yo Sprit che'n Dios laxto' bixa', nab tsa ngoklëi' bixa' le'n nits nela xmod mile' ka Señor Jesús mandad. ¹⁷ Orze' mixo'b Per kun Juan ya' bixa', yek rë xa' re', par nguio Sprit che'n Dios laxto' bixa'. ¹⁸ No or une Simón, ka nixo'b rop apost, ya' bixa' yek rë men ze', orze' ño Sprit che'n Dios laxto' rë xa' re', orze' mizë'b Simón dimi lo rë apost, ¹⁹ no nzhah xa':

—To go poder ba' kan, nes par nu da, or xo'ba ya'n yek rë men, yo Sprit che'n Dios laxto' men.

²⁰ Per nzhah Per lo xa':

—|Lox xtimil kun lu! ¿Kwan gabal, kun dimi zi'l kwa'n niza' Dios? ²¹ Gat ñalta'l le'l kwa'n nile' no, porke gat nambet laxto'l lo Dios. ²² Naki'n la'l, nale'tra'l xigab mal ba', no bina'b lo Dios, pas kinkitla nabei, che' Dios rë kwa'n nzë'bxkil, por rë xigab kwa'n nzho laxto'l ba'. ²³ Nal niwi'n, nagakt la'l, rë kwa'n gat lë' kwa'n nzho laxto'l ba'.

²⁴ Orze' nzhah Simón lo bixa':

—Guna'b go lo Dios por da, par nazhin ni tu rë kwa'n ne go ba' lon.

²⁵ No or milox mid'i'zh rop apost rë kure', nazhe'be chi nayo men ya' Dios, mbaino or milox mid'i'zh bixa' kwa'n milu' Señor Jesukrist, orze' ña bixa' par Jerusalén, mbaino biña bixa' nez, kidi'zh bixa' widi'zh che'n Dios por Jesukrist rë yezh kwa'n ña'n lazh men Samaria.

Lip no tu xa' nak zhi'n lazh men Etiopía

²⁶ Dispwës di kure', nzhah tu ganj che'n Dios lo Lip:

—Nayen wa nez kwa'n niro' nali laka yezh Jerusalén no yezh Gaza.

No nez re' nided plo nak pura yuo bizh. ²⁷ Orze' nzha Lip, lë'chi mizhë'l xa' tu men nzë lazh men Etiopía, tu xa' nagakt gap

una'. No xa' re' naka' kwent niguchao' dimi che'n rreyna Candace, tu una' kwa'n nile' mandad lo rë men etiope. No lë' miyi' re', ngwa yado' Jerusalén, par ngwazuxib xa' lo Dios. ²⁸ No se' ñë'd la xa' par ña xa' lazh xa', nzob xa' le'n karret che'n xa', no kiyo'l xa' yech kwa'n mikë' profet Isaías, tu xa' kwa'n midì'zh por Dios. ²⁹ Orze' nzhab Sprit che'n Dios lo Lip:

—Guzubi ta' karret ba'.

³⁰ No or nguzubi Lip ta' karret re', orze' mbin Lip, lë' xa' etiope re' kiyo'l yech kwa'n mikë' Isaías, orze' nzhab Lip lo xa' re':

—¿Chi kizobyek na go kwa'n kiyo'l go ba'?

³¹ Orze' nzhab xa' re':

—¿Xmod ganen kwan nzhabe chi niyent cho lu'i lon?

Orze' nzhab xa' lo Lip, kili Lip plo nzob xa', par zob Lip ta' xa'. ³² No yech kwa'n kiyo'l xa', nzhab se':

Ngut xa', nela nzhat tu mbëkxi'l ga',

no or mizakzi men xa',

ni tu widi'zh nangabt xa' lo rë xa' mbit xa'.

³³ Mile' men kwa'n nzhakla men kun lë' xa', no yent cho ngadi'zh por lë' xa',

mbaino nala'ta' ben che'n xa', porke lë' bid che'n xa' ngulubchi men yizhyuo re'.

³⁴ Orze' minabdi'zh men etiope re' lo Lip, nzhab xa':

—Le'l jabor nel, ¿cho xa' kize't profet, xa' kwa'n nzob lo yech re'? ¿Chi mis lë' profet nguzake, o xtu mene?

³⁵ Orze' nguzublo Lip, kilu' kwa'n nzob lo yech ze', no milu' Lip rë widi'zh nazhon che'n Dios por Jesukrist lo xa' re'. ³⁶ No or nded bixa' tu plo nikë nits, nzhab xa' re' lo Lip:

—Re' nikë nits. ¿Chi zak gaklëi' da re'?

³⁷ Orze' nzhab Lip:

—Chi lë'l walika ñilai, gak gaklëi'yal re'.

Orze' nzhab xa' re':

—Na ñila, lë' Jesukrist nak Xga'n Dios.

³⁸ Orze' mikwë'z xa' karret che'n xa', no ngula rop bixa' le'n nits, orze' mililëi' Lip xa' re'. ³⁹ No or nguro' bixa' le'n nits, di repent ñanu Sprit che'n Dios Lip, no ngane-tra' xa' re' Lip, orze' ña xa', no nizak laxto' xa'. ⁴⁰ Mbaino nguruxo'b Lip haxta yezh Azoto, kidi'zh xa' widi'zh nazhon che'n Dios por Jesukrist lo rë men, haxta or mizhin xa' yezh Cesarea.

9

Ngwayila Saulo widi'zh che'n Dios por Jesukrist

(Hch. 22:6-16; 26:12-18)

¹ Per stubi ra' nidi'zh Saulo, lë' xa' gut rë men che'n Jesukrist, kuze' ngwa xa' lo rë ngulëi' ro', ² par ngwalo' xa' tu yech kwa'n kinu permis, par yala' xa'i lo rë xa' nile'

mandad le'n rë yo' plo nitse'd rë men Israel widi'zh che'n Dios yezh Damasco, par yatsen Saulo rë men che'n Jesukrist kwa'n nzhin ze', miyi'y no una'i, par wei' Saulo bixa' yezh Jerusalén par yo bixa' lizhyi'b. ³ Or nzhazhin la Saulo yezh Damasco kun rë men xa' nzha xa' kun lë', lë'chi nguluxo'b tu ki dizde lo yibë' kwa'n mizini nayi' al naka'n plo nzhazë bixa', ⁴ orze' ngwachin Saulo lo yuo, mbaino mbin xa' tu widi'zh kwa'n nzhab lo xa':

—¡Saulo, Saulo! ¿Chon kirukël ticha par dilal kun na?

⁵ Orze' nzhab Saulo:

—¿Cho lu, Señor?

Orze' nzhab widi'zh re':

—Na Jesús kwa'n kirukël tich, mbaino kidilal kun lë'; chi lë'l dil kuna, lo mis lu kikwa'n yalne che'nal.

⁶ Orze' maska nixiz xa' di zhe'b, orze' nzhab xa':

—Señor, ¿kwan nzhakla go len?

Orze' nzhab widi'zh ze':

—Waxche, no wa yezh Damasco; ze' ne tu xa' kwan ñal le'l.

⁷ No rë xa' nzha kun Saulo, xe mia'n bixa' tuli, nangaktra' ngadi'zh bixa'; mbin bixa' widi'zh ze', per yent cho ngane bixa'. ⁸ No or ngwaxche Saulo lo yuo, mikal lo xa' tuli. Orze' men nguzen ya' xa', par mizhin xa' yezh Damasco. ⁹ Ze' nguio xa' chon ngubizh, no nikal lo xa', nangaot xa', mbaino ni nits nangot xa'.

¹⁰ No yezh Damasco nibëz tu men che'n Jesukrist xa' lë Ananías. Ngurulo Jesukrist lo xa' re' kun widi'zh re':

—¿Mal Ananías?

Orze' nzhab Ananías:

—Lë'da re', Señor.

¹¹ Orze' nzhab Jesukrist:

—Nayen wa nez kwa'n lë Direch, plo nzob lizh Judas. Ze' bina'bdi'zh por tu xa' lë Saulo, tu xa' kwa'n nzë yezh Tarso; porke mer kina'b xa' re' lon nalre', ¹² no lë' Dios milu' la lo Saulo, tu miyi' xa' lë Ananías xo'b xa' ya' xa' yek Saulo par yani lo xa' xtu wëlt.

¹³ Or milox mbin Ananías widi'zh re', orze' nzhab Ananías:

—Per Señor, dox nzhona, lë' miyi' ba' nizakzi rë xpenal, rë xa' kwa'n nzho yezh Jerusalén, ¹⁴ no nu re', kinu xa' permis che'n rë ngulëi' ro, par ko xa' rë xpenal lizhyi'b.

¹⁵ Orze' nzhab Jesukrist:

—Wa, porke lë'da ngule la xa' re', par di'zh xa' xtizha lo rë men gat lë't men Israel, no lo rë rey, mbaino lo rë men Israel, ¹⁶ porke lë'da lu lo miyi' ba', por da, dox naki'n zakzi xa'.

¹⁷ Orze' ngwa Ananías plo nzho Saulo, no or mizhin xa', migal xa' Saulo, mbaino nzhab xa':

—¿Mal, wecha Saulo? Lë' mis Señor Jesús kwa'n ngurulo lol, or nzël nez, lë' Me mixë'l da par yani lol xtu wëlt, mbaino par yo Sprit che'n Dios laxto'l.

¹⁸ Mis orze', ngob rë kwa'n lo Saulo, rë kwa'n nak nela kwa'n nzho'b tich mbël ga', orze' ngok ngwani lo Saulo xtu wëlt. Orze' ngwatso xa' par ngoklëi' xa' le'n nits, ¹⁹ mbaino ndao xa' par nka' la xa' xtu wëlt, no mia'n xa' zipla ngubizh kun rë men che'n Jesukrist kwa'n nzho yezh Damasco.

Nguzublo kilu' Saulo widi'zh che'n Dios por Jesukrist le'n yezh Damasco

²⁰ No nguzublo kilu' Saulo widi'zh che'n Dios por Jesukrist le'n rë yo' plo nitse'd men widi'zh che'n Dios, yezh Damasco; ze' galo laka mididi'zh Saulo lë' Jesukrist nak Xga'n Dios, Me nzho lo yibë'. ²¹ No or mbin rë men kure', xe mia'n bixa' tuli, mbaino kidi'zh bixa':

—¿Chi gat lë't miyi' re', xa' kwa'n kiza-kzi rë men che'n Jesukrist xa' nzho yezh Jerusalén? ¿No chi gat lë't mis xa' re', xa' nzë re' par zen xa' rë men che'n Jesukrist, par wei' xa' bixa' lo rë ngulëi' ro?

²² Per Saulo, kad ngubizh más dub la xa', kidi'zh xa' widi'zh che'n Dios por Jesukrist; haxta mile' xa' net rë men Israel kwan le' xa', rë xa' kwa'n nzhin Damasco, porke milu' xa', walika lë' Dios mixë'l Jesús, Me kwa'n nak Krist.

Mikë' Saulo karre lo rë men Israel

²³ Nayax ngubizh nded, lë'chi tutsa mia'n rë men Israel kwa'n nzhin yezh Damasco, par gut bixa' Saulo, ²⁴ per mbin Saulo cho xigab nile' bixa', zhëy-yë'le kimbëz bixa', ro' rë pwert che'n yezh Damasco, par gut bixa' Saulo. ²⁵ Per rë men che'n Jesukrist, yë'l ngulo' bixa' Saulo, ngulo bixa' Saulo le'n tu kardor, par mila bixa' Saulo xtu tich simient ke kwa'n nzho naka'n ro' yezh ze'.

Mizhin Saulo yezh Jerusalén

²⁶ Or mizhin Saulo yezh Jerusalén, ngokla xa' ngabin xa' kun rë men che'n Jesukrist, kwa'n nzho ze', per nangayilat bixa', chi walika nak Saulo tu men che'n Jesukrist. ²⁷ Orze' xtu men che'n Jesukrist xa' lë Bernabé, ngwanu xa' Saulo lo rë apost, no nzhab Bernabé lo rë xa' re': "Lë' Saulo une Señor or nzha xa' nez Damasco, no mididi'zh Señor lo xa', mbaino yezh Damasco lë' Saulo mididi'zh widi'zh che'n Dios por Jesús dub la xa'."

²⁸ Orze' mia'n Saulo yezh Jerusalén, nguzhin xa' kun rë men che'n Jesukrist kwa'n nzhin ze', no ni nangazheb xa' mididi'zh xa' widi'zh che'n Dios por Jesukrist, ²⁹ no michë'ro' Saulo kun rë men Israel kwa'n nidi'zh widi'zh grieg, per rë xa' re' kikwa'n mod par gut bixa' Saulo. ³⁰ Or mbin rë men che'n Jesukrist kure', lwegä' mbiy'

pla bixa' Saulo par yezh Cesarea, di ze' ña xa' par yezh Tarso. ³¹ Mbaino lë' rë men che'n Jesukrist kwa'n nzho yezh Judea, no yezh Galilea, mbaino kun rë xa' yezh Samaria, dox chul nzhin bixa', mbaino más nzharo'b xigab che'n bixa' lo rë che'n Dios, no más nzhon bixa' ro' Dios, naban bixa' nela xmod nzhakla Dios; no mile' Sprit che'n Dios, más miar bixa'.

Miak tu xa' lë Eneas

³² No or nikizë Per nayax rë yezh, ñatsi' xa' rë men che'n Jesukrist, orze' nu rë men che'n Jesukrist kwa'n nzho yezh Lida ngwatsi' xa'. ³³ Ze' nzho tu miyi' xa' lë Eneas. Nzha xon li'n, na'x xa' lo lo'n, nagakt win xa', ³⁴ orze' nzhab Per lo xa':

—Eneas, lë' Jesukrist miliwen lal. Waxche, no gulits lo'n che'nal.

Lwegä' ngwaxche Eneas, ³⁵ no rë men xa' nzho yezh Lida, kun más rë men xa' nzho tu lach kwa'n lë Sarón, or une bixa' miak Eneas, nu bixa' ngwayila widi'zh che'n Dios por Jesukrist.

Nguruban tu una' xa' lë Dorkas

³⁶ No le'n yezh kwa'n lë Jope, ze' nibëz tu men che'n Jesukrist, tu una' lë Tabita (widi'zh kwa'n gab Dorcas). Una' re', dub tiemp miban xa', mile' xa' wen, mbaino nzhaknu xa' rë men prob. ³⁷ Le'n rë ngubizh ze', una' re' ngokne no ngut una'. Or milox mizët bixa' kwerp che'n una' re', orze' mbiy' bixa' kwerp che'n una' re' le'n tu kwart al ya, yek yo'. ³⁸ No mbin rë men che'n Jesukrist kwa'n nibëz yezh Jope, lë' Per nzo gax laka yezh Lida, gax laka par ze', orze' mixë'l bixa' chop miyi' kwa'n ngwayab lo Per, nzhab bixa':

—Le' go jabor, lwegä' dë' go yezh Jope re'.

³⁹ Or mizhin Per kun rop xa' re', mbiy' xa' Per yek yo' al ya plo nzho'b una' re', no rë una' ngut xmiyi' nzhin ze', nzho'n biuna' lo Per, no milu' biuna' rë lar kamis no bestid kwa'n mitib una' re' or naban ra' una'. ⁴⁰ Mbaino nzhab Per, ro' rë xa' re' le'n kwart ze'. Orze' nguzuxib Per par mina'b xa' lo Dios, no or milox mina'b xa' lo Dios, miëk Per lo una' re', nzhab Per:

—Tabita, waxche.

Orze' miwi' una', une una' Per; lwegä' ngwaxche una', no nguzob una'. ⁴¹ Or nguzen Per ya' una', mizuli xa' una'. No or nguzezh Per rë una' xa' ngut xmiyi' ze', kun más rë men che'n Jesukrist kwa'n nzhin tich ze', ze' milu' Per, lë' una' nguruban. ⁴² No rë men yezh Jope, mbin bixa' kwa'n nguzak Tabita, kuze' nayax men kwa'n nzho ze', ngwayila bixa' widi'zh che'n Dios por Jesukrist. ⁴³ No nayax ngubizh mia'n Per yezh Jope, lizh tu miyi' xa' lë Simón, tu xa' nizuxkwa' yid.

10

Per no Cornelio

¹ Le'n yezh Cesarea, nguio tu miyi' xa' lë Cornelio, tu xa' nile' mandad lo tu gayo' sondad italiano. ² Dox wen xa' re', no wen rë melizh xa', mbaino nzhon xa' ro' Dios, no dox nzhaknu xa' nayax men Israel kun dimi che'n xa', no zilita' nina'b xa' lo Dios. ³ No ngol tu ngubizh, paste las tres guzhe, ngurulo tu ganj che'n Dios plo nzo xa', nzhab ganj lo xa':

—¡Cornelio!

⁴ Orze' dox mizheb xa', xe miwi' xa', mbaino nzhab xa':

—¿Kwan nzhaklal, Señor?

Orze' nzhab ganj:

—Rë kwa'n nina'bal lo Dios, no rë kwa'n nile' nzhaknul rë men prob, nake nela tu gon kwa'n ño laxto' Dios ga'. ⁵ No nal, bixë'l pla xpenal yezh Jope, par yaka' bixa' tu xa' lë Simón Per. ⁶ Xa' re' nzhoh lizh tu xa' lë Simón, tu xa' kwa'n nizuxkwa' yid, xa' re' nibëz gax laka ro' nitsdo'. Xa' re' ne kwan naki'n le'l.

⁷ No or ña ganj kwa'n midizh kun Cornelio re', orze' ngurezh Cornelio chop mos che'n xa', kun tu sondax xa' nzhon ro' Dios, tu xa' kwa'n nzhoh xid rë xa' kwa'n nzhaknu xa' zilita'. ⁸ Orze' miza' xa' kwente lo rë xa' re', kwan nguzak xa', orze' mixë'l xa' rë miyi' re' par yezh Jope.

⁹ Xtu riyë'l, or nzhazë rë miyi' re', no nzhazhin la bixa' yezh Jope, no lé' Per nkë yek yo', paste ngol garol zhë, par na'b xa' lo Dios. ¹⁰ Mbaino nila'n Per, nzhakla xa' gao xa', no dub kiline men tu kwa'n gao xa', lë'chi milu' Dios tu kwa'n lo xa'. ¹¹ Mixa'l lo yibë', orze' ngulayët tu kwa'n nak nela tu lar ro ga' haxta plo nzo Per, no kad skine nali'b. ¹² Lo lar ro re' nikë rë klas ma kwa'n nizë kun rop ni' no rop ya', no rë ma kwa'n nizë nadu'b laxto', mbaino kun rë ma kwa'n nzob xi'l. ¹³ Orze' mbin Per tu widizh kwa'n nzhab se':

—Per, watso no bit rë ma re' no dao ma.

¹⁴ Orze' nzhab Per:

—¡A'a Señor!, lalta' gat gau' tu kwa'n nayi' gao men nzhab Dios.

¹⁵ Orze' xtu wëlt nzhab widizh ze' lo Per:

—Rë kwa'n mitsumbe la Dios, nagabtra'l nayi' gao mene.

¹⁶ Chon wëlt ngok kure', orze' nguiubre ska lar ro re' lo yibë'. ¹⁷ Dub net Per kwan le' Per por kwa'n une Per, lë'chi mis orze' mizhin rë miyi' kwa'n mixë'l Cornelio, kin-abdi'zh bixa' plo nzob lizh Simón, mizhin bixa' ro' yo'. ¹⁸ Naye kinabdi'zh bixa', nzhab bixa': “¿Chi re' nzhoh tu xa' kwa'n lë Simón Per?” ¹⁹ Stubi kile' Per xigab por lar ro kwa'n une Per, lë'chi nzhab Sprit che'n Dios lo Per:

—Biwi', lë' chon miyi' kikwa'nal. ²⁰ Watso no gula, wa lo bixa'. Nale'tal xigab, porke na mixë'l bixa'.

²¹ Orze' ngula Per, nzhab Per lo rë xa' re':

—Na xa' kwa'n kikwa'n go ze'. ¿Kwan ne go?

²² Orze' nzhab bixa':

—Lë' Cornelio mixë'l no, tu xa' kwa'n nile' mandad lo tu gayo' sondad, tu xa' menaye, no nzhon xa' ro' Dios, mbaino tu xa' wen ñët xid rë men Israel. Lo xa' re' ngurulo tu ganj kwa'n nzhab ya go lizh xa' ne, par gab go lo xa' kwa'n naki'n gab go.

²³ Orze' mite'd Per bixa' le'n yo', mia'n bixa' ze' kun Per yë'l ze'. Orze' xtu riyë'l, nzhah Per kun lé' bixa', no kun zipla men che'n Jesukrist xa' nzhoh yezh Jope mile' kumpa'ñ Per. ²⁴ No xtu ngubizh, or mizhin bixa' yezh Cesarea, ze' lë' Cornelio mikan la rë melizh xa' kun zipla xa' dox nichë'l xa', kimbëz la bixa' zhin Per. ²⁵ Or mizhin Per lizh Cornelio, nguro' Cornelio ngwakinez xa' Per, orze' nguzuxib xa' xani' Per, nzhab xa': “Dox nazhon go.” ²⁶ Per militso Per xa', nzhab Per lo xa':

—Watsuli, porke tutsa nak ka be.

²⁷ Bin kidizh Per kun lé' xa', ña bixa' le'n yo', une Per, nayax men nzhin la ze', ²⁸ orze' nzhab Per:

—Rë go nane, lo ley che'n men Israel, nagakt zhë'l tu men Israel kun tu men xa' gat lë't men Israel, no per ni gat ña bixa' lizh men ze'. Per Dios milu' lon, gat ñalt gapa lo ni tu men: “Men ba', gat niwi't Dios lo.” ²⁹ Kuze' Iwega' nzhah or mile' bixa' abis lon, nangakta' da naya'. Per nal nzhaklan gona, ¿kwan ngurezh go da?

³⁰ Orze' nzhab Cornelio:

—Nzha tap ngubizh, or nal ta' re', paste las tres guzhe, duba xlatsa kina'ba lo Dios, lë'chi ngurulo tu miyi' nak lar ña'zbël laka lon, ³¹ ne xa': “Rë kwa'n nina'bal, no rë kwa'n nile' nzhaknul rë men prob, nake nela tu gon kwa'n ño laxto' Dios ga'. ³² No nal, bixë'l pla men par yezh Jope, par yaka' bixa' tu xa' lë Simón Per. Xa' re' ne kwan naki'n le'l, xa' re' nzhoh lizh tu xa' kwa'n nibëz gax ro' nitsdo', tu xa' lë Simón, kwa'n nizuxkwa' yid.” ³³ Kuze' mixëla pla xa' lo go, par yi'dka' xa' go, no wen go nzëka go lo no. Lë' rë no nzhin re' lo Dios, nal nzhakla no gon no rë kwa'n mile' Dios mandad go, ne go.

Kwa'n midizh Per lizh Cornelio

³⁴ Orze' nguzublo midizh Per, nzhab Per:

—Nal unen, walika, gat nibet Dios men, ³⁵ sino ke men nzhon ro' Dios no nile' bixa' kwa'n ñal, wen niwi' Dios lo bixa', wanei plo nzë xa'. ³⁶ No kure' nak widizh kwa'n mila' Dios lo rë men Israel, or mixë'l Dios Jesukrist, Me kwa'n nile' mandad lo rë men.

No por widi'zh re', nibin rë men wen kun Dios, wanei cho mene, xa' ñilai. ³⁷ No lë' go nane ka widi'zh re' mire'ch rë yezh che'n rë men Israel, galo laka kun rë men Galilea mire'che. Per antis di zubro re'ch widi'zh re', Juan mid'i'zh la, naki'n la' men rë kwa'n nakap kwa'n nak men, ban xa' xtu mod kun Dios, mbaino gaklëi' bixa' le'n nits. ³⁸ No nane go, ke lë' Dios miza' dox poder, mbaino miza' Dios Sprit che'n Dios yo laxto' Jesús, Me nzë yezh Nazaret; porke Dios nzo kun lë' Me, nkizë Me miliwen Me rë xa' nzhakne mbaino rë xa' kile' Mizhab bid naban. ³⁹ Mbaino no, rë xa' kwa'n une, rë kwa'n mile' Jesús, lazh men Israel, no yezh Jerusalén, dispwés di miké' bixa' Jesús lo krus par ngut Me. ⁴⁰ Per mile' Dios nguruban Me ngubizh yon, no mile' Dios ngurulo Me lo no. ⁴¹ Per gat lë'ta' lo rë men ngurulo Me, sino lo nab tsa rë xa' kwa'n ngule Dios par ne rë kure'. No nak rë xa' kwa'n ndao no ngu' kun lë' Me dispwés di nguruban Me. ⁴² Mbaino Jesús mixé'l no par di'zh no lo rë men, ke lë' Dios ngule Jesús, par gab Me xmod gak kun kad men por kwa'n mile' bixa', men naban no men ngut. ⁴³ No rë profet, rë xa' kwa'n mid'i'zh por Dios, mid'i'zh la bixa' rë kure', ke rë men xa' yila Jesús, lë' Dios che' rë kwa'n nzë'b xki bixa' lo Dios.

Nguio Sprit che'n Dios laxto' rë xa' gat lë't men Israel

⁴⁴ Stubi kidi'zh Per widi'zh re', lë'chi nguio Sprit che'n Dios laxto' kad bixa' kwa'n mbin widi'zh re'. ⁴⁵ No más rë men Israel, men che'n Jesukrist kwa'n nzë kun Per ze', mia'n xe bixa' tuli, or une bixa', lë' nu rë xa' gat lë't men Israel, nguio Sprit che'n Dios laxto', ⁴⁶ porke mbin bixa', kidi'zh rë men nzhin ze' lo Dios kun xtu ben di'zh, nzhab bixa', dox nazhon Dios. ⁴⁷ Orze' nzhab Per lo rë men Israel xa' nzhin ze':

—¿Chi zak gab be lo rë xa' ba', nagakt gaklëi' rë men re' le'n nits, rë xa' kwa'n nguio Sprit che'n Dios laxto', nela be ga'?

⁴⁸ Orze' mile' Per mandad, ngoklëi' rë xa' re' le'n nits, nela mile' ka Jesukrist mandad. Orze' nzhab rë men ngoklëi' ze' lo Per: “Biya'n go pla ngubizh kun no.”

11

Midi'zh Per lo rë men che'n Jesukrist yezh Jerusalén, chon ngwa Per lo Cornelio

¹ No rë apost, kun más rë men che'n Jesukrist xa' nzhin rë yezh kwa'n ña'n lazh men Judea, mbin bixa' lë' nu rë men, xa' gat lë't men Israel, ngwayila widi'zh che'n Dios por Jesukrist. ² Or miék Per yezh Jerusalén, ze' nzho pla men che'n Jesukrist xa' nidi'zh, cho nzhakla gak men che'n Jesukrist, naki'n kë señ kwa'n lë' circuncisión kwerp che'n

xa', nela xmod nzob lo ley che'n men Israel. Rë xa' re' nzhab lo Per, gat lë't mile' Per por rë kwa'n nzob lo ley, ³ nzhab bixa':

—¿Chon ngwatsi'l rë xa' gat nikët señ kwa'n lë' circuncisión kwerp che'n, mbaino ndawal kun lë' bixa'?

⁴ Orze' mid'i'zh Per, dizde xmod ngok rë kwa'n une xa', nzhab xa':

⁵ —Na nzho' yezh Jope, no or kina'ba lo Dios, orze' mixa'l lo yibé', milu' Dios tu kwa'n lon, nzhalayët tu kwa'n nela tu lar ro ga' plo nzon, no kad skine nali'b. ⁶ Orze' xe miwi'n loi, no loi nikë rë nak ma kwa'n nizë kun rop ni' no rop ya', no rë ma kwa'n nzho dan, mbaino rë ma kwa'n nizë nadu'b laxto', no rë ma kwa'n nzob xi'l. ⁷ Orze' mbina tu widi'zh kwa'n ne lon: “Per, ngwaxche bit pla ma re', mbaino dao ma.”

⁸ Orze' nzhapa: “¡A' Señor, lalta' gat gau' tu kwa'n nzhab ley che'n men Israel nagakt gao met!” ⁹ Orze' ne widi'zh ze' lon wëlt rop: “Rë kwa'n mitsumbe la Dios, nagabtra'l nagakt gaole.” ¹⁰ Chon wëlt mbina widi'zh re', orze' ña ska lar ro ze' lo yibé', ¹¹ lë'chi mizhin chon miyi' ro' yo' plo nzho'n. Nzë bixa' dizde yezh Cesarea par nzaka' bixa' da. ¹² Orze' ne Sprit che'n Dios lon: “Wa kun rë miyi' ba', yent cho xigab le'l.” No nu za xo'p wech be re', rë no ngwa lizh xa' kwa'n gat lë't men Israel re'. ¹³ Orze' miza' Cornelio kwent lo no, xmod ngurulo tu ganj che'n Dios lo xa', nzho xa' lizh xa', nzhab ganj ze' lo xa': “Bixé'l pla men yezh Jope, par yaka' bixa' tu xa' lë' Simón Per, ¹⁴ xa' re' ne lol, xmod le'l par nazaki' Diosal no rë xa' lizhal por kwa'n nzë'b xki go lo Dios.” ¹⁵ Orze' nguzublon kidizha widi'zh che'n Dios por Jesukrist lo rë xa' kwa'n nzhin ze', no nguio Sprit che'n Dios laxto' bixa', nela xmod nguio Sprit che'n Dios laxto' be galo laka. ¹⁶ Orze' mitsilan widi'zh kwa'n mid'i'zh Jesukrist lo be or ne Me: “Lë' Juan millëi' men kun nits, per go gaklëi' kun Sprit che'n Dios.” ¹⁷ No chi lë' Dios miza' Sprit che'n Me, yo laxto' rë men ze', nela mine' Dios Sprit che'n Dios yo laxto' be, or ngwayila be Señor Jesukrist, orze', ¿cho da par gapa lo Dios: “Naza'tal Sprit che'nal yo laxto' rë men ba'?”

¹⁸ Or mbin rë men che'n Jesukrist ze', rë xa' kwa'n nidi'zh kë señ kwerp che'n men, rë widi'zh kwa'n nzhab Per re', yentra' kwa'n ngab bixa', sino ke mid'i'zh bixa', nazhon Dios, mbaino nzhab bixa':

—¡Tatu nu rë men gat lë't men Israel, nguziyël Dios, niza' Dios xtu mod ban bixa' chi lë' bixa' la' rë kwa'n gat lë' nile' bixa' lo Dios!

Xpen Jesukrist kwa'n nzho yezh Antioquia

¹⁹ Or ngut Teb, orze' mire'ch rë men che'n Jesukrist rë yezh. Nzho bixa' ña lazh men Chipre, no nzho bixa' ña lazh men Fenicia, no más bixa' ña yezh Antioquia. Nangadi'zotra' bixa' widi'zh che'n Dios por Jesukrist más lo más rë men, sino ke nab tsa lo rë men Israel mid'i'zh bixa'i. ²⁰ Per nzho pla men che'n Jesukrist xid bixa' kwa'n nzë lazh men Chipre, mbaino rë xa' nzë lazh men Cirene. Or mizhin bixa' yezh Antioquia, ze' mid'i'zh bixa' widi'zh che'n Dios por Jesukrist, mbaino nu lo rë xa' nidi'zh widi'zh grieg mid'i'zh bixa'i. ²¹ Nayax dox rë men ze' kwa'n gat lë't men Israel, ngway-ila bixa' widi'zh che'n Dios por Jesukrist, porke ngoknu Dios rë men che'n Jesukrist, or mid'i'zh bixa' widi'zh che'n Dios lo rë men re'. ²² Or mbin men che'n Jesukrist, rë xa' kwa'n nzho yezh Jerusalén kure', mixë'l bixa' Bernabé par yezh Antioquia. ²³ No or une Bernabé, rë kwa'n wen nile' Dios xid rë men gat lë't men Israel, nizak laxto' xa', no nzhab xa':

—Tutsa xigab bile' go, no dubta' bile' go kwa'n nzhakla Dios.

²⁴ Se' mile' Bernabé par más mixobla bixa' Dios, porke Bernabé, tu xa' dox wen, no dox nzho Sprit che'n Dios laxto' xa', no dox ñila xa' widi'zh che'n Dios, kuze' dox men nguzubi lo Dios. ²⁵ No dispwës di kure', ngwa Bernabé yezh Tarso, par ngwakwa'n xa' Saulo. ²⁶ No or ngwazhël Bernabé Saulo, orze' ñë'dnu xa' Saulo par yezh Antioquia. Ze' mia'n bixa' tu li'n kun rë men che'n Jesukrist kwa'n nzho yezh ze', no milu' bixa' widi'zh che'n Dios por Jesukrist lo nayax men. Yezh Antioquia, plo galo laka ngurulë rë men che'n Jesukrist, kristian. ²⁷ Le'n rë ngubizh ze', pla profet, xa' kwa'n nidi'zh por Dios, nguro' bixa' yezh Jerusalén, par ngwa bixa' yezh Antioquia. ²⁸ Tu rë xa' re' lë Agabo, ngwatso xa' mid'i'zh xa' por Sprit che'n Dios, nzhab xa': "Lë'tu yalwin dox yo yizhyuo", no se'ka ngoke. Yalwin re' nguio or nak Claudio rey ro. ²⁹ Orze', lë' rë men che'n Jesukrist kwa'n nzho yezh Antioquia, mia'n bixa' di'zh kad bixa' za' dimi kwa'n zu' bixa', par gaknu bixa' rë men che'n Jesukrist kwa'n nzho lazh men Judea. ³⁰ No se' mile' bixa', lë' Bernabé no Saulo ngwala' rë dimi kwa'n migan ze' lo rë xa' nzo lo rë men che'n Jesukrist kwa'n nzho lazh men Judea.

12

Ngut Jakob, no lë' Per nzho lizhyi'b

¹ Le'n rë ngubizh ze', lë' rey Herodes nguzublo kizen pla men che'n Jesukrist par yo bixa' lizhyi'b, nes par zakzi rey Herodes bixa'. ² Orze' mile' Herodes mandad ngut Jakob, wech Juan, kun spad. ³ No or une Herodes, dox nguio laxto' rë men Israel

kure', kuze' nu Per mile' xa' mandad, ngwaga', par nguio lizhyi'b. Kure' ngok rë zhë or nzhaò rë men Israel pan kwa'n niyent levadur, or nzhal lani Pask. ⁴ Dispwës di ngwaga' Per, orze' ngulo Herodes Per lizhyi'b, plo kikina tap grup sondad, tap ga' sondad kad grup. Mile' Herodes xigab chi xa' Per lo rë men, or lox ded lani Pask. ⁵ No lë' Per nikë lizhyi'b plo dox kikina xa', per rë men che'n Jesukrist zilita' kina'b lo Dios por Per.

Tu ganj ngwalo' Per lizhyi'b

⁶ No mis yë'l par yanilyuo xtu ngubizh, or chi Herodes Per lo rë men, naxnaa Per lad che'n chop sondad, nali'b xa' kun chop kaden, no lë' zipla sondad kikina ro' pwert lizhyi'b. ⁷ Lë'chi ngurulo tu ganj che'n Dios, orze' dub le'n lizhyi'b ngwani, no migan ganj ta' Per, par nguro' mika'l lo xa', orze' nzhab ganj:

—jNayen waxche!

Orze' lweg'a lweg'a mixék kaden rop lad ya' Per, ⁸ orze' nzhab ganj:

—jGok xabal, no bikë' kwa'n ni'l!

Orze', se' mile' Per, no nzhab ganj:

—jGok kaxkem che'nal, no dikë' ticha!

⁹ Orze' nzhakë Per tich ganj, net Per chi waliy o gat walit kwa'n kizak Per; zak Per ka kicha' laxto' Per. ¹⁰ Nded bixa' tu ro' pwert, no or nded bixa' pwert rop lugar plo kikina sondad; or mizhin bixa' ro' pwert yi'b kwa'n nina le'n nez, nabe mixa'l ro'i, nguro' bixa'. Or zit la ñazë bixa', orze' mila' ganj, nab Per ña. ¹¹ Orze' une Per, walika rë kwa'n kizak Per, orze' mile' Per xigab le'n laxto' Per:

—Nal unen, walika lë' Dios mixë'l tu ganj che'n par ngoknu da, par nguro'n ya' Herodes, no lo rë kwa'n mile' men Israel xigab ngale'nu xa' da.

¹² Or milox une Per, walika rë kwa'n kizak Per, orze' ña xa' lizh Mari xna' Juan Mark, plo nzhin nayax men che'n Jesukrist, kina'b bixa' lo Dios. ¹³ Mikwe'zh Per ro' pwert, kwa'n nina le'n nez, orze' tu una' xi kwa'n lë Rode, ngwatsi' nabei choi. ¹⁴ Or mbin una' chi Per, no por tanta nizak laxto' una', nangaxalta' una'; karre miëk una', ngwayab una', lë' Per nzo ro' pwert. ¹⁵ Orze' nzhab rë men nzhin ze' lo Rode:

—jPas nzhak miyizhal!, çkwan kidi'zhal?

Per garga'l kiyab una'i, orze' nzhab bixa':

—Ka ganj che'n Pere.

¹⁶ Per stubi kikwe'zh Per ro' yo', no or mixa'l bixa' ro' yo', une bixa' walika lë' Pere, xe mia'n bixa' tuli. ¹⁷ Orze' milu' Per tu señ kun ya' Per lo bixa', par yentra' cho di'zh tuli, par nzhab Per xmod ngulo' Dios Per lizhyi'b, mbaino nzhab Per lo bixa':

—Guzh go kure' lo Jakob, no lo más rë wech be.

Orze' nguro' Per, ña xa' xtu plo.

¹⁸ Or ngwanilyuo xtu riyè'l, dox mizheb rë sondad, kichêlro' bixa' por nanet bixa' ma Per. ¹⁹ Orze' lê' Herodes mile' mandad ngwakwa'n rë sondad Per; per nangazhêlt bixa' Per. Or milox minabdi'zh Herodes lo rë sondad ma Per, orze' mile' xa' mandad, ngut rë sondad xa' nki'na ze'. Orze' nguro' Herodes yezh kwa'n ña'n lazh men Judea, par ña xa' yezh Cesarea, ze' miban xa'.

Ngut Herodes

²⁰ Herodes dox niyi' xa' nine xa' rë men yezh Tiro no rë men yezh Sidón. Rop rë yezh re', tutsa mia'n rë men re', ngwadi'zhnu bixa' tu xa' lê' Blasto, tu xa' nak tu zhi'n ro lo Herodes. Por xa' lê' Blasto re', mile' rë men yezh re' gan kwa'n nzhakla bixa', diltra' Herodes kun lê' bixa', porke lazh Herodes ñazi' bixa' kwa'n nzhao bixa'. ²¹ No or ngol ngubizh kwa'n mia'n bixa' di'zh, di'zh Herodes lo bixa', ngok Herodes lar wen kwa'n nzhak xa' or nile' xa' yalgustis, orze' nguzob xa' plo nile' xa' yalgustis; no mid'i'zh xa' kwa'n naki'n gab xa', lo rë men nzhin ze'. ²² Orze', nguzublo kibizhië rë men nzhin ze', nzhab bixa':

—¡Xa' kidi'zh re', diose, gat lê't mene!

²³ No mis orze', tu ganj che'n Dios mile' nzhakne Herodes, por nangab Herodes lo rë men: “Net go nazhon da; nab tsa lo Dios ñal widi'zh ba”; kuze' ngut xa', maska miyëz nidal xa'.

²⁴ Mbaino rë men nzhon widi'zh che'n Dios por Jesukrist, más kiyar bixa', rë plo kire'ch widi'zh che'n Dios por Jesukrist. ²⁵ No or milox ngwala' Bernabé kun Saulo dimi yezh Jerusalén kwa'n mikan bixa', orze' ña bixa' yezh Antioquia, no ñanu bixa' Juan Mark.

13

Nguzublo Bernabé kun Saulo, kè bixa' zhi'n nazhon che'n Dios

¹ Xid rë men che'n Jesukrist xa' nzho yezh Antioquia, nzho xa' nak profet, xa' kwa'n nidi'zh por Dios, no nzho xa' nak maestr; xa' kwa'n nilu' widi'zh che'n Dios lo men. Tu rë xa' re' nak Bernabé, no Simón Triyeñ, no Lus, xa' nzé yezh Cirene, mbaino xa' lê' Manaén, xa' kwa'n mixen tutsa kun gobiernador Herodes, xa' kwa'n mile' mandad lazh men Galilea, mbaino nu Saulo nzho xid rë xa' re'. ² No ngol tu ngubizh, dub kile' bixa' kult lo Dios, mbaino kina'b bixa' lo Dios dub xlats bixa', orze' nzhab Sprit che'n Dios lo bixa':

—Gulo' go Bernabé kun Saulo part, par kè bixa' zhi'n da, porke par kure' ngulen bixa'.

³ No or milox mina'b bixa' lo Dios dub nzo bixa' xlats bixa', mixo'b rë xa' re' ya' bixa' yek Bernabé no yek Saulo, orze' nzhab

bixa', le' Bernabé no Saulo, kwa'n nzhab Sprit che'n Dios ñal le' bixa'.

Kilu' Bernabé kun Saulo widi'zh che'n Dios por Jesukrist lazh men Chipre, kwa'n nzhin tsao' nitsdo'

⁴ Orze' Bernabé no Saulo nzhanu Sprit che'n Dios bixa', par yezh Seleucia kwa'n nzhin ro' nitsdo', no ze' nké bixa' bark par nzha bixa' Chipre, kwa'n nzhin tsao' nitsdo'.

⁵ No or mizhin bixa' pwert plo lê' Salamina, ze' nguzublo milu' bixa' widi'zh che'n Dios por Jesukrist, le'n rë yo' plo nitse'd rë men Israel widi'zh che'n Dios. No nu Juan Mark, nzha kun lê' bixa', par gaknu bixa'. ⁶ Orze' nguro' bixa' pwert Salamina par nkizé bixa' dub lazh men Chipre, haxta mizhin bixa' xtu yezh kwa'n lê' Pafos. Ze' mizhè'l bixa' tu men Israel xa' lê' Barjesús, tu xa' bruj kwa'n nikide men; nzhab xa' nidi'zh Dios por lê' xa', per gat walite. ⁷ Bruj re' niché'l kun gobernador Sergio Paulo, xa' nile' mandad lazh men Chipre. No dox natsin gobiernador re'. Or mbin xa', lê' Bernabé kun Saulo nikizé ze', orze' ngurezh xa' rop xa' re', por nzhakla xa' gon xa' widi'zh che'n Dios por Jesukrist. ⁸ Per Barjesús kinu xtu lê, lê xa' Elimas (widi'zh kwa'n gab bruj); gat lê't mid'i'zh xa' por widi'zh che'n Dios por Jesukrist, porke gat nzhaklat xa' yila gobiernadore. ⁹ Per Saulo, xa' nu kinu xtu lê, lê Pab; mile' Sprit che'n Dios ngwani laxto' Pab, orze' xe miwi' xa' lo bruj re', ¹⁰ nzhab Pab lo xa':

—¡Mbël goxa, kwa'n mal laxto', xin Mizhaba, kwa'n niyi' nine rë nak kwa'n wen che'n Dios! ¡Zilita' nikwa'nal mod, par tsinul rë nez nali che'n Dios! ¹¹ Nal nel kwan li'nu Diosal, lê' lol kal, nanetra'l biani che'n ngubizh tu tiemp.

Mis orze', lwega' mikal lo xa', orze' maska nzha ya' xa', kíkwa'n xa' cho zen ya' xa' par wei' xa'. ¹² Or une gobiernador kure', ngwayila xa' widi'zh che'n Dios por Jesukrist, xe mia'n xa' tuli or une xa' xmod nak widi'zh che'n Jesukrist.

Mizhin Pab kun Bernabé yezh Antioquia kwa'n ña'n lazh men Pisidia

¹³ Orze' nké Pab bark, kun más rë xa' nzha kun lê' xa'; orze' nguro' bixa' yezh Pafos kwa'n nzhin lazh men Chipre, par nded bixa' xtu lad ro' nits par nzha bixa' yezh Perge, kwa'n ña'n lazh men Panfilia. Ze' mila' Juan Mark bixa', ña Juan par yezh Jerusalén. ¹⁴ Orze' nguro' Pab kun Bernabé yezh Perge par nzha bixa' yezh Antioquia kwa'n ña'n lazh men Pisidia. Ze' mizhin bixa' tu zhé sabd, zhé kwa'n nile' men Israel diskans. Nguio bixa' plo nitse'd rë xa' re' widi'zh che'n Dios, orze' nguzob bixa'. ¹⁵ No or milox mbi'l men widi'zh kwa'n nzobni' lo ley, no lo yech kwa'n miké' rë profet, rë xa'

kwa'n midizh por Dios, orze' mixë'i' xa' nile' mandad le'n yo' ze', pla xa' kwa'n ngwayab lo Pab no lo Bernabé:

—Wech; chi kinu go tu widi'zh wen par rë men re', gak di'zh goi nal re'.

¹⁶ Orze' ngwatsuli Pab, no mile' xa' señ kun ya' xa' lo rë men nzhin ze', par gon bixa' kwan di'zh Pab, orze' nzhah Pab:

—Bin goi rë men Israel, no rë go xa' nzhon ro' Dios, ter gat lë't men Israel go: ¹⁷ Lë' Dios che'n be ngule rë xa' kwa'n ngok xuz be nzhala, mile' Dios miar dox bixa' or miban bixa' lazh men Egipto, ngok bixa' men zit lo rë xa' ze', per ngol ngubizh ngulo' Dios bixa' lazh men Egipto kun poder che'n Dios. ¹⁸ No dub cho' li'n mixek Dios nangont bixa' ro' Dios, ngok nayi' lazh bixa' or nguzhin bixa' lo yuo bizh. ¹⁹ No milo'x Dios za gazh ben men, kwa'n nguzhin lo yuo che'n men Canaán, par ndi'z Dios rë yuo che'n rë men ze', par nka' rë xa' nzhala, xa' ngok ben che'n be. ²⁰ Rë kure' midiy' como tap gayo' garol li'n. Dispwés, ngulo Dios rë xa' ngok jwes lo bixa', no haxta zhë che'n profet Samuel, une nguio jwes xid bixa'. ²¹ Orze' mina'b men Israel tu rey lo Samuel, par le' mandad lo bixa'. Kuze' mile' Dios ngok Saúl rey lo bixa'; no xuz Saúl ngurulë Kis, xa' kwa'n nzë ben che'n Benjamín; cho' li'n midiy' li'n che'n Saúl. ²² No or ngulutin Dios Saúl, orze' mile' Dios ngok Dabi rey lo bixa'. No por Dabi re' midizh Dios se': "Lë'da ngule Dabi xga'n Isaí, porke lë' Dabi tu miyi' kwa'n naban nela xmod nzhaklan, mbaino tu xa' kwa'n le' rë kwa'n gapa." ²³ No mis tu rë xa' kwa'n nzë ben che'n Dabi ngok Jesús, Me kwa'n mixë'i' Dios par che' rë kwa'n nzë'b xki men Israel lo Dios, nela xmod mila' ka Dios di'zh ga'. ²⁴ No antis di xë'i' Dios Jesús, lë' Juan midizh la widi'zh che'n Dios lo rë men Israel, nzhah Juan: "Bichë' go xmod nile' go xigab, no xmod naban go lo Dios, nale'tra' go kwa'n gat lë' lo Dios, no goklë'i' go le'n nits." ²⁵ No or mer milox la nkë Juan zhi'n nazhon che'n Dios, nzhah Juan lo rë men: "¿Cho nile' go xigab nak da? Gat lë't da nak Krist, per ticha nzë xtu xa' más tsak lon, per ni gat ñal da gak da tu mos che'n xa'."

²⁶ Orze' nzhah Pab:

—Wecha, rë go xa' nzë ben che'n Abraham, no rë go xa' nzhon ro' Dios, ter gat lë't men Israel go: Par be mixë'i' Dios widi'zh re', par che' Dios rë kwa'n nzë'b xki be lo Dios, mbaino par ban be nela xmod nzhakla Dios. ²⁷ Pwes rë men xa' nzho Jerusalén, kun rë xa' kwa'n nile' mandad lo bixa', nangalibe't bixa' cho nak Jesús, mbaino ni nangazobyekt bixa' rë widi'zh che'n rë profet kwa'n nzho'l men rë zhë kwa'n nile' men Israel diskans. Kuze', mis lë' bixa' mile' ngok rë kwa'n nzobni' la, or michi bixa' Jesús lo

rë men par ngut Jesús. ²⁸ No ter yent cho dol nzhah Jesukrist, par gat Me, per mina'b bixa' lo Pilat, rutin Jesús yizhyuo re'. ²⁹ No or ngok rë kwa'n nzobni' lo yech por Jesukrist, orze' mila bixa' kwerp che'n Me lo krus, orze' mika'ch bixa' Me. ³⁰ Per mile' Dios nguruban Jesukrist, ³¹ no nayax ngubizh, ngurulo Jesús lo rë xa' kwa'n nguzukë tich Me, or naban Me, dizde lazh men Galilea, haxta mizhin Me yezh Jerusalén. No rë xa' re' nzhudi'zh lo rë men, lë' Jesús nguruban.

³² No nal, nu no nzadnu rë widi'zh nazhon rë lo go, widi'zh kwa'n mila' Dios lo rë xuz be xa' nzhala. ³³ Rë kure' ngokla, une la be, rë be kwa'n nak ben che'n men mila' Dios di'zh re', or mile' Dios nguruban Jesús, nela xmod nzobni' ka lo Salmo kwa'n mirop kwa'n nzhah se': "Lu nak Xga'na. Malzhë re' Na mizol, par nakal Xa' nile' mandad lo rëi." ³⁴ No más plo midizh Dios nzobni', lë' Dios le' ruban Jesukrist, mbaino nzhah Dios nayotra' gat Jesukrist xtu wëlt, no ni nayëb kwerp che'n Me le'n ba', porke se' nzhah Dios: "Lë'da le rë kwa'n milan di'zh lo Dabi, rë kwa'n wali no rë kwa'n nazhon", ³⁵ nela xmod nzob ska xtu plo lo Salmos, kwa'n nzhah: "Nala'tal yëb kwerp che'n Me Nazhon che'nal", ³⁶ porke walika lë' Dabi, dispwés di mile' Dabi zhi'n nazhon che'n Dios xid rë men tiemp che'n xa', nela xmod mile' Dios mandad, orze' ngut xa', ña xa' plo nzho rë xuz xa', no miëb kwerp che'n xa'. ³⁷ Per lë' kwerp che'n Me kwa'n mile' Dios nguruban, nangayot ngayëbe. ³⁸ No rë go wech, nal naki'n ne go, kidi'zh no lo go: Por Jesukrist nizhe' rë kwa'n nzë'b xki men lo Dios, rë men kwa'n ñila Jesukrist. ³⁹ Gat lë'ta' por gon men ley kwa'n mila' Dios lo Muisés nizhe' rë kwa'n nzë'b men lo Dios, sino ke nab tsa por ñila men Jesukriste. ⁴⁰ Biwi' gox, par nazakt go, rë kwa'n midizh rë profet, rë xa' kwa'n midizh por Dios or nzhah bixa':

⁴¹ Biwi' rë gox kwa'n nixizhnu Da. Per ni nagakra' di'zh go di zhe'b, lë' go ya'n xe, haxta lox go tuli, porke rë ngubizh che'n go, lë' Da le tu zhi'n nazhon, mbaino ter za' men kwente lo go, per nayot yila goi.

⁴² No or nguro' Pab kun Bernabé le'n yo' ze', nzhah men lo bixa':

—Sabd xtu sman, nzhakla no di'zh go kure' lo no xtu wëlt.

⁴³ No or milox nguzhin xa' le'n yo' ze', nayax rë men Israel no nayax rë men xa' gat lë't men Israel per nzhon bixa' ley kwa'n mila' Dios lo Muisés, orze' ngwayila bixa' widi'zh che'n Dios por Jesukrist, nzhakë bixa' tich Pab no tich Bernabé. Orze' nzhah Pab kun Bernabé lo bixa':

—Naya'lt laxto' go xmod ngurezh Dios go, por nazhi' Dios go.

⁴⁴ Or ngol zhë Sabd ze', zhë kwa'n nile' men Israel diskans, nila' dub yezh ze' nguzhin par mbin bixa' widi'zh che'n Dios por Jesukrist. ⁴⁵ Per or une rê men Israel xa' nak zhi'n, lê' dox men miza, orze' dox niyi'xian bixa', no nakap mid'i'zh bixa' tich kwa'n nidi'zh Pab, no unde bixa' Pab, ⁴⁶ per yent kwan ngazheb Pab kun Bernabé, sino ke nzhab bixa':

—Galo laka lo go, naki'n di'zh no widi'zh che'n Dios por Jesukrist, porke go men Israel. Per nal, mis go nzhap dol, porke mis go nile' naya', ban go bid kwa'n niza' Dios par dubta'. Per nal nzho ra' xa' nzhaklai, kuze' lê' no yalu' widi'zh che'n Dios lo xtu ben men, xa' gat lê't men Israel, ⁴⁷ porke se' mile' Dios mandad no, Dios Me kwa'n naban par dubta', ne Me:

Lê'l xêla* rê plo kwa'n nzhin men dub yizhyuo,
par gakat nela tu biani ga' lo xtu ben men zit,

par ro' bixa' lo kwa'n nzë'b xki bixa' lo Dios.

⁴⁸ Or mbin rê men zit kure', dox nizak laxto' bixa', orze' nzhab bixa': "Dox nazhon widi'zh che'n Dios"; no ngwayila rê mene, xa' kwa'n ngule la Dios, par ban bid kwa'n niza' Dios par dubta'. ⁴⁹ Se' ngok mire'ch widi'zh che'n Dios por Jesukrist rê yezh kwa'n nzhin naka'n ze', ⁵⁰ per rê men Israel xa' nak zhi'n kwa'n nzho yezh ze', miki'l bixa' rê una' kwa'n más nzhon ley che'n Muisés, rê una' xa' más tsak yezh ze', no kun rê miyi' kwa'n nile' mandad yezh ze'. Se' mile' rê men Israel yezh ze', par tutsa mia'n bixa' di'zh, orze' nguruké bixa' tich Pab no tich Bernabé yezh ze', no par nayara' Pab kun Bernabé rê yezh kwa'n nzhin naka'n ze'. ⁵¹ Orze' lê' Pab kun Bernabé, nguzhib bixa' ni' bixa', nela tu se'n ga', par ne rê men Israel ze', lê' bixa' mile' naya' lo Dios. Orze' nguro' bixa' ze', Pab kun Bernabé, par ña bixa' yezh Iconio. ⁵² No rê men che'n Jesukrist kwa'n nzho yezh Antioquia ze', dox nizak laxto' bixa', no dox nzho Sprit che'n Dios laxto' bixa'.

14

Nguio Pab kun Bernabé yezh Iconio

¹ No or mizhin Pab kun Bernabé yezh Iconio, nguio bixa' le'n yo' plo nitse'd men Israel widi'zh che'n Dios, no milu' bixa' widi'zh che'n Dios por Jesukrist lo rê men nzhin ze'. No ze' nayax bixa' ngwayila widi'zh che'n Dios por Jesukrist, no xid rê xa' re' nzho men Israel, no dox nayax xa' gat lê't men Israel. ² Per rê men Israel xa' gat ñilat widi'zh che'n Dios por Jesukrist, miki'l bixa' rê men xa' gat lê't men Israel,

par le' bixa' nakap lo rê men che'n Jesukrist. ³ Kuze', mia'n Pab kun Bernabé yezh ze' tu tiemp xche, yent kwan ngazheb bixa', milu' bixa' widi'zh che'n Dios por Jesukrist lo rê men yezh ze'. Por rê se'n nazhon kwa'n mile' Dios ya' Pab no ya' Bernabé, rê kwa'n mile' mia'n men xe tuli, milu' Dios walika nazhon rê widi'zh che'n Dios kwa'n nilu' Pab no Bernabé.

⁴ Per rê men yezh ze', chop ngok bixa'. Garol bixa' ño man che'n rê men Israel, rê xa' gat ñilat widi'zh che'n Dios por Jesukrist; no zigarol bixa' ño man che'n rop apost che'n Jesukrist, Pab no Bernabé. ⁵ Orze' tutsa mia'n rê men Israel kun zipla men gat lê't men Israel, mbaino kun rê xa' nak zhi'n yezh ze', ngokla bixa' ngazakzi bixa' Pab kun Bernabé, mbaino ngagoke bixa' rop xa' re'. ⁶ Per or mbin Pab kun Bernabé kure', orze' miké' bixa' karre, ña bixa' par yezh Lистра, no yezh Derbe, kun más rê yezh kwa'n nzhin naka'n ze'; no rê yezh re', yezh Licaonia nile' mandade. ⁷ No le'n rê yezh re', milu' bixa' rê widi'zh nazhon che'n Dios kwa'n nile', gax ga' ñë'd laxto' men. ⁸ No le'n yezh kwa'n lê Lистра ze', nzho tu miyi' kwa'n nagakt zë dizde or ngol xa'. ⁹ Xa' re' nzob kiyon widi'zh kwa'n kidi'zh Pab, no or miwi' Pab xe lo miyi' re', ngwanu laxto' Pab, lê' miyi' re' ñila widi'zh che'n Dios, no haxta par liwen Dios xa', ñila xa'. ¹⁰ Orze', naye nzhab Pab lo xa':

—¡Watsuli, nali bizo ni'!

Orze' ngwatsuli xa' haxta ngwats xa', no nguzë xa'. ¹¹ No or une rê men yezh Licaonia, xa' nzhin ze', se' kwa'n mile' Pab, nguzublo kibizhië rê men, kun widi'zh kwa'n nidi'zh men Licaonia nzhab bixa':

—¡Lê' rê dios ngulali lo be nela men ga'!

¹² No ngulo'lê bixa' Bernabé, dios Júpiter; no lê' Pab ngulo'lê bixa', dios Mercurio, porke nab tsa Pab kidi'zh lo bixa'. ¹³ No ngulëi' kwa'n nile' rê zhi'n le'n yado' che'n Júpiter, kwa'n nzob ro' yezh ze', nzhanu xa' ngo'n no kun biga' kwa'n nak nela ye' ga', tutsa junt kun rê men yezh, par za' bixa' gon lo Pab no lo Bernabé. ¹⁴ Per or une Bernabé kun Pab kure', michëzla bixa' xab bixa', orze' nguzë'b bixa' xid men, no naye nzhab bixa':

¹⁵ —¡Lê' go! ¿Chon kile' go kure' kun no?, porke, jno men nela go ka! Nabtsa nzë no namás par nzadi'zh no widi'zh nazhon por Jesukrist, par la' go rê kwa'n nazu't re', no yila go Dios, Me kinu yalnaban par dubta', Dios kwa'n mizuxkwa' yibë' no yizhyuo, no nitsdo', no rê kwa'n nzhin loi. ¹⁶ Dios galo mila', mile' rê men nzhalá, rê xa' gat lê't men Israel, rê kwa'n nzhakla bixa'. ¹⁷ No ter sa' ngok bixa', per nangayot ngala' Dios, ngale'

* 13:47 Widi'zh re' nzobni' lo capítulo 49, versículo 6, lo yech kwa'n miké' Isaías, tu xa' kwa'n mid'i'zh por Dios nzhalá.

Dios rë kwa'n wen, par ne be, xmod nak Dios. Dios nila yiu par nzhak rë kwa'n, par ño nayax kwa'n nzhao men, no par nızak laxto' men.

¹⁸ No ter se' midizh Pab kun Bernabé lo rë men ze', per pe'n mile' bixa' gan, par nangut rë men ze' ngo'n como tu gon ga' lo Pab no lo Bernabé.

¹⁹ Lê'chi mis orze' mizhin pla men Israel kwa'n nzë yezh Antioquia, mbaino yezh Iconio. Miki'l bixa' rë men xa' ngokla ngaza' gon ze', par ngulo ke bixa' Pab, no mizubxax bixa' Pab haxta ro' yezh. Mile' bixa' xigab, ya ngut la Pab. ²⁰ Per or miza rë men che'n Jesukrist naka'n plo na' xbi Pab, lwegga' ngwaxche xa', no miëk xa' yezh ze' xtu wëlt. No or ngwanilyuo, nguro' Pab ze', kun Bernabé, par ña bixa' yezh Derbe.

Ña Pab kun Bernabé yezh Antioquia kwa'n ña'n lazh men Siria

²¹ No or milox milu' bixa' widizh nazhon che'n Dios por Jesukrist lo rë men yezh Derbe, nayax rë men ze' ngwayila widizh wen re'. Orze' miëk Pab kun Bernabé xtu wëlt par yezh Lистра, yezh Iconio, mbaino kun yezh Antioquia kwa'n ña'n lazh men Pisidia, ²² par midizhnu Pab kun Bernabé rë men che'n Jesukrist kwa'n nzho rë yezh ze', par más ngop bixa' jwers lo widizh che'n Dios por Jesukrist, par nala' bixa' Dios. No nzhab Pab kun Bernabé lo bixa':

—Naki'n zo be wen lo widizh che'n Dios kwa'n ñila be, ter dox zakzi be, par gal be rë kwa'n wen kwa'n kinu Dios par be.

²³ Mbaino nu ngule Pab kun Bernabé, pla rë men par gak zhi'n xid rë men che'n Jesukrist kwa'n nzho kad yezh ze'. No or midizh Pab kun Bernabé xlats bixa' lo Dios, orze' ngulo bixa' rë xa' ze' ya' Dios, Dios kwa'n ngwayila bixa'.

Miëk Pab kun Bernabé yezh Antioquia kwa'n ña'n lazh men Siria

²⁴ Or nded Pab kun Bernabé lazh men Pisidia, orze' mizhin bixa' rë yezh kwa'n ña'n lazh men Panfilia. ²⁵ No or milox midizh Pab kun Bernabé widizh che'n Dios por Jesukrist lo rë men yezh Perge, orze' nzha bixa' yezh Atalia. ²⁶ Or mizhin bixa', ze' nkë bixa' bark par ña bixa' yezh Antioquia kwa'n ña'n lazh men Siria, plo kwa'n guna'b rë men che'n Jesukrist lo Dios, par kë Pab kun Bernabé zhi'n nazhon che'n Dios, no nal, zhi'n re' mile' la bixa'.

²⁷ No or mizhin bixa' yezh Antioquia kwa'n ña'n lazh men Siria, mikan bixa' rë men che'n Jesukrist kwa'n nzho yezh ze', par midizh bixa' kwan pa' mile' Dios kun lê' bixa', no xmod mile' Dios, nayax xa' gat lê't men Israel ngwayila widizh che'n Dios por Jesukrist. ²⁸ No yezh ze', xche mia'n Pab kun

Bernabé, lo rë men che'n Jesukrist kwa'n nzho ze'.

15

Migan rë apost yezh Jerusalén

¹ Le'n rë ngubizh ze', mizhin pla miyi' kwa'n nzë lazh men Judea, mizhin bixa' yezh Antioquia kwa'n ña'n lazh men Siria, kilu' bixa' lo rë men che'n Jesukrist xa' nzho ze', nzhab rë miyi' re':

—Chi lê' kwerp che'n rë miyi' nakë señ kwa'n lê circuncisión nela xmod nzobni' lo ley kwa'n mila' Dios lo Muisés, nazubchit Dios rë kwa'n nzë'b xki go lo Dios.

² Or mbin Pab kun Bernabé kure', dox michëlo' bixa' kun rë miyi' ze'. Orze' mizo rë men che'n Jesukrist Pab kun Bernabé, no kun zipla men, par ya bixa' yezh Jerusalén, yadizh bixa' kure' lo rë apost no lo rë xa' nzo lo rë men che'n Jesukrist, xa' nzho yezh Jerusalén. ³ No dub nzha bixa' nez kun más rë men che'n Jesukrist, nded bixa' rë yezh kwa'n ña'n lazh men Fenicia no rë yezh kwa'n ña'n lazh men Samaria, no dub rë ze' midizh bixa' lo rë men che'n Jesukrist, nzhab bixa':

—Nu nayax men gat lê't men Israel, mila' bixa' rë kwa'n nazu't, rë kwa'n ñila bixa', par ngwayila bixa' widizh che'n Dios por Jesukrist.

Orze' dox nizak laxto' rë men che'n Jesukrist mbin kure'. ⁴ No or mizhin Pab kun Bernabé yezh Jerusalén, orze' rë apost kun rë xa' nzo lo rë men che'n Jesukrist, kun más rë men che'n Jesukrist xa' nzhin ze'; dox wen miwi' bixa' lo rë xa' re', orze' miza' Pab kwent kun Bernabé, rë kwa'n mile' Dios por lê' bixa'. ⁵ Per ngwatsuli pla men fariseo kwa'n ñila widizh che'n Dios por Jesukrist, par nzhab bixa' lo rë nak xa' nzhin ze':

—Naki'n kë señ kwa'n lê circuncisión kwerp che'n rë men che'n Jesukrist, rë xa' kwa'n gat lê't men Israel, xa' miyi', mbaino rë men che'n Jesukrist naki'n le' rë kwa'n nzobni' lo ley kwa'n mila' Dios lo Muisés.

⁶ Orze' migan rë apost kun rë xa' nzo lo rë men che'n Jesukrist, par le' bixa' xigab xmod gak rë kure'. ⁷ No guzhël-la di michëlo' bixa' por kure', lê'chi ngwatsuli Per, nzhab Per lo rë men ze':

—Biwi' go wech, lê' go nane, dizde nzhala ngule Dios da xid go, par lun widizh nazhon che'n Dios por Jesukrist lo rë men xa' gat lê't men Israel, par nu bixa' yilai. ⁸ Lê' Dios, Me nilibe' laxto' rë men, lê' Me milu' ke nu bixa' niwi' Dios wen lo, niza' Dios Sprit che'n Dios yo laxto' bixa', nela xmod mine' Dios Sprit che'n Dios nguio laxto' be. ⁹ Tutsa mod nile' Dios kun be, no kun rë men xa' gat lê't men Israel, porke nitsumbe Dios laxto' rë men, xa' ñila widizh che'n Dios por Jesukrist. ¹⁰ No nal, çchon kikixian go Dios? çChon kile'

go, par le' rë men che'n Jesukrist rë kwa'n nzobni' ley, kwa'n mila' Dios lo Muisés, no per ni rë xuz be xa' tiemp nangakt ngale'i; mbaino ni be? ¹¹ Per be, men Israel, ñila be, namás por wen laxto' Señor Jesukrist, mizubchi Me rë kwa'n nzë'b xki be lo Dios. Se'ska nile' Dios kun rë men, xa' gat lë't men Israel, chi lë' bixa' yila Jesukrist.

¹² No or midizh Per kure', xe nguzhin men, mbin bixa'i. Orze' midizh Bernabé kun Pab xmod mile' Dios rë kwa'n nazhon no rë kwa'n mile' ña'n xe men. Mile' Diose xid rë men gat lë't men Israel por Pab no por Bernabé. ¹³ No or milox midizh bixa' kure', orze' nzhab Jakob:

—Wech, bin go rë kwa'n ganin. ¹⁴ Midizh Simón Per lo be, xmod dizde galo miwi' Dios lo xtu ben xa' gat lë't men Israel, par ngule Me cho gak men che'n Me xid rë xa' re', ¹⁵ nela xa mizobni' ka rë profet, rë xa' midizh por Dios, or mizobni' bixa' kure':

¹⁶ Na nak Dios che'n go, Me nile' mandad go, lë'da yal xtu wëlt, par zon tu xa' kwa'n nzë ben che'n rey Dabi, par le' mandad lo go.

¹⁷ Or zhin zhë, gak rë kure', lë' xtu ben men zit zubi Lon, xa' kwa'n kwezha par gak men Da.

¹⁸ Na nak Dios che'n go, Me nile' mandad go, no dizde nzhalá, milan di'zh kure'.

¹⁹ No nzhab Jakob:

—Kuze', nilen xigab: Nale't be zi rë men ba' gat lë', rë xa' gat lë't men Israel, rë xa' ñila Dios. ²⁰ Neka xë'l be tu yech lo bixa', par nagao bixa' rë kwa'n nixo'b lo gaim. No gat ñalt ka' bixa' men gat lë't tsa' bixa', no ni nagao bixa' rë ma ngut nab, nangaxot ren, mbaino ni nagao bixa' ren; ²¹ porke dizde nzhalá, rë yezh, le'n rë yo' plo nitse'd rë men Israel widizh che'n Dios, nilu' men ley kwa'n mila' Dios lo Muisés, rë zhë kwa'n nile' men Israel diskans.

²² No widizh re', nguio laxto' rë apost, no rë xa' nzo lo rë men che'n Jesukrist, kun más rë men che'n Jesukrist kwa'n nzhin ze'. Orze' ngule bixa' Judas Barsabás, kun Silas, par wei' rë xa' re', Pab kun Bernabé, par yezh Antioquia. No Judas kun Silas, dox menaye rë xa' re', xid rë men che'n Jesukrist, xa' nzho yezh Jerusalén. ²³ No mixë'l rë xa' nzo lo rë men che'n Jesukrist, rë xa' nzho yezh Jerusalén, tu yech wei' Pab no Bernabé; se' nzobni' loi:

“No xa' nak rë apost, no kun rë wech be xa' nak zhi'n, no kun más rë wech be; mixë'l no tu widizh wen par rë go, wech, xa' gat lë't men Israel, xa' nzho yezh Antioquia; no par rë go, xa' nzho lazh men Siria, mbaino par rë go, xa' nzho lazh men Cilicia. Ne no lo rë go bizak laxto' go. ²⁴ Mbin no, nguro' pla bixa' lare', mbaino gat lë't no mixë'l bixa' lo go, mikixian bixa' go por

kwa'n ne bixa'. Milu' bixa' lo go, niki'n kë señ kwa'n lë circuncisión kwerp che'n go, nela xa nzobni' ka lo ley kwa'n mila' Dios lo Muisés, mbaino ne bixa', le' go rë kwa'n nzhab ley ze'. ²⁵ Kuze', mia'n no tutsa, ngule no pla xa' mile' kumpañ rop wech nazhi' be re', Bernabé no Pab, par nzë bixa' lo go, ²⁶ porke rop miyi' re', gat nizhebt gat por Señor Jesukrist. ²⁷ Kuze', mixë'l no Judas kun Silas, par ne yub bixa'i lo go, ²⁸ porke lë' Sprit che'n Dios milu' lo no, gat ñalt ne no, le' go rë kwa'n nzobni' lo ley kwa'n mila' Dios lo Muisés. Nabtsa kure' bin go no bile' go: ²⁹ Nagao go rë bë'l che'n rë ma kwa'n nzhat plo nile' men lani che'n winab, mbaino ni nagao go rë ma kwa'n nzhat nab, gat nigo't ren; no ni nagao go ren, no naka't go xa' gat lë't tsa' go. Chi lë' go lë' rë kure', dox wen le' go. Rëtsa kure' ne no le' go. Mbaino ne no, bizak laxto' go.”

³⁰ Or milox nzhab bixa' kure', orze' mixë'l rë men che'n Jesukrist Judas kun Silas, par le' bixa' kumpañ Pab kun Bernabé yezh Antioquia. Or mizhin bixa' ze', mikan bixa' rë men che'n Jesukrist kwa'n nzho yezh ze', par miza' bixa' yech ze', kwa'n mixë'l rë apost xa' nzho yezh Jerusalén. ³¹ Or mbi'l rë xa' re'i, dox nizak laxto' bixa', porke dox wen widizh kwa'n nzobni' lo yech re'. ³² No como lë' Judas kun Silas nak bixa' profet, xa' kwa'n nidi'zh por Dios, xche midizh bixa' par miza' bixa' konsej rë men che'n Jesukrist, par más ngop bixa' jwers lo widizh che'n Dios por Jesukrist. ³³ Orze' mia'n bixa' tu tiemp yezh Antioquia ze'. No or nguubre bixa' par yezh Jerusalén, orze' rë men che'n Jesukrist kwa'n nzho yezh Antioquia ze', nzhab bixa': “Bizë go kun Dios.” ³⁴ Per lë' Silas mile' xigab ya'n xa' yezh Antioquia. ³⁵ Nu Pab kun Bernabé mia'n bixa' yezh Antioquia ze', par milu' bixa' widizh che'n Dios por Jesukrist lo rë men nzho ze'.

Pab no Bernabé milë' bixa'

³⁶ No or nded pla ngubizh, nzhab Pab lo Bernabé:

—Cha' nzhatsi' be ma rë wech be, rë yezh plo midizh be widizh che'n Dios, par ne be xmod nzhin bixa' ze'.

³⁷ No lë' Bernabé ngokla ngwei' Juan Mark par ngale' kumpañ bixa', ³⁸ per net Pab nga xa' re', porke mila' nzë'b xa' re' Pab kun Bernabé or nzo bixa' lazh men Panfilia, nangaknut Juan Mark, ngakë bixa' zhi'n nazhon che'n Dios ze'. ³⁹ Dox michë'lo' bixa' por kure', haxta mile'i milë' bixa'. Lë' Bernabé nzhanu Juan Mark, nguzen bixa' bark par nzha bixa' lazh men Chipre, ⁴⁰ no lë' Pab ngule Silas, par le' kumpañ xa', orze' rë men che'n Jesukrist guna'b lo Dios por rop xa' re', par gaknu Dios bixa', orze' nzha bixa'. ⁴¹ Orze' nded bixa' rë yezh che'n

men Siria, kun rë yezh che'n men Cilicia, par miza' rop xa' re' konsej rë men che'n Jesukrist xa' nzho kad yezh ze', par ngop rë xa' ze' más jwers lo che'n Dios.

16

Timoteo mile' kumpañ Pab mbaino Silas

¹ Orze' mizhin Pab kun Silas yezh Derbe, no yezh Listra. Ze' mizhë'l bixa' tu men che'n Jesukrist lë Timoteo, xga'n tu una' kwa'n nak men Israel, tu men che'n Jesukrist, per xuz Timoteo nak tu xa' grieg. ² Rë men che'n Jesukrist kwa'n nzho yezh Listra kun yezh Iconio ze', wen midì'zh bixa' por Timoteo. ³ Mile' Pab xigab wei' xa' Timoteo, per galo laka miké' Pab señ kwerp che'n Timoteo, kwa'n niké rë men Israel, par yent kwan di'zh rë men Israel kwa'n nzho ze', porke rë bixa' nane, lë' xuz Timoteo nak tu xa' grieg. ⁴ No or mizhin bixa' kad yezh plo nded bixa', mbi'l bixa' yech lo rë men che'n Jesukrist kwa'n nzho rë ze', yech kwa'n mizuxkwa' rë apost yezh Jerusalén, kun rë xa' nzo lo rë men che'n Jesukrist, par le' rë men che'n Jesukrist rë kwa'n nzobni' loi, rë plo. ⁵ Se' mile' Pab par miro'b bixa' lo rë kwa'n nak che'n Dios, no zilita' niza más nayax men xa' ñila widi'zh che'n Dios por Jesukrist.

Milu' Dios le'n mika'l tu men Macedonia lo Pab

⁶ No nangaziyëlt Sprit che'n Dios ngalu' bixa' widi'zh che'n Dios rë yezh kwa'n ña'n lazh men Frigia, no rë yezh kwa'n ña'n lazh men Galacia mbaino lazh men Asia. ⁷ No or mizhin bixa' gax plo nak lazh men Misia, no mile' bixa' xigab, nga bixa' rë yezh kwa'n ña'n lazh men Bitinia, per nangaziyëlt Sprit che'n Dios nga bixa'. ⁸ Kuze' ndedka'n bixa' namás lazh men Misia, par mizhin bixa' yezh Troas. ⁹ Ze' une Pab le'n mika'l, tu miyi' yezh Macedonia, nzuli xa', dox kina'b xa' lo Pab, nzhab xa': "Guded par lazh men Macedonia re' par gaknul no." ¹⁰ Riyë'l xtu ngubizh or une Pab kure', lwega' nzha no par lazh men Macedonia, porke nane ka no, lë' Dios ngurezh no ba', par yayab no widi'zh che'n Dios por Jesukrist rë men ze'.

Nzho Pab lizhyi'b kun Silas yezh Filipos

¹¹ Nké no bark yezh Troas ze', par nzha no nali laka tu yezh kwa'n lë Samotracia, kwa'n nzhin tsao' nitsdo', no xtu riyë'l, mizhin no yezh Neápolis. ¹² No ze' ngwa no par yezh Filipos, tu yezh kwa'n más kwa'ro, kwa'n nzhin lazh men Macedonia, mbaino men Roma michao'we. No pla ra' ngubizh mia'n no ze'. ¹³ No tu zhë Sabd kwa'n nile' men diskans, nguro' no ro' yezh ze' par ngwa no ro' tu you' plo nina'b xa' lo Dios. Ze' nguzob no par midì'zh no lo pla una'

kwa'n nzhin ze'. ¹⁴ Xid rë una' re' nzho tu una' kwa'n lë Lidia, xa' nzë yezh Tiatura, tu una' xa' nito lar morad kwa'n tsak dox. Una' re' nzhon ro' Dios. No mixa'l Dios laxto' una', mizob yek una' kwa'n midì'zh Pab por Jesukrist. ¹⁵ Orze' ngoklëi' una' kun rë xa' lizh una', mbaino mina'b una' lo no, ne una':

—Chi walika nigobe' go nak da tu men che'n Jesukrist, cha' go ña be lizha par ya'n go.

No mile' una' mia'n no lizh una'. ¹⁶ No tu wëlt, dub nzha no plo nina'b men lo Dios, lë'chi zhi'n mile' tu una' nile' divín, mbi'dchël-lo una' no. Una' re' por poder che'n Mizhab, nile' xa' kure', no dox nile' xa' gan dimi, por rë xa' nak xa' mos lo. ¹⁷ Orze' nzadké una' re' tich no plo nzha no kun Pab, mbaino tich no, naye kibizhië una' lo men, nzhab una':

—jLë' rë miyi' re' nak rë men che'n Dios, Me kwa'n nile' mandad dub yizhyuo, no nilu' rë miyi' re' xmod nigo' Dios men lo rë kwa'n nzë'b xki men!

¹⁸ No nayax ngubizh mile' una' kure', haxta ke miyi'xian Pab por kure', orze' miëk Pab nzhab Pab lo mbi mal kwa'n nzho laxto' una' re':

—jPor lë Jesukrist kilen mandad, guro' laxto' una' re'!

No mis orze', lwega' nguro' mbi ze'. ¹⁹ Per or une rë xa' kwa'n nile' mandad una' re', nagakra' le' bixa' gan dimi por lë' una', porke ngulëz nile' una' divín, orze' nguzen bixa' Pab kun Silas, mizubxax bixa' rë xa' re' haxta plo nak xbi', par ngwala' bixa' Pab kun Silas lo gustis. ²⁰ No or michi bixa' Pab kun Silas lo gustis, orze' nzhab bixa':

—Lë' rë miyi' re', xa' nak men Israel, dox kichëldil bixa' men lazh be, ²¹ kidi'zh bixa' le' rë men lazh be xtu rë kostumbr kwa'n gat ñalt le' be, porke lë' be men Roma.

²² Orze' rë men niyi' lo Pab no lo Silas. Orze' jwers ngulo' rë gustis xab Pab no xab Silas, orze' mile' bixa' mandad ngurële tich rë xa' re'. ²³ No dispwëd di ngurële tich bixa', orze' ngulo bixa' rop xa' re' lizhyi'b, no nzhab rë gustis lo xa' nikina lizhyi'b: "jNaye bitsao'yo' go rop xa' re'!" ²⁴ Or mbin xa' nikina lizhyi'b kure'; ngwala' xa' Pab kun Silas más al xan, orze' ngulo xa' ni' Pab no ni' Silas le'n tu ya nzob ye'r. ²⁵ No pas como garol yë'l, kina'b Pab kun Silas lo Dios, no kike' bixa' kant por tanta nazhon Dios, no nu más rë xa' nzho lizhyi'b ze' kiyone. ²⁶ Lë'chi dox tu xo ro miwin, no dub lizhyi'b nguzhibe, haxta rë simient che'ne. Orze' lwega' mixa'l rë pwert, no rë kaden kwa'n nali'b rë men xa' nzho lizhyi'b, mixëk. ²⁷ No or nguro' mika'l lo xa' nikina lizhyi'b re', une xa' naxa'l rë nak pwert ro' lizhyi'b, orze' ngulo' xa' spad che'n xa' par gut yub xa' xa', porke mile' xa' xigab: "Rë nak rë xa' re',

miké' karre." ²⁸ Orze' naye midizh Pab lo xa', nzhab Pab:

—¡Nale'tal ni tu kwa'n gat lé', porke ré no nzhin ka re'!

²⁹ Orze' guna'b xa' nikina lizhyi'b re' tu biani, orze' karre nguio xa', no dub nixiz xa' di yalze'b, nguzuxib xa' lo Pab no lo Silas, ³⁰ orze' ngulo' xa' Pab kun Silas, no nzhab xa':

—Lé'o, ¿kwan naki'n len par che' Dios ré kwa'n nzé'bxkin lo Dios?

³¹ Orze' nzhab Pab kun Silas:

—Wayila Señor Jesukrist, par che' Dios ré kwa'n nzé'b xkil, no ré kwa'n nzé'b xki ré xa' lizhal lo Dios.

³² Orze' milu' bixa' widizh che'n Dios por Jesukrist lo xa' nikina lizhyi'b re', mbaino lo ré xa' lizh xa'. ³³ No mis yé'l ze', mbiy' xa' nikina lizhyi'b re', Pab kun Silas, par mizét xa' plo miwe' ré xa' re', orze' ngokléi' xa' nikina lizhyi'b re', kun ré xa' lizh xa'.

³⁴ Orze' mbiy' xa' Pab kun Silas al lizh xa', no miza' xa' kwa'n ndao ré xa' re'. No dox nizak laxto' xa' kun ré xa' lizh xa', por ngwayila bixa' Dios. ³⁵ Xtu riyé'l, mixé'l ré gustis pla xpen xa', lo xa' nikina lizhyi'b ze', par liya' xa' Pab kun Silas, ³⁶ orze' nzhab xa' nikina lizhyi'b re' lo Pab no lo Silas:

—Lé' ré gustis, mixé'l pla xpen bixa' lon, par liyan go, nal gak bi go, yentra' kwan nak kun go.

³⁷ Per nzhab Pab lo ré xpen gustis:

—No nak men Roma, porke ñal ngawi' bixa' chi walika kinu no dol, lé'la michél bixa'i tich no lo ré men, nguio xa' no lizhyi'b. No nal, ¿ko' xa' no xla'n nzhakla xa'? Per nagakte. Mejor yi'd yub bixa', par liya' bixa' no.

³⁸ No or mbin ré gustis kure', lé' Pab no lé' Silas men Roma, orze' dox mizheb bixa'. ³⁹ Orze' ngwa ré gustis lo Pab no lo Silas, par ngwatsiyal bixa' laxto' ré xa' re', orze' miliya' bixa' Pab no Silas, no nzhab ré gustis: "Bizé go, no guro' go yezh re'."

⁴⁰ No or nguro' bixa' lizhyi'b, ña bixa' lizh Lidia. No ré men che'n Jesukrist kwa'n nzhin ze', midizhnu Pab bixa' kun Silas, par más mixubla bixa' Dios. Orze' nka' Pab nez, ña xa' kun Silas xtu plo.

17

Miyi'xian men Tesalónica

¹ No or nded Pab kun Silas yezh Anfípolis kun yezh Apolonia, orze' mizhin bixa' yezh Tesalónica. Le'n yezh ze' nzob tu yo' plo nitse'd men Israel widizh che'n Dios. ² No ngwa Pab le'n yo' ze' nela xmod nile' ka xa', chon sabd ngwa xa' gazob sman, no michéro' xa' por widizh che'n Dios kun ré xa' nibin ze'. ³ No milu' Pab lo ré men ze', nzhab xa' lé' Jesukrist naki'n zakzi, mbaino

gat, per ngubizh yon, lé' Jesukrist ruban, porke se' nzobni' lo Yech che'n Dios. No nzhab Pab lo ré men ze':

—Jesús Me kidizha lo go re', nak Krist Me mixé'l Dios.

⁴ No pla ra' xa' re' ngwayilai, no nguio bixa' xlad Pab kun Silas. No nu tu béd men grieg kwa'n nzhon ro' Dios, no kun pla ra' una' kwa'n tsak yezh ze', nu bixa' nguzhin kun Pab no kun Silas. ⁵ Per ré men Israel kwa'n gat ñilat widizh che'n Dios por Jesukrist, dox niyi'xian bixa', nine bixa' Pab kun Silas, orze' mikan bixa' pla ré xa' minu la xmod nak, par chéldil bixa' Pab kun ré men yezh ze'. Orze' jwers nguio bixa' lizh tu xa' lé' Jasón, ngwakwa'n bixa' Pab kun Silas, par chi bixa' rop ré xa' re' lo ré men yezh ze' par zakzi men ré xa' re'. ⁶ No por nangaga' Pab kun Silas ya' bixa', orze' mizubxax bixa' Jasón kun zipla ré men che'n Jesukrist kwa'n nzho ze', par michi bixa' ré xa' re' lo gustis kwa'n nile' mandad yezh ze', orze' naye kibizhié bixa', nzhab bixa':

—¡Lé' ré miyi' re' kwa'n nikizé ré plo, kile' bixa' par nagon men ro' gubier! ¡No nal, nu lazhe b kile' bixa'! ⁷ No Jasón ngurezh bixa' lizh Jasón. ¡Ré xa' re' kichil ley che'n César, porke kidi'zh bixa' nzho xtu rey xa' lé' Jesús!

⁸ Or mbin ré men widizh re' kun ré gustis xa' nzhin ze', dox gat lét' mizi men, mizheb bixa'. ⁹ Orze' mile' ré gustis ndix Jasón tu mult, kun ré xa' niché'l xa', par ngok ña bixa'.

Pab kun Silas mizhin yezh Berea

¹⁰ Lwega', or yé'l ze', ré men che'n Jesukrist kwa'n nzho yezh ze', mixé'l bixa' Pab kun Silas, par yezh Berea lo mis orze'. No or mizhin Pab kun Silas yezh ze', nguio bixa' le'n yo' plo nitse'd ré men Israel widizh che'n Dios. ¹¹ No ré men Israel kwa'n nzho yezh ze', más naxa'l yek bixa', ke ré men Tesalónica. Dub la bixa' nzhon bixa' widizh che'n Dios kwa'n nilu' Pab, no zilita' nzho'l bixa' kwa'n nzobni' lo Yech che'n Dios, par ne bixa' chi walika nzobni' kwa'n nidi'zh Pab. ¹² Kuzé', nayax bixa' ngwayilai, no nayax ré una' grieg xa' tsak, no nu tu béd miyi' ngwayilai. ¹³ Per or mbin ré men Israel kwa'n nzho yezh Tesalónica, lé' Pab kun Silas kilu' widizh che'n Dios por Jesukrist yezh Berea, orze' lwega' micheb bixa' ré men yezh ze'. ¹⁴ Per ré men che'n Jesukrist xa' nzho ze', lwega' mixé'l bixa' Pab, par ro' nitsdo', no lé' Silas kun Timoteo, mia'n bixa' ze'. ¹⁵ No ré men xa' nkina Pab, ngulunez bixa' Pab haxta yezh Atenas. Orze' nguiubre ska bixa' par mbi'dyab bixa' kwa'n nzhab Pab, par ya Silas kun Timoteo lwega' plo kimbéz Pab.

Mizhin Pab yezh Atenas

¹⁶ No dub kimbëz Pab or zhin Silas kun Timoteo yezh Atenas ze', dox miwin laxto' Pab or une Pab, lë' rë men yezh ze', dox ñakë bixa' tich rë winab, no nazhi' bixa'i. ¹⁷ Kuze' midizhnu Pab rë men Israel mbaino rë men grieg xa' nzhon ro' Dios plo nitse'd bixa' widizh che'n Dios; mbaino se'ska, zilita' midizhnu Pab rë men plo nzhin xbi'. ¹⁸ Ze' midizhnu Pab pla maestr che'n men epikúrio xa' nilu', ngulen yizhyuo nabe, mbaino gak ban men xmod nzhakla men, no pla maestr che'n estóiko xa' nilu', nazakt laxto' men no ni nawin laxto' men kwa'dox, mbaino xek men lo rë kwa'n nizam men. Rë xa' re' michëlo' kun Pab. Tu ben xa' nzhab: —¿Kwan pa' dox kidi'zh xa' re'? Kilu' xa' kwa'n pas ni lë' xa' nanet.

Mbaino xtu ben xa' nzhab:
—Xa' re' kilu' kwent che'n rë dios kwa'n gat nakbe't.

Se' kidi'zh bixa', porke lë' Pab kilu' widizh wen che'n Jesukrist, mbaino xmod nguruban Me. ¹⁹ Orze' mbiy' bixa' Pab tu lad plo lë Areópago. Ze' nzob tu yo' nela yalao ga', orze' nzhab bixa' lo Pab:

—¿Chi zak di'zhal lo no, rë kwa'n kub kwa'n kilu'l ba'?, ²⁰ porke nel lo no, rë kwa'n nanet no kwan, no nzhakla no gon no kwane.

²¹ Se' nzhab bixa' lo Pab, porke rë men yezh Atenas kun rë xa' zit kwa'n nzho ze', dox ño laxto' bixa', di'zh bixa' o gon bixa' tu kwa'n laore nzhak. ²² Orze' ngwatsuli Pab xid rë xa' nzhin ze', nzhab Pab:

—Rë go men Atenas, bin go widizh re'. Niwi'n xmod nak go, nazhi' go rë winab che'n go, como nela tu dios ga'. ²³ No or nikizë'n le'n yezh re', unen nayax plo kinu go, nile' go lani par winab che'n go, no xid rë kure', unen nzobni' widizh re': “Kure' tu dios Me gat nakbe't.” No nal, Dios Me gat nilibe't go nidi'zh go nak dios che'n go, mbaino Dios re' kidizha lo go nal re'.

²⁴ 'Dios re' mizuxkwa' dub yizhyuo, kun rë kwa'n nzhin loi. No Dios re' nile' mandad lo yibë' mbaino lo yuo; no gat nzhot Dios re' le'n yado' kwa'n nizuxkwa' men. ²⁵ Lë' Dios re' gat naki'n le' men ni tu kwa'n, par gaknu men Dios, sino ke Dios re' niza' yalnaban ka' rë men, nikina Dios men, mbaino niza' Dios rë kwa'n par men.

²⁶ 'No kun tutsa miyi' mile' Dios miar xa' yizhyuo re', par mire'ch men rë plo; no ngulo Dios tiemp par yo kad ben men, mbaino plo ban bixa'. ²⁷ Kure' mile' Dios par kwa'n bixa' Dios, no ter nadi'b lo men, lë' men yazhël ka Dios. No nzhapa segur; gat zit nzo Dios lo kad be. ²⁸ No por yalnazon che'n Dios naban be, mbaino nizë be, no nzhin be yizhyuo re', como lë'la midizh ka pla rë xa' kwa'n nzhak nizuxkwa' di'zh chul xid go, midizh bixa': “Lë' be nzë ben che'n

Dios.” ²⁹ No chi lë' be nzë ben che'n Dios, gat ñalt le' be xigab, lë' Dios nak nela rë winab kwa'n nizuxkwa' men kun or; no kun plat, o kun ya, o kun ke, nela xmod nzë yek bixa'. ³⁰ Per Dios nangale't kas rë kwa'n nile' men, rë tiemp kwa'n nangale' men kwa'n wen, por nagane men cho Dios. Per nal, mile' Dios mandad lo rë nak men yizhyuo rë plo, la' bixa' rë kwa'n nakap kile' bixa' lo Dios, par le' bixa' kwa'n wen lo Dios, ³¹ porke kinu Dios tu ngubizh, lë' Jesukrist gab xmod gak kun kad men, por kwa'n nile' xa', wane'i choi. Mile' Dios nguruban Jesukrist, par ne be, lë' nab Jesukrist nile' mandad lo rë kwa'n nzho.

³² Or mbin rë men nzhin ze', lë' Jesukrist nguruban, nzho xa' mixizhnu Pab no nzho xa' nzhab lo Pab:

—Ba' pokta' nel kure' lo no xtu wëlt.

³³ Orze' mila' Pab bixa', nza Pab xtu plo. ³⁴ Per pla xa' ngwayilai, xa' ze' nzhakë tich Pab. Xid rë xa' re' nzho tu xa' lë Dionisio, tu xa' kwa'n nzho partid kwa'n lë Areópago. No xtu xa' nak tu una' xa' lë Dámaris, kun zipla men.

18

Pab nzho yezh Corinto

¹ Orze' nguro' Pab yezh Atenas, par ña xa' yezh Corinto. ² Ze' mizhë'l xa' tu miyi' tu xa' Israel xa' lë Aquila, tu xa' nzë lazh men Ponto; nzë'b ñë'd xa' di Italia kun tsa' xa' una' lë Priscila, porke lë' rey ro Claudio mile' mandad, ro' rë men Israel kwa'n nzho yezh Roma. Orze' ngwatswi' Pab lo rop tsa' xa' re'. ³ No lë' zhi'n kwa'n nzhak Pab nizuxkwa' xa' yo' yid, no mis zhi'n ska re' nile' rop tsa' xa' re', kuze' junt nkë bixa' zhi'n. ⁴ No kad ngubizh kwa'n nile' men Israel diskans, ñalul' Pab widizh che'n Dios por Jesukrist le'n yo' plo nitse'd bixa' widizh che'n Dios, par la Pab yek bixa' yila bixa'i, no nzho men ngwayila kwa'n milu' Pab, men Israel no men grieg.

⁵ Or nguro' Silas kun Timoteo yezh Macedonia, par zhin bixa' yezh Corinto, orze'se nguzublo Pab, zilita' nilu' Pab widizh che'n Dios lo rë men Israel, nidi'zh Pab: “Lë' Jesús nak Krist, Me kwa'n más tsak lo rë xa' kwa'n mixë'l Dios xid rë men Israel.” ⁶ Per mile' rë men Israel ze' nakap lo Pab, mbaino nde bixa' Pab, orze' nguzhib Pab xab Pab nela tu señ ga' ke nzë'b xki rë xa' ze' lo Dios, orze' nzhab Pab:

—Lë'o lox lo Dios, mis go nzhap dol por kuba'. No nal, lë'da yalu widizh che'n Dios por Jesukrist lo xtu ben men, xa' gat lë't men Israel.

⁷ Orze' nguro' Pab le'n yo' ze', no ngwa xa' lizh tu xa' lë Ticio Justo, tu xa' nzhon ro' Dios, no lizh xa' ze' nzob gax ta' yo' plo nitse'd men Israel widizh che'n Dios. ⁸ No

Crispo, xa' kwa'n nile' mandad le'n yo' plo nitse'd men Israel widi'zh che'n Dios; nu xa' ngwayila widi'zh che'n Dios por Jesukrist, kun dub lizh xa'. Mbaino nu pla rē men Corinto ngwayilai, or mbin bixa' widi'zh re', ngoklēi' rē bixa' le'n nits. ⁹ No tu yē'l, ngurulo Jesukrist lo Pab, nzhab Me:

—Pab, nazhebtal; bidi'zh xtizha zilita', natsao'tal ro'l; ¹⁰ porke na nzo kun lu, yent cho gak galal, porke dox men kinun yezh re'.

¹¹ Kuze' mia'n Pab tu li'n garol yezh Corinto ze', par milu' xa' widi'zh che'n Dios xid rē men ze'. ¹² Per or ngok Galión gobiernador lazh men Acaya, orze' tutsa mid'i'zh nayax men Israel, par mbiy' bixa' Pab yalao plo nzob gobiernador Galión. ¹³ Orze' nzhab bixa' lo Galión:

—Miyi' re' kiki'l men par zubi men lo Dios xtu mod, per gat lē't nela xmod nzob lo ley che'n noi.

¹⁴ Laore nzhakla Pab ngadi'zh Pab tu kwa'n, lē'chi ntab Galión lo rē men Israel ze', nzhab xa':

—Chi mile' xa' re' tu kwa'n gat lē', o mile' xa' tu kwa'n nazhe'b dox, orze'se gak di'zh go rē kwa'n nzhakla go, mblēgo men Israel; ¹⁵ per go, dox rē kwa'n kinabdi'zh go por rē kwa'n milu' rē xpen go, kwent che'n cho pa' ngok rē men che'n go, mbaino kwent che'n rē kwa'n nzobni' lo ley che'n go. Kuze', go wane kuxkwa' go kuba', porke na, gat lē't kwent da kuba', par len yalgustis.

¹⁶ Orze' ngulutin Galión rē bixa' le'n yalao. ¹⁷ Orze' nguzen rē men ze' Sóstenes, xa' nile' mandad le'n yo' plo nitse'd rē men Israel widi'zh che'n Dios, par miza' bixa' lao' Sóstenes, ro' yalao lo Galión, no per ni kas nangale't Galión kure'.

Nguiubre Pab yezh Antioquia

¹⁸ Per Pab mia'n pla ra' ngubizh yezh Corinto. Orze' nzhab xa' lo rē men che'n Jesukrist: "Lē'da ña xtu plo." Orze' nkē xa' bark kun Priscila no kun Aquila, par nza bixa' rē yezh che'n men Siria. Orze' mizhin bark yezh Cencrea, ze' ngula Pab bark par mizhi'b yek xa', par mile' xa' tu kwa'n mia'n xa' di'zh lo Dios. Orze' nkē xa' bark xtu wēlt par nza xa' nez che'n xa'. ¹⁹ No or mizhin bark yezh Efeso, ze' milē' Pab kun Priscila no kun Aquila, orze' ngwa xa' le'n yo' plo nitse'd men Israel widi'zh che'n Dios. Ze' mid'i'zh xa' lo rē men Israel kwa'n nibin ze' par ngala Pab yek bixa', par gon bixa' widi'zh che'n Dios por Jesukrist. ²⁰ No dox ngokla bixa' ngaya'n Pab xche kun lē' bixa' ze', per nangaziyēlt Pab, ²¹ sino ke ña Pab, no nzhab Pab:

—Lē'da nza lani kwa'n mer gal yezh Jerusalén, per chi ziyēl Dios, lē'da yubre ska re' xtu wēlt.

Orze' nkē xa' bark xtu wēlt, nguro' xa' yezh Efeso. ²² Or mizhin Pab yezh Cesarea, orze' ngwatswi' xa' ma rē men che'n Jesukrist kwa'n nzo ze'. Orze' nguzen xa' nez xtu wēlt par yezh Antioquia, kwa'n ña'n lazh men Siria. ²³ No pla ra' ngubizh mia'n Pab yezh Antioquia, orze' ngwa xa' xtu wēlt pla ra' yezh kwa'n nzhin lazh men Galacia no lazh men Frigia, par ngwadi'zh Pab lo rē men che'n Jesukrist rē xa' nzo ze', par más mixo'b yek bixa' Dios.

Milu' Pol widi'zh che'n Dios por Jesukrist yezh Efeso

²⁴ Le'n rē ngubizh ze', mizhin tu men Israel xa' lē Pol yezh Efeso. Xa' re' ngol yezh Alejandria, dox nix nidi'zh xa' par la xa' yek men, mbaino dox nzhak xa' widi'zh che'n Dios. ²⁵ Xa' re' nilibe' la che'p widi'zh che'n Dios por Jesukrist, no dubla xa' nidi'zh xa', mbaino lē'tsa lē' widi'zh che'n Jesukrist nilu' xa' or nidi'zh xa' lo rē men, no ter nab tsa xmod mililēi' Juan men kun nits, nane xa'. ²⁶ No yent kwan nizheb xa', nguzublo kidi'zh xa' widi'zh che'n Dios, le'n yo' plo nitse'd men Israel widi'zh che'n Dios. Per or mbin Priscila kun tsa' xa' Aquila xmod kidi'zh xa' re', orze' mbiy' bixa' Pol tu lad, par milu' bixa' más widi'zh che'n Dios por Jesukrist nela xmod nzhakla Dios. ²⁷ No or ngokla Pol ya Pol par lazh men Acaya, orze' mixē'l men che'n Jesukrist xa' nzo yezh Efeso, tu yech par lu' Pol lo más rē men che'n Jesukrist, xa' nzo lazh men Acaya, par wi' bixa' wen lo Pol or zhin Pol ze'. No or mizhin Pol ze', dox ngoknu Pol rē men che'n Jesukrist xa' nzo ze', par más mixo'byek bixa' Dios, rē xa' kwa'n ngwayila widi'zh che'n Dios por nilats laxto' Dios bixa'. ²⁸ Se' mile' Pol, porke lo nayax men, dox naye mid'i'zh Pol, mile' Pol gan une rē nak men Israel kwa'n michēlro' xa' kun lē', lē' Jesús walika nak Krist, nela xmod nzobni' lo Yech che'n Dios.

19

Nzo Pab yezh Efeso

¹ Dub nzo Pol yezh Corinto, nzhadad Pab rē yezh kwa'n ña'n le'n rē yi', orze' mizhin xa' haxta yezh Efeso. Ze' mizhē'l xa' pla men che'n Jesukrist, ² orze' minabdi'zh Pab, nzhab Pab lo bixa':

—¿Chi nguio Sprit che'n Dios laxto' go, or ngwayila go Jesukrist?

Orze' nzhab bixa':

—Per ni naga gon no chi nzo Sprit che'n Dios.

³ Orze' nzhab Pab:

—¿Xmod ska ngoklēi' go?

Orze' nzhab bixa':

—Ngoklēi' no nela xmod milu' Juane.

⁴ Orze' nzhab Pab:

—Walika, Juan mililèi' men le'n nits, par milu' walika mizi bixa' rè mod gat lè' nak bixa' lo Dios par ban bixa' xtu mod; per nzhab ska Juan: “Naki'n yila go Me kwa'n nzadkè ticha.” No Me kwa'n mize't Juan re', nak Jesús.

⁵No or mbin bixa' kure', lwega' ngoklèi' bixa' le'n nits, nela xmod mile' ka Jesukrist mandad, ⁶orze' mixo'b Pab ya' Pab yek rè men ze', mbaino nguio Sprit che'n Dios laxto' rè bixa', no midizh bixa' xtu ben widizh kwa'n yent cho nane, mbaino midizh bixa' por Dios. ⁷Di lo rè miyi' re', nak bixa' tu dusen men.

⁸No ze', dub chon mbëo' milu' Pab widizh che'n Dios por Jesukrist le'n yo' plo nitse'd men widizh che'n Dios, no nangazhebt xa' midizh xa'i, no mile' xa' por ngala xa' yek rè men ze', par gak bixa' men che'n Dios por Jesukrist. ⁹Per nzho pla xa' nad dox, gat nzhont xa'i, dox nakap nidi'zh bixa' tich widizh che'n Dios por Jesukrist lo rè nak men nzhin ze'. Orze' nguiubchi Pab ze', kun zipla men xa' ñila widizh che'n Dios por Jesukrist, orze' ngwanu Pab bixa' le'n tu yo' skwel che'n tu xa' lè Tirano, no ze', zilita' ñadi'zh Pab widizh che'n Dios lo rè xa' ze'. ¹⁰Se' mile' Pab dub chop li'n, par mbin rè xa' nzho lazh men Asia, rè men Israel kun rè men grieg, xmod nak widizh che'n Dios por Jesukrist. ¹¹No por Pab, mile' Dios rè kwa'n nazhon kwa'n nagat ne men. ¹²Haxta mbiyi' men pañit o tlè' lar lo Pab par nzhale ta' Pab, orze' nzhuwe'i mene lo xa' nzhakne, no niwen men, mbaino rè mbi mal nirutine laxto' men.

¹³Per nzho pla miyi' Israel, xa' nikizè yezh por yezh, nu bixa' nzhakla kutin mbi mal laxto' rè men por lè Jesukrist, nela Pab ga'. Se' midizh bixa' lo rè xa' nzho mbi mal laxto':

—Por lè Jesús kwa'n nidi'zh Pab lo rè men, lè'da ni, iguro'tin ba'!

¹⁴Se' mile' gash xga'n tu xa' lè Esceva, tu men Israel, tu xa' nile' mandad lo pla ngulèi'. ¹⁵Per tu wèlt, se' mikab mbi mal lo rè miyi' ze':

—Nilibe'n Jesukrist no nanen cho Pab, per go, ¿cho gox?

¹⁶Mbaino miyi' kwa'n nzho mbi mal laxto' ze', nguxo'b xa' tich rè xa' re', no miza' xa' lao' rè miyi' re', haxta michèz xa' xab rè xa' re', orze' mikè' rè miyi' re' karre; nzho xa' miwe', no nzho xa' ña kache'. ¹⁷Kuze', rè men nzho yezh Efeso, men Israel no kun rè men grieg, or mbin bixa' kwan nguzak rè miyi' re', orze' rè men dox mizheb bixa', no rè plo midizh men: “Dox nazhon Jesukrist.”

¹⁸No por kwa'n ngok re', nayax men ngwayila widizh che'n Dios por Jesukrist, no nu ngwa bixa' lo rè men che'n Jesukrist par mixèlro' bixa' rè kwa'n mal no rè yalbruj

kwa'n nzhak bixa'. ¹⁹No nu nayax xa' mitse'd yech che'n Mizhab, mbiyi' bixa'i par mizèk bixa'i lo rè men. No ngulo' bixa' kwent plak tsak rè yech ze', orze' nzhab bixa' tsake como cho' bi chi' mil dimi kwa'n nakxao' kun plat. ²⁰Por rè kure', más mire'ch widizh che'n Dios por Jesukrist rè plo, por une men dox nazhon Dios, mbaino más miar men xa' ñila widizh che'n Dios por Jesukrist.

²¹No or milox ngok rè kure', midizh Sprit che'n Dios lo Pab, ya xa' lazh men Macedonia, mbaino lazh men Acaya. No or gat ya Pab ze', nzhab Pab:

—Or lox yan yezh Jerusalén, naki'n yan, nu yezh Roma.

²²Orze' mixè'l Pab chop men xa' nzhaknu Pab, par ya bixa' rè yezh kwa'n nzhin lazh men Macedonia. Tu xa' re' lè Timoteo, mbaino xtu xa' lè Rast. No mia'n Pab zipla ngubizh lazh men Asia.

Niyi'xian men yezh Efeso

²³Le'n rè ngubizh ze', rè men yezh Efeso, dox nazheb mile' bixa' por widizh che'n Dios por Jesukrist kwa'n nilu' Pab, gat nzhaklat bixa' re'che lazh bixa'. ²⁴Xid rè xa' re' nzho tu xa' más nichèldil men, tu xa' lè Met. Xa' re' nichao' rè nich ye'n kwa'n nakxao' kun pura yi'b de plat, kwa'n nak nela yado' che'n winab che'n bixa' kwa'n lè Diana. Lè' Met kun más rè xa' kwa'n nichao' rè nich ye'n re', nayax dimi nile' bixa' gan por zhi'n re'. ²⁵Orze' mikan Met rè xa' nikè zhi'n re', par nzhab xa' lo rè xa' re':

—Rè be nane, por zhi'n re', rrik be. ²⁶Lè' go nane la, no nzhon la go, lè' xa' lè Pab re' kila yek rè men, ke rè winab kwa'n nichao' ya' men, gat lè't Diöse. Mbaino gat lè't nab yezh re' kile' xa'i, sino ke dub lazh men Asia kile' xa' sa'. No dox men mile' la xa' gan ngula yek. ²⁷Dox nazhe'b kure'. Paste lè' zhi'n che'n be lox. No gat lè't nab kure'i, nu nale'tra' men lani che'n naxnax Diana che'n be, Me kwa'n nazhon par rè men. ¡Mbaino, gat lè't nab yezh re' gake se', no nu dub lazh men Asia, no pas haxta dub yizhyuo jwals gak rè kure'!

²⁸Or mbin men kure', rè xa' kwa'n nikè Met zhi'n kun lè', orze' dox niyi'xian bixa', kibizhiè bixa', nzhab bixa':

—¡Dox nazhon naxnax Diana che'n men yezh Efeso!

²⁹Orze' rè men yezh ze', dox miyi'xian bixa'; orze' tutsa nguxo'b rè bixa' tich Gayo no tich Aristarco, rop miyi' kwa'n nzè lazh men Macedonia, xa' kwa'n nikizè tich Pab; orze' mbiyi' bixa' rop xa' re', haxta plo nibin bixa', nile' bixa' junt. ³⁰Lè' Pab ngokla ngazubi xid rè xa' ze', per rè men xa' nikizè kun Pab, ngala't bixa'. ³¹No pla gustis, xa' nzè lazh men Asia, rè xa' kwa'n nichè'l Pab,

mile' bixa' abis, guna'b bixa' jwers nayat Pab plo nzhin junt ze'. ³²No lo junt ze', dox nazhe'b kile' men. Xid rè xa' ze', nzho xa' kibizhiè naye tu kwa'n, no nzho xa' kibizhiè naye xtu kwa'n, no más bixa' ni nane chon nguzhin junt ze'. ³³Orze', pla rè men nzhin lo junt ze', ngulo' bixa' tu miyi' lè Jand tu lad, par mbin miyi' re', cho nzhap dol ngulen rè kure'; orze' miche'p pla rè men Israel Jand, tsa'o' plo nzhin rè xa' kizhin junt ze'. Orze' milu' Jand tu señ kun ya' xa' par nachao' men rruid, par di'zh xa' ke yent cho dol nzhap rè men Israel, rè xa' kwa'n nzho yezh re', por rè kwa'n nzhak re'. ³⁴Per or une rè men nzhin ze', lè' nu Jand nak men Israel, orze' tutsa kwa'n midi'zh rè bixa', se' nguruzhiè bixa' pas chop or:

—jDox nazhon naxnax Diana che'n men yezh Efeso!

³⁵Per haxta xa' nak sekretar mile' ngulèz nguruzhiè men, nzhab sekretar:

—Bin goi men Efeso, rè men yizhyuo nane, lè' yezh Efeso nikina yado' che'n naxnax Diana, me dox nazhon, mbaino winab che'n Diana kwa'n ngulali yibè'. ³⁶Nal, rè be nane, kure' walika. Bila' go, nale'tra' go nazhe'b, mbaino biwi' go kwan le'u, par nale'u tu kwa'n nayan. ³⁷¿Chon nguzen go rop miyi' re'? Yent ni tu kwa'n gat lè' mile' bixa' le'n yado' che'n be, mbaino ni nangadi'zh bixa' ni tu kwa'n nakap tich naxnax che'n be. ³⁸No nal, chi nzhakla Met, kun rè xa' nikè xa' zhi'n kun lè', yi'd bixa' gake, chi nzho tu kwa'n nak tu men, lè' rè yalao naxa'l ka, no lè' rè gustis nzhin ka, nes par rube' cho nzhap dol. ³⁹No chi nzho xtu kwa'n naki'n kuxkwa' go, naki'n le' goi xtu ngubizh, per le' goix nela xmod nidi'zhka ley che'n be, ⁴⁰porke jwals gab gobier, nzhap be dol por kwa'n ngok nalzhè re', no orze' yent kwan gak di'zh be por kuba'.

⁴¹Or milox midi'zh sekretar kure', orze' mile' xa', ña rè men.

20

Ngwa Pab lazh men Macedonia mbaino lazh men Grecia

¹No or mire'chbe rè men nzhin ze', orze' ngurezh Pab rè men che'n Jesukrist xa' nzho yezh re', par miza' xa' konsej rè xa' re', orze' nzhab xa': "Lè'da ña la", orze' nzha xa' par lazh men Macedonia. ²No or nded xa' rè yezh ze', mile' xa' más mixobla rè men che'n Jesukrist widi'zh che'n Dios, rè xa' kwa'n nzho ze'. No or milox nded Pab rè ze', ña xa' par lazh men Grecia, ³plo kwa'n mia'n xa' chon mbè'o', mbaino mer ñen xa' kè xa' bark par nga xa' lazh men Siria, per or mbin Pab, lè' rè men Israel kila'ch la par gut rè men re' xa', orze' tutsa xigab mile' xa' yèk ska xa', par lazh men Macedonia,

per neka ni' xa' ya xa', nes par zhin xa' lazh men Siria. ⁴No or nguio xa' nez par ded xa' lazh men Asia, nzhanu xa' rè xa' kwa'n lè Sópater, xga'n tu xa' lè Pirro, tu men yezh Berea; kun xtu xa' lè Aristarco, no kun tu xa' lè Segundo, tu xa' yezh Tesalónica; mbaino kun xtu xa' lè Gayo, tu xa' yezh Derbe, no kun Timoteo; mbaino kun Tíquico, no kun Trófimo, tu xa' kwa'n nzè lazh men Asia. ⁵Rè miyi' re' nguzhubner lo no, no ngulèz bixa' yezh Troas. ⁶No or nded lani kwa'n nzha men Israel pan kwa'n niyent levadur, orze' nguro' no yezh Filipos, par nkè no bark ña no yezh Troas. Gai' ngubizh nguio no le'n bark, par mizhin no yezh Troas. Ze' nguio no gash ngubizh, plo mizhè'l no rè xa' kwa'n nguzhubner lo no ze'.

Lult kwa'n midi'zh Pab yezh Troas

⁷Or ngol primer ngubizh che'n sman, nguzhin rè no par ndao no pan, orze' haxta garol yè'l ngulèz midi'zh Pab lo rè men che'n Jesukrist kwa'n nzho yezh Troas, porke riyè'l lè' xa' ro' la, par ya xa' xtu plo. ⁸Le'n kwart al ya plo nguzhin no ze', nayax biani nikè. ⁹Mbaino lè' tu mbwin kwa'n lè Eutiko, nzob ro' tu bentán che'n kwart ze'. No por dox xche kidi'zh Pab, kuze' nguzen mika'l mbwin re', orze' ngob mbwin lo yuo haxta pis yon, no or ngwalits men mbwin, lè' mbwin ngut la. ¹⁰Orze' ngula Pab lo yuo nguxo'b Pab ro' laxto' mbwin, orze' nde'x xa' mbwin, no nzhab xa' lo rè men che'n Jesukrist, xa' nzhin ze'.

—Nazhebt go. Lè' mbwin naban ka.

¹¹Lwega' mièk Pab le'n kwart al ya xtu wèlt, no or ndi'z xa' pan par ndao bixa', orze' haxta ngwanilyuo une midi'zh Pab, orze' ña xa'. ¹²Mbaino mbwin re', ngwala' bixa' mbwin lizh mbwin, naban mbwin, kure' mile' más ngop rè men ze' jwers lo che'n Dios.

Nguro' bixa' yezh Troas par nzha bixa' yezh Mileto

¹³Orze' nkè no bark, par nguzhubner no lo Pab par nzha no yezh Asón, ze' ngulèz no, porke lè' Pab mile' la xigab, zhin xa' ni' xa' yezh ze'. ¹⁴No or mizhin xa' plo kimbèz no, orze' nkè no bark kun lè' xa', par ngwa no yezh Mitilene. ¹⁵No or nguro' no plo nkè no bark, xtu riyè'l nded no kun bark ta' tu yezh win kwa'n lè Quio, kwa'n nzhin tsa'o' nitsdo', no lè' xtu riyè'l, nded no pwert Samos. No or nded no yezh Trogilió, ze' mile' no tu diskans tu rrat, no haxta xtu riyè'l, mizhin no yezh Mileto. ¹⁶Se' ngokla Pab, porke net xa' kwèz xa' xche lazh men Asia, ni yezh Efeso nangat xa', porke dox ñen laxto' xa' zhin xa' yezh Jerusalén, par gal xa' lani kwa'n lè Pentecostés kwa'n nzhazhin la.

Lult konsej kwa'n mila' Pab lo rë xa' nizo dilant xid rë men che'n Jesukrist, yezh Efeso

¹⁷ Or nzho Pab yezh Mileto, ngurezh xa' rë xa' nizo dilant, xid rë men che'n Jesukrist yezh Efeso. ¹⁸ No or mizhin bixa' lo Pab, nzhab Pab lo bixa':

—Lë' go nane ka xmod miban da xid go lazh men Asia. ¹⁹ Aunke ter dox bid nde'da, mbaino mbina por rë kwa'n mile' men lazha kun na, no kun yalnado' milen rë kwa'n mile' Señor mandad da, or nguio'n xid go. ²⁰ Rë go nane ka, nangakachta ni tu kwa'n wen lo go. Dilant lo rë go midizhai, mbaino nu lizh go mbidnine. ²¹ Dub lan minen konsej go, gat lë't nab rë men Israel mizane, sino ke nu rë men gat lë't men Israel mizane, par la' go rë kwa'n gat lë' kwa'n nak go, mbaino yila go Señor Jesukrist. ²² No biwi'u nal, lë' Sprit che'n Dios mile' mandad da, lë' da ya yezh Jerusalén, no naneta kwan pa' zaka ba', ²³ per lë'da nane la, lë' Sprit che'n Dios ya ne la lon, kad yezh kwa'n yan, lë'da yo' lizhyi'b, mbaino dox zakzi men da. ²⁴ Per yent kwa'n lë'i, zaka rë kuba'; ter haxta gat da; per naki'n loxa rë zhi'n kwa'n mine' Jesukrist len yizhyuo re', porke nile' Dios nizak laka laxto'n, or nidizha lo rë men, lë' Jesukrist niza' xtu mod ban men chul lo Dios, por nazhi' Dios men.

²⁵ No nal biwi'u, rë go xa' mbin, or milun rë wëlt, xmod ban men kun Dios, porke lë' da nane la, ya nayotra' ne go da. ²⁶ Kuze', nal kinin lo go, nagapta' dol lo Dios chi lë' go yitlo par dubta' lo Dios, ²⁷ porke yent kwan ngazheb da por men; rë kwa'n nzhakla Dios midizha lo go. ²⁸ Kuze', mis go bikina go go, no bikina go rë men che'n Jesukrist kwa'n mika'b Sprit che'n Dios lo go, par kina go rë xa' kwa'n mixo Jesukrist ren por lë', nela xmod nile' rë baxtor nikina ma ga'. ²⁹ Lë'da nane la, or yubchin lo go, orze' lë' xtu ben men yi'd xid go, nela rë ma nazhe'b kwa'n nzhao ma ga', par lo'x bixa' rë men nikina go. ³⁰ Mis xid go yo rë xa' ki'l rë xa' nikina go, par yakë bixa' tich rë xa' re'. ³¹ Kuze' biwi' go no bitsila go, lë'da dub chon li'n, zhë-yë'le dubta' minen konsej go, haxta mbina por kad go.

³² No nal wecha, lë'da la go ya' Dios par kina Me go, no bitsila go rë widi'zh che'n Dios kwa'n nidi'zh, nazhi' Dios men, par xobyek go Dios; mbaino par ne' Dios rë kwa'n wen ka' go, nela xmod mila' Dios di'zh za' Diose, ka' rë men che'n Dios, rë xa' kwa'n nambe laxto'.

³³ No na, nangaklata ngayix go ngakan, no ni nangaklan ngane' go lar gaka, ³⁴ sino ke kun yub ya'n nkën zhi'n, par ngopa rë kwa'n naki'n da, no par mizan rë kwa'n naki'n rë xa' kwa'n nkizë kuda lo zhi'n nazhon che'n Dios. ³⁵ Se' milun lo go, par lë' go zhi'n, no par gaknu go rë xa' kwa'n naki'n

gaknu go, no par tsila go rë widi'zh kwa'n mid'i'zh Señor Jesús or nzhab Me: “Más wen nzha men xa' za' kwa'n ka' men, ke xa' za' mene ka'.”

³⁶ No or milox mid'i'zh Pab rë kure', orze' nguzuxib Pab kun más rë men par mina'b bixa' lo Dios. ³⁷ Orze' rë bixa' nzho'n, mbaino nde'zh bixa' Pab, no michiro' bixa' ta' kwats Pab, por tanta nazhi' bixa' wech bixa'. ³⁸ No dox miwin laxto' bixa', por kwa'n nzhab Pab: “Ya nayotra' ne go da xtu wëlt.” No ngulunez bixa' Pab, haxta nkili Pab bark.

21

Ngwa Pab yezh Jerusalén

¹ No or mila' no rë men che'n Jesukrist ze', orze' nkë no bark, par ngwa no nali laka lazh men Cos, tu yezh win kwa'n nzhin tsao' nitsdo'. No xtu riyë'l, mizhin no lazh men Rodas, xtu yezh win kwa'n nzhin ska tsao' nitsdo'. No di ze' ngwa no yezh Pátara, kwa'n nzhin ro' nitsdo'. ² No yezh Pátara nkë no xtu bark, kwa'n ña par lazh men Fenicia. ³ No dub nzho no le'n bark ze', al lad izkierd che'n no mia'n yezh Chipre, kwa'n nzhin tsao' nitsdo'; orze' nzha no par lazh men Siria. No or mizhin no yezh Tiro, mila bixa' rë kwa'n nzho le'n bark. ⁴ Ze', mizhë'l no pla men che'n Jesukrist kwa'n nzho yezh ze', no mia'n no kun lë' bixa' gazh ngubizh. No por Sprit che'n Dios, nzhab rë xa' re', nayat Pab yezh Jerusalén. ⁵ Per or nded gazh ngubizh ze', nka' no nez ña no, orze' ngulunez rë men che'n Jesukrist ze' no, kun rë una' che'n bixa' no kun rë xmë'd bixa'. No ngulunez bixa' no zit par ro' yezh. No or mizhin no ro' nitsdo', ze' nguzuxib no, par guna'b no lo Dios. ⁶ Orze' nzhab no lo bixa': “Lë' no ña”, nkili no bark, orze' miëk rë xa' kwa'n ngulunez no ze' par lizh bixa'.

⁷ Nguro' no pwert Tiro, par mizhin no yezh Tolemaida, ze' ngula no bark, par ngwatsi' no ma rë men che'n Jesukrist xa' nzho ze', orze' mia'n no kun lë' bixa' tu ngubizh. ⁸ No xtu riyë'l, nguro' no yezh ze' par mizhin no yezh Cesarea, ze' mizhin no lizh tu men che'n Jesukrist xa' lë Lip, tu xa' nilu' widi'zh che'n Dios por Jesukrist lo rë men, no lë' xa' re' nak tu rë miyi' kwa'n nguio xid za gazh miyi' kwa'n ndi'z kwa'n ndao rë men che'n Jesukrist yezh Jerusalén. Lizh xa' re' mia'n no. ⁹ Mbaino Lip nzhap tap xcha'p, no dap una' nab; no lë' no, nguzen xa' sinch kwa'n nibin laxto' Pab, kun lë'i mis yub xa' mili'b xa' ya' xa' no ni' xa', orze' nzhab xa'.

—Se' ne Sprit che'n Dios: “Se' li'nu rë men Israel kwa'n nzho yezh Jerusalén miyi'

kwa'n nak che'n sinch re', mbaino chi bixa' miyi' re' lo xtu ben men, gat lè't men Israel.”

¹² Or mbin no kure', kun más rè xa' nzhin ze', kwa'dox nzhab no lo Pab:

—jNayatal yezh Jerusalén!

¹³ Orze' se' mikab Pab lo no:

—¿Chon nzho'n go, nile' go niwin laxto'n? Lè'da nzo la list, gat lè't nab par li'b dai, sino ke nu haxta par gat da yezh Jerusalén, por Señor Jesús.

¹⁴ Ngale't no gan, ngala yek xa', kuze' nzhab no:

—Lè' Señor wane kwan le' Señor kun lè' xa'.

¹⁵ No or nded rè kure', mizuxkwa' no rè che'n no, orze' nguro' no yezh Cesarea, par nzha no yezh Jerusalén. ¹⁶ No nu pla men che'n Jesukrist kwa'n nzho yezh Cesarea, ngulunez bixa' no, par lizh tu xa' lè' Mnasón, tu xa' kwa'n nzè tu yezh win lè' Chipre, no dizde nzhalak nak xa' re' tu men che'n Jesukrist.

Ngwatsi' Pab ma Jakob

¹⁷ No or mizhin no yezh Jerusalén lo rè men che'n Jesukrist xa' nzho ze', dox wen mile' bixa' kun no. ¹⁸ No xtu riyè'l, ngwa no kun Pab, ngwatsi' no ma Jakob, no nu ze' une no, nzhin rè xa' nzo lo rè men che'n Jesukrist, xa' nzho yezh Jerusalén. ¹⁹ No or milox minabdi'zh Pab chi wen ka bixa', orze' nzhab Pab lo bixa', tuga' rè zhi'n nazhon kwa'n mile' Dios xid rè men gat lè't men Israel. ²⁰ No or milox mbin bixa' rè kure', orze' nzhab bixa': “jDox nazhon Dios!”, no nzhab bixa' lo Pab:

—Lè' wech, lè'l nane ka, xid rè men Israel, nzho nayax men xa' ñila mid'i'zh che'n Dios por Jesukrist, per dox nguloyek bixa' le' bixa' ley kwa'n mila' Dios lo Muisés. ²¹ Per nzho men nzhab lo bixa', lu nilu' lo rè men Israel, rè xa' kwa'n nzho lazhi men gat lè't men Israel, nzhabal nale'tra' bixa' kwa'n nzobni' lo ley kwa'n mila' Dios lo Muisés; mbaino nzhabal nakè't bixa' señ kwerp che'n rè xga'n bixa', mbaino ni nale' bixa' rè kostumbr che'n rè men Israel. ²² ¿Xmod le' be nal, par ne men, gat lè't sa' nilu' lo rè men?, porke rè men gon ka, lè'l mizhin re'. ²³ Nal le'l kwa'n ne no lol re': Nzho tap miyi' xid no, xa' mila' di'zh le' tu kwa'n lo Dios. ²⁴ Wanu bixa', no bile' nela xmod le' bixa' kwa'n nzobni' lo ley kwa'n mila' Dios lo Muisés, par mbe laxto' rè go lo Dios. Gudix rè nak gaxt che'n bixa', no or milox mile' goi, orze' gak zhi'b yek go. Chi le'l se', rè men gab, gat walit kwa'n nidi'zh men por lu, nes par gab men, lè' nukal nile' ley kwa'n mila' Dios lo Muisés. ²⁵ No lu nane ka, mixè'l no yech lo rè men che'n Jesukrist, rè xa' gat lè't men Israel, par nzhab no: Nagaotra' bixa' kwa'n nixo'b lo winab, no ni nagao bixa' rè

ma ngut di mizi'yen, mbaino ni nagao bixa' ren, no ni naka' bixa' men kwa'n gat lè't tsa' bixa'.

Ngwaga' Pab ya' rè men Israel

²⁶ Orze' ngwanu Pab dap miyi' ze', no xtu riyè'l ngwa Pab kun lè' bixa' par mbe bixa' nela xmod nzobni' lo ley kwa'n mila' Dios lo Muisés, orze' lwegaga' nguio Pab le'n yado' Jerusalén, par ngwayab xa' lo rè ngulè'i' pok za zhè kwa'n mbe bixa', nez wei' kad bixa' tu gon lo Dios.

²⁷ Per ya mer la lox za gazh ngubizh par mbe bixa', lè'chi une pla men Israel, rè xa' kwa'n nzè lazhi men Asia, lè' Pab nzo le'n yado' Jerusalén. Orze' ngulo rè men re' di'zh lo más rè men nzhin ze', par mile' bixa' nazhe'b, orze' nguzen rè xa' nzè Asia ze' Pab, ²⁸ naye kibizhiè bixa':

—jRè go men Israel, goknu go zakzi be miyi' re'l, porke rè plo nikizè xa', kilu' xa' lo rè men, nidi'zh xa' gat lè't kwa'n nile' rè men Israel, no nu ley kwa'n mila' Dios lo Muisés gat ñalt le' be, mbaino nu yado' che'n be, nazu't nidi'zh xa'. jNo haxta nu ngulo xa' pla men grieg, xa' gat nambet, le'n yado' che'n be, par mitsinu xa' lugar nazhon re'!

²⁹ Kure' midi'zh bixa', porke lè' bixa' une la, nikizè Pab kun Trófimo yezh Jerusalén, no lè' Trófimo nzè yezh Efeso, kuze' mile' bixa' xigab, lè' Pab mbiy' rè xa' re' yado' Jerusalén. ³⁰ No rè nak xa' nzho yezh Jerusalén, nazhe'b mile' bixa', orze' karre migan rè men, nguzen bixa' Pab, no mizubxax bixa' Pab dizde le'n yado' haxta al tich, orze' lwegaga' mitsao' bixa' ro' yado'. ³¹ No rè men re', mer ñen bixa' gut bixa' Pab, lè'chi karre ngwayab tu men lo komandant che'n rè sondad Roma, kwa'n nzhin yezh Jerusalén, lè' rè men yezh Jerusalén kile' nazhe'b. ³² No lwegaga' nzhanu komandant re' rè sondad che'n xa', kun pla capitán, karre mizhin bixa' xid rè men ze'. Or une rè men kile' nazhe'b ze' lè' komandant nzhazhin lo bixa' kun rè sondad, orze' mila' bixa' nangayintra' bixa' Pab. ³³ No nguzubi komandant lo Pab, nguzen xa' Pab, orze' mile' xa' mandad, mili'b Pab kun chop kaden, orze' minabdi'zh xa' lo rè men nzhin ze': “¿Cho xa' re', mbaino kwan mile' xa'?” ³⁴ Per tu xa' nibizhyè tu kwa'n, no xtu xa' xtu kwa'n, kuze' nangont komandant kwane por dox kibizhiè men, orze' mile' komandant mandad, mbiy' sondad Pab plo nibin bixa'. ³⁵ No or mizhinu sondad Pab plo nikè skaler par kili bixa' al ya, orze' mixo'b yèn sondad Pab, par mbiy' bixa' Pab al nez plo nibin bixa', por dox nazhe'b kile' rè men ze', ³⁶ mbaino rè men nzadké tras kibizhiè bixa':

—jBit go xa' ba' tuli!

Midi'zh Pab lo rè men, yent kwan nak xa'

³⁷ No or mer nzhayo bixa' al le'n, orze' nzhab Pab lo komandant:

—¿Chi zak ganin tu kwa'n lo go?

Orze' nzhab komandant:

—¿Chi nzhak nidi'zhal widi'zh grieg?

³⁸ Orze' nzhab komandant xtu wêlt:

—¿No chi gat lêt' lazh men egipto nzêl, xa' mile' nangont men ro' gubier, nkizê xa' le'n yuo bizh, kun tap mil miyi' kwa'n nzhut men?

³⁹ Orze' nzhab Pab:

—Na nak tu men Israel, xa' nzê yezh Tarso, tu yezh kwa'n nakbe' kwa'n ña'n lazh men Cilicia, kuze' kinin lo go, chi ziyêl go dizha lo rê men re'.

⁴⁰ No or nguziyêl komandant, orze' nguzo Pab plo nikê skaler, no mile' Pab tu señ kun ya' Pab, par nachao' men rruid, rê xa' nzhin ze'. No or nguzhin men xe, orze' nguzublo midî'zh Pab lo bixa' kun widi'zh hebreo:

22

¹ —Bin rê go wech, no dad, bin go kwa'n ganin lo go, par ne go, yent kwan nak da.

² No or mbin bixa' kidi'zh Pab lo mis widi'zh hebreo kwa'n nidi'zh bixa', más xe nguzhin bixa', orze' sigue kidi'zh Pab:

³ —Na nak tu men Israel xa' ngol yezh Tarso, lazh men Cilicia, par miro'b da yezh Jerusalén. Lo Gamaliel mitse'da dike xmod nak rê ley che'n rê xuz be, no mixo'byeka len rê ley che'n Dios, nela xmod nile' go nal re'. ⁴ No dox ngok nakap da lo rê xa' ñila widi'zh che'n Dios por Jesukrist, haxta ngoknun ngut pla bixa'. No nzhò bixa' mili'bdo'n, par nguo bixa' lizhyi'b, wanei choi, miyi'y no una'i. ⁵ Lê' ngulêi' ro, kun rê xa' más nile' mandad le'n yado', rê xa' re' gak ne, lê' rê kwa'n kinin lo go, lê'i walika. Lê' bixa' mine' yech kan, mile' bixa' mandad da, mbiña yech lo rê wech be, men Israel, xa' nzhò yezh Damasco, par ngali'bdo'n rê men che'n Jesukrist kwa'n nzhò ze', orze' ngayidnun bixa' re' par ngazakzi bixa'.

Pab midî'zh xmod ngok xa' men che'n Jesukrist

(Hch. 9:1-19; 26:12-18)

⁶ Per or mer la nzhazhi'na yezh Damasco, pas mer garol zhê, lê'chi nguro' tu biani ro di lo yibê', miziniy naka'n plo nzhazê'n, ⁷ orze' ngwachin da lo yuo, mbaino mbina tu widi'zh kwa'n ne lon: “¡Saulo, Saulo!, ¿chon yent por kwan kirukêl ticha?” ⁸ Orze' nzhapa: “¿Cho go, Señor?” Orze' ne widi'zh ze': “Na nak Jesús, xa' nzê yezh Nazaret, xa' kirukêl tich, yent por kwan.” ⁹ No rê men xa' nzhà kun na, nab biani ro ze' une bixa', per nangont bixa' widi'zh kwa'n midî'zh lon re'. ¹⁰ Orze' nzhapa: “Señor, ¿kwan nzhakla go len?” Orze' ne Señor lon: “Waxche no wa yezh Damasco. Ze' nzhò tu xa' ne par kwan ngulen lu.” ¹¹ No por mile' yalnazhon

che'n biani re' mikal lon, kuze' lê' rê xa' nzhà no kun lê' nguzen ya'n, par mizhi'na yezh Damasco.

¹² Ze' nzhò tu miyi' xa' lê Ananías, tu xa' nzhon ro' Dios, no nzhon xa' ley kwa'n mila' Dios lo Muisés. No rê men Israel xa' nzhò yezh Damasco re', wen ñet xa' re' xid bixa'. ¹³ Mbi'd Ananías plo nzhò'n, orze' nguzubi xa' lon, ne xa': “¡Wecha Saulo!, biwi' xtu wêlt”, orze' ngulitsa lon, unen Ananías. ¹⁴ Orze' ne xa' lon: “Lê' Dios che'n rê xuz be xa' nzhala, dizde nzhala ngule Me lu, par nel xmod nak xigab che'n Me kun lu, no par ne yubal Me nile' rê kwa'n nzhakla Dios; mbaino par gonal yub widi'zh che'n Me kwa'n kibezhal, ¹⁵ porke gakal xa' nidi'zh por lê' Me lo rê men, por rê kwa'n unel, no por rê kwa'n mbinal. ¹⁶ No nal, ¿chon kimbêzal? Watsuli, no goklêi' le'n nits, no bina'b lo Señor par kubchi Me rê kwa'n nzê'b xkil.”

Midî'zh Pab, lê' Dios mixê'l xa' lo rê men gat lêt' men Israel

¹⁷ No or nguiubren yezh Jerusalén, orze' nguo'n le'n yado' re', no dub kina'ba lo Dios, milu' Dios tu kwa'n lon, ¹⁸ ne Me: “¡Karre guro' yezh Jerusalén!, porke nayilat men yezh re' kwa'n gabal lo bixa' por da.” ¹⁹ Orze' nzhapa lo Me: “Señor, rê men yezh re' nane, xmod nigotina rê xpenal le'n rê yo' plo nitse'd men widi'zh che'n Dios, par nigon bixa' lizhyi'b, no niyina bixa'. ²⁰ No or mbit men Teb xa' midî'zh xtî'zhal lo rê men, mbaino mis na nzo orze', mbaino mis na nzhap ñal ka xa'i, no haxta xab rê xa' mbit Teb, mikinan.” ²¹ Orze' ne Señor lon: “Wa, porke lê'da xê'lal zit lo xtu ben men, gat lêt' men Israel.”

Nzhò Pab ya' komandant

²² No lult kure' mixek men midî'zh Pab, orze' nguzublo, ngurezhiê bixa' xtu wêlt, nzhab bixa':

—¡Gat ñaltra' ban miyi' re' yizhyuo re'! ¡Bit go xa' tuli!

²³ No dub kibizhiê bixa', ngulo' bixa' lar kwa'n nak bixa' al tich, orze' kicho'n bixa' yuo al ya. ²⁴ No or une komandant se' kile' bixa', orze' mile' xa' mandad, ñanu sondad Pab plo nibin bixa', par rêle tich Pab, no par gab Pab chon niyi' rê men, nine men Pab. ²⁵ Per or nali'b la Pab par rêle tich xa', orze' nzhab Pab lo tu capitán xa' nzo ze':

—¿Chi zak chêl go tich tu men Roma, tu xa' naga ne go kwan nak?

²⁶ Or mbin capitán kwa'n midî'zh Pab, orze' ngwayab xa'i lo komandant:

—Nal, ¿kwan le' go kun miyi' ba'?, porke lê' xa' ne, nak xa' tu men yezh Roma.

²⁷ Orze' nguzubi komandant re' lo Pab, nzhab xa':

—Bine lon, ¿chi walika, men Roma lu?

Orze' nzhab Pab:

—Lê'i walika.

²⁸ Orze' nzhab komandant:

—Nayax dox dimi milen gaxt par ngok da tu men Roma.

Orze' nzhab Pab:

—Per na, nake dizde ngol da.

²⁹ No rê sondad kwa'n nzhakla ngachêle tich Pab, or mbin bixa', lê' Pab men Roma, lwegá nguibchi bixa' lo Pab; orze' haxta nu komandant mizheb or mbin xa' kure', porke lê' xa' mile' mandad mili'b Pab.

Nzo Pab plo nzhin rê gustis xa' más nile' mandad

³⁰ No xtu riyê'l ze', stubi nzhakla komandant ze' ne xa', chon nzhakla rê men Israel, gat Pab. Orze' ngurezh xa' rê ngulê'i ro, no kun rê gustis xa' más nile' mandad, orze' ngulo' komandant Pab al tich ze', mizo xa' Pab tsa'o' che'n rê xa' nile' mandad ze'.

3

¹ Orze' xe miwi' Pab lo rê gustis ze', no nzhab Pab lo bixa':

—Wecha, dub naban da, haxta zhê nalzhê, nambe laxto'n lo Dios.

² Orze' nzhab ngulê'i ro', xa' lê Ananías, lo rê men nzo gax plo nzo Pab:

—¡Bikê' go tube ro' xa' ba'!

³ Orze' nzhab Pab lo Ananías:

—¡Dios zakzil mbêl goxa, chigab walika men wenal! ¿Chi nzobal ba' par kube'l, chi lê'da gat nile ley kwa'n mila' Dios lo Muisés, orze' nzê'b xkin? No chi walika nile'l kwa'n nzhab ley, orze', ¿chon kile'l mandad kê' xa'i ro'n?

⁴ Lê'chi mikab rê xa' nzhin ze', nzhab xa':

—¿Chi sa' di'zhal nazhe'b lo ngulê'i ro che'n Dios?

⁵ Orze' nzhab Pab:

—Wecha, naneta chi xa' ba' nak ngulê'i ro; porke se' nzobni' lo ley che'n Dios: “Naketal men nile' mandad lo rê men che'n Dios.”

⁶ Orze' une Pab, chop ben nak rê men ze'; tu ben bixa' nak men saduceo, no xtu ben bixa' nak men fariseo, orze' naye midi'zh Pab lo bixa':

—¡Wecha, nu ska da nzhal ben men fariseo! No nal, ¿chi nigube' go nzhapa dol, por ñilan lê' rê men ngut ruban?

⁷ Or nzhab Pab kure', orze' nguzublo kichêro' rê men saduceo kun rê men fariseo, orze' milê' bixa', ngok bixa' chop montón, ⁸ porke rê men saduceo nidi'zh: “Gat walit ruban rê men ngut, no gat walit nzho rê ganj che'n Dios, mbaino ni gat wali nzho rê mbi mal, mbaino ni sprit che'n men”; per lê' rê men fariseo xtu mod ñila bixa', ke lê' rê men ngut ruban, no walika nzho rê ganj che'n Dios, mbaino nzho ka mbi mal no walika nzho sprit che'n men.

⁹ No di tanta kibizhiê men, orze' ngwatsuli pla men kwa'n nzê xid men fariseo, xa' nilu' ley kwa'n mila' Dios lo Muisés, nzhab bixa':

—¡Yent ni tu kwa'n gat lê' mile' mbe re'; pas wali ka midi'zh tu sprit lo xa', o pas tu rê ganj midi'zh lo xa'!

¹⁰ No di tanta nazhe'b kile' men, mizheb komandant, napa' chix bixa' Pab, orze' mile' komandant mandad rê sondad, ngulo' bixa' Pab jwers xid rê men ze', orze' mbiy' bixa' Pab xtu wêlt plo nibin bixa'. ¹¹ No mis zhê ze' or yê'l, ngurulo Jesukrist lo Pab, nzhab Me:

—Nazhebtal Pab; nela xmod midi'zhal xtizha lo rê men Jerusalén, se'ska naki'n di'zhle lo rê men yezh Roma.

Kîle' men xigab, xmod gut xa' Pab

¹² No riyê'l, nguzhin nayax men Israel, par kikwa'n bixa' mod gut bixa' Pab. Haxta mia'n bixa' di'zh lo Dios, zakzi Dios bixa' chi lê' bixa' gao no go bixa', no naga gut bixa' Pab. ¹³ No más di cho' men, xa' mia'n di'zh le' kure'. ¹⁴ Rê xa' re' ngwayab lo rê ngulê'i xa' nile' mandad lo más rê ngulê'i, no kun lo rê xa' kwa'n nzo lo rê men Israel, nzhab bixa':

—Lê' no mia'n di'zh lo Dios, lê' Dios zakzi no chi lê' no gao, no go no, chi naga gut no Pab. ¹⁵ Nal, go kun rê gustis xa' más nile' mandad, guzh go lo komandant yi'dnu xa' Pab lo go, par nabdi'zh go kwan pa' más nak xa'. Orze' lê' no kwêz la nez, par gut no xa'.

¹⁶ Per mbin tu xga'n bizan Pab kwa'n midi'zh rê xa' re', orze' lwegá' ngwa mbwin plo kinu sondad Pab, par nzhab mbwine lo Pab, ¹⁷ orze' ngurezh Pab tu capitán nzo ze', nzhab Pab:

—Wanu go mbwin re' lo komandant, porke lê' mbwin kinu tu kwa'n gab mbwin lo xa' ba'.

¹⁸ Orze' ngwanu capitán mbwin re' lo komandant, nzhab capitán:

—Lê' Pab xa' nzho lizhyi'b re', ne lon: “Wanu mbwin re' lo komandant”, porke lê' mbwin re' kinu tu kwa'n ne lo go.

¹⁹ Orze' nguzen komandant ya' mbwin re', ñanu xa' mbwin tu lad, orze' nzhab komandant:

—¿Kwan nzhaklal nel lon?

²⁰ Orze' nzhab mbwin re':

—Lê' rê men Israel tutsa mia'n bixa' di'zh, par ne bixa' lo go, xê'l go Pab yê' lo rê gustis xa' más nile' mandad, par rêl bixa', kwan pa' más nak Pab. ²¹ Per nala't go, kide bixa' go, porke más di cho' bixa', mia'n bixa' di'zh lo Dios, zakzi Dios bixa' chi lê' bixa' gao no go bixa', no naga gut bixa' Pab. No nal, lê' bixa' kimbêz la nez, namás xê'l go Pab.

²² Orze' nzhab comandant lo mbwin re':

—Bizê, no yent cho lo gabal kure'.

Mixè'l komandant Pab lo gobiernador Jwels

²³ Orze' ngurezh komandant chop capitán che'n xa', nzhab xa':

—Bikan go chop gayo' sondad kwa'n ya ni', mbaino chon gal nzhochi' sondad kwa'n ya kun kabai, no chop gayo' sondad xa' ya kun lans, par ya go yezh Cesarea nal guxin re', a las nueve. ²⁴ No za' go tu kabai zob Pab, par yent kwa'n zak xa' nez, no zhin xa' wen lo Jwels, xa' nak gobiernador.

²⁵ Orze' mixè'l komandant ze' tu yech kwa'n nzhab se':

²⁶ “Lè'da lè Claudio Lisias, mixèla yech re' lo go, go gobiernador Jwels, xa' dox tsak. Kinin lo go ya go wen. ²⁷ Lè' miyi' re', rē men Israel nguzen bixa' miyi', mbaino mer ngut bixa' miyi', per or unen, lè' miyi' re' tu men Roma, orze' ngwalata miyi' re' kun rē sondad da. ²⁸ No por nzhaklan ngenen, por chon nzhab bixa', nzhap miyi' re' dol, kuze' mbijā miyi' re' lo rē gustis xa' más nile' mandad xid rē men Israel. ²⁹ Orze' mbina, por ley che'n bixa', nzhab bixa' lè' miyi' re' nzè'b xki; per por ley che'n be yent kwa'n nak xa', mbaino ni' gat ñal gat xa', no ni lizhyi'b gat ñalt yo xa'. ³⁰ Per or mbina xla'n, lè' rē men Israel kila'ch par gut bixa' miyi' re', kuze' lwegā mixèla miyi' re' lo go. No milen mandad, yid' rē xa' kwa'n nzhab, lè' miyi' re' nzè'b xki, par ne bixa' lo go por kwan nzhap miyi' re' dol. Rētsa kuba' nin lo go. Ba' zhè'l be.”

³¹ Orze' mile' rē sondad ze' nela xmod mile' komandant mandad. Mīs yè'l ze', mbiy' bixa' Pab tu yezh kwa'n lè Antipatris. ³² No xtu riyè'l, rē sondad kwa'n nza ni', nguiubre bixa' plo nibin bixa'; no lè' rē xa' kwa'n nza kun kabai, nzhala' bixa' Pab yezh Cesarea. ³³ Or mizhin bixa' yezh Cesarea, orze' miza' bixa' yech ka' Jwels, xa' nak gobiernador; mbaino nu Pab ngwala' bixa'. ³⁴ No or milox mbi'l gobiernador yech re', orze' minabdi'zh xa' plo nzè Pab. Or mbin xa' lè' Pab nzè tu rē yezh lazh men Cilicia, ³⁵ orze' nzhab xa' lo Pab:

—Or zhin rē xa' kwa'n nidi'zh, lè'l nzè'b xki, orze' gona kwan di'zhal.

Orze' mile' xa' mandad rē sondad che'n xa', par kina bixa' Pab le'n yalao che'n Herodes.

24

Midi'zh Pab, yent kwan nak Pab, lo gobiernador Jwels

¹ Or neded gai' ngubizh, lè'chi mizhin Ananías yezh Cesarea, xa' nak ngulè'i ro, kun pla rē men Israel xa' nak zhi'n, mbaino kun tu abogad xa' lè Tértulo. Rē xa' re' nzadnu Tértulo lo gobiernador, par gab bixa' kwan nak Pab. ² No or ngurezh gobiernador Pab, orze' kimbèz la abogad Tértulo,

par gab xa' kwan nak Pab lo gobiernador. Galo laka, se' midi'zh xa':

—Xkix go, gobiernador; por go, dox wen naban no, por kizuxkwa' go rē kwa'n gat nak wen lazh no, por dox nane go kwa'n nile' go. ³ Dub lazh men Israel, ñèt rē zhi'n wen kwa'n nile' go, O Jwels xa' dox tsak. Kun dub laxto'n, kinin xkix lo go. ⁴ No par nadizha be's xche, kina'ba lo go, por wen laxto' go, tu rrat win tsa gon go kwa'n ganin lo go, ⁵ porke une no miyi' re' nak nela tu yalyizh che'n Dios ga', rē men kike'd xa'i, porke rē plo nikizè xa', kichèldil xa' rē men Israel. Mbaino lè' xa' nak xa' nile' mandad xid rē xa' lè nazareno. ⁶ Mbaino haxta nu yado' lazh no, ngokla xa' ngatsinu xa', par nangakra'i nazonh, kuze' nguzen no xa'. ⁷ Lè'chi orze' mizhin komandant Lisias, ngulutin xa' miyi' re' ya' no, dub xian xa', ⁸ no ne xa' lo no, zob no demand xa' lo go re'. Per más wen, yub go nabdi'zh lo xa', par ne go, por kwan nzhab no lè' xa' nzhap dol.

⁹ No nu rē men Israel xa' nak zhi'n, xa' nzhin ze' nzhab xa':

—jWalika kwa'n midi'zh abogad re'!

¹⁰ Or milu' gobiernador ya' lo Pab par di'zh Pab, orze' nzhab Pab:

—Dub laxto'n dizha lo go, por rē kwa'n kikè' men kixu' da lo go, dizde nzhala, nak go gustis xid rē men lazh no. ¹¹ Yub go gak nabdi'zh lo men par ne go, laore nzha tu dusen ngubizh, ngwan yado' Jerusalén par ngwazuxiba lo Dios. ¹² Or une bixa' da, yent cho ngane nzon le'n yado', kichèlro'n kun men, no ni nangane men kichèldila men le'n yado', mbaino ni le'n rē yo' plo nitse'd men Israel widi'zh che'n Dios, ni xtu rē plo nganet men da, kilen rē kuba'. ¹³ No rē men re', yent ni tu kwa'n gak lu' bixa', par ne bixa', walika nak da rē kwa'n kikè' bixa' kixu' da lo go re'. ¹⁴ Per kwa'n nin lo go walika nak da, na nile rē kwa'n nzobni' lo Yech che'n Dios kwa'n mila' Me lo rē xuza xa' tiemp, lo mis kwa'n nak Nez Kub che'n Jesukrist, kwa'n nidi'zh men gat went. Lo mis se'ska nilen rē kwa'n nzobni' lo yech che'n ley, mbaino rē widi'zh kwa'n midi'zh rē profet, xa' kwa'n midi'zh por Dios chi tiemp. ¹⁵ Mbaino na, ñila nela xmod ñila bixa', ke lè' rē men ngut ruban, xa' wene mbaino xa' gat nile't kwa'n wene; rē men ruban. ¹⁶ Kuze', dox niwi'n xmod nikizè'n, nela xmod nikizè rē xa' re', par ya'n da wen lo rē kwa'n nilen, nes par namba laxto'n lo Dios, mbaino lo rē men.

¹⁷ No pla ra' li'n ngwan lazh xtu ben men, orze' nguiubren lazha, ñadnun nayax dimi, par rē men prob nzhochi' lazha, mbaino mizan rē ma, par gon lo Dios. ¹⁸ Kure' kilen le'n yado' or une pla men Israel da, xa' nzè lazh men Asia. Orze' laore mitsa laka rē zhè kwa'n ngok namba da lo Dios, milen nela

xmod nzobni' lo ley che'n rë men Israel. No ni nangane bixa' da kun tu bëd men, mbaino ni nangane bixa' da kilen tu kwa'n nazhe'b. ¹⁹ Per nal, ñal yid yub rë men nzë Asia ze', rë xa' kwa'n une da, par ne yub bixa' chi nzho tu kwan nizak bixa' kuda. ²⁰ O ne yub rë xa' nzhin re', chi une bixa' nzhapa dol por tu kwa'n gat lë', or mbiy' bixa' da lo rë gustis xa' más nile' mandad. ²¹ O pas por midizha naye xid rë xa' nzhin ze', nzhab bixa' nzhapa dol por nzhapa: “jLë' rë men ngut ruban!”

²² Or mbin gobernador Jwels rë widi'zh re', porke lë' xa' ya nane la, xmod nak Nez Kub che'n Jesukrist, kuze' nzhab xa':

—Or yi'd komandant Lisias, orze' ganin xmod gak kwent che'nal.

²³ Orze' mile' Jwels mandad tu capitán, par kina xa' Pab, per gat lë'tra' nali'b Pabe, mbaino gak yatsi' rë men nichë'l Pab, lo Pab.

²⁴ No or nded pla ngubizh, nguiubre Jwels xtu wëlt kun tsa' xa', una' kwa'n lë Drusila, tu una' Israel. Orze' ngurezha xa' Pab par di'zh Pab lo rop tsa' xa' re', xmod pa' nak ñila men widi'zh che'n Jesukrist. ²⁵ Per or midizh Pab, xmod nzhakla Dios ban men, mbaino midizh Pab nale'tra' men kwa'n nzhakla kwerp che'n men, porke lë' Dios gab xmod gak kun kad men por rë kwa'n nile' men yizhyuo re', orze' mizheb Jwels, no nzhab Jwels lo Pab:

—Bizë; ba' or gapa tiemp, kwezha lu xtu wëlt.

²⁶ Per ka dimi nzhakla Jwels za' Pab par liya' xa' Pab, kuze' nayax wëlt ngurezha xa' Pab, par di'zh xa' kun Pab. ²⁷ Per nded chop li'n, nguro' Jwels di gobernador. Orze' nguio xtu xa' lë Porcio Festo xlugar xa'. No par ya'n Jwels wen kun rë men Israel, mila' xa' nzho Pab lizhyi'b.

25

Nzo Pab lo gobernador Festo

¹ Or mion ngubizh nzha di nak Festo gobiernador, orze' nguro' xa' yezh Cesarea par nzha xa' yezh Jerusalén. ² Ze' rë ngulëi' kwa'n más nile' mandad, kun más rë men Israel xa' nak zhi'n, xla'n ngwayab bixa' kwa'n nak Pab lo gobernador Festo, no dox guna'b bixa', ³ par le' Festo jabor, xë'l xa' Pab par yezh Jerusalén, no lë' rë xa' re' midizh la, la'ch bixa' nez, par gut bixa' Pab. ⁴ Per nzhab gobernador Festo lo bixa':

—Nabit Pab Jerusalén, neka nzho xa' ba', porke lë'da yubre ska yezh Cesarea lwega'.

⁵ No nu nzhab Festo:

—Rë xa' más nile' mandad xid go, gak lë' xa' kumpa' da par yezh Cesarea, no chi lë' mbe ba' mile' tu kwa'n gat ñal, orze' ba' gak ne go lon.

⁶ No or nded tu sman o chi' ngubizh nzha di nzho gobiernador Festo yezh Jerusalén, orze' miëk xa' par yezh Cesarea. No xtu riyë'l, nguzob gobiernador Festo plo nile' xa' yalgustis, orze' mile' xa' mandad, ñë'd Pab plo nzob xa'. ⁷ No or mizhin Pab, rë men Israel kwa'n nzë yezh Jerusalén, rë bixa' nguzhin naka'n plo nzo Pab, orze' nayax kwa'n nazhe'b mikë' bixa' kixu' Pab, no per ni tu rë kwa'n nzhab bixa' nak Pab, ngakt ngalu' bixa'i. ⁸ Per nzhab Pab lo Festo:

—Gat nakt da ni tu rë kuba', nangaleta ni tu kwa'n gat lë' kun kwa'n nzobni' lo ley che'n men Israel, no ni kun yado' che'n bixa', mbaino ni kun rey César nangaleta tu kwa'n gat ñal len.

⁹ Per lë' Festo nzhakla ya'n wen kun rë men Israel, kuze' nzhab xa' lo Pab:

—ÇChi nzhaklal, bil yezh Jerusalén, par ba' ganin, xmod gak rë kwent che'nal?

¹⁰ Orze' nzhab Pab:

—Nzon lo go, porke go tu xa' ngule rey César par le' yalgustis yezh Cesarea re'. Kuze', re' ñal, ne bixa' kwa'n nak da lo go. Mbaino lë' go, wena-wen nane go, ni tu kwa'n gat lë' nangaleta lo rë men Israel. ¹¹ Chi nzho tu kwa'n nazhe'b milen par ñal gat da, pwes yent kwane gat da. Per chi gat nzë'ba ni tu kwa'n ne bixa' nak da, yent cho nzhap direch, chi da lo rë men Israel kwa'n niyi' nine da. Nal nina'ba lo go, mejor yub César kube' kwent da.

¹² No or midizhnu Festo rë xpen xa', rë xa' más nzhak ley, orze' nzhab xa' lo Pab:

—Lu mina'b bil lo rey César par lë' xa' kube' xmod gak che'nal. Nal lë'l bi lo xa'.

Nzo Pab lo rey Agripa

¹³ Nzha pla ra' ngubizh, lë' rey Agripa no Berenice bizan xa', ngwa bixa' yezh Cesarea par ngwatsi' bixa' ma Festo. ¹⁴ No nayax ngubizh nzha nzho rey Agripa plo nzho Festo, kuze' ngok miza' Festo kwent che'n Pab lo rey, nzhab xa':

—Re' nzho tu mbe lë Pab nikë xa' lizhyi'b dizde li'n che'n Jwels ra'. ¹⁵ No or ngwan yezh Jerusalén, xla'n mbi'dne rë ngulëi' ro lon, rë xa' kwa'n más nile' mandad, mbaino kun rë xa' nak zhi'n lo rë men Israel, nzhakla bixa' ngalen mandad, gat mbe re'. ¹⁶ Per nzhapa lo rë xa' re': “Rë no men Roma, gat kinut no ley, gut no tu men, si naga zhë'ldizh kwan nak xa' lo xa' kwa'n nzhab, nzhap xa' dol.” ¹⁷ Kuze' or mbi'd rë men Israel lon, lwega' xtu riyë'l nguzo'ba plo nilen yalgustis, no milen mandad rë men da, par ñë'dnu bixa' mbe re'. ¹⁸ No rë xa' mbi'dne kwan nak mbe re' lon; nanganet bixa' ni tu rë kwa'n nazhe'b, kwa'n milen xigab nak mbe re'. ¹⁹ Per nab tsa kwa'n mbina ne bixa' nak mbe re', por kwa'n xmod ñila mbe rë Dios, no por nize't mbe re' tu xa' lë

Jesús, tu xa' ngut; per lè' mbe nidi'zh, lè' xa' nguruban. ²⁰ Mbaino na, neta xmod kube'n rè kwent re', kuze' nzhapa lo mbe re': "¿Chi nzhaklal bil Jerusalén, par ba' ganin xmod gak kwent che'nal?" ²¹ Per lè' xa' lè' Pab re' nzhakla, lè' rey César kube' kwent che'n xa'. Orze' milan nzhò xa' lizhyi'b, lè'da ga' xè'l' xa' lo rey, haxta or gake.

²² Orze' nzhah rey Agripa lo Festo:
—Nu da nzhakla gon, kwan ka nidi'zh mbe ba'x.

Orze' nzhah Festo:

—Yè' gonle.

²³ No xtu riyè'l, mizhin rey Agripa kun Berenice plo nibin junt, dox niwi' men lo bixa', orze' nzhah men, dox xa' ro rè xa' re'. Mbaino tutsa nzha bixa' kun rè komandant, mbaino kun rè xa' más tsak xa' nzhò yezh ze'. Orze' mile' Festo mandad sondad che'n xa', ngwaka' xa' Pab. ²⁴ Orze' nzhah Festo lo rè xa' mizhin ze':

—Rey Agripa, kun más rè go xa' nzhin re', lè' mbe re' nzè re'; rè men Israel kwa'n nzhò yezh Jerusalén, no rè xa' kwa'n nzhò yezh Cesarea re'; rè xa' re', haxta nguruzhiè bixa', dox nazhe'b guna'b bixa' lon, ne bixa' gat mbe re' tuli. ²⁵ Per na zak, yent cho dol kinu mbe re' par ñal gat mbe re'; per mis yub miyi' nzhakla, lè' rey César kube' kwent che'n miyi', kuze' milen xigab xèla miyi' lo xa'. ²⁶ Nal re', neta kwan zo'ba lo yech, par xèla lo rey César. Kuze' milen mandad nzo xa' lo rè go re', per na niwi' lo go, xkwan ne go, or lox nabdi'zh go lo mbe re', go rey Agripa, porke dox nzhak go nigobe' go kwent che'n men, nes par ganen xmod zo'ba lo yech, or xèla mbe re' lo rey César, ²⁷ porke nilen xigab, chi xèla tu men nzhò lizhyi'b, sin naga nen kwan nak xa', orze' gab men, yent yek kwa'n nilen.

26

Nzo Pab lo rey Agripa

¹ Orze' nzhah rey Agripa lo Pab:

—Gak di'zhal por lu.

Orze' ngulits Pab ya' Pab lo men, se' nguzublo midì'zh Pab, nzhah Pab:

² —Rey Agripa, dox wen nghan nzon lo go, par dizha, gat walit nak da ni tu kwa'n ne men Israel nak da, ³ porke go nane ka xmod nak rè kostumbr che'n rè men Israel, no rè kwa'n nichè'lro' bixa' xid bixa'. Kuze' kina'ba lo go gon go che'p kwa'n ganin lo go.

Midì'zh Pab xmod miban xa' nzhala

⁴ Orze' nzhah Pab:

—Rè men Israel nane ka xmod miban da xid bixa' dizde or win da, mbaino nane bixa' xmod miban da yezh Jerusalén. ⁵ No por dizde nzhala nilibe' bixa' da, mbaino nu, chi nzhakla bixa'i, gak ne bixa'i, na ngok tu men fariseo, xa' kwa'n más nile' ley kwa'n mila'

Dios lo Muisés, mbaino rè kostumbr kwa'n ñal le' no par ñakè no tich Dios. ⁶ No nal, namás por ñilan, lè' rè men ngut ruban, nela xmod mila' Dios di'zh lo rè xuz no xa' tiemp, por kure' nzadnu bixa' da lo go, par le' go yalgustis kuda. ⁷ Mbaino dus tu dusen ben men Israel ñila kure'. Kuze' kun dub la bixa', zhèy-yè'le, nile' bixa' kult lo Dios. No nal, por ñilan kure', o rey Agripa, ne bixa' nzè'b xkin. ⁸ Rè go men Israel, nidi'zh go ñila go, lè' rè men ngut ruban, mbaino, ¿chon tatu nen par yila go lè' Jesús nguruban?

Pab midì'zh, lè' Pab ngurukè tich rè men che'n Jesukrist

⁹ 'Nzhala, nu ka da mile xigab, dox ñal kwa'n milen, ngurukè'n tich rè men che'n Jesukrist, xa' nzè yezh Nazaret, par kana lo rè kwa'n nile' bixa'. ¹⁰ Nu yezh Jerusalén milen rè kure'. Guna'ba lo rè ngulè'i, xa' más nile' mandad, par mine' bixa' permis, mitsao'yo'n rè xa' ñila Jesukrist. Mbaino nu or mile' rè ngulè'i mandad gat rè men che'n Jesukrist, nu da nzhap ñal ka rè xa' ba'i. ¹¹ Nayax wèlt milen, mizakzin rè men che'n Jesukrist, par ngoklan ngala' bixa' ngayi-latra' bixa' widi'zh che'n Jesukrist. Se'ga' milen rè plo nitse'd men Israel widi'zh che'n Dios. No por dox niyi' da ninen bixa', haxta lazh rè men zit ngwakwana bixa' par ngazakzin bixa'.

Midì'zh Pab, xmod ngok xa' xtu men

(Hch. 9:1-19; 22:6-16)

¹² 'Kure' nzhalen, nghan yezh Damasco, nzhatsena rè men che'n Jesukrist, por mandad che'n rè ngulè'i ro. ¹³ Per or nghan nez, O rey Agripa, paste como garol zhè, lè'chi nguro' tu ki dizde lo yibè' kwa'n más nayi' nizini ke ngubizh, miziniy naka'n plo nghan kun rè xa' kwa'n nzha kuda. ¹⁴ Orze' ngwachin rè no, no mbina tu widi'zh hebreo kwa'n ne lon: "Saulo, Saulo, ¿chon kirukèl ticha? Chi lè'l dil kuda, lo mis lu kikwa'n yalne che'nal." ¹⁵ Orze' nzhapa: "¿Cho go Señor?", orze' ne widi'zh ze': "Na Jesús, no ticha kirukèl." ¹⁶ Nal waxche no watsuli. Ngurulon lol porke lu ngulen, par gakat tu xpena, mbaino par di'zhal rè kwa'n milun lol nal, no rè kwa'n laore lun lol. ¹⁷ Lè'da xè'lal lo rè men Israel par di'zhal lo bixa' por da, mbaino nu lo rè xa' gat lè't men Israel yal; per nalata gal ni tu rè men ba' lu, ¹⁸ par xa'lal lo bixa', nes par nale'ra' bixa' kwa'n gat lè', sino ke le' bixa' kwa'n wen; no par rutin bixa' ya' Mizhab, orze' gon bixa' ro' Dios; nes par yubchi rè kwa'n nzè'b xki bixa' lo Dios, mbaino par yo bixa' xid rè men mixo'byek Dios, por ngwayila bixa' Da."

Mbin Pab kwa'n milu' Jesukrist

¹⁹ Kuze' nin lo go, o rey Agripa, nangakta' da nad lo widi'zh kwa'n nguro' lo yibè' ze',

20 sino ke galo laka yezh Damasco midizhne, dispwés ngwadizhne yezh Jerusalén, orze' midizhne dub lazh men Judea, mbaino lult midizhne lo rê men gat lè't men Israel; no midizhne kad plo, la' bixa' rê kwa'n nakap kile' bixa', par gon bixa' ro' Dios, mbaino le' bixa' kwa'n lu', walika mila' bixa' rê kwa'n nakap. 21 Por rê kure', nguzen rê men Israel da le'n yado', no ngokla bixa' ngut bixa' da. 22 Per por kiyaknu Dios da haxta zhè nalzhè re'; stubi naban da no nzon lo go, par dizha, walika lè' Jesús nak Krist, lo rê men waneï choi, xa' tsake o xa' natsakte. Nabtsa kwa'n nidizha nak kwa'n midizh rê profet, rê xa' midizh por Dios, haxta nu Muisés midizh la kure'. Rê bixa' midizh la, lè' rê kure' gak. 23 Rê bixa' midizh la, naki'n zakzi Krist, no haxta gat Krist. Per nu midizh bixa', lè' Me gak xa' galo laka ruban, par galo laka rê men Israel, xa'l Dios yek, mbaino xa'l Dios yek rê men, xa' gat lè't men Israel.

Ngokla Pab, ngala yek rey Agripa, ngay-ila xa' Jesukrist

24 Stubi kidizh Pab kure' lo rey Agripa, lè'chi naye nzhab Festo:

—jPab, nzhak miyizhal! jPor tanta nzhakal yech, kuze' ngok miyizhal!

25 Orze' nzhab Pab lo gobernador Festo: —Gat lè't nzhak miyizh da, Festo, go xa' dox tsak; porke kwa'n nin lo go re' dox waliy, mbaino dox ñale. 26 Dub laxto'n ñilan lè' rey Agripa nane ka rê kure', kuze' kidizhne dub laxto'n lo xa', porke kure' gat lè't xla'n ngoke. 27 Lè'ò, rey Agripa, çchi ñila go rê kwa'n midizh rê profet, rê xa' kwa'n midizh por Dios nzhalat? Per na nane, lè'ò ñila kai.

28 Orze' nzhab rey Agripa lo Pab: —Xche'p win tsa ngalal yeka ngak da tu men che'n Jesukrist.

29 Orze' nzhab Pab: —Waneï, ter xche dizha lo go o tu rratsai, Dios nane, dub laxto'n nzhaklan, gat lè't nab go yilai, sino ke rê go, xa' kwa'n nzhin re', per gat nut li'b go nela xmod nali'b da re'.

30 Orze' ngwatsuli rey, no gobernador; mbaino Berenice, no kun rê xa' nzob kun lè' bixa'. 31 Orze' nguro' nab bixa' tu lad, midizh bixa', nzhab bixa':

—Miyi' re', yent kwan nak xa' par ñal gat xa', no ni par yo xa' lizhyi'b.

32 No orze' nzhab rey Agripa lo Festo: —Miyi' re' ngak ngaliya' be xa' chi nanganab' xa' ngagobe' rey César kwent che'n xa'.

27

Ñanu men Pab yezh Roma

1 No or mixè'l xa' nile' mandad no par lazh men Italia, orze' ngwala' xa' Pab no más rê xa' nzho lizhyi'b, ña bixa' ya' tu capitán xa'

lè Jul. Xa' re' nile' mandad lo xo'p gayo' sondad che'n rey César. 2 Orze' mikè' xa' no le'n tu bark kwa'n nzè yezh Adramitio, par dede rê pwert kwa'n ña'n lazh men Asia. Mbaino kun no nzha Aristarco, tu xa' nzè yezh Tesalónica kwa'n ña'n lazh men Macedonia. 3 No xtu riyè'l mizhin no pwert kwa'n ña'n yezh Sidón. Ze', wen dox mile' Jul lo Pab, nguziyèl xa' ngwatswi' Pab lo rê xa' nichè'l Pab yezh ze', par miza' rê xa' ze' kwa'n naki'n Pab. 4 No or nguro' bark yezh Sidón, dox nzo mbi, kuze' nguruya' bark al nez al ya' ro' yezh kwa'n lè Chipre, kwa'n nzhin tsao' nitsdo'. 5 Orze' nded nka'n bark lazh men Cilicia, mbaino lazh men Panfilia, orze' mizhin no pwert yezh Mira kwa'n ña'n lazh men Licia. 6 Ze' nzob la xtu bark kwa'n nzè yezh Alejandria, nzhai par lazh men Italia, orze' mikè' capitán no le'n bark ze' par zhin no plo nzha no. 7 Nayax ngubizh nzhezè no le'n bark ze', dox la chaolazh nzhai, no dox la bid nded no ro' tu yezh win kwa'n lè Gnido, kwa'n nzhin le'n nitsdo', no stubi gak ka, dox nzo mbi dilant plo nzha no, ze' nded nka'n no ro' xtu yezh win kwa'n lè Salmón, kwa'n nzhin le'n nitsdo', orze' ngulowèlt no ro' lazh men Creta, kwa'n nzhin ska tsao' nitsdo' ze'. 8 No dox pe'n nzhadet no ze', haxta mizhin no plo lè Buenos Puertos, kwa'n ña'n gax yezh Lasea.

9 Dox la xche kile' no nez, no nazhe'b la par zè met kun bark, porke lè' mbèo' niro' mbi mizhin la, mbaino nded la rê zhè kwa'n nina'b men Israel lo Dios, gat nzhaot bixa' dub zhè. Kuze', nzhab Pab lo rê xa' nzho le'n bark ze':

10 —Lè'ò mbee'; niwi'n, dox jwals bixche bark mbaino lè' rê kwa'n nzho le'ne gat lè't kwa'n zhine; mbaino gat lè't nab rê kuba'i, haxta jwals nu be gat.

11 Per lè' capitán che'n rê sondad, más mbin xa' ro' xa' nitsè' bark, no ro' xa' nak che'ne; lè' kwa'n nzhab Pab nangont xa'. 12 No lè' pwert ze' gat went kwèz bixa', porke lè' mbèo' kwa'n niro' mbi nzhazhin la. Kuze' rê bixa' mile' xigab, más wen rutin bixa' ze', wi' bixa' nabei chi zak zhin bixa' pwert Fenice, kwa'n ña'n lazh men Creta; ze' más wen mile' bixa' xigab te'd bixa' mbèo' kwa'n niro' mbi.

Nguro' tu mbi nazhe'b le'n nitsdo'

13 Orze' gal yèt nguzublo nguro' che'p mbi, mile' bixa' xigab, lè' bixa' zhin ka plo nzha bixa', orze' mixèk bixa' bark, ña bixa' naka'n ro' lazh men Creta. 14 No gat lè't be's xchèi, lè'chi nguro' tu mbi nazhe'b kwa'n lè Nordeste, kwa'n nzè al ya' dizde Creta. 15 Orze' kixonu mbi bark, dox nayeï, yentra' kwan ngak ngale' no, kuze' mila' no ñanu mbi bark plo nzhaklai. 16 Dub kixonu mbi

bark, nded bark al yët ro' tu yezh kwa'n lë Clauda, plo nitsa'p che'p mbi. Orze' se'tsa pe'n mile' no gan ngure no kano win par ngulo noi le'n bark. ¹⁷ No or ngulo noi le'n bark, orze' mili'bd'o no pla do' nacha' xan bark al yët, par nabile, no nu nizheb bixa', napa' gal bark lo tu lom kwa'n nzob le'n nitsdo' plo lë Sirte, kuze' mila bixa' lar ro che'n bark kwa'n nikë lo mbi, orze' mila bixa' ñaxonu mbi bark plo nzhaklai. ¹⁸ No xtu riyë'l, stubi naye kixonu mbi bark, kuze' ngulubi bixa' che'p kwa'n nzho le'n bark, par mixax bark che'p. ¹⁹ No ngubizh mion, kun mis ya' bixa' ngulubi bixa' le'n nitsdo', rë nak kwa'n naki'n par zë bark. ²⁰ No or nzha nayax ngubizh, no nayao' lo ngubizh, no ni mbël gat nilu't lo yibë', no stubi nzo mbi nazhe'b, orze' ngale'tra' no xigab, chi ngale' no gan lo kwa'n nazhe'b re'. ²¹ No por dox la xche kizak no kure', kuze' yentra' cho kinu yalnila'n, orze' nguzo Pab xid rë no, ne xa':

—Lë' go mbee', lë' da ni ka lo go, chi ngon go kwa'n nin, nangaro't be lazh men Creta, nes nangazakt be rë kwa'n nazhe'b re', orze' rë kwa'n ngazhinu be. ²² Per nal nin lo go, bixek go no nazhebt go, porke ni tu be nagatta'; ter bil bark, ²³ porke na'g guxin, ngurulo tu ganj kwa'n mixë'l Dios da, no Me nilen kwa'n nzhakla. ²⁴ Ne ganj lon: “Nazheb'tal Pab, porke naki'n zhinal lo rey César. jBiwi! Dios mine' yalnayë' yalnaban che'n rë xa' kwa'n nzë kun lu. Yent cho ga.” ²⁵ Kuze' nin lo go mbee', nazhebt go no bixek go; porke na ñila widi'zh che'n Dios, lë'i gak nela xmod mid'i'zh ganj lon. ²⁶ Per lë' bark ya'n cho'n yek tu lom kwa'n nzob tsao' nitsdo'.

²⁷ No or nzha chida yë'l nzo mbi nazhe'b re', laba'i-lare'i kixinui bark le'n nitsdo' kwa'n lë Adria, pas garol yë'l mile' rë xa' kitsë' bark xigab, ¿per chi walika nzhazhin bark ro' tu yezh? ²⁸ Orze' miche'x bixa' plak na'ch nits di lo yuo, pas nzhoi di na'che como gal bichi' bixo'p metr; no más dilant miche'x bixa'i xtu wëlt, nzhoi como gal bigazh metr di na'che. ²⁹ No por nizheb bixa', napa' yai ta' ke, kuze' mila bixa' tap yi'b ro kwa'n nak ganch, xan bark al tras par kwëze; mbaino ngokla bixa', oj yanilyuo ga. ³⁰ Orze' mile' xa' nitsë' bark xigab, ngaro' bixa' xla'n lo rë men. Kuze' mila bixa' kano win le'n nits lo bark, mile' bixa' nela tu men kil'i'b bark ga', nela xmod nile' ka bixa'. ³¹ Per or une Pab kure', orze' nzhab xa' lo capitán, no lo rë sondad:

—Chi lë' rë xa' ba' rutin le'n bark, ni tu be nale't gan lo kwa'n nazhe'b re'.

³² Orze' micho' rë sondad do' kwa'n nzen kano win, par ñaxunu nitse. ³³ No or mer yanilyuo, kina'b Pab lo bixa', ke gao bixa', nzhab Pab:

—Nal re', nzha chop sman, gat gao go; por dox kile' go xigab xmod gak go, kuze' gat gao go. ³⁴ Nal bin goi, dao go, par le' go gan lo kwa'n nazhe'b re', porke nin lo go, ni tu yichyek go nagabt.

³⁵ No or mid'i'zh Pab kure', orze' nguzen xa' tu pan, no miza' xa' xkix lo Dios lo rë men, no or michi'x xa'i, orze' kiyao xa'i. ³⁶ Orze' rë bixa' mbi'd gan, nu bixa' ndao. ³⁷ No di lo rë no, nak no chop gayo' nzho chon gal nzho chi'n bitub men kwa'n nzho le'n bark re'. ³⁸ No or milo'x ndao bixa' haxta plo miël ndao bixa', orze' ngulubi bixa' rë daded triu le'n nitsdo', par más mixax bark.

Mibil bark

³⁹ No or ngwanilyuo zhë laka, ngali'be't bixa' ro' yezh plo mizhin bixa'; per une bixa' tu lagún kwa'n gat na'cht, orze' ngokla bixa' ngachi bixa' bark ro' lagun ze'. ⁴⁰ Kuze', micho' bixa' do' kwa'n nzen yi'b ganch kwa'n nikwë'z bark, orze' mia'ne le'n nits; mbaino mixëk bixa' do' kwa'n nzen ya kwa'n lë timón kwa'n nile' nizë bark, orze' mikiya bixa' lar ro xtu wëlt le'n bark par ngazhin bixa' ro' lagún ze'. ⁴¹ Per mbiy' mbi bark plo nizhë'l nits, no ze' nguzobcho'n yek bark plo nzhin ya yux. No por dox nayi' rë bol che'n nitsdo', nguzubloi kichile xan bark. ⁴² No rë sondad nzhakla, gut rë men kwa'n nikë lizhyi'b lo Festo, par yent cho le' gan le'n nits. ⁴³ Per lë' capitán che'n rë sondad, gat nzhaklat gat Pab; kuze' nangala't xa' ngat rë xa' nikë' lizhyi'b ze', kuze' nzhab xa': “Cho nzhak nixo'bxits, wats galo laka go le'n nits, par zhin go xtu ro' yuo bizh. ⁴⁴ No más go, guzen go tab che'n bark, mbaino cho go guzen di ke kwa'n yaga' ya' go che'n bark, par gak zhin go xtu ro'.” Se' ngok mizhin no xtu ro' yuo bizh, yent kwan ngazak no.

28

Mizhin Pab tu yezh win kwa'n lë Malta kwa'n nzhin le'n nitsdo'

¹ No or mite'd la no rë kwa'n nazhe'b re', or mizhin no ze', mbin no, lë' yezh win ze' lë Malta. ² Mbaino rë men nzho ze', dox wen mile' bixa' kun no; mizo'l bixa' tu ki ro par bizh no, porke dox nzo yiu no nayag ze'. ³ Orze' ngwaka' Pab tu de'zh ya bizh, no or mixo'b xa'i lo bël, por yalnazho' che'ne, le'n ze' nguro' tu mbë'l nayi' ndao ma ya' Pab, mbaino nzentip ma ya' xa'. ⁴ Or une rë men nzho yezh ze'i, lë' mbë'l nikinal ya' Pab, orze' kidi'zh bixa' lo wech bixa':

—jPas segur xa' nzhut men xa' re! Ter mile' xa' gan le'n nitsdo', lë' xa' kix kwa'n mile' xa', porke lë' naxnax che'n be dox nazhon.

⁵ Per nguzhi'b Pab ya' Pab par ngob ma lo bël, no yent kwan ngazak xa'. ⁶ No xe

kimbëz lo rë men nzhin ze', nabei cho or ziki xa', o yachin xa' tuli gat xa'. Xchè xe niwi' rë men ze', yent kwan kizak xa', orze' xtu mod mile' bixa' xigab, nzhab bixa':

—Pas tu dios xa' re'!

⁷ Gax ze' nax xud che'n tu xa' lë Publio, xa' ze' más tsak xid rë men yezh Malta re'. Dox wen miwi' xa' lo no, kuze' mbiy' xa' no lizh xa' plo nguio no chon ngubizh; dox wen mile' xa' kun no, yent kwan ngok jwalt no lizh xa'. ⁸ No lë'tsa orze' nzhakne xuz Publio, tuli nax xa'. Nizak xa' xlë', mbaino yalnzhao. Orze' nguio Pab lo xa', no mina'b Pab lo Dios por lë' xa', no or migal Pab xa', lweg'a miak xa'. ⁹ No or mbin rë men nzho yezh ze' kure', orze' rë men nzhakne ngwa lo Pab; no rë xa' miak. ¹⁰ No dox wen mile' men yezh ze' kun no, no or ngol nguro' no ze', mine' bixa' rë kwa'n naki'n no par nez.

Mizhin Pab yezh Roma

¹¹ Or nzha chon mbë'o' nzha nzho no yezh Malta re', orze' nkë no le'n tu bark kwa'n nzhë yezh Alejandria, mite'de mbë'o' nayag plo nguio no re', mbaino nikë winab che'n chop dios yeke kwa'n lë Castor no Pólux. ¹² Or mizhin no yezh kwa'n lë Siracusa, ze' mia'n no chon ngubizh. ¹³ Orze' nguro' no, nkiya no par yezh Regio. No xtu riyë'l, nguro' tu mbi al nez plo nzë no, no ngubizh mirop, mizhin no yezh Puteoli. ¹⁴ Ze' mizhë'l no xpla men che'n Jesukrist no mbiy' bixa' no lizh bixa', ngulëz no tu sman lo bixa'. Ze' nguro' no par nzha no yezh Roma. ¹⁵ No or mbin rë men che'n Jesukrist xa' nzho yezh Roma, lë' no nzhazhin la, orze' mbi'dkinez bixa' no haxta yezh Foro che'n Apio, no yezh kwa'n lë Chon Taberna, par mizhë'l no kun lë' bixa' ze'. No or une Pab rë xa' re', miza' Pab xkix lo Dios, no miro'bla Pab. ¹⁶ No or mizhin no yezh Roma, lweg'a ngwala' capitán rë xa' nzho lizhyi'b ze' lo xtu komandant xa' nile' mandad yezh Roma. No nguziyël comandant re', ña Pab lizh Pab, no tutsa sondad nzhakë par kina Pab.

Kidi'zh Pab widi'zh che'n Jesukrist yezh Roma

¹⁷ Or nzha chon ngubizh mizhin Pab yezh Roma, orze' ngurez'h Pab rë men Israel xa' nak zhi'n kwa'n nzho ze'. Or nguzhin bixa' lo Pab, orze' nzhab Pab:

—Wecha, yent kwan milen lo rë men che'n be, no ni gat nzhapa nale'tra' go rë kwa'n mila' rë xuz be xa' nzhala. No dub se', michi rë men che'n be da yezh Jerusalén lo rë men Roma. ¹⁸ Per or une bixa' yent kwan nak da, orze' ngokla bixa' ngaliya' bixa' da, porke miwi' bixa' yent kwan nak da par ñal gat da. ¹⁹ Per net rë men Israel kwa'n nzho ba', ngaliya' bixa' da. Kuze' por lë' bixa' mile', guna'ba lë' rey César kube' kwent da, per gat lë't kuze' dizha tu kwa'n nak rë men

da. ²⁰ Kuze' ngurezha go, par ne go, mbaino par gon go kwan dizha. Nali' da kun kaden re', namás por ñilan nela xmod ñila rë men Israel; lë' rë men ngut ruban.

²¹ Orze' nzhab rë men nzhin ze':

—Yent cho tu yech gat zhin lo no por rë xa' nak zhi'n lazh men Judea, por kwa'n nakal; no ni tu wech be gat yi'd, ne tu kwa'n gat lë' nakal. ²² Per nal nzhakla no gon no kwa'n ne yubal; porke nzho no, rë plo nidi'zh men nakap tich rë kwa'n nilu'l, rë kwa'n nagat gon men ba'.

²³ No mia'n bixa' di'zh tu ngubizh, lu' Pab widi'zh che'n Dios por Jesukrist lo bixa'. Zhë ze', dox migan men Israel plo nzho Pab. No dub zhë ze', milu' Pab lo men, chi nagon men ro' Dios, nazhe'be. Kuze' rë men une, walika lë' Dios mixë'l Jesús, como lë'la xmod nzob ka lo ley kwa'n mila' Dios lo Muisés, mbaino nela xmod mididi'zh ka rë xa' mididi'zh por Dios nzhala. ²⁴ Nzho men ze' mile' xigab walika kwa'n mididi'zh Pab, mbaino nzho xa' mile' xigab gat walite. ²⁵ No por nangale' bixa' tutsa xigab, nguzublo ña bixa'; maska nzhab Pab:

—Kuze' ka, se' mididi'zh Sprit che'n Dios, or mididi'zh Me por profet Isaías lo rë men che'n be, chi tiemp, or nzhab Me:

²⁶ Wa, wadi'zh lo rë men yezh re';

guzh lo bixa':

Ter gon go xtizha,
per nazobyekt goi;
no ter xe wi' go lo rë kwa'n lun lo go,
per nalibe't go kwane,

²⁷ porke dox nad laxto' rë men re',

nayao' nzha bixa',
mbaino nayao' lo bixa'.

Chi nangak bixa' sa',
lë' bixa' nganei mbaino ngon bixa'i,
no ngalibe' bixa'i dub la bixa',
orze' ngayëk bixa' lon par ngaliwena bixa'.

²⁸ Orze' nzhab Pab:

—Biwi' go, dizde nal, lë' Dios za' xtu mod ban cho la men, mbaino lë' rë men re' zobyeke.

²⁹ No or milox mididi'zh Pab kure' lo bixa', orze' nkanez rë men ze'; no dub ña bixa', dox kichë'ro' bixa'.

³⁰ No chop li'n komplet, ndix Pab plo nguio Pab yezh re', no dox wen mile' Pab lo rë men kwa'n ngwatswi' lo xa'. ³¹ Lo rë nak men ze', naye nidi'zh Pab, nazhe'be chi lë' bixa' nagon ro' Dios, mbaino milu' Pab widi'zh che'n Señor Jesukrist dub lo rë nak men kwa'n nzhin ze', nangayot ngazhe'b Pab milu' xa' lo rë men ze', no yent cho ngaka milu' Pabe.

Yech kwa'n mixë'l Pab lo rë men che'n Jesukrist, xa' nzho yezh Roma

Ma go wech no bizan, ¿chi wen ka go?

¹ Na Pab, nak da tu mos nado lo Jesukrist. Dios ngurezh da, no ngule Me da par gak da tu apost, tu xa' mixë'l Dios, par lun widi'zh nazhon che'n Me lo rè men.

² No nzhala, mila' Dios widi'zh re' lo rè xa' midì'zh por lè' Me, no rè xa' ze' midì'zh widi'zh re' lo be, nela xmod mizobni' bixa'i lo yech kwa'n mikë' bixa'. ³ No rè widi'zh re' nidi'zhe Xga'n Dios, Me nzë ben che'n Dabi, tu men yizhyuo, ⁴ per por Sprit che'n Dios, nak Jesukrist Xga'n Dios, no por yalnazon che'n Dios, nguruban Jesukrist, Me nile' mandad be. ⁵ Por Jesukrist, mile' Dios dox wen kuda or ngule Me da par lun widi'zh che'n Me, par rè men yizhyuo yila Me no gon bixa' ro' Me. ⁶ No xid rè men re', ngurezh Dios go, nes par nu go gak men che'n Me. ⁷ Kixëla yech re' lo rè go, go xa' nzho yezh Roma. Dios nazhi' go, no ngurezh Dios go par gak go nab tsa par Dios. Lè' Xuz be Dios, kun Jesukrist, Me nile' mandad be, gaku no par zi go wen dizde le'n laxto' go.

Nile' Pab xigab, yatswi' xa' ma rè men Roma

⁸ Galo laka por Jesukrist, nizan xkix lo Dios por kad go, porke rè plo nzhon men lè' go ñila Jesukrist, no dox wen nidi'zh men go. ⁹ Dios nane ka, zilita' nina'ba lo Me por go, Dios Me nzhona ro' kun dub laxto'n, no nilun widi'zh nazhon che'n Me kwa'n nidi'zh por Jesukrist. ¹⁰ Zilita' kina'ba lo Dios par yid'tswi'n ma go, nabei chi lè'i nzhakla Dios, ¹¹ porke dox nzhaklan yid'tswi'n ma go, par gakkun go, más ro'b go lo rè che'n Dios, nes par zo go más wen kun Dios; ¹² se' le' be par gaku be rè guchin be, por xmod ñila kad be tutsa widi'zh nazhon che'n Dios por Jesukrist.

¹³ Rè go wech no bizan, nzhaklan gon go, dox pazhë ra' nzhaklan yid'tswi'n ma go, per nagakte, porke nzho kwa'n nala't lene. Kuze' nzhaklan yala, nes par nu rè xa' kwa'n nagat yila widi'zh che'n Dios, yila bixa'i, nela xmod milen xtu plo xid rè xa' gat lè't men Israel. ¹⁴ Dios mixë'l da yalun widi'zh che'n Me lo rè men, ter lo xa' dox nzhake, o lo xa' nazu't; o lo xa' natsin, o lo xa' naxenla. ¹⁵ Kuze', nu lo rè go, xa' nzho yezh Roma; dox nzhaklan lun widi'zh re' lo go.

Widi'zh nazhon che'n Dios nile', niro' men lo kwa'n gat lè't

¹⁶ Gat nitulata' dizha widi'zh nazhon che'n Dios por Jesukrist, porke chi lè' rè

men yilai, lè'i nak yalnazon kwa'n kinu Dios, par ro' rè men lo rè kwa'n nzë'b xki bixa', wanei choi, men Israele o men gat lè't men Israele. ¹⁷ Lè' widi'zh che'n Dios por Jesukrist, se' nzhabe, namás yila be Dios par mbe be lo Dios, nela xmod nzobni' ka lo Yech che'n Dios: "Chi yila tu men widi'zh che'n Dios, namás por kure' lè' xa' ban."

Rë men nzë'b xki lo Dios

¹⁸ Dios xë'l kwa'n zakzi rè men dizde lo yibë', rè xa' kwa'n gat ñilat nzho Dios, mbaino par rè xa' kwa'n naban nela xmod niza' la bixa'. No por naban bixa' lo kwa'n gat lè', nitse'd bixa' más rè men, nes par nale' rè men re' kwa'n nzhakla Dios. ¹⁹ No wenawen nane xa' xmod nak Dios, no xmod nilibe' men Dios, porke lè' Dios mizini la yek bixa'. ²⁰ Zak ka libe' men Dios chi zen men yek men por rè kwa'n mizuxkwa' Dios, pues namás dizde nguiuxkwa' yizhyuo, kuba' nilu' xmod nak Dios mbaino xmod nak yalnazon che'n Dios kwa'n nayot lox, ter naga ne men Dios. Kuze' yent cho gak gab lo Dios: "Neta xmod nak kwan nile'."

²¹ No ter milibe' bixa' Dios, per nangawi't bixa' lo Dios nela xmod ñala, no ni nangaza' bixa' xkix lo Dios, lè'la ngwazhë yek bixa' di xigab gat lè', no tuli nakao mi'a'n yek bixa'. ²² Nidi'zh bixa' lè' bixa' xa' nzhak, per lè' bixa' ngok xa' más yent kwan nzhon. ²³ Maska bixa' ngab nazhon Me kwa'n walia Dios, Me naban par dubta', lè'la lo rè winab nguzuxib bixa', che'n rè men nzhah, no haxta lo rè winab che'n rè miyin, mbaino che'n rè ma kwa'n nizë nazubxax, ngok Dios che'n bixa'.

²⁴ Kuze' mila' Dios, mile' bixa' rè xigab gat lè't kwa'n nzho yek bixa' ze'; kuze' miban bixa' kun xa' gat lè't tsa' bixa', mile' bixa' kwa'n gat lè' kun kwerp che'n bixa'. ²⁵ No maska bixa' ngayila widi'zh che'n Dios, lè'la kwa'n gat wali ngwayila bixa'; nguzuxib bixa' lo kwa'n michao' Dios, no mile' bixa' lani che'n rè kure' lugardi ngazuxib bixa' lo Dios Me michao' rè kure', par ngale' bixa' kwa'n nzhakla Dios, Dios Me ñal di'zh men wen par dubta'.

²⁶ Kuze' mila' Dios le' bixa' rè kwa'n nile', nitula men. Haxta nguio pla una' xid bixa' michë' biuna' xmod nak bixa', lugar di ban bixa' kun miyi', lè'la kun mis tsa' una' bixa' ño laxto' bixa'. ²⁷ Nuska nguio pla miyi', mila' bixa' una' che'n bixa', no nazhe'b nguio laxto' bixa' tsa' miyi' bixa'. Miyi' kun miyi' miban bixa', no por miban bixa' sa', Dios mixë'l yalyizh kwa'n ñal bixa'.

²⁸ No por nangayot laxto' bixa' yo Dios yek bixa', kuze' mila' Dios, nile' bixa' xigab gat lè', par le' bixa' kwa'n gat ñalt. ²⁹ Kuze' ngwazhë yek bixa' di pura xigab gat lè' kun xigab nakap no yalniwix, mbaino ño laxto'

bixa' le' bixa' rë lo kwa'n gat lë' re': niwix bixa' che'n xtu men, no nzhut bixa' men, no nidil bixa' par kwin bixa' part, no nikide bixa' wech bixa', no or nzhon bixa' nile' men tu kwa'n gat lë', más nichao' yek bixa'i, no lwega' nidi'zh bixa' kwent che'n xtu men. ³⁰ No men di'zhyix bixa', no niyi' bixa' nine bixa' Dios, no nila ro' bixa', no marian bixa', mbaino nidi'zh bixa' lë' bixa' más nzhak lo rë men; no zilita' nile' bixa' xigab xmod le' bixa' más kwa'n mal, no gat nzhont bixa' ro' xuz bixa' ni ro' xna' bixa'. ³¹ Nak bixa' men yent kwan nizobyeq, no gat nile't bixa' kwa'n ña'n bixa' di'zh, no gat nizinet la bixa' ni tu men mbaino gat nilast laxto' bixa' men. ³² No nane bixa' kwan nzobni' lo ley che'n Dios, rë xa' nikizë sa', ñal gat bixa'; no ter nzhon bixa' i, zilita' nikizë bixa' sa', no nizak laxto' bixa' or nine bixa' nikizë xtu men sa'.

2

Dios nile' yalgustis xmod ñale

¹ No chi nzhabal, nzë'b xki tu men, nul nzë'b xki, wane'i cho lu. Or nidi'zhal sa', tutsa nakal kun xa' ze', mis lu kile', nzë'b xkil. ² Per nane be, Dios nile' yalgustis xmod ñale kun rë xa' walika nzë'b xki, nela lu ga'. ³ No lu, xa' nzhab nzë'b xki xtu men, mbaino chi tutsa nakal kun xa' ze', çkwan gabal, le'l gan, nazakzit Diosal? ⁴ çChon nile'l naya? Dios nzhakla gaknul, o, çchi nzhaklal zakzi Diosal? Per por dox kinu Me pasens kun lu, kixek Dios lol, kimbëz Dios par le'l xtu xigab, no nale'tra'l kwa'n gat lë'. ⁵ Per lu dox nad yekal, no gat nzhontle. Kuze' mis lu kitsiyar yalzi par lu, or gab Dios xmod gak kun kad men yizhyuo, par kix bixa' kwa'n nzë'b xki bixa' lo Dios nela xmod ñale, ⁶ porke Dios za' kwa'n gal kad men, por kwa'n mile' xa'.

⁷ No rë xa' zilita' nile' kwa'n wen, por nzhakla bixa' wi' Dios wen lo bixa', nes par ban bixa' dubta' kun Dios; orze' Dios le', ban bixa' dubta' kun lë' Me. ⁸ Per lë' Dios niyi' mbaino dox zakzi Me más rë men, xa' nikwa'n kwa'n nzhakla bixa' namás, rë xa' gat nile't kwa'n wen, sino ño laxto' bixa' kwa'n gat lë', ⁹ porke Dios zakzi rë men kwa'n nile' rë kwa'n gat lë', galo laka rë men Israel, orze' nu rë men gat lë't men Israel. ¹⁰ Per par rë men nile' pura kwa'n wen, Dios wi' wen lo bixa', mbaino le' Dios yo pura kwa'n wen laxto' bixa', galo laka kun rë men Israel, no nu kun rë men gat lë't men Israel, ¹¹ porke gat nibet Dios men, no cho nzë'be kixe.

¹² Rë men gat lë't men Israel, ter gat kinut bixa' ley kwa'n mila' Dios lo Muisés, per lë' Dios zakzi bixa' por nzë'b xki bixa'; mbaino rë xa' kwa'n nzë'b xki lo Dios ter nilibe' bixa' ley, más zakzi Dios bixa' or gab Dios xmod gak kun kad bixa' por nilibe' bixa' ley, ¹³ porke gat nimbet men lo Dios nab

por gon bixa' ley, sino nab tsa por nile' men kwa'n nzhab ley, nimbe men. ¹⁴ Rë xa' gat lë't men Israel, gat kinut bixa' ley, per or nile' bixa' kwa'n nzhakla ley, ter yent cho nzhabe lo bixa', kure' nilu', nu bixa' nilibe' ley, ter nanet bixa' ley kwa'n mila' Dios lo Muisés. ¹⁵ Rë kwa'n nile' bixa' nilu', nane bixa' kwan nzhakla ley, porke kinu bixa'i yek bixa' por kwa'n nizi bixa' ba', ba' nilu' nzhole laxto' bixa'. Nzhole or nizi bixa' wen ka kwa'n nile' bixa', no nzhole or nizi ska bixa', gat lë't kwa'n nile' bixa'. ¹⁶ Por widi'zh nazhon che'n Dios por Krist Jesús kwa'n nidizha re', yo tu ngubizh, lë' Dios gab xmod gak kun kad men por Jesukrist, por rë kwa'n naga'ch nzhole laxto' bixa'.

Ley kwa'n mila' Dios lo Muisés no lo rë men Israel

¹⁷ Lu xa' nzhab, lë'l men Israel no ñilal nab tsa ley, kuze' nzhabal, Dios ninel wen por nakal men Israel, ¹⁸ no nzhakbe'l kwan nzhakla Dios, mbaino mitse'dal ley par kwel kwa'n más wen, ¹⁹ mbaino sigur nzhapal, lë'l lu' nez che'n Dios lo rë xa' nak nela men nikal lo ga', mbaino zinil nez che'n rë xa' nzhole lo nakao. ²⁰ Namás por nilibe' ley, nizil nela tu xa' nilu' ley lo men yent kwan zu' tuli lo kwa'n nak che'n Dios. Dox sigur nzhapal, por nzhakbe'l ley, nizil ke guzhë, miro'b la xigab che'nal lo kwa'n nak che'n Dios, mbaino nizil, wali kwa'n nidi'zhal. ²¹ No chi lu maestr, xa' nilu'i lo men, çchon natse'dal mis lu? Lu kwa'n nilu': "Naliwa'nt men", mbaino mis lu niliwa'n. ²² Mbaino nu nilu': "Nabant men kun xa' gat lë't tsa' xa'", no mis lu nile' kure'. No nidilal rë xa' nizuxib lo rë winab, no mis lu niliwa'n kwa'n nzhole le'n yado' che'n rë winab. ²³ Nidi'zhal, mitse'dal ley, per gat nile'tal kwa'n nzobni' loi, no por lu namás nakap nzhudi'zh men Dios. ²⁴ Kuze' lo widi'zh che'n Dios nzobni' widi'zh re': "Rë men gat lë't men Israel nidi'zh kwa'n gat lë'tich Dios por dol che'n go namás."

²⁵ Chi nile'l kwa'n nzobni' lo ley, orze' nzhole ka kwent nikë señ kwa'n lë circuncisión kwerp che'nal; per chi gat nile'l kwa'n nzobni' lo ley, yent cho kwent nikë señ re' kwerp che'nal. ²⁶ No chi tu xa' gat lë't men Israel, xa' gat kinut señ re' kwerp che'n xa', no chi lë' xa' le' kwa'n nzobni' lo ley, lë' Dios wi' lo xa' nela men kwa'n nikë ka señ kwerp che'n. ²⁷ Xa' gat nikët señ re' kwerp che'n, per nile' xa' kwa'n nzobni' lo ley, mis lë' xa' re' gak gab, yent kwan zu' nikë señ kwerp che'nal, ter kinul rë ley lo yech per gat nile'tal kwa'n nzobni' loi. ²⁸ No na'bd'i'zha lol, çcho xa' walika men Israel, no cho xa' walika nikë señ kwerp che'n kwa'n lë circuncisión? çChi xa' kwa'n kinu señ kwerp che'ne namás? ²⁹ Yent kwan zu'

kuba'; kwa'n más tsak nak, señ kwa'n miké' yub Sprit che'n Dios le'n laxto' men, no gat nikéte por ley kwa'n nzobni' lo yech, no ré men re' niwi' Dios wen lo, ter nile' naya' ré men kinu señ kwerp che'n lo ré men niyene per le'n laxto' bixa' niké señ.

3

¹ Nal ne be: “¿Kwan zu' par tu men, nak xa' tu men Israel?, o, ¿kwan zu' por niké señ kwa'n lè circuncisión kwerp che'n men?”

² Lè'i wen ka, por nzho nayax kwa'n gak di'zh be. Galo laka, Dios miza' widi'zh che'n Dios tse'd ré men Israel, no par lu' bixa'i lo más men. ³ No ter nzho bixa' nangale't kwa'n mile' Dios mandad lo bixa', ¿chi por kuba' nangale't Dios kwa'n mila' Dios di'zh lo bixa'? ⁴ ¡No gat lè't sa'!, porke ter ré men yizhyuo nidi'zh pura kwa'n mbèl, per lè' Dios nidi'zh pura kwa'n wali, porke se' nzobni':

Kure' nzhon be, Dios nidi'zh pura kwa'n wali,

no or ké' men kixu'l, por nidi'zhal pura kwa'n wali, lu ka le' gan.

⁵ No or nile' be ré kwa'n gat lè', orze' nizu' par niza' be kwent, ke nab tsa Dios nile' kwa'n wen, no, ¿chi zak gab be, gat lè't nile' Dios or nizakzi Me be por nzè'b xki be? (Kidizha nela xmod nile' tu men yizhyuo ga' xigab.) ⁶ Gat nakta' Dios sa', porke chi gat nile' Dios kwa'n ñal, ¿xmod gab Dios kwan gak kun kad ré men yizhyuo? ⁷ Per chi nilen ré kwa'n gat ñal, no kure' nilu' nab tsa Dios nile' kwa'n nali, orze' pas cho le' xigab se': “¿Chon gab Dios xmod gak kuda por nakap da? ⁸ No chi lè'i sa' nak, ¿chon nale' be pura kwa'n gat lè', par más gaku Dios be?” Kidizha se', porke nzho men nidi'zh, kure' nilun lo men. Ter nidi'zh bixa' sa' por da, per Dios zakzi bixa' por ñal bixa'i.

Rè be nzè'b xki lo Dios

⁹ Na'bdizha lo go, ¿chi más wen nzha men Israel lo ré xa' gat lè't men Israel? ¡Gat lè't sa'!, porke lè'da ni la lo go, tutsa nak men Israel kun ré xa' gat lè't men Israel, porke ré men nali'bd'o' lo ré kwa'n gat lè' kwa'n nak bixa'. ¹⁰ Se' nzobni' lo Yech che'n Dios: Yent ni tu men, xa' nile' kwa'n nali lo Dios;

¹¹ yent cho nilibe' kwa'n nali, no yent cho nikwa'n Dios.

¹² Ré men mila' nez che'n Dios, no ré men nzho nez nakap;

yent cho nile' kwa'n wen, yent per ni tu men.

¹³ Ré widi'zh kwa'n niro' ro' bixa' nak nela tu ba' kwa'n naxa'l,

plo nzho men ngut kwa'n nila' ga';

¹⁴ no widi'zh kwa'n niye bixa', nak nela benen che'n mbè'l ga';

¹⁵ no dox nayenla bixa' par gut bixa' men,

¹⁶ ré plo nikizè bixa', no nila' bixa' men tuli se'tsa.

¹⁷ Nagat tse'd bixa' xmod kwin bixa' wen kun men,

¹⁸ no gat nizhe'bt bixa', nine bixa' Dios.

¹⁹ No nane be, ré kwa'n nzobni' lo Yech che'n Dios, nzobni'y par ré xa' naki'n le'i, nes par ré men tsao' ro', no par gab Dios xmod gak kun kad men yizhyuo, ²⁰ porke yent cho men ya'n nambe lo Dios por nile' xa' kwa'n nzobni' lo ley. Nabtsa nizu' ley par ne men, lè' men nzè'b xki lo Dios.

Nal nin, xmod gak mbe men lo Dios

²¹ Per nal nin gat lè't por leye. Dios milu' la xmod gak mbe men, no kure' nidi'zh ka ley, no haxta ré xa' kwa'n mid'i'zh por Dios, mid'i'zh kure'. ²² Dios nitsumbe men nab tsa por ñila men Jesukrist, no gat nibet Dios men, wanei choi, porke tutsa nak ré men lo Dios, ²³ porke ré men nzè'b xki lo Dios, no ré bixa' por kure', gat naktra' bixa' nela xmod nzhab Dios, gak bixa'. ²⁴ Per por wen Dios, milats laxto' Me be, yentra' kwan naki'n le' be par mbe be lo Dios; nab tsa por kwa'n mile' Krist Jesús, nguro' be lo kwa'n nzhakla ley, le' be. ²⁵ Dios mixè'l Jesukrist par ngut Me lo krus; mbaino kun ren che'n Me, ndix Me kwa'n ñal ngayix ré men lo Dios. Se' milu' Dios, lè' Me nile' kwa'n ñal. Dizde nzhalala, nzhap Me pasens kun ré men por ré kwa'n gat lè' mile' men; nangawi't Dios lo kwa'n nzè'b xki men por wen Dios. ²⁶ Per nalre', mixè'l Dios Jesukrist par lu' Me, nab tsa Dios nile' kwa'n ñal, nes par ne men, dox nali kwa'n nile' Me, no par tsumbe Dios ré men, xa' yayila Jesukrist.

²⁷ Nal, ¿haxta plo mia'n kwa'n nidi'zh ré men, nzhab xa' tsak xa' lo Dios? Per par lo Dios, ¡yent kuba'! ¿Por cho ley ngoke sa? ¿Chi por mile' be kwa'n nzobni' lo leye? Gat lè't sai', lè'i nak nab tsa por ñila be Jesukrist. ²⁸ Yent cho men gab, más tsak men lo Dios, porke uno be, nzhak nambe men lo Dios por ñila xa' Jesukrist namás; no gat lè't por ngale' bixa' kwa'n nzobni' lo leye, porke yent cho gak le'i.

²⁹ O, ¿chi nab tsa ré men Israel nazhi' Dios? A'a, gat lè't nab bixa'i, sino ke nu ka ré xa' gat lè't men Israel nazhi' Dios. ³⁰ Lal nazhi' Dios ré nak men, mbaino lal nitsumbe Me men, wanei choi, ter men Israele o men gat lè't men Israel, chi lè' bixa' yila Jesukrist.

³¹ No chi pur kure', ¿gab be, nazu'tra' ley? ¡Gat lè't sa'!, sino ke na nilu, or ñila be widi'zh che'n Dios por Jesukrist, nile' be kwa'n nzobni' lo ley.

4

Kwa'n mile' Abraham

¹ Nal ne be, ¿xmod di'zh be por Abraham, xa' ngok xuz ré men Israel, por kwa'n mile'

xa'? ² No chi ngawi' Dios, lè' Abraham gat nzè'b xkit por mile' xa' rè kwa'n ñal, orze' ngak ngadi'zh Abraham, lè' xa' nak tu xa' tsak, per gat lè't lo Diose, ³ porke se' nzobni' lo Yech che'n Dios:

Nabtsa por ngwayila Abraham Dios, miwi' Dios lo xa',

nela lo tu men nambe par Dios.

⁴ Mbaino nane be, tu xa' nikè zhi'n, dimi kwa'n nzhax ka' xa', gat lè'ta' ti ka nzhaxe ka' xa', sino ke kwa'n ñal xa'i por zhi'n kwa'n mile' xa'. ⁵ Per tu men xa' ñila Dios, ter tu men nzè'b xki xa', per por ñila xa' Dios namás, lè' Dios wi' wen lo xa' nela lo tu men nambe ga'. ⁶ Se'ska midì'zh Dabi nzhala, por rè xa' ngwayila Dios namás, Dios miwi' lo bixa' nela lo tu men nambe ga' lo Dios, no gat lè't por mile' bixa' kwa'n nzobni' lo leye, no nangawi't Dios lo rè kwa'n gat lè' mile' bixa'. ⁷ Se' nzobni' lo Yech che'n Dios por Dabi:

¡Wen nzha rè xa' kwa'n nangawi't Dios lo rè kwa'n ngok nayi'lazh bixa' lo Me!

¡Rè xa' re' mitsao' Dios lo kwa'n nzè'b xki bixa'!

⁸ ¡Wen nzha rè men, rè xa' kwa'n nakixt kwa'n nzè'b xki lo Dios!

⁹ No nal, ¿chi nzha widi'zh re' nab tsa por rè xa' nikè señ kwerp che'n, o par nu rè xa' gat nikèt señe? Lè'da ni, par rè men nzha kure', porke Dios ngop kwent namás por ngwayila Abraham Dios. Por kure' namás, miwi' Dios lo xa' nela lo tu men nambe lo Dios ga'. ¹⁰ Or miwi' Dios lo Abraham se', ¿chi dispwes di nkè señ kwerp che'n xa'i, o or naga kèi xa'? Lè' go nane ka, kure' ngok or naga ngakè señ xa'i. ¹¹ No or nkè la señ kwerp che'n Abraham, kure' nak nela tu sey ga', ke lè' Dios miwi' lo Abraham nela lo tu men nambe ga', por ngwayila xa' Dios namás. No mile' Dios, lè' Abraham nak nela xuz rè xa' yila Dios, ter yent señ kwerp che'n bixa', per miwi' Dios lo bixa' nela lo tu men nambe ga' lo Dios. ¹² Mbaino nu nak Abraham xuz rè xa' nikè señ kwerp che'n, no gat lè't por nikè señ bixa'i namás, sino por nu ñila bixa' kwa'n nzhab Dios, nela xmod ngwayila Abrahame, or naga ngakè señ Abraham.

Dios miza' kwa'n wen nka' Abraham, namás por ngwayila xa' kwa'n mila' Dios di'zh lo xa'

¹³ Dios mila' di'zh lo Abraham, no lo rè xmè'd xa', che'n bixa' dub yizhyuo; per nzhab Dios kure' lo Abraham, gat lè't por mile' xa' rè kwa'n nzobni' lo ley ze'i; mila' Dios di'zhe namás por ngwayila xa' Dios, orze' miwi' Dios lo xa' nela tu men nambe ga' lo Dios. ¹⁴ O chi par rè xa' nile' kwa'n nzhab ley, mila' Dios di'zh, ka' bixa' dub yizhyuo; orze' yent kwa'n zu' kwa'n ñila

men Dios, mbaino yent ska kwan tsak kwa'n mila' Dios di'zh lo Abraham, ¹⁵ porke lo ley nilu', niyi' Dios por nzè'b xki men; per plo niyen ley, nagakt ne men, lè' bixa' nzè'b xki lo Dios. ¹⁶ Kuze' milats laxto' Dios be por wen Me, no par gak rè kwa'n mila' Me di'zh lo Abraham, par gal rè xmè'd Abraham kwa'n mila' Dios di'zh; no gat lè't nab lo rè xmè'd Abraham kwa'n nile' kwa'n nzobni' lo leye, sino ke nu lo rè xmè'd Abraham, rè xa' kwa'n ñila Dios nela Abraham ga', xa' kwa'n nak xuz, rè xa' ñila Dios, ¹⁷ porke se' nzobni' lo Yech che'n Dios: "Lu milen par gaxal xuz tu béd men yizhyuo." Lè' Dios nak Dios Me nile', niruban men, mbaino nu nak Me Dios kwa'n nidi'zh, rè kwa'n nagat rulo, per or nidi'zh Mei, nabe niru'loi.

¹⁸ Mbaino par Abraham, yentra' xigab gap xa' mè'd kun Sar, per ngwayila xa' widi'zh kwa'n mila' Dios di'zh lo xa', porke nane ka xa', lè' Dios le'i, kuze' tutsa xigab mile' xa', lè' xa' gak xuz tu béd men, por nzhab Dios lo xa': "Nal, nela nayax rè mbèl lo yibé' ga', gapal xmè'dal." ¹⁹ Mbaino ter nzhap la xa' pas como tu gayo' li'n, per naye nguzo xa' lo widi'zh che'n Dios, ngwayila xa'i, no ter nane xa', gat nile'tra' xa' xigab re', no nu ska Sar una' che'n xa', nagak-tra' wei' xin xa' por ngwagal la xa', ²⁰ per nangalè't Abraham chop xigab, naye nguzo xa' lo kwa'n ngwayila xa', haxta midì'zh xa', nazhon Dios, ²¹ no tutsa xigab mile' xa', ngwayila xa', lè' Dios gak le' rè kwa'n mila' Dios di'zh. ²² No por kure', Dios miwi' lo Abraham nela lo tu men kwa'n nile' rè kwa'n nzhakla Dios.

²³ Gat lè't nab par Abraham nguzobni' widi'zh re', ²⁴ nu ska par be nkèi, porke rè xa' ñila Dios, Dios nzhap kwent kure', wen niwi' Dios lo rè xa' re', Dios Me mile' nguruban Jesús, Me kwa'n nile' mandad be. ²⁵ No ngut Me por be, por nzè'b xki be lo Dios; per nguruban Me, par mbe be lo Dios.

5

Lo re' nzob xmod ban men kun Dios

¹ Nal, por ñila be Jesukrist, Me nile' mandad be, wen niwi' Dios lo be nela lo tu men nambe ga'. ² No por ñila be Krist, ngok nguzubi be lo Dios, no dub nizak laxto' be por dox wen Me kun be namás por ñila be widi'zh che'n Me, mbaino nizak laxto' be dub kimbèz be zhin zhè, gal be rè kwa'n nazhon kwa'n kinu Dios par be. ³ No gat lè't nab por kure' nizak laxto' be, nu ka rè or nizakzi be; porke nane be, or nided be loi, lè'i nizu' par nitse'd be xek be lo rè kwa'n nzè. ⁴ No por kure', lè' be ya'n wen lo Dios, orze' lè' Dios wi' wen lo be, kuze' nane ka be, lè' be gal kwa'n nazhon kwa'n kinu Dios par be. ⁵ Por kwa'n nane be re', nala't be chop

xigab, porke lè' Sprit che'n Dios, Me nzho laxto' be, nile' nazhi' be Dios mbaino nazhi' be men. ⁶ Kuze', nzho yalnazhi' laxto' be, porke dub yent kwan ngale' be, par ngayix be rë kwan nzè'b xki be lo Dios, Krist ngut por rë be, porke rë be nzè'b xki lo Dios. ⁷ No walika, yent cho ziyël gat por tu menaye, no ter nzho men ziyël gat por tu men wen. ⁸ Per Dios milu' nazhi' be, ter dub nzè'b xki be, Krist ngut por be. ⁹ No nal, por ren kwa'n mixo Krist or ngut Me por be, por kure' niwi' Dios lo be nela lo tu men yent kwan nzè'b xki lo Dios. Nal por Jesukrist, zakzitra' Dios be or zakzi Dios rë men por kwa'n nzè'b xki bixa', ¹⁰ porke chi dub nak be nela tu men nidil ga' kun Dios, une Dios be wen, miche' Xga'n Me kwa'n nzè'b xki be or ngut Xga'n Me por be, no nal por une Dios be wen, nix laka ro' be lo kwa'n nazhe'b kwa'n xè'l Dios par rë men por nguruban Xga'n Dios. ¹¹ Mbaino nu nizak laxto' be kun Dios por Jesukrist, Me nile' mandad be. Xkix Jesukrist por lè' Me une Dios be wen.

Adán no Jesukrist

¹² Nangont Adán ro' Dios; kuba' mile', nguio kwa'n gat lè' yizhyuo; kuze' rë men yizhyuo nzè'b xki lo Dios, mbaino nguio nzhat men. ¹³ Ni naga yo ley, lè' men mile' la rë kwa'n gat lè' lo Dios; ter nzè'b xki bixa' lo Dios per nangapt bixa' dol por niyen ley. ¹⁴ Per dizde zhè che'n Adán haxta zhè che'n Muisés, rë men ño nzhat, ter nangapt bixa' dol nela Adán ga', per ngut bixa' por Adán, mbaino Adán re' nak xa' lu' xmod nak Jesukrist.

¹⁵ Per gat lè't tutsa nak dol che'n Adán kun yalnazon kwa'n mine' Dios ka' be; por dol che'n Adán, tutsa miyi', nguio nzhat men, per por dox nazhi' Dios be, mine' Me yalnaban par dubta' ka' be por Jesukrist, xtu miyi'. Kuze', dol che'n Adán gat lè't tutsa nake kun yalnazon kwa'n mine' Dios ka' be, ¹⁶ mbaino, ter por dol che'n Adán re', nzhab Dios lo rë men: "Rë go nzè'b xki", per or dox miar rë kwa'n gat lè' nile' men, nzhab Dios lo rë men ñila Jesukrist: "Gat nzè'b xkitra' go." ¹⁷ Ter por tutsa miyi' mile' yalgut mandad lo rë men, per por xtu miyi' mile' nguio yalnaban kwa'n di' par dubta' par rë men xa' nzhab Dios lo: "Yentra' kwa'n nzè'b xkiu." Rë men re' miza' Dios tich guchin yalnazon nka' por ñila bixa' Jesukrist, mbaino le' bixa' mandad kun lè' Me.

¹⁸ Kuze', rë men yizhyuo nguio nzhat por dol che'n tutsa miyi'; se'ska por kwa'n wen mile' Jesukrist, nguio yalnaban par dubta' par rë men xa' nzhab Dios lo: "Gat nzè'b xkitra' go." ¹⁹ No por nangale' tutsa miyi' kwa'n nzhab Dios, kure' mile' tu bèd men nzè'b xki lo Dios; se'ska por mile' Jesukrist rë kwa'n nzhakla Dios, kure' mile'

dox nayax men mia'n nambe lo Dios. ²⁰ Or nguio ley, dox miar kwa'n gat lè' mile' men; per más kwa'ro ngok kwa'n nazhi' kun Dios be or miar rë kwa'n gat lè'. ²¹ No se'ska or mile' kwa'n gat lè' mandad lo men, mbi'ye xa' lo yalgut; no se'ska, or mile' yalnazhi' che'n Dios mandad, mbi'ye men lo yalnaban par dubta'; por ñila bixa' Jesukrist, mia'n nambe bixa' lo Dios.

6

Por nak be tutsa kun Jesukrist, nak be nela men ngut ga' lo kwa'n gat lè'

¹ Nal, xmod le' be? ¿Chi zibanra' be lo kwa'n gat lè' par más chizhi' Dios be? ² Per, igat nzhaklata' Dios sa!, no chi lè' be ya ngut la lo kwa'n gat lè', orze', xmod ban be xtu wèlt loi? ³ ¿Chi nanet go, rë be xa' ngoklèi' le' nits por nak be men che'n Krist Jesús; nak be nela tu men ngut ga' kun lè' Me por ngoklèi' be? ⁴ No nu, nak be nela tu men kwa'n miga'ch tutsa kun Jesukrist; ngut be par ruban be xtu wèlt, no par ban be par dubta', nela Jesukrist nguruban por yalnazon che'n Xuz Me Dios, ⁵ no chi tutsa ngut be kun Krist or ngoklèi' be por nak be men che'n Me, se'ska ruban be nela xmod nguruban Me. ⁶ Ñal tsila be, rë kwa'n ngok be nzhalala, lè'i nkè la lo krus kun Jesukrist, par nale'ra' kwa'n gat lè' mandad lo be, no par nabanra' be loi, ⁷ porke nela or nzhat tu men, nagaktra' le' rë kwa'n nzho yizhyuo re' mandad lo xa'; se'ska be, por ngut be tutsa kun Jesukrist, nagaktra' le' rë kwa'n ngok be nzhalala mandad lo be. ⁸ No chi ñila be, ngut be tutsa kun Jesukrist, se'ska yila be, lè' be banska kun Jesukrist. ⁹ Nane be, por nguruban Jesukrist, ya nayotra' gat Me; yentra' kwan le' yalgut kun lè' Me. ¹⁰ Dub miban Jesukrist yizhyuo re', ngokla kwa'n mal ngale' Me kwa'n gat lè'; per or ngut Me, milox rë kuba' par lè' Me; mbaino or nguruban Me, nab tsa kwa'n nzhakla Dios nizi Me le' Me. ¹¹ Se'ska go, bile' go xigab, lè' go nak nela tu men ngut ga' or nzè' xigab gat lè' yek go; naki'n le' go xigab, lè' go naban nab tsa par Dios por tutsa nak go kun Jesukrist.

¹² Kuze' nala'tra' go, le' kwa'n gat lè' mandad lo go, par nale'ra' go kwa'n nzhakla kwerp che'n go. ¹³ Nawei'tra' go kwerp che'n go lo kwa'n gat lè'; más wen guzubi go lo Dios, nela tu men ngut ga' lo kwa'n gat lè', no nguruban go xtu wèlt par le' go nab tsa kwa'n nzhakla Dios, ¹⁴ nes par nale'ra' kwa'n gat lè' mandad lo go, porke gat naki'ntra' le' go kwa'n nzobni' lo ley; kinu go yalnaban par dubta' namás por wen Dios kun go.

Nak be nela tu men nado ga' lo Dios

¹⁵ Nal, xmod le' be? ¿Chi zibanra' be lo kwa'n gat lè', porke gat naki'ntra' le' be

kwa'n nzobni' lo ley? ¹⁶ Dios gat nzhaklat sa'! Wen nane go, or nak go nela tu mos nado ga' lo xtu men, nile' go rē kwa'n nzhakla xa' porke lē' xa' nile' mandad lo go. No se' nak go, chi lē' go la', le' kwa'n gat lē' mandad lo go, lē' go gat. Per chi lē' go le' kwa'n nzhakla Dios, lē' go ban, no wi' Dios lo go nela lo tu men nambe ga' lo Dios. ¹⁷ Galo laka, kwa'n nzhakla kwa'n gat lē' mili'nui go, per nal re', xkix Dios, ngwayila go kun dub laxto' go widi'zh che'n Dios por Jesukrist, or milu' mene lo go. ¹⁸ No or nguro' go lo kwa'n gat lē', orze' ngok go nela tu men nado ga' lo Dios. ¹⁹ Kidizha lo go jwals, nela xmod nidi'zh tu men se'ga ga' par zobyek goi, porke lē' go laore nguio xnez Dios. Galo laka mbi'y go go lo rē kwa'n mia'n gat nambe laxto' go par ngok go nayi'lazh, mila' go ley che'n Dios; nal bile'ska go pura kwa'n nzhakla Dios le' go, nes par lu', nab tsa par Dios naban go.

²⁰ No or mile' kwa'n gat lē' mandad lo go, orze' nangayi'dt yek go ngale' go kwa'n nzhakla Dios. ²¹ No or mile' go rē kuba', orze', ¿kwan mile' go gan loi? Nal haxta nzē nitula lo go por rē kwa'n mile' go, wene namás par lo'xe men. ²² Per nal, lē' go nguro' la lo kuba'; nal nak go nela tu men nado ga' lo Dios par ya'n nambe go; no kure' le', ban go par dubta' lo Dios. ²³ Lē' men lox lo Dios chí banra' xa' lo kwa'n gat lē'; per chi wi' xa' no ban xa' lo kwa'n nazhon kwa'n kiza' Dios ka' xa', orze' lē' xa' ban par dubta' lo Dios por nak xa' tutsa kun Jesukrist, Me nazhon.

3

Xmod nile' men kun tsa' men

¹ Kure' kidizha lo rē go wech no bizan, xa' nzhak ley kwa'n mila' Dios lo Muisés. ¿Chi nanet go, nab tsa or naban tu men, naki'n le' xa' kwa'n nzobni' lo ley?, ² nela tu una' nzhap miyi', kasad por ley ga'. Haxta zhē kwa'n gat xmiyi' una', orze' une mile' xa' mandad una', no yentra' kwan ka lo una'. ³ Per chi gap una' xtu miyi' dub naban tsa' una', orze' lē' men di'zh, lē' una' nikizē nez mal. Per chi ngut la tsa' una', orze' gakra' le' ley che'n tsa' una' mandad una', no gakla una' kwa'n una' xtu miyi', no yent cho gab: "Lē' una' ba' nikizē nez mal."

⁴ Se'ska nzhak kun rē be, wech no bizan. Por tutsa nak be kun Jesukrist, ngut be kun lē' Me lo krus, kuze' nale'tra' ley mandad lo be. Nalre', nak be men che'n Jesukrist, Me mile' Dios nguruban, nes par gak le' be kwa'n nzhakla Dios, ⁵ Or miban be nzhala, mile' be kwa'n ngokla kwerp che'n be, porke or nguio ley, más miar rē xigab gat lē't kwa'n nile' be, no kure' nile' nzhak met lo Dios. ⁶ Per nal, nguro' be lo ley kwa'n nali'b be lo ba', lē' be ngut la loi. Nal, naban be

nela xmod nidi'zh Sprit che'n Dios le'n laxto' be, no gat lē't nela xmod nzobni' lo ley che'n Moiséze.

Rē xigab gat lē' kwa'n nzho yek men

⁷ ¿Kwan gab be nal? ¿Chi zab be, lē' ley nak kwa'n gat lē' lo Dios? Per, ¿gat lē't sa'! No chi nangalibe'n ley, nanganetska da chi nzē'b xkin lo Dios, no ni nangona chi nayi' wix da kwa'n kinu xtu men chi nangazobni' lo ley: "Nawixt go kwa'n kinu xtu men." ⁸ Per por ley che'n Muisés mile' unen, lē' rē lo xigab gat lē' kwa'n nzho yeka mile' mbi'y da par wix da rē lo kwa'n kinu xtu men. No chi nangayo ley, nangakt nganen, nayi' wix da kwa'n kinu xtu men. ⁹ No or naga libe'n ley, chul nizi da, naneta chí nzē'b xkin lo Dios; per or milibe'n ley, unen kwan kwa'n gat lē', orze' rē kwa'n gat lē' milen mbite da lo Dios. ¹⁰ No lē' ley kwa'n ngale' ngaban da, lē'la mbite da. ¹¹ No por ley, rē xigab gat lē' kwa'n nzho yeka, mbite da lo Dios, no mikidei da. ¹² Per Dios ngulo ley, no nazhon kwa'n nzobni' loi, mbaino kwa'n ñal ka nzhudi'zhe, no wene.

¹³ No nal, ¿chi zab be, lē' kwa'n wen re' mbit da? ¿gat lē'ta' sa' nake!, sino ke kwa'n nzē'b xkin mile' ngut da, par ne men, por kwa'n nzē'b xki men nile' nzhak men, no por nzobni'y lo ley kwa'n wen re', nes par ne men, dox nazhe'b nak or nzē'b xki men. ¹⁴ Nane be, lē' ley nak widi'zh che'n Dios, per be men yizhyuo, no lē' rē xigab gat lē' kwa'n nzho yek be nile' mandad lo be. ¹⁵ Kuze', naneta chon nilen kwa'n gat nzhaklata' len, porke or nzhaklan len kwa'n wen, lē'la kwa'n gat lē' nilen. ¹⁶ No or nilen kwa'n gat nzhaklata len, orze' nizan kwent, ke dox wen nak ley. ¹⁷ Kuze' gat lē'ta' na nile kwa'n gat lē', sino ke rē xigab gat lē' kwa'n nzho yeka nile'i. ¹⁸ Nal nizan kwent, yent cho tu xigab wen nzho yeka por nak da tu men yizhyuo; ter nilen xigab len kwa'n wen, lē'la kwa'n gat lē' nilen. ¹⁹ Gat nileta' kwa'n wen kwa'n nzhaklan len; lē'la kwa'n gat nzhaklata' len, kuze' nilen. ²⁰ No nal, chí nilen kwa'n gat nzhaklata len, gat lē't na niley, sino ke, kwa'n gat lē' kwa'n nzho yeka nile'i. ²¹ Nal unen, xtu kwa'n nzho kwerp da, tuli nzhuwe'i'ye da; porke ter nilen xigab len kwa'n wen, nab tsa kwa'n gat lē' nzhak nilen. ²² No dox ño laxto'n nzhona ley che'n Dios, ²³ per nal unen, xtu kwa'n nzho kwerp da re' nak nela tu ley ga'; kure' nala't len kwa'n nzobni' lo ley che'n Dios kwa'n ño laxto'n, no ley kwa'n nzho kwerp da re', nzhuwe'i'ye da lo kwa'n gat lē', no nali'bdo' da loi.

²⁴ ¡Tatu nalats nizaka! ¿Cho ko'tin da lo kwa'n nzho kwerp da kwa'n nak nela tu ley ga' kwa'n ñanu da par gat da? ²⁵ ¡Per xkix

Dios! Por Jesukrist niro' men lo rë kwa'n nali'bdò' men.

Nal unen, kun dub laxto'n nilen kwa'n nzobni' lo ley che'n Dios, ter nzho kwa'n gat lè' kwerp da.

8

Xmod nzhakla Sprit che'n Dios ban men

¹ Kuze' nal, par men tutsa nak kun Krist Jesús, gat nzè'b xkitra' xa' lo Dios, xa' gat nabantra' lo rë kwa'n gat lè' kwa'n nzho yek xa'; nab tsa naban xa' nela xmod nzhakla Sprit che'n Dios. ² No por tutsa nak be kun Krist Jesús, lè' ley che'n Sprit che'n Dios nzho laxto' be, ley kwa'n le', ban be par dubta'. Ley re' ngulo' be lo xtu ley kwa'n ñanu be lo kwa'n gat lè' par gat be. ³ Nangakta' ngale' ley kwa'n mila' Dios lo Muisés ngaya'n nambe men yizhyuo lo Dios, porke naxekt bixa' nale' bixa' rë xigab gat lè' kwa'n nzho yek bixa'. Kuze' mixè'l Dios Xga'n Me, ngok Xga'n Me tu men yizhyuo, no mizi Xga'n Me rë kwa'n gat lè' kwa'n nizi más rë men. Par yek Xga'n Dios, mixo'b Dios rë kwa'n nzè'b xki men, kuze' ngut Jesukrist, ndix Me rë kwa'n nzè'b xki be lo Dios, ⁴ par ngok rë kwa'n nzobni' lo ley par be, men che'n Jesukrist. Ya nale'tra' be rë kwa'n gat lè' kwa'n nzhakla kwerp che'n be, por nile' be namás kwa'n nzhakla Sprit che'n Dios, Me nzho laxto' be. ⁵ Rë men xa' nikizè no naban lo rë xigab gat lè' kwa'n nzho yek xa', nab tsa kure' nile' xa' xigab zilita'; per rë xa' nile' kwa'n nzhakla Sprit che'n Dios, nabksa kure' nile' xa' xigab zilita'. ⁶ Rë men xa' nile' xigab nab tsa rë kwa'n nzhakla kwerp che'n xa', kure' nile' nzhuwe'i' xa' lo yalgut; per xa' nile' xigab nab tsa rë kwa'n nzhakla Sprit che'n Dios, kure' nile' zilita' wen nzho laxto' xa', mbaino dubta' ban xa' lo Dios. ⁷ Rë men xa' nile' xigab nab tsa rë kwa'n nzhakla kwerp che'n xa', nab tsa rë kwa'n gat lè' nzè yek xa' le' xa', no nak xa' nela tu men nidil kun Dios, por nane xa' gon xa' ro' Dios, no ni nagak le' xa' kwa'n nzhakla Dios. ⁸ Kuze', men xa' naban nela xmod nzhakla kwerp che'n xa', ni tu kwa'n ño laxto' Dios nagakta' le' xa'.

⁹ Per go, chi lè'i walika nzho Sprit che'n Dios laxto' go, gat nikizètra' go nela xmod nzhakla kwerp che'n go, nal lè' go naban nela xmod nzhakla Sprit che'n Dios; per chi gat nzho Sprit che'n Dios laxto' tu men, gat lè'ta' men che'n Jesukrist xa' ze'. ¹⁰ No chi nzho Sprit che'n Dios laxto' go por Jesukrist, ter gat kwerp che'n go por xigab gat lè' kwa'n kinui, per lè' Sprit che'n Dios, Me nzho laxto' go, le' ban go par dubta', porke lè' go nambe la lo Dios. ¹¹ No chi lè' Sprit che'n Dios nzho laxto' go, yub Sprit che'n

Dios Me mile' nguruban Krist Jesús, orze' nu ska go lè' Me le' ruban go.

¹² Rë go wech no bizan, dox naki'n le' be kwa'n nzhakla Dios, no gat lè'ta' kwa'n nzhakla kwerp che'n bei. ¹³ Chi lè' go ban xmod nzhakla kwerp che'n go, lè' go gat lo Dios; per chi por Sprit che'n Dios nika'n go lo rë kwa'n gat lè' ba', orze' lè' go ban par dubta' lo Dios, ¹⁴ porke rë xa' naban nela xmod nzhakla Sprit che'n Dios, xa' re' xmè'd Dios, ¹⁵ porke Sprit kwa'n mine' Dios yo laxto' go, gat lè'ta' par le' rë kwa'n gat lè' mandalo goi xtu wèlt, no ni gat lè' par zheb go ne go Diose; sino ke lè' go kinu Sprit che'n Dios Me mile' nak go xmè'd Dios, kuze' se' nidi'zh go lo Dios: “¡Payè!, Payè!” ¹⁶ No Sprit che'n Dios Me mine' Dios yo laxto' be, nile', nizi be, lè' be nak xmè'd pa' Dios. ¹⁷ No nal, chi lè' be nak xmè'd pa' Dios, lè' be galska kwa'n mila' Dios di'zh kwa'n kinu Me, mis kwa'n nak che'n Jesukrist; porke chi nided be lo rë kwa'n nizakzi be por nak be men che'n Krist, nu ska yo be plo nazhon, plo nzho Krist.

Tu plo nazhon kimbèz par men

¹⁸ Nilen xigab, rë kwa'n nile' nizakzi be yizhyuo re', yent kwan kure' chi ché'l lal bei kun kwa'n nazhon kwa'n laore kuxo'b Dios par be. ¹⁹ Rë kwa'n ngulo Dios yizhyuo nzhakla, oj ne ga' kuxo'b Dios, cho rë xa' kwa'n walika nak xmè'd Dios. ²⁰ Nzhi'bde rë kwa'n ngulo Dios yizhyuo re', no ter gat lè't rë kure' nzhap dol, per sa' ngok xigab che'n Dios, par ne rë kwa'n nzho yizhyuo, lè' zhè zhin, lè' de re' yubchi ka; ²¹ nes par nayotra' lox rë kwa'n nzho yizhyuo re', par tutsa gake lo kwa'n nazhon che'n rë xmè'd Dios. ²² Rë kwa'n ngulo Dios yizhyuo re', nibizhwi' lo yalne, nela tu una' gap mè'd ga'. ²³ No gat lè't nab kwa'n nzhin yizhyuo re' nibizhwi', nu ska be xa' nzho Sprit che'n Dios laxto', dub kimbèz be zhin zhè, or zen Dios be nela xmè'd Dios, mbaino le' Dios kub kwerp che'n be. ²⁴ Por ñila be kwa'n kimbèz be re', kuze', nguro' be lo kwa'n nzè'b xki be, porke chi niwi' be lo tu kwa'n, orze' gat naki'ntra' kwèz be ka' bei. O, ¿cho men kwèz gap tu kwa'n, ya kinu la xa'? ²⁵ Per chi kwèz be gap be tu kwa'n gat kinut be, lè'i gap be, ter nided be lo rë kwa'n nile' nizakzi be por lè'i.

²⁶ Nela xmod kimbèz be zhin rë kwa'n nazhon che'n Dios, se'ta nzhaknu Sprit che'n Dios be por nazhèl na'b be lo Dios xmod ñal; per yub Sprit che'n Dios nina'b por be kun widi'zh kwa'n nanet be xmod di'zh be. ²⁷ Dios Me nane kwan nzho laxto' men, nane Me kwan nidi'zh Sprit che'n Me por be, porke lè' Sprit nina'b lo Dios nela xmod nzhakla Dios par rë men che'n Me, xa' nambe lo Dios.

Lo rē kwa'n le' be gan

²⁸ Nane be, rē kwa'n nizak rē xa' nazhi' Dios, no rē xa' ngule Dios par le' rē kwa'n nzhakla Dios, Dios nile' nizak bixa'i, par nizu'i par lē' bixa'. ²⁹ Rē xa' milibe' Dios or galo, ni naga yuxkwa' yizhyuo, lē' Dios ngule la bixa' par gak bixa' nela Xga'n Dios ga', mbaino par lē' Xga'n Dios gak Me galo xid bixa', rē xa' kwa'n nak nela wech Jesukrist ga'. ³⁰ No rē xa' kwa'n ngule Dios galo, Dios ngurezh rē xa' re'; no rē xa' kwa'n ngurezh Dios re', mitsumbe Dios bixa' par miza' Dios rē kwa'n gal bixa', rē kwa'n nak che'n Dios.

³¹ No nal, nane be kure', lē' Dios nzo kube, kuze' yent cho le' gan lo be. ³² Nangayeta' Dios tugaka Xga'n Me kwa'n nzhap Me par ngut; mine' Dios Xga'n Dios par ngut Me por rē be, par ne' Dios tutsa kwa'n ka' be kun Jesukrist. ³³ Kuze', yent cho gak gab kwa'n nak rē xa' ngule Dios, porke yub Dios nzhab: "Gat nzē'b xkitra' rē xa' ngwayila Jesukrist." ³⁴ No yent cho gak gab, nzē'b xki rē xa' ñila Jesukrist, Me ngut por be, mbaino nguruban Me no nzob Me lad direch che'n Dios, mbaino kina'b Me lo Dios par ya rē men che'n Me wen. ³⁵ Yent kwan gak kubchi be lo Jesukrist, Me nazhi' be. Per ni tu kwa'n, ni gor nided be lo kwa'n nile' nizakzi be; no ni gor niwin laxto' be, no per ni gor niyi' men nine men be, no ni gor niyent kwa'n gao be, no ni gor niyen lar gak be, no ni gor nizak be tu kwa'n le' gat be, no ter gut men be por kure'. jPer ni tu rē kure' nagakt kubchi be lo Dios! ³⁶ Nela nzobni' ka lo Yech che'n Dios:

Por nak no men che'n Go, zilita' nided no lo kwa'n nazhe'b nila' gat no;
no nilinu men no nela rē mbēkxi'l kwa'n nzhuwe'i men par gat.

³⁷ Lo rē kure' nile' be gan, por nzhaknu Jesukrist be, Me kwa'n nazhi' be. ³⁸ Na nane ka, yent kwan gak le' kubchi be lo kwa'n nazhi' Dios be: Ni yalgut no ni yalnaban, no ni rē ganj, no ni rē mbi mal; mbaino ni tu rē kwa'n nzho nal, no ni rē kwa'n laore yi'd; ³⁹ no ni rē kwa'n nzho al lo yibē', mbaino ni rē kwa'n nzho al yēt plo más na'ch; no ni tu rē kwa'n ngulo Dios. Yent kwa'n gak kubchi be lo yalnazhi' che'n Dios por Krist Jesús, Me nile' mandad be.

9

Ngule Dios rē men Israel

¹ No walika kwa'n kidizha; por nak da tu men che'n Krist, gat nidizhta' kwa'n mbēl; dizde le'n laxto'n nzē kure' plo nzho Sprit che'n Dios. ² Dox niwin laxto'n zilita', por nazine laxto'n rē men da, rē xa' tutsa ren da, no tutsa bē'l da. ³ Nzhaklan, oj yitlon lo Dios no lo Krist, chi ngake tu kwa'n, sa' gak

gaknun rē wecha par zubi bixa' lo Dios, rē xa' kwa'n nzē ben da, ⁴ no men Israel bixa'; kuze' lē' bixa' nak rē men ngule Dios gak xmē'd Dios, no rē men milu' Dios rē kwa'n nazhon lo, mbaino lo bixa' mila' Dios di'zh gak bixa' men che'n Dios. Lo bixa' mila' Dios ley che'n Muisés, no nab tsa lo bixa' mika'b Dios rē zhi'n yado', mbaino más rē kwa'n mila' Dios di'zh lo bixa'. ⁵ No ben che'n rē xuz be, xa' tiemp, nzē bixa'; mbaino ben che'n rē xa' re' nzē Krist, Me nak Dios, Me ñal di'zh rē men nazhon par dubta'. Sa' gake.

⁶ No nagabt be, nazu'tra' kwa'n mila' Dios di'zh lo rē men Israel; lē'i nak, porke gat lē't rē xa' nzē ben che'n men Israel, nak walika men che'n Dios. ⁷ Mbaino gat lē't ska rē xa' nzē ben che'n Abraham nak xmē'd Dios, porke Dios nzhab lo Abraham: "Nabtsa rē xa' nzē ben che'n Isaac gak walipa' rē ben che'nal", ⁸ porke yent cho tu men yizhyuo, or nzhal xa', nak la xa' xmē'd Dios por nzē xa' ben che'n tu men, sino ke rē xa' walipa' xmē'd Dios nak rē xa' nzhal por rē widi'zh kwa'n mila' Dios di'zh lo Abraham, ⁹ porke se' nak widi'zh kwa'n mila' Dios di'zh lo Abraham, nzhab Dios: "Par xtu li'n nal yala, lē' Sar kinu la tu mē'd." ¹⁰ No gat lē't nab kure'i, nu ska kwent che'n rop xmē'd Rebeca, tutsa xa' ngok xuz rop mē'd re', xa' lē Isaac, xa' ngok ben che'n be. ¹¹ No or naga gal rop mē'd re', ni naga le' mē'd tu kwa'n wen o tu kwa'n gat lē', per Dios ngule tutsa rē mē'd re', ¹² no gat lē't por mile' mē'd kwan tu kwa'n wen ngule Dios mē'd re'. Dios ka nzhab lo xna' mē'd: "Mē'd win le' mandad lo mē'd galo." ¹³ Nela xmod nzobni' ka lo Yech che'n Dios: "Na nazhi' Jakob, per Esaú niyi' da ninen." ¹⁴ ¿Kwan le' be xigab nal? ¿Chi le' be xigab: "Gat ñalt kwa'n nile' Dios?" jPer lalta' gat nakta' Dios sa'!, ¹⁵ porke nzhab Dios lo Muisés:

Na lats laxto' men nzhaklan,
mbaino zine laxto'n men nzhal laxto'n.
¹⁶ Kuze' nagakt gak nela xmod nzhakla men, o por kwa'n nile' men kwe Dios men; or nzhakla Dios lats laxto' Dios tu men, lē' Dios le'i. ¹⁷ Kuze', se' nzobni' lo Yech che'n Dios or nzhab Me lo Faraón: "Mizon lu, nakal rey lo rē men egipto, nab tsa par lun rē yalnazhon Da kwa'n len kun lu, nes par rē men yizhyuo ze't cho Da." ¹⁸ Sa' nak Dios, men nzhakla Dios lats laxto' Dios, lē' Dios lats laxto' xa'; mbaino men nzhakla Dios gak nad laxto', lē' Dios le' nad laxto' xa'.

¹⁹ Na!, chi nzho tu go ne lon: "Chi lē' Dios nak sa', gat ñalt gab Dios, lē' men nzē'b xki, porke yent cho gab, ¿chon nile'l kuba'?, or nile' Dios tu kwa'n." ²⁰ ¿Kwan nakal, miyi'?, lu kwa'n gab lo Dios: "¿Chon nak Dios sa'?" O, ¿chi zak gab tu yēts yuo lo xa' michao'we?: "¿Chon michao'wal da se'?" ²¹ No xa' kwa'n nichao' yēts re', kun mis ben ska ze' gak

chao' xa' tu vas kwa'n zu' nab tsa par kwa'n wen, mbaino kun mis ben ska re', gak chao' xa' xtu vas kwa'n zu' nab tsa par kwa'n gat lè'.

²² Mer sa' nile' Dios. Nzhakla Me lu' Me xmod zakzi Dios rë men xa' nak la di'zh zakzi mbaino lox, nes par rë men libe' yal-nazhon che'n Dios. Kuze', dox nixek Dios lo rë xa' kwa'n nak la di'zh zakzi no lox. ²³ Se'ska milu' Dios lo be, rë kwa'n nazhon nile' Dios por nilats laxto' Dios be, mbaino ngule Me be dizde or galo par gal be rë kwa'n kinu Dios. ²⁴ No gat lët' nab men Israel ngurezh Dios; Dios ngurezh nu rë men xa' gat lët' men Israel. ²⁵ Nela nzobni' ka lo yech kwa'n mikë' Oseas, tu xa' midizh por Dios nzhala, se' mizobni' xa':

Rë go xa' gat lët' men Da, lë' go ru'lë xme'd Dios, Me nzho lo yibë';

mbaino lo rë xa' kwa'n gat nazhi't da, lë'da nzhap lo bixa':

“Nazhi' da go.”

²⁶ No nu se' mizobni' Oseas:

“Go, gat lët' men Da”,

no rë xa' re' ru'lë, xin pa' Dios, Me naban par dubta'.

²⁷ Nuska nzobni'y lo yech kwa'n mikë' Isaías par rë men Israel:

Ter dox nayax men Israel,

nela yux kwa'n nzhin ro' nitsdo' ga',

Per che'ptsa bixa' ro' lo kwa'n nzë'b xki bixa' lo Dios;

²⁸ porke nzhazhin gax la zhë,

le' Dios kun rë men yizhyuo kwa'n mile' Me xigab le' Me.

²⁹ Nela midizh ska Isaías:

Chi lë' Dios Me nzho lo yibë', Me nile' rë kwa'n,

nangala' zipla rë ben che'n be.

Nal re' guzhë nak be nela yezh Sodoma kun yezh Gomorra,

plo milo'x Dios rë men.

³⁰ No nal, çkwan ra' gak nin lo go por kure'? Lë' rë men gat lët' men Israel, por ngwayila bixa' Dios, mia'n nambe bixa' lo Dios ter nangale't bixa' kwa'n nzobni' lo ley; ³¹ per rë men Israel, ter ngwakë bixa' tich ley par ngambe bixa' lo Dios, per nangambet bixa'.

³² ÇNo chon nangambe bixa'? Por mile' bixa' xigab, ngawi' Dios lo bixa' por kwa'n mile' bixa'. Per gat lët' sa'i, namás ngayila bixa' kwa'n mila' Dios di'zh par ngawi' Dios lo bixa'. Kuze' la ngok Krist par lë' bixa', nela tu ke kwa'n mile' ngwachin bixa'. ³³ Nela nzobni' ka, or midizh Dios se':

Biwi' go, lë'da zo tu men yezh Sion,

tu xa' nak nela tu ke ga' kwa'n le', rël xib men, mbaino yachin bixa' loi.

Per men yila xa' nak nela ke re',

dubta' ya'n xa' wen lo Dios.

10

¹ Rë go wech no bizan, dox xigab nilen por rë men Israel, no dub laxto'n nina'ba lo Dios par ro' bixa' lo rë kwa'n nzë'b xki bixa' lo Dios. ² Na nane ka, dox ño laxto' bixa' le' bixa' kwa'n nzhakla Dios, per nanet bixa' xmod le' bixa'i. ³ Sa' nizak bixa' por nane bixa' xmod nzhak nambe men lo Dios, lë'la nzhakla bixa' le' bixa' rë kwa'n nzobni' lo ley, par ya'n bixa' wen lo Dios. Mbaino nanet bixa' gon bixa' kwan midizh Dios por Jesukrist. ⁴ No nab tsa nizu' ley nichizhine men lo Jesukrist, nes par rë men xa' kwa'n ñila Jesukrist, nambe ña'n bixa' dilant lo Dios.

Xmod ban men par dubta' lo Dios

⁵ Muisés mizobni' widi'zh re' lo ley: “Xa' nzhakla ya'n nambe xa' lo Dios por ley, naki'n le' xa' rë kwa'n nzobni' lo ley dub tiemp naban xa' yizhyuo re'.” ⁶ Per par xa' ya'n nambe lo Dios por yila xa' Jesukrist, se' nzobni': “Nale'tal xigab: çCho kili lo yibë'?” (porke kuba' le', lal Krist lo yuo, mbaino lë' Krist ya mbi'd la). ⁷ No ni nale'l xigab: “çCho la le'n gabil plo nazhe' na'ch, par kix rë kwa'n nzë'b xki be?”, mbaino ni nale'l xigab: “çCho ruban par be?” (porke rë kuba' une la Krist), ⁸ porke se' nzobni' lo Yech che'n Dios: “Gax lol kinul widi'zh che'n Dios, mis laxto'l; mbaino le'n ro'l kinule.” Sa' nak widi'zh che'n Dios kwa'n nidi'zh no; namás naki'n yila men widi'zh re'. ⁹ Chi lë'l gab kun mis ro'l, Jesukrist nak Me nile' mandadal, mbaino dizde le'n laxto'l, yilal Dios mile' nguruban Jesukrist, guzhë nguro'l lo rë kwa'n nzë'b xkil lo Dios. ¹⁰ No men xa' yila widi'zh che'n Dios por Jesukrist dizde le'n laxto'l, guzhë mia'n nambe xa' lo Dios; mbaino xa' gab kun mis ro' dub lo men: “Jesukrist nak Me nile' mandad da”, xa' re' ban lo Dios par dubta', ¹¹ porke se' nzobni' lo Yech che'n Dios: “Xa' kwa'n yila Jesukrist, xa' ze' dubta' ya'n xa' wen lo Dios.” ¹² No gat nibet Dios men, wanei choi, chi men Israele o gat lët' men Israele; rë men nazhi' Dios; mbaino nzhaknu Dios men, niza' Dios kwa'n wen ka' men, xa' nina'b lo Dios. ¹³ Nela xmod nzobni' ka lo Yech che'n Dios: “Wanei cho men kwezh Dios par gaknu Dios xa', ro' xa' lo rë kwa'n nzë'b xki xa'.”

¹⁴ No nal, çxmod kwezh men Dios, tu xa' naga yila Dios? Mbaino, çxmod yila men Dios, chi naga gon xa' xmod nak Dios? Mbaino, çxmod gon men xmod nak Dios, chi niyent cho di'zh xmod nak widi'zh che'n Dios lo xa'? ¹⁵ Mbaino, çxmod yadi'zh tu men widi'zh nazhon che'n Dios lo rë men chi lë' Dios naxë'l xa' re' par yadi'zh xa'i? Nela xmod nzobni' ka lo Yech che'n Dios: “çTatu wen nzë' xa' n'zadnu widi'zh nazhon che'n Dios lo be!”

¹⁶ Per gat lè't rë men yila widi'zh nazhon che'n Dios re', porke se' nzhab Isaías, tu xa' mid'i'zh por Dios: "Lè'o, dox che'p men ngwayila widi'zh che'n Go." ¹⁷ Kuze', par yila men widi'zh nazhon che'n Dios, naki'n gon xa'i; no par gon xa'i, naki'n yo men yadi'zhe lo xa'. ¹⁸ Per nal nin, ¿chi nagat gon rë xa' ba' widi'zh che'n Dios? ¡Lè' bixa' mbin lai!, porke se' nzobni' lo Yech che'n Dios: Rë plo mbin la men widi'zh che'n rë xa' kwa'n mixè'l Dios,

no haxta rë yezh kwa'n nzhin más zit lo yizhyuo mbin la men widi'zh che'n Dios por rë xa' re'.

¹⁹ Xtu wèlt kinin: ¿chi nagat gon rë men Israel kure'? Lè' bixa' mbin lai, porke se' mid'i'zh Muisés:

Lè'da kixian go por rë kwa'n wen len kun xtu ben rë men,

xa' nidi'zh go, yent kwan tsak.

Lè' da le yi' go por rë kwa'n len kun rë men xa' nzhab go, yent kwan zu'.

²⁰ Mbaino nangazhebt Isaías mid'i'zh xa' kure':

Rë xa' nangakwa'nt Da, Na ngwakwan bixa';

no nguru'lon lo rë xa' nangale't xigab libe' Da.

²¹ No por rë men Israel, se' mid'i'zh Isaías: Zilita' nzè'b ya'n lo rë men Israel, par gak-nun bixa'.

Lè' bixa' nak tu ben men xa' gat nizobt xti'zha,

mbaino nayi'lazh bixa' lon.

11

Xmod nile' Dios xigab por rë men Israel

¹ No nal, ¿kwan gab go?, ¿ngulo' la Dios rë men Israel yek Dios, rë xa' kwa'n nak men che'n Dios? Per, ¡gat lè't sa' nak Dios!, porke mis na nak tu men Israel, tu xa' nzè' ben che'n Benjamín. ² Dios nagata' la' nzè'b men Israel, porke rë men re', dizde or galo men che'n Dios bixa'. Taxa, ¿chi nanet go, kwan mizobni' Li lo Yech che'n Dios or mizob xa' rë kwa'n nak rë men Israel? Se' mizobni' xa': ³ "Señor da, rë men re' mbit rë xa' mixè'l Go par di'zh kwa'n nzhakla Go, mbaino michil bixa' rë plo nine' men gon lo Go, no nab tsa da mia'n, xa' nidi'zh kwa'n nzhakla Go, per kizikè bixa' ticha par nu da gut bixa'." ⁴ Per nzhab Dios lo Li: "Gazh mil men kinun, xa' nile' kwa'n nzhaklan, mbaino ni naga zuxib rë xa' re' lo winab kwa'n lè Baal." ⁵ Se'ska mia'n zixche'p men, xa' ngule Dios xid rë men Israel por nilats laxto' Dios bixa'. ⁶ Na ni por nilats laxto' Dios men nibe Dios men, gat lè'ta' por nile' men kwa'n nzhab leye; no chi lè'i por ley, orze' yent kwan tsak kwa'n nilats laxto' Dios men. ⁷ Orze', ¿xmod le' be xigab por nangazhèl

rë men Israel rë kwa'n ngokla bixa' kwa'n dox? Per rë xa' ngule Dios ngwazhèl rë kwa'n ngokla, ter ngok nad rë men Israel.

⁸ Nela xmod nzobni' ka lo Yech che'n Dios: Dios mile' ngok nad laxto' bixa', nes ter ne bixa'i, per yent kwa'n zi bixa', mbaino ter gon bixa'i, per nazobyekt bixa'i, haxta nalzhè re'.

⁹ Nela nzhab ka Dabi:

Lo rë lani kwa'n nile' bixa',

mis lo rë kuba' nirèl xib bixa', ñachin bixa';

par zakzi Dios bixa' por rë kwa'n mile' bixa',

¹⁰ nes par kao lo xigab che'n bixa',

no par dubta' nzadkè rë kure' tich bixa'.

Men xa' gat lè't men Israel, lè' bixa' ro' lo rë kwa'n nzè'b xki bixa'

¹¹ Kina'bdizha kure': Or ngok nayi'lazh rë men Israel lo Dios, ¿chi nayotra' yuxkwa' bixa'? ¡Lalta' nala't Dios gake sa'!, no por nangazobt rë men Israel xti'zh Dios, kuze' nayax rë xa' gat lè't men Israel, mizubchi Dios rë kwa'n nzè'b xki bixa' lo Me, nes par nu rë men Israel gakla rë kwa'n wen kwa'n kile' Dios kun rë men re'. ¹² Chi por rë kwa'n nzè'b xki rë men Israel le' ya rë men yizhyuo wen, ¡tatu más wen ya rë men yizhyuo, or za rë men Israel xid más rë men xa' ngule Dios!

¹³ No nal, kidizha lo go, xa' gat lè't men Israel. Por nak da tu apost xa' mizo Dios lo go, dox nizak laxto'n nidizha widi'zh che'n Dios lo go, ¹⁴ par kixiana más rë men Israel por go, nes par yila bixa' Dios, mbaino ban bixa' par dubta' lo Dios. ¹⁵ Or miyi' Dios kun rë men Israel, kure' mile' ngok go xa' nichè'l Dios. Per or yal laxto' Dios kun rë men Israel, orze', ¡lè' más rë men wi' lo bixa' nela rë men nguruban ga', xtu wèlt ban bixa'!

¹⁶ No chi nizuxkwa' xa' tu pan par Dios, nu ska dub ko'b kwa'n ngokxao'we ze' che'n Dios; no chi za' men luch che'n tu ya par Dios, nu ska rë rram che'ne nak che'n Dios.

¹⁷ Rë men Israel nak nela tu ya olib ga'. No chi cho' men tu rram che'ne par xè'n men rram che'n xa'la ya ze', orze' lè' rram re' ban por xup che'n ya olib re'. Go men gat lè't men Israel, nak go nela rram kwa'n mixè'n men lugar che'n ya olib kwa'n miro'g re', kuze' kinu go yalnaban lo Dios por men Israel. ¹⁸ No nagab go, más tsak go lo rë men Israel, rë xa' gat ninet Dios wen. Bitsila go, por lè' bixa' namás ene Dios go wen. ¹⁹ ¿Kwan gab go nal?, mizubchi Dios bixa', namás par gag go men che'n Dios. ²⁰ Per na ni: Bitsila go, Dios mizubchi bixa' namás por nangazobt bixa' xti'zh Dios, mbaino go, por ngwayila go widi'zh che'n Dios namás, miwi' Dios wen lo go. Kuze', gat ñalt zi go más tsak go lo rë men Israel. Más wen bizheb go lo Dios. ²¹ No chi nangayè Dios yub rram che'n pa' ya ze' or micho' Diöse, más nayèt Dios go par kubchi Me go. ²² Kure'

biwi' go, tatu nilats laxto' Dios go, per nu ska nayi' Dios kun xtu rê men: Niyi' Dios kun rê men xa' gat nzhont ro' Dios, per wen Dios kun go chi lê'u gon ro' Me namás; no chi nu go le' nela rê men ze', lê' nu ska go kubchi Dios. ²³ No chi nagak nad ra' rê men Israel lo Dios, lê' Dios ne bixa' wen xtu wêlt; nela rram kwa'n micho' Dios ze', lê' Dios gakska xê'ne xtu wêlt. ²⁴ No walika, gat ñalt goch rê kwa'n wen kun rê kwa'n nazu't; no chi miwi' Dios wen lo go ter gat nzê't go xid rê men Israel; peor kun rê men Israel, nayen laka yal laxto' Dios kun lê' bixa', porke lê' bixa' nak men pa' che'n Dios.

Dios yal laxto' kun rê men Israel

²⁵ Rê go wech no bizan, dox nayax kwa'n nagat nê go, kwa'n nab tsa Dios nane, kuze' gak nine lo go: Nayax men Israel ngok nad lo Dios, nanet bixa' yila bixa' widi'zh che'n Dios por Jesukrist; mbaino se'gaka gak bixa' haxta za plak men xa' kwe Dios yo xid rê men Israel. ²⁶ No or lox gak rê kure', rê men Israel ro' lo rê kwa'n nzê'b xki lo Dios. Nela nzobni' ka lo Yech che'n Dios:

Yezh Sion yaxo'b Dios,

par tsimbe Me rê men nzê ben che'n Jakob lo rê kwa'n gat lê' nak bixa' lo Dios.

²⁷ Kure' milan di'zh len kun lê' bixa':

Lê' da kubchi rê kwa'n nzê'b xki bixa' Lon.

²⁸ No por nangayila rê men Israel widi'zh nazhon che'n Dios por Jesukrist, nak bixa' nela tu men nidil kun Dios. Por nak bixa' sa', wen nzha go kun Dios. Per por ngule Dios rê xa' nzhala, xa' ngok xuz rê men Israel, kuze' se'gaka nazhi' Dios bixa'. ²⁹ Ka niza' Dios rê kwa'n ka' men. Or niza' Dios tu kwa'n ka' men, nayotra' na'b Diose; mbaino or nibezh Dios tu men, par dubta' nile' Diose. ³⁰ No go, xa' gat lê't men Israel, nzhala ze' gat nzhont go ro' Dios; per por gat nzhon rê men Israel ro' Dios, kuze' milats laxto' Dios go. ³¹ Se'ska nal, por milats laxto' Dios go, nu ska men Israel lats laxto' Dios, ter net bixa' gon bixa' ro' Dios. ³² Per Dios ka mile', rê men net gon ro' Dios, par lal lats laxto' Dios rê men.

Nidi'zh Pab, dox wen Dios

³³ Tatu nazhe'bl, yent cho nane haxta plo zhin rê kwa'n tsak che'n Dios, no rê xigab nazhon che'n Dios. No yent cho zobyek xmod nak rê xigab che'n Dios, mbaino xmod pa' nak rê xnez Me. ³⁴ ¿Cho gak ne, xmod nile' Dios xigab? ¿No cho gak gab lo Dios: "Se' bile'?" ³⁵ No, ¿cho miza' tu kwa'n ka' Dios, tu kwa'n gat kinut Dios, orze' naki'n kix Mei? ³⁶ Por Dios ngokxao' rê kwa'n nzho, no Dios nzen rêi, mbaino nab tsa par Dios nzhin rêi. No nab tsa lo Dios ñal di'zh rê men nazhon par dubta'. Sa' gake.

12

Xmod ñal ban men che'n Jesukrist

¹ Kuze' rê go wech no bizan, kina'ba lo go por dox nilats laxto' Dios be, biza' go go lo Dios tuli, nela or nixo'b tu gon lo biko' par Dios. Dub ban go yizhyuo rê', nambe biban go lo Dios, nela xmod nzhakla Dios. ² Nabantra' go nela men yizhyuo, sino bila' go, chê' Dios xigab che'n go, nes par ne go kwan nzhakla Dios le' go; no kwa'n nzhakla Dios nak, le' go rê kwa'n wen, rê kwa'n ño laxto' Dios, mbaino rê kwa'n lê'tsa lê'.

³ No por nilats laxto' Dios da, mizo Dios da len rê zhi'n nazhon kwa'n mika'b Me lon. Kuze', kinin lo rê go, nale't go xigab por kwa'n nzhak go más tsak lo rê men, sino bile' go xigab che'n menaye ka, nela xmod mine' Dios yalnazon par le' kad go zhi'n kwa'n ñal le' go. ⁴ Nela xmod nak kwerp che'n be, nayax kwa'n nakxao'we, per gat lê't par tutsa kwa'n nizu' rêi. ⁵ Sa'ta' nak rê men che'n Jesukrist; ter dox nayax bixa', per tutsa nak bixa' lo Krist, kuze' ñal tutsa xigab le' tu be kun xtu be, or le' be tu kwa'n.

⁶ Tu ga' be mine' Dios yalnazon par le' be rê lo zhi'n nazhon, por nilats laxto' Dios be. Chi miza' Dios yalnazon ka' tu men par di'zh xa' por Dios, naki'n di'zh xa' rê kwa'n mile' Dios mandad di'zh xa'. ⁷ No chi miza' Dios yalnazon ka' xtu men par gaknu xa' men, naki'n gaknu xa' men nela xmod mile' Dios mandad; no chi miza' Dios yalnazon ka' xtu men par lu' xa' widi'zh che'n Dios lo men, naki'n lu' xa'i nela xmod mile' Dios mandad. ⁸ No chi miza' Dios yalnazon ka' xtu men par di'zhnu xa' men, zo men naye lo che'n Dios, orze' naki'n le' xa'i; no xa' miza' Dios yalnazon ka' par ki'z xa' rê che'n xa' ka' men, naki'n le' xa'i no naxo'bdi'zht xa'i; no xa' miza' Dios yalnazon ka' par zo xa' lo men, naki'n le' xa'i dub la xa', nacha'bt xa'; no xa' miza' Dios yalnazon ka' par lats laxto' xa' men nzho nalats, naki'n le' xa'i nizak laka laxto' xa'.

Bichizhi' go tu go kun xtu go

⁹ Naki'n walika bichizhi' go wech go, nayi'dt yek go le' go kwa'n gat lê', mbaino bile' pa' go par le' go nab tsa kwa'n wen. ¹⁰ Bichizhi' go wech go, xa' nak men che'n Jesukrist, tu go kun xtu go, no gop go kwent tu go kun xtu go. ¹¹ Mbaino nacha'bt go gukê go zhi'n, no zilita' bile' go kwa'n nzhakla Dios kun dub laxto' go. ¹² Bizak laxto' go por kwa'n kimbêz go ne' Dios ka' go, bixek go or nided go lo rê kwa'n gat lê', no zilita' bina'b go lo Dios. ¹³ Goknu go rê men che'n Jesukrist lo rê kwa'n naki'n xa', no biza' go tu plo ya'n xa' nzê zit. ¹⁴ No bina'b go lo Dios, gaknu Dios rê men nakap lo go por nak go men che'n Jesukrist, bidi'zh go ya bixa' wen, no nazhibdet go bixa'. ¹⁵ Bizak laxto' go kun rê men nizak laxto'; mbaino biwin laxto' go kun rê men niwin laxto'. ¹⁶ Chul guzhin go

tu go kun xtu go, nagakt go marian, no tutsa bile' go kun rë men nado', mbaino nazit go, go más nzhak. ¹⁷ Nale't go kwa'n gat lë' lo men nakap lo go; bile' pa' go par zilita' le' go kwa'n wen dilant lo rë men. ¹⁸ Bile' go rë men, porke se' nzobni' lo Yech che'n Dios: "Na gap xmod gak kun kad men xa' nile' kwa'n gat lë' lo xtu men, kun Na kix xa'i; sa' midizh Dios." ²⁰ Mbaino nu: "Chi tu men nidilal, no na'b xa' kwa'n gao xa' lol, orze' biza' kwa'n gao xa'; no chi nizei' laxto' xa', biza' kwa'n go xa'; nes par tula lo xa'." ²¹ Por le' go kwa'n wen, nala't go le' kwa'n gat lë' gan lo go; bika'n go loi.

13

Naki'n gon men ro' xa' nak zhi'n

¹ Rë go naki'n le', rë kwa'n ne xa' nak zhi'n, porke Dios ka mizo bixa' par le' bixa' mandad. ² Kuze', rë xa' kwa'n nzhak nayi'lazh lo xa' nak zhi'n, orze' kun Dios mile' xa'i, mbaino rë xa' nak sa', mis lë' xa' nile' nzë'b xki xa' lo Dios, no por kuba' lë' Dios zakzi xa'. ³ Rë xa' nile' kwa'n wen, yent por kwan zheb xa' lo xa' nak zhi'n, nab tsa rë xa' nile' kwa'n gat lë' nizheb. Mbaino chi lë'l gat nzhakla zhebal nel bixa', orze' bile' kwa'n wen par yétal wen xid bixa'. ⁴ Nzhin rë xa' nak zhi'n par le' bixa' kwa'n nzhakla Dios par nakwin go ngokla ngwa. Per chi nile' go kwa'n gat lë', neka bizheb go orze', porke rë xa' nak zhi'n kinu yi'b par zakzi xa' rë men nakap, no Dios ka mizo bixa' par le' bixa' yalgustis. ⁵ Kuze' naki'n gon go ro' xa' nak zhi'n, gat lë't nab par nazakzi xa' goi, sino ke par zi go lo Dios, yent kwan nak go lo bixa'. ⁶ Mbaino por nzhin rë xa' nak zhi'n par le' bixa' kwa'n nzhakla Dios, no por nak kure' zhi'n che'n bixa', kuze' ñal za' go kwa'n na'b bixa' lo go. ⁷ Gudix go lo kad bixa' kwa'n ñal kix go. Chi ñal kix go dimi lo xa' por zhi'n kwa'n kinu go o por rë kwa'n nzhap go, orze' gudix goi; no chi nzhakla xa' che'ptsa gak go lo xa', bile' goi orze'; o chi nzhakla xa' di'zh go wen tich xa', bile' goi.

Bichizhi' go men, porke nzhazhin la ban go kun Dios

⁸ Naruzë'bt go lo ni tu men; kwa'n nab tsa gak ruzë'b go nak, bichizhi' go tu go kun xtu go, porke men xa' nazhi' xtu men, nak xa' nela tu men xa' mile' la rë kwa'n nzobni' lo ley, ⁹ porke se' nzobni' lo rë kwa'n mile' Dios mandad: "Nabant go kun xa' gat lë't tsa' go, no nagut go men, mbaino naliwa'nt go, no ni nawixt go gap go kwa'n kinu xtu men." Rë kure' no más rë kwa'n nzobni' lo ley gak di'zh bei kun tutsa widi'zh: "Bichizhi' xtu

men nela lu ka", ¹⁰ porke xa' nazhi' xtu men, gat nile't xa' ni tu kwa'n gat lë' kun men; no xa' nzho yalnazhi' laxto', nak xa' nela tu xa' nile' rë kwa'n nzobni' lo ley.

¹¹ Bile' go rë kure' dub naban go yizhyuo rë, porke dox nazhe'b rë zhë nalre'; une la miban go nela men naxnaa ga'; gulo' go mika'l lo go, porke nzhazhin gax la ban go kun Dios ke or laore nguzublo ñila go widi'zh che'n Dios. ¹² Lë' yë'l nzalox la, mer la yanilyuo, kuze' nale'tra' go rë kwa'n naga'ch, sino bile' go rë kwa'n nzhakla Dios par gak go nela tu biani ga', o nela rë sondad kwa'n kinu la rë yi'b che'n par dil. ¹³ Biban go nela xmod ñal kai, nela tu men nzo lo biani ga'; nayatra' go lo rë lani plo nile' men rë kwa'n nzhakla kwerp che'n bixa', no ni nachao' ra' go yalguy, no ni nale' ra' go nela rë xa' nile' kwa'n nakap kun tu men xtu men, o nela rë xa' nidil par chil men namás, o nela nak rë xa' niwix che'n xtu men ga'. ¹⁴ Per nal, gok go nela Jesukrist ga', Me nile' mandad be, par nale'ra' go kwa'n nzhakla kwerp che'n go.

14

Nadi'zht go tich rë wech go, men che'n Jesukrist

¹ Wen bile' go kun rë wech go xa' nak men che'n Jesukrist, rë xa' kwa'n nalibe't be's xmod nak widi'zh che'n Dios; no chi niwi'u gat lë't xmod ñila xa'i, nachë'lro't go kun lë' bixa'. ² No xa' kwa'n más nzhak widi'zh che'n Dios, nile' xa' xigab, gat nayi't gao xa' rë kwa'n; per xa' kwa'n nanet be's xmod nak widi'zh che'n Dios, nile' xa' xigab, nab tsa rë kwa'n nayë' gak gao xa'. ³ No xa' gak gao rë kwa'n, nale't xa' naya' lo xa' kwa'n nile' xigab, nagakt gao rë kwa'n; mbaino xa' nile' xigab, nagakt gao xa' rë kwa'n, nadi'zht xa' tich xa' kwa'n nzhao rë kwa'n, porke lal niwi' Dios lo bixa'. ⁴ No, ¿cho lu, par di'zhal tich tu mos che'n xtu men? Chi le' xa' kwa'n wen, o le' xa' kwa'n gat ñal, lë' xa' nile' mandad xa' wane; porke xa' nile' mandad mos re' gak le', le' mos re' kwa'n wen.

⁵ Mbaino nzho men nile' xigab, nzho zhë más tsak lo xtu zhë, per nzho men nile' xigab, rë zhë tutsa nak. Kuze', kad men ñal wi' xa' kwa'n zak xa' wen. ⁶ Men xa' nidi'zh: "Tu zhë, zhë ro'", nidi'zh xa' par nu men di'zh nazhon Dios; mbaino xa' nzhao rë kwa'n, nzhao xa'i par yët Dios wen, no por lë'i niza' xa' xkix lo Dios. Mbaino xa' gat nzhaot rë kwa'n, gat nzhaot xa'i par di'zh ska men, lë' Dios nazhon, porke niza' xa' xkix lo Dios por lë'i. ⁷ Or naban tu men, ñal ban xa' nela xmod nzhakla Dios, mbaino or gat xa', ñal di'zh men nazhon Dios di xmod miban xa'. ⁸ Kuze', ter ban be o gat be, par Dios be, no ñal tsila be le' be rë kwa'n nzhakla Dios.

⁹ Por kure', ngut Krist no nguruban Me, par gak Me, Me nile' mandad lo rë men naban, mbaino lo rë xa' ngut la.

¹⁰ Kuze', gat ñalt di'zh go tich wech go, no ni gat ñal le' go naya' lo wech go, porke kad men zo dilant lo Jesukrist plo nzob Me par gab Me xmod gak kun kad men por kwa'n mile' xa'. ¹¹ Nela xmod nzobni' ka lo Yech che'n Dios:

Kidizha por yalnaban kwa'n kinun:

"Lë' rë men zuxib lon,

no rë men yizhyuo di'zh,

Nagaka nak Dios."

¹² Kuze', kad men za' kwent por kwa'n mile' bixa' lo Dios.

Nale't go tu ni tu kwa'n le', ro' wech go lo che'n Jesukrist

¹³ Por kure' nadi'zhtra' be kwa'n nak wech be, no ni nale' be kwa'n gat lë' kun wech be, par naro' xa' lo che'n Dios. ¹⁴ Na nane, yent kwan nayi' gao men, rëi gak gao men; porke Jesukrist, Me nile' mandad da, nei lon. Per chi nzho men nile' xigab, nzho kwa'n nayi' gao xa', nagaot xa'i orze'. ¹⁵ No chi zhi'n ka le' go, ze'n tu wech go gat lë' por kwa'n nzha'o go, sa' nile' go por gat nazhi' go xa'. Nale't go kun wech go, ti por kwa'n gao go, la' xa' che'n Dios, xa' kwa'n ngut Jesukrist por lë'. ¹⁶ Nala't go di'zh men gat lë' lo kwa'n wen che'n Dios, kwa'n nzhak nile' go. ¹⁷ Be, men che'n Jesukrist, gat lë't por dox nile' be xigab por kwa'n nzha'o be o por kwa'n nzho be, mbaino nizak laxto' Me mandad. Gat lë't sa'i; lë'i nak nab tsa por kinu be Sprit che'n Dios laxto' be, mbaino nzhak niban be nambe lo Dios, no nibin be wen tu be kun xtu be, mbaino nizak laxto' be lo rë kwa'n. ¹⁸ Men xa' naban se' por Sprit che'n Dios Me nzho laxto' xa', nile', wen niwi' Dios lo xa', mbaino wen ña'n xa' lo más rë men.

¹⁹ Kuze', le' pa' be jwers kwin be wen kun rë men; mbaino le' be por gaknu be wech be, par ro'b be lo che'n Dios. ²⁰ Nale't go, ti por kwa'n gao go o por kwa'n go go, lo'x go rë zhi'n nazhon kwa'n nile' Dios kun tu wech go, men che'n Jesukrist, xa' nanet be's xmod nak che'n Dios. No ter walika, yent cho tu kwa'n nayi' gao met, per dox gat lë' ti por kuba', la' tu wech be nayilatra' xa' Dios. ²¹ Más wen nagaot go bè'l, no ni nago go kwa'n nile' nizuzh men, o xtu rë kwa'n le', nayilara' tu wech go Dios. ²² Kwa'n zak kad tu go gat nayi't, ter xtu rë go zak nayi'y par lë' xa', nab tsa go no Dios naki'n nane kure'; mbaino naki'lt go xtu rë wech go yila nela xmod ñila go. Wen nzha rë xa' gat nize'nt gat lë' or nzha'o xa' tu kwa'n nzhab xa' gat nayi't. ²³ Per xa' nile' chop xigab or gao xa' tu kwa'n, nzhap xa' dol por kure', porke gat kile't xa'i nela xmod ñila xa'i. No rë kwa'n

nile' men chi gat ñila xa' wene, nzë'b xki xa' lo Dios por kure'.

15

Bile' go kwa'n ño laxto' wech go

¹ No be xa' kwa'n más nane xmod nak widi'zh che'n Dios, gat ñalt le' be xigab nab tsa par be cho pa' kwa'n wen; ñal gaknu be rë men che'n Jesukrist, xa' kwa'n nanet be's xmod nak che'n Dios, par le' xa' kwa'n nagakt le' xa'. ² Kad be naki'n gaknu be rë wech be, no wi' be kwan wen par lë' bixa', nes par más ro'b bixa' lo che'n Dios, ³ porke nangale't Krist kwa'n ño laxto' Me namás. Nela xmod nzobni' ka lo Yech che'n Dios: "Rë widi'zh kwa'n nde menal, par yeka nzhai." ⁴ No rë widi'zh che'n Dios kwa'n nzobni', par be nikëi, par nitse'de be, no nzhaknui nixek be lo rë kwa'n nizak be, mbaino par nane be lë' Dios ne' kwa'n mila' Me di'zh ka' be. ⁵ Tutsa Dios Me nile' nixek be no nile' ña'n wen laxto' be lo rë kwa'n nided be, no mis Dios ska re' nile', tutsa nak be par kwin be chul, nela xmod nile' Krist Jesús ga', ⁶ par tutsa kwin go mbaino kun dub laxto' go, di'zh go nazhon Dios, Xuz Jesukrist, Me nile' mandad be.

Xti'zh Dios por Jesukrist par rë men

⁷ Nal, naki'n wen wi' go lo tu go kun xtu go, nela Krist miwi' wen lo go, nes par rë men di'zh nazhon Dios. ⁸ Kuze' nin lo go, Krist ngok lo rë men Israel nela tu mos che'n bixa', par mile' Dios rë kwa'n mila' Me di'zh lo rë xuz men Israel, xa' tiemp, par ne rë men Israel, lë' Dios nile' rë kwa'n nila' Me di'zh. ⁹ Se' mile' Dios par rë men gat lë't men Israel, nu bixa' di'zh nazhon Dios por milats laxto' Dios bixa', nela xmod nzobni' ka lo Yech che'n Dios, widi'zh kwa'n nzhab se': Kidizha nazhon Go xid kwantsa rë lo men, xa' gat lë'ta' men Israel,

mbaino kë'n kant, dizha dox nazhon Go.

¹⁰ Mbaino xtu plo, se' nzobni':

Bizak laxto' go cho la men, tutsa kun rë men Israel.

¹¹ No xtu plo, se' nzhab:

Rë go, xa' nzë kwantsa yezh, bidi'zh go nazhon Dios, Me nile' mandad be.

Bikë' go kant bidi'zh go, dox nazhon Dios.

¹² Mbaino nu Isaías mizobni' widi'zh re':

Xid rë ben che'n Isaí rozi' tu xa' le' mandad rë men gat lë'ta' men Israel, mbaino por xa' re', ne bixa' zhin rë kwa'n mila' Dios di'zh par lë' bixa'.

¹³ Nal kina'ba lo Dios, Dios Me nile' ne go, lë' Me gaknu go, mbaino par zak laxto' go lo rë kwa'n, no zi go chul dizde le'n laxto' go por ñila go Dios, no par más yar kwa'n kimbëz go ka' go, por Sprit che'n Dios, Me nzho laxto' go.

Mizo Dios Pab lo rē men gat lē't men Israel

¹⁴ Rē go wech no bizan, na nane ka, lē' go nazhi' rē men che'n Jesukrist, mbaino por nane go xmod nak che'n Dios, kuze' nzhak nidi'zhuu go tu gon kun xtu go par le' go kwa'n ñal. ¹⁵ Lo yech re', niye laxto'n kidizha lo go pla rē widi'zh nayi' par tsila goi; nine lo go porke Dios mizo da par len zhi'n nazhon che'n Dios, por wen Dios. ¹⁶ Na xa' nile zhi'n nazhon che'n Krist Jesús lo rē men xa' gat lē't men Israel, par chi'n bixa' lo Dios, wi' Dios lo bixa' nela lo tu gon kwa'n ño laxto' Dios, no tsimbe Dios bixa' kun Sprit che'n Dios.

¹⁷ Kuze' dox nizak laxto'n nilen zhi'n nazhon che'n Dios, per por Krist Jesuze. ¹⁸ Yentra' kwan ye laxto'n dizha, nab tsa rē kwa'n kile' Krist por da, nes par rē men gat lē't men Israel gon bixa' ro' Dios; kile' Dios rē kure', rē kwa'n nidizha, mbaino rē zhi'n nazhon kwa'n nile' Krist por da. ¹⁹ Rē zhi'n nazhon re', nab tsa por Sprit che'n Dios nzhake xid rē men. No rē kure' kile' Dios, dizde yezh Jerusalén haxta lazh men Ilirico, plo kidizha widi'zh nazhon che'n Dios por Jesukrist lo rē men. ²⁰ Per xigab da nak zilita' nilen por nidizha widi'zh nazhon che'n Dios por Jesukrist plo nagat gon men cho nak Jesukrist, par nalen zhi'n nazhon che'n Dios plo nguzublo la xtu men. ²¹ Nela xmod nzobni' ka lo Yech che'n Dios:

Men xa' lalta' nagat gon widi'zh che'n Dios, lē' xa' gone; mbaino rē xa' naga gon widi'zh re', lē' bixa' zobyeye.

Nile' Pab xigab, yatsi' xa' ma rē men Roma

²² Nayax wēlt kilen xigab yala yi'dtsi'n ma go, per nagakte por zhi'n kwa'n kile' Krist por da re'. ²³ Per nal milox la rē zhi'n nazhon kwa'n kilen, le'n rē yezh plo nikizē'n re', porke dizde nzhala nzhaklan yi'dtswi'n ma go. ²⁴ Lē'da de'd lo go or yan lazh men España, mbaino yana pla ngubizh kun go, no nzhaklan plo yan, gaknu go da lo rē kwa'n naki'n da. ²⁵ Per nal, lē'da ya yezh Jerusalén plo nzho rē wech be xa' nak men che'n Jesukrist, par wēñ tu dimi par gagnun bixa'. ²⁶ Rē men che'n Jesukrist xa' nzho lazh men Macedonia kun rē xa' nzho lazh men Acaya, mikan bixa' dimi re' par rē men che'n Jesukrist xa' prob, xa' nzho yezh Jerusalén. ²⁷ Mile' bixa'i' por nzēi' laxto' bixa', per ñal ka le' bixa'i', porke rē men Israel mixē'l men par mid'i'zh widi'zh nazhon che'n Dios por Jesukrist lo bixa', mbaino une Dios bixa' wen por rē men Israel; kuze' nak bixa' nela tu men nzē'b ga' lo rē men Israel, or nzhaknu bixa' rē men Israel kun che'p kwa'n kinu bixa'. ²⁸ No or lox yate'da

dimi kwa'n migan re' lo rē men Israel, yan par nez España, orze' de'da lo go, yi'dtsi'n ma go. ²⁹ No wali ka, or yi'dtsi'n ma go, lē'da yi'dnu dox rē yalnazhon che'n Krist par go.

³⁰ Rē go wech no bizan, por nak be men che'n Jesukrist, Me nile' mandad be, no por xmod nazhi' be wech be por Sprit che'n Dios Me nzho laxto' be; kina'ba lo go, dubta' na'b go lo Dios por da, ³¹ par kina' Dios da lo rē xa' nayi'lazh, xa' nangont ro' Dios, rē xa' nzho rē yezh che'n men Judea; no nu par wi' rē wech be wen lon, rē xa' nzho yezh Jerusalén, nes par zak laxto' bixa' zen bixa' dimi kwa'n wēñ par lē' bixa'. ³² No chi'lē' Dios nzhaklai, lē'da zhi'n lo go, mbaino par zak laxto' go, yi'dtsi'n ma go, nes par yana che'p kun go par kan jwers. ³³ No Dios Me nile', nizi men chul dizde le'n laxto' men, lē' Me ya'n kun go. Sa' gake.

16

Kwa'n mid'i'zh Pab lult

¹ Kina'ba lo go, goknu go bizan be una' lē' Febe men che'n Jesukrist, xa' kwa'n nzhaknu más rē men che'n Jesukrist xa' nzho yezh Cencrea. ² Biwi'u lo una' re' nela xmod ñal ka le' rē men che'n Jesukrist. Biza' go kwan naki'n una', porke lē' una' re', dox ngoknu una' nayax men, mbaino nu da ngoknu una'.

³ Guzh go tu widi'zh wen lo Priscila no lo Aquila; rop xa' re' ngoknu da midizha widi'zh che'n Krist Jesús. ⁴ Rop xa' re' miye laxto' ngat por da. No gat lē't nab da kiza' xkix lo bixa', nu rē xa' nak men che'n Jesukrist, xa' gat lē't men Israel kiza' xkix lo bixa'. ⁵ No kixēla tu widi'zh wen par rē men che'n Jesukrist xa' nibin lizh bixa'. No nu par Epeneto, wech be por Krist, kixēla tu widi'zh wen par lē' xa', xa' nazhi' da re', xa' kwa'n galo laka ngwayila Krist xid rē men xa' nzho lazh men Asia. ⁶ No nu par Mari, Dios ka gaknu xa'; dox mile' xa' zhi'n che'n Jesukrist xid go. ⁷ No nu kixēla tu widi'zh wen par Andréonico, no par Junias, rop xa' re' melazha, no xa' kwa'n tutsa nguio'n lizhyi'b kulé', mbaino rop xa' re' dox tsak bixa' xid rē apost che'n Jesukrist, rē xa' galo laka ngok apost lon; Dios gaknu bixa'. ⁸ No nu par Amplias, xtu wech be men che'n Jesukrist xa' nazhi' da. ⁹ Nuska par Ban, xa' tutsa niké be zhi'n che'n Jesukrist kulé', no nu par Estaquis, xtu wech be xa' nazhi' da. ¹⁰ No nu par Apeles, tu xa' ya nane la men, dox naye nzo xa' lo widi'zh che'n Jesukrist; mbaino nu par rē melizh Aristóbulo. ¹¹ Mbaino nu par Herodión, xtu melazha, mbaino nu par rē xa' lizh Narciso, rē xa' nile' kwa'n nzhakla Jesukrist. ¹² No nu kixēla tu widi'zh wen par Trifena no par Trifosa. Rē una' re' dox niké bixa'

zhi'n nazhon che'n Dios. No nu par bizan be Pérsida, xa' nazhi' da, no xa' dox unké zhi'n nazhon che'n Jesukrist. ¹³ No nu par Rufo, kixêla tu widi'zh wen par lê' xa', tu xa' nakbe' por zhi'n wen kwa'n nile' xa' xid rê men che'n Jesukrist, mbaino nu par xna' xa', xa' re' ngok nela xna'n ga'. ¹⁴ Mbaino nu par Asíncrito, no par Flegonte mbaino par Hermes, no nu par Patrobas, no par Hermas, mbaino par rê men che'n Jesukrist xa' nzhin kun lê' bixa'. ¹⁵ No nu par Filólogo, kixêla tu widi'zh wen par lê' xa', no nu par Jul, mbaino par Nereo no par bizan xa', no nu par Olimpás, no par rê men che'n Jesukrist xa' nzhin kun lê' bixa'. ¹⁶ Rê go, men che'n Jesukrist, guzen go ya' wech go, uni' go lo bixa' kun dub laxto' go. No nu rê yado' plo nzhin rê men che'n Jesukrist, kixê'l bixa' tu widi'zh wen par rê go.

¹⁷ Rê go wech no bizan, kina'ba lo go, bikina go go lo rê xa' wen par nichil men namás, mbaino lo rê xa' kwa'n nikwa'n dil. Rê xa' re' nidi'zh xa'la mod lo rê kwa'n milu' no lo go; yubchi go lo bixa'. ¹⁸ Rê xa' nak sa', gat nile't bixa' kwa'n nzhakla Krist, Me nile' mandad be; nab tsa kwa'n nzhakla kwerp che'n bixa' nile' bixa'; no nix laka nidi'zh bixa' par la bixa' yek men xa' nazu't be's widi'zh che'n Dios. ¹⁹ Rê men nane, lê' go nile' kwa'n nzhakla Dios, kuze' nize' laxto'n por xmod naban go; no gok go más men nzhak par le' go más rê kwa'n wen, nes par yent por kwan di'zh men go gat lê', ²⁰ no ya mer la, lê' Dios Me nile' nize'n men chul dizde le'n laxto' men, lê' Dios ta'ch la yek Mizhab dilant lo go, no che'ptsa (bi'ch laka) gak Mizhab lo go. No Jesukrist, Me nile' mandad be, gaknu go por wen Me.

²¹ No nu Timoteo mixê'l tu widi'zh wen par go, tu xa' tutsa nikê no zhi'n che'n Jesukrist kun lê'; no nu Lus no Jasón, mbaino Sosípater mixê'l tu widi'zh wen par rê go; rê xa' melizha re'. ²² Na xa' lê' Tercio, kikê'n yech re' por mandad che'n Pab, Dios gaknu rê go. ²³ No nu Gayo mixê'l tu widi'zh wen par rê go. Xa' re' dox chul kinu xa' no lizh xa', na no rê wech be xa' nzho re'. No nu Rast mixê'l tu widi'zh wen par rê go, xa' re' nak zhi'n, nikina dimi yezh re'. No nu Cuarto, wech be por Jesukrist, mixê'l tu widi'zh wen par rê go. ²⁴ Lê' Jesukrist, Me nile' mandad be, gaknu rê go. Sa' gake.

Lult kwa'n midi'zh Pab

²⁵ Nal, ñal di'zh be nazhon Dios, Me nile' nzo go naye lo widi'zh che'n Jesukrist kwa'n nidizha no kwa'n mitse'da go, rê widi'zh nazhon che'n Jesukrist kwa'n kinu Dios naga'ch dizde or naga yo yizhyuo. ²⁶ Per nal une be kwa'n naga'ch re', rê kwa'n mizobni' rê men nzhala, xa' midi'zh por Dios; nela

xmod nak xigab che'n Dios, Me kinu yalna-ban par dubta'. Xigab naga'ch re' nak: lê' rê men yizhyuo yila Dios mbaino gon bixa' ro' Me. ²⁷ Lo tugaka Dios Me nab tsa lê' nzhak, yentra' cho más nane; lo Dios re' ñal di'zh rê men wen no nazhon par dubta' por Jesukrist. Sa' gake.

Yech galo kwa'n mixë'l San Pab lo rë men che'n Jesukrist, xa' nzho yezh Corinto

Ma go wech no bizan, çchi wen ka go?

¹ Na Pab, nak da tu apost che'n Krist Jesús, porke ngule Dios da par lun widi'zh che'n Me lo rë men, no nu Sóstenes, tu wech be por Jesukrist; ² mixë'l no yech re' lo rë go, xa' nzho yezh Corinto, xa' kwa'n ngule Dios, par gag go men che'n Me, go xa' mitsumbe la Krist Jesús laxto' por ñila go widi'zh che'n Me, nela xmod ngwayila más rë men che'n Dios xa' nzhin rë plo, par nina'b bixa' lo Jesukrist, Dios Me nile' mandad rë be. ³ Kina'ba lo Dios Xuz be, mbaino lo Jesukrist Me nile' mandad be, par gaku Me go, no zi go chul dizde le'n laxto' go.

Xkix Dios por nak be men che'n Jesukrist

⁴ Zilita' nizan xkix lo Dios por rë go, no nu por rë kwa'n wen, kwa'n mile' Me por go, por nak go men che'n Krist Jesús. ⁵ Mine' Dios rë kwa'n wen ka' go, par ro' widi'zh wen ro' go, mbaino par ngok milibe' go xmod nak Dios, por lë' Jesukrist, ⁶ por dox milu' walika ngwayila go widi'zh che'n Dios, mbaino mizobyek goi. ⁷ Kuze', dub kimbëz go, zhin zhë yë'd Señor Jesukrist xtu wëlt lo yizhyuo re', gat nzhak' jwält lo go, ni tu rë kwa'n nazhon, kwa'n niza' Dios ka' rë men che'n Me. ⁸ Lë' Dios le', dubta' yila go widi'zh che'n Me, haxta or zhin zhë, yë'd Señor Jesukrist xtu wëlt, no orze' yent cho gab, lë' go nzë'b xki tu kwa'n lo Dios. ⁹ Dubta' nile' Dios rë kwa'n nila' Me di'zh, no Dios ngule go par gag go tutsa kun Jesukrist, Me nile' mandad be.

Xmod milë' rë men che'n Jesukrist

¹⁰ Kuze', wech no bizan, por Jesukrist, Me nile' mandad be, dox kina'ba lo go, tutsa bile' go xigab or le' go tu kwa'n; no nalë't go, sino ke chul guzhin go, no tutsa xigab bile' go. ¹¹ Nin kure' lo go wech, porke tu melizh Cloé mbi'dne lon, lë' xid go nzho rë xa' nichë'lro'. ¹² Kuze' nin lo go, porke nzho go nidi'zh: "Na nak men che'n Pab", per más go nidi'zh: "Na nak men che'n Pol", no nzho go nidi'zh: "Na nak men che'n Per", mbaino más go nidi'zh: "Na nak men che'n Jesukrist." ¹³ Or nidi'zh go sa', pas gab go, nab tsa pla rë xa' kwa'n nzho xid go ba' nak men che'n Jesukrist; o, çpas nile' go xigab, lë' Pab nkë lo krus por rë kwa'n nzë'b xki go? o, çpor lë' Pab ngoklë'i go? ¹⁴ Per xkix Dios, ni tu go nangalilë'i'ya le'n nits, nab tsa Crispo no Gayo mililë'i'ya, ¹⁵ nes par ni tu

go nadi'zht, ngoklë'i' go por lën. ¹⁶ Mbaino namás, mililë'i'ya rë melizh Stefanos, per más men nazëtra' laxto'n, chi mililë'i'ya bixa', ¹⁷ porke nangaxë'lt Jesukrist da par lilë'i'ya men, sino ke mixë'l Krist da par dizha lo rë men, xmod nitsumbe Dios men lo rë kwa'n nzë'b xki men, no gat nilutne kun rë widi'zh kwa'n nzhak rë men yizhyuo re', nes par niyent cho di'zh, yent kwan zu' ngut Krist lo krus.

Lë'yalnazhon che'n Dios nak Krist

¹⁸ Rë widi'zh kwa'n nilu' no por xmod ngut Jesukrist lo krus por rë men, par kubchi Dios rë kwa'n nzë'b xki bixa'; kwent nzhak miyizh kure' par men gat ñilai, rë xa' kwa'n kilox lo rë kwa'n nzë'b xki bixa' lo Dios. Per par be, por ñila be, miche' Dios rë kwa'n nzë'b xki be lo Dios, porke widi'zh re' nak poder che'n Dios. ¹⁹ Nela nzobni' ka lo Yech che'n Dios:

Lë'da goch yek rë xa' kwa'n nizi dox nzhak, mbaino len, yitlo rë kwa'n nile' xa' xigab nzhak xa'.

²⁰ Por kwa'n mile' Dios por Jesukrist lo krus, milu' Dios yent kwan zu' xigab che'n men yizhyuo. Par Dios, yent men natsin, no yent men nzhak por dox mitse'd xa' widi'zh che'n Dios, porke yent cho gak kab lo Dios chi na'bdi'zh Dios tu kwa'n. ²¹ Nilibe' men Dios, gat lë't por dox nzhak men, rë kwa'n nane men yizhyuo re'i, sino ke por wen Dios namás, nila' Dios nilibe' men Dios par ban bixa' bid kwa'n nayot lox por ñila bixa' Jesukrist, ter par más men, xa' gat ñilat widi'zh che'n Dios, tlë't xti'zh menaye kure'.

²² Nzhakla rë men Israel ne bixa' le' men tu kwa'n nazhon por Dios, par yila bixa' men; mbaino rë men grieg, par yila bixa' kwa'n di'zh tu men, galo laka nzhakla bixa' gon bixa' kwa'n di'zh tu men rë widi'zh dox nagan kwa'n nab tsa rë men nzhak nane; ²³ per no nilu' widi'zh che'n Jesukrist, Me ngut lo krus; no par rë men Israel, widi'zh re' nak nela tu ke kwa'n nirë'l ni' bixa'; per par rë xa' gat lë't men Israel, widi'zh re' nak gat lë't xti'zh menaye; ²⁴ per par rë xa' ngurezh Dios par gag men che'n Jesukrist, wane'i choi, rë men Israele o rë xa' gat lë't men Israele; par rë men re', Jesukrist nak rë yalnazhon che'n Dios, mbaino rë kwa'n nzhak Dios. ²⁵ Rë men yizhyuo nile' xigab, gat lë't xti'zh menaye rë widi'zh che'n Dios, per widi'zh che'n Dios mile' gan, más nzhake lo rë kwa'n nzhak men yizhyuo; no ter nzho men nile' xigab, yent kwan zu' Dios par le' Me tu kwa'n nazhon, per Dios walika lë' gaka Me más nazhon lo rë kwa'n zak men yizhyuo re' dox nazhon.

²⁶ Rë go wech no bizan, bitsila go, or ngurezh Dios go, más rë men xa' gat nilibe't Dios nile' xigab, yent kwan zu' go mbaino

yent kwan tsak go, mbaino ni gat nzë go ben men tsak, ²⁷ sino ke Dios ngule men chigab naxeenla yizhyuo re', par le' Dios tula rë xa' nile' xigab, gab dox nzhak; mbaino ngule Dios xa' chigab yent kwan zu' tuli, par le' Dios tula rë xa' nile' xigab, gab dox nzhak. ²⁸ No nu ngule Dios rë xa' natsakt, rë xa' nile' rë men yizhyuo rrajón lo, par le' Dios tula rë xa' nile' xigab, dox tsak, ²⁹ nes par sa', yent cho zi marian lo Dios. ³⁰ Per mile' Dios ngok go tutsa kun Krist Jesús; mixë'l Dios Jesukrist lo be par mizini Me yek be, par gak be xa' nzhak, mbaino par ban be nali lo Dios; mbaino mitsambe Dios laxto' be lo Dios, par ngok be men che'n Me. ³¹ Mbaino lë'la xmod nzhak ka widi'zh che'n Dios: Chi nzho men nzhakla, zi dox tsak xa' por nane xa' kwa'n, gak zi xa'i, per por kwa'n mile' Señor Jesukrist por lë' xa'i.

2

Widi'zh che'n Jesukrist, Me kwa'n nkë lo krus

¹ Kuze', rë go wech no bizan, or mbi'dlun widi'zh che'n Dios lo go, nangalutne kun rë widi'zh dox nagan kwa'n nidi'zh rë men, ² sino ke or midizha xid go, yentra' kwan más midizha, nab tsa midizha kwent che'n Jesukrist, Me nkë lo krus. ³ No or mizhi'na lo go par lun widi'zh che'n Dios, nizi da nela tu men yent jwers, no haxta nixiz da no nizheb da. ⁴ No or midizha widi'zh che'n Dios lo go, nangadizhtne lo go nela tu men dox nzhak ga', sino ke milan, lë' Sprit che'n Dios milu' lo go kun poder, nayax rë kwa'n nazhon, ⁵ nes par kwa'n ñila go Dios, gat nzëte por kwa'n nzhak men yizhyuo, sino ke lë'i nzë por yalnazhon kwa'n kinu Dios.

Nzhakbe' be Dios por Sprit che'n Dios

⁶ Per xid rë xa' miro'b la xigab che'n, lo che'n Dios, nidizha pura widi'zh kwa'n nzhak Dios, no gat lë't rë widi'zh kwa'n nzhak men yizhyoi, o rë widi'zh kwa'n nidi'zh rë xa' kwa'n kinu poder par le' mandad, porke kwa'n nzhak men yizhyuo, lë'i lox. ⁷ Per no, nidi'zh rë widi'zh kwa'n nab tsa Dios nzhak, rë xigab kwa'n kinu Dios naga'ch, or ni naga ko Dios yizhyuo, nes par mile' Dios ban be lo biani che'n Dios. ⁸ No ni tu rë xa' nile' mandad, rë xa' nzhin yizhyuo re', nangont rë widi'zh re'; per chi lë' bixa' ngone, orze' nangakë't bixa' Jesukrist lo krus, Me kwa'n nile' mandad rë kwa'n nzho. ⁹ Nela xmod nzobni' ka lo Yech che'n Dios: Dios kinu la rë kwa'n par rë men nazhi' Dios, rë kwa'n lalta' nagat ne men, no ni naga gon men, mbaino ni xigab naga le' mene.

¹⁰ Dios milu' la rë kure' lo be por Sprit che'n Dios, porke Sprit che'n Dios nane xmod nak rë kwa'n, haxta rë kwa'n kinu Dios más naga'ch, nane Sprit che'n Dios.

¹¹ Xid rë men yizhyuo, yent cho nane kwan nzho laxto' tu men, nab tsa sprit che'n men nane cho xigab nile' men. Se'ska, nab tsa Sprit che'n Dios nane, kwan nile' Dios xigab. ¹² No be, por mine' Dios Sprit che'n Dios yo laxto' be, kuze' nane be kwan mine' Dios ka' be, por wen Dios. ¹³ Nidi'zh no rë kure' lo men, gat lë't kun widi'zh kwa'n mitse'd no yizhyuo re'; nidi'zh noi kun rë widi'zh kwa'n mitse'd Sprit che'n Dios no, par di'zh no rë che'n Dios lo rë men xa' nzho Sprit che'n Dios laxto'.

¹⁴ Per men xa' gat nzhot Sprit che'n Dios laxto', gat ñilat xa' kwa'n nzë por Sprit che'n Dios, porke par lë' xa', gat lë't xti'zh menaye kure', no ni nagak zobyek xa'i, porke nab tsa Sprit che'n Dios nile' nizobyek mene. ¹⁵ Per xa' nzho Sprit che'n Dios laxto', rëi nzhak xa' no nizobyek xa'i; per xa' gat kinut Sprit che'n Dios, nagakt ne xa' xmod nak men xa' nzho Sprit che'n Dios laxto'. ¹⁶ Kuze', se' nzobni' lo Yech che'n Dios: Yent cho nane xmod nak xigab che'n Dios, no yent cho gak gab kwan le' Dios. Per be, xa' nzho Sprit che'n Dios laxto', kinu be xigab che'n Jesukrist.

3

Lë' men che'n Jesukrist nile'

¹ Biwi'ule wech no bizan, nangadizhta' lo go nela tu xa' nzhak dox por Sprit che'n Dios, sino ke midizha lo go nela nidi'zh rë xa' laore ngwayila widi'zh che'n Dios, rë xa' nak nela tu mè'd ga' lo che'n Dios. ² Mitse'da go kun pura widi'zh jwals, no gat lë't kun widi'zh nagan milene, porke go nak nela tu mè'do' ga' kwa'n nab tsa chich gak go. No nela xmod nangazobyekt go kwa'n nagan che'n Dios, or milune lo go, no ni naga zobyek goi nalre', ³ porke stubi kinu go xigab che'n men yizhyuo re', niwix go rë kwa'n kinu wech go, mbaino nidil go, tu go kun xtu go, porke se' nile' rë men yizhyuo, ⁴ porke nzho go nidi'zh: "Na nak men che'n Pab", per más go nzhak: "Na men che'n Pol." Pwes xmod nak go ba', sa' nile' rë men yizhyuo re'.

⁵ Pwes na Pab, mbaino Pol, yent xkwane no; nab tsa nak no mos che'n Dios, xa' nilu' widi'zh che'n Dios lo go, mbaino ngwayila goi, kuze' kad tu no mile' zhi'n kwa'n mine' Dios le' no. ⁶ Na mixen go, nela tu yaye'n ga', lo widi'zh che'n Dios; no Pol ngok xa' ngulo nits xan yaye'n re', per Dios nak Me nile' niro'b men lo che'n Dios. ⁷ Pwes ni xa' nidi'zh widi'zh che'n Dios, no ni xa' kwa'n nitse'd men widi'zh che'n Dios zilita' nela tu

maestr ga', yent cho tsak, sino ke nab tsa Dios tsak, Me kwa'n nile' niro'b men lo che'n Me. ⁸ Tant men kwa'n ñadi'zh widi'zh che'n Dios, no men kwa'n nilu' widi'zh che'n Dios lo rë men, lal tsak bixa' par lo Dios, no Dios kix ka' kad bixa' por kwa'n nile' bixa'. ⁹ Na kun Pol, nak no namás nela mos nado ga' lo Dios, no go nak nela yuo nzha'n men kwa'n nak che'n Dios, o nak go nela tu yo' ga' kwa'n michao' Dios.

¹⁰ Por dox wen Dios kuna, nak da nela tu albañil xa' michao' simient che'n tu yo', no xtu men kichao' yo' lo simient re'; per kad men ñal wi' xa' xmod kichao' xa' yo' re', ¹¹ porke tutsa simient nzho par yo' che'n Dios, no simient re' nak yub Jesukrist. ¹² No chi tu men chao' kwa'n or lo simient re', o kwa'n plat, o kun rë ke dox tsak; o chao' men yo' loi kun yix triu o kun ya, ¹³ per zhi'n che'n kad men yaxo'b zhë kwa'n gab Dios xmod gak kun kad men por kwa'n mile' bixa'. No zhë ze', kun bël gak preb zhi'n kwa'n mile' kad men. ¹⁴ No chi kwa'n michao' men yent chi gake le'n bël, pwes wen gax ka' men ze' por zhi'n kwa'n mile' xa' re'. ¹⁵ Per chi yo' kwa'n michao' men yëk le'n bël, orze' yent cho kwent zhi'n kwa'n mile' xa', ter le' xa' gan nela men kwa'n nikë' karre le'n bël ga'. ¹⁶ ¿Chi nanet go, lë' go nak yado' che'n Dios, no Sprit che'n Dios nzho laxto' go? ¹⁷ No chi cho men chil yado' che'n Dios, lë' Dios lo'x men ze', porke dox nambe yado' che'n Dios, mbaino go nak yado' re'.

¹⁸ Nakidet go yub go; chi cho tu go nile' xigab, dox nzhak go por nilibe' go rë kwa'n nzho yizhyuo re', pwes naki'n gak go nela tu men yent kwan nzhak yizhyuo re', nes par gak go walika men nzhak por Dios. ¹⁹ Porke par Dios, rë men xa' nzhak kwa'n nzho yizhyuo re', nak nela tu men nidi'zh kwa'n yent yek ga', porke se' nzobni' lo Yech che'n Dios:

Dios nile', nitula rë xa' nzhak kwa'n nzho yizhyuo re',
por mis kwa'n nidi'zh bixa', lë' bixa' men nzhak.

²⁰ Mbaino xtu plo, se' nzobni' lo Yech che'n Dios:

Dios nane ka, rë xigab kwa'n nile' rë men, xa' nile' xigab, nzhak rë kwa'n nzho yizhyuo re',

nak nela tu men, gat menayet ga'.

²¹ Kuze', gat ñalt gak tu men marian por kwa'n kinu xa' yizhyuo re', porke kad go mine' Dios rë kwa'n wen par bien chego:

²² kwa'n mitse'd go lo Pab, o lo Pol, o lo Per; rë kuba' nak par ya go wen; mbaino yizhyuo, no yalnaban, no la muert, no rë kwa'n nzho nal, mbaino rë kwa'n laore yo; rëi nak che'n go; ²³ mbaino go nak men che'n Jesukrist, no haxta Jesukrist nzë lo Dios.

4

Zhi'n che'n rë apost

¹ Kuze' naki'n ne go, lë' no nak nela tu mos ga' lo Jesukrist par nile' no zhi'n che'n Me; nidi'zh no rë kwa'n kinu Dios naga'ch, no par lu' noi lo go. ² Pwes, tu xa' nikë' tu zhi'n, naki'n wei' xa'i wen, lo rë kwa'n nile' xa'. ³ No na, nayat laxto'n ter rël go xmod nak da, o mis rë gustis yizhyuo re' wi' bixa', nabei chi nilen kwa'n wen o kwa'n nakap; no ni mis na, nagakt wi'n xmod nak da, ⁴ porke gat nize'nt da chi nzhapa dol, per gat lë't por kuze', gat kinuta dol; pwes lë' Señor wane xmod gak da, chi nzë'b xkin. ⁵ Kuze', nagabt go kwan ñal tu men por xmod nak xa' lo Dios, or naga zhin zhë or yë'd Jesukrist xtu wëlt, orze' lë' Me ko' al tich rë kwa'n nzhuka'ch, mbaino rë xigab kwa'n nzho laxto' kad men, orze' par za' Dios kwa'n ñal kad men por kwa'n mile' bixa'.

⁶ Rë go wech no bizan, nin kure' lo go, par tse'd go gak go nela da ga', no xmod nak Pol. Nin kure', nes par ni nale' go dimás lo rë kwa'n nzobni' lo ley che'n Dios. Per ni tu go kwa'n nak men che'n Jesukrist, nazit go más tsak go lo xtu rë wech go. ⁷ No chi nizi go más tsak go xid más rë wech go, por rë che'n Dios kwa'n kinu go, per gat ñalt zi go sa', porke mis Dios mine'i. No chi lë' Dios mine'i, ¿chon nizi go marian? ¿Chi mis jwers che'n yub go, mile' kinu goi?

⁸ Nile' go xigab, dox tsak go; mbaino dox rrik go nidi'zh go, no haxta nile' go xigab, nak go nela rey ga', gat naki'ntra' go no. Oj walika rey go, nes par nu no ngale' mandad kun go. ⁹ Per na zak, rë no, xa' nak apost che'n Dios, Dios mizo no lugar lult lo rë men, nela tu men namás kimbëz par gat; mbaino niyitnu rë men yizhyuo no, no nixizhnu bixa' no; haxta nu rë ganj che'n Dios nine kwa'n nizak no. ¹⁰ Nilu' no lo rë men nela men naxenla ga' por nilu' no widi'zh che'n Jesukrist; per go, xkix Jesukrist, kinu men go por natsin; mbaino no nak nela men yent jwers ga', per go, men kinu jwers por Krist ter nixizhnu men no, mbaino niyi' bixa' nine bixa' no, per go, más nzhon men ro'u. ¹¹ Mbaino no, haxta nal se'gaka, nite'd no yalnila'n no yalnuzei', no ni xab no niyent, no gat ninet men no wen; mbaino ni gat kinu no plo yo no. ¹² Nikë' no zhi'n kun ya' no, haxta plo ñazha no; no or nizhi'bde men no, orze' nina'b no lo Dios par ya men ze' wen; no ter nizakzi men no por nak no men che'n Jesukrist, per nixek no loi, wanei kwane. ¹³ No or niye men no, orze' nikab no lo bixa' kun widi'zh wen; no kinu men no nela tu kwa'n yent kwa'n zu' ga', mbaino tu kwa'n wen namás par yubiy; dub tiemp nizak no se'.

¹⁴ Gat kinita' kure' lo go lo yech re', par len tula go, sino ke par nen kusej goi, porke rë go nak nela tu xme'da kwa'n nazhi' da. ¹⁵ Pwes ter kinu go chi' mil maestr xa' nilu' widi'zh che'n Jesukrist lo go, per nagakt gap go nayax xuz go ga'. Na nak xuz go, porke or midizha widi'zh che'n Jesukrist lo go, no ngwayila goi, orze' ngok go nela xme'da ga'. ¹⁶ Kuze', dox kina'ba lo go; gak go nela da. ¹⁷ Por kure', mixëla Timoteo lo go, xa' nak nela tu xga'na, xa' nazhi' da, no xa' nzhon di'zh por Jesukrist. Lê'xa' ne lo go xmod nikizë'n lo widi'zh che'n Jesukrist, nela xmod nilu' ka widi'zh che'n Dios lo rë men che'n Me xa' nzhin rë plo ñan, ¹⁸ porke nzho go kizi la dox tsak go, nile' go xigab, ya nayi'dtsi'tra' ma go, ¹⁹ per nilen xigab yi'dtsi'n ma go lwega', chi lê' Dios nzhaklai, orze' gat lê't nab ganen, xkwan nidi'zh rë xa' nizi dox tsak ba'i, sino ke wi'n nabe'i, chi walika nile' Sprit Nazhon che'n Dios, rë nak kwa'n nidi'zh bixa' nile' bixa', ²⁰ porke tu men walika ñila widi'zh che'n Dios, gat nilut xa'i kun nab rë kwa'n nidi'zh xa', sino ke nilu' xa'i di xmod naban xa'. ²¹ Xmod nzhakla go, yala lo go? ÇChi nzhakla go yala, nzho tu bar ya'n par kina go?, o, çyala nazhi' da go, no dizha pura widi'zh wen lo go?

5

Xmod ñal le' rë men che'n Jesukrist or nzhak tu kwa'n gat lê' xid bixa'

¹ Pwes nzhona, nidi'zh men xid go, rë xa' nak men che'n Jesukrist, jnzho tu go kinu mis xna' guya'n go, nak una' ghego! No, jdox gat lê't kure', per ni xa' gat nilibe't Dios, gat nzhot met nile' kure'! ² Mbaino marian nizi gox! ÇMaxa go ngawin laxto' por kwa'n ngok re', no ngagotin go miyi' ba' xid go, xa' kwa'n mile' kwa'n gat lê' ba'? ³ No ter gat nzota xid go, per sprit da nzo ka kun go, par ganin kwan ñal, xa' mile' kwa'n gat lê' ba'. ⁴ Ter nzon zit, per nikë laxto'n go no nilen xigab che'n go; no or win go por nak go men che'n Señor Jesukrist, bitsila go, lê' go kinu yalnazhon che'n Me par le' go mandad. ⁵ Kuze', naki'n bichi go xa' nak sa' lo Mizhab, mbaino ter lo'x Mizhab kwerp che'n xa', per sprit che'n xa' ro' lo rë kwa'n nzë'b xki xa', zhë kwa'n yubre Señor Jesukrist xtu wëlt.

⁶ Gat ñalt zi go marian por kwa'n nile' go. No lê' go nane ka: Ke tlë' win tsa levadur nitsibech dub tu mas ro ko'b harin. ⁷ Kuze', gat ñaltra' le' go kwa'n gat lê't xid go ni lo Dios, rë kwa'n nak nela levadur ga', nes par ya'n namba go, nela tlë' ko'b harin, kwa'n laore mbich, par gaxkao' pan sin levadur; porke walika go nak nela pan kwa'n gat nakxao't kun levadur kwa'n nzhao men lani Pask; no Krist ngut por kwent che'n be, nela nzhat tu mbëkxi'l ga' par lani Pask che'n

rë men Israel. ⁸ Kuze', naki'n le' be lani Pask kun pan kwa'n nzhakxao' sin levadur; kure' nak namba laxto' be, no nali nikizë be, no nale't be lani Pask kun pan kwa'n nzho levadur go'x, kwa'n nak kwa'n gat lê', kwa'n nzho laxto' men.

⁹ Lo xtu yech kwa'n mixëla lo go ze', nin: "Nachë'lt go dub laxto' go kun rë xa' niban kun cho la men", ¹⁰ per gat kinita, nayot go xid rë men yizhyuo, xa' niban kun nayax men, o xid rë xa' kwa'n niwix gap dimi, o xid rë xa' wa'n, o xid rë xa' kwa'n nizuxib lo rë winab; pwes par nayo go xid rë men ba', naki'n ro' go lo yizhyuo tuli. ¹¹ Kwa'n nzhaklan gon go lo yech re' nak: "Nachë'lt go kun rë xa' nidi'zh nak xa' tu men che'n Jesukrist, per niban xa' kun tu men, xtu men; o niwix xa' kwa'n kinu xtu men, o nizuxib xa' lo rë winab, o nak xa' tu men dox niye, o nak xa' tu men nguy, o wa'n xa'." Kun rë men nak sa', per ni nagao go kun lê' bixa'. ¹²⁻¹³ Porke na, nagakta' len mandad lo rë xa' gat lê't men che'n Jesukrist, sino ke Dios ka wane le' yalgustis kun lê' bixa'. Per rë xa' ñila widi'zh che'n Jesukrist, go nak xa' le' yalgustis kun lê' bixa'. Kuze' nin lo go, naki'n kutin go xa' kwa'n nile' kwa'n gat lê' xid go ba'.

6

Or kinu rë men che'n Jesukrist tu kwent

¹ Or kinu go tu kwent kun tu wech go, men che'n Jesukrist, çchon ya go lo rë xa' gat lê't men che'n Jesukrist, par lê' xa' kuxkwa' kwent che'n go; chon naya go más wen lo rë men che'n Jesukrist? ² ÇChi nagont go, lê' zhë zhin, gab rë men che'n Jesukrist xmod gak kun rë men yizhyuo? No chi lê'i men che'n Jesukrist le' kuba' kun rë men yizhyuo, orze', çkalo rë kwa'n win re', nagakt kuxkwa' yub tu rë go, rë kwent kwa'n nizak go? ³ ÇChi nagat gon go, haxta nu lo rë ganj che'n Dios, gab go xmod gak kun lê' bixa'? No chi lê'i sa' nak, jpwes más jwals le' goi yizhyuo re'! ⁴ Or nidil go kun mis wech go, men che'n Jesukrist, çchi ziye laxto' go, gab go lo rë xa' gat lê't men che'n Jesukrist, le' bixa' yalgustis kun go? ⁵ Nin kure' lo go, nes par tula go. ÇTaxa niyent ni tu go, men che'n Jesukrist, xa' nzhak mbaino xa' natsin, par lê' xa' kuxkwa' kwent kwa'n kinu go kun wech go, men che'n Jesukrist? ⁶ No gat lê't nab nidil tu go kun xtu goi, sino ke ñazob go demand wech go lo rë xa' nak zhi'n, xa' gat lê't men che'n Jesukrist.

⁷ Kun nab tsa nidil go namás kun xtu rë men che'n Jesukrist, dox tu jwalt ro kure'. Más wen bixek go lo rë kwa'n gat lê' nile' bixa' lo go, no ter bila' go ka' xa' rë che'n go. ⁸ Per go, kun mis men che'n Jesukrist, nile' go kwa'n gat lê', nakap go lo bixa', mbaino

nilat go che'n bixa'. ⁹Nala't go wei' xigab gat lè't go par le' go kwa'n gat lè'. ¿Chi nagont go, nayot ni tu rē men, xa' nile' kwa'n gat lè', plo nile' Dios mandad? Rē xa' kwa'n niban kun tu men no xtu men, no rē xa' nizuxib lo rē winab, mbaino rē xa' niban kun tsa' men, mbaino rē miyi' xa' ño laxto' gak una', no rē miyi' xa' nika' tsa' miyi'; ¹⁰ no ni rē men wa'n, mbaino ni rē xa' niwix ka' che'n xtu men, no ni rē men nguy, no ni rē xa' dox niye, no ni rē xa' nikide par lat xa' che'n men; pwes ni tu rē men re' nayot plo nile' Dios mandad. ¹¹ No pla go ngok sa', per nal, lè' Dios mitsumbe la go, no mia'n nambe laxto' go lo Dios, porke miche' Dios rē kwa'n nzè'b xki go por Señor Jesukrist, no por Sprit che'n Dios.

Kwerp che'n be nak yado' che'n Dios

¹² Nzho men nidi'zh kure': "Na gak le rē kwa'n nzhaklan." Walikai, per gat lè't rē kwa'n nzhaklan len, rēi wen. Kuze' nalata le' ni tu kwa'n mandad lon. ¹³ No nzho men nidi'zh: "Lè' kwa'n nzhao men nizu' par laxto' men, no laxto' men nizu' par nzhao men." Walikai, per zhin zhè, rop kure' lox lo Dios. Per kwerp che'n be gat kinut bei par ban be kun tu men no xtu men, sino ke za' be kwerp che'n be par le' be kwa'n nzhakla Dios, porke kwerp che'n be nak che'n Dios. ¹⁴ Pwes nela mile' Dios, nguruban Jesukrist, nu ska be le' Dios ruban be. ¹⁵ Pwes go, ¿chi nanet go, lè' kwerp che'n go nak kwerp che'n Jesukrist?, no chi lè' kwerp che'n be nak kwerp che'n Krist, orze', ¿chi ziza' be kwerp che'n Krist par gake tutsa kun kwerp che'n tu una' le'n kai (kwa' gal)? ¿Nayot gakla Dios kuba! ¹⁶ ¿Chi nanet go, or nika' tu miyi' tu una' kai, orze' rop xa' nzhak tutsa kwerp?, porke se' nzobni' lo Yech che'n Dios: "Rop xa' nak nela tutsa men." ¹⁷ Per tu xa' nak men che'n Jesukrist, tutsa ngok kwerp che'n xa' kun kwerp che'n Dios, por Sprit che'n Dios. ¹⁸ Kuze', ¿yubchi go tuli, nabant go kun men, xa' gat lè't tsa' go! Rē nak xtu kwa'n gat lè' kwa'n nile' men, gat lè't lale kun kure', porke dox gat nambet ña'n kwerp che'n xa' kwa'n nile' kure' lo Dios, xa' niban kun chola men. ¹⁹ ¿Chi nanet go, lè' mis kwerp che'n go nak yado' che'n Sprit che'n Dios, no Dios mine' Sprit che'n Dios nzho laxto' go? Kuze', gat lè't mis go nile' mandad go, ²⁰ porke nguzi' Dios go kun tu kwa'n dox tsak; kuze' naki'n za' be kwerp che'n be par Dios, le' be kwa'n nzhakla Dios.

7

Tu kusej par kwa'n men

tsa' men

¹ Nal ganin lo go, kwa'n ngunabdi'zh go lon, lo yech kwa'n mixè'l go or ne go: "Chi zak más wen nakwa'nt men una'." ² Per por

rriez ban men tu men xtu men, más wen kad miyi' gap tu una' xa' gak tsa' xa', no kad una' gap tu miyi' xa' gak tsa' una'. ³ No kad miyi' mbaino kad una' naki'n nab tsa kun tsa' bixa' ga' bixa', ⁴ porke rē una' kwa'n nzhap miyi', gakta' le' una' mandad kwerp che'n una', sino ke xmiyi' una' nile' mandad kwerp che'n una'; mbaino se'ga' miyi', una' che'n xa' nile' mandad kwerp che'n miyi'. ⁵ Kuze', nakat go kwerp che'n go lo tsa' go. Más wen, ya'n go di'zh or na'b go tu kwa'n lo Dios, naga't go; dispwes orze' gaka ga' go kun tsa' go xtu wèlt, nes par nakide Mizhab go, le' go tu kwa'n gat lè', or naxe' go lo kwa'n na'b kwerp che'n go. ⁶ Nin kure' lo go, nela tu kusej ga', gat lè't mandad che'n Diose. ⁷ Na nzhakla, ¡más wen rē go ngak nab nela da ga'!; per por kad men, nile' Dios, xa' nak tu xa', no xa' nak xtu xa'.

⁸ Per xigab da, rē xa' nab, mbaino rē una' kwa'n ngut xmiyi', más wen ya'n bixa' nab nela na ga', nakwa'nt bixa' men gak tsa' bixa'. ⁹ Per chi nagak ka'n bixa' lo xigab re', pwes neka kwa'n bixa' tsa' bixa', porke más wen, kad men gap tsa', ke par lox men lo kwa'n dox nzhakla men, kwa'n men tsa' men.

¹⁰ Per lo nabtsa rē xa' kinu tsa', gadizha kure': Gat lè't xigab dai, sino ke Dios kile' mandade: Rē una' kwa'n nzhap xmiyi', nalè't xa' kun xmiyi' xa'. ¹¹ No nal, chi lè' tu una' la' xmiyi', orze' ñal, ya nakwa'ntra' una' xtu miyi', o di nuev, zhè'l xa' kun xmiyi' xa', yo wen laxto' bixa' xtu wèlt, mbaino se'ska, nagakt lè' tu miyi' kun una' che'n xa'.

¹² Mbaino lo más rē go ganin, gat lè't Señor mile' mandade, xigab dai. Chi tu una' che'n tu miyi', xa' nak men che'n Jesukrist, gat ñilat una' widi'zh che'n Dios, per kinu una' xigab, lè' una' ban ka kun lè' miyi', kuze' gat ñalt la' miyi' re' una' che'n xa'. ¹³ Mbaino se'ga', chi tu una' xa' ñila widi'zh che'n Jesukrist, no xmiyi' xa' gat ñilate, per xigab che'n miyi', lè' miyi' ban ka kun lè' una', orze' gat ñalt lè' una' kun xmiyi' una', ¹⁴ porke miyi' xa' gat lè' men che'n Jesukrist re', ngok nambe xa' lo Dios por mizhè'l xa' kun una' xa' ñila widi'zh che'n Jesukrist; mbaino una' xa' gat lè't men che'n Jesukrist, nu una' ngok nambe lo Dios namás por xmiyi' una', xa' nak men che'n Jesukrist. Mbaino haxta rē xmè'd bixa', niwi' Dios lo nela lo men che'n Jesukrist, no nawi't Dios lo bimè'd nela tu kwa'n gat nambe ga' par lo Dios. ¹⁵ Per chi kwalesquier tu rē xa' re', xa' miyi' o xa' una'i, xa' kwa'n gat lè't men che'n Jesukrist re', gakla xa' lè' xa' kun tsa' xa', xa' nak men che'n Jesukrist re', pwes zak le' xa'i. Orze' lè' miyi' o una', xa' nak men che'n Jesukrist re', orze' gak lè' bixa', porke Dios ngurez' be par ban be chul, no zi be chul. ¹⁶ No lu, una', kwa'n nak men che'n

Jesukrist, pas por lu nzho rriez, lè' xmiyi'l ban par dubta' kun Dios; o, lu miyi', xa' nak men che'n Jesukrist, pas por lu namás, lè' una' che'nal ban par dubta' kun Dios.

¹⁷ Widi'zh re' nzhaklan nin, par gon rè goi, go xa' nak men che'n Jesukrist: Nela xmod nzo go or ngwayila go Dios, sa' guzo go dubta'. Kure' nilun lo más rè men che'n Jesukrist xa' nzhin rè plo. ¹⁸ Chi ngurezhe Dios tu miyi' par gak xa' tu men che'n Jesukrist, dub nikè señ kwa'n lè' circuncisión kwerp che'n xa', pwes gat ñalt kuchi xa' señ ze' kwerp che'n xa'; mbaino chi ngurezhe Dios tu miyi' par gak xa' tu men che'n Jesukrist, dub gat nikè señ re' kwerp che'n xa', pwes gat ñalt kè señ re' kwerp che'n xa'. ¹⁹ Porke yent kwa'n tsak, nikè señ re' kwerp che'n men, o gat nikète; kwa'n más tsak lo Dios nak, gon men ro' Dios. ²⁰ Kad men ñal gak nela xmod nak bixa' or ngwayila bixa' Dios. ²¹ Chi nakal tu mos nado lo xtu men por nguzi' xa' lu, or ngwayilal Dios; nale'tal be's xigab por lè'i; per chi gak zhirel dimi kwa'n nguzi' xa' ze' lu, par nale'ra' xa' mandadal, pwes bizhirei. ²² Pwes xa' nak mos nado lo xtu men, or ngwayila xa' Dios, par kè xa' zhi'n nazhon che'n Dios, nal gat naktra' xa' mos nado; yent kwan ka xa' par lo Dios; no se'ska, xa' yent cho nile' mandad or ngwayila xa' Dios, nal lè' xa' nak nela tu mos nado ga' lo Jesukrist. ²³ Nguzi' Jesukrist rè go kun mis ren che'n Me. Kuze' nala't go gak go chigab nela tu mos nado ga' lo xtu men, sino ke nak go chigab nela mos nado ga' lo Jesukrist. ²⁴ Pwes rè go wech no bizan, gok go dubta' dike xmod nak go, or ngwayila go Dios, par gak go men che'n Jesukrist.

²⁵ No nal, gat kinuta ni tu widi'zh kwa'n ne Jesukrist por rè xa' nab, xa' laore kwa'n tsa'. Na gani tu widi'zh kwa'n nak xigab da par go, por nak da tu men che'n Jesukrist, por milats laxto' Dios da. ²⁶ Nilen xigab, por rè tiemp nazhe'b kwa'n nzho nalre', más wen ya'n go nela xmod nzo go nal. ²⁷ Chi kinul una', nala'tal una' che'nal; per chi gat kinul una', mejor nakwa'ntal una'. ²⁸ Per chi kwa'nal una', gat nayi'te par lo Dios; mbaino chi lè' tu una' xi kwa'n miyi', gat nayi't skai par lo Dios; per tu kwa'n ganin, rè xa' kwa'n nzhap tsa', dox kwa'n ne bixa' por kuba', no na, gat nzhaklata ded go lo rè kuba'. ²⁹ Rè go wech no bizan, kure' kwa'n nzhaklan nin lo go: Che'ptsa tiemp kinu be, ban be yizhyuo re', kuze' rè miyi' xa' kinu una', ñal bile' go xigab nela xa' nangayot ngap una'. ³⁰ No rè go xa' nizak yalnawin nalre', nale't go be's xigab por kwa'n nizak go; mbaino rè go xa' nzho chul nalre', nazit go marian por kuba'. No rè go xa' nizi' kwa'n, nazit go marian por kuba'. ³¹ No rè go xa' kinu rè kwa'n par nikè go zhi'n kun

lè'i, goknu go rè men naki'ne, porke yizhyuo re', lè'i lox, kun rè kwa'n nzhin loi.

³² Na gat nzhaklata le' go be's xigab, porke tu miyi' nab kwa'n gat kinut una', nile' xa' xigab por zhi'n nazhon che'n Dios, mbaino xmod par ya'n xa' wen lo Dios. ³³ Per xa' kinu una', más nile' xa' xigab por kwa'n nzho yizhyuo re', no xmod par ya'n xa' wen kun una' che'n xa'. ³⁴ No se'ska, rè una' nab kun rè una' nzhap miyi', porke rè una' nab más nile' bixa' xigab xmod le' bixa' rè che'n Dios, par gak bixa' nab tsa par Dios; no se'ska nak rè una' ye'n kun Dios. Per rè una' kwa'n nzhap miyi' más nile' bixa' xigab por rè kwa'n nzho yizhyuo re', no xmod ya'n bixa' wen kun xmiyi' bixa'. ³⁵ Nin kure' lo go par bien che'n goi, no gat lè't par len gat lè' vid che'n goi, sino ke par ban go dike xmod nzhakla Dios, mbaino par chizhi' go Dios más ke lo rè kwa'n.

³⁶ Per chi nzho tu miyi' nile' xigab, gat went dox kilè' xa' par ban xa' kun una' kwa'n nidi'zhnu xa', mbaino por una'ro la una', per mia'n bixa' di'zh ban bixa', pues ñal ban bixa', porke nayi'y kide xa' una'. ³⁷ Per chi nzho tu miyi', nile' xigab, gat naki'nt ban xa' kun una' nidi'zhnu xa', porke Dios nile', nzhak nika'n xa' lo kwa'n nzhakla kwerp che'n xa', pues gak ya'n nab xa', porke gat nayi'te par lo Dios. ³⁸ Mbaino xa' ban kun una' nidi'zhnu xa', pwes wen ka kwa'n nile' xa'; per xa' nakwa'n una', más wen par xa' re'.

³⁹ Tu una' xa' kinu miyi', naki'n ban xa' kun tsa' xa' haxta zhè gat miyi', orze' gak kwa'n una' xtu miyi', namás lè' miyi' ze' naki'n gak tu xa' ñila widi'zh che'n Dios. ⁴⁰ Per par xigab da, más wen ya' una' kun Dios chi nakwa'n ra' xa' miyi'. Wayila go kwa'n nin, porke mis Sprit che'n Dios kwa'n kinu go, kinun.

8

Niza' men gon lo winab kun kwa'n nzhao bixa'

¹ No nal, nin lo go, or niza' men gon lo rè winab por kwa'n nzhao men. Rè be nane che'p kure', per or nile' tu men xigab, dox nzhak xa' tu kwa'n, orze' ño yalmarian laxto' xa'. Per más tsak, or nazhi' men wech men, no kure' nizu'i par más niro'b men lo rè kwa'n nak che'n Dios. ² No chi nzho tu xa' nidi'zh, dox nane xa' rè kwa'n, per stubi nagat tse'd xa' nela xmod ñal gak xa', ³ per xa' nazhi' Dios, orze' Dios nilibe' men ze'.

⁴ Mbaino por rè kwa'n niza' men gon lo rè winab kun kwa'n nzhao men, no chi nayi' gao men che'n Jesukriste, rè be nane, yent kwa'n tsak tu winab yizhyuo re', porke tutsa Dios nzho. ⁵ Pwes nayax men nidi'zh, nzho nayax dios lo yibè', o lo yizhyuo; no nu

nidi'zh men, rë winab re', dios che'n bixa'i, ⁶ per par be, nzho tutsa Dios, Me nak Xuz be, Me mile' rë kwa'n nzho; no por lë' Me, kinu be yalnaban. Mbaino nzho tutsa Señor Jesukrist, no por Jesukrist, mizuxkwa' Dios rë kwa'n, no por lë' Me kinu be yalnaban.

⁷ Per gat lë't rë men che'n Jesukrist nane rë kure', porke nzho bixa' ya mië' la nizuxib lo rë winab, no or nzhao bixa' rë kwa'n niza' lo Dios por kure', orze' nizi bixa', nzë'b xki bixa' lo Dios, porke stubi nile' bixa' xigab, che'n rë winab re'. ⁸ Per gat lë't por kwa'n gao be, le' wi' Dios lo be más wen; o le'i, wi' Dios lo be gat lë'.

⁹ No ter nanel, nzhak nzhaowal rë kwa'n, per biwi' namás, napa nu xtu men le'i, tu xa' laore ngwayila Dios, orze' zi xa', nzë'b xki xa' lo Dios por kure', por lu namás. ¹⁰ No chi lu, xa' nane rë kure', no zobal gawal plo kwa'n niza' men gon lo rë winab kun kwa'n nzhao men, mbaino ne tu men che'n Jesukrist kile'l kure', tu xa' laore ngwayila Dios, orze' nu xa' ye laxto' le'i. ¹¹ No ter nanekal gat nayi'te, per por lu namás, wechal xa' gat ñilat be's Jesukrist, zi xa' nzë'b xki xa' por ndao xa'i, orze' nayilatra' xa' Jesukrist, Me ngut por lë' xa' lo krus. ¹² No por mile'l kure', no mizi xa', nzë'b xki xa' lo Dios por ndao xa' lo mis kwa'n une xa' ndaowal, kuze' mis lu nzë'b xki lo Jesukrist por kwa'n ndawal ba'. ¹³ Kuze', na, chi por tu kwa'n gau le' gap tu men che'n Jesukrist dol lo Dios, más wen nayot gau kwa'n niza' men gon lo rë winab, chi por kure' le' gap xa' re' dol lo Dios.

9

Cho pa' direch kinu tu apost

¹ Biwi'ux, nase yent cho gak ki'l da par jwers len tu kwa'n ne go. ¿Chi ze't laxto' go na nak tu apost, mbaino unen Señor Jesús? ¿Chi nu mia'l la laxto' go, galo laka na midizh widi'zh che'n Jesukrist lo go? ² No ter xtu rë men gat nanet bixa' chi na nak tu apost, per go nane kai, por na midizh widi'zh che'n Jesukrist lo go, orze' ngwayila goi.

³ Kure' nak kwa'n nin, par rë xa' gat ñilat chi walika, nak da tu apost. ⁴ No, ¿chi nu mia'l laxto' go, go ñal ne' rë kwa'n gao no mbaino kwa'n go no? ⁵ Mbaino, ¿chi nu mia'l laxto' go, no gak ban kun tu rë una' xa' nak men che'n Jesukrist par gak tsa' no, no le' kumpaño no plo ya no, nela xmod naban ka más rë apost? No nela xmod mile' ka, rë wech Señor Jesukrist, no haxta nu Per mile' se'. ⁶ O, ¿taxa yub no naki'n kë no zhi'n par gao no, na no Bernabé, orze' lë' go gat ñalt, ne' go kwa'n gao no, dub nikë no zhi'n nazhon che'n Dios xid go?

⁷ O, ¿cho tu go nak sondad, no gat nzhaxt nika' go? O, ¿cho tu go kinu ya gub, orze' chi nagakt gao go xlë che'ne? O, ¿chi kinu

go tu bak, orze' chi nagakt go go nizh che'n ma? ⁸ No nagabt go nal, xigab yeka nin rë kure' lo go, sino ke lo ley kwa'n mila' Dios lo Muisés nzobni' kure', ⁹ porke se' nzobni' lo ley: "Nakotal yex xi' ngo'n or nigo' ma triu." Pwes rë widi'zh re', nangadi'xt Diose namás por dox nile' Dios xigab por rë ma, ¹⁰ sino ke Dios midi'zhe par be. Lë' ley re' nkë lo yech por be, porke xa' nzha'n yuo, no xa' nitsumbe triu, rop bixa' nizak laxto', dub kimbëz bixa', gal bixa' kwa'n le' bixa' gan lo yalgo'n. ¹¹ Lë' go nak nela tlë' yuo plo ngo'n no laz h kwa'n nak che'n Dios, por milu' no widi'zh che'n Dios lo go. Kuze', nela tu kwa'n nile' no gan ga', por zhi'n kwa'n nikë no, ñal ne' go kwa'n naki'n no par ban no. ¹² No chi ñal gaknu go xtu men por kwa'n mile' bixa' xid go, pwes no, más ñal gaknu go no.

Per gat kina'bt no kure' lo go par nazo no zhi'n lo go, kuze' nixek no lo rë kwa'n nizak no, por nilu' no widi'zh che'n Dios. ¹³ No lë'go nane ka, rë xa' nile' zhi'n che'n yado' che'n men Israel, nzhak nzhao bixa' bë'l che'n rë ma kwa'n niza' más rë men par gon, no se'ga' rë xa' nile' zhi'n lo biko' che'n yado' ze', nzhak nzhao bixa' bë'l che'n rë ma kwa'n nixo' b lo biko'. ¹⁴ No se'ga' mile' Señor Jesukrist mandad, lo mis ka rë men che'n Dios za' kwa'n naki'n rë xa' kwa'n nidi'zh widi'zh nazhon che'n Dios por Jesukrist, par ban bixa'.

¹⁵ Per na, ni tu rë kure' gat kileta', no ni gat kizo'bai lo yech par le' go se' kuda; más wen gat da ke par le' tu men nazakra' laxto'n por zhi'n kwa'n nilen, ka nidizha widi'zh che'n Dios. ¹⁶ No or nidizha widi'zh nazhon che'n Dios por Jesukrist, gat nizat da marian, porke se' naki'n len, mile' Dios mandad. No chi nalene, jzhe'b nalats kwa'n zaka! ¹⁷ Mbaino chi lë'da lu widi'zh che'n Dios, nizak laka laxto'n, lë' Dios kix tu kwa'n wen kan; no chi lë'da lei jwers, pwes naki'n len kwa'n mile' Dios mandad len. ¹⁸ Orze', ¿kwan gax kan por ka nilun widi'zh nazhon che'n Dios lo rë men? Kwa'n nzhak kan nak dox nizak laxto'n, por ka nidizha widi'zh che'n Dios, ter ñal gax kan por zhi'n re'.

¹⁹ No ter niyent cho nile' mandad da, per nizi da nela tu mos nado ga' lo rë men. Sa' nilen par más men yila Jesukrist. ²⁰ Or nzon xid rë men Israel, nilen nela xmod nak bixa', porke ley kwa'n mila' Dios lo Muisés, ñila bixa'. No par len gan, gak bixa' men che'n Jesukrist, nilen chigab nu da ñila ley kwa'n mila' Dios lo Muisés, nela xmod ñila bixa'i, no ter gat naki'ntra' gona ley re'. ²¹ No xid rë xa' kwa'n gat kinut ley kwa'n mila' Dios lo Muisés, nilen, nzhak da nela tu men, xa' gat kinut ley ga', no ter nzhona ro' Dios por nilen rë ley che'n Krist, per sa' nilen par len gan rë xa', gat kinut ley. ²² No or nzon

xid rë xa' che'ptsa nzhak widi'zh che'n Dios, nilen nela lë' bixa' ga'; se' nilen kwaliskier mod par nu bixa' ban par dubta' kun Dios. ²³ Rë kure' nilen por widi'zh nazhon che'n Dios kwa'n milu' Jesukrist, par tutsa junt ne' Dios kwa'n nazhon kwa'n mila' Dios di'zh ka' be.

²⁴ Naya'lt laxto' go, or nigo' men karré par le' bixa' gan tu kwa'n, rë bixa' nikë' karré, per tutsa xa' nile' gan. Se'ska go, gok go nela xa' mile' gan, nes par ne' Dios kwa'n nazhon kwa'n mila' Dios di'zh ka' go.

²⁵ No nu bitsila go, rë xa' niyit por tu kwa'n, dox nitse'd bixa' kwerp che'n bixa' par xek bixa'. Kure' nile' bixa' par le' bixa' gan tu kwa'n lweg'a' nilox, per be xa' nzho nez che'n Dios, nak be nela xa' niyit ga', par le' be gan, ne' Dios yalnaban ka' be, kwa'n nayot lox. ²⁶ Kuze', gat nakt da nela tu men nikë' karré nadi'blo ga', xa' gat nile't gan, zhin plo nzhakla; no ni gat nakt da nela tu men kitse'd dil, no nale't gan tsen tu puñet; ²⁷ per na nizakzi kwerp da, no gat nileta kwa'n nzhaklai, nes par yo kwent milun widi'zh che'n Dios lo más rë men, no par nagakt da xa' niyent kwan ngazu' lo kwa'n mile'.

10

Lë' rë men Israel nzë'b xki lo Dios

¹ Rë go wech no bizan, gat nzhaklata ya'lt laxto' go kwa'n nguzak rë xuz be xa' nzhala; mitsao' Dios bixa' le'n tu xkao, no nded bixa' le'n nitsdo' Naxne. ² No por nded bixa' le'n xkao ze', mbaino por nded bixa' le'n nitsdo' Naxne, mile' ngoklë'i' bixa' par ngwakë bixa' tich Muisés. ³ No se'ska, rë bixa' ndao tutsa kwa'n mila Dios dizde lo yibé'. ⁴ No se'ska, rë bixa' ngu' tutsa kwa'n miza' Dios, porke ngu' bixa' nits kwa'n ngulen ta' ke ro, mbaino ke ro re' nak Krist, no lo mis lë'ska Me kwa'n mile' kumpa'n bixa' plo nkizë bixa'. ⁵ No ter rë bixa' una kwa'n wen mile' Dios par lë' bixa', per platsa bixa' mile' kwa'n nangayot laxto' Dios, kuze' nayax bixa' zhaga' nguzhin bixa' le'n yuo bizh, plo ngut bixa'.

⁶ Rë kure' nak nela tu kusej ga' par be, par nawixt be rë kwa'n miwix bixa'. ⁷ No ni nazuxib be lo rë winab, nela xmod mile' pla bixa', porke se' nzobni' lo Yech che'n Dios: "Rë men nguzublo ndao, no ngu' bixa', orze' nguzublo mile' bixa' kwa'n ño laxto' bixa', no nguzen bixa' tu una' no xtu una'." ⁸ No nagakt ban be kun tu men xtu men, nela xmod mile' pla bixa', pwes por kure' tutsa zhë ngut gal bichon mil bixa'. ⁹ ¿Chi nile' go xigab, nazakzit Krist go, ter zilita' naban go lo kwa'n gat lë'? Por miban pla bixa' sa', orze' ndao mbë'l naye' bixa', nayax bixa' ngut. ¹⁰ No ni nadi'zh be kwa'n gat lë' tich

Dios, nela xmod mile' pla bixa', kuze' mixë'l Dios ganj che'n Dios par mbit nayax bixa'.

¹¹ Rë kure' nguzak rë xuz be, xa' nzhala; kuze' nkëi' lo Yech che'n Dios, nela tu kusej ga' par wi' be kwan le' be, be kwa'n naban lult rë tiemp re', par nale' be nela xmod mile' bixa'. ¹² Kuze', kwaliskier xa' kwa'n nile' xigab, wen nzo xa' lo Dios, pwes naki'n wi' xa', napa galo laka xa' le' kwa'n gat lë'. ¹³ Pwes yent cho tu kwa'n naxek be le' be or nizenbe' Dios be (niwi' Dios xmod nak be), porke rë kwa'n nizak be, rë men nizake. Mbaino naki'n wayila go, lë' Dios nile' rë kwa'n mila' Me di'zh, porke nala't Dios zakzi go haxta plo nagakra'i, sino ke lë' Me gaknu go par xek go ded go loi.

Rë lani che'n rë winab no lult yë'l kwa'n ndao Señor Jesukrist

¹⁴ Kuze' nin lo rë go wech no bizan, rë xa' nazhi' da, nazuxibt go lo rë winab; guro' go tuli lo rë kure', ¹⁵ porke nane ka, pas lë' go zobyek ka kwa'n nin, no bile' go xigab, walika kwa'n kidizha lo go. ¹⁶ Or nzho be vin nazhon tutsa le'n tutsa vas, kure' nile' nitsila be lult yë'l kwa'n ndao Señor Jesukrist, no niza' be xkix lo Dios por lë'i, par tsila be, lë' ren che'n Jesukrist mixo por be, or ngut Me lo krus. No nu or nichix be tutsa pan no nzhao be tlë' ga'i, kure' nile', nitsila be, tutsa kwerp nak be kun Jesukrist, Me unkë lo krus por be. ¹⁷ Ter dox nayax be, per tutsa kwerp nak be por nzhao be tutsa pan.

¹⁸ Biwi' go xmod nile' rë men Israel: Nzhao bixa' bë'l che'n rë ma kwa'n nzhut bixa' lo biko' le'n yado', par Dios. Pwes rë men re', tutsa nak bixa' lo Dios por gon kwa'n miza' bixa' lo Dios. ¹⁹ Gat lë't por nin kure' gab go: "Walika tsak rë winab kwa'n ñila xtu ben rë men", o gab go: "Más tsak rë kwa'n nzhao bixa' re', kwa'n niza' bixa' gon lo rë winab, ke lo wanei xtu rë kwa'n nzhao men." ²⁰ Nin kure' por rë men xa' gat nilibe't Dios, porke rë kwa'n niza' bixa' gon lo rë winab, per gat lë't lo winab niza' bixa'i, sino ke par Mizhab niza' bixa'i, no gat nzhaklata' gak go lal kun rë xa' niza' gon par Mizhab, ²¹ porke chi go go vin le'n vas che'n Señor Jesukrist, orze' nagakt go go kwa'n nzho le'n cop kwa'n niza' bixa' lo Mizhab; no chi gao go lo mes che'n Señor, orze' nagakt gao go lo mes che'n Mizhab, ²² o, ¿chi nile' go xigab, nazakzit Krist go, ter zilita' naban go lo kwa'n gat lë'? O, ¿kwan gab go, más nazhon go lo Dios?

Ñal le' rë men che'n Dios kwa'n wen par nadi'zh más rë men gat lë' por Dios

²³ Walika, gak le' be rë kwa'n nzhakla be, per gat lë't rë kwa'n nzhakla be zu' par be, porke gat lë't rë kwa'n nzhakla be zu' tsiro'b be lo rë che'n Jesukrist. ²⁴ No nale't go xigab namás par bien che'n nab go, sino

ke bile' go xigab nu par bien che'n más rë wech go, men che'n Jesukrist. ²⁵ Gak gao go kwaliskier bê'l kwa'n nido lo xbi', no ni nale' go xigab plo nzêi, par yent kwan zi go or gao goi, ²⁶ porke lo Yech che'n Dios, se' nzobni': "Yizhyuo, mbaino bê' kwa'n nzhin loi, che'n Dios rëi." ²⁷ Per chi tu xa' gat ñila widi'zh che'n Dios, no kwezh xa' go par gao go tu kwa'n lizh xa', no nzhakla go ya go lizh xa', pwes dao go rë kwa'n ne' xa' gao go, sin nale' go xigab, chi zak gao goi o nagakte, nes par niyent kwan zi go por lë'i. ²⁸ Per chi ne tu men lo go: "Lë' bê'l re' miza' men gon lo rë winab", pwes nagaot goi, por xa' ne kure' lo go, par niyent kwan zi xa' por kwa'n gao go re', porke che'n Dios yizhyuo, no rë kwa'n nzhin loi. ²⁹ Kure' nin par niyent kwan zi xtu men lo Dios por kwa'n nile'l, no gat lë't par niyent kwan zile. Pas nzho go kile' xigab se': "¿Chon naki'n len xigab par nazi xtu men nakap por kwa'n nilen?" ³⁰ Or nizan xkix lo Dios por kwa'n nzhau, orze' yent kwan nayi' gau, kuze' gat ñalt di'zh xtu men ticha, nayi' gau tu kwa'n."

³¹ Per na ni, or gao go o go go kwaliskier tu kwa'n, u or le' go wanei cho xtu kwa'n, per bile' goi nela xmod ñal ka, nes par wi' men, lë' Dios walika nazhon. ³² Kuze', biwi' u par niyent cho zi nakap por kwa'n nile' go, ni nazi rë men Israel nakap, mbaino ni rë men gat lë't men Israel zi gat lë', no ni rë xa' nak men che'n Jesukrist, yent kwan zi por go, ³³ porke na nile' ña'n da wen kun rë men; rë plo gat nikwanta' kwa'n zu' par da namás, sino ke nikwana kwa'n zu' par más rë men, nes par nu bixa' ro' lo rë kwa'n nzê'b xki bixa' lo Dios.

11

¹ Bile' go nela na ga', porke na nile kwa'n nzhakla Jesukrist.

Xmod ñal le' men che'n Jesukrist or nzhak kult

² Rë go wech no bizan, nizak laxto'n por go, porke zilita' nitsila go da, no nile' go rë kwa'n milun lo go, ³ per nzhaklan ne go, lë' Krist nile' mandad kad miyi', no lë' miyi' nak xa' nile' mandad lo una' che'n xa', mbaino lë' Dios nile' mandad lo Krist. ⁴ Kuze', rë miyi', chi dub nzob kwa'n yek xa' or na'b xa' tu kwa'n lo Dios, u or di'zh xa' tu kwa'n gab Dios lo xa', orze' mal mia'n xa', tu lad mila' xa' Krist. ⁵ No kwaliskier tu una', or na'b xa' tu kwa'n lo Dios, u or di'zh xa' tu kwa'n gab Dios lo xa', no yent kwan xo'b yek una', orze' tu lad mila' xa' xmiyi' xa', no nak una' nela tu una' mizhi'b yek ga' por gat nzhon una' ro' xmiyi' una'. ⁶ No chi lë' tu una' gat nzhakla yao' yek una', pwes más wen zhi'b yek una' tuli; no chi nitula una' zhi'b yek una', pwes neka sao' una' yek una', orze', ⁷ porke miyi', por

nakxao' xa' nela Dios ga', kuze' por lë' xa' nilu' lë' Dios nazhon; no por nguro' una' ta' miyi', kuze' lë' una' nizu' par nilu', lë' miyi' dox tsak; kuze' ñal yao' yek rë una', ⁸ porke gat lë'ta' kwerp che'n una' nzê miyi', sino ke kwerp che'n miyi' nzê una'. ⁹ No ni nangago Dios miyi' por una', sino ke ngulo Dios una' por miyi'. ¹⁰ Kuze', naki'n yao' yek tu una' le'n yado' par ne rë ganj che'n Dios, lë' una' nzhon ro' xmiyi', ¹¹ per por nak be' tusa kun Jesukrist, nagakt ban miyi' sin una', no ni una' nagakt ban sin miyi'. ¹² Pwes walika, lë' una' nguro' ta' miyi', no nu ska miyi' nzhah por una', per rop bixa' nzê lo Dios, Me ngulo rë kwa'n.

¹³ Ñal ne go, naki'n xo'b tu kwa'n yek rë xa' una', or na'b xa' lo Dios. ¹⁴ No men miyi', nane be, dox gat lë't lu' xa' chi lë' xa' la' ro'b yichyek xa'. ¹⁵ Per par una', dox chule par lë' xa', no'l yichyek xa'; kuze', mila' Dios no'l yichyek xa', par tsao'we yek xa'. ¹⁶ No chi tu men nzhakla chë'lro' kun no por kure', ñal ne xa', ni no, mbaino ni más rë xa' nak men che'n Jesukrist xa' nzhin kwaliskier xtu plo, gat nile't no kun yichyek no sa'.

Gat ñalt kwa'n nile' bixa', or nibin bixa', nile' bixa' Santa Cena che'n Señor

¹⁷ Ñal dizha más kure' lo go, nagakt nin wen nzha go, por kwa'n kile' go re', porke or nibin go, lugar di le' go kwa'n wen, lë'la kwa'n gat lë' nile' go. ¹⁸ Galo laka, kwa'n ganin lo go, nzhona nidi'zh men, or nibin go nile' go kult, gat nzhint go wen, no gat nakt go tutsa, no kure' ñila ka, pas wali kwa'n nidi'zh men. ¹⁹ No walika, naki'n ka gak rë kure' xid go, nes par ne go, cho xa' walika nak men che'n Jesukrist. ²⁰ Kuze', or nibin go lo mes par le' go kwa'n lë' Santa Cena che'n Señor Jesukrist, gat nile't goi nela xmod ñalkai, ²¹ porke or nile' goi, pla go nizhubner nzha'o galo go, jhaxta nizuzh go!, mbaino más go ña'n kun yalnula'n. ²² No chi lë' go niyentra' kwan nzhon, lizh go bile' rë kuba'. ¿Chon tu lad nila' go rë wech go, men che'n Jesukrist, no nile' go nitula rë xa' gat kinut kwa'n gao xid go? Kwan ganin lo go nal, dox wen kwa'n kile' go pas. Per gat kile't go kwa'n wen.

Santa Cena che'n Señor

(Mt. 26:26-29; Mr. 14:22-25; Lc. 22:14-20)

²³ Milu' Señor Jesukrist lon dike xmod milun lo go, ke lë' Señor Jesús, or nguzen rë men Me yë'l kwa'n ndao Me lult, kun rë men che'n Me, or ngol lani Pask, orze' nguzen Me pan, ²⁴ no or milox miza' Me xkix lo Dios, orze' michix Mei no nzhah Me: "Kure' nak kwerp da kwa'n nak tu gon lo Dios par bien che'n go; no kad wëlt, or gao go pan re', bitsila go da." ²⁵ No se'ska, or milox ndao bixa', orze' nguzen Me kwa'n nzho vin, no

nzhab Me: “Kure' nak ren da, kwa'n milan di'zh xon par go. Se' bile' go rë wëlt go go kure', par tsila go da”,²⁶ porke rë wëlt, or gao go pan re', no go go vin re', kure' zu' par lu' go xmod ngut Jesukrist lo krus, haxta zhin zhë, or yi'd Me xtu wëlt.

Xmod ñal le' rë men che'n Jesukrist Santa Cena che'n Señor

²⁷ Kuze' nin lo go, kwaliskier tu go xa' gao pan re', no go go kwa'n nzhò le'n vas che'n Señor, no naga gon go, xmod nak kure', orze' nayi'y par go, no nak go nela xa' mbit Señor, or mixo Me ren che'n Me. ²⁸ Kuze' kad go, biwi' go, chi nambe ka laxto' go lo Dios, mbaino chi niyent kwa'n kinu go kun ni tu men, or naga gao go pan re', no go go kwa'n nzhò le'n vas re'. ²⁹ Porke xa' gao kure', no go xa' kwa'n nzhò le'n vas che'n Señor, sin nawi' xa' xmod nak laxto' xa', orze' mis lë' xa' le', zakzi Dios xa'.³⁰ Kuze', nayax go yent jwers, no nzhò go nzhakne, mbaino nzhò go ya ngut la. ³¹ Per chi wi' be wena wen kwan pa' nak be lo Dios, orze' gat naki'nt rël Señor kwan nak be. ³² No ter rël Señor xmod nak be, kure' zu' par tse'd be, no par nazakzi Dios be junt kun rë men yizhyuo, or zakzi Dios bixa'.

³³ Kuze', nin lo rë go wech no bizan, or kwin go par le' go Santa Cena che'n Señor, gulëz go, za rë go, par tutsa gao go no par tutsa le' goi. ³⁴ No chi nila'n tu go, pwes lizh go dao go, par nagab Dios xmod gakkun kad go por gat nibin go nela xmod ñal ka. No or yi'dtsi'n ma go, orze' ganin lo go xmod gakkun más rë kwa'n.

12

Yalnazon kwa'n niza' Sprit che'n Dios

¹ Rë go wech no bizan, nzhaklan gon go xmod nak rë yalnazon kwa'n nine' Sprit che'n Dios ka' be. ² Rë go nitsila, or stubi nagat libe' go widi'zh che'n Jesukrist, nela tu men nikal lo ga', ngwakë go tich rë winab kwa'n ni nagak di'zh. ³ Kuze', nzhaklan ne go, niyent cho gak zhi'bde Jesús por Sprit che'n Dios, no ni yent cho gak gab: “Jesukrist nak Señor da”, chi gat lë' por Sprit che'n Dios, Me kwa'n nzhò laxto' xa' i.

⁴ No nal, nzhò nayax mod niza' Dios kwa'n le' kad men yado', per mis tutsa Sprit che'n Dios nile' rëi. ⁵ No nzhò nayax mod, nile' men zhi'n nazon che'n Dios, per tutsa Dios nile' nzhak rë zhi'n re'. ⁶ No nayax mod nirulo yalnazon che'n Me, per tutsa Dios nile' nzhak rë loi xid kad bixa'.

⁷ Per lo kad men, xa' mod nirulo zhi'n nazon che'n Sprit che'n Dios, par bien che'n rë men, ⁸ porke por Sprit che'n Dios, nzhò xa' dox nzhak nizobeyek rë kwa'n, mbaino nzhò men, dox nane xa' rë kwa'n por mis Sprit che'n Dios. ⁹ Mbaino, por

mis Sprit re', nzhò men dox ñila widi'zh che'n Jesukrist, mbaino nzhò xa' niliyak men nzhakne por mis Sprit ska re'. ¹⁰ No nzhò rë men nile' rë lo kwa'n nazon, no nzhò men nile' Sprit re' nidi'zh por Dios; mbaino nzhò men ñanu laxto' cho sprit nzhò laxto' tu men; chi Sprit che'n Diöse o che'n Mizhabe; mbaino nzhò men nzhak nidi'zh rë lo di'zh kwa'n gat nakbe't; no nzhò ska men nile' Sprit re', gak gon bixa' kwan gab rë widi'zh re'. ¹¹ Per rë zhi'n nazon re' nile' mis tutsa Sprit, Me niza' zhi'n nazon nela xmod nzhakla Me, par le' kad men.

Tutsa nak be kun kwerp che'n Jesukrist

¹² Kwerp che'n men, ter nayax part kinui, per tutsa kwerp nakxao'we; se'ta' nak kun kwerp che'n Krist kun rë men che'n Me, ¹³ porke rë be ngoklë'i' kun mis tutsa Sprit, par ngok be tutsa kwerp kun Krist, ter nak be men Israel, o men gat lë't men Israel; ter nzhò be nak mos nado lo xtu men, o xa' yent cho nile' mandad; per mis tutsa Sprit che'n Dios nzhò laxto' rë be, ¹⁴ porke kwerp che'n be, gat nakxao'te kun tutsa kwa'n, sino nayax kwa'n nakxao'we. ¹⁵ O, ¿chi zak gab ni' men: “Lë'da gat lë' ya' men, kuze' gat nakt da tu kwa'n che'n kwerp che'n men?” No, ¿chi por midizhe sa', kuze' nagaktra'i che'n kwerp che'n men? ¹⁶ No chilë' tu nzha men gab: “Lë'da gat lë' zalo men, kuze' gat nakt da tu kwa'n che'n kwerp che'n men.” No, ¿chi por kuze', nagaktra'i che'n kwerp che'n men? ¹⁷ No chi dub kwerp che'n be nak zalo be, orze', yent nzha be par gon be tu kwa'n. Mbaino, chi dub kwerp che'n be nak nzha be, orze', ¿ma xi' be par gak zi be yi'd xla' tu kwa'n xi' be? ¹⁸ Per Dios mizuxkwa' kad kwa'n kinu kwerp che'n men, nela xmod ngol la Me. ¹⁹ No chi lë' rë part che'n kwerp che'n men ngake tutsa part, orze', ¿xmod ngake tu kwerp? ²⁰ No ter dox nayax kwa'n nakxao' kwerp che'n men, per rëi nzë ta' tutsa kwerp.

²¹ Nagakt gab zalo men lo ya' xa': “Gat naki'nt da lu”, no ni nagakt gab yek men lo ni' xa': “Gat naki'nt da lu”, ²² per rë kwa'n kinu kwerp che'n be, kwa'n chigab más che'p jwers kinu, kuze' kwa'n más naki'n be; ²³ no rë part che'n kwerp che'n be, kwa'n zak be yent cho kwent be's, no kuze' kwa'n más nikina be; no se'ska nile' be kun rë kwa'n gat nilu't lo men, kuze' más nitsao' be. ²⁴ No lë'la rë kwa'n che'n kwerp che'n be, kwa'n gat naki'n sao' be, menes nikina bei, porke se'ka mizuxkwa' Dios kwerp che'n be par más kina be plo nile' be xigab, menes tsak. ²⁵ Sa' nak kwerp che'n be, par nalë'i' kun weche, sino ke nikina'i weche. ²⁶ No or ne tu plo be, dub kwerp che'n be nizinei; mbaino or ñak tu plo ne be, dub be ña'n wen.

²⁷ No nal, se'ska kun be, rë be nak kwerp che'n Krist, no kad be nak tu part che'n kwerp che'n Me. ²⁸ No nizo Dios men yado', par le' bixa' zhi'n xid rë men che'n Me; galo laka mizo Dios rë xa' nak apost, orze' rë profet, xa' nidi'zh por Dios; orze' rë xa' nilu' widi'zh che'n Dios lo men, mbaino xa' nile' rë lo zhi'n nazhon, no rë xa' niliyak men nzhakne, no rë xa' nzhaknu rë men, mbaino rë xa' nizo dilant, no rë xa' nzhak nidi'zh rë lo di'zh kwa'n niyent cho nane. ²⁹ Per gat lët' rë bixa' nak apost, no ni gat lët' rë bixa' profet, xa' nidi'zh por Dios; mbaino ni gat lët' rë bixa' xa' nilu' widi'zh che'n Dios, o rë xa' kwa'n nzhak rë lo zhi'n nazhon. ³⁰ No gat lët' rë bixa' niliyak men nzhakne, o xa' nidi'zh rë lo di'zh kwa'n niyent cho nane, mbaino ni gat lët' rë bixa' xa' nane kwan gab rë widi'zh gat nakbe't. ³¹ Per go, ñal ka kwe go lo Dios tu rë zhi'n kwa'n más tsak re'. Per na lu' lo go, tu kwa'n más nazhon lo rë kure', par le' go.

13

Xmod nilu', walika nazhi' tu men, xtu men

¹ No chi na, nzhak nidizha rë lo di'zh kwa'n nidi'zh rë men yizhyuo, mbaino haxta nidizha rë di'zh che'n rë ganj che'n Dios, per chi gat nazhi' da xtu men, orze' nak da nela tlë' yi'b kwa'n nichao' ruid namás, o nela tu plati kwa'n nibezh naye. ² No chi nzhak nidizha por Dios, nela tu profet ga', o nizobyeka rë kwa'n naga'ch che'n Dios, no nzhak da rë kwa'n nane men yizhyuo, mbaino haxta nanen rë kwa'n nane Dios; mbaino dox ñilan Dios haxta par len gan yubchi tu yi', per chi gat nazhi' da xtu men, yent kwa'n tsak da. ³ No chi ki'za rë kwa'n kinun par ka' rë men prob, o chi zakzin kwerp da haxta lan yëke par gakkun men, per chi gat nazhi' da xtu men, yent cho kwent rë kwa'n nilen.

⁴ Men xa' nazhi' xtu men, lo rë kwa'n nilinu men xa' nixek xa', mbaino dubta' wen xa'; no gat niwixt xa' ka' xa' kwa'n nak che'n xtu men, mbaino gat lët' mis lët' xa' nidi'zh, lët' xa' wen; no ni gat nizi xa' marian. ⁵ No gat nile't xa' kwa'n gat ñal, mbaino gat nikwa'nt xa' kwa'n wen par nab tsa lët' xa'; no ni gat nak xa' tu xa' lweg'a niyi'xian, no ni gat niguchao' xa' xian laxto' xa' por kwa'n nile' men lo xa'. ⁶ Mbaino gat nidi'zht xa' tich rë xa' nile' kwa'n gat lët', sino ke nizak laxto' xa' or nile' rë men kwa'n wen. ⁷ Men xa' nazhi' xtu men, or nizakzi men xa', gat nidi'zht xa'i; no gat lët' jwals yila xa' nakap tu men, mbaino kimbéz xa' zhin rë kwa'n mila' Dios di'zh; no or nizakzi xa', nane xa' par bien che'n xa' nila' Dios nizak xa'i.

⁸ Nayot zhë lox, chizhi' be xtu men, per rë widi'zh kwa'n nidi'zh men por Dios, lët' zhë zhin, lët' lox; no zhin zhë yotra' men xa' di'zh rë kwa'n laore gak; mbaino yotra' men xa' di'zh rë lo di'zh kwa'n gat nakbe't, no nayotra' men xa' di'zh rë kwa'n nab tsa Dios nane, ⁹ porke nal, che'pts'a nane be, no che'pts'a nzhak nidi'zh be rë che'n Dios, ¹⁰ per or yi'd Jesukrist xtu wëlt, Me nane rë kwa'n, par we'i Me be plo ban be par dubta', ze'se gat naki'ntra' be kwa'n che'pts'a nane be yizhyuo re'.

¹¹ Or ngok da tu më'd win, midizha nela tu më'd win, milen xigab che'n më'd win, mbaino miwi'n kwa'n wen mbaino kwa'n gat wen, ter kun xigab che'n më'd win milene; per or ngok da tu men ro, tu lad milan rë che'n më'd win. ¹² Nal gat nilibe' laka be xmod pa' nak Dios. Kure' nak lët'la or niwi' be lo be, lo tu spej kwa'n nilu' nacho'n; per or ban be kun Dios, lët' be ne Dios nela xmod niwi' be lo wech be; nal we'tsa nilibe' be Dios, per zhin zhë, lët' be libe' Dios nela xmod nilibe' Dios be. ¹³ Kuze', dub tiemp kwa'n naban be lo yizhyuo re', chon kwa'n naki'n dubta' le' rë men che'n Jesukrist. Kwa'n galo nak, yila be, lët' Dios nichë'l kun be, por nak be men che'n Jesukrist; mbaino miche' Dios rë kwa'n nzë'b xki be. Kwa'n rop nak: rë or yila be, lët' Dios ne' kwa'n ka' be, rë kwa'n mila' Dios di'zh, ka' rë men che'n Me. Mbaino kwa'n mion nak: Chizhi' be tsa' men be. Per kwa'n más tsak lo yon kure' nak, chizhi' be xtu men nela be ka, porke kure' nayot lox.

14

Más tsak bichizhi' go tsa' men go

¹ Kwa'n ñal le' go, walipa' bichizhi' go rë men; mbaino nu bile' pa' go, par le' go rë zhi'n nazhon, kwa'n nile' Sprit che'n Dios. Xid rë kure', kwa'n más ñal le' go nak, di'zh go por Dios nela tu profet ga', ² porke rë xa' nidi'zh rë widi'zh kwa'n yent cho nzhak, nab tsa Dios nane kwan nidi'zh bixa', no yent cho men zobyek kwa'n kidi'zh bixa' orze', porke por Sprit che'n Dios, nidi'zh bixa' rë xigab kwa'n kinu Dios naga'ch. ³ Per xa' kwa'n nidi'zh por Dios nela tu profet ga', nizobyek men kwa'n nidi'zh xa', no nzhaknu par más ro'b xigab che'n rë men yado' lo che'n Dios, no par yi'd gan bixa' le' bixa' che'n Dios, mbaino rë xa' niwin laxto' nizi bixa' chul, ⁴ porke men kwa'n nidi'zh rë widi'zh kwa'n yent cho gak zobyek, orze' nab tsa par lët' xa' nizu'i; per xa' nidi'zh por Dios nela tu profet ga', par rë men che'n Jesukrist nizu'i, orze' más nitse'd bixa' xmod ban bixa' lo che'n Dios. ⁵ Na nzhakla, ter rë go di'zh rë lo di'zh kwa'n niyent cho nane, per más nzhaklan di'zh go por Dios

nela tu profet ga', porke más tsak xa' nidi'zh por Dios ke xa' nzhak nidi'zh lo Dios rë lo widi'zh kwa'n yent cho nane. No chi nale' Dios gab xtu men kwan gab rë kwa'n midi'zh xa' re', orze' yent kwa'n zu'i par más rë men che'n Jesukrist.

⁶ O gab be, yi'dtswi'n ma go wech no bizan, no yid dizha lo rë go rë di'zh kwa'n nazobyekt go, orze' yent kwan zu'i par go, sino ke kwa'n zu' par go nak, yid dizha tu kwa'n milu' Dios lon, par gon goi; o dizha kwa'n ne Dios lon, par más ro'b xigab che'n go lo che'n Dios; o dizha wanei xtu widi'zh che'n Dios par tse'd goi. ⁷ Nal za' be kwent che'n rë yi'b kwa'n nzho'l men, nela flaut o harp; chi gat kiyo'l mene wen, orze' nagakt libe' be, cho di kiyo'l xa' kun lë'i. ⁸ No se'ska lo tu yër, chi lë' na' nzh'o' trompet nakwe'zhe wen, orze', ζ xmod libe' rë sondad cho di kiyo'l xa', no par zo rë sondad list par dil xa'? ⁹ No se'ska nzhak kun go, chi nadi'zh go rë widi'zh kwa'n nazobyekt men, orze', ζ xmod ne men kwan kidi'zh go? Nak go orze' nela xa' nab tsa lo mbi kidi'zh. ¹⁰ Walika, rë lo widi'zh kwa'n nzh'o yizhyuo, mbaino kad yezh nilibe' xti'zh, ¹¹ per chi gat nizobyeka kwan gab tu widi'zh kwa'n kidi'zh tu men lon, orze' nak da par men ze' nela tu xa' nzë xtu plo, no nazu't da xti'zh xa'; no se'ska nak xa' par da. ¹² Kuze', rë go xa' nixo'byek le' zhi'n nazhon por Sprit che'n Dios, bile' pa' go par le' go más wen rë kwa'n zu' par ro'b rë men che'n Jesukrist lo che'n Dios.

¹³ Kuze', xa' nzhak nidi'zh xtu ben di'zh kwa'n niyen cho nizobyekt, ñal na'b xa' re' lo Dios, par le' Dios gak gab xa' kwan gab rë kwa'n di'zh xa', ¹⁴ porke chi na'ba lo Dios kun rë widi'zh kwa'n gat nizobyekta', orze' kun sprit da kina'ba lo Dios, porke naneta kwan kidi'zha. ¹⁵ Orze', kwa'n ñal len, naki'n na'ba lo Dios kun sprit da, per nu lene, nen kwan gapa or na'ba lo Dios. Mbaino naki'n kë'n kant kun sprit da, per nu ska naki'n len xigab or kë'n kant par nen kwan dizha, ¹⁶ porke chi kidi'zhal nazhon Dios, kiza'l xkix lo Dios kun nab sprit che'nal, no gon tu xa' nanet xmod nak che'n Dios, kwa'n kidi'zhal, orze' nagakt zubi xa' lol par ne xa': "Walika kwa'n kidi'zhal", porke nagont xa' kwa'n kidi'zhal lo Dios. ¹⁷ No ter nanel, dox wen kiza'l xkix lo Dios, per par xtu men, nazu'te par ro'b xigab che'n xa' lo che'n Dios.

¹⁸ Nizan xkix lo Dios, porke más nzhak da lo rë go, nidizha xtu ben di'zh kwa'n ni tu go nanet, ¹⁹ per or nzon le'n yado' xid rë men che'n Jesukrist, más nzhaklan dizha gai'tsa widi'zh kwa'n zobyekt bixa', no zu'i par tse'd bixa' ke par dizha chi' mil widi'zh kwa'n nagont bixa' kwan.

²⁰ Rë go wech no bizan, nale't go xigab nela më'd win ga', sino ke gok go nela më'd

win ga' le't go kwa'n nakap; per bile' go xigab nela che'n rë men xa' miro'b la xigab che'n lo che'n Dios. ²¹ Se' nzobni' lo Yech che'n Dios, nzhab Dios:

Lë'da dizh lo rë men re' kun rë widi'zh kwa'n gat nakbe't,

mbaino dizha lo bixa' kun rë widi'zh che'n rë men zit,

per ni kun ter midizha sa', nangont bixa' ro'n.

²² Kuze', or nidi'zh men che'n Jesukrist xtu rë di'zh kwa'n gat nakbe't, par rë men xa' gat ñilat widi'zh che'n Dios, kure' nak par lë' bixa' nela tu señ ga', lë' Dios zakzi bixa'. Per or nidi'zh rë men che'n Jesukrist tu kwa'n nzhab Dios lo xa', nela tu profet ga', kure'se zu' par más ro'b rë men che'n Jesukrist lo che'n Dios, no gat lë't par rë men gat ñilat Diose. ²³ O gab be, or nibin go lo kult, orze' rë go zubro di'zh xtu ben rë di'zh kwa'n yent cho men nzhak, no orze' zhin tu xa' nanet xmod nak widi'zh che'n Dios, o tu xa' gat ñilat Dios, orze' lë' xa' le' xigab, nzhak miyizh go, por kidi'zh go sa'. ²⁴ Per chi kidi'zh go por Dios nela tu profet ga', no orze' yo tu xa' plo nibin go, tu xa' gat ñilat Dios, o xa' nanet xmod nak widi'zh che'n Dios, orze' lë' xa' ze' gon kwan kidi'zh go, no lë' xa' zi nzë'b xki xa' lo Dios, ²⁵ no orze' lë' kwa'n naga'ch kwa'n nzh'o laxto' xa' re', lë'i ro' al tich, orze' lë' xa' zuxib lo Dios, mbaino zi xa', walika nzo Dios kun go.

Bile' go kwa'n ñal, or nile' go kult

²⁶ Rë go wech no bizan, lo rë kwa'n nin re', kure' ñal le' go or nibin go. Gak kë' pla go tu kant nazhon lo Dios, no zipla go gak lu' widi'zh che'n Dios lo más rë men, o di'zh zipla go tu kwa'n milu' Dios lo go, o di'zh go tu rë di'zh kwa'n gat nakbe't, mbaino xtu go gab kwan gab rë widi'zh ze'. Per rë kwa'n le' go re', naki'n le' go'i, nab tsa par más yila go widi'zh che'n Diose. ²⁷ No or di'zh tu rë go xtu ben rë di'zh kwa'n gat nakbe't, ñal choptsa go o chontsa go di'zhe; mbaino tu go naki'n di'zh kwan gab rë widi'zh kwa'n midi'zh go re'. ²⁸ Per chi yent cho go gak gab kwan midi'zh tu rë go re', orze' más wen nadi'zhtra' rë xa' re' lo rë men yado', rë di'zh kwa'n nazobyekt men kwan gab, más wen nab tsa bixa' di'zhe par bien che'n bixa' namás, mbaino kure' ño laxto' Dios.

²⁹ No se'ska, xa' kwa'n di'zh por Dios, xa' nak profet, namás di'zh chop xa' o chon xa', no más go naki'n xe gon goi, par nabei, chi walika widi'zh che'n Dios kidi'zh rë xa' re'.

³⁰ Per chi lë' Dios le' di'zh xtu rë xa' nzob xid go, tu kwa'n milu' Dios lo xa', orze' ñal nadi'zhtra' rë xa' kwa'n kile' Dios kidi'zh galo re'. ³¹ Se' ñal di'zh tuga' go kwa'n ne Dios lo kad go, par gak tse'd go kwan le' go, no par más yi'd gan go lo kwan' nak che'n Dios,

³² no lo kad xa' nidi'zh por Dios, niza' Sprit che'n Dios xigab par ne xa' or ñal di'zh xa', mbaino or kwëz di'zh xa', ³³ porke Dios gat nzhaklat ngokla ngwa, sino ke Dios nzhakla kwïn bixa' nela xmod ñalkai.

Nela xmod nzhak ka xid más rë men che'n Jesukrist plo nzhin bixa', ³⁴ ñal xe zob rë una' lo kult le'n yado' plo nibin go, porke gat ñalt di'zh bixa' tu kwa'n lo rë go, sino ke gon bixa' ro' xmiyi' bixa', nela xmod nzobni' ka lo ley kwa'n mila' Dios lo Muisés. ³⁵ No chi nzhakla tu una', na'bdi'zh xa' kwaliskier tu kwa'n, más wen na'bdi'zh xa'i lo xmiyi' xa' or nzho xa' lizh xa'; porke gat ñalt di'zh tu una' le'n yado', or nzhak kult.

³⁶ Bitsila go, gat lë'ta' galo laka xid go nguro' men kwa'n milu' widi'zh che'n Dios galo laka; mbaino ni gat lë' galo laka go mbin widi'zh che'n Dios lo más rë men.

³⁷ No chi nzho tu xa' xid go, xa' nile' xigab, nak xa' profet, xa' nidi'zh por Dios; no chi ñila xa' lë' Sprit che'n Dios nile' rë kwa'n nazhon kun lë' xa', orze' ñal libe' xa', walika lë' Jesukrist mile' mandad da, mizobni'ne lo yech par gon goi. ³⁸ No chi nzho tu xa' nzo lo nakao, nagat yila xa', lë' Jesukrist mile' mandad da kidizha rë kure', lë' xa' wane, yentska cho wi' lo xa'. ³⁹ Kuze' rë go wech, bile' pa' go par gak go xa' nidi'zh por Dios, no bila' go di'zh rë xa' kwa'n nidi'zh xtu ben rë di'zh, kwa'n niyent cho nane, ⁴⁰ per lo rë kwa'n le' go, bile' goi, nela xmod ñal kai.

15

Walika, nguruban Jesukrist

¹ Nal, nin lo rë go wech no bizan; nzhaklan tsila go widi'zh nazhon che'n Dios kwa'n milun lo go, no kwa'n ngwayila go, mbaino widi'zh nazhon che'n Dios re', nak nela tu simient par go, porke haxta nal re', se'gaka ñila goi, ² no por widi'zh nazhon re', lë' go ban kun Dios par dubta', chi lë' go se'gaka yila widi'zh re'; per chi nayilara' goi, orze' yent cho kwent ngwayila goi.

³ Xid rë kwa'n mitsë'da galo laka, nak, lë' Krist ngut por rë kwa'n nzë'b xki be. Kure' milun lo go galo laka, nela xmod nzobni' ka, ⁴ mbaino miga'ch Krist, per ngubizh mion, lë' Me nguru'ban, ⁵ mbaino galo laka ngurulo Krist lo Per, orze' lo za tu dusen apost che'n Me; ⁶ dispwes ngurulo Me lo más di gai' gayo' men che'n Me; no mer rë xa' re' se'gaka naban. ⁷ Orze' ngurulo Krist lo Jakob, no lo más rë apost. ⁸ No lult, ngurulo Jesukrist lon, na nak nela tu më'd ngol gat za mbë'o', ⁹ porke xid más rë xa' nak apost, na nak xa' natsakt be's, no ni gat ñal ru'lë da tu apost, porke nguru'kë'n tich rë men che'n Jesukrist, no dox mizakzin bixa'. ¹⁰ Per por dox milats laxto' Dios da, kuze' nak da tu apost che'n Dios, per gat lë't yent

cho kwent milats laxto' Dios da, porke más zhi'n nazhon milen ke kwa'n mile' más rë apost, per gat lë't kun mis jwers da milene, sino ke Dios ngoknu da por nilats laxto' Dios da. ¹¹ Per ni más rë apost, no ni na, yent cho más tsak. Kwa'n más tsak nak, nidi'zh no lo rë men, par yila bixa' Dios por Jesukrist, Me kwa'n ngwayila go.

Rë men ruban

¹² No chi rë no, xa' nak apost che'n Jesukrist, nidi'zh no lo men, lë' Jesukrist nguruban, orze', ¿chon nidi'zh pla go: "Gat walit ruban rë men ngut?" ¹³ Pwes chi gat wali, ruban men ngut, orze', ni Krist nangarubant ska, ¹⁴ no chi gat wali, nangarubant Krist, pwes orze' yent cho kwent milu' no widi'zh che'n Me lo go, no yent cho kwentska ngwayila goi orze'. ¹⁵ No chi lë'i sa' nak, pwes rë no, xa' nidi'zh widi'zh che'n Dios, orze' midid'zh no kwa'n gat wali por Dios, porke nidi'zh no, mile' Dios, nguruban Krist. No chi lë'i gat wali, ruban rë men ngut, ¹⁶ orze' ni Kristska gat walit nguruban, chi lë'i sa' nak. ¹⁷ No chi nangaruban Krist, orze' yent cho kwentska ngwayila go widi'zh che'n Krist, mbaino se'gaka nzë'b xki go lo Dios. ¹⁸ No chi lë'i se', rë xa' kwa'n ngut, dub ñila xa' Jesukrist, orze' milox bixa' tulix. ¹⁹ No chi nab tsa par yizhyuo re' zu' kwa'n ñila be Krist, orze' be más nalats nizak lo rë men yizhyuo por zhe'b tont be.

²⁰ Per walika, mile' Dios nguruban Jesukrist, no nak Krist nela tu xlë galo laka che'n tu kusech, porke lë' Krist galo laka nguruban. ²¹ No por dol che'n tutsa miyi', rë men ño nzhat, mbaino se'ska por kwent che'n xtuska miyi', rë men ruban. ²² No sa', nguio nzhat men, por Adán, mbaino se'ska por kwent che'n Krist, rë men ruban. ²³ Per kad men ruban tiemp kwa'n ñal kad xa': Galo laka nguruban Krist, dispwes ruban rë men che'n Krist, or yi'd Me xtu wëlt yizhyuo re'. ²⁴ Or zhïn zhë lult, or le' Krist gan lo rë mbi kwa'n más kinu poder par le' mandad, mbaino lo rë mbi kwa'n gat kinut be's poder, no haxta lo rë mbi kwa'n más wë' kinu poder; orze' wei' Krist rë poder re' lo Xuz Me Dios, ²⁵ porke lë' Krist sigue le' mandad, haxta le' Dios gan, zubi rë xa' re' lo Krist, rë xa' kwa'n nidil kun lë' Me, par le' Krist mandad lo rë. ²⁶ No or mile' la Krist gan lo rë xa' nidil Me, lult laka le' Me gan lo xtutsa xa', xa' re' nak ganj che'n Mizhab kwa'n lë La Muert. ²⁷ Lë' Dios miza' yalnazon nka' Jesukrist par le' Me mandad lo rë. Per or nzhab Yech che'n Dios: "Miza' Dios yalnazon nka' Jesukrist", per nab tsa lo Dios nagakt le' Jesukrist mandad, porke Dios nak Me miza' yalnazon nka' Jesukrist. ²⁸ No or le' Krist mandad lo rë kwa'n nzho, orze' zhireska Me rë yalnazon lo Xuz Me

Dios, par nab tsa Xuz Me Dios le' mandad lo rë kwa'n nzho, haxta lo Yub Jesukrist, le' Dios mandad.

²⁹ No chi nile' go xigab, narubant men ngut, orze', çkwan le' rë xa' gan, xa' nzhakléi' lugar che'n men ngut, chi naruban men ngut orze'? Orze', çchon nzhakléi' men, por xkwent men ngut la? ³⁰ No chi lé'i sa' nak, yent cho kwent zilita' nided no lo kwa'n nila' gut no. ³¹ Walika nin lo go, wecha; nizak laxto'n lo Señor Krist Jesús por go, no nin lo go, walika, zilita' nzho xa' nzhakla gut da. ³² Orze', çkwan milen gan, or ndila kun ré men xa' nak nela tu mbe'zh ga' lazh men Efeso? Chi lé'da ndil por kwa'n yizhyuo re', orze', çkwan mizu'i par da? Chi lé'i gat wali, ruban men ngut, orze' más wen nela nidi'zh ka ré men: "Nal wen be, gao be no go be, porke yè' lè'be gat." ³³ Nakidet go lo mis go, nela nzhak ka tu di'zh: "Naché'ltal kun men nakap, napa ke'd xa'i lu, orze' nale'tra'l kwa'n wen." ³⁴ Wenawen bile' go xigab, par nale'tra' go kwa'n gat lé' lo Dios, porke nzho pla men xid go, xa' gat lé't men che'n Jesukrist. Nin kure' lo go par tula ré xa' ba'.

Xmod ruban ré men ngut

³⁵ Pas nzho go nzhakla gon, xmod ruban ré men ngut, o xmod nak kwerp, gap bixa'. ³⁶ çZhe'b nad yek go, par ne go kuba'l, porke or nixè'n men wane'i cho lazh tu ya, naki'n galo laka yao'yo lazh, orze' lene par gake tu yaye'n. ³⁷ No gat lé'ta' yaye'n kwa'n nilen ze' nigo men lo yuo, sino ke lazh kwa'n nzha'n bixa'i, lé'la tu nzhob, o wane'i cho xtu lazh ré kwa'n. ³⁸ No kad lazh kwa'n nzha'n men, nizuxkwa' Diose nela xmod ñola Dios. ³⁹ Gat lé'ta' tutsa nakxao' ré kwerp. Xa' mod nak kwerp che'n men, no xa' ga' mod nak kwerp che'n ma, mbaino kwerp che'n miyin no kwerp che'n ré mbël, xa' mod nakxao' kade. ⁴⁰ Pwes se'ska nzho kwerp yibè', mbaino nzho kwerp yizhyuo; chul nakxao' kade, ter xa' mod nilu' ré kwerp kwa'n nzho yibè', lo kwerp kwa'n nzho yizhyuo. ⁴¹ Xa' nak biani che'n ngubizh no che'n mbëo', no xa' nak ré ki che'n ré mbël lo yibè', mbaino kad mbël kinu xmod nizini.

⁴² No se'ska gak or ruban men ngut. Or niga'ch kwerp che'n tu men ngut, ñëb kwerp che'n xa' le'n ba', per or ruban xa', xtu mod gak kwerp che'n xa', nayotra' yébe. ⁴³ Niga'ch tu kwerp ngut kwa'n nazu'tra' no milox jwers; per or ruban xa' re', dox chul gak kwerp che'n xa', no nayei, mbaino nayotra' loxe. ⁴⁴ Or niga'ch tu men ngut, kwerp yizhyuo kinu xa', per or ruban xa', gap xa' tu kwerp kwa'n nayot lox. Kuze', nzho kwerp kwa'n nzho yizhyuo re', mbaino nzho kwerp kwa'n nayot lox. ⁴⁵ No nela nzobni' lo Yech che'n Dios, miyi' galo xa' lé Adán, mile'

Dios, ngok xa' tu men kinu yalnaban; per Jesukrist, Me mbi'd lult, mbaino ngol Me nela Adán ga', per por nguruban Me, mile' Dios, lé' Me kinu yalnaban kwa'n nayot lox, par za' Mei ka' ré men yila Me. ⁴⁶ Per gat lé't galo laka yalnaban kwa'n nze' yibè' nguio, sino ke galo laka kwa'n nzho yizhyuo re'i, dispwes nguio kwa'n nze' yibè'. ⁴⁷ Miyi' galo laka kwa'n nguio, ngokxao' kun yuo; lé' miyi' mirop nze' yibè', Me nak Jesukrist. ⁴⁸ Ré kwerp che'n men yizhyuo, nak nela Adán ga', xa' ngokxao' kun yuo; per ré xa' miza' Jesukrist yalnaban ka', nak nela Jesukrist ga', Me nze' yibè'. ⁴⁹ Mbaino miban be nela xmod miban Adán ga', xa' ngokxao' kun yuo. Per nal, naki'n ban be nela Krist ga', Me nze' yibè'. ⁵⁰ Nal, nzhaklan nin lo ré go, wecha; nagakt yo kwerp kwa'n ngolnu be yizhyuo re' plo nile' Dios mandad; mbaino ni nagak yo kwa'n nilox plo nzho kwa'n nayot lox.

⁵¹ Ré go wech no bizan, nzhaklan gon go kwa'n kinu Dios naga'ch: Gat lé't ré be gat, per ré be bixlo. ⁵² Tu rrat tsa, nela or niti'b men lo men, no xa'l xa'i, or kwezh lult trompet, porke trompet kwezh, orze' lé' ré men ngut, xa' nak men che'n Jesukrist, ruban; orze' lé' ré be, xa' stubi naban, lé' kwerp che'n be bixlo, ⁵³ porke kwerp che'n be kwa'n nze' yizhyuo re', lé'i bixlo par gake kwa'n nze' yibè', porke kwerp che'n be kwa'n nzhat yizhyuo re', lé'i bixlo, par nayotra' gate. ⁵⁴ Mbaino or bixlo kwerp che'n be kwa'n nze' yizhyuo re', orze' gake kwa'n nze' yibè', no or bixlo kwerp che'n be, orze' gake kwa'n ban par dubta', par gak ré widi'zh kwa'n nzobni' re'.

Milox La Mwert, porke Jesukrist mile' gan lo La Mwert.

⁵⁵ La Mwert, çma kwa'n mile'l gan, por mizakzil men?

Mbaino, çma poder kwa'n miza'l yalne men, no mbital men?

⁵⁶ Kwa'n nze'b xki men lo Dios nak kwa'n nile' nzhat men, mbaino ley kwa'n mila' Dios lo Muisés mile' nze'b xki men lo Dios. ⁵⁷ Per ñal za' be kxix lo Dios, Me ngulo' be lo ré kure', por kwa'n mile' Jesukrist por be, Me nile' mandad be.

⁵⁸ Kuze' ré go, wecha, xa' nazhi' da, nala't go kwa'n nile' ñila go Jesukrist dub tiemp kwa'n naban go, mbaino zilita' bile' go zhi'n nazhon che'n Dios dub la go, porke lé' go nane ka, gat lé't yent cho kwent zhi'n nazhon kwa'n nile' go, por nak go men che'n Jesukrist.

16

Gan dimi par ré men che'n Jesukrist xa' nzhin ré yezh che'n men Israel

¹ No rë dimi kwa'n gan par rë wech be, xa' nak men che'n Jesukrist; bile' goi nela xmod nzhap ka, le' rë men che'n Jesukrist, xa' nzhò rë yezh che'n rë men Galacia. ² Rë zhë Doming, zen kad go tu dimi yek rë dimi kwa'n nile' go gan, dike kwa'n nzhax ka' go, par kinu chao' la goi or yala, nes mis na kane lo go. ³ No or yala, ya ngule la go rë xa' kwa'n wei' dimi re', mbaino nu tu yech bizuxkwa' go por lë'i, nes par or yala lo go, xëla bixa' par wei' bixa' kwa'n miza' go dub la go, par rë wech be xa' nzhò yezh Jerusalén. ⁴ No chi kube'u, nu da ñal ya, pwes ya no kun lë' bixa'.

Xigab kwa'n kinu Pab plo ya xa'

⁵ Par zhì'na lo go, naki'n de'da rë yezh kwa'n ña'n lazh men Macedonia, orze' zhì'na yezh Corinto plo nzhin go. ⁶ Orze' kitla yana che'p kun go, o pas yana dub rë mbëo' nayag lo go; orze' gak gaknu go da plo nilen xigab yan dispwes, ⁷ porke gat nzhaklata de'da nayen lo go, sino ke nzhaklan yana che'p xche kun go, chi lë' Señor ziyël. ⁸ Per nzhaklan yana yezh Efeso, par de'da lani kwa'n lë Pentecostés ba', ⁹ porke yezh Efeso, nzhò nayax xa' nzhakla tse'd widi'zh che'n Dios, ter nu nzhò nayax men ba', xa' kwa'n niyi' nine da por nak da men che'n Jesukrist.

¹⁰ No chi zhìn Timoteo lo go, chul bile' go lo xa' par zi xa' chul xid go, porke lo mis tutsa zhì'n nazhon che'n Jesukrist nilen kun lë' xa'. ¹¹ Kuze' nawit' go lo xa' gat lë'; sino ke gulunez go xa' chul, par nizak laxto' xa' zhìn xa' re', porke na kun zipla wech be por Jesukrist, kimbéz no zhìn xa'.

¹² Lo Pol wech be, dox mina'ba lo xa', no lo nu zipla wech be, par yi'dtsi' bixa' ma go, per ne xa', nagakt yi'd xa' nal re', sino ke lë' xa' yi'dtsi' ka ma go, per haxta or gake.

Lult kwa'n midì'zh Pab

¹³ Bikina go go, no wayila go widi'zh che'n Jesukrist zilita', no nazhebt go lo ni tu kwa'n, no naye guzo go kun Dios. ¹⁴ No rë kwa'n le' go, bile' goi kun dub laxto' go por nazhi' go men.

¹⁵ Wecha, rë go nane, lë' melizh Estéfanos nak rë xa' kwa'n galo laka ngwayila widi'zh che'n Jesukrist, xa' nzhò tu rë yezh kwa'n nzhin lazh men Acaya, mbaino dox nzhaknu bixa' rë men che'n Jesukrist kwa'n nzhò ba', kuze' kina'ba lo go, ¹⁶ gon go ro' rë men re', no ro' más xa' nikè mis rë zhì'n nazhon che'n Dios, nela rë xa' re'. ¹⁷ Dox nizak laxto'n mizhin Estéfanos lon, kun Fortunato no kun Akaiko; pwes rë men re' mile' rë kwa'n por da, por niyen go re'. ¹⁸ Lë' bixa' mile', mizi da chul, no nu rë go mizi chul; kuze' ñal ne go, rë xa' nak nela lë' bixa', dox tsak bixa'.

¹⁹ Lë' rë men che'n Jesukrist xa' nzhò yezh re', plo nak lazh men Asia, mixë'l tu widi'zh wen par rë go. No nu Aquila kun tsa' xa' Priscila, no nu más rë xa' nak men che'n Jesukrist kwa'n nibin lizh rë xa' re'; rë xa' re' mixë'l tu widi'zh wen par rë go. ²⁰ Rë wech be xa' nak men che'n Jesukrist, xa' nzhin re', mixë'l tu widi'zh wen par rë go; no nu ska go, guzen go ya' rë wech go, uni' go lo bixa' kun dub laxto' go.

²¹ Na Pab, kixëla tu widi'zh wen re' par rë go; kun mis letr ya'n mixë'lai par go.

²² Chi nzhò men xid go, xa' gat nazhi't Señor Jesukrist, nzhì'bde la xa' re' lo Dios. ¡Lë' Señor Jesukrist, Me nile' mandad be, ya mer la yubre!

²³ Lë' Señor Jesukrist gaknu rë go. ²⁴ Nazhi' da rë go por Krist Jesús, Me nile' mandad be. Sa' gake.

Yech mirop kwa'n mixê'¹ San Pab lo rë men che'n Jesukrist xa' nzho yezh Corinto

Ma go wech no bizan, ¿chi wen ka go?

¹ Na Pab, yub Krist Jesús mixê'¹ da par dizha lo go, porke sa' ngokla Dios gak, par lun widi'zh che'n Me. Na no Timoteo, xa' nak wech be por Jesukrist; mixê'¹ no yech re' lo rë go, xa' nak men che'n Jesukrist, rë go xa' nzho yezh Corinto, no rë go men che'n Jesukrist xa' nzhin rë yezh plo nak lazh men Acaya. ² Kina'b no lo Dios, Xuz be, no lo Jesukrist, Me nile' mandad be, par gaknu Me go, no par le' Me, zi go chul dizde le'n laxto' go.

Rë kwa'n nded Pab

³ Ñal di'zh be wen por Dios, Me nak Xuz be, no lo mis Dios ska re', Me nak Xuz Jesukrist, Me nile' mandad be, mbaino dox nilats laxto' Dios be, no Dios nitsiyal laxto' be or nizakzi be, ⁴ porke or nided no lo rë kwa'n nizak no, Dios nitsiyal laxto' no, nes par gak tsiyal no laxto' rë men, or nizak bixa' wanei tu kwa'n. No or nizakzi bixa', par le' no kun lë' bixa', nela xmod nile' Dios kun go ga'. ⁵ Porke nela xmod, dox nguzakzi Krist, se'ska nided no loi por nilu' no widi'zh che'n Krist, mbaino se'ska nitsiyal Krist laxto' no or nided no lo kwa'n nile' nizakzi no. ⁶ No chi nided no lo rë kwa'n nizakzi no por go, lë'i nak par ya go wen, mbaino par ro' go lo rë kwa'n nazhe'b kwa'n nzadkë tich go. No chi nitsiyal Dios laxto' no, nu ska kun go le' Diose, par xek go ded go lo rë mis kwa'n nided no. ⁷ Pwes kuze', sigur nzhap no, or nided go lo rë kure', nela xmod nided no ga', Dios tsiyal laxto' go, nela xmod nitsiyal Dios laxto' no ga'.

⁸ Rë go wech no bizan, nzhaklan gon go rë kwa'n nguzak no, no rë kwa'n nalats nguded no or nguio no rë yezh kwa'n zhin lazh men Asia. Dox tu kwa'n nazhe'b nguzak no, kwa'n mile' yentra' jwers no tuli, ngale'tra' no xigab chi ngabanra' no. ⁹ Guzhê unei, mile' no xigab; sa' mizi no mile' Dios par nangayila no mis no, sino ke mizu'i par más yila no yalnazon che'n Dios, kwa'n nile', niruban rë men ngut, ¹⁰ porke Dios ngoknu no lo rë kwa'n nazhe'b kwa'n mer ngat no, no sigur nzhap no, lë' Dios se'gaka gaknu no, mbaino kina Dios no lo rë kwa'n, ¹¹ no chi lë' go gaknu no, na'b go lo Dios por no, nes par se', más nayax men za' xkix lo Dios por rë kwa'n wen, kwa'n laore le' Dios por no.

*Chon nangatswi' Pab, ma rë men che'n
Jesukrist xa' nzho yezh Corinto*

¹² Nidi'zh no wen por mis no, porke namba laxto' no, yent kun cho mile' no tu kwa'n gat lë'; kun rë men namba nikizë no, per más ra' kun go namba laxto' no, nela xmod milu' Dios lo no. No se' nikizë no, gat lë't por kwa'n nzhak no yizhyuo re'i, sino ke por nilats laxto' Dios noi. ¹³ Rë widi'zh kwa'n mikë' no lo go re', jwals laka go'l goi, mbaino jwals laka zobyek goi, porke nzhakla no zobyek go rëi. ¹⁴ Como lë' go mizobyek la, pla ra' xti'zh no; nane ka no, or zhin zhë or yëk Señor Jesús xtu wëlt, Me nile' mandad be, orze' lë' go zak laxto' por no, nela nizak laxto' no por go ga'.

¹⁵ Kinun xigab re', ngoklan ngatswi'n ma go galo laka; nes par chop tant ngazak laxto' go, or ngane go da wëlt mirop. ¹⁶ Milen xigab, ngatswi'n ma go, or ngan par rë yezh kwa'n nzhin lazh men Macedonia; no or ngayëka di ba', ngayi'dtsi'n ma go xtu wëlt, no par ngaknu go da or ngan rë yezh kwa'n nzhin lazh men Judea. ¹⁷ Pas nile' go xigab, or milen xigab, ngalen kure', nayan milene, o chi nile' go xigab, nak da nela rë men yizhyuo ga', rë xa' kwa'n nzhab le' tu kwa'n, orze' lwegä' nzhab xa' nale'tska xa'i. ¹⁸ Per Dios, or nidi'zh Dios tu kwa'n, lë' Dios nile'i, no Dios nane, or nidi'zh no tu kwa'n, lë'i nile' no, ¹⁹ porke Xga'n Dios, Jesukrist, Me kwa'n nidi'zh no xti'zh lo go, na no Silvan, mbaino Timoteo; gat nichë't Jesukrist widi'zh, gat lë't galo di'zh Me tu kwa'n, guzhëla di ze' xa'la di'zh Jesukrist, sino ke nile' Me rë kwa'n nidi'zh Me. ²⁰ Kuze', rë kwa'n mila' Dios di'zh, lë' Dios le' rëi por Jesukrist. Kuze', or nidi'zh no nazon Dios, nzhab no: "Amén, sa' gake", por Jesukrist. ²¹ No Dios nile', nzo no wen nela go tutsa nzo be lo widi'zh che'n Jesukrist, no nu ngule Me be, par le' be zhi'n nazon che'n Dios, ²² no par milu' Me, lë' be nak men che'n Me, mikë' Me tu señ be, no señ re' nak Sprit che'n Me kwa'n mine' Me par nzho laxto' be.

²³ No chi naga yi'dtsi'n ma go, por Dios nin lo go, por gat nzhaklata win laxto' goi. No chi lë' da ka mbël, mejor we'i Dios da. ²⁴ Nale't go xigab, nak no nela tu xa' nile' mandad lo go, par ne no lo go, kwan pa' naki'n yila go, sino ke tutsa junt nikë no zhi'n nazon che'n Dios kun go, nes par más zak laxto' go, porke niwi' no, lë' go nzo ka naye lo widi'zh che'n Dios.

2

¹ No por gat nzhaklata win laxto' go, kuze' más wen nangayi'dtsi'ta ma go xtu wëlt, ² no chi ngalen, ngawin laxto' go, orze', ¿cho le', zak laxto'n dispwes?, porke yentra' choi, gogakai. ³ Kuze', por nangayala, mejor mixëla yech ze' lo go, porke gat nzhaklata

yala lo go, par ngale' go más ngawin laxto'n, porke más wen, le' go zak laxto'n. No nane ka, chi nizak laxto'n por go, nu ska go zak laxto' go por da. ⁴ Pwes or mixêla yech ze' lo go, dox trixt mizi da, no dox milen xigab, haxta mbina mile'i. Per ngaleta kuba' par ngawin laxto' go, sino ke par ne go, dox nazhi' da go.

Ña'l laxto' Dios kwa'n nile' men

⁵ Per men kwa'n mile' miwin laxto'n, gat lê't nab kuda mile' xa'i, sino ke más kun go; dizhta' be's kure', por gat nzhaklata ro'be más. ⁶ Per nayax go mile' la, nguzakzi xa' ze', no sobr kwa'n mile'nuo xa' ba'. ⁷ Per nal, kwa'n ñal le' go, biya'l laxto' go kwa'n mile' xa' kun go, no bitsiyal go la xa', par yo wen laxto' xa', napa kwan kizak xa' di le' xa' sient rê kuba'. ⁸ Kuze', dox kina'ba lo go, bilu' rê go, lê' go nazhi' xa', nela xmod nak go, or galo. ⁹ Pwes kuze' mixêla yech lo go orze', par nen, nabei chi walika, le' go rê kwa'n nin lo go. ¹⁰ No nela wanei tu kwan nile' tu men lo go, no ña'l laxto' goi, nu ska da ña'l laxto'n wanei kwa'n, porke chi mile' go tu kwa'n mia'l laxto'n, milene lo Jesukrist por go, ¹¹ nes par nagakt le' Mizhab gan lo be; porke nane be xmod nak kwa'n nile' Mizhab.

Dox xigab mile' Pab, yezh Troas

¹² Or mizhi'na yezh Troas par lu win widi'zh che'n Dios kwa'n milu' Jesukrist, no ze' mile' Dios, mizhê'l da pla xa' nzhakla gon widi'zh che'n Jesukrist, ¹³ per dox milen xigab por nanganen Tito ze', xa' nak wech be por Jesukrist; kuze', lweg'a' nguzena nez, nzhan par yezh Macedonia, milan rê xa' ze'.

Miza' Pab xkix lo Dios

¹⁴ Per xkix Dios, Me nzhuwei' no por Jesukrist, Me nzhaknu no par nile' no gan lo rê nak kwa'n nizak no; no por no, nile' Dios, nilibe' rê men widi'zh che'n Dios, rê xa' kwa'n nzhin rê lad lo yizhyuo. No widi'zh che'n Dios re' kwa'n nak nela tu mbi kwa'n nix nixla' ga', ¹⁵ no nu nak widi'zh nazhon che'n Dios kwa'n nilu' no nela rê kwa'n nilazhya'l Jesukrist lo Dios, par nidede nu lo rê xa' niro' lo kwa'n gat lê'; no lo rê xa' niziwan lo rê kwa'n gat lê'. ¹⁶ No par rê xa' niziwan re', widi'zh nazhon che'n Dios nak nela tu kwa'n nzhut men ga'; per par rê xa' niro' lo kwa'n gat lê', widi'zh nazhon re' nak kwa'n niza' yalnaban ka' xa' par ban xa' dubta' lo Dios. No yent xa' nzhak rê kwa'n, par lu' xa' widi'zh nazhon che'n Dios. ¹⁷ Nzho nayax xa' nilu' widi'zh che'n Dios par le' xa' gan dimi namás; per no, gat nakt no sa', sino ke nali nilu' no widi'zh che'n Dios, no lo Dios nidi'zh no por Krist, porke Dios mixê'l no.

3

Widi'zh kwa'n ne Dios lu' no

¹ Gat kidi'zht no rê kure' par di'zh no, mis no ke lê' no wen, no ni gat naki'n no lu' no tu yech kwa'n di'zh, ke lê' no dox wen, mbaino ni lo go, gat kina'bt no yech par ne xtu men xmod nak no, nela xmod nile' más rê men, ² porke mis go nak nela tu yech ga' plo nzobni' xmod nak no, no laxto' no nzobni'y par go'l más mene, par ne men rê zhi'n wen kwa'n mile' no xid go. ³ No vid che'n go nak nela tu yech kwa'n nzobni' widi'zh che'n Dios por Jesukrist, mbaino por no mizhin widi'zh re' lo go. Gat nzobni't widi'zh re' laxto' go kun tint, sino ke kun Sprit che'n Dios, Me naban par dubta', nzobni'y; mbaino ni gat nzobni' widi'zh re' lo tu ke tab, nela ngok kun ley kwa'n mila' Dios lo Muisés, sino ke laxto' go nzobni'y.

⁴ Tutsa Dios ñila no por Jesukrist, nane ka no rê kure', ⁵ no yent cho tu zhi'n gak le' mis no, porke rê kwa'n nile' no, Dios nile' mandad no nile' noi. ⁶ Pwes lê' Dios nine' jwers nka' kad no, nak no nela más nado ga' lo Dios par yalu' no widi'zh kub che'n Dios por Jesukrist lo rê men, no kure' gat nakte nela ley kwa'n mila' Dios lo Muisés kwa'n nzhab naki'n gat men por kwa'n nzê'b xki men lo Dios, sino ke widi'zh kub che'n Dios re' nzê' por Sprit che'n Dios, Me niza' yalnaban ka' men. ⁷ Lê' ley kwa'n mila' Dios lo Muisés nilu' kwan pa' nzê'b xki men, no kuze' ño nzhat men. No ngok nayax kwa'n nazhon or mikê' Dios widi'zh che'n rê ley ze' lo tab ke, no nangak ngawi' men Israel lo Muisés, porke ña'zbêl lo xa', per nangadi't kwa'n ña'zbêl re' xche. ⁸ No chi sa' ngok or nguio ley galo, pwes nal más kwa'ro biani che'n kwa'n kinu widi'zh nazhon che'n Sprit che'n Dios. ⁹ No chi lê' ley kwa'n mila' Dios lo Muisés kwa'n nzhab, naki'n gat men kwa'n nzê'b xki, nguioi kun biani nazhon kwa'n kinu Dios, pwes más kinu biani ro yalnazhon kwa'n nak widi'zh che'n Jesukrist, kwa'n nile', nimbe men lo Dios, ¹⁰ porke biani galo kwa'n mbi'dnu ley che'n Dios, gakt lala kun biani ro kwa'n kinu widi'zh che'n Dios por Jesukrist. ¹¹ No chi kwa'n galo mbi'd kun biani nazhon, no che'pts'a midi'y, pwes más yalnazhon kinu biani ro kwa'n nile' nimbe men par dubta'.

¹² No por nane ka no, se' nak kure', kuze' yent kwan nizheb no, or nidi'zh noi lo men. ¹³ Gat nile't no nela xmod mile' Muisés, or mitsao' xa' lo xa', par nangane rê men Israel or nguzubchi kwa'n ña'zbêl ze' lo xa', ¹⁴ per rê men Israel, net bixa' ngayila bixa' rê kure', no haxta nalzhê re', or nitse'd bixa' rê ley tiemp che'n bixa', nagakt zobyek bixa'i, nela mitsao' lar ze' lo Muisés ga'; no

nab tsa Krist gak gaknu bixa' par zobyek bixa'i. ¹⁵ Kuze', haxta zhê nalzê re', or nitse'd bixa' rê kwa'n mikê' Muisés, nitsao' lar ze' lo bixa', par nazobyek bixa'i. ¹⁶ Per or walipa' ñila tu men Señor, orze' ñubchi kuze' kwa'n nitsao' yek xa', kwa'n nak nela lar ga', ¹⁷ porke lê' Señor kwa'n nile' mandad be nak Sprit che'n Dios, mbaino plo nile' Sprit che'n Dios mandad, ze' nagaktra' le' ley mandad kwa'n mila' Dios lo Muisés. ¹⁸ Mbaino no, gat nitsao'tra' lar kwa'n lê velo ze' lo no, sino ke nak no nela bixin che'n spej ga', plo nilu' yalnazon che'n Dios, yalnazon kwa'n michê' xmod nak no, no kad ngubizh, más kile' Dios yalnazon che'n Dios kun no, haxta or gak no nela xmod nzhakla Dios. Xkix Dios por rê kwa'n kile' Sprit che'n Dios laxto' no.

4

¹ Pwes nane ka no, ngule Dios no par lu' no widi'zh che'n Me lo rê men, por nilats laxto' Me no, kuze' ñi'd gan no nile' noi. ² No gat nile't no ni tu kwa'n naga'ch, no gat nitulat no lo men, mbaino ni gat nikide no men; no ni gat nigoch no widi'zh che'n Dios kun widi'zh gat lê'; sino ke pura kwa'n wali nidi'zh no or nilu' no widi'zh che'n Dios dike xmod nzhakla Dios, nes par ne men, xmod nzo no kun Dios. ³ Per nab tsa rê xa' nagakt zobyek widi'zh nazhon che'n Dios kwa'n nilu' no, nak rê xa' kwa'n nikizê lo rê kwa'n nzhuwe'i' bixa' par gat bixa' lo Dios, ⁴ porke lê' Mizhab kwa'n nile' mandad yizhyuo re', nitsao' yek rê xa' kwa'n gat ñilat widi'zh nazhon che'n Dios por Jesukrist, nes par nane bixa' biani kwa'n kinu yalnazon che'n Dios por Jesukrist, kwa'n nak nela tu biani ro ga' par ne men xmod nak yalnazon kwa'n kinu Jesukrist, Me tutsa nak kun Dios. ⁵ Or nilu' no widi'zh che'n Jesukrist, gat nidi'zht no mis no, sino ke no nidi'zh Jesukrist, Me nile' mandad rê kwa'n nzho; mbaino, no namás nak nela tu mos ga' lo go, par le' no mandad che'n go por nak no men che'n Jesukrist. ⁶ Or ngulo Dios yizhyuo, nzhab Dios: "Yo biani plo nzho nakao nal re'." No nal, Dios mizini yek be, par ngok milibe' be yalnazon che'n Dios, kwa'n nak yub Jesukrist.

Xmod ñal ban men che'n Jesukrist, or ñila bixa' widi'zh che'n Dios

⁷ No rê widi'zh nazhon che'n Dios por Jesukrist, le'n laxto' be ngulo Diöse, be kwa'n nak nela tu vas bitsi'n ga', nes par ne men rê poder no kwa'n nile' rê widi'zh kwa'n nidi'zh no, no lo Dios nzêi, no gat lê'ta' che'n bei, be kwa'n nakxao' kun yuo, mbaino pe'n nak be. ⁸ Kuze', ter nizak no rê lo kwa'n nile', nizakzi no, per Dios nzhaknu no par nile' no gan lo rêi; no ter nanet no xmod le' no, per gat ñat laxto' no por lê'i; ⁹ mbaino

ter nizakzi men no, per nala't Dios nab no; no ter nile' men, ñachin no, per yent cho le' gan gut no. ¹⁰ Rê plo ña no, nzhakla men gut bixa' no, nela mbit men Jesukrist ga', nes par ne men, lê' Krist kinu poder par le' ruban men xid rê mengut; ¹¹ mbaino nal, dub naban no, niye laxto' no gat no por nilu' no widi'zh che'n Dios por Jesukrist, nes par ne men, xmod par ban bixa' vid kwa'n nayot lox kwa'n niza' Dios por Jesukrist. ¹² Kuze' niye laxto' no gat no, por nilu' no widi'zh che'n Jesukrist, nes par go ban kun Dios orze'.

¹³ Porke se' nzobni' lo Yech che'n Dios: "Ngwayilan Dios, kuze' midizha por Dios", pwes se'ska no ñila no Dios, kuze' nidi'zh no widi'zh che'n Dios por Jesukrist, ¹⁴ porke nane no, Dios Me mile' nguruban Jesukrist; mis Dios re' le', ruban no nela xmod nguruban Jesukrist, par wei' Dios no kun go plo nzho Me. ¹⁵ No rê kwa'n nizak no, par bien che'n goi, no par más yar kwa'n nizak laxto' go, no ro'b go lo rê che'n Dios, nes par más yar men kwa'n za' xkix lo Dios por wen Dios.

¹⁶ Kuze', zilita' ñi'd gan kile' no zhi'n re', ter nzhalex kwerp che'n no, per sprit che'n no, kad zhê, kile' Dios más nzhayake, nela tu kwa'n kub ga'. ¹⁷ Per gat lê't kwa'ro dox rê kwa'n nided no, lê' rê kure' nile' kun no rê yalnazon kwa'n nak nela tu biani kwa'n di' par dubta', no más tsake ke lo rê kwa'n nided no. ¹⁸ Kuze', gat nile't no be's xigab por rê kwa'n nine no nal, sino ke nile' no xigab por rê kwa'n gat nilu't no lo; porke rê kwa'n niwi' be lo, lê'i lox; per rê kwa'n gat nilu't be lo, lê'i nidi' par dubta'.

5

¹ No nane, lê' kwerp che'n be kwa'n yizhyuo re' nak nela tu yo' nakxao' di pura lar, plo nzho alm che'n be, no or zhin zhê loxe, lê' Dios kinu la xtu yo' lo yibê' kwa'n nayot lox par be, tu yo' kwa'n yub Dios michao'. ² Kuze' nizi' laxto' be, dub kinu be kwerp kwa'n ngolnu be re', por nzhakla be oj zhin la zhê kwa'n ban be kun kwerp kub kwa'n gap be lo yibê' par dubta', ³ par sa' lu' be nela men ngok xtu lar ga', no par naya'nt be nela tu men kache' ga'. ⁴ Kuze', dub naban be kun kwerp kwa'n kinu be yizhyuo re', nizi' laxto' be, mbaino nzho gor haxta nzho'n be, por rê kwa'n nizak be, kwa'n nile', nizakzi be, no gat lê't por gat nzhakla be, gat bei, sino ke nzhakla be ne ga' be kwerp kub che'n be, nes par kwerp che'n be kwa'n gat re', lê' Dios lê'i tu kwa'n di' par dubta'. ⁵ No Dios mile' xigab, le' Dios kun be se', kuze', mine' Dios Sprit che'n Dios yo laxto' be, nela tu señ ga', ke lê'i walika, lê' Dios le' kwa'n mila' Dios di'zh lo be.

⁶ Kuze', zilita' nizak laxto' no, porke nane no, dub tiemp kwa'n naban no lo yizhyuo

re' kun kwerp che'n no, zit nzo no par lo yibè' plo gak lizh no. ⁷ No dub nikizè no yizhyuo re', ter nagakt ne no Dios, per nane ka no, lè' Dios ne' kwa'n mila' Dios di'zh gal no. ⁸ Kuze' nane no, por widi'zh che'n Dios kwa'n ñila no, no gat niwint laxto' no, kisier no la' ga' no kwerp kwa'n nak che'n yizhyuo re', par bi ga' no plo nzho Jesukrist. ⁹ Kuze', zilita' nile' no por le' no kwa'n ño laxto' Jesukrist, ter lo yizhyuo re' o lo yibè'i, ¹⁰ porke kad be, zo lo Jesukrist, plo nzob Me, par nile' Me yalgustis, no par gab Me xmod gak kun kad be, par ne' Me kwa'n ñal kad be, por kwa'n mile' be yizhyuo re', kwa'n wen o kwa'n nakap.

Por Jesukrist, nichè'l be kun Dios

¹¹ No nane no, nab tsa Dios nazhon, mbaino tutsa Dios ñal gon be ro', kuze' nilu' no widi'zh che'n Me lo rè men, par yila bixa'i. No Dios nane ka xmod nikizè no, nzhakla no, oj nu go ne, mbaino zi go ke lè' no, wen ka nzo no lo Dios. ¹² Per gat kinet no lo go xtu wèlt, dox wen no, sino ke par zak laxto' go por no, no par nane go xmod di'zh go lo rè xa' nile' chigab walika wen, lo rè men, per mal laxto' bixa'. ¹³ No chi nile' men xigab, lè' no nak nela men nzhak miyizh ga', pwes par Diose; no chi gat nak no sa', pwes par go, menaye no. ¹⁴ Por dox nazhi' Jesukrist no, kuze' nzhon no ro' Me, porke nane no, tutsa Jesukrist ngut por rè men, kuze' rè men nak nela men ngut ga'. ¹⁵ Jesukrist ngut par rè men, no rè xa' ñila widi'zh che'n Jesukrist, nabantra' bixa' xmod nzhakla bixa', sino ke ban be namás par le' be kwa'n nzhakla Jesukrist, Me ngut no nguruban por rè men. ¹⁶ Kuze' nal, gat niwi'tra' no lo ni tu men yizhyuo por xmod nilu' bixa' al tich, nela xmod nak men yizhyuo re'. Ter sa' mile' no xigab kun Jesukrist, or mihan Me yizhyuo re', per nal, gat nile'tra' no xigab sa', ¹⁷ porke tu xa' nak tutsa kun Jesukrist, men ze' nak la xtu men; rè kwa'n ngok xa' nzhala, lè'i nded la; nal kwa'n naban xa', rèi ngok kub par lè' xa'. ¹⁸ Rè kwa'n wen re' nzè lo Dios; nal nak be nela tu men nichè'l kun Dios por kwa'n mile' Jesukrist, no mile' Dios no par lu' no widi'zh che'n Dios lo rè men, par nu bixa' gak men nichè'l Dios. ¹⁹ Por kwa'n mile' Jesukrist, nguio wen laxto' Dios kun rè men yizhyuo, porke rè xa' ñila widi'zh che'n Jesukrist, niche' Dios rè kwa'n nzè'b xki bixa', no mizo Dios no par di'zh no kure' lo rè men. ²⁰ Kuze', Jesukrist mixè'l no par di'zh no widi'zh che'n Me, nela yub Dios kidi'zh lo go por no. Kuze', por lè' Jesukrist, dox kina'b no lo go par gak go men nichè'l kun Dios, porke Dios nzhakla yo wen laxto' Dios kun go. ²¹ Ni tu dol nangapt Krist, per por be, mile' Dios ngut Krist, nela tu xa' dox

nzè'b xki ga', nes par rè be, xa' ngwayila Jesukrist, nak be nela tu men nambe ga', nela tu xa' gat nzhapt ni tu dol lo Dios.

6

¹ Pwes por nak no xa' nile' zhi'n nazhon tutsa kun Dios, kina'b no lo go, nale't go naya' lo kwa'n wen kwa'n mile' Dios por go, por wen Dios namás, ² porke se' nzobni' lo Yech che'n Dios:

Zhè kwa'n milats laxto'n lu, nguiziyèl da kwa'n una'bal lon;

mbaino ngoknun lu, zhè kwa'n ngol laxto'n ngulon lu lo rè kwa'n nazhe'b kwa'n nzadké tichal.

¡Bin go kwa'n nin re'! Nal nak tu zhè kwa'n milats laxto' Dios go; mbaino tu zhè kwa'n kubchi Dios rè kwa'n nzè'b xki go. ³ Yent cho tu kwa'n gat lè' kile' no lo ni tu men, par niyent cho di'zh gat lè' por rè zhi'n kwa'n nikè no, ⁴ sino ke nilu' no, walipa' nak no mos che'n Dios, no nixek no or nizakzi no, no or nizak no kwaliskier xtu yalzi, haxta nzho wèlt nanet no xmod le' no gan lo kwa'n nizak no; ⁵ no or niyin men no, mbaino or nigo bixa' no lizhyi'b, no rè or niro' nayax men par nidil bixa' no, no rè wèlt nazhe'b ñazha no por rè zhi'n naxekt men lo tuli, mbaino rè or kwa'n niro' xka'l no, mbaino rè wèlt kwa'n nite'd no yalnila'n, ⁶ nes par sa', nilu' nak no, mos xa' nile' kwa'n nzhakla Dios, por nambe nikizè no lo Dios; por nane no xmod nak Dios; no por nixek no lo rè kwa'n; mbaino por wen no kun rè men por Sprit che'n Dios Me nzho laxto' no; mbaino por walipa' nazhi' no rè men; ⁷ no nu por nidi'zh no kwa'n wali lo men, mbaino por kinu no poder che'n Dios. Nikizè no nambe lo Dios mbaino lo men, porke kure' nak nela tu spad ga' kwa'n nizu' nidil men, par dil no lo rè kwa'n gat lè', no par le' no gan loi. ⁸ Mbaino nzho gor nile' men kas no, no nzho wèlt nile' xa' naya' lo no; mbaino nzho wèlt nidi'zh men kwa'n gat lè' tich no, mbaino nidi'zh bixa' wen tich no; mbaino nzho gor nidi'zh men, ka mbèl kwa'n nidi'zh no, per no nidi'zh pura kwa'n wali. ⁹ No ter wen nilibe' men no, per nile' xa' kun no nela tu men, xa' gat nakbe't ga'. No nzho gor, chigab, ngut la no, per stubi naban no; no ter nizakzi men no, per nala't Dios, gut men no. ¹⁰ No chigab nalats nizak no, per zilita' nizak laxto' no; no chigab prob no, per nayax men rrik lo che'n Dios por no; no chigab prob no yizhyuo re', per yentra' kwan nzhak jwalt no por Jesukrist.

¹¹ Rè go, men Corinto, lè' no midizh rè kwa'n wali lo go, rè kwa'n nzho laxto' no. ¹² Porke dox nazhi' no go, yent kwan nigoka'ch no lo go, per go gat nazhi't go no nela xmod nazhi' no go ga'. ¹³ Nal kidizha lo

go, nela nidi'zh tu men lo rē xmē'd xa' ga': "¡Bichizhi' go da nela xmod nazhi' da go ga'!"

Nak be yado' che'n Dios, Me naban par dubta'

¹⁴ No gat ñalt chē'l go kun dub la go kun rē xa' gat ñila Jesukrist, napa gak go nela lē' xa'; porke nagakt chē'l rē men nile' kwa'n nzhakla Dios kun rē men mila' ley che'n Dios tu lad por nayi'lazh, no ni nagak kwéz nakao lo biani; ¹⁵ porke Krist gat nichē'lt kun Mizhab, mbaino se'ska nagakta' chē'l tu men ñila widi'zh che'n Jesukrist kun tu xa' gat ñilate. ¹⁶ Mbaino be nak yado' che'n Dios, Me kwa'n naban par dubta', no chi lē' Dios nzho laxto' be, orze' yentra' kwan che'n be nzho kun rē winab, nela xmod midi'zh ka Dios:

Yo'n laxto' bixa', par kizē'n xid bixa'; Na nak Dios che'n bixa', no lē' bixa' nak men da.

¹⁷ Mbaino nu se' midi'zh Señor: Guro' go xid rē men ba', giubchi go lo bixa', no nale't go ni tu kwa'n gat lē', nes par go, gak xmē'da.

¹⁸ Orze' Na gak Xuz go, no go gak xga'na no xcha'pa. Sa' midi'zh Dios, Me kwa'n nzhak nile' rē kwa'n.

7

¹ Kuze', rē go wech no bizan, nazhi' da go, Dios mila' di'zh rē kwa'n wen re' lo be, naki'n wi' be xmod ban be, kina be kwerp che'n be lo rē kwa'n gat lē', no ni nale' be rē xigab gat lē', par mbe laxto' be, mbaino nala't be ya'n be mal lo Dios, le' be tu kwa'n gat lē', sino ke le' be por ban be lo Dios nambe.

Nizak laxto' Pab por rē men che'n Jesukrist xa'yesh Corinto

² Kun dub laxto' go, wayila go no. Kun ni tu go gat le' no ni tu kwa'n gat lē', no ni naga tsinu no ni tu go, mbaino ni naga gao no chego. ³ Gat kidizhta' nakap tich go por kinin kure', porke lē'da ni la lo go, le'n laxto'n kinun go, par ban be junt o gat be junt. ⁴ Nanen lē' go ñilaka rē kwa'n nidizha lo go, no dub lan nidizha go lo rē men, mbaino ter dox nalats nizakzi no, per nizak laxto'n por go.

⁵ No dizde mizhin no rē yezh kwa'n nzhin laz h men Macedonia, gat zob no xe, porke dox nizheb no, napa' la' go widi'zh che'n Dios kwa'n milu' no lo go. ⁶ Per Dios, Me nitsiyal laxto' rē xa' nizak nalats, mitsiyal Dios laxto' no or mizhin Tito. ⁷ No gat lē't nab por mizhin Tito lo no nizak laxto' no, sino ke nu por nizak laxto' xa' por go. Ne Tito lo no, dox nzhakla go yidtswi' go ma no, mbaino nu gat lē't mizi go por kwa'n ngok xid go, mbaino nile' go xigab por da.

Kuze' rē kure' nile' nizak laxto'n. ⁸ Ter mile' yech kwa'n mixē'la lo go miwin laxto' go, aunke gor galo miwin laxto'n gor mixē'lai lo go, per nal gat niwint laxto'n por kuba', ter mile'i miwin laxto' go tu tiemp or mbi'l goi. ⁹ Nal nizak laxto'n, gat lē't por miwin laxto' goi, sino ke kuba' mizu' par una'b go lo Dios miche' Me rē kwa'n nzē'b xki go, no mizhē' xigab che'n go nela xmod nzhakla Dios. Kuze', wen mile' no gor mixē'l no yech ba' lo go, ¹⁰ porke yalnawin kwa'n nile' Dios nizak tu men, nizu'i par nina'b men lo Dios par che' Me rē kwa'n nzē'b xki men, mbaino nizhē' xigab che'n men, gat nile'tra' men kwa'n gat lē', orze' yentra' por kwan zi xa' gat lē'. Lē' yalnawin kwa'n nizak men por kwent che'n yub men, nzhute men. ¹¹ Per biwi' go, kwan mile' yalnawin kwa'n mixē'l Dios lo go, mbaino kwan une go por kuba': ¡Mile'i, mile' go rē kwa'n wen!: ngok une go, kwan pa' ngok xid go; mizobye'k go gat lē't nu go nzhap dol por kuba'; miyi'xian go por lē'i, mbaino mizheb go, no haxta ngokla go ngayi'dtsi' go lon, mbaino nu ngokla go le' go kwa'n nin. Mile' go yalgustis kun xa' nzē'b xki re', no nu mizi go, yent kwa'n nak go por kwa'n ngok ba'. ¹² Mbaino na, or mixēla yech ze' lo go, nangaxē'ltne por xa' kwa'n mile' kwa'n gat lē' re', no ni por una' kwa'n nguzhitnu miyi' re'. Na mixēl yech ze' par gon go, Dios nzhap kwent or dox mile' go xigab por no. ¹³ Rē kure' mile', nizi no chul, per más nizak laxto' no or une no, lē' Tito nizak laxto', por dox mile' go chul mizi xa' le'n laxto' xa'. ¹⁴ Lē'da nzhap la lo Tito, dox wen nizi da por go, no nizak laxto'n midizha sa' lo xa', porke walika rē kwa'n nzhapa lo Tito por go, nela xmod kidizha lo go nal re' kwa'n wali. ¹⁵ Nal, más nazhi' Tito go, or nitsila xa', lē' go mile' rē kwa'n ne xa' lo go, mbaino or mizhin xa' lo go, kun dub laxto' go mile' go wen kun lē' xa', dub tiemp kwa'n mbi'd xa' lo go; mbaino haxta nixiz go no mizheb go por rē kwa'n ne xa' lo go. ¹⁶ No nal, dox nizak laxto'n por go, no por nzhon go ro'n, nile' go rē kwa'n nin lo go.

8

Gon par rē men che'n Jesukrist xa' nzho yezh Jerusalén

¹ Pwes nal, rē go wech no bizan, nzhakla no di'zh no lo go, por rē kwa'n wen kile' Dios xid rē men che'n Me, xa' nzhin rē yezh plo nak yuo che'n men Macedonia, gat ñēt bixa' che'n bixa' par ki'z bixa'i kun más rē men che'n Jesukrist. ² Ter nided bixa' lo rē kwa'n nazhe'b, no nile' bixa' xigab, per nizak laxto' bixa', no ter dox men prob bixa', per niza' bixa' dimi par gon, no haxta di más niza' bixa'i, nela tu men rrik ga'. ³ Na nane kwa'n une lon, no walika kwa'n nin lo go,

kun dub laxto' bixa', miza' bixa' dimi haxta plo gake, no haxta dimás miza' bixa'i. ⁴No haxta mina'b bixa' lo no, ziyèl no za' bixa' dimi che'n bixa', par le' bixa' nela xmod nile' no, nzhaknu no men che'n Jesukrist. ⁵Mbaino más kwa'n mile' bixa', lo kwa'n mile' no xigab le' bixa'. Mis lè' bixa' miza' bixa' par Señor Jesukrist, par le' Dios kun lè' bixa' nela xmod nzhakla Dios. Mbaino nu lo no mila' bixa' le' no mandad bixa', par gak kun lè' bixa' nela xmod nzhakla Dios.

⁶Porke Tito ngok xa' galo laka mikan dimi par gon xid go, kuze' una'b no lo Tito par yi'd xa' lo go nal, par gaknu xa' lox gan rē dimi ba' xid go. ⁷Mbaino go, dox kinu go rē kwa'n nak che'n Dios: Dox ñila go widi'zh che'n Dios por Jesukrist, mbaino nzhak go nidi'zh go por Dios, no rē kwa'n nzhakla Dios nane go, mbaino dox ño laxto' go le' go zhi'n nazhon che'n Dios, no wen ka nazhi' go no. Dox jwers kinu go. Kuze', biwi'u par ne más rē wech be por Jesukrist, gat ñèt go rē che'n go par ki'z goi ka' más rē men che'n Jesukrist, xa' nzho yezh Jerusalén.

⁸Nale't go xigab jwers nin, naki'n le' go kure'; nab tsa nzhaklan gon go xmod nak laxto' más rē xa' gat ñèt dimi par miza' xa'i, nes par lu' go, walika nazhi' go rē men che'n Jesukrist, xa' prob, ⁹porke lè' go une la xmod milats laxto' Señor Jesukrist be; no ter rrik Me por kinu Me rē kwa'n kinu Dios, per por nazhi' Me go, mile' Me nela tu men prob ga', nes par gap go rē kwa'n kinu Dios lo yibè'. ¹⁰Na ni lo go, kwa'n nak xigab da, porke kure' dox zu'i par go. Li'n nded ba', galo laka go, nguzublo miza' go dimi par gon, par rē men che'n Jesukrist xa' nzho yezh Jerusalén, mbaino galo laka go ngokla go le' goi. ¹¹Pwes nal, bilo'x go le' go kwa'n nguzublo la go kile' go, nela xmod nizak laxto' go, or nguzublo go kile' goi. Biza' kad go kwa'n gak za' go, ¹²porke tu xa' za' gon lo Dios, dike kwa'n gak za' xa', per kun dub laxto' xa' za' xa'i, orze' lè' Dios zene, porke Dios gat nina'bt kwa'n gat kinu men. ¹³Gat kinita, za' go rē che'n go, par gaknu go xtu men, orze' ya'n go se'tsa; sino par lal gap go kwa'n kun xtu men. ¹⁴Nal, lè' go kinui, biza' go kwa'n nzhak jwalt lo bixa', per xtu zhè, gor gap bixa'i, lè' bixa' ne' kwa'n gak jwalt lo go. Biza' goi ka' bixa', nes par rē go gap kwa'n naki'n go, ¹⁵porke se' nzobni' lo Yech che'n Dios: "Men kwa'n mikan nayaxe, nangaxo'bt sobrt lo xa'; mbaino men kwa'n mikan che'pe, nangakt jwalte lo xa'."

Tito mbaino rē xa' le' kumpa'ñ xa'

¹⁶Xkix Dios mile' Dios nikè laxto' Tito go, par gaknu xa' go, nela na ga'. ¹⁷Pwes nguziyèl xa' le' xa' kwa'n una'ba lo xa', nela xmod nzhakla ka xa' le' xa' zhi'n nazhon che'n Dios xid go. No mis lè' ka xa', dub

la xa' nile' xa' xigab yi'dtswi' xa' ma go. ¹⁸Mbaino nu tu wech be por Jesukrist, yi'd junt kun Tito; tu xa' kwa'n ñèt por wen xid rē men che'n Jesukrist, porke dox wen nikè xa' zhi'n nidi'zh xa' widi'zh nazhon che'n Dios. ¹⁹Mbaino, wech be re', ngule más rē men che'n Jesukrist, par gaknu xa' no dub yakan no dimi lo más rē men che'n Jesukrist, mbaino par wei' noi lo más rē wech be xa' prob kwa'n nzho yezh Jerusalem, par más men di'zh wen por Jesukrist, mbaino par lu' no, xmod ñal le' no zhi'n che'n Jesukrist, ²⁰par yent cho di'zh, lè' no nile' gaxt rē dimi kwa'n nikan no re', par rē men che'n Jesukrist. ²¹Kuze' kile' pa' no, le' no kwa'n wen, gat lè't nab lo Señor Jesukriste, sino ke nu lo rē men. ²²No kun rop wech be re', xè'l no xtu wech be por Jesukrist, xa' milu' la pla wèlt, xmod nak xa' lo no, nane no, lè' xa' nzhakla le' kwa'n ñal lo rē zhi'n, no nal, por dox nzhakbe' xa' go, más nzhakla xa', le' xa' zhi'n wen re'. ²³No chi na'bdi'zh men lo go cho nak Tito, orze' guzh go se': "Lè' xa' nak xa' nile' kumpa'ñ Pab, no nikè xa' zhi'n kun Pab." No chi cho na'bdi'zh por xchop wech be re', orze' guzh go, lè' rē xa' re' nak xa' mixè'l más rē men che'n Jesukrist, no por lè' bixa', wen nidi'zh men por Jesukrist. ²⁴Mbaino par gon más rē men che'n Jesukrist, bilu' go ke lè' go nazhi' rē wech go xa' prob, xa' nzho yezh Jerusalem, nes par nzho ka kwent nidi'zh no, lè' go wen kun rē men.

9

Dimi par rē wech be men che'n Jesukrist

¹Kuze', par gaknu be más rē men che'n Jesukrist, gat naki'ntra' xèla más widi'zh lo go, ²porke nane ka, nzhakla go le' go kure', kuze' dox wen midizha por go lo rē men che'n Jesukrist xa' nzhin rē yezh pl nak lazh men Macedonia, mbaino nzhapa lo bixa', dub li'n ra' mikan go dimi. No por mbin bixa', rē go men Acaya, dox nile' go xigab por kure', orze' nayax rē men Macedonia, nu bixa' mikan dimi par gaknu bixa'. ³Per mixèla rē wech be re' lo go, par nadizha yent cho kwent rē kwa'n mizeta go lo bixa', nes par list zo go, kan go dimi xid rē wech go, nela xmod midizha lo go or galo. ⁴porke gat lè'te, or yala kun pla men Macedonia, napa ne bixa', nagat kan go dimi, orze' par no, mbaino nu ska par go, dox mal ya'n be, mbaino yent cho kwent midizha dox wen go. ⁵Kuze' milen xigab, lwega' yi'd rē wech be re' lo go, antis di yala lo go, par gaknu bixa' go, gan dimi kwa'n mila' go di'zh kan go ze', mbaino par lo'x go kan goi, nes par lu' go kun dub laxto' go za' goi, no gat lè't jwers kiki'l no go za' goi.

⁶Bitsila go widi'zh re': Men xa' nzha'n che'ptsa, che'pska yalgo'n kan xa'; no xa'

nzha'n nayax, nayaxska yalgo'n nak xa'.
 7 Kad go naki'n za' kwa'n ngol laxto' go, no nayët goi za' goi, mbaino nale't goi por ki'l men go, porke Dios nazhi' xa' niza' kwa'n dub nizak laxto',⁸ porke Dios gak ne' rë kwan ka' go; che'p kwa'n za' go, más yare lo go, nes par gak, gaknu go rë men yent kwan kinu,⁹ porke se' nzobni' lo Yech che'n Dios: Dox kwa'n miza' Dios ka' rë men prob, mbaino par dubta' wen Dios kun men.

¹⁰ Dios nak Me niza' lazh kwa'n nzha'n men, mbaino kwa'n nzhao men; no Dios ka le', yar dox kwa'n kinu go, no rë zhi'n wen kwa'n nile' go, nes par más gak gaknu go más men, xa' naki'ne. ¹¹ Dios le', yent kwan lijwalt lo go, rrik go lo rëi, nes par rë gor, gak gaknu go men, yent kwan kinu. No rë dimi kwa'n xë'l go lo no, par rë men che'n Jesukrist, orze' lë' bixa' za' xkix lo Dios por lë'i,¹² porke or nile' go se' par rë men che'n Jesukrist, gat lë'ta' nab tsa par za' go kwa'n naki'n bixa', sino ke nu par le' go, za' más bixa' xkix lo Dios. ¹³ No por rë zhi'n nazhon kwa'n nile' go re', par rë men che'n Jesukrist xa' nzho yezh Jerusalem, orze' di'zh bixa' wen por Dios, porke nilu' go, walika ñila go widi'zh nazhon che'n Dios kwa'n nidi'zh go lo men; nu bixa' di'zh wen por Dios, porke kiyaknu go bixa' kun dimi kwa'n xë'l go ka' bixa', mbaino par más rë wech be por Jesukrist xa' nzhin xtu rë plo. ¹⁴ Orze' na'b bixa' lo Dios por go, por nazhi' bixa' go, por tanta mile' Dios wen laxto' go kun lë' bixa'.¹⁵ jKix Dios por mine' Me tu kwa'n dox tsak ka' be! jHaxta nagakt yazhël be widi'zh par di'zh be kwan pa' mine' Dios ka' be!

10

Pab kinu poder che'n Dios par le' mandad

¹ Na Pab, dox kina'ba lo go kun pura rë widi'zh wen, mbaino kun rë widi'zh nazhon che'n Jesukrist, par gon go rë kwa'n nin re', porke nzho men nidi'zh xid go, na nak tu men nado', no tu men nazhe'b or nzon xid go, per or gat nzota lo go, nidi'zh bixa', dox nayi' da lo go, no nidi'zh rë widi'zh nazhe'b lo go. ² Kuze' kina'ba lo go, bile' go kwa'n ñal, nes par gor yi'dtswi'n ma go, gat naki'nt dizha nayi' lo rë xa' kwa'n michao' di'zh yix kuda, nzhab bixa', nak da tu men kwa'n nile' kwa'n namás par bien che'n nab, nela xmod nile' men yizhyuo re'. ³ No walika, lë' no men yizhyuo re', per or nidil no por rë kwa'n nak che'n Dios, gat nidilt no nela xmod nile' rë men yizhyuo or nidil xa',⁴ porke rë yi'b che'n Dios kwa'n kinu no, gat nakte nela rë yi'b kwa'n nidil rë men yizhyuo, sino ke lë'i nak poder che'n Dios, par nichile rë widi'zh no rë xigab gat lë' kwa'n kinu rë men yizhyuo re', rë kwa'n gat nizhë'lt kun widi'zh nazhon che'n Dios.

⁵ No kun poder re', nichil no rë xigab gat lë' kwa'n nichao' yek men, no rë xigab marian kwa'n nala't libe' más men Dios. Kun poder re', nidi'zh no par rë xa' kinu kwa'n gat lë' lo Dios, no xtu mod niban bixa', no xtu la xigab nile' bixa', mbaino nzho bixa' ro' Krist. ⁶ No gor ya nane la no, kun dub la go nzho go ro' Jesukrist no ro' no, orze' lë' no zo la par zakzi no kwaliskier tu rë xa' nzho xid go, xa' kwa'n nanet lë' kwa'n nzhakla Dios.

⁷ Wenawen biwi' go, kwan nzhak xid go. Chi nzho tu xa' nizi, lë' xa' más nzhak lo rë men che'n Jesukrist, naki'n wi' xa' re', lë' nu ska no nzhak widi'zh che'n Jesukrist. ⁸ No ter nile' go xigab, menes kinun poder par len mandad xid go, per na galdëi' kun go, no gat nizhehta nine lo go, porke Jesukrist mine' poder kan par len mandad, per gat lë't par kubchin go lo Dios, sino ke par ro'b go lo rë kwa'n nak che'n Dios,⁹ porke gat nzhaklata, cheba go, or nixëla yech lo go,¹⁰ porke nzho men xid go se' nidi'zh ticha: "Lo rë yech kwa'n nixë'l Pab, pura rë kwa'n nagan nidi'zh xa', mbaino pura rë widi'zh nayi'; per lë' gor nzo xa' xid be, nile' xa' nela tu men yent jwers, mbaino tu xa' yent kwan zu' par di'zh lo rë men." ¹¹ Per naki'n zobyek rë men ba', ke nela xmod nizob no lo yech lo go or nixë'l noi; se'ka le' no or yi'd no lo go xtu wëlt.

¹² Se' nin, porke nayot len nela rë xa' nidi'zh mis lë' xa', dox nzhak xa', porke xa' nile' xigab sa', gat walit nak xa'i. ¹³ Per no, gat nizit no marian por zhi'n kwa'n lalta' gat ne' Dios kë no, sino ke nab tsa nile' no kwaliskier zhi'n kwa'n mine' Dios le' no, no haxta xid go mine' Dios zhi'n re' le' no. ¹⁴ Kuze', poder kwa'n mine' Dios ka' no par le' no mandad lo go, ngale't noi kwa'dox kun go, porke yent cho galo laka midid'zh widi'zh che'n Dios lo go, galo laka no mbi'dlu' widi'zh nazhon che'n Dios por Jesukrist lo go. ¹⁵ Gat nizit no marian por zhi'n che'n xtu men, sino ke kimbëz no, or más yila go widi'zh nazhon che'n Dios, orze' más di'zh go wen por no, por zhi'n kwa'n nile' no xid go. Kwa'n naki'n len namás nak, len rë zhi'n kwa'n mila' Dios len,¹⁶ no par yalu' no widi'zh che'n Dios por Jesukrist rë yezh kwa'n ña'n dilant plo nzho go, no plo lalta' nagat yadi'zh xtu men widi'zh nazhon che'n Dios por Jesukrist, nes par niyent cho di'zh, dox ya nizi no por zhi'n nazhon che'n xtu men. ¹⁷ No chi cho men nzhakla di'zh dox tsak xa' por xmod nak xa', ñal di'zh xa' sa', nab tsa por ñila xa' Jesukrist, Me nile' mandad be,¹⁸ porke Dios gat niwi't wen lo xa' mis lë' nidi'zh wen, sino ke nab tsa xa' niwi' Dios wen lo, nak xa' kwa'n yub Jesukrist nane, lë' xa' re' wen.

11

Pab no rë xa' gat walit mixë'l Jesukrist

¹ Le' go jabor, bixek go lon por pla widi'zh kwan' chigab gat lë't che'n menaye kwa'n dizha lo go, ² porke dox nilen xigab por go, dox nikan go, porke na nzhakla gag go nab tsa par Dios, nela xmod nile' tu men kun tu xcha'p ga', or nzo xti'zh una' par ban una' kun tutsa men. Se'ta' nak go kun Jesukrist, par ban go nab tsa kun lë' Me. Nzhaklan zo go lo Me, nela tu una' ye'n kwa'n ni tu miyi' nagat gal, ³ porke dox nizheb da, napa zak go nela Yeb ga', no le' Mizhab gan ko Mizhab xtu xigab yek go, par nayilara' go Jesukrist, Me kwa'n nazhi' go nal re' kun dub laxto' go, ⁴ porke dub la go ñila go kwa'n nidi'zh xtu men kwa'n nzhab, nzho xtu Jesús kwa'n nak xa'la lo Jesukrist, Me kwa'n milu' no xti'zh lo go, mbaino dub laxto' go ñila go xtu sprit kwa'n gat nakt nela Sprit che'n Dios kwa'n nguio laxto' go. No nu ñila go xtu ben rë widi'zh kwa'n gat nakt nela widi'zh nazhon kwa'n mbin go, mbaino widi'zh nazhon re' ngulo' go lo rë kwa'n nzë'b xki go lo Dios. ⁵ Per gat nizit da más yët lo rë apost xa' nile' go xigab más nzhak ba', rë xa' kwa'n nidi'zh, mis lë' bixa' más nzhak. ⁶ Ter nak da tu xa' nazu't par di'zh lo rë men, per di lo kwa'n nzhak da, yent kwan nzhak jwalt da, no dubta' milun kure' lo rë go, por rë zhi'n kwa'n milen xid go.

⁷ O, ¿chi gat lë't milen por ka milun widi'zh che'n Dios lo go, sin nangaxt ni tu dimi kan par ro'b go kun che'n Dios namás?, ⁸ no or nguzon xid go, xtu ben rë men che'n Jesukrist mine' dimi kan par ngoknun go, ⁹ mbaino or ngok jwalt tu kwa'n lon, yent kwan una'ba lo ni tu go or nguio'n xid go, no or mbi'd pla rë men che'n Jesukrist, xa' nzë rë yezh plo ña'n lazh men Macedonia, lë' bixa' ngoknu da, mine' rë kwa'n ngok jwalt lon, no se' len par dilant, par niyent cho zhi'n zon lo go. ¹⁰ Mbaino, lë' da nane ka, por rë widi'zh che'n Jesukrist kwa'n nzho laxto'n, yent cho men Acaya kubchi da lo kwa'n nizak laxto'n por ka nilun widi'zh nazhon che'n Dios, no gat lë't kun dimiy. ¹¹ ¿Chon nin se' lo go? ¿Chi por gat nazhi' da go? ¡Per Dios nane ka, dox nazhi' da go! ¹² Per nane go, yent kwan nina'ba lo go por nilun widi'zh nazhon che'n Dios lo go, no se'ska len par dilant, par niyent cho gag gab, nak bixa' nela no ga'. ¹³ Per gat walit mixë'l Jesukrist bixa'; ka nikide bixa' men, nile' bixa' chigab walika Jesukrist mixë'l bixa'. ¹⁴ Mbaino di por si ka, yo rë men ba', porke mis Mizhab nibixlo, nilu' nela tu ganj che'n Dios ga' kwa'n ñaz bël. ¹⁵ Kuze', nu rë men che'n Mizhab nilu' nela xa' nile' pura zhi'n wen ga', per Dios zakzi bixa' nela xmod ñalkai por kwa'n nile' bixa'.

Dox kwa'n nguzak Pab por nak xa' tu men mixë'l Jesukrist

¹⁶ Xtu wëlt nin lo go: Nale't go xigab, nzhak miyizh da por rë widi'zh kwa'n dizha lo go. Per chi nzho go nile' xigab sa', yent kwan lë'i, biwi' go lon sa' nes par gak zi da che'p nela tu men chigab walika marian ga'. ¹⁷ Rë kwa'n kinin re', gat lë't mandad che'n Jesukriste, sino ke nine por mis na, kidizha wen por da, ter nanen, gat lë't nak tu men nak sa', ¹⁸ porke nzho nayax men kwa'n nidi'zh wen por mis lë', nal nu ska da lei, ¹⁹ porke nane ka dox nizi go nzhak go, kuze' dox nixek go lo rë men gat lë't nak, mbaino dox nixek go lo rë men xa' yent kwan nzhon. ²⁰ No haxta nixek go lo rë xa' kwa'n nili'nu go nela xmod nili'nu men tu ma ga', par nile' xa' mandad go, mbaino or niliwa'n xa' rë kwa'n kinu go, no or nile' xa' gan lo go, no nile' xa' nela xa' más tsak lo go, no nixek go lo rë kure'. No haxta ter niyich xa' ro' go. ²¹ Per no, por nazhi' no go, nagakt lë' no sa' kun go. Nal, ¿chi zak di'zh go tich no por nak no sa' kun go?

Per por nzho ka rë xa' niye laxto' nile' marian, nu ska da gag lei, ter gat lë't kumplet men nak se'. ²² No chi nak bixa' men hebreo, xa' kinu rë kostumbr che'n rë men Israel, nu ska da nak men hebreo. No chi nak bixa' men Israel, rë xa' kwa'n mila' Dios di'zh lo, nu ska da nak men Israel. Mbaino chi nzë bixa' ben che'n Abraham, nu ka da nzhal ben che'n Abraham. ²³ No, chi nak bixa' men nikë zhi'n nazhon che'n Jesukrist, na más nikë zhi'n nazhon che'n Jesukrist, ter gat lë't xti'zh menaye kidizha lo go. No na, más zhi'n nzhalen ke lë' bixa'; más michël mene ticha ke tich bixa', mbaino más nzhayo'n lizhyi'b lo bixa', no nayax wëlt nila' gut men da. ²⁴ Gai' wëlt, michël rë men Israele ticha; gal bichi' biyë' bins mine' bixa' ticha kad wëlt, ²⁵ mbaino chon wëlt mile' rë men mandad, pura kun yarrot ndin bixa' da, tu wëlt nguloke men da, no chon wëlt ngwa'zyo' bark kwa'n nzho'n le'n nitsdo', no mer ngayap da, mbaino tu zhë no tu yë'l mia'n da le'n nitsdo', nzho'byo da lo nits, no pe'n ngulo' men da. ²⁶ Mbaino dox nayax plo nzhakizë'n, no dox kwa'n nazhe'b nzhazaka, le'n rë you', por rë men wa'n, no mis rë men lazha men Israel mili'nui da, no nu rë men xa' gat lë't men Israel. Dox kwa'n nzhalinu men da le'n rë yezh ro no or nzon rë dan, no nu le'n nitsdo'. Mbaino nu haxta kun rë xa' chigab walika men che'n Jesukrist, mili'nui da. ²⁷ Dox zhi'n nzhalen kwa'n niyent cho xek, no michizhai da, no nayax wëlt nguro'xka'la, mbaino dox nzhate'da yalnila'n no yalnuzei'; nayax wëlt nguzon xlatsa, mbaino mite'da yalnayag, no ngok jwalt kwa'n ngaka. ²⁸ Mbaino nu rë kure' nizaka: zilita' be's xigab nilen

por rē men che'n Jesukrist plo nzhin bixa'.
²⁹ Mbaino or nizi tu go pe'n por rē kwa'n nizam go, por go nu da niziy; no chi cho ki'l go le' go tu kwa'n gat lē' lo Dios, dox nitulan no niyi' da por kure'.³⁰ No chi nzho tu kwa'n le' zi da marian, mejor zi dai por rē kwa'n nilu' nak da tu men yent jwers.
³¹ Lē' Dios, Me nak Xuz Señor Jesukrist, Dios Me ñal di'zh rē men wen, mbaino nazhon par dubta'; lē' Me nane, nangadizhta' kwa'n mbēl.
³² Or nguio'n yezh Damasco, lē' gobiernador xa' nak zhi'n che'n rey Aretas, mile' mandad par kina rē men nak zhi'n ro' rē pwert che'n yezh re', par ngazen bixa' da,³³ per ngulo pla men che'n Jesukrist da le'n tu kardor, par ngulo' bixa' da ro' ventan, mila bixa' da al xtu tich simient ke, par ngok milen gan lo rē men ze'.

12

Rē kwa'n milu' Dios lo Pab

¹ Naki'n ganin más kwa'n wen por mis na, ter nanen, yent kwan le' men gan or mis yub men di'zh, lē' xa' wen. Per lē'da gani lo go, rē kwa'n milu' Señor Jesukrist lon, no rē kwa'n unen por lē' Me.
² Na nili'be' tu miyi', tu xa' nak men che'n Jesukrist; nzhalá chida li'n mbi'y Dios xa', haxta yibē' mion, naneta chi kun dub kwerp xa' ngwa xa', o nab tsa alm che'n xa' ngwa, nab tsa Dios nane kure'.
³ Xtu wēlt nin, nab tsa Dios nane, chi kun dub kwerp xa' ngwa xa', o nab tsa alm che'n xa' ngwa.
⁴ Namás nanen, mbi'y Dios xa' plo nzob Dios, no ze' mbin xa' rē widi'zh kwa'n gat nzhaklat Dios, di'zh xa' lo más rē men.
⁵ Na gak dizh, dox tsak miyi' ze', per gat lē't mis na dizh, dox tsak da. Nabtsa kwa'n ganin nak da, nak da tu men yent jwers,
⁶ ter chi ngadizha rē kwa'n wen por mis da, gat lē't por kuze' nak da nela tu men nzhak miyizh, porke walika rē kwa'n nidizha, per naleta sa', par nagab go dimás nilen lo kwa'n wali nak da, o lo kwa'n nidizha.
⁷ Milu' Dios nayax kwa'n nazhon lon, per par nangazi da marian por lē'i, kuze' mila' Dios, mixē'l Mizhab tu yalne kwerp da, nela chigab tu yich ga' wa'z kwerp da, par zakzi da.
⁸ Chon wēlt una'ba lo Señor Jesukrist, par ngazubchi Me yalne re',
⁹ per se' ne Jesukrist lon: "Nabtsa kwa'n naki'nal nak kwa'n nazhi' da lu, par gak lu' poder Da xid rē xa' niyent jwers." Kuze' nizam laxto'n por nak da tu men yent jwers, nes par lu' poder che'n Jesukrist kuda.
¹⁰ Kuze', or nizaka rē kure' por Jesukrist, nizam laxto'n or nak da tu men yent jwers, no or niye men da, no or nizaka tu kwa'n nazhe'b, no or niyi' men nine men da, o haxta or naneta xmod len, porke or nak da tu men niyent jwers, orze' más jwers che'n Jesukrist kinun.

Dox nile' Pab xigab por rē men che'n Jesukrist, xa' nzho yezh Corinto

¹¹ Midizha lo go nela tu men yent kwan nzhon ga', per go mile' midizha sa', porke go ñal di'zh wen por da, porke ter yent kwan más menes tsak da lo más rē apost, xa' kwa'n nidi'zh go no ñila go, dox nzhak ba', no ter yent kwan tsak dax.
¹² Rē kwa'n mixek da lo por rē zhi'n kwa'n milen xid go, no rē señ, kun rē yalnazon kwa'n milen por poder che'n Dios; rē kure' nilu' ke walika lē' Jesukrist mixē'l da.
¹³ Mbaino, ¿kwan milen por más rē men che'n Jesukrist, no kun go nangaletai? No na ni lo tu go, yent kwan mina'ba, no, ¿chi por kure' nile' go xigab, menes tsak go lo más rē men che'n Jesukrist? ¡Nal biya'l laxto' goi, na ka nake, yent kwan una'ba lo go!

¹⁴ Biwi' go, nilen xigab yi'dtswi'n ma go, no kure' nak wēlt yon kwa'n yala lo go. Mbaino nalre', gat nzhaklata zon zhi'n lo go, yent kwan che'n go nzhaklan kan, sino ke go nikē laxto'n, gat lē't dimi chegoi; porke xuz men ñal za' dimi par xin xa', no gat lē't xin xa' ñal za' ka' xuz xa'.
¹⁵ Na, kun dub lan, loxa rē kwa'n kinun par go, haxta mis rē jwers da kwa'n kinun loxa par go, par gaku'n go. No chi dox nazhi' da go, ¿chon gat nazhi't go da be's?
¹⁶ Ter une go, yent kwan una'ba lo go par ngaknu go da, per nzho xa' xid go nidi'zh, kun xtu rē kwa'n mikiden go, por nzhak da nikiden men.
¹⁷ Per nangakideta' go lo ni tu kwa'n, or mixē'la rē xa' mbi'd' lo go ze'.
¹⁸ Or mixē'la Tito lo go kun xtu rē men che'n Jesukrist par mbi'dtsi' bixa' ma go, yent kwan chego ngaka' Tito; o pas nile' go xigab xa' mod nak da lo Tito, o xa' zhi'n nilen kun Tito.

¹⁹ No dub kwa'n kiyo'l go yech re', pas kile' go xigab, ka nikwana mod lo go par ya'n da wen namás, per na walika nak da tu men mixē'l Jesukrist, no gat nikwanta' mod par ya'n da wen, mbaino walika kwa'n kikē' no lo yech dilant lo Dios, no lo Jesukrist. No rē kwa'n mile' no por go, rē wecha xa' nazhi' da, lē'i nak par ro'b go lo che'n Dios,
²⁰ porke nizheb da, or yi'dtswi'n ma go, napa yazhēl da go, gat kile't go kwa'n nzhaklan, orze' naletska kun go kwa'n nile' go xigab len. Nizheb da, napa nzho go dox nichē'lo', o niyi' go por niwix go che'n xtu wech go, o nayi'yē go, o xa' plo nzhin tu go kun xtu go por xmod nile' kad go xigab, o nidi'zh go tich wech go, o dox nizi marian go, o nichēl dil go men.
²¹ Nizheb da, or yi'dtswi'n ma go xtu wēlt, napa le' Dios tulan por rē kwa'n nak go, o haxta gona por lē'i or ganen, lē' nayax go stubi nagat la' go rē kwa'n nak go nzhalá, se'gaka nile' go rē kwa'n mal, mbaino nika' go rē men rē xa' gat lē't tsa' go, no nile' go kun rē men, rē kwa'n nzhakla kwerp chego.

13

Lult kwa'n midì'zh Pab

¹ Nal ya chon wèlt kwa'n yì'dtswi'n ma go. Bitsila go, se' nzhab widi'zh che'n Dios: "Par zhè'l dì'zh tu kwa'n nile' tu men, naki'n kwa'n gab chop men o chon men: Kuze' kwa'n wali." ² Lè'da ni lai, dízde nzhala, no xtu wèlt ganine lo go: Rè go xa' nikizè ra' lo kwa'n gat lè', no lo más rè go, nal kwa'n nzon zit lo go, ne go namás, lè' da dil go dike xmod nin lo go, or miala wèlt mirop, no chi lè' da yì'dtswi' ma go xtu wèlt, ya nalastra' laxto'n ni xtu go. ³ Lè' da lei, porke nzhakla go, ne go chi walika mine' Jesukrist poder nkan par dizha widi'zh che'n Me lo go, porke Krist gat nzhak jwalta' poder Me par le' Mei xid go; lè' Me lu' poder che'n Me lo go. ⁴ Walika or nkè Krist lo krus, ngok Me nela tu men pe'n nak ga'; per nal naban Me por poder che'n Dios. No se'ska no, nak no nela tu men pe'n nak; per por tutsa nak no kun Krist, nal, por poder che'n Dios, kuze' kinu no yalnaban, mbaino par lu' no poder che'n Me lo go.

⁵ No nal, ñal gurèl go mis go, par ne go, chi walika ñila go Jesukrist. Wenawen biwi' go, xmod nak laxto' go. ¿Chi nanet go, lè' Jesukrist nzho laxto' kad go? O nzho go, xa' nangazu't ngak men che'n Jesukrist. ⁶ Per na nzhaklan ne go, gat nut no nak xa' nangazu't ngak men che'n Jesukrist, porke no walika nak no men mixè'l Jesukrist. ⁷ No nu nina'ba lo Dios par nale' go kwa'n gat lè', no gat lè't par dì'zh men wen por noi, sino ke par ban go wen, nela xmod ñal ka, ter nile' men xigab, gat walit, nak no men mixè'l Jesukrist, ⁸ porke nagakt ka'n no lo widi'zh nazhon che'n Dios, sino ke kwa'n nile' no nak, nayot kwèz dì'zh no widi'zh che'n Dios por Jesukrist. ⁹ Kuze' nizak laxto' no or gon no, lè' go nzoka naye lo widi'zh che'n Jesukrist, ter no nak nela tu men pe'n nak. Kwa'n más nina'b no lo Dios nak, gaknu Dios go par kad ngubizh, más ro'b go lo che'n Dios. ¹⁰ Kuze' kixèla yech re' lo go, antìs di yì'dtswi'n ma go, par zo go wen lo che'n Dios, nes par or yala lo go, gat naki'ntra' dizha lo go nayi', porke poder kwa'n mine' Señor Jesukrist par len mandad, lè'i nak par gakanun go, más ro'b go lo che'n Dios, no gat lè't par len, ro' go lo che'n Diöse.

¹¹ No nal, rè go wech no bizan, lult kwa'n nin lo go re': Bizak laxto' go, hiban go nela xmod ñalkai, bin go kwa'n nin, tutsa xigab bile' go, no guzhin go wen tu go kun xtu go, no Dios kina go, Me nile', nazhi' men wech men, no niban men wen, tu men kun xtu men. ¹² Guzen go ya' rè wech go, uni' go lo bixa' kun dub laxto' go, ¹³ no rè wech be por Jesukrist xa' nzhin re', mixè'l tu widi'zh wen par rè go.

¹⁴ Kina'ba lo Dios, dubta' lats laxto' Señor Jesukrist go, lo kwa'n nazhi' Me go, mbaino tutsa gak rè go por Sprit che'n Dios. Sa' gake.

Yech kwa'n mixë'l San Pab lo rë men che'n Jesukrist, xa' nzhò lazh men Galacia

Ma go wech no bizan, ¿chi wen ka go?

¹ Na Pab, nak da tu men mixë'l Jesukrist par dizha lo go, no gat lë't men mizo da, par nak da tu apost, sino ke yub Jesukrist mile'i, kun Xuz Me Dios, Dios Me mile' nguruban Jesukrist. ² Na, no rë wech be por Jesukrist xa' nzhin re', mixë'l no yech re' par rë go, xa' nak men che'n Jesukrist, rë go xa' nzhin rë yezh kwa'n ña'n lazh men Galacia. ³ Kina'ba lo Dios Xuz be no lo Jesukrist, Me kwa'n nile' mandad be, par gaku Dios go, no par zi go chul dizde le'n laxto' go. ⁴ Mis yub Krist michi Me Me par ngut Me por be, par mizubchi Me rë kwa'n nzë'b xki be lo Dios. Rë kure' mile' Me por be, par ngulo' Me be lo rë kwa'n gat lë' kwa'n nzhò yizhyuo re'. Se' mile' Krist, par ngok rë kwa'n nzhakla Xuz be Dios. ⁵ Par dubta' ñal di'zh men, lë' ga' ka Dios nazhon. Se' gake.

Tutsa mod gak ban men kun Dios

⁶ ¡Xe mia'n da tuli!, or mbina tatu nayen kila' go Dios, Dios Me ngurezhe go por dox nilats laxto' Dios go por rë kwa'n mile' Krist por go. No nal, xtu la mod ñila go widi'zh che'n Dios, namás por rë men xa' nidi'zh, lë' xa' nane xmod nak widi'zh che'n Dios, no xmod ban men kun Dios, ⁷ porke niyentra' ni xtu widi'zh nazhon kwa'n nile', ban men kun Dios. Rë men ba' namás wen par nigoch bixa' yek men, no par goch bixa' widi'zh nazhon che'n Jesukrist kun rë kwa'n gat wali. ⁸ Per chi haxta no o tu rë ganj kwa'n nzë lo yibë', di'zh widi'zh che'n Dios lo go, xa'la mod ke xmod milu' no lo go; orze', jnzhi'bde la men ze' lo Dios! ⁹ Como lë'la xmod midizha la no lo go, no nal nine xtu wëlt lo go: Chi nzhò men lu' xa'la mod lo go, widi'zh che'n Dios por Jesukrist, no chi gat nake nela xmod milu' no lo go, ¡Dios zakzi men ze'!

¹⁰ ¡Gat lë't por nin kure' nzhaklan di'zh men wen ticha, porke gat lë't kuba' nikwana! Nabtsa nzhaklan, ne Dios da wen. Per chi nikwana, nab tsa di'zh men wen ticha, orze' gat nakt da tu mos kwa'n nile' rë zhi'n che'n Jesukrist kun dub laxto'.

Cho mizo Pab, par nak xa' tu apost

¹¹ Nal, nzhaklan gon go kure', wech; lë' widi'zh che'n Dios por Jesukrist kwa'n nilun lo men, gat lë't kwa'n michao' yekne. ¹² Gat lë't men milu' widi'zh re' lon, no gat lë't men mitse'de da, sino ke yub Jesukrist mile' milibe'ne.

¹³ Lë' go ya mbin la, xmod miban da nzhala ze', kun rë ley kwa'n mila' Dios lo Muisés, nela xmod niban rë men Israel. Walika dox mizakzin nayax men, xa' nak men che'n Jesukrist, no nangalast laxto'n bixa', haxta ngoklan ngaloxa rë bixa' tuli. ¹⁴ No ngok da tu men xa' más mixo'byek rë ley che'n Muisés xid rë men Israel, xa' nzhapa igwal kun lë', mbaino dox nkinan xmod nak kun rë kostumbr che'n rë men xa' nak ben da. ¹⁵ Per or ngol laxto' Dios por wen dox Dios kuda, ngule Me da dizde le'n laxto' xna'n, ¹⁶ mbaino milu' Dios Xga'n Dios lon, no par lun widi'zh che'n Me lo rë xa' gat lë't men Israel. No dispwés di milibe'n Jesukrist, yent cho mikwana más par lu' rë widi'zh che'n Dios lon, ¹⁷ no ni nangatswi'n lo ni tu rë apost, xa' ngule Dios galo lon, rë xa' kwa'n nzhò yezh Jerusalén. Nangaleta kuba', sino ke ngwan rë yezh che'n men Arabia, no dispwés miëka par yezh Damasco.

¹⁸ No or nded chon li'n, orze' ngwan par yezh Jerusalén, ngwadi'zhnun Per, no ze' mia'n da chi'n ngubizh kun lë' xa'. ¹⁹ Per nangatswi'ta lo cho xtu rë apost, sino nab tsa lo Jakob wech Señor Jesukrist ngwatswi'n lo. ²⁰ ¡Dios nane, walika rë widi'zh kwa'n kixëla lo go re'!

²¹ Dispwés di kure', ngwan rë yezh che'n men Siria, kun rë yezh che'n rë men Ciliacia. ²² No rë men che'n Jesukrist kwa'n nzhin rë yezh che'n men Judea, nanganet bixa' da. ²³ Nabtsa mbin bixa' kidi'zh men: "Lë' xa' dox mizakzi be ze', ¡nal lë' xa' kilu' la widi'zh nazhon che'n Dios por Jesukrist lo rë men, widi'zh kwa'n galo net xa' yila men!" ²⁴ Mbaino por mbin men kure', dox kidi'zh men nazhon Dios.

2

Milibe' más rë apost, lë' Jesukrist mixë'l Pab

¹ No or nded chida li'n, ngwan yezh Jerusalén xtu wëlt, no nu Bernabé mbijn kun Tito. ² Orze' ngwan, porke lë' Dios milu' lon, naki'n yan yezh re' par dizha kun rë xa' kwa'n nidi'zh men, lë' ga' ka bixa' nane xmod nak widi'zh che'n Jesukrist, mbaino nile' bixa' mandad xid rë men che'n Jesukrist. No midizha lo bixa', xmod nak widi'zh che'n Dios por Jesukrist kwa'n nilun lo rë men, xa' gat lë't men Israel. Nabtsa lo rë xa' re' midizha kure', par nabei, kwan ngane bixa'. ³ Per ni Tito, por xa' mbijn re', yent cho ngane, naki'n kë señ kwa'n lë circuncisión kwerp che'n xa', no ter nzë xa' lazh men grieg. ⁴ Midizh no kun rë xa' nidi'zh men, lë' gaka bixa' nzhak, porke nguio pla xa' ngokla ngakë señ re' kwerp che'n Tito. Mile' bixa' nela men chigab walika men che'n Jesukrist, mbi'dla'ch bixa'

xid no, par ne bixa' nabei, ¿chon gat ñilara' no, nile' ley kwa'n mila' Dios lo Muisés mandad lo no?, por ñila no widi'zh che'n Jesukrist, mbaino, ¿chon gat nile'ra' no rë kos-tumbr che'n men Israel? No jwers ngokla bixa', le' no rë kuba' xtu wëlt. ⁵No per ni tu kwa'n nzhakla rë xa' ba', nangale't noi, nes par dubta' ban go kun widi'zh nazhon che'n Dios por Jesukrist.

⁶Per rë xa' kwa'n nzhob' xti'zh, xa' tsak, rë xa' kwa'n lë' gaka nane; ni tu kwa'n nangagot bixa' lo widi'zh che'n Dios por Jesukrist kwa'n nilun; no nangazhe'bt da lo bixa', rë' no rë kuba' xtu wëlt. ⁷No per ni tu kwa'n nangadi'zht bixa' nak da, sino ke milibe' bixa', lë' Dios mixë'l da lo rë xa' gat lë't men Israel, nela xmod mixë'l Dios Per lo rë men Israel, ⁸porke Dios Me mixë'l Per lo rë men Israel, mis Dios ka re' mixë'l da lo rë xa' gat lë't men Israel.

⁹Jakob, no Per, mbaino Juan, rë xa' re' nzhob' xti'zh más tsak bixa' xid rë men che'n Jesukrist. No or milibe' bixa' lë' Jesukrist mixë'l da, orze' nguzen bixa' ya'n no ya' Bernabé, par milu' bixa', lal tsak no kun lë' bixa' lo zhi'n nazhon che'n Dios, porke une bixa', lë' Jesukrist mixë'l no lo rë men gat lë't men Israel, nela xmod mixë'l Jesukrist bixa' lo rë men Israel. ¹⁰Nabtsa mina'b bixa' lo no, gaknu no men prob, no kure' nile la dizde nzhala.

Ndil Pab Per por tu kwa'n gat ñal mile' Per

¹¹Per or mbi'd Per yezh Antioquia, ndila xa' lo rë nak men, por tu kwa'n gat ñal mile' xa' kun rë men che'n Jesukrist, ¹²porke or naga zhin pla men kwa'n mixë'l Jakob plo nzhob no, tutsa lo mes nzhao Per kun rë men che'n Jesukrist xa' gat lë't men Israel. Per or mizhin men che'n Jakob lo no, orze' gat nzhao'tra' Per kun rë xa' re', porke nizheb Per lo rë men che'n Jakob, rë xa' kwa'n nzhakla, kè' señ kwa'n lë' circuncisión kwerp che'n rë xa' gat lë't men Israel. ¹³Orze', más rë men Israel, nu bixa' mizheb lo rë men che'n Jakob ze' nela Per ga'. Haxta nu Bernabé mile' kure'. ¹⁴Per or unen, gat kile't bixa' nela xmod nak widi'zh che'n Dios por Jesukrist, orze' nzhapa lo Per dilant lo rë men nzhin ze': "Lu men Israel, no kile'l nela tu xa' gat lë't tu men Israel. ¿Chon kiki'lal rë xa' gat lë't men Israel, le' bixa' nela xmod nile' rë men Israel ga'?"

Nzhak nambe laxto' men nab tsa por ñila men Jesukrist

¹⁵Nu nzhapa lo Per: "Rë be, xa' nak men Israel, zak be dizde or ngol be, gat nzë'bt xkit be lo Dios nela más rë men xa' gat lë't men Israel. ¹⁶Per nane be, ni tu men, yent cho nzhak nambe laxto' lo Dios por nile'

xa' kwa'n nzhobni' lo ley kwa'n mila' Dios lo Muisés. Nabtsa por ñila men Jesukrist nzhak nambe laxto' men lo Dios. Kuze', rë be xa' nak men Israel, ñal yila be Jesukrist, par ña'n nambe laxto' be lo Dios, no gat lë't por le' be kwa'n nzhobni' lo ley che'n Muisés ya'n nambe laxto' be."

¹⁷Nal nin, nzhak nambe laxto' men nab tsa por ñila men Jesukrist. Kuze', nayi' par lo Dios cho men stubi kile' kwa'n nzhakla ley kwa'n mila' Dios lo Muisés. Kuze', pas gab men, Jesukrist nile' nzhap men dol lo Dios, por nagak le' men kwa'n nzhap ley. ¿Per gat lë't sa' nak kure'? ¹⁸Per chi kwana, ya'n nambe laxto'n lo Dios por len xtu wëlt kwa'n nzhobni' lo ley, ¿orze' walika nzë'b xkin lo Dios! ¹⁹Lë'da nak nela tu men ngut ga' par ley ba', par ban da par Dios, por nak da men che'n Jesukrist. ²⁰Nak da nela tu xa' ngut tutsa kun Jesukrist lo krus; gat naban'tra' da xigab da; nal naban da nela xmod nzhakla Jesukrist. No por ñilan Jesukrist, kwa'n naban da nal re', por Jesukrist naban dai, Me nazhi' da, no Me ngut por da. ²¹Gat nilata' tu lad kwa'n wen kwa'n mile' Dios por da, no chi por le' men kwa'n nzhap ley, ngak nambe laxto' men lo Dios, ¿orze' yent kwan zu' ngut Jesukrist lo krus!

3

Nzhak nambe laxto' men lo Dios namás por ñila men Jesukrist

¹¿Zhe'b jwals mikide men go, men Galacia! ¿Cho mikixkan yek go, par nayilara' go widi'zh che'n Dios por Jesukrist? ¿Wenawen milu' no lo go, lë' Jesukrist nkë lo krus por be! ²Nal, tutsa kwa'n nzhakan ne go lon: ¿Chi nguio Sprit che'n Dios laxto' go por mile' go kwa'n nzhobni' lo ley, o por mbin go widi'zh che'n Dios por Jesukrist, no ngwayila goi? ³¿Chon tatu jwals mikide men go? Galo laka, nguzublo go naban go lo Jesukrist, nela xmod milu' Sprit che'n Dios lo go; mbaino nal xigab che'n yub go naban go. ¿Kwan gab go, dub sa' nak go, ziyë'l Dios ban go par dubta' lo Dios? ⁴Orze', ¿chi yent cho kwent nguzakzi go lo rë kwa'n? ¿Chi lë'i walika, mila' go Dios?, ⁵porke or ngulo Dios Sprit che'n Dios laxto' go, no or mile' Me zhi'n nazhon kun go, ngale't Mei por mile' go kwa'n nzhobni' lo ley che'n Muisés, sino mine' Me Sprit che'n Me, por mbin go widi'zh nazhon che'n Dios por Jesukrist, mbaino ngwayila goi.

⁶Nela Abraham ga', ngwayila xa' kwa'n nzhap Dios lo xa', kuze' miwi' Dios lo xa' nela lo tu men gat nzë'b xkit ga'. ⁷Kuze' bin go kure': Rë men xa' ñila widi'zh che'n Jesukrist, niwi' Dios lo bixa' nela niwi' Dios lo Abraham ga', ⁸porke lë' Dios ya midizh la, tsumbe Dios laxto' rë men, xa' gat lë't men

Israel; por ñila bixa' widi'zh che'n Dios por Jesukrist. Kuze', nzhab Dios widi'zh wen re' lo Abraham: "Por lu, rë men yizhyuo ya wen." ⁹ Kuze', wen nzha rë men xa' ñila widi'zh che'n Dios por Jesukrist, nela wen nzha Abraham ga', por ngwayila xa' kwa'n nzhab Dios lo xa'.

¹⁰ Per rë xa' gab, ya'n xa' wen kun Dios por le' bixa' rë kwa'n nzobni' lo ley kwa'n mila' Dios lo Muisés; nzh'i'bde la rë xa' re' lo Dios por kuba', porke se' nzobni' lo ley: "Rë men xa' gat nile' rë kwa'n nzobni' lo ley kwa'n mila' Dios lo Muisés, nzh'i'bde la bixa' lo Dios." ¹¹ Walika, yent cho tu men ya'n nambe laxto' lo Dios por nile' xa' kwa'n nzobni' lo ley, porke se' nzobni' lo ley che'n Dios: "Rë men ña'n nambe laxto' lo Dios namás por ñila xa' widi'zh che'n Dios, no ban xa' par dubta' kun Dios." ¹² Per men xa' naban kun ley, gat niwi't xa' lo Dios, porke se' nzobni' lo ley: "Rë men xa' nile' kwa'n nzobni' lo ley, naki'n dub ban xa' yizhyuo re', le' xa' rë kwa'n nzhab ley."

¹³ Porke Jesukrist ngulo' no lo de kwa'n nzadké tich no, rë no men Israel, por nangale' no gan ngale' no rë kwa'n nzobni' lo ley; kuze' lë' Krist ndix rë de che'n no, or ngut Me lo krus, porke se' nzobni' par rë men, xa' kè lo krus: "Nzh'i'bde xa' re' lo Dios." ¹⁴ Mbaino nu go, xa' gat lë't men Israel, ngulo' Jesukrist go lo de kwa'n nzadké tich go por gat nile' go gan le' go rë kwa'n nzhab ley, nes par nu go, gal kwa'n mila' Dios di'zh lo Abraham, or nzhab Dios: "Por lu, rë men yizhyuo ya wen." No kwa'n nzha go wen re' nak, Dios mine' Sprit che'n Dios yo laxto' go.

Ley no widi'zh kwa'n mila' Dios di'zh lo Abraham

¹⁵ Rë go wech no bizan, lë'da di'zh lo go xmod nile' men lo yizhyuo re'. Or nichao' men tu yech par la' xa' di'zh lo xtu men por tu kwa'n, no or ngulo rop xa' firm lo yech re', yent cho gak gab, natsakte, no yent cho gak kè' más widi'zh kwa'n ya nzob la lo yech re'. ¹⁶ Nal mbin be, lo Abraham mila' Dios di'zh, no lo xa' kwa'n nzë ben che'n Abraham. Per nangala't Dios di'zh kure' kun rë xa' gak ben che'n Abraham, nela lo tu béd men ga', sino ke nab tsa lo tutsa xa', no ben che'n Abraham re' nzë Jesukrist. ¹⁷ Kuze' nin lo go: Lë' kwa'n mila' Dios di'zh lo Abraham, lë'i le' Dios; no or mid'i'zh Dios kure', nzhak jwalt tap gayo' nzho gal bichi' li'n par za' Dios ley ka' Muisés. No nangakt ngazubchi ley widi'zh kwa'n mila' Dios di'zh lo Abraham galo. ¹⁸ No chi naki'n galo laka, le' men rë kwa'n nzobni' lo ley kwa'n mila' Dios lo Muisés, par za' Dios rë kwa'n nak che'n Dios ka' men, per yizhyuo re', yent kwan miza' Dios ka' Abraham. Per por wen laxto' Dios

kun Abraham, mila' Me di'zh ka za' Me rë kwa'n ka' xa'.

¹⁹ No nal, ¿par kwan miza' Dios ley ka' Muisés? Miza' Diose nes par une rë men Israel, dox nzë'b xki bixa' lo Dios, no mizu' ley haxta or mbi'd Jesukrist, Me kwa'n nzë ben che'n Abraham, no Me kwa'n mila' Dios di'zh lo, nela xmod mila' Dios di'zh lo Abraham ga'. Or miza' Dios rë ley ka' Muisés, rë ganj mile' Me mandad ngwala', par ngwala' Muiseze lo rë men Israel; ²⁰ per or mila' Dios di'zh lo Abraham, yub Dios mid'i'zh, gat lë't cho xtu mizo Dios.

Xmod nzhakla ley ban men

²¹ No chi le' go xigab: Par ley kwa'n mila' Dios lo Muisés, ¿gat lë't nak kwa'n mila' Dios di'zh lo Abraham? ¿Gat lë't sa' nak kure'! No chi por ley nzhak niban men par dubta' lo Dios, orze' ngawi' Dios wen lo be por nzhon be kwa'n nzhab ley. ²² Per por kwa'n nzobni' lo Yech che'n Dios, nane be kure': Rë kwa'n gat lë' kwa'n nile' rë men yizhyuo re', lë'i nile' mandad lo rë men; per por widi'zh kwa'n mila' Dios di'zh lo Abraham, rë xa' kwa'n ñila widi'zh che'n Dios por Jesukrist, Dios niza' yalnaban par lë' bixa' par dubta'.

²³ Orze', rë zhë kwa'n naga zhin widi'zh che'n Dios kwa'n nile' ña'n nambe laxto' be, por ñila be Jesukrist, lë' ley ngok par be nela tu lizhyi'b ga', plo miao'yo' be, haxta ke mizhin zhë une be, xmod ña'n nambe laxto' be lo Dios por Jesukrist. ²⁴ Kuze' ngok ley nela tu xa' mile' mandad lo be, nela tu xa' nikina tu më'd win ga', par jwers le' më'd kwa'n ñal le' më'd, no michizhin ley be haxta lo Jesukrist, par ya'n nambe laxto' be lo Dios por ñila be Jesukrist. ²⁵ Nal, por ñila be widi'zh che'n Dios por Jesukrist, gat naki'ntra' be ley ze' kina be par le' be kwa'n ñal.

²⁶ Kuze', rë go xmë'd Dios por ñila go widi'zh che'n Jesukrist, por nak go tutsa kun lë' Me, ²⁷ porke or ngoklë'i go le'n nits por lë' Jesukrist, kure' milu', ngok go tutsa kun Jesukrist. ²⁸ No por nak go tutsa kun Jesukrist, gat naki'ntra' le' go xigab chi men Israel go, o xtu plo nzë go; o chi nak go tu mos nado lo xtu men, o yent cho nile' mandad lo go; o chi nak go tu miyi' o tu una'; porke rë be, tutsa nak be lo Jesukrist. ²⁹ Nal, por nak go tutsa kun Jesukrist, por ñila go widi'zh che'n Me, kuze' nak go nela tu men xa' nzë ben che'n Abraham ga', mbaino gal go lo mis kwa'n mila' Dios di'zh, gal Abraham.

4

¹ Nal dizha kure' xtu mod lo go: Tu men kwa'n gal tu kwa'n, la' xuz xa' di'zh; dub tiemp nak xa' më'd win, nak xa' nela tu mos kwa'n nile' tu men mandad ga', no ter che'n më'd rë nak kwa'n kinu xuz më'd. ² Dub

nak tu mē'd, mē'd win, tu men nikina mē'd; mbaino nzho más xa' nikina kwa'n gal mē'd, haxta zhin zhē kwa'n gab xuz mē'd, za' xa' kwa'n gal mē'd. ³ Se'ska nguzak be or ngok be nela mē'd ga' lo xigab che'n be. Tiemp ze', rē sprit kwa'n nile' mandad lo rē kwa'n nzho yizhyuo re', mile' mandad lo be. ⁴ Per or mizhin zhē mile' Dios kwa'n mile' Dios xigab, mixē'l Me Xga'n Me, ngol Xga'n Me laxto' tu una', no ngok Xga'n Me tu men Israel xa' naki'n mile' rē kwa'n nzobni' lo ley kwa'n mila' Dios lo Muisés. ⁵ No ngulo' Xga'n Dios be lo rē kwa'n mile' ley mandad lo be, nes par ngok be xmē'd Dios.

⁶ Nal, por nak be xmē'd Dios, kuze' mixē'l Dios Sprit che'n Xga'n Dios, par yo laxto' be, no por be, se' nina'b Sprit lo Dios: "iPayē', Payē'l", por kwent che'n be. ⁷ Kuze', gat nile'tra' be rē kostumbr kwa'n nzho yizhyuo re', no gat nile'tra'i mandad lo be, sino ke lē'be nak la xmē'd Dios; no por nak be xmē'd Dios, Dios ne' ska kwa'n gal be, kwa'n kinu Me.

Dox xigab kile' Pab por rē men yezh Galacia

⁸ Walika, or naga libe' go Dios, mile' rē sprit mandad lo go, rē sprit kwa'n gat walit dios. ⁹ Per nal, por milibe' go Dios, o más wen gab be, lē' Dios milibe' go por nak go xmē'd Dios, orze', ¿chon nzhakla go le' go xtu wēlt rē xigab kwa'n nazu't, rē kwa'n nzho yizhyuo re', par le'i mandad lo go? ¹⁰ ¿Chon nzhakla go, le' go lani rē zhē sabd che'n rē men Israel, no kad nibi mbēo'; no lani Pask, mbaino más rē lani kwa'n nile' rē men Israel le'n rē li'n, mbaino rē lani or ño xtu li'n kad wēlt, nela xmod nzobni' lo ley kwa'n mila' Dios lo Muisés ga'? ¹¹ Nizheb da tuli nile' go, porke pas yent cho kwent rē zhi'n nazhon kwa'n mile' Dios xid go por da.

¹² Wi'ule wech, dox kina'ba lo go, gok go nela da ga', porke por milibe'n Jesukrist, gat niletra' kwa'n nzhab ley kwa'n mila' Dios lo Muisés, no gat kinita' lo go, mile' go tu kwa'n gat lē' lon. ¹³ Lē' go nitsila ka, or milun widi'zh nazhon che'n Jesukrist lo go, or galo laka milune lo go por tu yalyizh kwa'n nguzaka. ¹⁴ Por yalyizh kwa'n nguzaka re', dox mizon zhi'n lo go, no ter sba', nangala't go da, sino ke mile' go kuda nela xmod nile' men kun tu ganj che'n Dios ga', miwi'u lon nela lo Krist Jesús ga'. ¹⁵ Nal, ¿ma rē kwa'n nizak laxto' go ze'? Nin lo go, orze' pas haxta zalo go ngane' go ngakan chi ngana'bai lo go. ¹⁶ No nal, ¿chi niwi'u lon nela lo tu xa' niyi'u nineu por kidizha kwa'n wali re' lo go?

¹⁷ No rē xa' nzhakla le' go rē kwa'n nzhab ley kwa'n mila' Dios lo Muisés, dox kiki'l bixa' go, par gak go nab tsa men che'n bixa'. Per gat walit wen bixa' kun go; nab

tsa nzhakla bixa', kubchi bixa' go lo no. ¹⁸ Wenka le' go xigab, le' go kwa'n nzhakla Dios zilita', no gat lē't nab or nzon kun go, le' go kwa'n wen. ¹⁹ Kun rē go nizaka nela xmē'da ga' por Jesukrist, no nizine laxto'n go, nela yalne che'n tu una' gap mē'd ga'; kure' nizi da por go haxta or gak go, walika tu men che'n Jesukrist. ²⁰ ¿ojla' zon ba' kun go mis nalre'l, par dizha lo go xtu mod, porke naneta xmod len kun go.

Kwent che'n Hagar kun Sara

²¹ Bineu tu kwa'n lon, rē go kwa'n nzhakla, le' ley mandad lo go. ¿Chi nagat gon go kwa'n nzobni' lo ley? ²² Kure' nzobni': Lē' Abraham ngop chop xga'n; tu mē'd ngok xga'n una' kwa'n lē' Hagar, xa' ngok mos kwa'n nguzi' Abraham; no xtu mē'd ngok xga'n Sar, una' kwa'n ngok tsa' pa' Abraham. ²³ Lē' xga'n una' mos ze' ngol nela nzhalka wanei cho men, per xga'n tsa' pa' Abraham ngol por widi'zh kwa'n mila' Dios di'zh lo Abraham. ²⁴ Kwent che'n rop una' re' nak rop kwa'n mila' Dios di'zh. No kwa'n mila' Dios di'zh lo rē men yek yi' Sinai nak nela xga'n Hagar ga', porke ley mile' mandad bixa'. ²⁵ Per or di'zh be kwent che'n xga'n Hagar, kure' nak nela yek yi' Sinai kwa'n ña'n lazhen Arabia, mbaino nak skai nela yezh Jerusalén kwa'n nzho nal, porke mer rē men Israel xa' zhin ze' nal; nak bixa' nela mos nado ga' lo kwa'n nzhab ley. ²⁶ Per nzho xtu yezh Jerusalén kwa'n nile' yibē' mandad, no yezh re' kun rē men nzhin le'ne, gat nile'tra' ley mandad lo bixa', no yezh Jerusalén re' nak plo nzē rē be, no nake nela xna' be ga', ²⁷ porke se' nzobni': Bizak laxto', una' kwa'n nagakt gap mē'd; naye bixizh, lu kwa'n nanet xmod nak yalne che'n una' nzhap mē'd.

Yo más xmē'd una', xa' mila' nzē'b miyi', ke una' kwa'n nzhap miyi'.

²⁸ Sa', wech, nak be nela Isaac ga', xga'n Abraham, xa' ngol por widi'zh kwa'n mila' Dios di'zh. ²⁹ Per lē' xga'n una' kwa'n ngol nela wanei cho men ga', nakap mile' xga'n una' lo mē'd kwa'n ngol por Sprit che'n Dios, no haxta nal stubi nake sa'. ³⁰ Kuze', se' nzobni' lo Yech che'n Dios: "Bichubla dub xin una' kwa'n nak mos ba', porke nagakt ka' xin una' ba' lo mis kwa'n gal xga'n una' kwa'n gat lē't mos ba'." ³¹ Wech, rē be gat lē't xmē'd una' kwa'n nak mos re' be, sino ke lē' be nak xmē'd una' kwa'n gat lē't mos re'.

5

Nala't go ki'l men go, par le' go kwa'n nzhab ley

¹ Naye guzo go lo widi'zh che'n Jesukrist, porke lē' Me ngulo' la be lo kwa'n nile' ley

mandad lo be; kuze' nale'tra' go xtu wêlt rê ley kwa'n mila' Dios lo Muisés.

² Na Pab nin lo go; chi la' go, kē señ kwa'n lē circuncisión kwerp che'n go, nela xmod nzobni' lo ley ga', orze' par go, yentra' kwan zu', kwa'n mile' Jesukrist. ³ Nin xtu wêlt lo go; rê xa' nzhakla kē señ kwerp che'n, rê nak kwa'n nzobni' lo ley kwa'n mila' Dios lo Muisés naki'n le' xa' re'. ⁴ Rē go kwa'n nzhakla, le' rē kwa'n nzobni' lo ley, par gab go, ya'n nambe laxto' go lo Dios, por nak go sa'; nguiubchi la go lo Jesukrist, mbaino tu lad mia'n la go lo rē kwa'n wen kinu Dios. ⁵ Per no, rē xa' nak tutsa kun Krist por kinu no Sprit che'n Dios, no por ñila no widi'zh che'n Dios por Jesukrist, nane no, ña'n nambe laxto' no lo Dios nab tsa por zhi'n nazhon kwa'n nile' Sprit che'n Dios laxto' no. ⁶ Por ñila no Krist Jesús namás, ter kē señ kwa'n lē circuncisión kwerp che'n no, o nakēte kwerp che'n no, kwa'n más tsak par no nak, ñila no Jesukrist, no por kure' nazhi' no tu no kun xtu no.

⁷ Wen dox nzhazē go nez che'n Jesukrist; per nal, ¿chon mila' go, migoch men yek go?, nanetra' go ban go xmod nzhakla Jesukrist, ⁸ porke rē xa' kwa'n kitse'd go xtu mod ba', gat lē't Dios mixé'l bixa', porke Dios ngurez h la go gak go men che'n Me. ⁹ Rē widi'zh mbēl che'n rē men ba' nak nela levadur ga'; ter tlē' win tsa levadur per nitsibeche dub ko'b narín (widi'zh re' gab, ter tutsa kwa'n mbēl nzhoxid rē kwa'n wali, orze' rēi ninu tuli). ¹⁰ Por nak be tutsa kun Jesukrist, kuze' nanen, lē' go ñila ka nela xmod ñilan ga'; per rē xa' kwa'n kile' par le' go chop xigab ba', lē' Dios zakzi bixa', wanei choi.

¹¹ Ka wi'ule wech, chi lē'i wali stubi nidizha kē señ kwa'n lē circuncisión kwerp che'n men, orze' yentra' por kwan gakla rē men Israel zakzi da, chi lē'da wali nidizh sa'; mbaino nayi'tra' bixa' gon bixa' or dizha, lē' Jesukrist ngut lo krus par ya'n nambe laxto' be lo Dios. ¹² No rē xa' kiki'l go ba', par kē señ kwa'n lē circuncisión kwerp che'n go, joj mis lē' bixa' cho' dub plo naban bixa' tuli!

¹³ Rē go wech no bizan, ngurez h Dios go par ngulo' Jesukrist go lo ley kwa'n mila' Dios lo Muisés, per go bikina go go; nagabt go por nguro' go lo ley, gak le' go kwa'n nzhakla go. Kwa'n naki'n le' go nak, goknu go tu go kun xtu go kun yalnazhi', ¹⁴ porke men xa' nazhi' xtu men nela lē'ka xa', rē ley kwa'n mila' Dios lo Muisés kile' xa' re'. ¹⁵ Per chi zublo le' go nela ma nzhao men ga', orze', jlo mis go lo'x tu go kun xtu go!

Kwa'n nzhakla kwerp che'n men le' men, mbaino kwa'n nzhakla Sprit che'n Dios le' men

¹⁶ Nal nin lo go, biban go nela xmod nzhakla Sprit che'n Dios, no nabantra' go

nela xmod nzhakla kwerp che'n go, ¹⁷ porke rē kwa'n nina'b kwerp che'n men yizhyuo re', gat nizhē'lte kun rē kwa'n nzhakla Sprit che'n Dios, no se'ska, rē kwa'n nzhakla Sprit che'n Dios gat nizhē'lte kun rē kwa'n nzhakla kwerp che'n men yizhyuo. Kuze' nagakt le' go kwa'n nzhakla kwerp che'n go. ¹⁸ Per chile' go kwa'n nilu' Sprit che'n Dios lo go, orze' gat naki'ntra' le' go kwa'n nzobni' lo ley.

¹⁹ No nakbe' rē xa' nile' pura kwa'n nzhakla kwerp che'n namás: niban bixa' kun xa' gat lē't tsa' bixa', nile' bixa' kwa'n nakap, no niban bixa' loi. ²⁰ Kinu bixa' rē winab no nina'b bixa' kwa'n nizak men, no niyi' bixa' nine bixa' men, no gat nichē'lt bixa' kun men, no nigo bixa' xian laxto' bixa' por kwa'n kinu xtu men, no dox nayi'yē bixa', mbaino lambid bixa', no nagakt kwin bixa' junt kun men, mbaino xtu mod ñila bixa' Dios. ²¹ No nu niwix bixa' kwa'n nak che'n xtu men, no nzhut bixa' men, no nikizē bixa' kiziyo bixa'i, mbaino nile' bixa' más rē kwa'n gat lē'; pwes lē'da ni la lo go, rē xa' nak sa', nayot bixa' plo nile' Dios mandad.

²² Per xa' nile' kwa'n nzhakla Sprit che'n Dios, se' niban bixa': nzhak nazhi' xa' xtu men, no nizak laxto' bixa', no yent kun cho nidil bixa', no gat niyi't bixa' lwega'; nzhaknu bixa' men, no wen laxto' bixa', no nile' bixa' kwa'n ña'n bixa' di'zh, ²³ no nado' bixa', mbaino nika'n bixa' lo rē kwa'n nzhakla kwerp che'n bixa'. Ni tu ley nagakt gab: "Gat lē't kwa'n kile' xa' re'." ²⁴ No rē men xa' ñila widi'zh che'n Dios por Jesukrist, gat nile'tra' bixa' rē kwa'n gat lē' kwa'n nzhakla kwerp che'n bixa', ²⁵ porke lē' Sprit che'n Dios mitsumbe la laxto' be, kuze' ñal ka gon be ro' Dios por Sprit che'n Me.

²⁶ Nagakt be men marian, no ni nakixian be xtu men, no ni nako be xian laxto' be, mbaino ni nawix be gap be kwa'n kinu xtu men.

6

Goknu go tu go kun xtu go

¹ Wech, chi niwi' go nzho tu men che'n Jesukrist xid go, no ngwaga' xa' mile' xa' tu kwa'n nayi' par lo Dios, orze', rē go xa' más nzho Sprit che'n Dios laxto', bidi'zhnu go xa', no goknu go xa' par zo xa' wen lo Dios; per chul bidi'zh go lo xa', no mis go bikina go go par nazak go nela lē' xa'. ² Goknu go rē guchin go lo rē kwa'n nizak xa', nes par le' go rē widi'zh kwa'n nak ley che'n Krist.

³ No chi nzho tu xa' nile' xigab, lē' xa' más tsak xid go, no chi niyent kwan nak xa' xid go; lo mis lē' xa' kikide xa'. ⁴ Kad men naki'n wi' xa', xmod naban xa' lo Dios, no chi kile' ka xa' kwa'n nzhakla Dios, orze' ñal ka zak laxto' xa' por lē'i; per nachē'lalt xa' xa' kun

xtu men, par nagab xa' nabei cho más wen kile'. ⁵ Kad men, lè' men wane xmod nak men lo Dios.

⁶ Xa' kwa'n kitse'd widi'zh nazhon che'n Dios, naki'n gaknu xa' men kwa'n kilu' widi'zh che'n Dios lo xa', kun che'p rè kwa'n kinu xa'.

⁷ Nala't go kide men go, porke yent cho gak kide Dios: Rè ta' tu kwa'n nzha'n men, no or nikan xa'i, más nayaxe nikan xa', mbaino mis lè' skai. ⁸ Kuze', rè xa' kwa'n nile' rè xigab kwa'n nzhakla kwerp che'n xa', por rè xigab ba' namás lè' xa' gat lo Dios; no rè xa' kwa'n nile' rè kwa'n nzhakla Sprit che'n Dios, por lè'i lè' xa' ban par dubta' lo Dios. ⁹ Gat ñalt yazha be, le' be kwa'n nzhakla Dios, dub tiemp naban be, porke lè' Dios ne' tu kwa'n wen ka' be, or zhin zhè ne' Dios kwa'n gal be. ¹⁰ Kuze', zilita' kwa'n gak le' be, le' be kwa'n wen kun rè men, per galo laka kun rè men che'n Jesukrist le' bei.

Lult kwa'n midì'zh Pab

¹¹ Biwi' go, letr kwa'n mikè'n lo go, letr roi, no mis na mikè'i. ¹² Rè xa' kwa'n kiki'l go, par kè señ kwerp che'n go kwa'n lè circuncisión, kile' bixa'i namás par ya'n bixa' wen kun rè men; sa' nile' bixa' par nagab men Israel, nu bixa' ñila, ngut Jesukrist lo krus por rè men. ¹³ No lè' bixa', ter nikè' señ bixa', per gat nile't bixa' kwa'n nzobni' lo ley; per nzhakla bixa' kè señ kwerp che'n go, namás par di'zh bixa' lo men, lè' go nak men che'n bixa'. ¹⁴ Per nase, ni tu kwa'n gat nzhaklata' yèt da wen. Nabtsa kwa'n nzhaklan di'zh men, lè' da ñila, ngut Jesukrist lo krus, Me kwa'n nile' mandad da. No por kure', rè kwa'n nzho yizhyuo re', lè'i ngut la lo krus por da, no haxta na ngut la da par yizhyuo re'. ¹⁵ No par rè be, xa' nak tutsa kun Jesukrist, nawi't be chi nikè señ be, o gat nikète; par be, kwa'n más tsak nak be xtu men por ñila be Jesukrist. ¹⁶ Rè men xa' nzhon rè widi'zh re', mbaino naban xa' loi, kina'ba lo Dios, ya bixa' wen, no lats laxto' Dios bixa', porke rè men xa' naban sa', walika men Israel che'n Dios bixa'.

¹⁷ Lult kwa'n kinin, di re' par dilant, ni xtu men gat nzhaklatra' kixian da, porke nikè rè ndi'b kwerp da plo mizakzi rè men da, namás por nak da tu men nguzi' Señor Jesukrist.

¹⁸ Rè go wech no bizan, lè' Señor Jesukrist gaknu go kun Sprit che'n Me. Sa' gake.

Yech kwa'n mixë'l San Pab lo rè men che'n Jesukrist xa' nzho yezh Efeso

Ma go wech no bizan, ¿chi wen ka go?

¹ Na Pab, nak da tu apost, tu xa' mixë'l Krist Jesús, porke sa' ngokla Dios gak; mixëla yech re' lo rè go, xa' nzho yezh Efeso, rè go xa' ñila widi'zh che'n Jesukrist, mbaino nambe naban go lo Dios, dike xmod nzhakla Me. ² Kina'ba lo Xuz be Dios, no lo Señor Jesukrist Me nile' mandad be, par gaknu Dios go, mbaino le' Me zi go chul dizde le'n laxto' go.

Rè kwa'n wen nine' Dios ka' be por nak be men che'n Jesukrist

³ ¡Ñal rè men di'zh dox nazhon Dios, Me nak Xuz Señor Jesukrist, Me nile' mandad be! No por nak be men che'n Jesukrist, mine' Dios rè kwa'n wen ka' be, kwa'n kinu Dios lo yibë'. ⁴ Antis di ko Dios yizhyuo, lè' Dios ngule la be, par gak be men che'n Krist, mbaino gak be men xa' nambe laxto', no xa' gat nzë'b xkit, lo Dios. ⁵ Por nazhi' Dios be, sa' ngol laxto' Dios, mile' Dios, ngok be xmë'd Dios por Jesukrist; porke sa' mbi'd yek Dios, mile' Dios, no nguio laxto' Diose. ⁶ Sa' mile' Dios, nes par rè men di'zh rè kwa'n wen kwa'n nak Dios, rè kwa'n mine' Dios ka' be, por nak be men che'n Jesukrist, Me kwa'n nazhi' Dios. ⁷ Por nak be men che'n Jesukrist, kuze' rè kwa'n ngok be nzhala, nale'tra'i gan wei'ye be par le'ra' be kwa'n gat lè', no miche' Me rè kwa'n nzë'b xki be, por ren kwa'n mixo Jesukrist or ngut Me por be. ¡Dox kwa'ro kwa'n nilats laxto' Dios be! ⁸ Kuze', ni nagakra' di'zh be, haxta plak nazhi' Dios be por tanta kwa'n mile' Me por be, por dox nzhak Me no nane Me. ⁹ Mile' Dios, milibe' be rè kwa'n kinu Dios naga'ch, kwa'n nzhakla Dios gak por Jesukrist. ¹⁰ No rè kwa'n mile' Dios xigab re', or gal tiemp kwa'n mizo Dios, lè' rè kwa'n nzho lo yibë', mbaino rè kwa'n nzho lo yizhyuo, tutsa junt zhin Diose lo Jesukrist par le' Me mandade.

¹¹ Dizde nzhala, ngule Dios be par ne' Me rè kwa'n mile' Me xigab ka' be, por nak be men che'n Jesukrist. Sa' ngol laxto' Me le' Me kun be. ¹² Mbaino, rè no men Israel, ngok rè xa' galo laka xa' ñila, lè' Dios za' yalnaban kwa'n nayot lox ka' men por Krist, nes par galo laka no ngok xa' midì'zh, ¡lè' Dios dox nazhon mbaino wen! ¹³ No rè go, xa' gat lè't men Israel, mizhin go, ngok go men che'n Dios por mbin go rè widi'zh che'n Dios por Jesukrist, rè widi'zh kwa'n nile' nizak laxto' men, kwa'n mine' yalnaban ka'

go or ngwayila go Krist. No rè be xa' ngwayila widi'zh re', Dios mikë' tu señ be kun Sprit che'n Me; kure' nak par nakbe' be, lè' be men che'n Dios, nela xmod mila' ka Dios di'zh. ¹⁴ Por nzho Sprit che'n Dios laxto' be, nane be, lè' be ka' kwa'n mila' Dios di'zh, za' Dios ka' rè men che'n Dios. Kuze', rè kwa'n ngok be nzhala, nale'tra'i gan wei'ye be par lè' be kwa'n gat lè', porke lè' be men che'n Dios. Rè men ñal di'zh, ¡lè' Dios dox nazhon, mbaino dox wen!

Kina'b Pab lo Dios por rè men che'n Jesukrist, xa' nzho yezh Efeso

¹⁵ Or mbina, lè' go ñila widi'zh che'n Señor Jesukrist, mbaino lè' go nazhi' rè men che'n Dios, por kure', no más rè kwa'n midizha galo, ¹⁶ dubta' nizan xkix lo Dios por go, no nizeta go lo Dios or nina'ba lo Me. ¹⁷ Dubta' nina'ba lo Dios, Me nazhon no Me nak Xuz Señor Jesukrist, par ne' Sprit che'n Dios yalnazon ka' go, par libe' go xmod nak rè kwa'n naga'ch kwa'n kinu Dios, no par ne go xmod pa' nak Dios. ¹⁸ No nu kina'ba, par zini Me yek go, par ne go, xmod nak kwa'n kimbëz go re', kwa'n ngurezh Dios go re', par ne go, dox tsak, mbaino dox kwa'ro kwa'n mila' Me di'zh, za' Me, ka' rè men che'n Me, ¹⁹ porke Dios nzhakla ne go, dox kwa'ro yalnazon kwa'n kinu Dios par nzhaknu Me be, por nak be men che'n Dios. ²⁰ Lo mis yalnazon re' mile' nguruban Jesukrist, no nu milë'i nguzob Jesukrist lad direch che'n Dios lo yibë', ²¹ par dizde ba', mile' Dios, lè' ga' ka Jesukrist kinu yalnazon par le' mandad lo rè nak mbi mal, mbaino lo rè nak ganj kwa'n kinu poder par nile' mandad; mbaino lo rè xa' laore yo. ²² No rè kwa'n nzho michi Dios xan ni' Jesukrist, mbaino mizo Dios Jesukrist lo rè men che'n Dios, par lè' Jesukrist le' mandad lo rè bixa', nela xmod nile' yek men mandad lo dub kwerp che'n men, ²³ nes par be, xa' nak men che'n Krist, nak be nela kwerp che'n Me, par lox tsa be rè kwa'n nzhak jwalt le' Krist yizhyuo re'; no se'ska Krist nitsa kwa'n nzhak jwalt lo más rè kwa'n nzho.

2

Por nazhi' Dios be, mine' Me yalnaban kwa'n nayot lox ka' be

¹ No go, galo ngok go nela rè men ngut ga' lo Dios. Or miban go nzhala ze', nzë'b xki go lo Dios, mile' go rè kwa'n gat lè'. Dub nak go sa', mine' Dios yalnaban par dubta' ka' go. ² Nzhala ze', nikizë go lo rè kwa'n gat lè' kwa'n nzho yizhyuo re'; mile' go rè che'n Mizhab, xa' kwa'n nile' mandad lo rè mbi mal kwa'n gat nilu't lo rè men, no haxta zhë nalzhë re', rè mbi re' nile' gat nzhont men ro' Dios. ³ Sa' ngok be nela rè men

ba', porke xigab che'n be ngok nela rè xigab kwa'n nile' men yizhyuo re', xa' gat nzhont ro' Dios. Mile' be rè kwa'n ngokla be, no rè kwa'n ngokla kwerp che'n be. Ngadedt lè' Dios ngazakzi be por ñal bei, nela xmod ñal rè men yizhyoi. ⁴ Per por dox nilats laxto' Dios be, mbaino por dox nazhi' Dios be, ⁵ dub nak be nela men ngut ga' lo Dios, por kwa'n nzè'b xki be lo Me, mbaino dub sa' nak be, mile' Dios nguruban be, tutsa kun Krist. Por milats laxto' Dios be, ngulo' Dios be lo rè kwa'n nazhe'b kwa'n nzadkè tich be. ⁶ Por nak be tutsa kun Jesukrist, Dios mile' nguruban be nela Krist Jesús ga'; no nu mile' Dios, lè' be nzob la kun Krist lo yibè'. ⁷ Dios mile' kure', par milu' Dios lo rè men, xa' laore yo yizhyuo re', dox kwa'ro kwa'n nilats laxto' Dios be, por kwa'n nazhi' Dios be re', nilu' kwa'n mile' Dios por be por Krist Jesús. ⁸⁻⁹ Por milats laxto' Dios go, mine' Me yalnaban ka' go par dubta' por ngwayila go Dios namás; gat lè't por yub goi, no ni gat lè' por zhi'n wen kwa'n mile' yub goi, sino ke ka mine' ka Diose ka' go, nes par niyent cho di'zh, no niyent cho zi marian. ¹⁰ Nabtsa Dios mile' nak be xtu men por nak be tutsa kun Krist Jesús, kuze' ñal ban kad be lo rè zhi'n nazhon kwa'n mile' la Dios xigab dizde nzhala ban kad be.

Tutsa nak rè be por Jesukrist

¹¹ Nal bitsila go, xmod ngok go galo. Gat lè't men Israel go. Nayax men Israel nize't bixa' go, lè' go nak xtu ben men zit, xa' gat nakbe't, por gat nikè señ kwerp che'n go kwa'n nikè rè men Israel; no señ re', mis men nikè'i bixa'. ¹² Chi tiemp ze', gat nilibe't go Jesukrist, no ni gat nakbe' go por men che'n Dios. No ni naga libe' go, rè kwa'n mila' Dios di'zh, mbaino ni naga le' go xigab, lè' Dios gaknu go, no ni nangayi' de yek go, libe' go Me nak walika Dios yizhyuo re'. ¹³ Per nal, por nak go tutsa kun Krist Jesús, go xa' kwa'n nguzo zit lo Dios, nal gax nzo go lo Dios, por ren kwa'n mixo Jesukrist or ngut Me por go, ¹⁴ porke mis Krist mile', chul nguzhin men Israel kun men xa' gat lè't men Israel; kun mis kwerp che'n Me, michil Me kwa'n ngok nela tu mur ke ga' kwa'n nzhogarol sao' rop ben men re', kwa'n mile', ngabint bixa' tutsa. ¹⁵ Por ngut Krist por be, gat naki'ntra' le' be rè kwa'n nzobni' lo ley, kun más rè kwa'n nile' rè men Israel, kwa'n nile', niyi' rè men Israel nine' rè xa' gat lè't men Israel. Yub Jesukrist mile' nguzhin be chul, nes par mile' Dios ngok be tutsa ben men, mbaino ngok be xtu men mbaino mial la laxto' be tu be kun xtu be. ¹⁶ Por ngut Krist lo krus, mile' Me nguzhin rop ben men re' chul, nes ngok be tutsa ben men por nak be xtu men, no nguzubi be lo Dios por Jesukrist, nes par nayi'ra' be ne be wech be.

¹⁷ Kuze' mbi'd Krist, par midizh Me xmod ché' men kun Dios; par rè xa' gat lè't men Israel, xa' nzo zit lo Dios, mbaino par rè men, xa' nakmen Israel, xa' nzo gax lo Dios. ¹⁸ Por Krist, mine' Dios Sprit che'n Me nzho laxto' be; kuze' rè be gakzubi lo Dios Xuz be, rè no xa' nak men Israel, mbaino rè go, xa' gat lè't men Israel. ¹⁹ Kuze' rè go, xa' gat lè't men Israel, gat lè'tra' men zit go, nal lè' go nakbe'; mbaino tutsa plo nzè go kun rè men che'n Dios, no melizh go bixa'. ²⁰ No nu nak be nela tu yado' kwa'n nzhakxao' lo tutsa simient ke, no simient ke re' nak rè apost, kun rè profet xa' tiemp, xa' midizh por Dios; mbaino Krist Jesús nak ke galo laka kwa'n nzen dub simient che'n yado' re'. ²¹ No Jesukrist nalazh dub yado' re', no lè' Me kichao' we par yaloi, nes gake tu plo nazhon, mbaino nab tsa par Diose. ²² Por nak go tutsa kun Krist, nu go nak nela tu ke che'n yado' re', par nzhaknu go nzhakxao' we kun más rè xa' nak nela ke ska, porke go nak yado' plo nzho Dios por Sprit che'n Dios, Me nzho laxto' go.

3

Mizo Dios Pab par lu' xa' widizh che'n Dios lo men xa' gat lè't men Israel

¹ Por rè kure', na Pab, nzhò'n lizhyi'b por nilun widizh che'n Krist Jesús lo go, xa' gat lè't men Israel. ² No nanen, lè' go mbin la, por wen Dios, mizo Dios da par dizha lo go rè widizh nazhon kwa'n kinu Dios par go, par ya go wen. ³ Lè' Dios milu' lai lon, kwa'n naga'ch kwa'n kinu Dios; rè kure' midizhla che'p lo yech kwa'n mixèla lo go ze'. ⁴ No or go'loi goi, orze' za' go kwent, lè'da nane la xmod nak xigab naga'ch che'n Jesukrist. ⁵ Kwa'n kinu Dios naga'ch re', dizde rè tiemp galo, mbaino yent cho men gat nei. Per nal, por Sprit che'n Dios, mile' une rè aposte, no une rè profete, rè xa' midizh por Dios. ⁶ No widizh naga'ch re' nak: Rè men, xa' gat lè't men Israel, nu bixa' ka' rè kwa'n nazhon kwa'n mila' Dios di'zh ka' rè men Israel, no tutsa ben men ngok bixa' kun men Israel, rè xa' kwa'n ngwayila widizh nazhon che'n Krist Jesús.

⁷ Nilun widizh nazhon re' lo men, gat lè't por wen dai, sino ke por dox wen Dios, no por milats laxto' Dios da. Nzhak nilen zhi'n nazhon re', porke Dios nile' nzhak nilene. ⁸ Ter natsakta' be's xid rè men che'n Dios, per Dios ka mile' nzhak nilen kure', mbaino ka mine' Dios yalnazhon re' kan, par dizha widizh che'n Me lo rè xa' gat lè't men Israel, par ne bixa' rè kwa'n ni nagak zobyek men, rè kwa'n nazhon kwa'n kinu Krist. ⁹⁻¹⁰ Zhi'n nazhon kwa'n nilen re', nak, par ne rè men, xmod nile' Dios zhi'n nazhon che'n Me, por rè xigab naga'ch kwa'n kinu Dios dizde or

galo laka, Dios Me ngulo rë kwa'n; no por mile' Dios, nguzhin men chul, men Israel kun xa' gat lë't men Israel, ne rë xa' nile' mandad lo yibë', no rë xa' gat nile't be's mandad lo yibë', tse'd bixa' rë kwa'n kile' Dios nal re'. ¹¹ Nela xmod mile' Dios xigab gag dizde or galo, Dios mile' ngok kure' por Krist Jesús, Me nile' mandad be. ¹² Por nak be tutsa kun Krist, por ñila be widi'zh che'n Me, yent kwan nika yo be haxta plo nzob Dios, no nane be, lë' Dios nzhon kwa'n nina'b be lo Me. ¹³ Kuze', dox kina'ba lo go, ter kide'da nayax kwa'n nalats por nilun widi'zh nazhon che'n Dios lo go; nagabt go por kuba', la' go nez che'n Jesukrist. Más wen bizak laxto' go; rë kwa'n kizaka re', lë'i nak par ya go wen.

Dox kwa'ro yalnazhi' che'n Krist kun be, yent cho gag chë'lale

¹⁴ Por kure', nizuxiba lo Dios Xuz be, ¹⁵ Dios Me nile', xmod nak mbaino xmod lë kad ben men, xa' nzho lo yibë' no lo yizhyuo. ¹⁶ Kina'ba lo Dios, por Sprit che'n Dios, mbaino por rë kwa'n nazhon che'n Dios, le' zi go dizde le'n laxto' go, jwers che'n Dios par xek go lo rë kwa'n gat lë'. ¹⁷ No nu kina'ba, par más le' Krist mandad le'n laxto' go por ñila go widi'zh che'n Me; mbaino kina'ba lo Dios, par lo rë nak kwa'n le' go, le' goi por nazhi' go Dios, mbaino por nazhi' go xtu men, ¹⁸ nes par lal gag zobyek go, kun más rë men che'n Dios, xmod pa' nak kwa'n nazhi' Krist go; plak naxene, no plak no'le, mbaino plak na'che, no plak di yai. ¹⁹ Ter yent cho gag zobyek dub xmod nak kwa'n nazhi' Krist be, kina'ba lo Dios, nes par libe' go, xmod ka nak kwa'n nazhi' Krist go re', par ro'b go lo rë kwa'n nak che'n Dios.

²⁰ Dios nzhak nile' rë kwa'n más kwa'ro lo rë kwa'n gag na'b be lo Dios, no ni nagak le' be xigab kwan pa' nzhak nile' Dios. Nile' Dios rë kure' por yalnazhon che'n Me kwa'n nile' kwa'n xid be. ²¹ Por dub tiemp che'n rë tiemp, ñal di'zh men dox nazhon Dios por rë kwa'n nile' Me xid rë men che'n Me, no por rë kwa'n nile' Me por Krist Jesús! Sa' gake. Amén.

4

Tutsa kwerp nak be por Sprit che'n Dios

¹ Por rë kure', nzho'n lizhyi'b re' por nilen zhi'n che'n Jesukrist, dox kidizhnun go, par ban go nela xmod ñalkai, dike xmod nzhakla Dios gag go or laore ngurezh Me go. ² Gok go men nado' laxto', no men wen, mbaino gop go pasens; no por nazhi' go bixa', bixek go lo más rë men che'n Jesukrist, rë xa' kwa'n gat nakt tutsa kun go. ³ Lë' Sprit che'n Dios nile', nibin go chul tu go kun xtu go, nes par gag go tutsa. Kuze', bile' go rë kwa'n gag le' go par se'gaka kwín go chul, nes dubta' gag

go tutsa. ⁴ Nela xmod nak rë be men che'n Jesukrist, kuze' tutsa kwerp che'n Krist nak be, no tutsa Sprit che'n Dios nzho laxto' be. No se'ta' mila' Dios di'zh ka' be tutsa kwa'n wen, no por kure', ngurezh Dios be gag be men che'n Me. ⁵ Mbaino nzho tutsa Señor Jesukrist, Me nile' mandad be, no nab tsa por ñila be widi'zh che'n Me, kinu be yalnaban par dubta' lo Dios, mbaino nab tsa por nak be men che'n Me, nzhaklë'i be le'n nits. ⁶ No nu nzho tutsa Dios Xuz be, Me nile' mandad lo rë be, Me nile' rë zhi'n nazhon che'n Me por rë be, mbaino nzho Me laxto' kad be.

⁷ No mile' Krist tu kwa'n nazhon kun kad be, mizini Me yek be par gag kë be zhi'n kwa'n mile' Krist xigab ne' Me par kad be.

⁸ Kuze', se' nzobni' lo Yech che'n Dios:

Or nkili Me plo más al ya plo nzob Me, nile' Me mandad,

mbiy' Me rë xa' kwa'n mile' Me gan lo, orze' ka miza' Me nayax kwa'n nazhon ka' nayax rë men che'n Me.

⁹ No nal, ¿kwan gab widi'zh re': "Nkili Me plo más al ya"? Widi'zh re' gab, galo laka ngula Me yizhyuo re', haxta plo más na'ch.

¹⁰ No Me ngula plo más na'ch, lë'gaka Me re' nkili plo más al ya lo yibë', nes par zo Me, le' Me mandad lo rë kwa'n nzho. ¹¹ Lë' Krist mile' nguio rë xa' nak apost, xa' yub Krist mixë'l par kë bixa' zhi'n che'n Me nela lë' Me ga'; no nzho men mile' Krist nak profet, xa' nidi'zh por Dios; no nzho men mile' Krist, nikizë nidi'zh widi'zh nazhon che'n Dios; mbaino más men mile' Krist nzhak pastor, xa' nizo lo rë men che'n Dios, no ngulo Krist rë xa' nilu' xmod nak widi'zh che'n Dios.

¹² Mile' Krist kure', nes par yo rë men che'n Dios xa' nilu' rë kwa'n nazhon che'n Dios, par le' bixa' rë zhi'n kwa'n nzhakla Krist, nes par ro'b rë men che'n Dios, rë xa' kwa'n nak kwerp che'n Krist, lo rë kwa'n nak che'n Me. ¹³ Ñal gag rë zhi'n re' haxta or zhin zhë, gag be tutsa lo kwa'n ñila be, mbaino libe' be xmod nak Xga'n Dios, orze' gag be nela tu men ro ga' lo rë kwa'n nak che'n Dios, no gag be nela Krist ga'.

¹⁴ Orze' nagakt be nela tu bark win kwa'n nichixche bol che'n nitsdo' rë lad ga', nela xmod nizak rë xa' nak nela tu më'd win ga' por nazu' xa' be's widi'zh che'n Dios; sa' nizak bixa' por dox naxen bixa', nila' bixa' nikide rë men nikizë nez gat lë' bixa' kun xigab yek men. ¹⁵ Kuze' más wen, di'zh be rë widi'zh nazhon che'n Dios, no chizhi' be rë wech be men che'n Jesukrist, nes par ro'b be lo rë kwa'n nazhon che'n Krist, Me nile' mandad be. ¹⁶ No nile' Krist nibin rë men che'n Me chul, no gat naya't bixa' le' bixa' kwa'n ñal le' kad bixa', por tutsa nak bixa'; no or kad bixa' nile' xmod ñal kai, orze' más ñar bixa' por nazhi' bixa' wech bixa'.

Xmod ñal ban xa' nak men che'n Jesukrist

¹⁷ Kuze' nin lo go, por nak da tu xa' mixê'l Jesukrist par le' mandad lo go, ke nabantra' go nela rê xa' gat nilibe't Dios, rê xa' naban nela xa' niyent xigab ga'. ¹⁸ Nakao nak yek bixa', mbaino zit nzo bixa' lo Dios, Me niza' yalnaban ka' men, no gat nize'nt bixa' nzo bixa' lo rê kwa'n gat lê', no ni nane bixa' libe' bixa' Dios. ¹⁹ Gat nitulatra' lo bixa' nile' bixa' rê kwa'n nzhakla kwerp che'n bixa', no kure' nzhuwe'i'ye bixa' lo rê kwa'n gat lê', no gat ñazhat bixa' nile' bixa' rê kwa'n gat lê' re'. ²⁰ Per go, gat lê't kuba' mitse'd go lo widi'zh che'n Krist. ²¹ Na nane ka, nguio ka cho milu' rê kwa'n nak che'n Krist lo go, rê widi'zh kwa'n walika milu' Me par mitse'd go ban go nela lê' Me. ²² Kuze', bila' go rê mod go'x ba', rê kwa'n ngolun go ba'; rê kwa'n nilu' chigab wene por nina' b' kwerpe, per nile'i' par nzhata go lo Dios. ²³ Mbai nal, bila' go, chê' Dios laxto' go no xigab che'n go, gake tu kwa'n kub do' laka, ²⁴ nela tu xa' nzhak tu lar kub ga', porke Dios mile' nak go xtu men nela lê' Me ga'. Sa' nak go por naban go tutsa kun Jesukrist, Me nile' rê kwa'n nzhakla Dios mbaino miban Me lo yizhyuo re' nab tsa par Dios.

²⁵ Ya nadi'zhtra' go kwa'n mbêl, sino pura kwa'n wali bidi'zh tu go lo xtu go, porke rê be nak tutsa kwerp che'n Krist.

²⁶ No chi kixiant tu men go, nayi't go ne go xa', no nakuchao't go xian laxto' go dub zhê, par nazê'b xki go lo Dios. ²⁷ Nala't go kide Mizhab go, kun ni tu kwa'n.

²⁸ Men nikizê niliwa'n, ya naliwa'ntra' xa'; neka ñal kê xa' zhi'n kun ya' xa' par le' xa' gan kwa'n gao xa', nes par gaknu xa' rê xa' kwa'n naki'n gaknu men.

²⁹ No gat ñaltra' ro' rê widi'zh nakap ro' go, sino bidi'zh go chul, nes par zu'i par xtu rê xa' gone. Dox naki'n kure', nes par rê xa' gon widi'zh che'n go, más ya bixa' wen, no ro'b bixa' lo che'n Dios. ³⁰ No nale't go kwa'n le' win laxto' Sprit che'n Dios, Me nile' nilu', nak go men che'n Dios, Me kwa'n walika nikina go, haxta zhê lult kwa'n wei' Dios go lo yibê'.

³¹ Bizubchi go rê kwa'n gat lê' lo go: Rê xian kwa'n niguchao' go laxto' go por xtu men; no rê yalnayi' kwa'n kinu go, rê kwa'n nichê'ryo' go kun men, no rê kwa'n niye go men; mbaino bila' go más rê kwa'n gat lê' nile' go; ³² sino ke gok go wen kun men, no bilats laxto' go tu go kun xtu go; mbaino biya'l laxto' go kwa'n nile' xtu men lo go, nela xmod mia'l laxto' Dios, no miche' Dios rê kwa'n nzê'b xki go lo Dios, por kwa'n mile' Krist por go.

5

Biban go nela xmê'd Dios ka

¹ Bikwa'n go xmod gak go nela Dios ga', porke xmê'd Dios go, no nazhi' Me go. ² Lo rê kwa'n le' go, bile' goi por nazhi' go rê men, nela nazhi' Jesukrist be, or miza' Me kwerp che'n Me, ngut Me lo krus, no ngok kwerp che'n Me nela tu gon ga' kwa'n nilazhya'l men, no rê zhen ze' nguio laxto' Diose.

³ Kuze', per ni gat ñal yê't kure' xid go, rê go niban kun xa' gat lê't tsa' go, no per ni xtu rê kwa'n nakap kwa'n nile' go; no per ni nawix go kwa'n nak che'n xtu men, porke rê kuba' gat nile't men che'n Dios, rê xa' nambe laxto'. ⁴ No ni gat ñalt, ro' widi'zh kwa'n nile', nitula men ro' go; no ni nadi'zh go widi'zh yent yek; no ni rê widi'zh markeriad; porke gat ñalt di'zh go rê kuba'. Más wen biza' go xkix lo Dios rê or; ⁵ porke naki'n ne go kure'; no walika, rê xa' niban kun men xa' gat lê't tsa' xa', o rê xa' kwa'n nile' kwa'n nakap, o rê xa' ti jwers nzhakla gap más kwa'n, lal nak rê xa' re' kun rê xa' nizuxib lo rê winab. Rê xa' nak sa' nayot bixa' plo nile' Krist mandad, plo kinu Dios kwa'n gal rê men che'n Me. ⁶ Nala't go kide men go kun widi'zh yent yek; porke walika, por rê kuba', lê' Dios zakri rê xa' gat nzhont ro' Dios. ⁷ Kuze', ni gat ñalt chê'l go kun rê men nak sa'.

⁸ Nzhala ze', nakao nikizê go; per nal, por milibe' go Krist, no mizini Me yek go, naki'n kizê go lo biani che'n Me, ⁹ porke rê xa' nikizê lo biani che'n Dios, nile' bixa' rê kwa'n wen no rê kwa'n nzhakla Dios, mbaino pura kwa'n wali nidi'zh bixa'. ¹⁰ Bitse'd go le' go kwa'n ño laxto' Dios Me nile' mandad be. ¹¹ Zhê'ltra' kizê go kun rê men xa' nile' rê kwa'n yent yek; nile' bixa' rê kure' por nakao nak yek bixa'; neka gulo' go rê kwa'n nak bixa' al tich, guzh goi lo bixa', ¹² porke haxta nitula met di'zh met rê kwa'n nile' bixa' xla'n, ¹³ per or niro' rê kure' al tich, orze' niza' men kwent xmod nake; no or ñani lo tu kwa'n nax lo nakao, orze' nine men kwane. ¹⁴ Kuze', se' nzobni' lo Yech che'n Dios:

Wena-wen bile' xigab,
no nagaktra'l nela tu men naxnaa ga',
por nikizêl nez kwa'n wei'yal lo yalgut.
Más wen bila' zini Krist yekal,
nes par gak ro'l lo rê kuba'.

¹⁵ Kuze' biwi' go xmod ban go; nabant go nela tu men yent kwan nizobyekt ga'; sino ke gok go nela rê men natsin, xa' nzhak kwa'n wen. ¹⁶ Gor gak le' go tu kwa'n wen, bile' goi, porke rê timp nal re', dox nakap kwa'n nile' men. ¹⁷ Kuze', nagakt go nela tu men yent kwan nizobyek ga'; neka bile' pa' go par wi' go kwan nzhakla Dios le' go, ¹⁸ no nazuzht go par nawei'ye go lo rê kwa'n gat ñal; más wen bila' go, wei' Sprit che'n Dios go lo rê kwa'n wen. ¹⁹ Or nibin go, bidi'zh go lo tu go kun xtu go, rê kwa'n nzhak Salmos,

no xmod nzhap rë himnos, mbaino rë kant che'n Dios; no gat lè't nab kun ro' go kè' go kant, sino ke dizde le'n laxto' go ñal ro'i par Dios. ²⁰ No rë gor biza' go xkix lo Dios Xuz be, wanei kwan nizak go, por nak go men che'n Jesukrist.

Xmod ñal ban be lo Dios kun rë xa' lizh be

²¹ Bin go ro' tu go kun xtu go nes par nilu', nzhon go ro' Krist.

²² Rë go una' xa' nzhap tsa', naki'n gon go ro' tsa' go nela xmod nzhakla Krist ga', ²³ porke yek miyi' rë kwa'n, kuze' lè' miyi' nile' mandad lo una' che'n xa', nela Krist nile' mandad lo rë men che'n Me, porke lè' Me miche' kwa'n nzè'b xki bixa', rë xa' nak kwerp che'n Me. ²⁴ No nela xmod ñal gon rë men che'n Krist ro' Krist no le' bixa' rë kwa'n nzhap Me, se'ta' naki'n gon rë una' rë kwa'n gab xmiyi' bixa'.

²⁵ Rë miyi' xa' nzhap tsa', ñal chizhi' xa' una' che'n xa', nela milu' Krist, dox nazhi' Me rë men che'n Me, haxta ngut Me por lè' bixa'. ²⁶ Kure' mile' Me par mitsumbe Me laxto' rë men che'n Me, par mia'n nambe bixa' nela tu lar kwa'n miët le'n nits ga', no nits re' nak widi'zh che'n Krist, ²⁷ nes par or wei' Me rë men che'n Me lo Dios, nambe la bixa', no nabe bixa', no gat nzè'b xki-tra' bixa', mbaino gat kinutra' bixa' ni xtu kwa'n gat lè', sino ke nambe laxto' bixa', no yent kwan nzhak jwalt bixa'. ²⁸ Kuze', nela nazhi' miyi' kwerp che'n miyi', se'ta' naki'n chizhi' xa' una' che'n xa'. Miyi' xa' nazhi' una' che'n Me, mis kwerp che'n xa' nazhi' xa', ²⁹ porke lalta' ni tu men gat yi' ne kwerp che'n, sino ke niza' xa' kwa'n nzhaklai, mbaino nikina xa'i, nela xmod nikina Krist rë men che'n Me, ³⁰ porke part che'n kwerp che'n Krist be, nela ya' Me no ni' Me, ³¹ porke se' nzobni' lo Yech che'n Dios: "Lè' miyi' la' xuz no xna', par zhè'l xa' kun una' che'n xa', nes par tutsa men gak rop xa' lo Dios." ³² Le'n rë widi'zh re', nzhon tu kwa'n dox nagan par zobyek mene. Per na kidizhe par ne go xmod nile' Krist kun rë men che'n Me, ³³ per nu par go nza widi'zh re', nes par kad go chizhi' go una' che'n go, nela xmod nazhi' go go; no go una', naki'n gap go kwent xmiyi' go, no gon go ro' xmiyi' go.

6

¹ Rë go mè'd, no nzhap go xuz go o xna' go, bin go ro' xa', nela ro' Dios ga', porke sa' nzhakla Dios; ² no se' nzobni' lo Yech che'n Dios: "Gop kwent xuzal no xna'l", porke kure' nakkwa'n galo mile' Dios mandad, xid rë kwa'n mila' Dios di'zh: ³ "Par yal wen, mbaino par banal xche lo yizhyuo re'."

⁴ No rë go xa' nzhap xmè'd, nale't go kwa'n le' yi' xmè'd go, sino ke dub tiemp kwa'n xè'n

go mè'd, bitse'd go mè'd mbaino bidi'zhnu go mè'd nela xmod nzhakla Dios.

Rë xa' kwa'n nikè zhi'n che'n men, no rë xa' kwa'n nak che'n zhi'n

⁵ Rë go, xa' nikè zhi'n lo men yizhyuo re', bile' go kwa'n ne bixa', mbaino bile' goi nizheb la ka go, no kun dub laxto' go bile' goi nela or nzhon go ro' Krist ga'. ⁶ Bile' go rë kwa'n ne xa', no gat lè't nab or nzo xa' lo go le' goi par ya'n go wen kun lè' xa', sino ke bile' goi kun dub laxto' go, por nak go men che'n Krist. Sa' bile' go, nela xmod nzhakla Dios ga'. ⁷ No or nikè go zhi'n, bile' goi nela or nile' go tu kwa'n par Dios ga', porke gat lè't par men kile' goi. ⁸ Bitsila go kure' wena-wen, lè' Krist kix kwa'n le' kad men, wanei cho mene, chi xa' kwa'n nak mos nado lo xtu mene, o xa' nak che'n zhi'ne.

⁹ No rë go xa' nak che'n zhi'n; chul ska bile' go kun rë xa' kwa'n nikè zhi'n che'n go, nakuzhyët go lo bixa', no ni nale' go xigab, zakzi go bixa'. Bitsila go kure': Mis tutsa Dios, Me nzhon lo yibè', nile' mandad go kun lè' bixa'; porke Dios gat nibet men.

Rë kwa'n ñal le' be or kidil be kun mbi che'n Mizhab

¹⁰ No nal, lult kwa'n nin lo go, por yalnzhon che'n Sprit che'n Dios, bikwa'n go xmod zo go wen por nak go tutsa kun Jesukrist, mbaino por kiyaknu Me go kun yalnzhon che'n Me, nzhak nile' go mandad lo rë kwa'n nile' Mizhab kun go. ¹¹ Guzo go naye lo rë kwa'n nak che'n Dios, par niyent kwan zak go or gakla Mizhab lichin go, ¹² porke or nidil be, gat lè't kun rë men yizhyuo nidil be, sino ke nidil be kun rë mbi mal kwa'n gat nilu' lo rë men. No xid rë mbi mal re' nzhon más rë mbi mal kwa'n nile' mandad, nzhon nak nela rë xa' nak zhi'n ga', no nile'i mandad lo nakao che'n yizhyuo re'. ¹³ Kuze' nal, gok go nela tu sondad ga'. Natsin guzo go, guzen go rë kwa'n kinu Dios kwa'n nak nela yi'b ga' kwa'n nika'n lo rë kwa'n nigubi Mizhab ta' go, nes par or kin Mizhab go, yent kwan ya laxto' go, no ter dox naye kin Mizhab go. Per gor lox dil go kun Mizhab, zillita' guzo go naye kun Dios. ¹⁴ Kuze' naye pa' guzo go lo widi'zh che'n Dios!, nes par di'zh go pura kwa'n wali, no par yent kwan linu Mizhab go, mbaino sigue ban go nela xmod nzhakla Dios. ¹⁵ No dubta' ñal zo go natsin par di'zh go widi'zh nazhon che'n Jesukrist kwa'n nile', ya'n men wen lo Dios. ¹⁶ No zilita' wayila go widi'zh che'n Dios. Kure' le', yent kwan yaga' ta' go; lè'i ka'n lo rë kwa'n gat lè' kwa'n nigubi Mizhab ta' go, rë kwa'n nak nela flech kwa'n nzobyol ga'. ¹⁷ No bitsila go, lè' Dios mine' la yalnaban par dubta' ka' go, kure' nak nela tu kask ga' kwa'n nzob yek go, par nale't go xigab por

ni tu kwa'n. No bitse'd go xmod di'zh go widi'zh che'n Dios, kwa'n nak par go nela tu spad ga'. ¹⁸No lo más rë kwa'n nile' go, bina'b go lo Dios nela xmod nilu' ka Sprit che'n Dios lo go. Kuze' bikina go go, no nala't go le' Mizhab gan kide go, mbaino dubta' bina'b go lo Dios por más rë men che'n Dios. ¹⁹Mbaino nu guna'b go lo Dios por da, nes par or dizha, Dios ne' widi'zh kwa'n ñal dizha or nilun widi'zh che'n Me lo rë men, no par dizha rë xigab naga'ch kwa'n nak che'n Dios, no nazhebt da dizha rë widi'zh che'n Jesukrist kwa'n nile', nzhap men yalnaban par dubta'. ²⁰Por widi'zh re', nak da tu xa' nidi'zh por kwent che'n Dios lo rë men, ter nzho'n lizhyi'b nal, per guna'b go lo Dios par nazheb da, or dizha widi'zh che'n Dios, no dizhne nela xmod ñalkai.

Lult kwa'n midi'zh Pab

²¹Tíquico, tu wech be men che'n Jesukrist no nak xa' tu xa' dox nichêla, mbaino nzhon dox xa' ro' Jesukrist, no dub laxto' xa' nile' xa' zhi'n che'n Me; lë' xa' re' za' kwent lo go, rë kwa'n nizaka, nes par gon go, xmod nzho'n, mbaino kwan nilen. ²²Kuze' xêla xa' lo go, nes par gon go xmod nzhin no, no par tsiro'b xa' la go, mbaino par nale'ra' go be's xigab por no.

²³Lê' Dios Xuz be, mbaino Señor Jesukrist, le' zi go chul dizde le'n laxto' go, rë go wech no bizan, kun más rë men che'n Jesukrist, no par le' Me, más chizhi' go tu go kun xtu go, mbaino par más yila go Jesukrist. ²⁴Lê' Dios gaknu rë go, rë xa' kwa'n dubta' nazhi' Jesukrist kun dub la. Sa' gake.

Yech kwa'n mixë'l San Pab lo rê men che'n Jesukrist xa' nzhoyezh Filipos

Ma go wech no bizan, ¿chi wen ka go?

¹ Na Pab kun Timoteo, nak no mos nguzi' Jesukrist; mixë'l no yech re' lo rê go xa' nak men che'n Jesukrist xa' nzhoyezh Filipos, mbaino lo rê go xa' nizo dilant, no lo rê go xa' nzhaknu xid rê men che'n Jesukrist, xa' nzhoba'. ² Kina'b no lo Dios Xuz be, mbaino lo Jesukrist Me nile' mandad be, par gaknu Dios go, no par zi go chul dizde le'n laxto' go.

Kina'b Pab lo Dios por rê men yado', xa' nak men che'n Jesukrist

³ Zilita', nizan xkix lo Dios or nitsilan go; ⁴ no or nina'ba lo Dios por go, nizak laxto'n ⁵ por kiyaknu go da, kidi'zh go widi'zh che'n Dios por Jesukrist lo rê men, dizde zhë galo laka, or nguzublo go ñila go widi'zh re', no haxta nalzhë kile' goi. ⁶ Kuze', nane ka, nela mizublo Dios zhi'n wen re' laxto' go, se'gaka le' Me rêi laxto' go haxta zhë yubre Jesukrist xtu wêlt. ⁷ Ñal ka nilen xigab se' por go, porke dox nazhi' da go, mbaino nzhaknu go da kun rê zhi'n nazhon che'n Dios kwa'n mila' Dios di'zh len, ter nzhon' lizhyi'b, o nzon lo rê xa' nak zhi'n, par dizha, walika widi'zh che'n Dios kwa'n ñila be. ⁸ Kuze' Dios nane ka, walika kwa'n nin lo go or nin, dox nazhi' da go, no nilen xigab che'n go; rê kure' nile' Jesukrist ñi'd laxto'n por go. ⁹ No nu dox kina'ba lo Dios par más chizhi' go wech go; no rêi tse'd go wen, mbaino zobyek goi, ¹⁰ nes par gak kwe go kwa'n más tsak, par or yubre Jesukrist xtu wêlt, yazhë! Me go namba laxto' go, mbaino yent cho gak gab ni tu kwa'n gat lê' che'n go lo Jesukrist, ¹¹ par le' go wen lo rê kwa'n nile' go; no bitsila go, nab tsa Jesukrist gak le' gak go se', nes par rê men ze't Dios por wen Dios.

Par Pab, yalnaban nak Jesukrist

¹² Rê go wech no bizan, nzhaklan ne go, ke rê kwa'n kizaka, lê'i kiyak par más yila men widi'zh nazhon che'n Dios, ¹³ porke rê sondad xa' nikina yalao che'n rey ro re', kun más rê men yezh re', wena-wen nane bixa', nzhon' lizhyi'b re' por nak da tu mos che'n Jesukrist. ¹⁴ No por nzhon' lizhyi'b, kure' nile', nitsiro'b laxto' nayax wech be por Jesukrist, no nazhebt bixa' par más lu' bixa' widi'zh che'n Dios por Jesukrist.

¹⁵ No ter nzhon men kidi'zh widi'zh che'n Jesukrist, por nzhakla bixa' más yët bixa' ke da; per nzhon ka más xa' nidi'zh widi'zh che'n Jesukrist por xigab wen kwa'n kinu xa' kun Dios. ¹⁶ Ter más rê xa' ka nidi'zh widi'zh che'n Dios ba', nile' bixa'i namás por

nzhakla bixa' yët bixa' wen xid más rê men; per gat walit wen bixa', ka kile' bixa'i namás par yi'xian da, nal nzhon' lizhyi'b re'; ¹⁷ per xtu ben bixa', walika nidi'zh bixa' widi'zh che'n Dios por Jesukrist kun dub la bixa', nile' bixa'i por nazhi' bixa' da, porke nane bixa', Dios mizo da par lun, walika nazhon widi'zh che'n Dios por Jesukrist. ¹⁸ Per yent kwane, ter nazhi' men da, o niyi' men nine men da, per nizak laxto'n por kidi'zh men widi'zh che'n Dios por Jesukrist.

Mbaino zakra' laxto'n por kure', ¹⁹ no por kuze' nanen, rê nak kure' lê' par liya' men da por stubi kina'b go lo Dios por da, mbaino por kiyaknu Sprit che'n Jesukrist da. ²⁰ Kuze', naye nzon, no kun dub laxto'n nanen, nala't Dios ya'n da gat lê' lo ni tu kwa'n mi'ka'b Dios lon, sino ke nazhebt da porke nal no par dubta', lu' rê kwa'n nilen xid men por poder che'n Jesukrist, mbaino wen yët Jesukrist por da, ter naban ga ka da lo yizhyuo re', o ter ngut la da. ²¹ No chi stubi naban da, lê' da le ra' rê kwa'n nzhakla Jesukrist. No chi gat da, lê'i' gak par más men yila Jesukrist, no más gak da tutsa kun lê' Me. ²² Per chi lê' da ban ra', gak len más rê zhi'n nazhon che'n Dios; kuze' naneta, kwan más wen par da, chi ban ra' dai, o gut bixa' dai. ²³ Ñal, lo rop kure', naneta cho kwa'n kwen. Dox nzhaklan bi'n lo yibë' no yo'n tutsa kun Jesukrist, porke más wen kure' par na. ²⁴ Per par gaknu ra' da rê go, dox naki'n ban ra' da. ²⁵ Kuze', más wen ban ra' da par gaknu ra' da rê go, par ro'b go lo widi'zh che'n Dios, no nu par más zak laxto' go dub ñila goi, ²⁶ par or zon xid rê go xtu wêlt, más di'zh go wen por Jesukrist por kwa'n nile' Me kuda.

²⁷ Kuze', ter dub kizaka rê kure', per go, más ñal ban go nela xmod nzhakla Dios lê' go por Jesukrist, nes se', chi zak yi'dtsi'n ma go, o chi nagakte; per nzhaklan gona, chi tutsa nak ka xigab che'n rê go lo rê zhi'n nazhon che'n Dios, nes par yent cho gak ki'l go, yila go widi'zh che'n Dios xa' mod lo kwa'n mbin go or galo. ²⁸ Nazhebt go lo rê xa' nikwa'n dil kun go por nak go men che'n Jesukrist, no nazhebt go di'zh go por ñila go widi'zh che'n Dios. Nazhebt go lo bixa', porke lê' go ñila widi'zh che'n Dios. Or nile' go sa', kure' nak nela tu seña ga', nadedt lê' bixa' lox. Mbaino par go kure' nilu', lê' Dios ngulo' la go lo rê kwa'n nazhe'b kwa'n nzadké tich go. ²⁹ Kuze' par rê go, mine' Dios zhi'n nazhon che'n Jesukrist le' go, gat lê't nab tsa yila go widi'zh che'n Me, sino ke nu par zakzi go por nak go men che'n Me. ³⁰ No tutsa lo kwa'n ded go nela rê kwa'n nde'da, mbaino lê' go nane ka rê kwa'n nguzaka, mbaino rê kwa'n kizaka.

Naki'n gak men nela Jesukrist ga'

¹ Kuze', chi walika nane go xmod nitsiyal Krist laxto' go dub kizakzi go por nak go men che'n Me; no por nazhi' go rē wech go, kuze' nzhak nitsiyal go laxto' bixa'; no por nile' go tutsa xigab kun rē wech go no rē bizan go por Sprit che'n Dios Me nzho laxto' go, kuze' nizine laxto' go or nizak tu rē wech go tu kwa'n; ² no chi walika nak go sa', dox kina'ba lo go: Bile' pa' go par dox zak laxto'n or gona, tutsa xigab nile' rē go, no lal nazhi' go rē wech go, mbaino chi nak ka go nela tutsa men ga'. ³ Nagakt go lambid mbaino nagaklat go ni tu kwa'n por lambid go; mbaino nagakt go marian, sino ke gok go tu men nado' kun wech go, no nale't go xigab, más tsak go lo wech go. ⁴ No chi nazu' tu kwa'n par go, gabt go nazu'te chi naga wi' go xmod zu'i par rē wech go. ⁵ Más wen bile' go xigab nela xmod nile' Jesukrist xigab ga'. ⁶ No ter nak Krist Dios, per nangale't Me nela tu Me nak Dios ga', ⁷ sino mila' Me rē kwa'n nile' Me mandad kwa'n kinu Me, mbaino ngok Me nela tu mos nado ga' lo Xuz Me Dios, kuze' ngol Me nela wanei tu men yizhyuo, nela be ga'. ⁸ No or miban Me yizhyuo re', ngok Me tu men nado' laxto' par milo'x Me mile' Me rē kwa'n ngok xigab che'n Xuz Me. No por mbin Me ro' Xuz Me dub tiemp kwa'n miban Me yizhyuo re', nguziyël Me ngut Me lo tu krus, nela tu men xa' dox nzē'b xki ga' lo Dios. ⁹ Kuze', mile' Dios, lē'gaka Me más tsak, mbaino miza' Xuz Me Dios tu lē Me kwa'n más tsak xid lo rē lē xa' kwa'n nzho, ¹⁰ nes par lo Jesukrist, zuxib rē xa' kwa'n nzho lo yibē', no rē xa' kwa'n nzho yizhyuo, mbaino rē xa' kwa'n nzho gabil, ¹¹ no rē nak bixa' gab lo más rē men, lē' Jesukrist nile' mandad lo bixa', par di'zh rē bixa', itatu nazhon Xuz be Dios!

Rē men che'n Jesukrist nak nela rē ki che'n rē biani kwa'n nzho lo yizhyuo re'

¹² Kuze', rē go wech no bizan, rē go xa' nazhi' da, nela mbin go ro'n or nguzon xid go or galo, mbaino nal nzon zit lo go, ñal gon ra' go ro'n, no sigue bile' go rē kwa'n ñal, nes par ro'b go lo rē kwa'n nak che'n Dios. ¹³ Nzhak nile' go rē kure', porke zilita' nile' Dios zhi'n nazhon laxto' go nes par más gakla go, le' go rē kwa'n nile' Me xigab, le' go.

¹⁴ No lo rē kwa'n le' go, nale't goi chop la go; no gat ñalt gab go: "¿Chon len kure'?", or naki'n le' goi, ¹⁵ par gak go xmē'd Dios xa' gat kinut ni tu jwalt, no nambe laxto' go; ter nzho go xid más rē men nakap, xa' naban lo rē kwa'n gat lē'. Naki'n gak go nela rē mbēl kwa'n nzi'b lo yibē' ga', kwa'n nizini lo tu yizhyuo nakao, ¹⁶ par se' lu' go lo bixa', widi'zh che'n Dios kwa'n za' yalnaban par dubta' ka' men. Chi lē' go le' se', or

yē'd Jesukrist xtu wēt lo yizhyuo re', zak laxto'n por go, porke orze'se nen, gat lē't yent cho kwent rē zhi'n kwa'n milen xid go. ¹⁷ Rē go ñila widi'zh che'n Dios por Jesukrist, mbaino nile' go zhi'n nazhon che'n Me, kwa'n nak nela tu gon ga'. Mbaino chi walika gut bixa' da, kure' gak nela tu gon ga' kwa'n zan tutsa kun rē gon kwa'n niza' go lo Me, mbaino chi zak da sa', por lē'i nzhaklan rē go zak laxto' kuda. ¹⁸ No se'ska, nu go naki'n zak laxto' por niza' go mis go lo Dios, nela nizan da lo Dios ga'.

Timoteo mbaino Epafrodito

¹⁹ Por nak da tu men che'n Jesukrist, nane lē' Dios nzhakla, xēla Timoteo lo go lwegā', par más zak laxto'n or gona xmod nzho go ba', ²⁰ porke gat nzhot xtu xa' nile' xigab nela na ga' por go, no Timoteo dox nile' xa' xigab por go, ²¹ porke más bixa' nile' xigab por lē' bixa' namás, no gat nile't bixa' por Jesukrist. ²² Per rē go nane, wen ka nak xmod Timoteo; tutsa nikē rop no zhi'n nazhon, nidi'zh no widi'zh nazhon che'n Dios por Jesukrist nela tu xa' rop xga'n ga'. ²³ Kuze' kilen xigab xēla xa' lo go lwegā', per galo nen chi liya' rē men re' da, ²⁴ per mile' Jesukrist mbi'd laxto'n, yi'dtswi'n ma go.

²⁵ Per milen xigab, naki'n zhiren wech be Epafrodito lo go, xa' re' xa' nzhaknu da, no xa' nizak mis kwa'n nizaka por widi'zh che'n Dios; xa' re' xa' mixē'l go lon par ngoknu xa' da kwent che'n go lo rē kwa'n naki'n da. ²⁶ No nal zhiren xa' lo go no dox nzhakla xa' ne xa' rē go, no dox nizob xigab yek xa' por go por mbin go ngokne xa'. ²⁷ No walika ngokne xa' haxta mer ngat xa'; per milats laxto' Dios xa' nangatta' xa', no gat lē't nab xa'i sino nu da milats laxto' Dios par nangawin laxto'n kwa'n dox por kwa'n kizaka. ²⁸ Kuze' naki'n lwegā' yubre xa' lo go par zak laxto' go or ne go xa' xtu wēt, no par nawinra' laxto'n por lē' xa'. ²⁹ No or zhin xa' lo go, bizak laxto' go kun lē' xa' por nile' xa' zhi'n nazhon che'n Jesukrist; no bidi'zh go wen tich más rē men, xa' nak nela lē' xa' ga', ³⁰ porke mer ngat xa' por mile' xa' zhi'n nazhon che'n Jesukrist, no nangayet xa' bid che'n xa' por mbi'd xa' kwent che'n go, por nangakt ngayi'd más rē go par ngaknu go da.

3

Nzhak nambe men lo Dios nab tsa por ñila men Jesukrist

¹ No por más rē kwa'n, rē go wech no bizan, sigue bizak laxto' go por nak go tutsa kun Jesukrist. No na, gat niyi't da nin xtu wēt lo go, rē kwa'n ni la lo go lo yech kwa'n mixēla, porke par go, wene. ² Gok natsin go, nala't go kide rē men nakap go, rē xa' nak nela rē mbēk ga', porke dox nakap zhi'n nile' bixa'. Kuze', gok natsin go lo rē men re',

porke niki'l bixa' men par nikë señ kwerp che'n men, nela xmod ngok rè kostumbr kwa'n mila' Dios lo rè men Israel chi tiemp, porke zak bixa' por nikë señ re' kwerp che'n bixa', men che'n Dios bixa'. ³ Per nab tsa be kinu señ che'n Dios kwa'n walika, porke nane be, nak be men che'n Dios por Sprit che'n Me kwa'n nzho laxto' be; no por Sprit che'n Dios, nile' be zhi'n nazhon che'n Me; mbaino nile' Me, nizak laxto' be por nak be tutsa kun Jesukrist, no gat lë't por rè kwa'n nile' nab bei chi nawi' be lo Dios. ⁴ Haxta da, ngak ngalen xigab, nambe laxto'n lo Dios por milen rè kwa'n nzobni' lo ley; no chi xtu men zak nambe laxto' xa' lo Dios por mile' xa' rè kwa'n nzobni' lo ley ze', na gak le xigab, más nambe laxto'n lo xa' ze', ⁵ porke or ngol da, xon ngubizh nzhapa or mikë' bixa' señ ze' kwerp da. No nak da tu men Israel, tu xa' nzë ben che'n Benjamín, tu xa' kwa'n ngok xga'n men Israel. Mbaino nak da tu xa' nidi'zh widi'zh che'n rè men hebreo, porke widi'zh re' midizh xuza no xna'n. No por nded milen rè ley che'n rè men Israel, ngok da tu rè men fariseo xa' más mile' rè kwa'n nzobni' lo ley ze'. ⁶ No por dox milen xigab por rè kwa'n nzobni' lo ley, haxta ngurukë'n tich rè men che'n Jesukrist, porke, çchon mila' bixa' ley kwa'n mila' Dios lo Muisés? No por dox milen rè kwa'n nzobni' lo ley ze', kuze' yent cho gak gab, nzë'b xkin lo Dios por nangalen tu rè ley ze'. ⁷ Per ter milen xigab, dox tsak rè kure' par na gulak ze' (nzhalaz ze'), per mizhin zhë mizi da, ni tu rè kure' ngazu't par na, porke zhë ze' milibe'n Jesukrist, no mitsumbe Me da lo rè kwa'n nguzë'b xkin lo Dios orze'. ⁸ No gat lë't nab tsa kure'i, per nal nizan kwent, nazu't rè kwa'n milen galo, porke nal más tsak nak da tu men che'n Jesukrist, Me nile' mandad da. Por nak da tu men che'n Me, milan rè kwa'n milen galo, no nake par da nela tu kwa'n naxbi ga', por kinun kwa'n más tsak, por nak da tu men che'n Jesukrist, ⁹ porke nzhaklan gak da tutsa kun Jesukrist no gat lë't por milen rè kwa'n nzobni' lo ley che'n Muiseze, sino por ñilan Jesukrist. Dios mitsumbe laxto'n namás por ngwayilan Jesukrist. ¹⁰ Kuze' nzhaklan libe'n más xmod pa' nak rè che'n Jesukrist, no par ban da lo yalnazon che'n Dios, Me mile', nguruban Jesukrist; no par zakzi da nela xmod nguzakzi Me, mbaino par nala ra' be's xigab por da, no ter gat da nela xmod ngut Me, ¹¹ par se' nanen, nu da le' Dios, ruban.

Nak be men che'n Dios xa' kimbëz, ban kun Dios lo yibë'

¹² Gat kinita' lo go, guzhë mile la rè kwa'n nin lo go, no ni gat kinin yentra' kwan nzhak jwalt da par lo Dios. Kuze', sigue nzhan par

dilant, porke dox nzhaklan gal da kwa'n re' Me kan orze', no por kwa'n gal da re', ngule Me da dizde or galo, par nak da tu men che'n Me. ¹³ No wi'ule wech, mis na nane, jwaltra' gal da kwa'n len gan re'; per kwa'n naki'n len nal, ya'l laxto'n rè kwa'n nak da nzhala ze'; más ñal wi'n lo kwa'n nilu' la lon kwa'n nzo dilant. ¹⁴ Nabtsa par dilant niwi'n par zhi'na lo kwa'n niwi'n lo re'; kure' nak ban da par dubta' kun Dios, porke por kure' ngurezh Dios be ban be kun lë' Me lo yibë', por nak be tutsa kun Jesukrist.

¹⁵ No rè be xa' kwa'n miro'b la lo rè che'n Dios, ñal le' be xigab re'. No chi nzho go nile' xa'la xigab; Dios ka le', le' go xigab kwa'n ñal le' go. ¹⁶ Per kwa'n naki'n le' be, nak, sigue ban be kun mis xigab kwa'n milu' la Dios lo be.

¹⁷ Rè go wech no bizan, naki'n ban go zilita' nela xmod naban da, mbaino biwi' go lo rè xa' naban xid go nela xmod midizh ka no lo go. ¹⁸ Pwes dox la midizha lo go, per nal nzhona no dox niwin laxto'n dub nine xtu wëlt lo go, nzho nayax xa' nikizë xa'la mod, par lë' bixa' yent kwan zu', ngut Jesukrist lo krus por rè men yizhyuo. ¹⁹ No por kure' nadedt lë' bixa' lox tuli, porke nile' bixa' kwa'n nzhakla kwerp che'n bixa' namás, no maska bixa' tula, lë'la marian nizi bixa' por lë'i, porke kwa'n nzho yizhyuo re' namás nile' bixa' xigab. ²⁰ Per go, naki'n ban go nela no ga', porke che'n be nak lo yibë'; no kimbëz be ne be dizde lo yibë', yubre Me ngulo' be lo rè kwa'n yizhyuo re', Me nak Jesukrist, Me nile' mandad be. ²¹ No kwerp che'n be kwa'n nzhat re', lë' Me le' bixloi par gake nela kwerp nazhon che'n Me. Kure' le' Me por yalnazon kwa'n kinu Me, yalnazon kwa'n kinu Me par le' Me mandad lo rè kwa'n nzho.

4

Guzo naye go lo yalnaban kwa'n kinu go kun Jesukrist

¹ Kuze', rè go wech no bizan xa' nazhi' da, no nikë laxto'n go, mbaino nizak laxto'n por go, porke nak go par da nela tu kwa'n milen gan ga'; nal guzo go naye lo widi'zh che'n Jesukrist kwa'n ñila go. ² No lu, Evodia, kun Sintique, dox kina'ba lo go chul guzhin go, no tutsa xigab bile' go, lë' go bël por Jesukrist, Me nile' mandad be. ³ Mbaino lol nin, lu xa' nichëla no xa' nzhaknu da mile' be rè zhi'n nazhon che'n Dios; kina'ba lol gakkun rop una' re', porke lë' biuna' ngokun bixa' da midizh bixa' widi'zh che'n Dios par más mire'che; no nu nin lol Ment, no lo zipla ra' xa' kwa'n ngoknu da. Kuze' lë' lë go nzobni' la lo Yech kwa'n kinu Dios, plo nzob lë rè men che'n Dios, xa' ban par dubta'.

⁴ Bizak laxto' go zilita' por nak go tutsa kun Jesukrist, Me nile' mandad be. Xtu wëlt

nin: ¡Bizak laxto' go! ⁵ Gok go men nado' laxto' lo rè men, porke ya mer la yubre Jesukrist lo yizhyuo re' xtu wèlt, Me nile' mandad be.

⁶ Nale't go be's xigab por ni tu kwa'n, sino or nina'b go lo Dios, bina'b go lo Me por rè kwa'n naki'n go; no or le' go kure', dub laxto' go, biza' go xkix lo Me. ⁷ No lé' Me le', zi go chul dizde le'n laxto' go. Kwa'n nile' Dios nizi go ba', nagakt zobyek rè men yizhyuoi. Kuba' le' kina go, mbaino kina rè xigab che'n go, por nak go tutsa kun Jesukrist.

Bile' go xigab por rè kwa'n wen

⁸ Lult kwa'n nin lo go wech no bizan; bile' go xigab rè kwa'n walí, no rè kwa'n wen par men, mbaino rè kwa'n nzhakla Dios, no rè kwa'n nambe lo Me, no rè kwa'n nile' nazhi' men wech men; mbaino bile' go xigab rè kwa'n nile' nidi'zh men wen. Rè kure' bile' go xigab, rè kwa'n ñal par men, mbaino rè kwa'n más nidi'zh men wen.

⁹ Bile' go rè kwa'n milun lo go, no bile' go rè kwa'n une go milen, mbaino rè kwa'n mbin go milen. No rè kwa'n midizha lo go, lé' Dios, Me nile' nizi men chul, ya'n kun go.

Xkix go por rè kwa'n ka mine' go kan

¹⁰ Dub naban da tutsa kun Jesukrist, dox nizak laxto'n, porke dispwés di nded tu tiemp, mbidtsi' go da xtu wèlt par mile' go kumpa'ñ da. Gabt go porke nin kure', nin mia'l laxto' go da, sino ke lè' da nane ka, nan-gakt ngayidtsi' go ma da xtu or. ¹¹ Gat kinita' kure' lo go por nzhak jwalt tu kwa'n lon, pwes na mitse'd naban da kun kwa'n kinun namás. ¹² No mitse'da naban da ter yent kwan kinun, mbaino mitse'da da naban da or kinun nayax kwa'n naki'n da. Nixek da naban da waney xmode, mbaino yent kwane par da, ter nizaka rè kwa'n nalats. No ter dimás kinun kwa'n gaḡ, o ter niyent kwa'n gaḡ. ¹³ No wanei kwa'n nizaka, Krist nzhaknu da par niyent kwan nzhak jwalt lon. ¹⁴ No go, dox ka wen laxto' go kuna, ngoknu go da lo rè kwa'n nguzaka.

¹⁵ Mbaino wen mis go une, or nguro'n lazh men Macedonia plo nzhin go nal re', or nguzublon milun widi'zh che'n Dios lo rè go, nab tsa go mixè'l dimi lon por widi'zh che'n Dios kwa'n milun lo go. ¹⁶ No or mia'n da yezh Tesalónica, no naki'n da cho ngaknu da ba', no nayax wèlt mixè'l go dimi par da. ¹⁷ Gat kinita' kure' par kina'ba más rè kwa'n nak che'n go kan, sino ke nzhaklan, más yar rè kwa'n kinu go lo Dios. ¹⁸ Rè kwa'n mixè'l go par da lo Epafrodito, lé'i kinu la, haxta di sobre lo rè kwa'n naki'n da. Rè kure' nak nela tu gon kwa'n miza' go lo Dios, tu gon kwa'n dox nix nixla, mbaino dox nizak laxto' Dios por lé'i. ¹⁹ Por Jesukrist, lé' Dios, Me kinu rè kwa'n naki'n be, lé' Me zilazh

más rè kwa'n naki'n go, rè kwa'n nzhak jwalt lo go. ²⁰ ¡Par dubta', ñal di'zh be nazhon por Xuz be Dios! Sa' gake.

Lult kwa'n midí'zh Pab

²¹ Bidi'zh go tu widi'zh wen por kwent da, lo rè xa' nzhin xid go, rè xa' nak men che'n Jesukrist. No nu rè wech be por Jesukrist, rè xa' nzhok kuda re', mixè'l tu widi'zh wen par rè go. ²² No rè xa' ñila widi'zh che'n Dios nzhok kuda re', rè bixa' mixè'l tu widi'zh wen par rè go; mbaino rè xa' nak zhi'n yalao che'n emperador romano, nu bixa' mixè'l tu widi'zh wen par rè go. ²³ Lé' Señor Jesukrist gaknu rè go. Sa' gake.

Yech kwa'n mixë'l San Pab lo rè men che'n Jesukrist xa' nzho yezh Colosas

Ma go wech no bizan, ¿chi wen ka go?

¹⁻² Na Pab, mixëla yech re' lo go, rè go xa' nak men che'n Dios xa' nzho yezh Colosas, porke Dios mixë'l da, nak da tu apost che'n Jesukrist. Na kun wech be Timoteo, por nak no men che'n Jesukrist, mixë'l no yech re' lo rè go, por nak go men che'n Dios, no por nak go tutsa kun Jesukrist, por ñila go widi'zh che'n Jesukrist. Nina'b no lo Xuz be Dios par gaknu Me go, no par le' Me, zi go chul dizde le'n laxto' go.

Pab niza' xkix lo Dios por rè men che'n Jesukrist xa' nzho yezh Colosas

³ Rè or kwa'n nina'b no lo Dios por go, niza' no xkix lo Dios por go, Me nak Xuz Señor Jesukrist. ⁴ Mbin no, dox ñila go widi'zh che'n Krist Jesús, no dox nazhi' go rè men che'n Dios, ⁵ porke nane go, dox kwa'n wen kinu Dios par go lo yibë'. Nane go rè kure' por mbin go rè widi'zh nazhon che'n Dios, rè widi'zh kwa'n nilu' xmod ban men dubta' kun Dios. ⁶ Widi'zh re', zilita' nire' che nayax plo lo yizhyuo go, no lë'i nizini laxto' men, naban xa' nela xmod nzhakla Dios, nela xmod mile' Dios kun go ga', dizde zhë galo kwa'n mbin goi, mbaino mile' Dios mizobyek go, lë' Dios walika nazhi' go. ⁷ Mbin go lë' Dios, dox wen laxto' kun go, por Epafras, tu xa' nazhi' no, no tu xa' dub laxto' nile' zhi'n nazhon che'n Jesukrist tutsa kun no. ⁸ No ne xa' lo no, lë' Sprit che'n Dios kiyaknu go nazhi' go rè men.

⁹ Kuze', por rè kwa'n kile' go, dizde zhë kwa'n mbin noi, zhë-yë'le kina'b no lo Dios par más zini Dios yek go, par ne go, kwan pa' nzhakla Dios par go. No Sprit che'n Dios le' gak go men nzhak no libe'u xmod pa' nak Dios. ¹⁰ Orze' gak ban go nela xmod nzhakla Señor Jesukrist, no zilita' le' go kwa'n nzhakla Dios. Orze' lë' go le' rè lo zhi'n nazhon, par más libe' go xmod nak Dios. ¹¹⁻¹² Kina'ba lo Dios par gaknu Me go kun yalnazon ro che'n Me, nes par zo go naye lo widi'zh che'n Dios kwa'n ngwayila go, no par xek go lo rè kwa'n nizak go. No kina'ba lo Dios, par dub nizak laxto' go, za' go xkix lo Xuz be Dios, porke lë' Me ngule go no mitse'd Me go nes par nu go gal rè kwa'n kinuchao' Me par rè men che'n Me, plo nzob Me kun yalnazon ro che'n Me, plo nile' Me mandad. ¹³ Ngulo' Dios be lo nakao plo mile' Mizhab mandad be, par mbiy' Dios be lo biani plo nzob Xga'n Dios, kile' Me mandad, Me nazhi' Dios. ¹⁴ Por Jesukrist, Me nak Xga'n Dios, rè kwa'n ngok be nzhala,

nale'tra'i gan wei'ye be par le'ra' be kwa'n gat lë', mbaino miche' Me rè kwa'n nzë'b xki be por ren kwa'n mixo Jesukrist or ngut Me por be.

¿Xmod nak Krist?, no, ¿kwan pa' nile' Me?

¹⁵ Yent cho gat ne lo Xuz be Dios, per Krist lal kun lë' Me, porke ni naga yo rè kwa'n lë' Krist ya nzho la, no lo rè kwa'n nile' Krist mandad, ¹⁶ porke por Krist, nguio rè kwa'n nzho lo yibë', mbaino rè kwa'n nzho lo yizhyuo, no rè kwa'n niwi' be lo, mbaino rè kwa'n gat nilu' t'lo be, nela rè mbi mal kwa'n nikizë, gat nilu' t'lo men no nile'i mandad nela tu rey ga', mbaino nzho sprit nak nela tu gubier ga', no nzho sprit nak nela gobiernador ga', mbaino nzho sprit nak nela rè xa' nak zhi'n yalao ga'; se'ta' nak rè sprit re'. Rè kure' ngulo Dios por Jesukrist, no por Krist nzho rèi. ¹⁷ Ni naga yo yizhyuo, lë' Krist ya nzho la; kuze' lë' Me nalazh rè kwa'n, no nikina Mei. ¹⁸ Lë' Krist nak Me nile' mandad lo rè men che'n Dios, rè xa' kwa'n ñila widi'zh che'n Dios; no por lë' Me kinu be yalnaban kwa'n nayot lox. Galo laka Krist nguruban, nes par lë' gaka Me gak le' mandad lo rè kwa'n nzho. ¹⁹ Se' ngok xigab che'n Dios, lë' Xga'n Dios nak yub Dios. ²⁰ Por ren che'n Jesukrist kwa'n mixo Me lo krus, nguio wen laxto' Dios, miwi' Dios xtu wëlt lo rè kwa'n nzho, ter kwa'n nzho lo yizhyuo o kwa'n nzho lo yibë'.

²¹ No sa' ga' ngok kun go; zit mia'n go lo rè kwa'n wen kwa'n kinu Dios, mbaino ngok go nela tu men xa' nidil kun Dios ga', mbaino dox kwa'n gat lë' mile'u, no mile'u xigab. ²² Per nal, por ngut Xga'n Dios lo krus por go, nak go men xa' nichë'l kun Dios, par or kwezh Xuz be Dios go, nambe laxto' go zubi go lo Dios, nela tu xa' nangayot ngale' tu kwa'n gat lë'. ²³ Per naki'n zilita' yila go widi'zh nazhon che'n Dios, par gak go nela tu yo' ga' kwa'n dox naye nzob por simient ke kwa'n kinui. Biwi'u namás, par nala'u rè kwa'n nazhon kwa'n kinu Dios par go. Nane go rè kure' por widi'zh che'n Dios kwa'n mbin go. No widi'zh che'n Dios re', ya mire'ch la dub lo yizhyuo, no Dios ngule da, par nu da dizh widi'zh re'.

Zhi'n nazhon kwa'n mile' Pab par rè men che'n Jesukrist, xa' gat lë't men Israel

²⁴ No nal, nizak laxto'n por kizakzi da por go, porke nzho nayax kwa'n naki'n zak men che'n Jesukrist, no nizaka nela xmod nguzak Jesukrist ga', per naki'n de'da rè yalnalats kwa'n jwalt nen. ²⁵ Dios mile', nak da nela tu mos ga' lo rè men che'n Me; lon mika'b Me len rè zhi'n nazhon re', nes par ganin lo go rè widi'zh kwa'n kinu Me par go kwa'n le' ya go wen. ²⁶ No rè widi'zh re', naga'ch kinu Diose par lo rè xa' nguio galo; per nal, lo rè men che'n Dios nguluxo'b

Diose. ²⁷ No lo rē men che'n Me, mile' Me xigab, lu' Me xmod nak rē kwa'n nazhon re', par ne bixa', lē' nu par xa' gat lē't men Israel gal rē kwa'n kinu Dios naga'ch re'. Kwa'n naga'ch re' nak, yo Jesukrist laxto' go, kuze' lē' go nane ka, lē' go yo tutsa kun Dios lo biani che'n Me. ²⁸ Kuze', nilu' no widi'zh che'n Dios lo cho la men. Kun rē widi'zh kwa'n mitse'd Dios no, nikuzhiē no yek bixa' par nale'ra' bixa' rē kwa'n gat lē', mbaino nitse'd no bixa' xmod ñal ban kad bixa' lo Dios, nela tu men che'n Jesukrist, xa' ya miro'b la xigab che'n lo Dios.

²⁹ Kuze', dub lan nilen zhi'n nazhon re', no ñan tu kun rē che'n Mizhab. No por yalnazhon kwa'n nine' Jesukrist kan, nzhak nilen gan lo rē kuba'.

2

¹ Nzhaklan gon go, dox bid ninen por go no por rē men che'n Jesukrist xa' nzho yezh Laodicea, mbaino nu por más rē men che'n Jesukrist xa' nagat libe' da. ² Se' nilen par más yila go widi'zh che'n Dios, no nazhebt go lo rē kwa'n nizak go, no par le' go tutsa xigab, no chizhi' go rē wech go, no par gap go rē kwa'n wen che'n Dios, nes par nane go, walika mizobyeq go xmod nak rē widi'zh naga'ch che'n Dios, no widi'zh naga'ch re' nak yub Jesukrist, ³ porke nab tsa Jesukrist nzhak nile' nixa'l yek men par ne bixa' rē kwa'n nzhak Dios no rē kwa'n nane Dios; no rē kure' nak nela tu kwa'n dox tsak mbaino naga'che par lo rē men. ⁴ Nin rē kure' lo go par nayila go rē xa' kwa'n chigab wali kwa'n nidi'zh ba', per ka mbēl bixa'. ⁵ Ter gat nzot yuba kun go, per nak da nela tu men chigab nzo ka kun go ga', porke zilita' nilen xigab por go, kuze' nizak laxto'n por tutsa nak xigab che'n rē go, mbaino por naye nzo go lo kwa'n ngwayila go Jesukrist.

⁶ Nela nguziyēl go, nile' Krist Jesús mandad lo go, se'ska naki'n ban go nela xmod nzhakla Me, par nilu' tutsa nak go kun lē' Me. ⁷ Naye guzo go lo kwa'n ngwayila go Jesukrist, nela tu ya kwa'n doxluch kinu ga', o nela tu yo' kwa'n nzob lo tu simient dox na'ch ga'; nes par ro'b go lo widi'zh che'n Dios kwa'n ngwayila go no rē widi'zh kwa'n mitse'd go. No zilita' bilu' go lo Dios, lē' go dox nizak laxto' por rē kwa'n wen kwa'n mine' Me nka' go.

Yalnaban kwa'n niza' Jesukrist ban men

⁸ No gok natsin go par nala' go kide rē men ba' go, rē xa' kwa'n nidi'zh chigab rē kwa'n wali no rē kwa'n chul, per pura rē kwa'n nichao' yek bixa'i. No rē men ba', nile' bixa' rē kwa'n che'n mbi mal kwa'n nikizē yizhyuo kun poder, porke rē men ba', gat nile't bixa' kwa'n nzhak Krist, ⁹ porke xmod nak Dios, no rē kwa'n kinu Dios, sa'

ska nak Jesukrist lo mis lē'ska Diose, ter ngop Jesukrist tu kwerp che'n men yizhyuo, ¹⁰ no kinu go yub yalnaban kwa'n nazhon che'n Jesukrist, Me más tsak, no Me más nile' mandad lo wanei cho xtu sprit, ter kwa'n más naye mandad che'ne, o kwa'n we'tsa nile' mandade. ¹¹ No nu por nak go tutsa kun Jesukrist, mikē' Krist tu señ laxto' go, no gat lē't nela rē señ kwa'n nikē' rē men kwerp che'n wech bixa'. Kuze', mile' go gan lo rē kwa'n nzhakla kwerp che'n go, le' go, rē kwa'n nzhakla wei' go par yachin go lo rē kwa'n gat lē', ¹² porke ngoklē'i go le'n nits por nak go men che'n Jesukrist, kure' nilu'; nu go miga'ch tutsa kun Jesukrist or miga'ch Me; no nu or nguruban Me, nu go nguruban junt kun lē' Me; porke ñila go, kinu Xuz Me Dios yalnazhon kwa'n mile', nguruban Jesukrist. ¹³ No lē' go, galo laka ngok go nela men ngut ga' lo Dios por rē kwa'n nzē'b xki go, no por gat lē't men Israel go, no nu por gat kinut go ley che'n Muisés. Per nal, tutsa kun Krist, mile' Dios nguruban go, no miche' Me rē kwa'n nzē'b xki go. ¹⁴ Dios miche' la lo yech che'n Me plo nzobni' rē kwa'n ñal zakzi be por rē kwa'n nzē'b xki be lo Me, plo nzob rē ley kwa'n nzhak: "Nale'tal kuba'." Mizubchi Dios yech re' or nkē' Jesukrist lo krus. ¹⁵ No or ngut Jesukrist lo krus, mizubchi Me rē poder kwa'n kinu wanei cho rē sprit kwa'n nile' mandad. No or mizubchi Jesukrist rē poder kwa'n kinu rē sprit re', orze' milu' Jesukrist, ni tu ra' más rē sprit re' kinu poder par le' mandad.

Bikwa'n go nab tsa rē kwa'n nak che'n Dios

¹⁶ No bizob yek go rē widi'zh kwa'n milun lo go, par nayaa laxto' go or di'zh cho rē men tich go, por kwa'n nzhao go o por kwa'n nzhao go, o, ¿chon gat nile' go rē lani kwa'n naki'n le' go?, o, ¿chon gat ña laxto' go, le' go lani rē zhē kwa'n nibi mbēo', o rē zhē kwa'n nayi' kē men Israel zhi'n? ¹⁷ Rē kure' nak nela tu xkal ga' par kwa'n laore gak, no kwa'n laore gak re' nak Jesukrist. ¹⁸ Kuze' nin lo go, nala't go chi cho men gakla kubchi kwa'n nak che'n go lo Jesukrist. Rē men re', chigab nilu' más nzhak bixa', no nilu' nado' bixa' más ke xtu men; mbaino ño laxto' bixa', nizuxib bixa' lo rē ganj, nela lo Dios ga'. No nzhak bixa', nine bixa' rē kwa'n nazhon. Per por gat lē' nak xigab che'n bixa', yent cho kwent rē kwa'n nidi'zh bixa', mbaino marian bixa'. ¹⁹ Rē men ba', gat nzont bixa' ro' Jesukrist, Me kwa'n nile' mandad lo rē men che'n Me, nela xmod nile' yek men mandad lo dub kwerp che'n men; no niza' Jesukrist yalnaban kwa'n kinu Me, par ka' rē men che'n Me, no por Jesukrist, tutsa nak bixa', mbaino más nzhak nayax

bixa' no niro'b bixa' lo kwa'n nak che'n Dios, nela xmod nzhakla Dios.

²⁰ No go, tutsa ngok go kun Krist por ngut Krist lo krus, kuze' gat ñaltra' le' go rë kwa'n nak che'n rë sprit kwa'n kinu poder par le' mandad lo yizhyuo re'. No chi walika ngulo' Krist go lo rë kuba', orze', çchon nikizë ra' go, nela xmod nikizë rë men yizhyuo re'? No, çchon nzhon go ro' rë xa' nidi'zh: ²¹ "Nazental kuba', no nale'tal preb xtu kuba', o nazental kuba' kun ya'l"?" ²² Rë kwa'n nidi'zh bixa' re', kwa'n nzë yek bixa'i, nidi'zh bixa' pura kwa'n nzhao men o kwa'n nzhon men, kwa'n lweqa' nilox. ²³ No nzhon men se' nidi'zh bixa' por rë kuba': "Wenka rë kure' par be, porke nile'i jwers, nizuxib be lo Dios, no gak nado' laxto' be lo Dios, mbaino zakzi be kwerp che'n be par wi' Dios wen lo be."

Per nin lo go, yent cho kwent rë kuba', porke nagakt ka'ne lo rë kwa'n gat lë' kwa'n ngolnu be.

3

Xmod ñal, ban men che'n Jesukrist

¹ Por mile' Dios nguruban go tutsa kun Jesukrist, kuze' naki'n le' go xigab por rë kwa'n nzhon lo yibë', plo nzob Krist lad direch che'n Xuz Me Dios, par nile' Me mandad. ² Kuze' naki'n zilita' biban go xmod nzhakla Dios; no nale't go xigab por kwa'n nzhon lo yizhyuo re', ³ porke lë' go nak nela tu men ngut ga' lo rë kwa'n nzhon lo yizhyuo re'; naga'ch kinu Jesukrist yalnaban che'n go lo Dios, ⁴ no por Jesukrist kinu go yalnaban, kuze' or yubre Jesukrist xtu wëlt lo yizhyuo re', nu go yo lo yalnazon kwa'n kinu Me.

Bid galo mbaino bid kub

⁵ Kuze' naki'n la' go rë kwa'n gat lë', rë kwa'n nina'b kwerp che'n go. Xid rë kwa'n gat lë' re' nak, niban go kun rë xa' gat lë't tsa' go, nile' go xigab gat lë', haxta nile' go xigab ban go kun cho la una' o cho la miyi', no niwix go gap go más kwa'n, no rë xigab gap go más dimi lo rë kwa'n kinu la go, porke tutsa nak kure' kun rë men nizuxib lo rë dios winab. ⁶ Rë kure' nile' niyi'xian Dios, kuze' lë' Dios lo'x rë xa' gat nzhont ro' Dios. ⁷ No or galo, naxa't li'b go lo rë kure', ⁸ per nal, naki'n biya'l laxto' go rë kure'; nakixiantra' go wech go, no nagaktra' go dox nayi', no nazakzit go men; no ni nake ra' go Dios no ni men, mbaino ni nadi'zhra' go rë kwa'n markeriad. ⁹ Nakë'tra' go mbël, porke mila' la go rë kwa'n miban go or galo, rë kwa'n mile' go chi tiemp. ¹⁰ No nal, nak go xtu men, porke Dios, Me kwa'n miza' go yizhyuo re', zilita' kile' Me kun go par gak go nela lë' Me ga', nes par ne go xmod pa' nak Me. ¹¹ Kuze', yentra' cho wi' chi men Israel tu men, o gat nakt xa' men Israel; o

chi nikë señ tu men plo nak xa' miyi' o gat nikëte xa'; o chi nak xa' tu men zit, o nak xa' tu men xa' niyent cho nilibe' plo nzë; o chi nak xa' tu mos nado lo xtu men, o yent cho nile' mandad xa'; porke kwa'n más tsak lo rë kure', nak tu men, men che'n Jesukrist, porke nzho Me laxto' rë xa' nak men che'n Me.

¹² Porke go nak men che'n Dios, nazhi' Me go no ngule Me go par gak go men che'n Me. Kuze' naki'n ban go nela xmod nzhakla Dios; bilats laxto' go rë wech go men che'n Jesukrist, no gok go wen kun rë men; gok go men wen laxto' mbaino nado', no bixek go lo rë xa' nak xa'la mod lo go. ¹³ Nakuchao't go xian laxto' go por rë kwa'n nile' wech go lo go; más wen biya'l laxto' go rë kwa'n nile' xa' lo go. Sa' naki'n gak go, porke Dios mia'l laxto' rë kwa'n nzë'b xki go lo Me. ¹⁴ No lo rë kure', kwa'n más naki'n le' go, bichizhi' go wech go, porke kure' le', kwín go chul, tu go kun xtu go. ¹⁵ Naki'n la' go, le' Jesukrist zi go chul dizde le'n laxto' go kun rë men che'n Jesukrist, porke kure' ngurezh Dios go, par gak go nela tutsa men ga', no par za' go xkix lo Dios.

¹⁶ Naki'n zilita' bitsila go rë widi'zh nazhon che'n Jesukrist, nes par más ro'b xigab che'n go loi. No por rë kwa'n nzhak go por widi'zh nazhon re', bilu' goi lo rë wech go, mbaino bidi'zhnu go bixa'. No nu naki'n bikë' go rë kant kwa'n nidi'zh xmod nak Dios kun rë himno, no rë kant kwa'n nilu' Sprit che'n Dios lo go, dub kiza' go xkix lo Dios. Sa' bile' go. ¹⁷ No lo rë kwa'n nidi'zh go, no lo rë kwa'n nile' go, bile' goi nela xmod nzhakla ka Jesukrist, dub kiza' go xkix lo Xuz be Dios por rë kwa'n mile' Jesukrist por go.

Xmod ñal ban men che'n Jesukrist kun rë xin xa'

¹⁸ Rë go xa' una' xa' nzhap tsa', naki'n gon go ro' tsa' go, porke se' ñal ban go por nak go men che'n Señor Jesukrist. ¹⁹ No rë go xa' miyi', xa' kinu tsa', naki'n chizhi' go una' che'n go kun dub la go; mbaino nazakzit go una' che'n go nela tu mos ga'. ²⁰ No rë go më'd, naki'n gon go ro' xuz go no ro' xna' go, lo rë kwa'n ne xa'; porke sa' nzhakla Dios gak. ²¹ No rë go xa' nak xuz më'd, ñal goknu go xmë'd go ro' më'd lo rë kwa'n gat lë' nile' bimë'd, nes par nakuchao't bimë'd xian laxto' bimë'd kun go, nes par nazit bimë'd, yent kwan zu' bimë'd. ²² No rë go, xa' nak mos; lo rë kwa'n naki'n gon go ro' xa' nile' go zhi'n che'n yizhyuo re', no gat lë't nab tsa or nzo xa' lo go le' go kwa'n nzhakla xa' par ya'n go wen lo xa' namás, sino ke bile' go wen ter or niyent xa', par sa' lu' go, nikë go zhi'n che'n xa' kun dub laxto' go, no nu par lu' go, nzhon go ro' Dios, Me nile' mandad

go. ²³ Lo rē kwa'n nile' go, bile' goi kun dub laxto' go par lu' go, lē' go nikē zhi'n lo yub Jesukrist, no gat lē't nab tsa lo men yizhyuo nikē go zhi'n che'n. ²⁴ No bitsila go, lē' Señor Jesukrist ne' kwa'n wen ka' go kwa'n mila' Me di'zh, za' Me ka' rē men che'n Me; porke nab tsa Jesukrist nak Me nile' mandad lo go, no Me kwa'n nikē go zhi'n lo. ²⁵ No rē xa' kwa'n nile' kwa'n gat lē', nu bixa' gal kwa'n ñal bixa' por rē kwa'n nak bixa', porke Dios nayot man che'n ni tu men or gab Dios kwan gak kun kad men por kwa'n mile' bixa'.

4

¹ No rē go xa' nzhap mos par le' mandad che'n go; bile' go kwa'n ñal kun rē mos che'n go, porke bitsila go, nu ska go kinu tu Dios Me nzho lo yibē', Me nile' mandad go.

² Rē go, zilita' bina'b go lo Dios, no biwi' go por kwa'n kina'b go lo Me dub kiza' go xkix lo Me. ³ No or nina'b go lo Dios, bina'b go gaknu Dios rē no par niyent kwan ka or di'zh no widi'zh che'n Dios por Jesukrist rē plo, widi'zh kwa'n kinu Dios naga'ch dizde or galo, por nal, ngulo' Mei al tich par gon men, rē kwa'n wen che'n Jesukrist. No por nilun widi'zh re', ngulo men da lizhyi'b. ⁴ Kuze' bina'b go lo Dios por da, par gak dizha rē widi'zh re' lo rē men nela xmod ñal kai.

⁵ Biwi' go xmod di'zh go lo rē men, xa' nagat yila widi'zh che'n Jesukrist, par gak di'zhnu go bixa' or ñale. ⁶ No rē widi'zh che'n go naki'n gake rē widi'zh chul, widi'zh kwa'n yo laxto' men or gon bixa'i par ne go xmod kab go lo wanei cho tu xa' nabdi'zh lo go.

Lult kwa'n mikē' Pab lo yech re'

⁷ Lē' Tíquico, xa' nzhaknu da lo rē zhi'n nazhon che'n Dios por Jesukrist nela tu mos ga'; wech nazhi' be re', lē' xa' ne lo go kwan pa' kizaka. ⁸ Kuze', mixēla xa' lo go nes par gon go xmod nzhin no re', par le' xa' nale'tra' go xigab che'n no or gon go ma no. ⁹ Mbaino nu xtu wech nazhi' be, xa' lē' Onésimo, mixēla xa', nzē xa' kun xa' re', mbaino nu ska xa' nile' zhi'n nazhon che'n Jesukrist nela Tíquico re', porke lo mis kun go nibin xa' re', no dox nzhon xa' ro' Jesukrist. Rop rē xa' re' ne lo go xmod nzhin no re'.

¹⁰ No nu Aristarco, xa' nzhho lizhyi'b kuna re', mixēl xa' tu widi'zh wen par rē go, no nu Mark, xa' nak wech ye'n Bernabé mixēl tu widi'zh wen par rē go. Lē' go ya mbin la xmod le' go kun xa' re' chi lē' xa' yidtsi' ma go. ¹¹ Nu Jesús, xa' kinu xtu lē, lē Justo; mixēl tu widi'zh wen par rē go. Rop tsa xa' re' nak men Israel, xa' nak men che'n Jesukrist, rē xa' kwa'n kiyaknu da nidizha widi'zh che'n Dios por Jesukrist; no dox mitsiyal bixa' laxto'n por rē kwa'n nguzaka.

¹² No nu Epafras, tu men che'n Jesukrist, lo mis kun go ska nibin xa' re', no nak xa' nela tu mos nado ga' lo Krist Jesús; nu xa' re' mixēl tu widi'zh wen par rē go. Zilita' nina'b xa' lo Dios par rē go, par zo go naye no ro'b go lo widi'zh che'n Dios kwa'n ñala go, par gak go nela xmod nzhakla Dios, par le' go rē kwa'n nzhakla Dios. ¹³ Lo mis na nane, dox nile' Epafras xigab por go, no nile xa' zhi'n nazhon che'n Dios kun más rē men che'n Jesukrist xa' nzhho yezh Laodicea, no kun rē xa' nzhho yezh Hierápolis. ¹⁴ Luk, xa' nak doctor, tu wech nazhi' be, nu xa' mixēl tu widi'zh wen par rē go; no nu Demas mixēl tu widi'zh wen par rē go.

¹⁵ Guzh go por kwent da, lē' da mixēl tu widi'zh wen par rē wech be por Jesukrist, rē xa' kwa'n nzhho yezh Laodicea; no nu mixēla tu widi'zh wen par Ninfas no par lo más rē men che'n Jesukrist xa' nibin lizh xa'. ¹⁶ No or lox go'l go yech re', bixēl goi lo rē men che'n Jesukrist xa' nzhho yezh Laodicea par nu bixa' go'le; no mis orze', naki'n nu ska go go'l tu yech kwa'n mixēla lo bixa'. ¹⁷ No guzh go widi'zh re' lo Arquipo: "Bile' pa' por lo'xal rē zhi'n kwa'n mile' Señor Jesukrist mandadal le'l."

¹⁸ Na Pab, yuba mikē' widi'zh wen re' par rē go. Naya'lt laxto' go, lē'da nzhho' lizhyi'b re' no zilita' bina'b go lo Dios por da. Dios gaknu rē go. Sa' gake.

2

Yech galo kwa'n mixë'¹ San Pab lo rè men che'n Jesukrist xa' nzho yezh Tesalónica

Men che'n Jesukrist, ¿ma go, chi wen ka go?

¹ Na Pab, kun Silvan no Timoteo; kixë'! no yech re' lo rè go, xa' nak men che'n Xuz be Dios no men che'n Jesukrist, rè go xa' nzho yezh Tesalónica. Kina'b no lo Xuz be Dios, kun lo Señor Jesukrist, par ya go wen, mbaino par zilita' zi go chul dízde le'n laxto' go.

Rë plo nzhon men, walika ñila go widi'zh che'n Dios

² Zilita' niza' no xkix lo Dios por rè go, mbaino nina'b no lo Dios gaknu Dios rè go. ³ Kad or niza' no xkix lo Xuz be Dios, nize't no go lo Me por dox nile' go rè kwa'n nzhakla Me por ñila go Me, mbaino por nzhaknu go rè men por nazhi' go bixa'. No nu or nizakzi go por nak go men che'n Me, nixek go por nane go, lé' Señor Jesukrist mer la yë'd. ⁴ Rë go wech no bizan, dox nazhi' Dios go, nane no, Dios ngule go nak go men che'n Me. ⁵ Nane no Dios ngule go porke or milu' no widi'zh nazhon che'n Dios lo go, nu ska Sprit che'n Dios mile' kwa'n nazhon xid go, no par une go xmod nak no, yent kwan che'n go nguzen no; no mile' par ban go wen namás.

⁶ No yub ka go nguziyë! ban nela xmod miban no xid go, no nela xmod miban Señor Jesukrist, porke or ngwayila go widi'zh nazhon kwa'n milu' no lo go, por Sprit che'n Dios, mizak laxto' go mile'í, ter mizakzi más rè men go. ⁷ Sa' miban go lo rè men par milu' go xmod ñal ban más rè men che'n Jesukrist, xa' nzho rè yezh kwa'n ña'n lazh men Macedonia, kun lazh men Acaya. ⁸ Por go, mire'ch widi'zh che'n Dios rè plo, gat lë't nab tsa lazh men Macedonia kun lazh men Acaya. Rë plo ñët, dox ñila go widi'zh che'n Jesukrist; kuze', gat naki'ntra' di'zh no go lo rè men, rè men nzhon xmod naban go, ⁹ porke rè men nidi'zh, lë' go mile' wen kun no or ngwatsi' no ma go, no tatu mila' go tu lad rè dios winab che'n go, par le' go kwa'n nzhakla Dios, Me walika naban mbaino Me gaka nak Dios. ¹⁰ Nu nidi'zh bixa' lë' go kimbëz, zhin zhë yubre Jesukrist yizhyuo; Jesukrist, Me mile' Dios nguruban, mbaino Me ngulo' be lo yalzi nazhe'b kwa'n xë'! Dios lo rè men yizhyuo re'.

Zhi'n nazhon kwa'n mile' Pab yezh Tesalónica

¹ Rë go wech no bizan, men che'n Jesukrist, lë' go nane ka, gat lë't dimbald mbi'dtsi' no ma go. ² No nane ka go, or naga yi'd no plo nzho go, nakap mile' rè men yezh Filipos lo no, no ngokla ngwa mid'i'zh bixa' lo no; per ngoknu Dios no, nangazhebt no or milu' no widi'zh nazhon che'n Dios lo go, ³ porke rè kwa'n mid'i'zh no lo go ba', gat nakte kwa'n michao' yek no, par tsinu no men namás, porke yent cho nzhakla no kide no, ⁴ per Dios mizo no, mika'b Me di'zh no lo rè men widi'zh nazhon che'n Me, kuze' nikwa'n no di'zh no kwa'n ño laxto' Dios, gat lë't kwa'n ño laxto' mene, porke Dios nzhakbe' kwa'n nzho laxto' no. ⁵ Lë' go nane ka, nangadi'zht no lo go rè widi'zh chul namás par ngala no yek go, no ni nangakide no go par ngaka' no rè che'n go; Dios nane nambe laxto' no lo rè kure', ⁶ porke lalta' gat nikwa'nt no wi' men wen lo no, no ni gat nzhakla no ngale' go sa' kun no. No ter ñal ka ngana'b no lo go, ngaxë'n go no, por nak no apost che'n Jesukrist, per nangale't noi, ⁷ lë'la nkina no go nela xmod nile' tu una' kun xmë'do' xa' or nikina xa' më'd. ⁸ Se' nile' no por go, nizak laxto' no, gat lë't nab por mid'i'zh no widi'zh nazhon che'n Dios lo go, haxta no miye laxto' no ngat no por go por dox nazhi' no go. ⁹ Rë go wech no bizan, lë' go nitsila ka, dox vid ned no or mid'i'zh no widi'zh nazhon che'n Dios lo go, mbaino zhë-yë'le nkë no zhi'n par ndao no par nangazo no zhi'n lo ni tu go.

¹⁰ Go, no Dios nane, nambe nkizë xid go, nangale't no ni tu kwa'n gat ñal, no ni tu go nagakt gab kwan tu kwa'n nak no xid go. ¹¹ No nane go, mile' no kun kad go nela xmod nile' tu xuz men kun rè xmë'd xa'. ¹² Se' mid'i'zhnu no go, mbaino mitsiro'b no la go lo rè kwa'n nguzak go, mbaino ne no lo go nela xmod mile' Dios mandad no, ñal ban go nela xmod nzhakla Dios, Me ngurez' go par yo go plo nzho yalnazon che'n Dios no plo nile' Me mandad.

¹³ Kuze' zilita' niza' no xkix lo Dios, porke or mbin go widi'zh che'n Dios kwa'n mika'b Me par mid'i'zh noi lo go, ngwayila goi, porke miliibe' go widi'zh che'n Diose, gat lë't kwa'n michao' yek mene, porke xtu mod niban men, xa' ñila widi'zh nazhon re'. ¹⁴ Biwi'ule wech no bizan, men che'n Jesukrist; nela mizakzi rè men lazh go go, se'ska ngurukë rè men Israel tich rè men che'n Jesukrist, xa' nzho lazh men Judea. ¹⁵ No lë' rè men Israel re' mbit bixa' yub Señor Jesukrist, no lë'ga' bixa' mbit rè profet, rè xa' mid'i'zh por Dios nzhala, mbaino ngulutin bixa' no lazh bixa'. No ni gat nile'

bixa' kwa'n nzhakla Dios, lè'la nakap bixa' lo rè men. ¹⁶ No or nzhakla no di'zh no widi'zh nazhon che'n Dios lo rè men, rè xa' gat lè't men Israel, par nu bixa' ro' lo rè kwa'n nazhe'b nzhò bixa', per nala't rè men Israel le' noi. Kuze', guzhe miza la rè kwa'n nzè'b xki bixa' lo Dios, mbaino guzhe zakzi Dios bixa'.

Nzhakla Pab yèk xa' yezh Tesalónica

¹⁷ Rè go wech no bizan, ter gat nzot no lo go nal re' por tu tiemp, per zilita' nitsila no go, no dox nzhakla no yi'dtswi' no ma go xtu wèlt. ¹⁸ Nayax wèlt mile' no xigab re'; na Pab, nu da nayax wèlt ngoklan ngayala ba', per nangala't Mizhab. ¹⁹ Gat por go la gal no kwa'n kinu Señor Jesukrist ka' no, no por go nizak laxto' no, mbaino nizi no tsak no lo Señor Jesukrist por xmod miro'b go lo rè che'n Me. Kuze', or kube' Señor Jesukrist rè kwa'n mile' no, por go ya'n no wen lo Me. ²⁰ Walikai, por go más wen nine Dios no, mbaino nile' go nizak laxto' no.

3

¹ Kuze', por naxektra' no nikè laxto' no go, nzhakla no ne no ma go, kuze' mile' no xigab yent kwa'n lè'i ya'n nab no yezh Atenas re'. ² Orze' mixè'l no Timoteo, xa' nak tu wech be por Jesukrist, par yi'dtswi' xa' ma go, por nak xa' tu men xa' nzhaknu no nidi'zh no lo rè men widi'zh nazhon che'n Jesukrist. Mbi'd xa' ba' par mile' xa' zo go wen lo rè che'n Dios, no par midizhnu xa' go par naya'lt laxto' go widi'zh nazhon che'n Dios kwa'n ngwayila go, ³ nes par ni tu go nala't widi'zh che'n Dios por rè kwa'n nile' rè men ba'; lè' go nane ka, lè' be naki'n ded lo rè kwa'n nilinu men be, ⁴ porke or stubi nzo no xid go, nayax wèlt midizh no lo go, nzhazhin la zakzi men be, no se' ka ngoke nela xmod ne no lo go. ⁵ No na, por ya naxektra' da nikè laxto' no go, mixèla Timoteo lo go par ne xa', nabei chi se'gaka ñila go widi'zh nazhon che'n Dios kwa'n ngwayila go. Nizheb da, napa' mikide Mizhab go lo kwa'n gat lè', orze' yent cho kwent nguzakzi no por go.

⁶ Per nal, or nguiubre Timoteo lo no di mbi'dtswi' xa' ma go, mile' xa' gax ga' ñè'd laxto' no, mbin no lè' go se'gaka ñila widi'zh nazhon che'n Dios, mbaino dox nazhi' go guchin go, men che'n Jesukrist. No nu ne xa' lo no, nu go nikè laxto' no nela no ga', mbaino dox nzhakla go, ne go no, nela xmod nizi no kun go ga'. ⁷ Kuze', wecha no bizana, men che'n Jesukrist, ter dox kizakzi no por rè kwa'n kizak no, per gax ga' ñè'd laxto' no por se'gaka ñila go widi'zh nazhon che'n Dios. ⁸ No por mbin no, lè' go se'gaka naban lo rè che'n Dios, nizak no nela tu men mer la gat per unka' la xa', ⁹ haxta nanetra' no xmod za' no xkix lo Dios por rè kwa'n

kile' Me por go, no por go nizak laxto' no lo Dios. ¹⁰ Zhè-yè'le, dox nina'b no lo Dios par gaku Me no, yi'dtswi' no ma go, nes par ne go rè kwa'n, kwa'n nzhak jwalt lo kwa'n ñila go Dios.

¹¹ Kina'ba lo Xuz be Dios, no lo Señor Jesús, par gaku bi Me no, gak yi'dtswi' no ma go. ¹² No nu kina'ba lo Señor Jesukrist par gaku Me go, más yar kwa'n nazhi' go men che'n Jesukrist, tu go kun xtu go, no kun rè men, nela xmod nazhi' no go ga'. ¹³ Mbaino kina'ba lo Jesukrist, Me nile' mandad be, gaku Me go, le' go kwa'n ño laxto' Dios, nes par ban go nambe lo rè kwa'n gat lè', par yent cho gak gab ni tu kwa'n gat lè' nak go dilant lo Xuz be Dios, or yubre Jesukrist, Me nile' mandad be, kun rè ganj che'n Me.

4

Ñal ban be nela xmod nzhakla Dios

¹ No nal, xtu kwa'n. Rè go wech no bizan, milu' no lo go, xmod nzhakla Dios ban go, no se'gaka kile' go. Per nal dox kina'b no lo go, kika'b no, bile' go se'gaka, biban go nela xmod nzhakla Dios, nela xmod milu' no lo go, por nak go men che'n Jesukrist. ² Lè' go nane ka, mitse'd no go rè widi'zh kwa'n mika'b Señor Jesukrist lo no, ³ porke nzhakla Dios ban go nambe lo Me par lu', nak go nab tsa par lè' Me; kure' nak, nabant go kun men gat lè' tsa' go. ⁴ Kad go ñal ka'n lo kwa'n nzhakla kwerp go no go, par ban go nambe lo Dios, orze' lè' men di'zh nazhon Dios. ⁵ Nagakt go nela rè men xa' naban kun chola men, porke sa' nak rè men, nela xa nile' rè men xa' gat nilibe't Me walipa' Dios. ⁶ Nzhakla Dios, par nayot ni tu go xa' nile' kwa'n gat lè', no xa' nikide wech, rè xa' nile' rè kure'. Lè' da ni la lo go, lè' Jesukrist Me nile' mandad be, zakzi rè men xa' nile' rè kure', ⁷ porke ngurezh Dios be, gat lè't par ban be lo kwa'n gat lè'i; lè' Dios nzhakla ban be nab tsa par lè' Me. ⁸ Kuze', men xa' nile' naya' lo widi'zh re', gat lè't lo men nile' xa'i; lo Diose, Me mine' Sprit che'n par yo laxto' be.

⁹ No xtu kwa'n ne no lo go, gat naki'ntra' zobni' no más widi'zh par ne go xmod chizhi' go wech go, porke yub Dios mitse'd go chizhi' go wech go. ¹⁰ Per ter nazhi' ka go rè men che'n Jesukrist, xa' nzhò dub laz men Macedonia, dox kina'b no lo rè go wech no bizan men che'n Jesukrist, par más yar kwa'n nazhi' go tu go kun xtu go. ¹¹ Bile' pa' go par wi' go nab tsa lo rè kwa'n nak che'n go; nala'cht go kwa'n nak che'n xtu men, gükè go zhi'n par gao go, nela xmod mitse'd no go, ¹² par yèt go wen xid rè men xa' gat ñilat widi'zh che'n Dios, porke yent cho lo nina'b go ni tu kwa'n par ban go.

Or yubre Señor Jesukrist xtu wèlt

¹³ Rê go wech no bizan, men che'n Jesukrist, nzhakla no ne go xmod gak kun rê men che'n Jesukrist, rê xa' ngut la, par nawint laxto' go nela rê xa' nanet tuli chi ziruban men ngut. ¹⁴ Per be, por ñila be ngut Jesukrist no nguruban Me, se'ska ñal yila be, lê' Jesukrist le' ruban rê mengut, rê xa' nak men che'n Me, par wei' Me bixa' lo yibê'. ¹⁵ Kuze', nela xmod mile' Señor Jesukrist mandad, kidi'zh no lo go. Or yubre Jesukrist, galo laka rê xa' nzho le'n ba' chê'l lo Me lo yibê'; orze' nzha rê be, xa' se'gaka naban yizhyuo re'. ¹⁶ Lê' yub Jesukrist lali dizde lo yibê' no le' Me mandad ruban rê men che'n Me xa' ngut la, mbaino ganj xa' más nile' mandad naye di'zh ganj, no xtu ganj kwe'zh trompet che'n Dios; orze' rê men che'n Jesukrist, xa' ngut la, ruban. ¹⁷ Orze'se, rê be xa' se'gaka naban yizhyuo re', lê' be kili par zhê'l be le'n xkao kun más rê xa' galo laka nkili, nes par ze', tutsa zhê'l rê be kun lê' Señor Jesukrist; orze' par dubta' yo be kun lê' Me. ¹⁸ Por rê kure', bitsiro'b go la wech go (bile' go, nayat laxto' wech go), tu go kun xtu go, lo rê kwa'n nizak go.

5

¹ Nal, wech no bizan, men che'n Jesukrist, gat naki'ntra' zob no lo yech re', pok gak rê kure', cho mbëo'we o cho zhêi; ² lê' go nzhon la, yent cho nane or zhin zhê yubre Jesukrist; lê'i gak nela tu yê'l or ño tu wa'n lizh men ga'. ³ Gab rê men yizhyuo: "Ni tu xigab, chul nzhin rê be; yent por kwan le' be xigab", per jdi'l, zhin rê kwa'n lo'x bixa', nela yalne che'n tu una' gal xin; yent cho ka'n lo rê kwa'n lo'x rê men re'. ⁴ Per go, wech no bizan, men che'n Jesukrist; gat nut go nzhin lo nakao; lê' go nane la rê kure'. Kuze', nazhint zhê re' lo go nela tu wa'n ga', ⁵ porke rê be xa' nak men che'n Jesukrist, nak be men nzo lo biani che'n ngubizh ga', gat nakt be nela rê men nzo lo nakao che'n yê'l ga'. ⁶ Kuze' la, naki'n gak natsin be; nagakt be nela más rê men xa' gat ñat laxto', nela tu men naxnaa ga'. ⁷ Lê' go nane ka, más nix nzha' men yê'l, no yent cho kwent niza' bixa' rê kwa'n nzhak; mbaino rê xa' nzhoi, más nizuzh bixa' yê'l, no se'ska gat niza't bixa' kwent rê kwa'n nzhak. ⁸ Per be, men che'n Dios, gat nile't be rê kwa'n nzhak lo nakao, kuze' ñal gak natsin be lo rê kwa'n nzhak. Nela xmod nile' rê sondad lo dil, nikina bixa' bixa' kun rê yi'b kwa'n kinu bixa', se'ska naki'n kina be be lo rê kwa'n gat lê': Dubta' yila be widi'zh nazhon che'n Dios, no nazhi' be wech be, men che'n Jesukrist, mbaino wanei cho men; no naki'n tsila be, lê' Dios kubchi be lo rê kwa'n zakzi Dios rê men xa' gat nzhoit ro' Dios. Par be, kure' nak nela tu yi'b ga' par kina be be,

⁹ porke nangagot Dios be par lox be lo yalzi; lê' Dios ngulo be par ban be dubta' por rê kwa'n mile' Señor Jesukrist por be. ¹⁰ Ngut Me por be; kuze', ter naban be o ngut be yizhyuo re', per lê' be ban par dubta' kun lê' Me. ¹¹ Nal ñal bitsiro'b go la wech go (bile' go, nayat laxto' wech go), tu go kun xtu go, mbaino bile' go, ro'b tu go kun xtu go lo rê che'n Dios, nela xa kile' ka go.

Lult kwa'n midizh Pab

¹² Rê go wech no bizan, men che'n Jesukrist, dox kina'b no lo go, gop go kwent rê xa' dox nile' xigab por go, nitse'd bixa' go ban go nela xmod nzhakla Señor Jesukrist. ¹³ Biwi' go wen lo bixa', no bichizhi' go bixa' por rê kwa'n nile' bixa' por go; no chul guzhin go tu go kun xtu go. ¹⁴ No kina'b no lo rê go, men che'n Jesukrist; xa' nicha'b kê zhi'n xid go, bilu'zh go bixa' (biza' go kunsj bixa'); no rê xa' nzhakla ro' ya' lo widi'zh che'n Dios, bitsiro'b go laxto' xa'; mbaino bixek go lo rê men nakap lo go. ¹⁵ Bikina go go, nayat go lal kun men nile' nakap lo go; más wen zilita' bile' pa' go par le' go kwa'n wen tu go kun xtu go, no wanei kun cho xtu men. ¹⁶ Zilita' bizak laxto' go, ¹⁷ no dubta' nayazhat go na'b go lo Dios. ¹⁸ Lo rê kwa'n nizak go, biza' go xkix lo Dios; kure' nzhakla Dios por nak go men che'n Jesukrist. ¹⁹ Nale't go naya' lo rê kwa'n nazhon nile' Sprit che'n Dios xid go, ²⁰ no ni nayi'd yek go, le' go xigab, ka mbêl rê widi'zh kwa'n nidi'zh men por Sprit che'n Dios. ²¹ No or gon go rê widi'zh re', gurêl goi, no chi che'n Diose, wayila goi; ²² no yubchi go lo rê kwa'n gat lê'.

²³ Kina'ba lo yub Dios, Me nile', nizi rê men che'n Me chul, dizde le'n laxto' bixa', par tsumbe Me laxto' go lo rê kwa'n, no alm che'n go, mbaino kwerp che'n go, par nane Señor Jesukrist ni tu kwan gat lê' nak go or yubre Me. ²⁴ Dios ngule go par gak go tu ben men par lê'tsa Me. Por nile' Me rê kwa'n nila' Me di'zh, nanen, lê' Me le' rê kwa'n kina'ba lo Me por go.

Tu widi'zh wen par rê go, men che'n Jesukrist

²⁵ Rê go wech no bizan, men che'n Jesukrist, bina'b go lo Dios par gaknu Me no. ²⁶ Guzen go ya' rê wech be no bizan be, men che'n Jesukrist xa' nzho ba', mbaino uni' go lo bixa' kun dub laxto' go. ²⁷ Dilant lo Señor Jesukrist, kika'ba lo rê go, go'l go yech re' lo rê men che'n Jesukrist xa' nzho ba'. ²⁸ Lê' Señor Jesukrist gaknu rê go. Sa' gake.

2

Yech mirop kwa'n mixë'¹ San Pab lo rë men che'n Jesukrist xa' nzho yezh Tesalónica

Men che'n Jesukrist, zma go, chi wen ka go?

¹ Na Pab kun Silvan no Timoteo; kixë'¹ lo yech re' lo rë go, men che'n Jesukrist, rë xa' nzho yezh Tesalónica, rë go xa' nak tutsa kun Xuz be Dios no kun Señor Jesukrist. ² Kina'b no lo Xuz be Dios no lo Señor Jesukrist, par se'gaka ya go wen, mbaino par zi go chul dizde le'n laxto' go.

Lë' Dios zakzi rë men nzë'b xki or yubre Jesukrist

³ Rë go wech no bizan, men che'n Jesukrist, zilita' niza' no xkix lo Dios por go. Ñal le' noi por dox nzaro'b kwa'n ñila go widi'zh che'n Dios, mbaino por dox kiyar kwa'n nazhi' go wech go, men che'n Jesukrist. ⁴ Kuze', dub nizak laxto' no, nize't no go lo más rë men che'n Jesukrist, por se'gaka kixek go, nzo go wen lo widi'zh che'n Dios, ter kizakzi rë men go, kidedo go lo rë kwa'n. ⁵ Por kixek go, se'gaka nzo go wen lo Dios, nal lë' Me niwi', por kizak go rë kuba', ñal ka yo go plo nile' Dios mandad par dubta'. Kure' nilu', lë' Dios nigobe' nela xa ñale. ⁶ Kuze', rë men xa' nile' nizakzi go, sa' ska le' Dios kun lë' bixa'. ⁷ Per or ruxo'b Jesukrist lo yibë' kun yalnazon che'n Me kwa'n maska nzobol, no kun rë ganj che'n Me, rë xa' más nile' mandad, orze'se xax go lo rë kwa'n nizak go, mbaino nu ska no. ⁸ Orze' kun bël kwa'n nzobol ze', zakzi Jesukrist rë men xa' nile' naya' lo Dios, net bixa' gon bixa' widi'zh nazhon che'n Dios por Jesukrist, Me nile' mandad be. ⁹ Rë men nad re', par dubta' zakzi bixa'; zit ya'n bixa' lo Jesukrist, Me nile' mandad be, mbaino lo yalnazon kwa'n nilu' lë'gaka Me Dios. ¹⁰ Or ruxo'b Señor Jesukrist lo yibë' kun rë yalnazon che'n Me, orze' lë' rë men che'n Me di'zh, lë'gaka Me nazhon, mbaino xe ya'n bixa' tuli; no xid rë xa' re', nu go yo, por ngwayila go widi'zh nazhon che'n Me kwa'n midi'zh no lo go.

¹¹ Kuze', zilita' nina'b no lo Dios por go, par wi' Dios, lë' go ñal ka gal kwa'n kinu Dios par go dizde or ngule Me go. No nu nina'b no lo Me, gaknu Me go kun yalnazon che'n Me, le' go rë kwa'n wen kwa'n nzhakla go le' go, mbaino más rë kwa'n por ñila go Me, ¹² nes par rë men di'zh dox nazhon Señor Jesukrist por wen nzo go kun Dios, orze' wen ya'n go lo Dios, por dox wen Xuz be Dios no Jesukrist, Me nile' mandad be.

Xmod gak or rulo xa' niyi' nine Jesukrist

¹ No nal, wech no bizan, di'zh be xmod gak or yubre Jesukrist, no xmod yo be kun lë' Me. Dox kina'ba lo go, ² nala't go kide men go, no ni nala' go cheb men go, xa' di'zh: "Guzhë mizhin zhë yubre Jesukrist lo yizhyuo re'." Napa' midi'zh tu men lo go, lë' Sprit che'n Dios nzhab kure' lo xa'; o midi'zh xa', no nzhabe lo xa'; o no mikë'i lo yech, orze' mixë'¹ noi lo xa'. ³ Nala't go chi cho gakla kide go lo ni tu kwa'n, porke antis di yubre Jesukrist, galo daka yo nayax men yi' ne Dios, orze' yaxo'b tu xa' dox nayi'lazh lo Jesukrist, xa' nak la di'zh, lox lo Dios. ⁴ Lë' men re' gak, xa'gaka más niyi' nine Dios, no gakla xa', lë' xa', xa' más tsak lo rë kwa'n zak men Dios, mbaino lo rë kwa'n nizuxib men lo; no haxta zob xa' le'n pa' yado' che'n Dios, no por rë kwa'n le' xa', gab xa' Dios xa'. ⁵ Bitsila go, lë' da midizh la kure' or nzon lo go. ⁶ No lë' go nzhon la kwan nala't yaxo'b xa' ba' nal re', par nayi'd xa' or naga gal or che'n xa'. ⁷ Por kwa'n nile' Mizhab, nzho nayax men yizhyuo xa' nila' nzë'b ley che'n Dios por nayi'lazh bixa'. Per nayi'd gat xa' re', chi nakubchi Dios kwa'n nika lo xa'. ⁸ Per or kubchi Diöse, orze'se yaxo'b xa'gaka más niyi' nine Dios, per lë' Señor Jesukrist gut xa' re' kun nab tsa mbi ro' Me, lo'x Me xa' kun yalnazon che'n Me kwa'n maska nzob yol or yubre Me yizhyuo re'. ⁹ Or yaxo'b xa' nayi' nine Dios re', dox gaknu Mizhab xa', le' xa' nayax kwa'n chigab walika nazhon lo yizhyuo, per ka par kide xa' mene; ¹⁰ kun rë lo kwa'n mbël le' xa' par kixkan xa' yek rë men, xa' nak la di'zh lox lo Dios por nangaya la bixa' or mbin bixa' widi'zh nazhon che'n Dios, orze' ngago' Dios bixa' lo rë kwa'n nazhe'b nzho bixa'. ¹¹ Por nane bixa' yila bixa' rë kwa'n wali, kuze' zhi'n ka la' Dios goch yek bixa' par más yila bixa' rë kwa'n mbël, ¹² nes par kube' Dios xmod nak rë xa' nangazi'yëlt ngayila widi'zh nazhon che'n Dios, lë'la kwa'n mbël más ño laxto' bixa'.

Rë xa' ngule Dios ban dubta'

¹³ Per no, zilita' nile' no kwa'n ñal, niza' no xkix lo Dios por rë go, men xa' nazhi' Jesukrist. Ngule Dios go dizde or galo par ban go dubta'; lë' Sprit che'n Dios mit-sumbe la go por mizhela go widi'zh nazhon che'n Dios, mbaino ngwayila goi. ¹⁴ Por kure' ngurezh Dios go, gal go rë kwa'n nazhon kinu Señor Jesukrist, por ngwayila go widi'zh nazhon che'n Dios kwa'n midi'zh no lo go.

¹⁵ Kuze', rë go wech no bizan; ñal guzo go wen lo rë widi'zh nazhon kwa'n milu' yub no lo go, mbaino rë widi'zh kwa'n midi'zh no lo go, lo rë yech mixë'¹ no.

¹⁶ No nal, lè' yub Jesukrist, Me nile' mandad be, mbaino Xuz be Dios, Me nazhi' be no nitsiyal laxto' be par dubta', no por lè' Me nane be, lè' be gal kwa'n mila' Me di'zh par be por dox wen Me kun be; ¹⁷ kina'b no lo Xuz be Dios no lo Señor Jesukrist, par yent kwan ya laxto' go lo rē kwa'n nizak go, no par más yar rē kwa'n wen nile' go no rē kwa'n nidi'zh go.

3

Bina'b go lo Dios por no

¹ No lult, rē go wech no bizan, men che'n Jesukrist, bina'b go lo Dios por no, par gaknu Me no, yadi'zh no widi'zh che'n Dios más rē plo, mbaino par or gon mene, gab bixa' nazhone, nela xmod mile' go ga'. ² No nu bina'b go par kina Dios no lo rē men nayi' lazh, no lo rē xa' minu la lo rē kwa'n nakap, porke gat lè't rē men yila Jesukrist. ³ Per nile' Señor Jesukrist rē widi'zh kwa'n nila' Me di'zh, kuze' nane ka no, lè' Me le', más yar rē kwa'n wen nile' go, no kina Me go par nale' go rē che'n Mizhab. ⁴ No niza' no xkix lo Dios por go, porke nane no, lè' go kile' ka rē kwa'n mile' no mandad le' go, mbaino lè' go le'ra' rē kwa'n milu' no lo go. ⁵ Kina'b no lo Señor Jesukrist gaknu Me go, se'gaka zi go xmod nak kwa'n nazhi' Dios go; mbaino par xek go lo rē kwa'n nela xmod mixek Jesukrist ga'.

Xa' nane kē zhi'n, gaot ska xa'

⁶ Rē go, wech no bizan, men che'n Jesukrist, kile' no mandad go kwa'n mika'b Señor Jesukrist lo no, nachē'lt go kun cho tu rē men che'n Jesukrist, xa' gat nzhaklat kē zhi'n, no gat nzhaklat ban nela xa milu' no ban go. ⁷ Lè' go nane ka xmod miban no xid go; sa' ñal le' go. Or nguzo no xid go, nangacha'bt no ngakē no zhi'n gao no. ⁸ Ni tu kwan nangaot no se'ga xid go, sino ke zhē-yē'le vid nkē no zhi'n, par nangazo no zhi'n lo ni tu go. ⁹ Sa' miban no xid go ter ñal ngaxē'n go no, per por milu' no xmod ñal ban go, sa' mile' no. ¹⁰ No bitsila ska go, dub nzo no kun go, mile' no mandad: "Xa' nane kē zhi'n, gat ñalt ska gao xa'", ¹¹ porke nzhon no, nzho pla xa' xid go, xa' nanet kē zhi'n, per par kwent che'n mense lē'la ka bixa'. ¹² Lo rē men re' kika'b no kwa'n ne Señor Jesukrist lo no, kē bixa' zhi'n gao bixa', no nakuro'tra' bixa' kwent che'n xtu men. ¹³ No lo más rē go wech, men che'n Jesukrist, nayazhat go le' go kwa'n wen. ¹⁴ No chi tu rē men che'n Jesukrist xa' nzho xid go, nanet gon kwa'n kile' no mandad lo yech re', bila'ch go choi no nachē'lt go kun lē' xa', par zi xa' kwa'n nak xa', ¹⁵ per nawi't go lo xa' nela tu men niyi'u nineu ga', más wen bilu'zh go xa' (biza' go kunsej xa') nela tu men che'n Jesukrist ga'.

Lult widi'zh nazhon kwa'n mina'b Pab

¹⁶ Kina'b no lo Señor Jesukrist, Me nile' ña'n wen laxto' men, lè' Me le', zilita' zi go chul dizde le'n laxto' go, wanei kwan nizak go. Lè' Jesukrist, Me nile' mandad be, zo kun go dubta'.

¹⁷ Na Pab, yuba kikē'n widi'zh nazhon re' par rē go ya wen. Se' nilen lo rē yech da, par nakbe' letr da. ¹⁸ Lè' Jesukrist, Me nile' mandad be, gaknu rē go. Sa' gake.

Yech galo kwa'n mixë'¹ San Pab lo Timoteo

¿Mal wech, men che'n Jesukrist? ¿Chi wen kal?

¹ Na Pab, lë' Dios no Krist Jesús mile' mandad, nak da tu apost; Dios Me nigo' be lo rë kwa'n nzë'b xki be; no Krist Jesús, Me niza' yalnaban ka' rë men che'n par dubta'. ² Kixëla yech re' lol, Timoteo, lu nak nela tu xga'na, por ngwayilal widi'zh che'n Krist Jesús kwa'n midizha lol; lë' Xuz be Dios no Señor Krist Jesús gaknul, no lats laxto' Me lu, no zil chul dizde le'n laxto'.

Neu kun rë xa' nilu' widi'zh che'n Dios xa'la mod

³ Nela mika'ba lol or nkizë'n rë yezh kwa'n nzhin lazh men Macedonia, nin ya'nal yezh Efeso par di'zhnul pla rë men xa' nilu' widi'zh che'n Dios xa'la mod, par nale'tra' bixa'i, ⁴ mbaino ni nadi'zh ra' bixa' rë kwent kwa'n michao'yek men nzhalo, o por cho ngok rë melizh men xa' tiemp; porke rë kure' nile' nichë'lro' men maska bixa' le' kwa'n mika'b Dios lo bixa', di'zh bixa' widi'zh nazhon che'n Dios lo men. ⁵ Kwa'n mika'ba lol nak gaknul bixa' chizhi' bixa' tu xa' kun xtu xa', porke men nzho yalnazhi' laxto', nikwa'n xa' ya xtu men wen, no nane xa' cho kwa'n wen no cho kwa'n gat lë', mbaino yub pa' lë' widi'zh che'n Jesukrist ñila xa'. ⁶ Nzho bixa' mila' la rë kwa'n wen re'; guzhe miziwan bixa' lo rë widi'zh yent yek. ⁷ Nzhakla bixa' lu' bixa' ley kwa'n mila' Dios lo Muisés, per ni nazobyeq bixa' cho widi'zh kidi'zh bixa'; no per ni kwa'n nilu' bixa' dub la bixa', nanet bixa' kwane.

⁸ Nane be, nizu' ka ley par ya men wen, per nab tsa chi nane men xmod ñal le' men kwa'n nzhabë, ⁹ porke nangagot Dios ley par men wen; Dios nguloi par rë men xa' nayi'lazh nzhon ley che'n Dios, par rë men yent kwan nzhon tuli, no par rë men gat nzhapt kwent ni tu rë kwa'n nazhon che'n Dios; mbaino par rë xa' naban lo kwa'n nayi' par lo Dios no lo rë xa' naban lo rë kwa'n nakap; par rë xa' yent kwan ña laxto' lo rë che'n Dios, mbaino par rë xa' nzhut xuz o xna', o wane'i cho xtu rë men. ¹⁰ No nu ngulo Dios ley par rë xa' niban kun cho la men no par rë xa' niban kun tsa' miyi' o kun tsa' una', mbaino par rë xa' nito men nela tu ma ga', no par rë men nikë' mbël no nu par rë xa' nize't Dios or nikë' xa' mbël. Par kuze' ngulo Dios rë ley par tse'd Dios rë men xa' nilu' wane'i cho xtu rë kwa'n nika lo widi'zh lë'tsa lë' che'n Dios. ¹¹ Rë kure' mika'b Dios lon par dizha widi'zh nazhon re' lo rë men.

Niza' Pab xkix lo Dios

¹² Nizan xkix lo Krist Jesús, Me nile' mandad be, mbaino mine' Me yalnazhon che'n Me kan, miwi' Me lon, nela lo tu men dox nzhon ro' Me, ngule Me da par len zhi'n nazhon che'n Me. ¹³ Mile' Me da tu men che'n Me, ter ngok da or galo tu xa' mizhibde widi'zh che'n Me, no ngurukë'n tich rë men che'n Me par mizakzin bixa'; per milats laxto' Me da, porke nagat yilan widi'zh che'n Me, kuze' naneta chi nayi' kwa'n kilen. ¹⁴ Per por dox wen Jesukrist, Me nile' mandad be, gat ñalta' da kwa'n mile' Me kuda, nak da tu men che'n Me, kuze' nazhi' da rë men. ¹⁵ Walika widi'zh re', no ñal yila mene: Mbi'd Krist Jesús yizhyuo re' par ko' Me rë men lo kwa'n nazhe'b nzho bixa', xa' nzë'b xki lo Dios; no xid rë men re', na galo laka más nzë'b xki lo Dios. ¹⁶ Ter sa' ngok da, per milats laxto' Krist Jesús da par milu' Me lo rë men, dox nixek Me lo rë kwa'n nakap nak men, no par ne rë men kwa'n mile' Me kuda, par nu bixa' yila Me, orze' gal bixa' yalnaban par dubta'. ¹⁷ Rë men ñal di'zh nazhon rey Me nzho par dubta', rey Me nayot gat. Yent cho gak ne lo Me, no tugaka Me nak Dios. Dubta' ñal di'zh men dox nazhon Me. ¡sa' gake!

¹⁸ No lu, Timoteo, xa' nak nela xga'na ga' por ñilal widi'zh che'n Dios kwa'n milun lol; kika'ba lol rë widi'zh kwa'n ne pla rë xa' nidi'zh por Dios lol, or ne bixa' kwa'n nzhab Dios por lu. Bin kwa'n ne bixa', guzo natsin nela tu sondad kwa'n nidil. ¹⁹ Se'gaka wayila widi'zh nazhon che'n Dios, no bile' nab tsa kwa'n nanel wen; nagaktal nela pla rë xa' kwa'n mia'l laxto' rë kure', mila' bixa' widi'zh nazhon che'n Dios; orze' ngok bixa' nela tu bark kwa'n michil nits. ²⁰ Xid rë men re' nzho Himeneo kun Jand, no milan bixa' lo Mizhab, par tse'd bixa' nalu' ra' bixa' widi'zh che'n Dios xa'la mod.

2

Nilu' Pab xmod ñal na'b men lo Dios

¹ Xid rë kure', kwa'n galo laka kika'ba, bilu' lo más rë men che'n Jesukrist, na'b bixa' lo Dios por rë men, wane'i xmod ñale; mbaino nu ñal za' bixa' xkix lo Dios por rë men; ² mbaino bilu' ñal na'b bixa' por rë rey, no por rë xa' nile' mandad, par ban be tu vid chul, yent kwan zheb be, nes par le' be kwa'n nzhakla Dios, mbaino kwa'n ñal lo rë men, ³ porke dox wen kure' mbaino nizak laxto' Dios or nina'b be sa' lo Me. Lë' Me ngulo' be lo kwa'n nazhe'b nzho be, ⁴ no se' ska nzhakla Me kun rë men, ro' bixa' lo kwa'n nazhe'b kwa'n nzho bixa', libe' bixa' widi'zh nazhon che'n Jesukrist. ⁵ Tugaka Dios nzho, mbaino tutsa Krist Jesús, Me nidi'zh lo Dios por be, no por lë' Me mila' Dios di'zh xtu wëlt par be. Nu nak Krist

Jesús tu men yizhyuo. ⁶ Yub Me michi Me Me, ngut Me par ndix Me rë kwa'n nzë'b xki men; ngok kure' haxta tiemp mizo Dios, or ngokla Me ne men xmod ko' Me bixa' lo rë kwa'n nzë'b xki bixa'. ⁷ Por kure', mizo Dios da nak da tu apost, tu men ñadi'zh widi'zh nazhon re' lo rë men xa' gat lë't men Israel, par ne bixa' no par yila bixa' kwa'n walika nak widi'zh che'n Krist Jesús. ¡Walika kwa'n kinin re', gat lë't mbële!

⁸ Kuze', rë plo nibin men che'n Dios, or lits rë xa' miyi' ya' par na'b bixa' lo Dios, nzhaklan nambe laxto' bixa' lo Dios; gat ñalt na'b bixa' lo Dios dub nzho xian laxto' bixa' por nichëlro' bixa' kun wech bixa'. ⁹ No rë una' xa' nzho xid bixa', gat ñalt gak bixa' lar kwa'n gat ñalt gak rë men che'n Jesukrist. Gat ñalt, zo bixa' dox nabe, o dox chul li'b yek bixa', o gap bixa' rë kwa'n gor o rë perla; o gak bixa' dox lar wen. ¹⁰ Más wen wi' men lo rë una' por rë kwa'n wen nile' bixa', porke sa' nilu', nak bixa' men nzhon ro' Dios. ¹¹ No or kilu' rë xa' miyi' widi'zh che'n Dios, ñal xe zob rë una', nes par nilu', nzhon bixa' ro' miyi'. ¹² No naziyëlta, lu' tu una' widi'zh che'n Dios lo miyi', o le' una' mandad lo miyi'; más wen xe zob rë una' or nibin go lo kult, ¹³ porke galo laka mizuxkwa' Dios Adán, orze' mizuxkwa' Me Yëv, ¹⁴ no nangakidet Mizhab Adán, lë' Mizhab mikide Yëv, kuze' lë' una' ngop dol lo Dios. ¹⁵ Per Dios ko' rë una' lo rë kwa'n nzë'b xki bixa' por gap bixa' më'd, no dubta' yila bixa' widi'zh nazhon che'n Dios, mbaino chizhi' bixa' wanei cho men no ban bixa' nab tsa par Dios, mbaino nu nagakt una' tu xa' dox nabe.

3

Xmod ñal le' rë xa' nizo lo rë men che'n Jesukrist

¹ Walika widi'zh re': Cho tu miyi', men che'n Jesukrist, nzhakla gak, xa' zo dilant lo rë men che'n Dios, nazhon zhi'n nile' xa' xigab. ² Per, naki'n gak xa' tu men, yent cho gak gab kwan tu kwa'n nak xa'; no ñal gap xa' tutsa una', mbaino gak xa' tu menaye lo rë kwa'n nile' xa', no wenawen nile' xa' xigab or nile' xa' tu kwa'n, mbaino niwi' laka xa' kwan le' xa'; no dub la xa' niza' xa' tu plo ya'n men lizh xa', no nu nzhak xa' nilu' xa' widi'zh che'n Dios. ³ No nagakt xa' nguy, mbaino nagakt xa' tu men nichao' dil, no ni nagakt xa' tu men nikide men par le' gan dimi; ñal gak xa' tu men nado' laxto' mbaino gak xa' tu men nile' nibin men wen; no nawixt xa' gap xa' dimi. ⁴ No ñal gak xa' tu men nigo gobier lizh, mbaino nizob rë xmë'd xa' xti'zh xa' no nile' bimë'd kwa'n ñal. ⁵ No chi gat nigo tu men gobier lizh, orze', ¿xmod kina xa' rë men che'n Dios? ⁶ No lo rë men re', gat ñalt zo tu xa' laore ngwayila

widi'zh che'n Dios, napa' zi xa' dox ya, orze' zak xa' nela kwa'n nguzak Mizhab, no zakzi Dios xa'. ⁷ No nu, ñal yët xa' wen xid rë men xa' gat lë't men che'n Jesukrist, no chi yët xa' gat lë', orze' nayilatra' men xa', mbaino ya'n xa' gat lë' lo Dios por Mizhab.

Kure' ñal le' rë xa' nzhaknu más rë men che'n Jesukrist

⁸ Se'ska ñal gak rë xa' nzhaknu más rë men che'n Jesukrist: Ñal gak xa', xa' nile' lë'ska lë' tu kwa'n, no gak xa' tu men nile' kwa'n nidi'zh; nagakt xa' tu nguy, no ni nakide xa' men par le' xa' gan dimi. ⁹ No ñal se'gaka ban bixa' lo kwa'n mitse'd bixa', par zi bixa' yent kwan nak bixa' lo rë widi'zh nazhon che'n Jesukrist kwa'n nguluxo'b Dios lo be. ¹⁰ Ñal galo laka gurël go chi wen ka nzo rë men re' lo Dios, no chi yent kwan nak bixa', orze' bizo go bixa' lo zhi'n re'. ¹¹ No se'ska rë una', xa' nzhakla gaknu xid más rë men che'n Jesukrist, ñal gak bixa' men nile' lë'ska lë' tu kwa'n, no nagakt bixa' men di'zhyix; naki'n gak bixa' menaye lo rë kwa'n nile' bixa', mbaino lë' bixa' rë kwa'n nidi'zh bixa'. ¹² Tu xa' gaknu más rë men che'n Dios, ñal tutsa una' gak tsa' xa', no gak xa' tu men nigo gobier re' xa' lizh xa', ¹³ porke rë xa' walika niro' wen lo zhi'n re', orze' wen ñët xa' xid más rë men, mbaino yent por kwan zheb xa' di'zh xa' widi'zh che'n Krist Jesús lo men.

Dox nazhon widi'zh kwa'n ngulu'xo'b Dios lo be

¹⁴ Kixëla yech re' lol, ter lë' da yal ka yi'dtsi'mal, ¹⁵ no chi lë' da lë' ra', lë'i nane la xmod tse'dal rë men che'n Dios, Me naban par dubta', nes par rë men re' kina widi'zh nazhon che'n Dios, nela yatso no simient che'n tu yuo' nzene dub yuo'. ¹⁶ Lë'i walika, dox kwa'ro widi'zh nazhon che'n Dios kwa'n nguluxo'b Me lo be:

Or mbi'd Jesukrist yizhyuo re', ngok Me tu men,

mbaino milu' Sprit che'n Dios, tugaka Me nak Xga'n Dios,

no une rë ganj che'n Dios Me, mbaino haxta rë men gat lë't men Israel mbin widi'zh che'n Me.

No rë plo ngwayila men widi'zh nazhon re', mbaino Xuz Me Dios mbi'y Me lo yibë' plo nzho yalnazhon.

4

Rë xa' la' widi'zh nazhon che'n Dios

¹ Per nal, zhë laka nidi'zh Sprit che'n Dios, or nzhazhin gax la yë'd Jesukrist, lë' nayax men yo, xa' la' widi'zh nazhon che'n Dios, más yila bixa' rë widi'zh gat lë' kwa'n nzë lo rë mbi mal, kwa'n nikide men. ² Lë' rë widi'zh re' yo por rë men mbël, rë xa' chigab walika men wen; per ni gat nize'nra' bixa'

chi nakap kwa'n nile' bixa'. ³ Rë men re' di'zh, nayi'y par lo Dios, kwa'n men tsa' men, no nu di'zh bixa', nzho kwa'n nayi' gao men. Per rë kwa'n gak gao men, xa' ñila nab tsa widi'zh nazhon che'n Jesukrist, or niza' xa' xkix lo Dios por lë'i. ⁴ Rë kwa'n ngulo Dios, rëi wen gao be or niza' be xkix lo Dios por lë'i; kuze' gat ñalt gab be, nzho kwa'n nayi' gao be, ⁵ porke rë kwa'n nzaho be nzhak nambei por widi'zh che'n Dios or nina'b be lo Me par tsumbe Mei.

Tu mos wen che'n Jesukrist

⁶ Chi lë'l lu' rë kwa'n kidizha lol, lo rë wech be, men che'n Jesukrist, orze' walika nakal tu mos wen che'n Me; nzadro'bal lo rë che'n Jesukrist kwa'n ngwayilal no kwa'n nanel, walipa' widi'zh nazhon che'n Dios. ⁷ Per nakinzhatal rë widi'zh yent yek che'n rë men yizhyuo re', no rë kwa'n nidi'zh rë men nzhala; más ñal bitse'd rë kwa'n nzhakla Dios. ⁸ Ter nzho men ña plo nzhak naye kwerp che'n men, per zu'te par rë kwa'n; más nizu' par men, tse'd xa' kwa'n nzhakla Dios, porke dox nazhon kwa'n niza' Dios par men, wanei ploi, yizhyuo re'i mbaino nu haxta plo wei' Me be. ⁹ Walika widi'zh re', no ñal rë men yilai. ¹⁰ Por nile' be kwa'n nzhakla Dios, vid nine be no nidil be kun rë che'n Mizhab, por kimbëz be, ban be dubta' kun Dios, Me nayot gat. Dios nzhakla ko' rë men lo kwa'n nazhe'b nzho bixa', per más nile' Me por rë men ñila widi'zh che'n Me.

¹¹ Bika'b rë kure' lo rë xa' nitse'dal, par le' bixa'i. ¹² Naziyëltal chi cho nagon ro'l por xil; wanei, bilu' lo rë men che'n Dios xmod nidi'zhal no xmod nile'l kwa'n lë'ska lë'; no xmod nazhi'l men, mbaino xmod ñilal widi'zh che'n Dios, no xmod nile'l kwa'n lë'ska lë'; bikinal par yent cho gak gab kwan tu kwa'n nakal. ¹³ Dub nilë' yala, bile' pa' por go'lal widi'zh che'n Dios lo rë men, no bilu' kwan nzhabe, mbaino bidi'zhnu bixa'. ¹⁴ Bikën laxto' le'l zhi'n nazhon kwa'n mine' Dios nka'l, or mixo'b rë xa' nzo lo rë men che'n Jesukrist, ya' bixa' yekal. ¹⁵ Zilita' gulo yek, le'l rë kure', par lu', nza'dro'bal lo rë che'n Dios. ¹⁶ Biwi' xmod nikizël lo rë che'n Dios, no xmod nilu' widi'zh che'n Dios lo rë men, mbaino nayazhatal le'l rë kure', nes par galal yalnaban par dubta' kun rë xa' nzhon kwa'n nilu'.

5

Xmod ñal le' be xid men che'n Jesukrist

¹ Or lu'zhal rë xa' miyi' ngwagal la, nadi'zhtal nayi' lo xa'; chul bidi'zh lo xa' nela men nidi'zh lo xuz ga'; mbaino lo rë miyi' xi, bile' kun lë' bixa' nela nile' men kun tu wech men. ² No kun rë xa' una' ngwagal la, bile' kun lë' bixa' nela nile' men kun tu xna' men; mbaino kun rë xa' xi, bile' kun

lë' biuna' nela nile' men kun tu bizan men; yent cho xigab gat lë't le'l kun lë' biuna'.

³ No biza' kwa'n naki'n rë una' ngut xmiyi', xa' yent cho nzhap. ⁴ Per chi lë' una' re' nzhap rë xmë'd o nzhap xa' xinxots xa', más wen tse'd rë mè'd re' lu' bixa' walika men che'n Dios bixa' or gaknu bimë'd xna' mè'd o xnit mè'd, nela xmod mixë'n xa' bimë'd, porke se' ño laxto' Dios. ⁵ No nal, una' xa' ngut xmiyi', no walika yent cho nzhap xa', xa' re' nab tsa lo Dios niwi' xa' par gaknu xa', zhë-yë'le nina'b xa' lo Me kwa'n naki'n xa'. ⁶ Per chi nzho tu una' xa' ngut xmiyi', no naban xa' nela xmod nzhakla xa', orze' par lo Dios ngut la una' re'. ⁷ Bika'b le' bixa' rë kwa'n ñal, par yent cho gab kwan nak bixa'. ⁸ Per chi xid go nzho tu men che'n Jesukrist, xa' ngut xmiyi' rë melizh, no ni rë xa' lizh xa', orze' mila' la xa' re' widi'zh che'n Dios tu lad, mbaino par lo Dios, más nzë'b xki xa' ke tu men naga yila Dios.

⁹ No bizobni' lo yech nab tsa lë rë xa' una', xa' ngut xmiyi', xa' nzhap dizde chon galli'n par al ya, per chi ngop xa' tutsa miyi'; orze' gak gaknu go xa'. ¹⁰ No ñal yët xa' wen por rë kwa'n wen mile' xa': Chi wen ka mixë'n xa' rë xmë'd xa', chi miza' ka xa' lizh xa' ya'n rë men dub la xa', no chi ngoknu xa' kun yalnado' rë men che'n Jesukrist, no kun rë xa' une yalnalats, mbaino chi mile' ka xa' rë kwa'n ñal.

¹¹ Per nazobtal lë rë una' xa' xi, xa' ngut xmiyi', napa' gakla bixa' lë' bixa' rë kwa'n nzhakla kwerp che'n bixa', orze' lë' bixa' ya'l laxto' kwa'n mia'n bixa' di'zh lo Jesukrist por kwa'n bixa' xtu miyi', ¹² no or nile' bixa' kure', ña'n nzë'b xki bixa' lo Dios. ¹³ No gat lë't nab kure', nu nzhak jloj bixa': laba'i-lare'i nikizë bixa' lizh men; no gat lë't nab nzhak jloj bixa', nu di'zhyix bixa', mbaino niguro' bixa' che'n men no nidi'zh bixa' kwa'n gat ñal. ¹⁴ Kuze' nin, más wen par rë una' xi xa' ngut xmiyi', kwa'n bixa' xtu miyi' no gap bixa' mè'd, mbaino kina bixa' lizh bixa', nes par nadi'zh más rë men tich men che'n Jesukrist por Mizhab, ¹⁵ porke nzho una' xa' ngut xmiyi', nguro'ya' la lo nez che'n Dios par nile' bixa' kwa'n nzhakla Mizhab. ¹⁶ Chi nzho tu una', men che'n Jesukrist, no xid rë melizh xa' nzho tu una' ngut xmiyi', naki'n gaknu una', una' ngut xmiyi' re', par nazo una' re' zhi'n lo rë men yado', rë xa' nzhaknu rë una' xa' ngut xmiyi', xa' yent cho nzhap.

¹⁷ Rë xa' nizo lo más rë men che'n Dios, chi lë' bixa' wen ka nile' zhi'n nazhon che'n Dios xid rë men, ñal gax ka' bixa' mbaino wen biwi' go lo bixa'; per más ñal gax ka' rë xa' más nizo, no vid nine xa', nidi'zh widi'zh che'n Dios, mbaino nilu' bixa'i lo men; lo rë xa' re', más ñal wi' go wen, ¹⁸ porke se' nzobni' lo Yech che'n Dios: "Nakotal yex ro'

ngo'n or nigo' ma triu", no: "Men xa' niké' ñal gax ka' xa'."

¹⁹ Nayilatal kwa'n di'zh tutsa men, xa' kè' kixu' tu men xa' nizo lo más men che'n Jesukrist. Naki'n ne chop-chon xa'i par gax zhè' di'zh chi walikai. ²⁰ Per chi walika sa' nak tu rē men xa' nizo lo rē men che'n Jesukrist, orze' bilu'zh xa' (biza' kusej xa') dilant lo rē men che'n Jesukrist, nes par zheb más rē men che'n Jesukrist. ²¹ Dilant lo Dios kun lo Krist Jesús, Me nile' mandad be; mbaino kun lo rē ganj xa' ngule Dios; kika'ba lol par le'l rē widi'zh re', no nakwetal men or le'l kwa'n wen; tutsa bile' kun rē men. ²² Antis di kwel tu men par le' zhi'n nazhon che'n Dios, nakènt laxto'l, tuli ka xo'btal ya'l yek xa'; napa' por lé' xa', nul gap dol. ¡Guro' tuli lo rē kwa'n gat lé'!

²³ No nagotra'l nab tsa nits, gu' che'p vin, porke kad pok nzhaknel.

²⁴ Nzho ka xa', zhè laka nilu' nzè'b xki xa', ter naga kobe' (wi') Dios kwan nak xa'; mbaino nzho xa' gat nilu'te, per zhin zhè, lé'i yaxo'b. ²⁵ Se'ska nzhak or nile' men kwa'n wen; nzhoi zhè laka nilu' no nzho kai naga'ch, per zhin zhè, lé' rē men gone.

6

¹ Rē men che'n Jesukrist xa' nak mos nado lo xtu men, naki'n gon bixa' ro' xa' nile' mandad lo bixa', par yent cho di'zh gat lé' nak Dios, no por widi'zh che'n Me kwa'n nilu' be. ² Kuze', chi cho men che'n Jesukrist nak mos nado lo xtu men che'n Jesukrist, nale't xa' xigab, gat naki'nt gon xa' ro' xa' re'; más ñal le' xa' kwa'n gab xa' re' por nak xa' tu men che'n Jesukrist, mbaino por nazhi' Jesukrist xa'. Kure' ñal lu'l mbaino bika'b lo rē men che'n Jesukrist.

Ñal ban be nambe, mbaino zak laxto' be por kwa'n kinu be

³ Chi cho men nilu' widi'zh che'n Dios xa'la mod par lo widi'zh lé'tsa lé' che'n Señor Jesukrist, mbaino par lo widi'zh che'n Dios kwa'n nilu' xmod ñal ban be. ⁴ Men re' dox ya nizi xa', mbaino lalta' gat zobyek xa' widi'zh lé'tsa lé' che'n Dios. Minu la yek xa' por dox ño laxto' xa', ché'lo' xa' por wanej kwan tu kwa'n. No or nilu' bixa' rē kure' lo men, nike'd bixa'y men kwa'n nak bixa'; niwix men gap men kwa'n nak che'n xtu men, no nibin bixa' dil, mbaino niye bixa' wech bixa', no gat niwi't bixa' lo wech bixa' dub la bixa'. ⁵ Por nak bixa' sa', nayot lox ché'lo' bixa', porke minu la yek bixa' por gat nizobyek bixa' widi'zh lé'tsa lé' che'n Dios; zak bixa', por nak bixa' men che'n Jesukrist, le' bixa' gan nayax dimi. Yubchi lo rē men nak sa'. ⁶ Walika, dox wen nzha rē men che'n Jesukrist, per nab tsa par rē xa' nizak laxto' kun rē kwa'n kinu tsa xa',

⁷ porke or ngol be yizhyuo re', yent kwan nzadnu be; no ni or gat be, yent kwa'n wei' be; ⁸ kun nzho kwa'n gao be, no nzho kwa'n gak be; kun kure' namás nizak laxto' be. ⁹ Per rē xa' nzhakla gak rrik, lé' rē che'n Mizhab wei' xa' par ya'n cho'n xa' le'ne; wix xa' gap xa' nayax kwa'n yent yek, rē kwa'n nitsinu men; orze' nzhuwe'i' rē kure' xa' tu plo nagakra' ro' xa' par nizakziy xa', orze' nilo'xe xa'. ¹⁰ Or dox nile' men por dimi, orze' re' nzè rē lo kwa'n gat lé'; nzho men, por dox niwix xa' gap xa' dimi, nila' xa' widi'zh che'n Jesukrist, no nzhuwe'i' kwa'n gat lé' xa' plo dox niwin laxto' xa' por rē yalzi kwa'n kine xa'.

Wen ña men or nizo men wen lo rē che'n Dios

¹¹ Yubchi lo rē kuba', porke lu, nak tu miyi' xa' nilu' lé'ska lé' widi'zh che'n Dios; dub banal bile' kwa'n ñal no kwa'n nzhakla Dios; mbaino bitsiro'b más kwa'n ñilal Jesukrist no kwa'n nazhi'l rē men; no nu bitsiro'b laxto'l lo rē kwa'n nizakal, no gok nado' laxto' lo rē men. ¹² Por ñilal widi'zh walipa' che'n Jesukrist, bixek zakzil haxta plo nei; nes par galal yalnaban par dubta'. Por kure' la ngurezh Diosal, mbaino por lé'lai midi'zhal, dub mbin nayax men, lé'l ñila Jesukrist. ¹³ No nal, kika'ba lol, dilant lo Dios, Me nile' naban rē kwa'n nzho; no dilant lo Krist Jesús, Me nangazhebt ngadi'zh kwa'n wali lo Pons Pilat; ¹⁴ kinin lol, bile' rē kwa'n midi'zha lol; nalu'tal widi'zh che'n Dios xa'la mod par yent cho gak gab kwan tu kwa'n nakal lo ni tu men; dubta' bile' se' haxta or yè'd Jesukrist, Me nile' mandad be. ¹⁵ Dios le' zhin zhè re', tiemp kwa'n mizo Me; Dios Me tugaka nzha wen par dubta', mbaino Me tugaka nile' mandad lo rē kwa'n nzho; Dios Me nab tsa nak rey lo rē rey, mbaino nab tsa Me nile' mandad lo rē xa' nile' mandad. ¹⁶ Tugaka Me nak Dios Me nayot gat, no naban Me lo tu biani kwa'n nayi' nizini, plo yent cho gak zubi; mbaino nagat ne ni tu men Me, no ni nagak ne men Me. Tutsa lé' Me ñal di'zh men wen no nazhon, mbaino nab tsa lé' Me nile' mandad par dubta'. Sa' gake.

¹⁷ Lo rē men dox kinui, bidi'zhnu bixa', nazit bixa' ya, mbaino ni nawi' bixa' lo dimi kwa'n ño nilox. Más ñal wi' bixa' lo Dios, Me nizilazh kwa'n nayax lo kwa'n naki'n men nes par ya men wen. ¹⁸ Mbaino nu guzh lo rē xa' kinu dimi ba', más ñal le' bixa' rē kwa'n wen par gap bixa' yalrik lo Dios; gak bixa' wen laxto', yèët bixa' rē che'n bixa', ki'z bixa'i ka' men, ¹⁹ par tsa bixa' yalrik kwa'n nayot lox, nes par rē zhè kwa'n laore nzè, lé' bixa' gal kwa'n walika nak yalnaban.

Lult kwa'n mika'b Pab lo Timoteo

²⁰ Timoteo, bikina rë kwa'n mika'b Dios lol; nakinzhatal rë widi'zh yent yek che'n rë men yizhyuo re', rë widi'zh kwa'n nile' nichëlo' men, kwa'n zak men, widi'zh che'n rë xa' nzhak, ²¹ porke nguruya' pla men lo widi'zh che'n Jesukrist por ngwayila bixa' kwa'n nilu' rë men ba'. Lë' Dios gaknul. Sa' gake.

Yech mirop kwa'n mixë'l San Pab lo Timoteo

¿Mal wech, men che'n Jesukrist? ¿Chi wen kal?

¹ Na Pab, Krist Jesús mizo da nak da tu apost; porke sa' ngokla Dios, por kwa'n mila' Dios di'zh, za' Me yalnaban ka' rë xa' nak tutsa kun Krist Jesús. ² Kixëla yech re' lol, Timoteo, lu nak nela tu xga'na, xa' dox nazhi' da. Kina'ba lo Dios Xuz be no lo Krist Jesús, Me nile' mandad be, par gaknu Diosal, no lats laxto' Me lu, mbaino le' Me zil chul dizde le'n laxto'l.

Kika'b Pab, se'gaka le' Timoteo kwa'n nzhakla Dios

³ Zhëy-yë'le, or nina'ba lo Dios, nitsilan lu, nizan xkix lo Dios por lu, Dios Me nilen zhi'n nazhon che'n, dub nambe laxto'n; nela xmod ngok rë xtita xa' nzhala, yent cho gak ne kwan tu kwa'n gat lë' milen. ⁴ Zilita' nitsilan or mbi'nal, no dox nzhaklan nen lu, par lox zak laxto'n, ⁵ porke nitsilan yubpa' widi'zh che'n Dios ñilal, nela kwa'n ngwayila xnital Loida, kun xna'l Eunice, no kwa'n nanen, se'gaka nab tsa widi'zh che'n Jesukrist ñilal. ⁶ Kuze' bitsila, nala'tal yal yalnazon kwa'n mine' Dios ka'l, or mixo'ba ya'n yekal, ⁷ porke nangane'ta' Dios Sprit che'n Dios kwa'n nzho laxto' be par zheb be; Dios mine' Sprit che'n Me par le' be mandad lo rë kwa'n, mbaino par chizhi' be men, no ka'n be lo rë kwa'n gat lë' kwa'n nzhakla be le' be.

⁸ Kuze', natulatal, di'zhal viv widi'zh che'n Señor Jesukrist lo men; no ni natulatal por da, ter nzho'n lizhyi'b por nak da tu men che'n Señor Jesukrist; kuze' ñal, bixek or zakzil por widi'zh che'n Señor Jesukrist. Dios ka gaknul lo rë kure', ⁹ porke Dios ngulo' be lo kwa'n nazhe'b nzho be, no ngurezh Me be par ban be nambe lo Me. Miwi' Me lo be, gat lë't por mile' be rë kwa'n wene; lë' Me mile'i porke sa' ngok xigab che'n Me, mbaino milats laxto' Me be por Krist Jesús, dizde or naga yuxkwa' yizhyuo. ¹⁰ Nal, Dios milu', dox nazhi' Me be por Krist Jesús, Me ngulo' be lo kwa'n nazhe'b nzho be. Por lë' Me, gat nile'tra' yalgut mandad lo be, mbaino por widi'zh nazhon che'n Jesukrist, nguluxo'b Me yalnaban kwa'n di' par dubta'. ¹¹ Kuze', mizo Jesukrist da yadizha widi'zh re', nak da tu apost che'n Me, mbaino tu xa' nilu' widi'zh nazhon che'n Me lo men. ¹² Ter kizakzi da por widi'zh re', per gat nitulata por rë kure', porke nane ka xmod nak Jesukrist; rë kwa'n nzhak nile' Me por nazhon Me; kuze' nane ka, lë' Me kina ka widi'zh che'n Me kwa'n mika'b Me dizha lo

rë men, haxta zhë yë'd Me. ¹³ Se'gaka bikina widi'zh lë'tsa lë' che'n Dios kwa'n milun lol; dubta' wayila widi'zh re', mbaino bichizhi' men nela xmod ñale por nak be men che'n Jesukrist. ¹⁴ Lë' Sprit che'n Dios Me nzho laxto' be, gaknul par nagocht widi'zh che'n Jesukrist kwa'n mika'ba lol.

¹⁵ Lë'l nane ka, mer rë men che'n Jesukrist xa' nzho lazh men Asia, mila'nzë'b bixa' da; xid rë xa' re' nzho Figelo mbaino Hermógenes. ¹⁶ Per nal, kina'ba lo Señor Jesukrist, lats laxto' Me Onesíforo kun rë melizh xa', porke nayax wëlt mbi'dtsi' xa' re' da par mitsiro'b xa' laxto'n lo rë kwa'n nizaka, no ni nangatula xa' por nzho'n lizhyi'b, ¹⁷ porke or mizhin xa' yezh Roma, nangazhat xa' mikwa'n xa' da haxta ng-wazhël xa' da, ¹⁸ Lë' Señor Jesukrist lats laxto' xa' re' or gab Me xmod gak kun kad men yizhyuo; lë'l nane ka dox ngoknu xa' re' da or nzho'n yezh Efeso.

2

Tu xa' walika men che'n Jesukrist, nak xa' nela tu sondad ga'

¹ Por rë kwa'n nin re', xga'na, bile' pa' par zol wen lo rë che'n Krist Jesús, par gaknu Diosal; ² no rë kwa'n mbinal midizha lo nayax men, bika'be lo rë xa' nanel, nizob ka xti'zhal, rë kwa'n nidi'zhal lo bixa', nes par lu' bixa'i lo más men. ³ Guzo natsin nela tu sondad or nidil xa' or nidedal lo rë kwa'n nalats, por nakal men che'n Krist Jesús. ⁴ Rë sondad, par ya'n xa' wen lo xa' mizo xa', nagakta' ro' xa' lo zhi'n che'n xa'. ⁵ Se'ska, tu xa' niyit wane'i kwane, yent kwan le' xa' gan, chi lë' xa' nale'i nela xa' ñale. ⁶ Se'ska rë xa' nza'n yuo med, galo laka lë' xa' ñal gal kwa'n ngo'n xa'. ⁷ Bile' xigab por kwa'n kinin lol, orze' lë' Señor Jesukrist le' xa' yekal, par zobyekal rë kure'.

⁸ Bitsila Jesukrist, Me ngut no nguruban, Me nzë ben che'n Dabi. Kure' widi'zh nazhon kwa'n nidizha, ⁹ no por widi'zh nazhon re', nixek da lo rë kwa'n nizaka, haxta lizhyi'b nzho'n por lë'i, nela tu men nzhut men ga', per widi'zh che'n Dios gat nayao'yo'te, rë plo kiyon mene. ¹⁰ Kuze' la, kixek da lo rë kwa'n kizaka, nes par wen ya rë men xa' ngule Dios, ro' bixa' lo kwa'n nazhe'b kwa'n nzho bixa', mbaino gal bixa' yalnazon kwa'n niza' Jesukrist, kwa'n di' par dubta'. ¹¹ Walika widi'zh re':

Chi walika nak be nela tu men ngut ga' lo rë kwa'n gat lë' kwa'n ngok be,

orze' lë' be ruban nela nguruban Jesukrist.

¹² Chi se'gaka nixek be nided be lo rë kwa'n nalats por nak be men che'n Jesukrist,

orze' nu be le' mandad kun lë' Me.

Chi gab be lo rē men, gat lē't men che'n Me nak be,
orze' nu ska Me gab lo Xuz Me, gat lē't men che'n Me be.

¹³ No ter gat ñila be, nile' Me kwa'n nidi'zh Me,
per dubta' nile' Me rē kwa'n nila' Me di'zh,
porke lalta' gat ñalt laxto' Me kwa'n nila' Me di'zh.

Naki'n gak Timoteo tu xa' niro' wen lo zhi'n nazhon che'n Dios

¹⁴ Bile', tsila rē men rē kure'; dilant lo Dios, bika'b nachē'ro't bixa' por mala-mala kwa'n, porke yent kwan zu' kure'; wene namás par tsinui rē xa' nzhone. ¹⁵ Bile' pa' par ya'nal wen lo rē zhi'n nazhon che'n Dios kwa'n nile'l, par nazil gat lē' lo Me nile'l zhi'n che'n, por nakal tu xa' nilu' viv widi'zh che'n Dios. ¹⁶ No nakinzhatal rē widi'zh yent yek che'n rē men yizhyuo re', porke rē men nak se', ña'n cho'n bixa' lo rē kwa'n gat lē'. ¹⁷ Rē widi'zh re' nak nela yalyizh kangaren ga', nizēi dub men. Se'ta' nak widi'zh kwa'n nilu' xa' lē' Himeneo kun xa' lē' Fileto; ¹⁸ nguruya' la bixa' lo yub pa' widi'zh che'n Dios por nidi'zh bixa', rē men che'n Dios xa' ngut, lē bixa' nguruban la, no por nile' bixa' sa', nigoch bixa' yek men par nayilara' men widi'zh che'n Dios. ¹⁹ Per lē' be nane ka, viv widi'zh che'n Dios ngwayila be, porke widi'zh re' nak nela tu simient ke plo nzobni': "Lē' Señor Dios nili'be' ka rē xa' nak men che'n Me", mbaino nu nzobni': "Rē xa' walika nak men che'n Señor Jesukrist, naki'n ro' bixa' lo rē kwa'n gat lē'."

²⁰ Lizh tu men rrik, nzho rē lo kwa'n nizen men; nzhoi nakxao' kun or, no nzhoi nakxao' kun kwa'n plat; no mase kwa'n nakxao' kun ya mbaino kun bitsi'n yuo. Nzho rē kure' nizu' par tu lani, mbaino mase nizu' par wanei cho xtu zhē. ²¹ Se' nzhak kun rē xa' niro' lo kwa'n gat lē', nak xa' tu men más tsak lo Dios, kure' nile' ña'n nambe xa' lo Dios, orze' yent kwan nika le' xa' wanei cho rē zhi'n wen che'n Dios. ²² Kuze', tuli guro' lo rē xigab che'n men xi, xigab kwa'n nzhuwei' men lo rē kwa'n nzhakla kwerp che'n men; más wen dubta' bile' kwa'n ñal, no se'gaka wayila widi'zh wali pa' che'n Dios, no bichizhi' men, no bile' pa' par ya'nal wen kun rē men; par tutsa gakai kun rē xa' nambe laxto' nina'b lo Dios. ²³ No nachē'ltal kun rē xa' nidi'zh rē kwa'n yent yek; lē'l nane ka, kure' nizu', nichēldil men, ²⁴ porke tu men xa' nile' lē'ska lē' kwa'n nzhakla Señor Jesukrist, gat ñalt chēldil xa' men. Naki'n wen xa' kun men, mbaino gak xa' tu men nix laka nilu' widi'zh che'n Dios lo men, no nixek xa' lo rē men yent kwan nzhon lo widi'zh che'n Dios. ²⁵ Kun widi'zh nado', naki'n lu' xa' plo ñagan

rē xa' yent kwan nzhon; kitla lē' Dios chē' bixa' xigab, par nu bixa' libe', xmod nak yub pa' widi'zh nazhon che'n Dios, ²⁶ orze' lē' Dios zini yek bixa' par ne bixa' plo kinucho'n Mizhab bixa', mbaino lē' Dios ko' bixa' par nale'ra' bixa' kwa'n nzhakla Mizhab.

3

Se' gak rē men or ya mer la yē'd Jesukrist

¹ Per naki'n nel, dox nazhe'b kwa'n zak rē men or ya mer la yē'd Jesukrist, ² porke yo rē xa' wi' nab tsa lē' xa', no rē xa' dox niwix gap dimi, mbaino yo rē xa' dox marian, rē xa' dox niye; mbaino yo rē xa' gat nzhont ro' xuz no ro' xna', no rē xa' gat niza't xkix lo Dios por ni tu kwa'n, mbaino rē xa' gat nigot kwent ni tu rē kwa'n nazhon che'n Dios. ³ Le'n rē zhē ze', yo rē xa' nazinetra' laxto' men, mbaino xa' gat ña'lt laxto' kwa'n nile' xtu men lo xa', no men di'zhyix, mbaino xa' gakt ka'n lo kwa'n nzhakla kwerp che'n, no men nak nela tu ma dox nayi' ga', mbaino men niyi' nine rē kwa'n wen. ⁴ Gak bixa' men chi men lo xtu men par gat men, no rē zhē ze' yo rē men yent kwan nizheb le' wanei kwane, no men dox ya nizi; mbaino rē xa' más ño laxto', le' rē kwa'n nzhakla kwerp che'n ke par le' bixa' kwa'n nzhakla Dios. ⁵ Chigab walika men che'n Dios bixa', per por xmod nak bixa', nilu' gat lē't Dios nile' mandad lo bixa'.

Yubchi lo rē men re', ⁶ porke xid bixa' nzho xa' nikide dub lizh men, no sa' nikide bixa' rē una' naxen ye'n, rē una' xa' nagaktra' ro' lo rē kwa'n gat lē', rē una' miziwan la di xmod nikizē. ⁷ Ñila biuna' rē kwa'n nilu' xtu men, per lalta' gat libe' biuna' rē widi'zh viv che'n Jesukrist. ⁸ Nela ngok Janes kun Jambres, midizh bixa' gat walit che'n Muisés, se'ta' nak rē men nikide re'. Gat nzhaklat bixa', gon más rē men widi'zh viv che'n Jesukrist; minu la xigab che'n bixa', mbaino gat niwi'tra' Dios lo bixa'. ⁹ Per kwa'n nilu' bixa', nadi'te xche, porke rē men ne, nilē' bixa' gat nizobyekt kwa'n nilu' bixa', nela nguzak rop xa' nzhala ze', xa' ndil kun Muisés.

Lul' kwa'n mika'b' Pab lo Timoteo

¹⁰ Per lu, se'gaka kile'l lē'tsa lē' widi'zh che'n Dios kwa'n nilun, mbaino nabanal nela xmod nak da, no mis xigab da kinul, mbaino lal ñila be widi'zh nazhon che'n Jesukrist; no mitse'dal, or nizakzi menal, yent kwan nile'l, mbaino nu nazhi'l men nela da ga', no nixekal nidedal rē kwa'n nalats nela xmod mitse'da lu. ¹¹ No nanel, yezh Antioquia, no yezh Iconio, mbaino yezh Listra, dox ngurukē men ticha no mizakzi bixa' da. Dox kwa'n mite'da, per Jesukrist ngoknu da lo rē kure'. ¹² Lē' be nane ka, rē men xa' nzhon ro' Krist Jesús, nadedta' lē' men zakzi

bixa', ¹³ per rē men nakap, mbaino rē men xa' chigab walika men wen, kad zhē más bi bixa' lo kwa'n gat lē'; kide xa' men, no se'ska kide men xa'. ¹⁴ Per lu, se'gaka wayila rē kwa'n mitse'dal, no rē kwa'n nanel, walika, lē'l nane ka cho mitse'de lu. ¹⁵ Bitsila, dizde winal, nilibe'l rē kwa'n nzobni' lo Yech che'n Dios, no rē kwa'n mitse'dal ba' le' gakai tu xa' nzhak par nel cho kwa'n lē'tsa lē' no cho kwa'n nazut', nes par tse'dal yilal nab tsa widi'zh che'n Jesukrist, orze' banal dubta' kun Dios. ¹⁶ Rē widi'zh kwa'n nzobni' lo Yech che'n Dios, Dios midiz'zhe, no dox wene par tse'd men, ne men xmod nak Dios, mbaino par zi men kwan nak men, no la' men xmod nak men, orze' nile'i nitse'd men ban men nela xmod nzhakla Dios, ¹⁷ nes par men che'n Dios, xa' wenawen mitse'd kwan naki'n par le' xa' wanei cho rē zhi'n wen kwa'n ño laxto' Dios.

4

Bidi'zh widi'zh che'n Dios

¹ No nal, dilant lo Dios no lo Krist Jesús, Me ya mer la yubre par le' Me mandad lo rē, mbaino par gab Me xmod gak kun kad men, men naban no men ngut; ² dox kina'ba lol: Bidi'zh widi'zh che'n Dios; bile'pa' por le'le, ter nizil kwa'n nizil; bile' zi men kwa'n nak men, orze' bile' mandad nale'tra' bixa'i, mbaino bidi'zhnu bixa' par zubro bixa' le' bixa' kwa'n nzhakla Dios. Lo rē kure', naki'n xekal lo bixa' par tse'dal bixa' lo widi'zh walipa' che'n Dios, ³ porke zhin zhē, lē' bixa' ro'ya' lo kwa'n walika nak widi'zh che'n Dios; lē'la yakan bixa' nayax men xa' nilu' nab tsa kwa'n ño laxto' bixa', par le' bixa' rē kwa'n nzhakla kwerp che'n bixa'. ⁴ Par sa', la' bixa' widi'zh viv che'n Dios no tse'd bixa' widi'zh kwa'n nichao' yek men. ⁵ Per lu, bikinal lo rē kwa'n nizakal, no bixek lo rēi. Se'gaka bilu' widi'zh che'n Dios lo rē men. Por nakal tu men che'n Dios, bile' rē kwa'n mika'b Me lol.

⁶ Rē kure' nin lol, porke na, dox mizhin la gut bixa' da; lē' or mizhin la bi'n lo yibē'. ⁷ Lē' rē zhi'n kwa'n milen milox la, nela tu sondad, lē' xa' mile' gan lo más rē men ndil xa'; o nela tu xa' mile' gan lo tu karre; no dubta' nangalata Dios. ⁸ No nal, lē' Krist Jesús, Me nigobe' xmod ñal gak kun kad men; lē' Me kinuchao' kwa'n dox tsak gal da por nzhona ro' Me; no gat lē't nab tsa da gal kure', nu rē xa' dox nzhakla yē'd ga' Me.

Lult rē kwa'n nzhab Pab nab tsa lo Timoteo

⁹ Bikēnla y'i'dtswi'l ma da, ¹⁰ porke lē' Demas, net xa' la' xa' rē kwa'n nzho yizhyuo re', mila' nzē'b xa' da, nzha xa' yezh Tesalónika; no lē' Crescente nzha lazh men Galacia, mbaino lē' Tito nzha lazh men

Dalmacia. ¹¹ Nabtsa Luk nzho kuda re'. Yi'dnul Mark or yi'dal, xa' re' zu' gaknu da lo zhi'n nazhon che'n Dios; ¹² Lē'da mixēl Tikiko yezh Efeso. ¹³ Or yi'dal, dinu kapot da kwa'n milan lizh Karp, xa' nzho yezh Troas; no dinu rē libr; per ne naya'l laxto'l rē libr kwa'n nakxao' kun yid che'n ma. ¹⁴ Lē' Jand, xa' nichao' rē kwa'n kun yi'b brons, dox di'zhyix mikwa'n xa' kuda; per lē'ka Jesukrist gab kwan ñal xa'. ¹⁵ Ne kun xa' re', porke dox niyi' xa' por nilu' be widi'zh che'n Dios lo men. ¹⁶ Or galo laka nzhapa lo rē xa' nak zhi'n, yent kwan nak da; yent cho ngaknu da; rē xa' nichēla mila' nzē'b da, no nina'ba lo Dios par ya'l laxto' Me kwa'n mil'nu bixa' da, ¹⁷ per lē' Jesukrist nguwo kuda no ngoknu Me da par ngok milun rē widi'zh che'n Dios, par mbin rē men xa' gat lē't men Israel widi'zh che'n Dios. Se' milen gan nangutta' bixa' da; milen nela or nile' men gan ro' tu mbe'zh ga', ¹⁸ no se'gaka lē' Me gahnura' da ya' rē men nakap, par wei' Me da lo yibē' plo nile' Me mandad. Nabtsa lē' Me ñal di'zh men nazhon par dubta'. Sa' gake.

Ba' zhē'l be

¹⁹ Guzh lē'da nzhakla gon chi wen ka Prisca kun Aquila, no rē melizh Onesiforo. ²⁰ Lē' Rast mia'n yezh Corinto, no lē' Tróximo milan yezh Mileto por nzhakne xa'. ²¹ Bikēnla yi'dal antis di zhin mbēo' nayag. Rē wech be re', men che'n Jesukrist, nzhakla gon chi wen kal: xa' lē' Eubulo no Pudent, mbaino Lin, no Lao; nu mas más rē wech be, men che'n por Jesukrist.

²² Lē' Jesukrist, Me nile' mandad be, zo kun lu, mbaino gaknu Me rē go. Sa' gake.

Yech kwa'n mixë'l San Pab lo Tito

¿Mal wech, men che'n Jesukrist? ¿Chi wen kal?

¹ Na Pab, nak da nela tu men nado ga' lo Dios, mbaino Jesukrist mizo da nak da tu apost; mixë'l Me da par dizha widi'zh nazhon che'n Me lo rè men xa' ngule Dios gak men che'n Dios, par zobyek bixa' widi'zh walipa' che'n Jesukrist, orze' ban bixa' nela xmod nzhakla Dios. ² Por widi'zh re', lë' be ban dubta' kun Dios, nela xmod mila' ka Dios di'zh, or ni naga yuxkwa' yizhyuo. Dios le' kure', porke Dios gat nikë't mbël. ³ No or ngol zhë, mile' Dios xigab, milu' Me xmod ban men par dubta'. No Dios, Me ngulo' be lo kwa'n nzë'b xki be, miwi' Me lon lë' da zu' ka dizha rè' kure', porke sa' mile' Me mandad len. ⁴ Kixëla widi'zh re' lol, Tito, lu nak nela tu xga'na, porke lu no na, yub pa' widi'zh che'n Jesukrist ñila be. Nina'ba lo Dios Xuz be mbaino lo Krist Jesús, Me ngulo' be lo kwa'n nzë'b xki be, gaknu Me lu, no le' Me, zil chul dizde le'n laxto'l.

Zhi'n nazhon kwa'n mia'n di'zh le' Tito lazh men Creta

⁵ Milan lu lazh men Creta kwa'n nzhin sao' nitsdo', par wi'l kwan naki'n yuxkwa' xid rè men che'n Jesukrist, no kad plo nzhin men che'n Jesukrist, kwel tu ga' xa' zo lo bixa', nela xmod milen mandad. ⁶ Tu men zo lo rè men che'n Jesukrist, ñal gak xa' tu men yent cho gak gab kwan tu kwa'n nak xa', no ñal tutsa una' gap xa', mbaino rè xmë'd xa' ñal gak bixa' men che'n Jesukrist, no nagakt bixa' men gat nzhon di'zh o men nayi'lazh, ⁷ porke tu men xa' zo lo rè men che'n Jesukrist, ñal gak xa' tu men, yent cho gak gab kwan tu kwa'n nak xa' lo zhi'n nazhon che'n Dios. No nazit xa' ya, mbaino gakt xa' tu men nazho' yek, no nagakt xa' nguy, no ni nagak xa' tu xa' nichao' dil, o tu xa' nikide men par ka' xa' dimi che'n men. ⁸ Ñal gak xa' re' tu xa' dox wen kun rè men xa' ña'n lizh xa', no tu xa' dox ño laxto' nile' kwa'n wen, mbaino wenawen nile' xa' xigab or nile' xa' tu kwa'n, no nile' xa' kwa'n ñal, mbaino nambe laxto' xa' dilant lo Dios, no nika'n xa' lo rè kwa'n nzhakla kwerp che'n xa'. ⁹ Ñal naye zo xa' lo yub pa' widi'zh che'n Dios kwa'n mitse'd xa', nes par gak tse'd xa' men, ro'b men lo widi'zh viv che'n Dios, no nu par gak le' xa' zi men kwa'n nak men, or di'zh tu men widi'zh che'n Dios xa'la mod, ¹⁰ porke plo nzhoh ba', lazh men Creta, dox nzho men xa' nilu' widi'zh che'n Dios xa'la mod, mbaino

nidi'zh bixa' kwa'n niyent yek, nikide bixa' men. Xid rè men re' nzho rè xa' niki'l men kè' señ kwerp che'n men, nela xmod nzobni' lo ley che'n Muisés. ¹¹ Rè xa' re' ñal sao' be xa' ro' xa', porke nile' xa' dub lizh men nila' widi'zh wali pa' che'n Dios. Kilu' bixa' lo men kwa'n gat ñalt, namás par nile' bixa' gan dimi. ¹² Mis tu men yezh Creta ze', tu xa' nidi'zh por Dios, se' nzhah xa' nak rè melazh xa': "Rè men yezh re', dox mbël bixa', no nak bixa' nela ma nayi' ga', mbaino nzhao cho' bixa', no jloy bixa'." ¹³ No walika nak bixa'i, kuze' dox bilu'zh bixa' (biza' kunesj bixa'), par zo bixa' wen lo viv widi'zh che'n Jesukrist, ¹⁴ nes nayilatra' bixa' rè kwa'n nichao' yek rè men Israel, mbaino nale'tra' bixa' rè kwa'n nile' rè men re' mandad, rè xa' nguruya' la lo yub pa' widi'zh che'n Jesukrist. ¹⁵ Rè xa' ñila widi'zh viv che'n Jesukrist, par lë' bixa' rè kwa'n nambe; per par rè xa' minu la xigab che'n lo Dios, mbaino rè xa' gat kinut widi'zh viv che'n Jesukrist, yent kwa'n nambe par lë' bixa'. ¹⁶ Nidi'zh bixa', dox nilibe' bixa' Dios, per por xmod nak bixa', nile' bixa' naya' lo Dios. Nilu' bixa' lo Dios nela tu kwa'n más nakap lo rè. Dox nayi'lazh bixa' lo Dios, kuze' ni tu kwa'n wen nagakt le' bixa'.

2

Ñal tse'd be men yub pa' widi'zh che'n Dios

¹ Per lu Tito, bilu' nela xmod nak ka widi'zh viv che'n Dios. ² Guzh lo rè miyi', xa' ngwagal la; naki'n gak bixa' menaye lo rè kwa'n nile' xa', no gak bixa' men xa' nile' lë'ska lë' tu kwa'n, mbaino gak bixa' men xa' nile' xigab wenawen or nile' bixa' tu kwa'n, no nab tsa widi'zh viv che'n Jesukrist ñila bixa', mbaino chizhi' bixa' más rè men, no nazolia'zht bixa' lo Dios (le't bixa' naya') or zak bixa' tu kwa'n. ³ Se'ga' guzh lo rè una', xa' ngwagal la; gak bixa' menaye lo rè kwa'n nile' bixa'. No nagakt bixa' men di'zhyix, no ni nazuzh bixa'; ñal gak bixa' wen, ⁴ nes gak lu' bixa' lo rè una' xi, xmod chizhi' rè una' xmiyi' una' no rè xmë'd una'. ⁵ No or le' rè una' xi tu kwa'n, wenawen le' bixa' xigab, mbaino gak bixa' una' nambe laxto' nikizë, no la'ch bixa' lizh bixa' mbaino gak bixa' wen kun men, no zob bixa' xti'zh xmiyi' bixa', par yent cho di'zh gat lë' por widi'zh che'n Dios. ⁶ No se'ga' guzh lo rè miyi' xi, wenawen le' bixa' xigab or nile' bixa' tu kwa'n. ⁷ No lu, Tito; lo rè kwa'n, bilu' xmod nabanal, par ne rè men, lë'l nile' lë'tsa lë' tu kwa'n; no or nilu' widi'zh che'n Dios, naka'chtal ni tu kwa'n, nela xmod ñal kai. ⁸ Bidi'zh pura kwa'n lë'tsa lë', par yent cho gak rèl ni tu kwa'n nidi'zhal gat lë't; nes par tula rè xa' nidi'zh xa'la mod nak widi'zh

che'n Dios, orze' yentra' por kwan di'zh xa' be. ⁹ Bidi'zhnu rē xa' nak mos nado, gon bixa' ro' xa' nile' mandad xa'; gak bixa' wen, nakabro't bixa'. ¹⁰ No naliwa'nt bixa', lu' bixa' lē' bixa' menaye lo rē kwa'n, nes par ne rē men, dox nazhon widi'zh che'n Dios che'n be, Me ngulo' be lo rē kwa'n nzē'b xki be.

¹¹ Porke lē' Dios milu' dox nazhi' Dios rē men yizhyuo, por Jesukrist Me niza' yalnaban ka' rē men, xa' nzhon widi'zh che'n Me. ¹² Por nazhi' Dios be, kitse'd Me be par nale'ra' be kwa'n gat lē', no ni nawixra' be kwa'n nzo yizhyuo re'; par gak be tu men xa' nile' xigab wenawen or nile' be tu kwa'n, mbaino le' be kwa'n ñal no ban be nela xmod nzhakla Dios, dub naban be lo yizhyuo re'. ¹³ Se' le' be dub kwēz be haxta zhin zhē gak rē kwa'n mila' Dios di'zh; or yaxo'b Jesukrist kun rē yalnazon che'n Me, par ne rē men, lē'gaka Me nak Dios, Dios Me ngulo' be lo rē kwa'n nzē'b xki be. ¹⁴ Yub Me nguziyēl Me ngut Me por be, par ngulo' Me be lo rē kwa'n ngok nayi'lazh be lo Me. Mitsimbe Me be par gak be tu ben men nab tsa par lē' Me, rē xa' xo'byek le' nab tsa rē kwa'n wen. ¹⁵ Rē kure' ñal di'zhal, no bidi'zhnu men le' bixa'i, mbaino bile' zi men kwa'n nak men, no bile' mandad gon bixa' ro'l; no nala'tal cho nane le'i.

3

Xmod naki'n ban men che'n Jesukrist

¹ Guzh lo rē men che'n Jesukrist, tsila bixa' le' pa' bixa' par gon bixa' ro' rē men che'n gobier, xa' nile' mandad; gat ñalt gak bixa' men gat nzhon di'zh. Nal wi' laka bixa' le' bixa' wanei cho zhi'n wen. ² No guzh, nadi'zht bixa' nakap tich ni tu men no ni nakwa'nt bixa' dil kun men; ñal xek bixa' or nile' men kwa'n gat lē' lo bixa', mbaino gak bixa' nado' kun rē men. ³ Nuska be ngok sa': Yent xigab yek be, no ngok be nayi'lazh, mbaino nguziwan be lo rē kwa'n gat lē'. No mbi'y rē xigab gat lē' be par mile' be rē kwa'n nguio laxto' be, mbaino miyi'xian be por gat kinu be kwa'n kinu xtu men, por dox miwix be gap bei. Miyi' men, nine men be, no nu ska be mile'i. ⁴ Per Dios, Me ngulo' be lo rē kwa'n nzē'b xki be, milu' Me, lē' Me dox wen mbaino nazhi' Me be. ⁵ Ngulo' Me be lo rē kwa'n nzē'bxki be por dox nilats laxto' Me be, gat lē't por mile' be tu kwa'n dox wene. Por yalnazon che'n Sprit che'n Dios, mitsumbe Me be lo rē kwa'n gat lē', mile' Me ngok be nela tu men laore ngol ga', mbaino mine' Me yalnaban kwa'n di' par dubta' ka' be. ⁶ Por Jesukrist, Me ngulo' be lo rē kwa'n nazhe'b nak be, mixē'l Dios Sprit che'n Me yo laxto' be kun rē yalnazon che'n Me. ⁷ Nal, por nilatsa laxto' Dios be, niwi' Me lo

be, nela lo tu men xa' gat nzē'bxkit, nes par gal be kwa'n mila' Dios di'zh; ban be dubta' kun lē' Me. ⁸ Walika rē kwa'n nin re'. Kuze', zilita' guzh kure' lo rē men che'n Dios xa' nzhin ba', nes par rē xa' nzhon ro' Dios, le' pa' bixa' por le' bixa' rē kwa'n wen lo Dios, no kwa'n zu' par rē men. ⁹ Per nala'tal dil men por kwa'n niyent yek, o por cho ngok rē melizh men xa' tiemp; no ni por rē kwa'n nzobni' lo ley che'n Muisés, kwa'n wen par chēldil men nabei cho más tsak. Rē kure' yent kwan zu'i no yent cho kwente. ¹⁰ Chi nzho tu men nichao' dil xid rē men che'n Dios xa' nzhin ba', bidi'zhnu xa' tu wēlt o chop wēlt. No chi nagon xa' ro'l, nako'tra'l kwent xa'. ¹¹ Orze' lē'l nane la, lē' xa' re' minu la lo Dios; por nad xa', gat nzhont xa' di'zh, kuze' nilu' nzē'b xki xa' lo Dios, no gat ñalt wi'l lo xa' nela tu men che'n Dios ga'.

Lult rē widi'zh re' nzhab Pab lo Tito

¹² Or xēla Artemas o Tíkiko lol, bikēnla yi'dal yezh Nicópolis, par yi'dtsil ma da, porke milen xigab, te'da mbēo' nayag ba'. ¹³ Bile' pa' por gankul abogad Zenas no Pol; biza' rē kwa'n naki'n bixa', par ya bixa' nez che'n bixa', par yent kwan gak jwalt lo bixa'. ¹⁴ Biwi' par tse'd rē men che'n Jesukrist, le' bixa' kwa'n wen, no par gaknu bixa', xa' walika naki'n kwa'n. Se' ñal le' bixa' par nagak bixa' men yent kwan zu'.

¹⁵ Rē xa' nzho kuda re', nzhakla ne, chi wen kal; no guzh, chi wen ka rē wech be, men che'n Jesukrist, rē xa' nzho kun lu ba', rē xa' ñila tutsa mod widi'zh che'n Dios kun be, mbaino nazhi' xa' be. Kina'ba lo Dios, rē go gaknu Me. Sa' gake.

Yech kwa'n mixë'l San Pab lo Jwilimón (Filimón)

¿Mal wech, men che'n Jesukrist? ¿Chi wen kal?

¹ Na Pab, nzho'n lizhyi'b por nilun widi'zh che'n Krist Jesús. Rop no kun Timoteo wech be, kixë'l no yech re' lol, Jwilimón; nazhi' da lu por tutsa zhi'n nile' be. ² No nu lo bizan be Apia, xa' nak men che'n Jesukrist, kixë'l no yech re'; mbaino lo Arquipo, xa' nak nela tu sondad ga' lo zhi'n che'n Jesukrist; no nu lo rë men che'n Jesukrist, xa' nibin lizhal, Jwilimón. ³ Kina'ba lo Dios Xuz be kun lo Jesukrist, Me nile' mandad be, par gaknu Me go, no par le' Dios, zi go chul dizde le'n laxto' go.

Wen laxto' Jwilimón kun rë men, no viv widi'zh che'n Jesukrist ñila xa'

⁴ Rë or nina'ba lo Dios, Me nile' mandad be, nizan xkix lo Me or nitsilan lu. ⁵ Lë'da mbin la, dox nazhi'l rë men che'n Jesukrist, no yub pa' widi'zh che'n Me ñilal. ⁶ Nina'ba lo Dios, por xmod ñilal widi'zh che'n Jesukrist, lë' más wech be zobyek, rë kwa'n wen kwa'n gak le' Krist Jesús kun kad be. ⁷ Dox nizak laxto'n, mbaino miro'b laxto'n or mbina, lë'l nazhi' ka rë wech be, men che'n Jesukrist, nes par nixax bixa' lo rë kwa'n nizak bixa'.

Kina'b Pab wi' Jwilimón wen lo Onésimo

⁸ Por rë kure', ter Jesukrist mizo da, nak da tu apost, per naleta mandadal jwers, le'l kwan ñal le'l. ⁹ Na kiniy por nazhi' be wech be, mbaino por ngwagal la da, no por nzho'n lizhyi'b por nilun widi'zh che'n Krist Jesús. ¹⁰ Kina'ba lol por Onésimo, xa' nak nela xga'na, ngwayila xa' widi'zh che'n Krist Jesús por da, dub nzho'n lizhyi'b re'.

¹¹ Xa' re', or galo, ngazu't xa' lol; per nal, lë' xa' zu' lol mbaino haxta lon zu' xa'. ¹² Nal lë' da le, yëkska xa' lol; biwi' lo xa', porke tu zalon xa' re'. ¹³ Na ngakla ya'n xa' re' kuda, par gaknu xa' da nela lu ka, dub nzho'n lizhyi'b re' por nidizha widi'zh nazhon che'n Dios. ¹⁴ Per nangaleta kuba', napa' naziyëlal, no nagabtal por kina'ba kuba', le'le jwers; nzhaklan laxto'l ro'i. ¹⁵ No pas por kuba', nguro' Onésimo lol che'p, nes par yo xa' kun lu dubta'. ¹⁶ No nawi'tra'l lo xa' nela lo tu xa' se'gaka nado lol; bichizhi' xa' nela tu wech pa'l por nak xa' tu men che'n Jesukrist; na dox nazhi' da xa', per lu ñal chizhi'l xa' más.

¹⁷ Kuze', chi niwi'l lon nela lo tu xa' nile' tutsa zhi'n kun lu, orze' sa' ska biwi' lo xa' re', nela xa niwi'l lon ga'. ¹⁸ Mbaino chi mile' xa' tu kwa'n gat lë' kun lu, o nzë'b xa' tu kwa'n lol, na kixe. ¹⁹ Na Pab kikë'n yech re'

kun mis letr da: Kwa'n nzë'b xa' re', na kixe; per nangazeta vid che'nal kwa'n nzë'bal lon. ²⁰ Walikai wecha, bile' tu jabor re' kuna; nale'tle por nazhi'l da, lu bile'i por nazhi'l Jesukrist. No por nak be men che'n Me, chi lë'l le' kwa'n nin, orze' gax ga' xax da lo kwa'n nzho yeka.

²¹ Kixëla yech re' lol, lë' da nane, lë'l le' kai; mbaino nanen, haxta más kwa'n le'l lo kwa'n kina'ba lol. ²² Mbaino biwi' ga' plo ya'n da; na nane, lë' Dios le' ka kwa'n kina'b go lo Me, zon xtu wëlt kun go.

Ba' zhë'le

²³ Nuska Epafra, xa' tutsa nzho'n lizhyi'b kun lë' por nidi'zh no widi'zh che'n Krist Jesús, nu xa' nzhakla gon, chi wen kal. ²⁴ Mbaino nu Mark, kun Aristark mbaino Dem, no Luk, rë xa' re' tutsa zhi'n nile' no, nu bixa' nzhakla gon chi wen kal.

²⁵ Lë' Jesukrist, Me nile' mandad be, gaknu go. Sa' gake.

Tu yech par lo rë men Hebreo

Rë zhë re', kidi'zh Dios lo rë men por Xga'n Me

¹ Chi tiemp, nayax wëlt no nayax mod, midi'zh Dios lo rë xuz be xa' tiemp por rë profet, xa' midi'zh por Dios. ² Per nal, rë zhë lult re', Dios midi'zh lo be por Xga'n Me, porke ya' Xga'n Dios mila' Dios rë kwa'n nzho, no por Xga'n Me ngulo Me rëi. ³ Kuze' lë' Xga'n Dios kinu yub yalnazhon che'n Dios kwa'n maska ñaz bël, no tugaka Xga'n Dios Me nak yubska Dios, mbaino nzen Xga'n Dios rë kwa'n nzho kun widi'zh nazhon che'n Me. No or milox mitsumbe Xga'n Dios be lo rë kwa'n nzë'b xki be lo Dios, nguzob Me lad direch che'n Xuz Me Dios, Me nzho lo yibë', Me nile' mandad lo rë.

Más tsak Xga'n Dios lo rë ganj

⁴ Kuze', más tsak Xga'n Dios lo rë ganj, porke más tsak xmod ngululë Dios Xga'n Dios lo rë ganj, ⁵ porke lalta' nagat gab Dios se' lo tu rë ganj:

Lu nak Xga'na; nalse Lu zon par le'l mandad lo rë.

Mbaino ni naga ska di'zh Dios se' lo ni tu rë ganj:

Na nak Xuzal,
no lu nak Xga'na.

⁶ Per or mixë'l Dios tugaka Xga'n Dios lo yizhyuo re', se' mile' Me mandad: Rë nak ganj da zuxib lo Xga'na.

⁷ Ter se' mize't Dios rë ganj che'n Dios: Mile' Dios nak rë ganj, nela or nzo mbi gat nilu'te.

No rë xa' nile' zhi'n nazhon che'n Dios, nilu' bixa' nela bël ga'.

⁸ Per or mize't Dios Xga'n Dios, se' nzhah Me: Lu nak Dios;

nayot zhë lox le'l mandad,
mbaino dox nali le'le.

⁹ Nixo'byekal nile'l rë kwa'n nzhakla Dios, mbaino niyil' ninel rë kwa'n nile' nzhak nayi'lazh men lo Dios.

Kuze', lë' Dios che'nal ngulel.

No más mile' Dios nizak laxto'l lo rë xa' nichë'lal.

¹⁰ No nu se' nzobni' lo Yech che'n Dios:

No Lu, Señor, dizde or galo mizuxkwa'l rë kwa'n nzen yizhyuo.

Mbaino mis Lu mizuxkwa' yibë'.

¹¹ Rë kure' lox nela nilox tu lar ga', per Lu naban par dubta'.

¹² Rë kure' tuzhal nela nituzh men tu lar ga', no kubile nela nigubi men tu lar go'x, per Lu, nayot yitlol.

¹³ No ngayot ngab Dios lo ni tu rë ganj che'n Dios:

Guzob lad direch da,
lu' le' mandad,

haxta or zhin zhë len,

che'ptsá (bi'ch laka) gak rë xa' nidilal xan ni'l.

¹⁴ ¿Taxa nanet go, nab tsa sprit nak rë ganj che'n Dios, rë ganj nixë'l Dios par gaknu rë men, xa' ngule la Dios par ban kun Dios par dubta'?

2

Nala't be Jesukrist, tugaka Me nigo' be lo kwa'n nzë'b xki be

¹ Kuze' zilita' ñal yila be widi'zh che'n Dios kwa'n mbin la be; nes par naro' be lo nez che'n Dios. ² No chi lë'ka ngwayila rë men Israel rë widi'zh kwa'n mila' Dios lo bixa' por rë ganj che'n Me, mbaino chi ñal ka mizakzi Dios rë xa' nangont widi'zh re', ³ no nal, ¿xmod le' be gan or zakzi Dios rë men nzë'b xki lo Me, chi lë' be le' naya' lo yalnazhon che'n Dios kwa'n nigo' men lo rë kwa'n nzë'b xki men lo Dios? Porke yub Señor Jesukrist mila' widi'zh re' lo rë men che'n Me, mbaino lë' men che'n Me midi'zhe lo be. ⁴ No yub Dios milu' walika rë kwa'n milu' bixa' lo go por rë lo yalnazhon kwa'n mile' Dios mia'n xe rë men por lë' bixa'. Mbaino nu por Sprit che'n Dios, ndi'z Dios yalnazhon xid rë go, dike xmod ngokla Sprit che'n Dios.

Jesukrist mixa'l nez par zhin be lo Dios

⁵ Dios nangazot rë ganj, par le' bixa' mandad lo yizhyuo kwa'n laore yo kwa'n kidi'zh no nal re'. ⁶ Nela xmod nzobni' ka xtu plo lo Yech che'n Dios:

¿Kwan nak tu men, par tsila go xa'?

mbaino, ¿chon dox nizob xigab yek go por lë' xa'?

⁷ Pla tsa ngubizh mile' go natsakt xa' be's nela tsak rë ganj che'n go,

per nal ngulitsya go xa' kun rë yalnazhon che'n go.

⁸ Rë kwa'n nzho mila' go ya' xa'.

No or mila' Dios rë kwa'n ya' xa', kuba' nilu', yent ra' kwan nangaza' Dios ka' xa', no ter nagat ne be, lë' Dios mila' rëi ya' xa'. ⁹ Per nane be, lë' Jesús, Me mile' Dios tu tiemp, natsakt be's nela xmod tsak rë ganj che'n Dios. Por nazhi' Dios rë men, xigab che'n Dios ngok ngut Jesukrist par rë men yizhyuo ya wen, per nal ngulitsya Dios Jesukrist kun rë yalnazhon por ngut Me nela xmod ngokla Dios.

¹⁰ Dios nak Me mizuxkwa' no nikina rë kwa'n nzho, no por dox nazhi' Dios men yizhyuo, ngokla Me dox nguzakzi Jesukrist, nes par gak ko' Jesukrist met lo rë kwa'n nzë'b xki met lo Dios, par nayax men gak xmë'd Dios, par gal bixa' yalnazhon kwa'n

kinu Dios tutsa kun Jesukrist, Me tugaka mixa'l nez par zhin men lo Dios. ¹¹ Porke tutsa nak Jesukrist kun rē men che'n Me, rē xa' mimbe por lē' Me, kuze' gat nitulat Me, nzhab Me: "Wecha", lo rē men re'. ¹² Nela xmod nzobni' ka lo Yech che'n Dios: Lē' Da dizh lo rē wecha, dox nazhon Go, mbaino xid rē men che'n Go, kē'n kant kwa'n nidi'zh dox wen Go.

¹³ No xtu plo nzobni':

Na nane ka, nab tsa Dios gak gaknu da.

No nu se'ga' nzobni':

Lē'da nzo re' kun rē men da, xa' mine' Dios.

¹⁴ Nela nak rē men xa' nibezh Dios gak xmē'd Dios, men yizhyuo bixa'; se'ska Jesukrist, nu men yizhyuo Me nela lē' bixa'; no por ngut Me, mizubchi Me yalnizhe'b kwa'n nigo Mizhab yek men, nizheb men gat men por nzē'b xki men. ¹⁵ Se' mile' Jesukrist par yentra' kwan zheb men gat men, porke nzho men dub naban xa' yizhyuo re', nizheb xa' gat xa', no Mizhab nigo kure' yek xa'. ¹⁶ No por nak Jesukrist tu men yizhyuo, nangayi'dt Me par gaknu Me rē ganj che'n Dios; lē' Me mbi'd par gaknu Me rē men xa' yila Dios nela Abraham ga', ¹⁷ kuze' mile' Dios nak Me nela tu rē be re', rē xa' nigolē Me wech Me, par nak Me ngulē'i ro che'n Dios, xa' nilats laxto' rē men, no wen xa' por nile' xa' kwa'n nzhakla Dios, nes par ko' xa' rē men lo rē kwa'n nzē'b xki men lo Dios. ¹⁸ No por nguzakzi yub Me, mbaino nguzenbe' Mizhab Me (miwi' Mizhab xmod nak Me) par ngale' Me kwa'n gat lē', kuze', nzhak nzhaknu Me rē men, xa' nzhakla Mizhab kide, par le' xa' kwa'n gat lē'.

3

Más tsak Jesús lo Muisés

¹ Rē go wech no bizan, men che'n Jesukrist nela da ga', bitsila go cho nak Jesukrist: lo Me mika'b Dios di'zh Me widi'zh che'n Dios lo be, mbaino nak Me ngulē'i ro lo be, Me kwa'n nidi'zh be ñila be. ² Jesukrist mile' rē kwa'n nzhab Dios lo rē zhi'n nazhon kwa'n mika'b Dios lo Me, nela mile' Muisés rē kwa'n nzhab Dios lo xa' lo rē zhi'n nazhon kwa'n mizo Dios xa' lo rē men Israel, xa' ngok men che'n Dios. ³⁻⁴ Nela rē yo', por tu men ngokxao'we; rē kwa'n nzho, por Jesukrist ngokxao'we, no yub ska Dios Me. Kuze', ngok xigab che'n Dios, más ñal di'zh men wen por Jesukrist ke por Muisés, nela nak tu men xa' nichao' yo'; más tsak xa' ke yo' kwa'n nichao' xa'. ⁵ Mile' Muisés rē kwa'n nzhakla Dios, dub miwi' xa' lo rē men che'n Dios, nela tu mos xa' nile' kwa'n nzhab xa' nile' mandad lo xa'. Por mbin Muisés ro' Dios, mile' Dios mid'i'zh Muisés kwa'n laore le' Dios por Jesukrist. ⁶ Per se'gaka kile' Jesukrist kwa'n nzhakla Dios, dub kikina

Me rē men che'n Dios, nela xga'n galo tu men, lē' xa' nikina más rē wech win xa'. No be nak wech win Jesukrist, lē' Me nikina be, chi lē' be se'gaka yila Me, di'zh bei lo rē men, lē' Me yē'd dub kimbēz be yē'd Me.

Nagakt go nayi'lazh; bin go ro' Dios

⁷ Kuze', nela xmod nzobni' ka lo Yech che'n Dios:

Chi lē' go gon kwa'n ne Dios nal,

⁸ nagakt go nayi'lazh, nela pla xa' nkizē le'n yuo bizh.

Nguzenbe' bixa' Da (miwi' bixa' xmod nak Da) no mikixian bixa' Da;

⁹ ze' plo nguzenbe' rē xuz go Da.

No ter une bixa' rē kwa'n nazhon milen za cho' li'n xid bixa'.

¹⁰ Kuze', dub niyi'xian Da kun rē men ze', nzhapa lo bixa':

"Dox zit nzo xigab che'n go lon,

no gat nzhaklat go, li'be' go nez Da."

¹¹ Orze' dub niyi' Da lo rē men ze',

midizha por mis Da:

"Nayot zhē yo bixa' plo kinun,

par xax bixa' lo rē kwa'n ngwazha bixa'."

¹² Kuze', rē go wech no bizan, bikina go go, par nayo rē xigab gat lē' yek go, napa' la' go Dios Me ngwayila go, no Dios Me kinu yalnaban par dubta'. ¹³ Más wen zilita' haxta plo gak, gaknu go wech tu go kun xtu go, par nagak go men nayi'lazh, xa' gat nzhont ro' Dios, rē xa' nix laka nile' rē kwa'n gat lē', rē kwa'n nayi' par lo Dios. ¹⁴ Per chi zo be wen lo widi'zh che'n Dios kwa'n ngwayila be dizde or galo, orze' lē' be gal kwa'n nazhon kwa'n kinu Jesukrist par be.

¹⁵ Nela nzobni' ka lo Yech che'n Dios:

Chi lē' go gon kwa'n ne Dios lo go nal,

nagakt go nayi'lazh nela rē men nguzenbe' Da,

no miki'xian bixa' Da.

¹⁶ No nal, ¿cho rē xa' mbin widi'zh che'n Dios per ngok nayi'lazh bixa'? Gat rē xa' ngulo' Muisés lazhe men egipto'i, rē xa' ze' ngok sa'.

¹⁷ Mbaino, ¿cho lo rē xa' miyi' Dios dub cho' li'n? Gat lo rē xa' mile' kwa'n gat lē' lo Diöse,

kuze' ngut bixa' le'n yuo bizh. ¹⁸ No, ¿par cho rē men nzhab Dios: Nayot bixa' plo kinu

Dios yo bixa' par gax ga' yē'd laxto' bixa' lo rē kwa'n nizak bixa'? Rē xa' nangont ro' Diöse.

¹⁹ No nane ka be, nangayot ka bixa' plo kinu Dios ngaxax bixa' lo rē kwa'n nizak bixa',

por nangon bixa' ro' Dios.

4

¹ Nal, naki'n kina be be, lē'ga' naxa'l plo mila' Dios di'zh gak yo be par xax be lo rē kwa'n nzho'b tich be; napa' nzho go nagakt yo re', ² porke lē' be mbin widi'zh che'n Dios kwa'n nigo' men lo rē kwa'n nzē'b xki men; se'ska mbin rē xa' ze'i, per yent cho kwente, porke nangayilat bixa'i. ³ Per be,

xa' ngwayila kwa'n mila' Dios di'zh, lè' Dios le' xax be lo rè kwa'n nzho'b tich be. Nane be kinu Dios lugar re', porke midi'zh Mei or mikixian rè men ze' Me, mbaino tutsa nzhab Me, nayot yo bixa' plo kinu Me par xax bixa' lo rè kwa'n nzho'b tich bixa'.

No ter nangayot bixa' plo kinu Dios re', per dizde or mizuxkwa' Dios yizhyuo, lè' Me nzho la re', ⁴ porke xtu plo se' nzobni' lo Yech che'n Dios:

Zhè' gazh mixax Dios lo rè kwa'n mile' Me.

⁵ No biwi' go xtu wèlt, se'ska midi'zh Dios: Nayot yo bixa' plo kinun xax bixa'.

⁶ Per se'gaka naxa'l plo le' Dios, xax rè men lo rè kwa'n nzho'b tich bixa', rè men xa' kwezh Me gak men che'n Me; no ter lo rè xa' galo laka mila' Dios di'zh kure', nangayot bixa' re' por nangon bixa' ro' Me.

⁷ Kuze' ngule Dios xtu zhè' kwa'n nize't Me nela "Nalzè" ga', porke or nded nayax li'n, midi'zh Dios xtu wèlt por Dabi, or mile' Dios midi'zh Dabi kure':

Nalzè, chi lè' go gon widi'zh che'n Dios, nale't go naya' lo Me.

⁸ No chi Josué ngale' ngaxax rè men Israel lo rè kwa'n nizak bixa', orze' nangaze'tra' Dios: "Yo tu plo xax men lo rè kwa'n nizak men."

⁹ Kuze' nane be, mer la zhin zhè' yo be plo le' Dios xax be lo rè kwa'n nizak be.

¹⁰ Kure' nilu', rè men xa' nguio plo kinu Dios re', yentra' kwan jwalt le' bixa' par ya'n bixa' wen lo Dios, nela Dios, yentra' kwa'n jwalt le' Me lo rè kwa'n ngulo Me yizhyuo re'.

¹¹ Kuze' ñal le' pa' be par le' be gan, yo be plo le' Dios xax be lo rè kwa'n nizak be, neu namás napa' zak tu rè go nela kwa'n nguzak rè xa' ze', xa' nangont ro' Dios. ¹² Tutsa xigab le' be yo be plo kinu Dios re', porke kwa'n nidi'zh Dios lo be, lè'i kinu yalnayè' yalnaban no nazhone, no más nzho loi lo tu spad kwa'n nzho lo rop tich; no ña'ze haxta plo más na'ch le'n alm che'n men, no le'n sprit che'n men, nela tu spad dox nzho lo ña'ze haxta le'n wes. Kuze', por widi'zh che'n Dios, nane be xa nak be, mbaino haxta plo nizhin xigab che'n be. ¹³ No yent cho tu kwa'n ngulo Dios gak yuka'ch lo Dios; rèi zhè' laka nilu' lo Me, Dios Me nadedt lè' be za' kwent rè kwa'n nile' be.

Ñal zubi be dub la be lo Jesukrist, Me nak ngulèi'ro che'n be

¹⁴ Nalse kinu be tu ngulèi', walika ngulèi' ro; lè' Me ngwa yub lo yibè' par ngwaxo Me ren che'n Me por rè men; Me re' Jesukrist, Me nak tugaka Xga'n Dios; kuze' ñal wen zo be lo Me, ¹⁵ porke lè' ngulèi' ro che'n be, Me dox tsak, walika nizine laxto' Me be or naxek ra' be lo kwa'n gat lè' por Mizhab, porke haxta lè' Me nguzenbe' Mizhab Me (miwi' Mizhab xmod nak Me), per nangayot ngale' Me kwa'n gat lè'. ¹⁶ Kuze', gat ñalt

zhe'b be or zubi be lo Jesukrist, Me nile' mandad lo rè. Lè' be nane ka, dox nazhi' Me be mbaino nizine laxto' Me be, nes gaknu Me be rè or nizak be tu kwa'n.

5

¹ Rè ngulèi' ro, Dios ngule bixa' xid más rè ngulèi', par za' bixa' rè gon no rè ma che'n rè men Israel lo Dios, par namás tsao'we lo rè kwa'n nzè'b xki men. ² No por nagakt le' rè ngulèi' ba' kwa'n nzhakla Dios, kuze' nilats laxto' bixa' rè men xa' nile' kwa'n nayi' par Dios sin nane bixa'i, mbaino rè xa' nix laka nile' kwa'n gat lè' lo Dios, ter nane xa' nayi'y. ³ No por mis xtol rè ngulèi' ro, naki'n yub bixa' za' gon che'n bixa' lo Dios, nela xmod niza' bixa' rè ma par gon che'n más rè men Israel, par tsao' Dios lo rè kwa'n nzè'b xki bixa'.

⁴ No nu, yent cho tu men kwe yub xa' xa', gak xa' ngulèi' ro; nab tsa Dios gak le' kure', nela xmod mizo Dios Aarón. ⁵ Se'ska Jesukrist nangabet yub Me Me, nak Me ngulèi' ro; yub Dios mizo Me nak Mei, porke se' nzhab Dios:

Lu nak Xga'na,
nalzhè' ngulen Lu,

Lu le' mandad.

⁶ Mbaino xtu plo, se' nzobni':

Lu nak ngulèi'ro par dubta', nela ngok Melquisedec.

⁷ Or miban Jesukrist yizhyuo re', dox mina'b Me lo Dios, haxta nguruzhiè' Me no mbi'n Me lo Dios, gaknu Dios Me, nazhebt Me lo yalgut; Dios Me ngak ngago' Jesukrist lo yalgut. Per mbin Dios kwa'n una'b Jesukrist por mile' Jesukrist rè kwa'n nzhakla Dios.

⁸ No ter nak Jesukrist Xga'n Dios, per lo rè kwa'n nguzakzi Me, mitse'd Me mbin Me ro' Dios, ⁹ no por milo'x Jesukrist, mile' Me rè kwa'n nzhakla Dios, kuze' lè' Me niza' yalnaban par dubta' ka' rè men xa' nzhon ro' Me, ¹⁰ orze' mizo Dios Me, nak Me ngulèi' ro par dubta', nela ngok Melquisedec ga'.

jTaxa gat zobyek go kwa'n más jwals lo widi'zh che'n Jesukrist!

¹¹ Nayaxra' widi'zh che'n Jesukrist nzhakla no ne no lo go, per dox nad go par zobyek goi. ¹² Ter nzhala ñila go widi'zh che'n Jesukrist, haxta ñal ngak la go xa' nilu'i lo men; per nal, lè'la men naki'n lu' kwa'n más jwals lo widi'zh che'n Jesukrist lo go. Nak go nela tu mè'do' kwa'n se'gaka nzho chich, maska go ngak nela tu men ro xa' nzhao rè kwa'n. ¹³ Men xa' nagakt zobyek kwa'n más jwals lo widi'zh che'n Jesukrist, gakt libe' xa' xmod nimbe men lo Dios; nak xa' nela tu mè'do' kwa'n se'gaka nzho chich ga'. ¹⁴ Per men xa' nzhak nane kwan wen no kwan gat lè't, porke miè' la xa' naban xa' lo kwa'n wen, no nak xa' nela tu men ro, xa' nzhao rè kwa'n.

6

¹ Kuze', naki'n le' pa' be par ro'b be lo rē che'n Jesukrist. Nadi'zhtra' be rē kwa'n dox jwals kwa'n mitse'd la be, nela widi'zh kwa'n la' men rē kwa'n gat lē' nak men lo Dios, no widi'zh kwa'n naki'n wi' men nab tsa lo Dios par mbe men. ² Go nane la chon nzhaklē'i' men, no chon nixo'b men ya' men yek xtu men; mbaino nane la go, lē' zhē zhin, lē' rē men ngut ruban; no nu nane go, lē' Dios gab xmod gak kun kad men par dubta' por rē kwa'n mile' bixa'. ³ Kuze', naki'n le' pa' be par ro'b be lo rē che'n Jesukrist chi lē' Dios ziyēl. ⁴ Nin lo go chon naki'n ro'bra' be lo rē kwa'n nak che'n Jesukrist. Nzho men nizini Dios yek, no mile' Dios une bixa' rē kwa'n wen che'n Dios, mbaino miza' Dios, Sprit che'n Dios nzho laxto' bixa'. ⁵ Rē men re' nize'n bixa' walika widi'zh che'n Dios, no xmod nak yizhyuo nazon kwa'n kinu Dios par lē' bixa'; ⁶ chi tuli mila' bixa' widi'zh che'n Dios por Jesukrist, orze' nagaktra' yubre bixa' lo Jesukrist nela or galo, porke nak bixa' nela xa' mikē' Jesukrist lo krus, no nu nile' bixa' par le' xtu men naya' lo Jesukrist. ⁷ Bile' go xigab che'p: yuo kwa'n nzo yiu lo, chi lē' yuo ze' niza' yalgo'n wen par xa' nzha'ne, orze' nile' Dios nazon nzha yuo ze'; ⁸ per chi lo yuo ze' nilen pura ya yich no kun más rē ya o yix kwa'n nazu't, orze' yent kwan zu'i no nzho rriez zhi'bde Diose, mbaino yēke.

Naya'lt laxto' Dios rē kwa'n wen kile'u por lē' Dios

⁹ Per rē go wech no bizan xa' nazhi' da, ter sa' mid'i'zh no lo go, per nane ka no, lē' rē kwa'n wen zhin lo go, kure' nak ban go dubta' kun Dios, ¹⁰ porke Dios nile' kwa'n ñal or nzhab Dios xmod gak kun kad men, no naya'lt laxto' Dios rē kwa'n mile' go, nazhi' go Dios or ngoknu go más rē wech be, par más yila bixa' widi'zh che'n Dios, no se'gaka kile' goi nal. ¹¹ Per nzhakla no, tu ga' go se'gaka bilu' go kun dub laxto' go kwa'n kile' go por Dios haxta zhē lult, nes par rulo kwa'n kimbēz go, kwa'n kinu Dios par go. ¹² No gat nzhaklat no cha'b go; gok go nela xmod ngok rē xa' nzhala: zililita' ngwayila bixa' widi'zh che'n Dios, mixek bixa' haxta mizhin rē kwa'n wen lo bixa', rē kwa'n mila' Dios di'zh, za' Dios ka' bixa'.

¹³ Porke yentra' cho xtu más tsak lo Dios par ze't Dios, kuze', or mila' Dios di'zh par Abraham, mis lē' Dios mize't Dios, ¹⁴ nzhab Dios:

Walikai, dox len yal wen,
mbaino dox len yar rē benal.

¹⁵ Por mixek Abraham ngulēz xa', kuze' une xa' rē kwa'n mila' Dios di'zh za' Dios ka' xa'. ¹⁶ Or nila' tu men di'zh le' xa' tu kwa'n, orze' nize't xa' lē' xtu xa' más tsak lo xa', par lu'

walika kwa'n kidi'zh xa'; no or nize't xa' lē' men ze', orze' nagaktra' chē' xa' kwa'n mid'i'zh xa'. ¹⁷ Kuze', por nzhakla Dios, ne rē ben che'n Abraham, lē' bixa' gal rē kwa'n mila' Dios di'zh par Abraham, mbaino par nane bixa', nagakt chē' Dios kwa'n mile' la Dios xigab ka' bixa', kuze' or mid'i'zh Diose, mize't Me mis lē' Me. ¹⁸ Sa' mile' Dios par ya laxto' be, zubi be lo Dios: Mila' Me di'zh, le' Me ban be nazon, mbaino nu mila' Me di'zh, chi lē' Me nale'i, yub Me zakzi Me. Mbaino nane be walika kure', porke nagakt kē' Dios mbēl. ¹⁹ No kwa'n kimbēz be re', nile' naye nizo be kun Dios, nela tu bark naye nzen ganch che'ne; no lo Me nizubi be re' nak yub Jesukrist, Me nguio lo yibē' haxta plo nzob Xuz Me Dios. ²⁰ Xuz' nguio Jesukrist por be, par mixa' Me nez ded be, nez kwa'n nizhin lo Dios, Xuz Jesukrist, porke lē' Jesukrist nak ngulē'i' ro par dubta', nela ngok Melquisedec.

7

Jesukrist nak ngulē'i'ro nela ngok Melquisedec

¹ Ngok Melquisedec rey yezh Salem, mbaino nu ngok xa' ngulē'i' ro che'n Dios, Me nzho lo yibē'. Or ñē'd Abraham di ndil xa' kun pla rē rey, orze' ngwachē'i' lo Melquisedec xa', par mina'b xa' lo Dios, más nazon ban Abraham, ² no miza' Abraham che'p rē kwa'n ngulat xa' lo dil ka' Melquisedec. No galo laka, widi'zh Melquisedec gab: "Rey, xa' nile' kwa'n nali", per por nu nak xa' rey lo rē men yezh Salem, nu gab widi'zh re': "Rey, xa' nile' nizi men chul dizde le'n laxto' men." ³ Gat nzobni't lo Yech che'n Dios cho ngok xuz Melquisedec no cho ngok xna' xa', mbaino cho ngok rē melizh xa'; no ni gat nzobni't pok ngol xa' no pok ngut xa'. Kure' nilu' nak xa' nela nak Xga'n Dios, Me nak ngulē'i' ro par dubta'.

⁴ No biwi' go, jtatu men tsak Melquisedec! Haxta xuz be Abraham miza' che'p rē kwa'n milat xa' lo dil, ka' xa' re'. ⁵ No lo yech che'n Muisés nzobni', naki'n nab tsa rē ngulē'i', xa' nzē ben che'n Leví, ñal ka' bixa' che'p rē kwa'n nak che'n más rē men Israel, no ter nu ka más rē men Israel re' nzē ben che'n Abraham nela rē ngulē'i'. ⁶ Per Melquisedec, ter gat nzēt xa' ben che'n Leví, per miza' Abraham che'p rē kwa'n nak che'n Abraham ka' xa', mbaino mina'b Melquisedec lo Dios, más nazon ya Abraham, no ter lo Abraham mila' Dios di'zh. ⁷ No rē men nane, xa' más tsak, ñal na'b lo Dios por xa' natsakt be's, ya xa' wen. ⁸ No nu xa' nika' che'p rē kwa'n nak che'n más rē men yizhyuo re', men nzhath bixa'; per or nize't Dios Melquisedec lo Yech che'n Dios, mid'i'zh Dios xa' nela tu xa' se'gaka naban nal re'.

⁹ Kuze', or miza' Abraham che'p kwa'n nka' Melquisedec, gak gab be, nu Leví miza'í, ter rë ngulëi' xa' nzë ben che'n Leví nak rë xa' nika' che'p rë kwa'n nak che'n más rë men Israel. ¹⁰ Se' ngok rë kure', porke rë xa' re' nzë ben che'n Abraham, no or ngwachël lo Melquisedec Abraham, gak gab be, rë xa' re' nzo la kun Abraham orze'.

Mizo Dios xtu ngulëi'; rë xa' galo, ngak ngatsimbe bixa' men

¹¹ Nane be, lo rë men Israel mila' Dios ley kwa'n miza' Dios nka' Muisés; mbaino por ley, mizo Dios rë xa' nak ngulëi', xa' nzë ben che'n Leví. No chi ngak ngatsimbe rë ngulëi' re' más rë men Israel, rë xa' nzë^bxki lo Dios por nangale' bixa' kwa'n nzobni' lo ley che'n Muisés, orze' gat naki'ntra' ngazo Dios xtu ngulëi', xa' nak nela Melquisedec. ¹² Per nane be, nangakt nangatsimbe bixa' más rë men, porke mizo Dios xtu ngulëi' kub, nela Melquisedec. Mbaino or michë' Dios ngulëi', nu ley naki'n michë' Me, ¹³ porke Jesukrist, Me nak ngulëi' nela Melquisedec, gat nzët Me ben che'n Aarón, mbaino ni tu rë men nzë ben che'n Me nangakt bixa' ngulëi', ¹⁴ porke rë men nane, lë' Señor Jesukrist nzë ben che'n Judá, no or midizh Muisés kwent che'n rë ngulëi', nangaze'tta' xa' rë men ben che'n Judá.

¹⁵ No zhë laka nilu', más tsak Jesukrist lo más rë ngulëi' xa' nzë ben che'n Leví, por nak Me nela Melquisedec, ¹⁶ porke mizhin ngok Me ngulëi', gat lët' por nzë Me ben che'n rë xa' nzhak ngulëi'ye, nela nzobni' lo ley; lë' Me nak ngulëi' por yalnazon kwa'n kinu Me, naban Me par dubta', ¹⁷ porke se' nzobni' lo Yech che'n Dios:

Lu nak ngulëi' par dubta', nela nak Melquisedec.

¹⁸ Kuze' ley kwa'n ngulo Dios galo, nat-saktra'i, porke nangakta' ngale'i men nela xmod nzhakla Dios. ¹⁹ Ni tu men nangakt ngaban nambe lo Dios por ngokla xa' ngale' xa' rë kwa'n nzobni' lo ley che'n Muisés. Per nal, más tu kwa'n wen kimbëz be, ke lo kwa'n galo, no kwa'n wen re' nile' nizubi be más lo Dios.

²⁰ No gat lët' nab kwa'n kimbëz be re', mbaino nu antis de zo Dios Jesukrist gak Me ngulëi' ro, mize't Dios lë' Dios, lë' Dios le'i. No ter nangayot ngaze't Dios lë' Dios or nguio más rë ngulëi', ²¹ per or ngok Jesukrist ngulëi' ro, se' nzhab Dios:

Lë' Señor mila' di'zh kure', mbaino nachët' Me di'zh che'n Me or nzhab Me:

“Lu nak ngulëi' ro par dubta'”

²² Por kwa'n mila' Dios di'zh, le' Dios por Jesús, más tsake lo kwa'n mila' Dios di'zh or galo. ²³ Tich guchin ngulëi' nguio, rë xa' nzë ben che'n Aarón; nangakt ngayo tutsa

xa' por nzhak bixa'. ²⁴ Per por dubta' naban Jesukrist, kuze' nayotra' zhë, yo xtu ngulëi' xkwent Me. ²⁵ Kuze', nu par dubta' nigo' Jesukrist rë men lo kwa'n nazhe'b nzhob bixa', rë xa' nizubi lo Dios por lë' Me, porke dubta' nzo Jesukrist par na'b Me lo Dios por rë men che'n Me.

²⁶ Kuze' nal Jesús nak ngulëi' ro, Me naki'n zo lo be; nambe laxto' Me, yent cho dol nzhap Me, no ni tu kwa'n gat lë' ngale't Me; mbaino ngulo' Dios Me xid rë men nzë^b xki, no ñanu Dios Me lo yibë' plo más ya. ²⁷ Gat nakt Jesukrist nela más rë ngulëi' ro. Zilita' nzhut bixa' ma par niza' bixa' gon lo Dios, galo laka por mis dol che'n bixa', orze' por dol che'n más rë men. Per Jesukrist, tutsa wëlt miza' Me yub Me par dubta', kun mis kwerp che'n Me, lo Dios, por kwa'n nzë^b xki rë men. ²⁸ Walika naki'n be tu ngulëi' ro nela Me re', porke lo ley kwa'n mila' Dios lo Muisés nzobni', rë ngulëi' kwa'n yo por ley re', nix laka le' bixa' kwa'n gat lë'. Per or mila' Dios di'zh mize't Me lë' Dios, lë' Me zo yub Xga'n Me gak ngulëi' ro, xa' le' lë'ska lë', rë kwa'n nzhakla Dios.

8

Rë zhi'n nazhon kwa'n nile' rë ngulëi' men Israel, nake nela tu xkal tsa lo rë kwa'n nile' Jesukrist lo yibë' por be

¹ Xid rë kwa'n kidi'zh no lo go, kwa'n más nzhakla no ne go: Kinu be tu ngulëi'ro, no Me re' Jesukrist; no nguzob Me lad direch che'n Dios, kile' Me mandad plo nzob Dios lo yibë'. ² Nak Me ngulëi' ro le'n yado' kwa'n más nazhon, yado' kwa'n mis Dios michao', no gat lët' mene. ³ Rë ngulëi' ro kwa'n mizo Dios lo yizhyuo re', naki'n miza' bixa' gon, nu nzhut bixa' ma lo Dios. Kuze', nu ska Jesukrist naki'n miza' gon lo Dios. ⁴ No chi stubi nzo Jesukrist yizhyuo nal re', orze' ni gat ñal ngak Me ngulëi', porke lo yizhyuo re' nzhob la rë ngulëi' xa' niza' gon lo Dios, nela xmod nina'b ley kwa'n mila' Dios lo Muisés, ⁵ ter nak rë zhi'n nazhon kwa'n nile' rë ngulëi' re' nela tu xkal ga', che'n rë kwa'n nzhob lo yibë'; no nane be, nake kwa'n laore yi'd, porke or naga kuxkwa' Muisés yuo yid plo nidi'zh xa' kun Dios, nzhob Dios lo xa': Biwi' par le'lë'tsa lë' rë kwa'n milun lol, yek yi' Sinaí.

⁶ Nal, más tsak zhi'n nazhon kwa'n nile' Jesukrist ke rë xa' nguio galo; no nu más tsak kwa'n mila' Dios di'zh par be por Jesukrist, ke lë'la kwa'n mila' Dios di'zh or galo, ⁷ porke chi ngaya'n nambe laxto' rë men por kwa'n mila' Dios di'zh galo, orze' gat naki'ntra' ngala' Dios di'zh xtu wëlt par rë men ze', ⁸ porke une Dios, nangont rë men che'n Me ro' Me, orze' se' midizh Dios lo Yech che'n Dios:

Biwi'u, lè' zhè zhin, lè' Da la di'zh xtu wèlt par rē men Israel, mbaino par rē men Judá.

⁹Widi'zh kwa'n lan re' nagakte nela widi'zh kwa'n milan par rē xuz bixa', xa' nzhala,

or nguzena ya' bixa' par ngulon bixa' lazh men Egipto.

No por nangale' bixa' rē kwa'n milan di'zh lo bixa', kuze' milan bixa', nzhab Señor.

¹⁰No dispwes di rē zhè ze', nzhab Señor, se' gak widi'zh kwa'n lan par rē men Israel; nits ga' yo rē ley Da yek bixa', mbaino le'n laxto' bixa' zobni'ne.

Orze' Na gak Dios che'n bixa', no lè' bixa' gak men da.

¹¹No gat naki'ntra' lu' bixa' lo wech bixa', cho nak Dios,

porke rē men libe' Da, dizde mē'd win haxta men ngol.

¹²Por nilats laxto'n bixa', nawi'ta kwan nak bixa',

mbaino nayotra' tsilan rē kwa'n nzè'b xki bixa'.

¹³Or midì'zh Dios, la' Me di'zh xtu wèlt, kure' gab, nazu'tra' kwa'n mila' Dios di'zh or galo; mbaino or nazu'tra' tu kwa'n, ngok go'x lai, kaxche'p lè'i yitlo la.

9

Yado' lo yizhyuo re', no yado' yibè'

¹No nal, lo kwa'n mila' Dios di'zh galo, kinui rē ley par xmod naki'n le' men rē zhi'n nazhon lo Dios, mbaino tu yo' plo le' men rē kure'. ²Mbaino yo' re' ngok tu yo'yid kwa'n michao' rē men Israel, lè' Dios mila' di'zh, nak bixa' men che'n Dios. Le'n yin ze' nzho tu yèts kwa'n nakxao' pura or, no zhèi di tu ben pan kwa'n lè maná; no nu bar che'n Aarón, kwa'n ngulen bixich ze' nzho le'n yin, mbaino kun rē tab ke plo mikè' Dios za chi' mandamint kwa'n mila' Dios lo Muisés. ⁵Per tich yin re', nakxao' chop winab che'n ganj querubín che'n Dios; no rop querubín ze' nak nela tu se'n ga', lè' Dios nzo ze'; no xi'l rop querubín ze' nizhè'l garol sao' tich yin. No tich yin re' naki'n chob ngulèi' ro ren che'n rē ma por rē kwa'n nzè'b xki rē men Israel. Per nal nayentra' di'zh no tuga' rē kure'.

⁶No or ngokxao' yo' re' kun rē kwa'n nzho le'ne, orze' zilita' ño rē ngulèi' le'n yo' re',

plo nazhon, par nile' bixa' rē zhi'n nazhon lo Dios. ⁷Per xtu le'ne kwa'n ña'n xan laka plo dox nazhon, nab tsa ngulèi' ro ño ze', tutsa wèlt tu li'n; no nagakt yo xa' ze' chi nawei' xa' ren che'n ma par za' xa' gon lo Dios por rē kwa'n nzè'b xki xa', mbaino por rē kwa'n nzè'b xki rē men Israel por kwa'n nile' bixa', or gat ñanut laxto' bixa' chi nzè'b xki bixa'. ⁸Por rē kure', lè' Sprit che'n Dios nilu' lo be, rē zhè kwa'n nguio rē ngulèi' le'n yo' yid plo mile' bixa' rē zhi'n nazhon lo Dios, se'gaka nayao' nez kwa'n niro' plo walika nzho Dios. ⁹Rē kwa'n ngok galo nak nela tu se'n ga' par rē kwa'n nzhak nal re', porke rē gon no rē ma kwa'n miza' bixa' lo Dios, nangakt ngale'i, ngazi rē men ze', lè' bixa' nambe laxto' lo Dios. ¹⁰Rē kure' mizu' namás par nane men kwan nguziyèl Dios gao men no go men, mbaino xmod gaz men, o wane'i cho xtu kwa'n nile' men par nimbe nab tsa kwerp che'n men; rē kure' midì' haxta or mile' Dios xtu mod, ban men lo Dios.

¹¹Per or mbi'd Jesukrist, Me nak ngulèi' ro nal, mbi'dla' Me rē yalnazhon par be, rē kwa'n nidi' par dubta'. No le'n yado' plo nile' Me rē zhi'n nazhon nal re', más nazhone, mbaino yent kwan jwalte, no gat lè't men yizhyuo mizuxkwa'i, lè'i nzè yibè'. ¹²No nu or nguio Jesukrist mer plo nzob Dios, gat lè't ren che'n chib o ren che'n ngo'n miza' Me gon; yub ren pa' che'n Me miza' Me gon lo Dios; mbaino tutsa wèlt miza' Me ren che'n Me, ya nayotra' le' Mei, par ngulo' Me be lo rē kwa'n nzè'b xki be lo Dios. ¹³Nzhala ze', ren che'n chib, o ren che'n ngo'n, mbaino kubde che'n rē bicerr kwa'n nizè'k bixa', nichob rē ngulèi' yek rē men gat nambet lo Dios par ña'n nambe nab tsa kwerp che'n rē men ze' lo Dios. ¹⁴Per nane be, por ren che'n Jesukrist mitsimbe Me be haxta le'n laxto' be, kuze' nane be gat nzè'b xkitra' be lo Dios nela rē men se'gaka nile' rē kwa'n nazu't par tsimbe bixa' lo Dios. Kuze' nzhak niban be zilita' nela xmod nzhakla Dios, Me naban par dubta'. Rē ngulèi' dubta' niza' bixa' rē ma wen par gon lo Dios. Se'ta' or miza' Jesukrist yub Me nela tu gon ga' lo Dios, yenta' kwan nak Me lo Dios, ni tu kwa'n gat nzè'b xkit Me, porke lè' Sprit che'n Dios ngoknu Me, lè'ska lè' kwa'n mile' Me lo Dios or miban Me lo yizhyuo re'.

¹⁵Kuze', lè' Jesukrist nak Me nidi'zh lo Dios por be, mbaino por lè' Me mila' Dios di'zh xtu wèlt par be. No ngut Jesukrist par miche' Me rē kwa'n nzè'b xki rē men, xa' miban lo kwa'n mila' Dios di'zh galo; no par rē xa' ngurezh Dios gak men che'n Me, gal bixa' yalnaban par dubta' kwa'n kinu Dios par lè' bixa'. ¹⁶Kwa'n mila' Dios di'zh par be por Jesukrist nak nela tu yech kwa'n mila' tu men or gat xa', plo zobni' rē kwa'n mila'

xa' di'zh la' xa'. Per par tsak yech re', naki'n galo laka gat xa' mila'i. ¹⁷ No yent kwan tsak yech re' chi se'gaka naban xa' michao'we; lè'i tsak or ngut la xa'. ¹⁸ Kuze', or mila' Dios di'zh or galo par re' men Israel chi tiemp, naki'n mixo ren che'n rë ma. ¹⁹ No or milox midizh Muisés rë kwent che'n rë ley lo rë men Israel, orze' nka' xa' ren che'n pla bicerr kun ren che'n pla chib, no migoch xa'i kun nits, mbaino ngwaka' xa' che'p yich che'n mbëkxi'l' kwa'n nilu' naxne, no mili'b xa'i yek tu ya kwa'n lë hisopo; orze' michob xa' ren lo yech plo nzobni' rë ley, mbaino yek rë men Israel, ²⁰ orze' nzhah xa' lo rë men ze':

Ren re' nilu',

dizde nalzhë re' naki'n le' go rë kwa'n mila' Dios di'zh par go.

²¹ Se'ska michob Muisés ren tich yo'yid, no lo rë kwa'n naki'n rë ngulëi' or nile' bixa' zhi'n nazhon par Dios le'n yo'yid. ²² Lo ley kwa'n mila' Dios lo Muisés nzobni', kun ren che'n rë ma naki'n mbe rë nak kwa'n lo Dios, porke chi naxo ren, natsaot Dios lo rë kwa'n nzë'b xki men.

Tutsa wëlt par dubta' mixo Jesukrist ren che'n Me

²³ Kuze', naki'n ngut rë ma ze', no mixo ren che'n bima, par mimbe rë kwa'n nak nela tu xkal ga' che'n rë kwa'n nzho lo yibë'; per, par mimbe rë men xa' wei' Dios lo yibë', naki'n mixo ren kwa'n más tsak lo ren che'n rë ma, ²⁴ porke nangayot Jesukrist le'n tu yo'yid kwa'n michao' ya' men, plo nzhah men lë dox nazhon, per nab tsa tu xkal nake che'n yado' yibë'; no nal yub pa' yado' yibë' nzho Me plo nina'b Me lo Dios por be. ²⁵ Mbaino gat lë't garga'l mixo Jesukrist ren che'n Me, nela ngok kun rë ren che'n rë ma ga', or li'n kun li'n naki'n nguio rë ngulëi' ro par mixo bixa' ren che'n rë ma plo nzhah men lë dox nazhon. ²⁶ No chi naki'n ngale' Jesukrist nela xmod nile' rë ngulëi' yizhyuo re', orze' nayax wëlt naki'n ngat Me, dizde or nguio yizhyuo. Per nal, rë zhë lult re', tutsa wëlt nguruxo'b Jesukrist yizhyuo re' par ngut Me nes miche' Me rë kwa'n nzë'b xki be lo Dios par dubta'. ²⁷ Sa'ska, nela ño nzhat rë men tutsa wëlt, orze' tuga' bixa' ded lo Dios par gab Dios xmod gak kun kad bixa'; ²⁸ se'ska mixo Jesukrist ren che'n Me tutsa wëlt lo krus, par mizubchi Me rë kwa'n nzë'b xki nayax men lo Dios. No lë' Jesukrist yaxo'b xtu wëlt, per gat lë't par kubchi Me rë kwa'n nzë'b xki mene; lë' Me yaxo'b par za' Me yalnaban par dubta', ka' rë xa' kwa'n kimbëz dub la, yaxo'b Me xtu wëlt.

10

¹ Porke ley kwa'n mila' Dios lo Muisés nak nela tu xkal tsa che'n rë kwa'n wen

kwa'n laore zhin, per gat nakte nela widi'zh che'n Dios por Jesukrist; kuze', ley kun ren che'n rë ma kwa'n nixo li'n kun li'n, nagakt kubchiy par dubta' rë kwa'n nzë'b xki rë men, xa' nizubi lo Dios. ² No chi lë' ley ngak ngatsimbe rë kwa'n nzë'b xki rë men re', orze' yentra' por kwan ngaza'ra' bixa' ren che'n rë ma, chi lë' bixa' nangazi se'gaka nzë'b xki bixa'. ³ Per or niza' bixa' gon kun ren che'n rë ma li'n kun li'n, nizu'i namás par nitsila bixa', lë' bixa' nzë'b xki lo Dios, ⁴ porke ren che'n rë ngo'n, no ren che'n rë chib, nayot kubchiy kwa'n nzë'b xki men.

⁵ Kuze', or mbi'd Jesukrist yizhyuo, nzhah Me lo Dios:

Gat nzhaklatra'l ne' men rë ma lol,

o más rë gon kwa'n nine' men lol,

par che' rë kwa'n nzë'b xki bixa'.

Kuze' mizol Da,

kun yub kwerp Da len rë kuba'.

⁶ No ngwachi'blal or nizë'k men rë ma lo biko' che'nal,

mbaino gat ñotra' laxto'l más rë gon kwa'n nine' bixa' lol,

par tsao' lo rë kwa'n nzë'b xki bixa'.

⁷ Kuze' nin lol:

“Lë' Da nzhal re' par len rë kwa'n nzhaklal, nela xmod nzobni' ka lo Yech che'nal por Da.”

⁸ Galo laka nzhah Jesukrist: “Ngwachi'blal or nizë'k men rë ma lo biko' che'nal, mbaino gat ñotra' laxto'l más rë gon nine' bixa' lol, par nitsao' lo rë kwa'n nzë'b xki bixa'”, ter lo ley nzobni', naki'n le' men rë kure'. ⁹ Per nu nzhah Jesukrist or miza' Me yub Me nela tu gon ga' lo Dios: “Lë' Da nzhal re' par len rë kwa'n nzhaklal, nela xmod nzobni' ka lo Yech che'nal por Da.” Sa' ngok mizubchi Jesukrist kwa'n nguio galo, no por ren che'n Me, nguio Me xtu mod ya'n nambe men lo Dios. ¹⁰ Mitsimbe Dios be lo rë kwa'n nzë'b xki be por mile' Jesukrist kwa'n ngokla Dios; yub Me miza' Me kwerp che'n Me tutsa wëlt par dubta', or nkë Me lo krus por be.

¹¹ Rë ngulëi' men Israel, se'gaka nile' bixa' rë zhi'n nazhon che'n Dios, mbaino mis lë'ska rë ma ze' niza' bixa' nayax wëlt gon lo Dios, ter nayot kubchi rë kure' kwa'n nzë'b xki men lo Dios. ¹² Per Jesukrist, tutsa wëlt miza' Me yub kwerp che'n Me nkë lo krus par mizubchi Me rë kwa'n nzë'b xki be lo Dios par dubta', orze' nguzob Me lad direch che'n Dios lo yibë', ¹³ plo kimbëz Me zhin zhë, chi Dios rë xa' nidil Me, che'p'tsa (bi'ch laka) gak bixa' xan ni' Me, ¹⁴ porke tutsa wëlt nkë Me lo krus par mitsimbe Me par dubta', rë xa' nak men che'n Me. ¹⁵ No nu Sprit che'n Dios, midizh lë' kure' walika or mile' Me nguzobni' widi'zh re' lo Yech:

¹⁶ Kure' nak kwa'n lan di'zh par lë' bixa', or lox rë kwa'n milan di'zh galo, nzhah Señor.

Le'n laxto' bixa' zobni'n rë widi'zh Da, mbaino len, nits laka yo rë ley Da yek bixa'.
 17 No nu nzhab Sprit che'n Dios:
 No ni nayora' tsilan rë kwa'n mia'l laxto' bixa' Da,
 por ngok nayi'lazh bixa' Lon,
 mbaino ya'l laxto'n rë kwa'n gat lë' nak bixa'.
 18 Kuze', or mizhe' la rë kwa'n nzë'b xki men, gat naki'ntra' za' men rë ma par yao' lo rë kwa'n nzë'b xki men lo Dios.

Ñal zubi be lo Dios

19 Kuze' nal, rë go wech no bizan, por ren che'n Jesukrist, yentra' kwan nika yo be lo Dios plo lë dox nazhon. 20 Lë' Jesukrist mixa'l xtu nez ded be, nez kwa'n kinu yalnaban par be par dubta'. Mixal Me nez re' or miza' Me yub kwerp che'n Me nela tu gon ga' lo Dios por be. 21 Jesukrist nak ngulë'i ro che'n be, Me nile' zhi'n nazhon lo Dios le'n yado' kwa'n nile' ña'n nambe laxto' be, porke nane be lë' Dios niwi' lo be nela tu men yent kwan nak por ñila be widi'zh che'n Me, widi'zh kwa'n nile' ña'n nambe laxto' be lo Dios no lo rë xigab kwa'n gat lë't ñi'd yek be; mbaino por mimbe dub be kun widi'zh che'n Dios, nak be nela tu men ngoz ga', lë' widi'zh che'n Dios nak nela nits nambe ga'. 23 Mbaino, ñal zo be wen lo widi'zh che'n Dios kwa'n ngwayila be, no gat ñalt le' be chop xigab lo kwa'n kimbëz be, porke lë' Dios ne' kwa'n gal be, kwa'n mila' Me di'zh ne' Me; 24 mbaino be men che'n Jesukrist, ñal wi' be xmod tsiro'b be la wech be par chizhi' be tu be kun xtu be; mbaino nu wi' be xmod le' be nab rë kwa'n wen. 25 No gat ñalt la' be nayatra' be plo nibin rë men che'n Jesukrist, nela xmod nak pla bixa'; per be kwa'n ñal le' be, la be yek más rë men che'n Jesukrist par más wen zo bixa' lo Dios, porke nzhazhin gax la zhë yubre Jesukrist, yi'd ka' Me rë men che'n Me.

26 Porke chi se'gaka kile' be kwa'n gat lë' ter mbin la be widi'zh che'n Jesukrist, orze' yent kwan zu' ngut Jesukrist por be. 27 Orze' nab tsa kimbëz be gab Dios kwan ñal be, orze' xë'l Me be le'n bël nazhe'b kwa'n lo'x rë men kwa'n niyi' nine Dios. 28 Porke chi tu xa' nagakla ra', gon kwa'n nzhab ley kwa'n mila' Dios lo Muisés, no nguio chop o chon xa' une walika kure', orze' ñal gat xa' re', no yent cho lats laxto' xa'. 29 Orze', xmod nile' go xigab, yazë xa' nile' naya' lo Xga'n Dios, mbaino lo ren kwa'n mixo Xga'n Dios por men ze'? No por ren ze' mila' Dios di'zh, zhe' kwa'n nzë'b xki xa' re' lo Dios. No haxta nu nakap nidi'zh xa' nak Sprit che'n Dios, Me nazhi' men re'. jBile' go xigab, tatu nazhe'b ñal men ze', zakzi xa'! 30 Porke nane la be, se' midi'zh Dios: "Kun Na kix xa' kwa'n mile'

xa', Na gap kwan ñal xa'." No nu nzhab Dios: "Lë' Da gap xmod gak kun tu ga' men Da."
 31 jDox nazhe'b nzha men gal yalzi che'n Dios, Me kinu yalnaban par dubta' mbaino Me gak xë'l men tuli plo nazhe'b!

32 Bitsila go or galo laka, or laore mizini widi'zh che'n Dios yek go, tatu mixek go mizakzi men go por nak go men che'n Jesukrist, 33 porke nzho go, dox nakap midi'zh men nak go, mbaino dilant lo men milinu bixa'i go; mbaino nzho go dox mile' xigab por rë xa' mizakzi men nela go ga'. 34 No gat lë't nab milats laxto' go rë guchin go rë men che'n Jesukrist, xa' nzho lizhyi'be; haxta nu mizak laxto' go or milat men rë kwa'n kinu go, porke ñila go, lo yibë' nzho kwa'n más tsak par go, no kwa'n di' par dubta'. 35 Kuze' nale't go chop xigab chi nzo ka Dios kun go or mizakzi go por nak go men che'n Me, porke por kure', dox tu kwa'n wen ne' Dios ka' go, kwa'n mila' Dios di'zh. 36 Porke ñal xek go lo rë kwa'n nizak go, par se'gaka le' go kwa'n nzhakla Dios, par gal go kwa'n mila' Dios di'zh ne' Me ka' go, 37 porke se' nzobni' lo Yech che'n Dios:
 Kaxche'ptsa, mer la ye'd Me nak di'zh ye'd, nalë'tra'i be's.

38 Rë xa' ngurezha,
 rë xa' nile' kwa'n ñal lon,
 ñal se'gaka yila bixa' Da.
 Per rë xa' nayera' laxto' yi'dkë ticha,
 nayot laxto'n bixa'.

39 Per be, gat nakt be men xa' nizheb por nak xa' men che'n Jesukrist, porke rë xa' nizheb, lë' xa' lox lo Dios; be men che'n Jesukrist, lë' Dios ne' yalnaban par dubta' ka' be, por dubta' ñila be widi'zh che'n Me.

11

Tsila be rë men xa' walika ñila widi'zh che'n Dios

1 Or ñila men tu kwa'n mila' Dios di'zh par lë' xa', nane ka xa' lë' zhë zhin gap xa'i; no ter gat nilu'te lo xa', per lë' zhë zhin, lë'i ne xa'. 2 Rë xuz be xa' nzhala, wen une Dios bixa' por ngwayila bixa' kwa'n mila' Dios di'zh.

3 Nane be, nab tsa kun widi'zh che'n Dios mizuxkwa' Me rë kwa'n nzho; kuze' lo rë kwa'n niwi' be nal, ngokxao'we kun rë kwa'n gat nilu't lo men.

4 Por ñila Abel widi'zh che'n Dios, miza' Abel gon lo Dios kwa'n más kwa'n wen lo gon kwa'n miza' Cain; no por kuze', midi'zh Dios, lë' Abel nak tu men más nile' kwa'n nzhakla Dios lo wech xa'. Mbaino, miwi' Dios wen lo gon che'n Abel, no nal, ter ngut la Abel, per se'gaka ñët xa' por kwa'n mile' xa'.

5 Se'ska ngok kun Enoc, por ngwayila xa' Dios, dub naban xa' ñanu Dios xa'; nangatta' xa', no yentra' cho ngazhël xa'; mbaino lo

Widi'zh che'n Dios nzobni', or naga wei' Dios xa' lo yibè', wen miwi' Dios lo xa',⁶ porke gat ñot laxto' Dios, xa' gat ñila widi'zh che'n Dios, porke par zubi tu men lo Dios, naki'n yila xa', lè' Dios nzho, mbaino lè' Dios niza' kwa'n nazhon ka' men, men nikwa'n Dios. ⁷ No por ngwayila Noé widi'zh che'n Dios or nzhab Dios, lè' rē kwa'n gak, kwa'n nagat ne men, no orze' mile' xa' kwa'n nzhab Dios, michao' xa' tu yo' ya ro, par nangat rē xa' lizh xa'. No por ngwayila Noé Dios, nguruya' xa' xid rē men nayi'lazh; kuze' miwi' Dios wen lo xa'.

⁸ No por ngwayila ska Abraham Dios, or ngurezih Dios xa', mbin xa' ro' Dios, nguro' xa' lazih xa' par ña xa' lo yuo plo mila' Dios di'zh, za' Dios ka' xa'. No or nguro' xa', ni nane xa' plo ña xa'. ⁹ No por ngwayila Abraham Dios, miban xa' lo yuo nela tu men zit ga', yuo kwa'n nzhab Dios nak che'n xa', no or miban xa' loi, nab tsa yo' yid ngop xa', no sa'ga' miban Isaac no Jakob, porke se'ga' mila' Dios di'zh lo rē xa' re', ¹⁰ porke kimbèz Abraham, yo xa' tu yezh kwa'n di' par dubta', plo yub Dios mile' xigab xmod yuxkwa', mbaino plo yub Dios kuxkwa'. ¹¹ No se'ska Sar, ngwayila xa' widi'zh che'n Dios; ter nangakt ngap xa' mè'd mbaino nded la li'n xa' par kure', per por yalnazon che'n Dios, ngok xa' xna' mè'd, porke ngwayila xa', nadedt lè' Dios le' kwa'n mila' Dios di'zh lo xa'. ¹² Kuze', ter ya dox la mengol Abraham, per miar xa' nela rē mbèl ga' kwa'n nzi'b lo yibè', no nela rē yux kwa'n nzhin ro' nitsdo' ga', kwa'n yent cho gak lab.

¹³ Rē men re' ngut bixa', nanganet bixa' rē kwa'n mila' Dios di'zh par lè' bixa'; per por ngwayila bixa' Dios, ter naga zhine lo bixa', lè' bixa' une lai, orze' mizi bixa', nak bixa' nela men zit ga', mbaino ka nzhadet bixa' yizhyuo re'. ¹⁴ Nane be, rē xa' nidi'zh sa', nali laka midì'zh bixa', lè' bixa' kikwa'n tu plo gak lazih bixa'. ¹⁵ No chi ngatsila bixa' lazih bixa' plo nguro' bixa', orze' ngak ngayubre bixa'. ¹⁶ Per nangayèkt bixa'; lè' bixa' mile' xigab, yo bixa' tu plo más tsak, kwa'n nzhin lo yibè'. Kuze' ño laxto' Dios, lè' Dios, Dios che'n bixa', porke Dios ya kinu la tu plo gak lazih bixa'.

¹⁷ No Abraham, por ngwayila xa' widi'zh che'n Dios, miza' xa' tugaka Isaac, xa' nak xga'n xa', par ngat xa' lo Dios, nela tu gon ga', or nguzenbe' Dios xa' (or miwi' Dios xmod nak xa'), nabei, chi ziyèl xa', za' xa' tugaka xga'n xa' kwa'n kinu xa', per nguziyèl Abraham za' xa' xga'n xa', ter se' mila' Dios di'zh: ¹⁸ "Nabtsa por Isaac, gak yaral, par yo rē xa' gak ben che'nal." ¹⁹ Porke nane Abraham, ke lè' Dios kinu yalnazon, haxta nile' Dios niruban rē men ngut; no gab be, nguruban Isaac, orze' nguzenska Abraham

xga'n xa' xtu wèlt. Kure' nak nela tu señ ga'. ²⁰ No se'ska, por ñila Isaac widi'zh che'n Dios, kuze' midì'zh xa' widi'zh nazhon par Jakob no par Esau'. ²¹ No se'ska, Jakob, por ñila xa' Dios, dub pe'n nak xa', nzen xa' yek bordón che'n xa' par miza' xa' widi'zh nazhon par tuga' rē xga'n Che, mbaino nu midì'zh xa' lo Dios, nazhon Dios. ²² No Che, por ñila xa' widi'zh che'n Dios, dub naxiat xa', midì'zh xa' por Dios, lè' rē men Israel ro' lazih men Egipto; mbaino mila' xa' di'zh xmod gak kun rē wes che'n xa'.

²³ No por ñila rē xuz Muisés, widi'zh che'n Dios, kuze' or ngol Muisés, nguluka'ch bixa' Muisés dub chon mbè'o', porke une bixa', dox harmós mè'd, no nangazhebt bixa' kwa'n mile' rey mandad, naki'n gat rē mè'd xibyí'. ²⁴ No se'ska Muisés, por ñila xa' widi'zh che'n Dios, or miro'b xa', nangazyèlt xa' ngarulè xa' xga'n xcha'p rey Egipto, ²⁵ lè'la ngule xa' zakzi xa' tutsa kun rē men che'n Dios, ke par ngaban xa' lo yalrrik kwa'n nidi' tu rratsa mbaino nile'i nzè'b xki men lo Dios, ²⁶ porke par Muisés, más tsak zakzi xa' nela Jesukrist ga', ke par ngaban xa' lo rē yalrrik kwa'n nzho lazih men Egipto; porke lè' xa' kimbèz gal xa' kwa'n mila' Dios di'zh par lè' xa'. ²⁷ Por ñila Muisés widi'zh che'n Dios, nguro' xa' lazih men Egipto, ngazhebt xa' ter miyi'xian rey Egipto kun lè' xa'; tutsa xigab mile' xa', wen nguzo xa' kun Dios, no chigab niwi' xa' lo Dios Me yent cho gak ne. ²⁸ Por ñila Muisés widi'zh che'n Dios, mile' xa' lani kwa'n lè' Pask, no nu mile' xa' mandad, mitsa' rē men Israel ren che'n rē mbèkxi'l ro' rē pwert lizh bixa', nes par nangut ganj xa' nzht men, ni tu xga'n galo rē men Israel. ²⁹ No por ñila rē men Israel widi'zh che'n Dios, nded bixa' sao' nitsdo' Naxne, nela lo yuo bizh ga'; no or ngokla rē men Egipto, no bixa' ngaded, orze' miao'yo' bixa' le'n nitsdo', ngwap bixa'. ³⁰ No por ñila rē men Israel widi'zh che'n Dios, mibil simient ke kwa'n nzho naka'n ro' yezh Jericó, or milox miza' bixa' wèlt gazh ngubizh, naka'n ta'i. ³¹ No Rahab, tu una' le'n kai (kwa' gal), por ñila xa' widi'zh che'n Dios, nangatta' xa' or ngut rē men Jericó, rē xa' gat nzhont ro' Dios, por ngoknu una' rē men Israel xa' ngwala'ch xmod nak yezh ze'.

³² ¿Kwanra' ganin lo go par zobyek go, xmod nak ñila men Dios? Naza'tra' ze'ta Gedeón, no Barac, mbaino Sansón, no Jèftè, mbaino Dabi no Samuel, mbaino más rē xa' midì'zh por Dios chi tiemp. ³³ Por ñila bixa' widi'zh che'n Dios, nzho xa' mile' gan lazih men or ndil bixa', no mile' bixa' mandad loi nela xmod nzhakla Dios, kuze' ngol bixa' kwa'n mila' Dios di'zh par lè' bixa'; no nzho bixa' mitsao' ro' mbe'zh; ³⁴ mbaino nzho bixa' mitsiyal bèl nazhe'b, no nzho

bixa' mile' gan nangut men bixa' kun spad. Mbaino nzho bixa' yent jwers, per nguio jwers bixa', ngok bixa' dox naye lo yèr, haxta michubla bixa' rē sondad xa' nzē xtu lazh men xa' nidil bixa'.³⁵ No nzho rē una' xa' nguruban rē melizh por ñila rē una' ze' Dios; no ter nzho bixa' ngut por miza-kzi men bixa', per nangaziyélt bixa' ngalát men bixa', porke nzhakla bixa' ban bixa' nazhon or ruban bixa'.³⁶ No nzho más bixa' nguzakzi, mixizhnu men bixa', no michél mene tich bixa'; mbaino nzho bixa' mili'b kun kaden, no ngulo men bixa' lizhyi'b.³⁷ No nzho bixa' ngut kun ke, no kun sierr, chop lé' ngok bixa' tuli. Más bixa' ngut kun spad, no nzho bixa' nkizé laba'i, lare'i; no ngok xab bixa' yid che'n mbéksi'l no che'n chib, yentra' kwan kinu bixa'; no dox nalats nguzak bixa', mbaino nakap mili'nu men bixa'.³⁸ Gat ñalt rē men yizhyuo ché'l kun rē men re'; nkizé bixa' le'n rē yuo bizh plo yent men, no le'n rē yi', ni nane bixa' plo nzha bixa', ngok lizh bixa' le'n rē ye'r ke mbaino le'n rē ye'r yuo.

³⁹ Rē xa' re', ter dox wen kwa'n mile' bixa' por ñila bixa' widi'zh che'n Dios, per nanganet bixa' kwa'n mila' Dios di'zh par lé' bixa',⁴⁰ porke Dios kinu la tu kwa'n tsak par rē be, kuze' nangalt bixa'i por be, porke tutsa gal be kun lé' bixa' kwa'n mila' Dios di'zh.

12

Naki'n tsila be xmod nkizé Jesukrist

¹ Nal nzo be sao' che'n rē xa' walika ngwayila Dios. Kuze', naki'n la' be tu lad rē kwa'n nika le' be rē kwa'n wen, mbaino la' be nakizétra' be lo rē kwa'n gat lé' kwa'n nichél xi'd be, no kek be zé be nez che'n Dios kwa'n mine' Me zé tuga' be. ² Naki'n wi' be xmod mile' Jesukrist, porke lé' Me mile', ngwayila be widi'zh che'n Dios, mbaino por lé' Me, le' be lé'tsa kwa'n nzhakla Dios. Or nguzakzi Jesukrist lo krus, nangatulat Me ngut Me sa', porke nane ka Me, or lox zak Me rē kure', lé' Me ne kwa'n nazhon, mbaino dox zak laxto' Me. Nal lé' Me nzob lad direch che'n Dios.

³ Kuze', bile' go xigab, tatu mixek Jesukrist or midizh rē xa' dox nzé'b xki, rē kwa'n gat ñal lo Me. Kuze', nayazhat go mbaino ni naya laxto' go por rē men re',⁴ porke lé' go se'gaka kixek lo rē xa' nakap, gat le' xa' gan gut xa' go. ⁵ ¿Chi mia'l laxto' go rē widi'zh kwa'n ne Dios lo go por nak go xmé'd Me? Porke se' nzobni' lo Yech che'n Dios:

Xmé'da, nayi'tal or tse'd Diosal or nile' kwa'n gat ñalt,
mbaino ni nacha'bal or kuzhié Dios yekal por kwa'n nakal,

⁶ porke lé' Dios nitse'd rē men nazhi' Dios,

mbaino nichél Diosé tich rē xa' nak xmé'd Me.

⁷ Kitse'd Dios go nal re' por xmod nak go, par neu, walika xmé'd Dios go. O, ¿chi nzho tu men gat nitse'd xa' xmé'd xa' or nile' mé'd tu kwa'n gat ñalt? ⁸ Per chi lé' Dios gat nitse'd go nela xmod nitse'd Dios rē xmé'd pa' Dios, orze' gat lé't xmé'd Dios go. ⁹ Lé' go nane ka, yizhyuo re', or ngok be mé'd, mitse'd xuz be be mbaino mbin be ro' xa'. Per nal, más ñal gon be ro' Xuz be Me nzho lo yibé', par ban be dubta'. ¹⁰ Yizhyuo re', plo niban be che'ptsá, mitse'd xuz be be dike xmod zak xa' más wen. Per Dios nitse'd be par ya be wen, nes par gak be nela lé' Me. ¹¹ Walikai, yent cho yo laxto' or mer kitse'd Dios tu men, porke dox yalnei. Per or nilox nitse'd Dios men, orze' nzhak nile' xa' kwa'n nzhakla Dios, mbaino dubta' chul nzho laxto' xa'.

Chi lé' be la' widi'zh che'n Dios, lé' be zakzi

¹² Or naban be yizhyuo re', nak be nela tu men xa' ngulo' tu karre ga', ngwazha ni' be no ya' be. Kuze' por rē kuba', naki'n wi' be nab tsa lo Dios par ka'la be. ¹³ Nakizétra' go lo kwa'n gat lé', nes par se'gaka ro'b go lo rē kwa'n nak che'n Dios kwa'n mitse'd go por Jesukrist.

¹⁴ No bile' pa' go par ya'n go wen kun rē men, mbaino bikwa'n go gak nela Dios ga', porke rē xa' gat nakt sa', nanet bixa' Dios. ¹⁵ Biwi' go napa' yo tu rē go ya'l laxto' go Dios, Dios Me nazhi' be. Mbaino nala't go yo tu rē go xa' le' tse'd go le' go kwa'n gat ñal, orze' ke'd goi más xa'. ¹⁶ No biwi' go, nayo tu rē go xa' niban kun cho la men, xa' gat lé't tsa', o xa' kwa'n yent kwan ña laxto', ter kwa'n nazhon la' xa', nela xa mile' Esau'. Por tu plat kwa'n ndao xa', mito xa' yalnazon kwa'n ngol xa', por nak xa', xa' galo lo wech xa'. ¹⁷ No nane la go, or ngokla Esau' ngaza' xuz xa' tu widi'zh nazhon par lé' xa', per nangalt xa'i por gat ñal xa'i; no ter dox mbi'n Esau' por lé'i, per yentra' kwan ngak ngale' xa'.

¹⁸ Porke go, nangazubit go lo yi' nela rē men Israel, or nguzubi bixa' lo yi' kwa'n nagakt gal men, no plo nzobyl, maska nzha' bēl, no nakao, mbaino nzo tu mbi dox kwa'n nazhe'b. ¹⁹ No ni nangan go ngurezh tu trompet, no ni chi Dios. Rē xa' mbin chi Dios, una'b bixa', une la nadi'zhtra' Dios lo bixa',²⁰ porke nangaxekt bixa' lo kwa'n mile' Dios mandad or nzhab Dios: “Wane'i cho gal yi' re', ter mene o mai, lé' xa' gat kun ke o kun waz.” ²¹ Dox nazhe'b kwa'n une rē xa' nzhin ze', haxta yub Muisés nzhab: “Haxta nu da nixiz di nizheb da.”

²² Per go nguzubi go lo yi' kwa'n lē Sion, yezh che'n Dios, Me naban par dubta', plo

lê Jerusalén kwa'n ña'n yibè', plo nzhin dox nayax ganj che'n Dios, nizak laxto' bixa' kidi'zh bixa' lo Dios dox nazhon Me; ²³ kun rê men che'n Dios, rê xa' nak nela men galo ga', xa' nzobni' lê lo yibè'. Gose nguzubi go lo Yub Dios Me gab xmod gak kun rê men yizhyuo; mbaino nguio go xid rê sprit che'n rê xa' mile' kwa'n nzhakla Dios dub miban bixa' yizhyuo re', rê xa' mitsimbe la Dios. ²⁴ Nal, lê' go nguzubi lo Señor Jesukrist, Me nidi'zh lo Dios por be, mbaino por lê' Me mila' Dios di'zh xtu wêlt par be, no por ren che'n Me, mimbe be lo kwa'n nzè'b xki be; gat nakte nela ren che'n Abel, ren kwa'n mina'b gat men kwa'n mbit xa'.

²⁵ Neu namás, nale't go naya' lo Dios Me kidi'zh lo go, porke chi mizakzi Dios rê xa' nangont ro' Dios or nguruzhiè Dios yek bixa' lo yizhyuo re', çkwan gab go zakzit Dios go, chi lê' go le' naya' or nidi'zh Dios lo go dizde lo yibè'? ²⁶ No chi tiemp ze' mixiz yizhyuo or mid'i'zh Dios, per nal, se' nzhab Dios:

Xtu wêlt, lê' Da le,
gat lê't nab yizhyuo win,
haxta nu yibè' len win.

²⁷ Or mid'i'zh Dios, xtu wêlt lê' yizhyuo win, kure' gab, lê' zhè zhin, lê' rê kwa'n niwin kwa'n ngulo Dios; lê'i lox par ya'n nab tsa rê kwa'n nagakt win, rê kwa'n nzho lo yibè'.

²⁸ No chi lê' be kinu tu lazh be kwa'n kub, kwa'n ne' Dios yo be plo nile' Me mandad, kuze' ñal za' be xkix lo Dios por rê kure', mbaino lê' be rê kwa'n nzhakla Me kun yalnado', nela xmod ño laxto' Me, ²⁹ porke lê' Dios che'n be nak nela tu bêl kwa'n nilo'x rê kwa'n.

13

çXmod ñal ban men che'n Jesukrist?

¹ Go, men che'n Jesukrist, dubta' bichizhi' go rê wech go. ² Naya'lt laxto' go le' go wen lo rê xa' yi'dtsi' ma go, porke nzho xa', ter nanet xa' choi, per ganj che'n Dios mizhin lizh xa'. ³ Bitsila go gaknu go rê xa' nzho lizhyi'b, nela chigab nu go nzho kun lê' bixa'; no goknu go rê xa' kizakzi men, nela chigab kun go kile' bixa'i. ⁴ Rê men ñal ne, dox tsak kinu men tsa' men, mbaino rê xa' kinu tsa', ñal ban xa' nambè kun tsa' xa'; porke mis Dios gab xmod gak kun kad men xa' niban kun cho la men, mbaino xmod gak kun rê xa' kinu tsa' no nikizè' xtu xtu men. ⁵ Nawixt go gap go nayax dimi, sino bizak laxto' go kun kwa'n kinu tsa go, porke se' mid'i'zh Dios: "Nalan zè'bta' lu, mbaino ni nalan, ya'nal se'tsa." ⁶ Kuze' ñal ro'b laxto' be porke nane ka be:

Lê' Dios nzhaknu be,
yent por kwan zheb be lo rê men.

⁷ Bitsila go rê xa' milu' widi'zh che'n Dios lo go, no mitse'd bixa' go xmod ñal ban go;

no biwi' go xmod miban bixa', par nu go le'i. ⁸ Lê' Jesukrist di xa nak Me na'g, nak Me nal, mbaino se'ska gak Me dubta'. ⁹ Kuze', nayilat go kwa'n lu' xtu men lo go kwa'n gat nakt nela widi'zh che'n Dios kwa'n mid'i'zh Jesukrist; kuze' más ñal zo be wen lo rê kwa'n wen kwa'n nile' Dios por be por Jesukrist, ke par le' be rê ley kwa'n nidi'zh por kwa'n nzhao men o kwa'n nzho men, porke yent kwan ngazu' rê kuba' par rê xa' mile'i chi tiemp.

¹⁰ Lo yibè' kinu be tu biko', no ni tu rê ngulèi' xa' nikè' zhi'n nela xmod nzobni' lo ley che'n Muisés, nagakt gao bixa' kwa'n nzh'i'b lo biko' che'n be, ¹¹ porke rê ngulèi' ro che'n rê men Israel, niza' bixa' nab tsa rê ren che'n rê ma par gon plo lê dox nazhon le'n yado' che'n Dios, mbaino lê' rê ma nigo' ren ze' nizè'k bixa' ma tu lad ro' yezh. ¹² No sa' ska, Jesukrist ngut tu lad ro' yezh, par mizubchi Me kun ren pa' che'n Me kwa'n nzè'b xki rê men che'n Me lo Dios. ¹³ Kuze' nal, zubi be lo Jesukrist tu lad ro' yezh, par nu lo be di'zh men kwa'n mid'i'zh men lo Me, ¹⁴ porke yizhyuo re' gat kinut be lazh be kwa'n di' par dubta', kuze' kimbèz be lazh be kwa'n laore yo. ¹⁵ Kuze', gon kwa'n niza' be lo Dios nak, or niza' be xkix lo Dios por rê kwa'n mile' Jesukrist por be, no di'zh be lo rê men, lê' Jesukrist nile' mandad be. ¹⁶ No naya'lt laxto' go, le' go rê kwa'n wen, no gaknu go rê men kun kwa'n kinu go, porke nu ska kure' nak gon kwa'n ño laxto' Dios. ¹⁷ Mbaino bin go rê kwa'n ne' rê xa' mizo Dios kina go, no bizob go xti'zh bixa', porke zilita' nikina bixa' go, porke lo bixa' na'b Dios kwent por go. Kuze', rê kwa'n ne bixa' bile' goi, par zak laxto' bixa'; per chi por xmod nak go dox zob xigab yek bixa', orze' yent kwan zu' i' par go.

¹⁸ Zilita', bina'b go lo Dios por no, porke nizi no, yent kwan nak no lo Dios, porke dubta' nikwa'n no le' no kwa'n wen lo rê kwa'n. ¹⁹ Kwa'n más kina'ba lo go, bina'b go lo Dios par nayan laka xè'! Dios da lo go xtu wêlt.

Lult rê widi'zh kwa'n mikè' xa' mixè'l yech re'

²⁰ Dios Me nile', ña'n chul laxto' men, mile' Me nguruban Señor Jesukrist, Me nak Baxtor ro lo rê be; mbaino por ren che'n Jesukrist, ngok rê widi'zh kwa'n mila' Dios kun be, par dubta'. ²¹ Kuze', kina'ba lo Dios par le' Me ro'b go lo rê che'n Me, par le' go rê kwa'n nzhakla Dios; mbaino kina'ba, le' Dios kun go por Jesukrist, rê kwa'n nazhon kwa'n nzhakla Me par go. ¡Nal par dubta', ñal rê men di'zh nazhon Jesukrist! Sa' gake.

²² Rê go wech no bizan, kina'ba lo go, kun pasens bin go pla widi'zh kwa'n kinin lo go re' par kala go. ²³ Bin go, lê' wech be

Timoteo nguro' la lizhyi'b; no chi lë' xa' zhin re' lwegä', lë'da yi'dnu xa' or yi'dtswi'n ma go. ²⁴ Bidi'zh go wen lo rë xa' mizo Dios par kina go, mbaino lo más rë xa' nak men che'n Dios. Rë wech be por Jesukrist, xa' nzhin Italia, mixé'l tu widi'zh wen por Jesukrist, par rë go. ²⁵ Kina'ba lo Dios, par le' Me ya rë go wen. Sa' gake.

Yech kwa'n mixë'l San Tiao

Ma go wech no bizan, ¿chi wen ka go?

¹ Na Tiao, nilen zhi'n nazhon che'n Dios no che'n Jesukrist, Me nile' mandad be; kixëla tu widi'zh wen lo rë go, xa' nzë xid dub tu dusen ben, men Israel, xa' nak men che'n Jesukrist xa' nzhire'ch dub yizhyuo.

² Wech no bizan, xa' nak men che'n Jesukrist, ñal bizak laxto' go or nided go lo rë kwa'n wane'kwane, nabei chi zile' go kwa'n gat lë' por naxek go loi. ³ Lë' go nane ka, or nided go lo rë lo kwa'n, por ñila go Jesukrist, sa' par más tse'd go xëk go or nided go loi. ⁴ No or nixek go, or nizak go rë kwa'n, nizu'i par gak go nela xmod nzhakla Dios, orze' za xigab go, gak go men naye lo che'n Dios.

⁵ Chi nzho tu xa' xid go, xa' jwält xigab par le' xa' kwa'n wen, ñal na'b xa'i lo Dios, porke Dios niza' kwa'n nina'b men lo Dios, mbaino dimás niza' Diose, no ni nayan kwa'n gab Dios or za' Diose. ⁶ Per ñal na'b xa'i dub la xa', no nale't xa' chop xigab, porke xa' nile' chop xigab nak xa' nela rë bol che'n nitsdo' ga, kwa'n ña-ñë'd rë lad. ⁷ Men xa' nile' chop xigab, nakot xa' yek xa' lë' Dios za' kwa'n ka' xa', ⁸ porke men xa' nile' chop xigab lo kwa'n nile' xa', gat nile't xa' tu kwa'n dub la xa'.

⁹ Per tu wech be xa' yent kwan nzhap, per men che'n Jesukrist xa'; ñal zak laxto' xa' por kure', porke lo Dios, dox tsak xa' re'. ¹⁰ No tu xa' rrik, ñal zak ska laxto' xa', mbaino zi xa' nela tu men yent kwan nzhap par wi' xa' nab tsa lo Jesukrist, porke rë kwa'n kinu xa', lë'i lox nela xmod nzhak kun tu ye' ga, dox che'p nidi'y. ¹¹ Or nilen ngubizh, no or nizini ngubizh nayi', orze' nibizh rë yix nayë' por nazho' che'n ngubizh, no nzhab rë ye' che'ne, no nilox kwa'n nilu'i chul. Se'ta' gak kun rë men rrik; dub kile' bixa' rë che'n bixa', lë' bixa' gat, mbaino ya'n rë kwa'n kinu bixa'.

Or nixek men lo rë kwa'n nizak men

¹² Wen nzha men, xa' nile' kwa'n nzhakla Dios dubta', ter nided xa' lo rë kwa'n gat lë'; porke or nixek xa' lo rë kure', wen ña'n xa' lo Dios, orze' lë' Dios za' tu koron ka' xa', ban xa' dubta' kun Dios, nela xmod mila' Dios di'zh, lë' Dios za' yalnaban ka' rë men, xa' walika nazhi' Dios. ¹³ Or nzë tu xigab gat lë' yek go par le' goi, nagabt go, Dios ngulo xigab ba' yek go, porke yent cho gak ki'l Dios par le' Me kwa'n gat lë', mbaino ni gat niki'l Me men par le' mene. ¹⁴ Or nile' go tu kwa'n gat lë', por mis xigab che'n go nzhuwe'i ye go par nile' goi, ¹⁵ no rë xigab gat lë' re', or nile' mene, nzë'b xki men lo Dios por lë'i. No or

ñar xtol men, nile'i nzhath men par dubta' lo Dios.

¹⁶ Rë go wech xa' nazhi' da, nagakt go nakide, kide go lo mis go. ¹⁷ Rë kwa'n wen no rë kwa'n lë'tsa lë' par men, dizde al ya mixë'l Diose par be; Dios Me ngulo rë ki kwa'n nzhi'b lo yibë', Dios Me kwa'n gat nichë't lo kwa'n nidi'zh Me, mbaino gat nzot Me lo nakao par le' Me kwa'n gat lë'. ¹⁸ Por xigab che'n Dios, nak be men che'n Dios por ñila be widi'zh che'n Me por Jesukrist, no par gak be men galo laka xid más rë men che'n Me, nela tu yalgo'n galo laka par lo Dios.

Gat lë't nab tsa gon be widi'zh che'n Dios, nu ska naki'n ban be xmod nzhakla Dios

¹⁹ Bitsila go kure', rë go wech no bizan xa' nazhi' da: Gok go natsin par gon go kwa'n ne xtu men; per nadi'zht go tu kwa'n lwega', mbaino ni nayi' go nayan, ²⁰ porke or niyi' tu men, gat nile't xa' kwa'n ñal lo Dios. ²¹ Kuze', gulo' go rë kwa'n gat nabe nzhoh laxto' go, no bila' go rë kwa'n gat lë' nile' go; gulo go yalnado' laxto' go, no dubta' wayila go widi'zh che'n Dios kwa'n ngulo Dios laxto' go, porke lë' widi'zh che'n Dios kinu yalnazhon par ko'i go lo rë kwa'n nazhe'b nzho go.

²² Gok go men xa' nile' kwa'n nzhab widi'zh che'n Dios, no gat lë't namás gon goi; porke chi nab tsa gon goi, orze' mis go kikide go go, ²³ porke men xa' namás nzhon widi'zh che'n Dios no gat nile't xa' kwa'n nzhabe, nak xa' nela men xa' niwi' lo, lo tu spej ga', ²⁴ no or miwi' xa' lo spej, orze' miëk xa', tuli mia'l laxto' xa' xmod nzhak lo xa'. ²⁵ Per men xa' dox nirë'l lo ley plo nzob lë'tsa lë' rë xigab che'n Dios, orze' nits ga' nzho ley che'n Dios yek xa', ley kwa'n nigo' men lo kwa'n gat lë'; orze' nile' xa' rë kwa'n nzhabe, no por kuba' wen ña xa' lo rë kwa'n nile' xa'.

²⁶ No chi nzho tu men xid go, xa' nile' xigab nile' ka xa' kwa'n nzhakla Dios, per gat nikwa'n xa' lo rë kwa'n nidi'zh xa', orze' lo mis lë' xa' re' nikide xa', no kwa'n nile' xa' por Dios, yent kwa'n zu'i par lë' xa'. ²⁷ Nin kwan más ñal le' men, mbaino kwa'n más nile' ña'n nambe men lo Dios nak: Gaknu men më'd wizëb, no gaknu xa' una' kwa'n ngut xmiyi'; mbaino nambe ban xa' lo yizhyuo re'.

2

Gat ñalt kwe go men par le' go kwa'n wen

¹ Rë go wech no bizan, xa' ñila widi'zh che'n Señor Jesukrist, Me kwa'n nile' mandad be, no Me nidi'zh be nazhon; gat ñalta' kwe go men xa' le' go wen kun lë'. ²⁻³ Gab be, plo nibin go zhin tu men xa' nzho yani gor ya', mbaino nabe xa', no por kure' gab go lo xa': "Guzob go lo yaxil chul re', par go yaxil

re'." No mis orze' zhin xtu men, tu xa' milox xab no be'de, mbaino lo xa' re' gab go: "Baga guzo", o gab go: "Neka lo yuo guzob." ⁴ Chi lè' go nile' sa' kun mis wech go, men che'n Jesukrist, orze' nak go nela rè justis xa' gat nzhot xigab wen yek.

⁵ Rè go wecha xa' nazhi' da, bin go le, Dios ngule rè men xa' prob yizhyuo re', par dox yila bixa' Dios no ka' bixa' kwa'n kinu Dios plo nile' Dios mandad, nela xmod mila' Dios di'zh, za' Diose ka' rè men, xa' wali ka nazhi' Dios. ⁶ Per go, gat nizineta go rè men prob. ¿Chi gat nzhot go, lè' rè men rrik nizakzi rè men che'n Jesukrist, no nigubxax bixa' rè men re' par nzhuwe'i' bixa' rè xa' re' lo rè gustis par zakzi xa' rè men re'? ⁷ ¿Chi gat nzhot go, rè men rrik laba' niye xa' Jesukrist, Me nazhon, no Me nile' mandad go?

⁸ Dox wen le' go, chi lè' go walika le' kwa'n nzobni' lo ley che'n Dios kwa'n más tsak lo rè, kwa'n nzhab se': "Bichizhi' xtu tsa' menal, nela lu ka." ⁹ Per gor nibeu men or nzhaknu go men, por nile' go sa' nzè'b xki go lo Dios, no dox mal ña'n go lo ley che'n Dios. ¹⁰ No chi nzho tu men nile' rè kwa'n nzobni' lo ley, per xtutsai gat kile't xa', no por kure' ña'n xa' mal lo ley che'n Dios, ¹¹ porke Dios nzhab: "Nabantal kun xtu men chi kinul tsa'l", mbaino nu ska nzhab Dios: "Nagaktal men nzhot men." No ter naban tu men kun nab tsa xa' nak tsa' xa' per nzhot xa' men, por kure' mia'n la xa' mal lo rè ley che'n Dios. ¹² Niki'n bikwa'n go mod di'zh go no xmod ban go; no bitsila go, tu ngubizh, lè' Dios gab xmod gak kun kad men por rè widi'zh che'n Dios kwa'n mbin men, kwa'n nigo' men lo rè kwa'n gat lè', ¹³ porke men xa' nangalast laxto' xtu men, or gab Dios xmod gak kun rè men yizhyuo por kwa'n mile' bixa', orze' nazinet ska laxto' Dios xa' re'; per men xa' mizine laxto' men, wen nzha xa' re' lo Dios, porke lè' Dios zine laxto' xa'.

¿Kwan más tsak: Chi nab yila men Diose o le' xa' kwa'n nzhakla Diose?

¹⁴ Rè go wech no bizan, men che'n Jesukrist, ¿kwan zu' par tu men, xa' nab tsa ñila Dios, per gat nile't xa' kwa'n nzhakla Dios? ¿Chi zu' nab ñila men Dios ko'i xa' lo rè kwa'n gat lè' kwa'n nzadkè tich xa'? ¹⁵ Gab be, tu wech be o tu bizan be, xa' nak men che'n Jesukrist, gat kinut xa' xab xa', mbaino ni gat kinu xa' kwa'n gao xa', ¹⁶ orze' gab tu rè go lo xa' re': "¿Wenkaix bizè ra', Dios ne' kwa'n gakal no kwa'n gawall?", orze', ¿kwan zu' widi'zh ba' par xa' ze' chi naza' go kwa'n naki'n xa'? ¹⁷ Se' nak men xa' nab tsa ñila widi'zh che'n Dios, nak xa' nela tu kwerp che'n tu men ngut ga', gat ñastra' laxto' xa'.

¹⁸ Kuze' gak ne tu men lol: "Lu nab tsa ñila Dios; na ñila ska Dios, per na nile kwa'n nzhakla Dios. No nal, bilu' kwa'n nilu' ñilal Dios, mbaino na lu ñilan Dios por rè kwa'n nilen." ¹⁹ ¿Chi ñilal, tutsa Dios nzho? ¿Wen dox nile'l, porke haxta nu rè mbi che'n Mizhab nane ka tutsa Dios nzho, mbaino di zhe'b nixiz rè mbi re' por kure! ²⁰ ¿Nagakt go dox naxenlaa! Bin go kure': Men namás ñila Dios, per gat nile't xa' kwa'n nzhakla Dios, orze' par lo Dios yent kwa'n zu' kwa'n ñila xa' Dios. ²¹ Lè' go nane ka kwan mile' Dios kun Abraham, xa' ngok xuz be chi tiemp. Miwi' Dios lo xa' nela lo tu men yent kwan nzè'b xki ga', por mbin xa' kwa'n nzhab Dios, miza' xa' xmè'd xa' Isaac par gat mè'd lo Dios nela tu gon ga'. ²² Ne goi nal, más miar kwa'n ñila Abraham Dios por mile' xa' kwa'n nzhab Dios lo xa'. ²³ Orze' ngok widi'zh che'n Dios plo nzobni' se': "Ngwayila Abraham Dios, kuze' Dios miwi' lo xa' nela lo tu men yent kwan nzè'b xki ga'." Mbaino nu midi'zh Dios, Abraham ngok xa' michè'l Dios. ²⁴ Ne goi nal, Dios niwi' lo men nela lo tu men xa' yent kwan nzè'b xki lo Dios por kwa'n nile' xa', no gat lè't nab tsa por ñila xa' Diose.

²⁵ Sa'ska ngok kun una' lè Rahab, tu una' le'n kai (kwa' gal). Dios miwi' lo una' nela lo tu men niyent kwan nzè'b xki lo Dios por kwa'n mile' una', ngoknu una' rè xa' ngwala'ch lazha una', por mandad che'n xtu rè men che'n Dios, no miza' una' plo mia'n rè xa' re', no nu ngulunez una' bixa' xtu nez par nangut men rè xa' re'. ²⁶ No nela xmod nak tu men ngut ga', gat ñastra' laxto' xa', sa' ska nak tu men, xa' nab tsa ñila Dios, no gat nile't xa' kwa'n nzhakla Dios.

3

Kwan nile' widi'zh nazhe'b kwa'n niro' ro' men

¹ Rè go wech no bizan, men che'n Jesukrist, gat ñalt gakla nayax go, lu' go widi'zh che'n Dios lo rè men, porke lo xa' re' más na'b Dios kwent por xmod naban xa', ke lo más rè men se'ga. ² Rè be nane, dox nile' be kwa'n gat lè', no chi nzho tu xa' nidi'zh pura kwa'n wen, xa' re' nak tu men miro'b la lo che'n Dios, no xa' re' gak ka'n lo rè kwa'n nzhakla kwerp che'n xa' par nale' xa' kwa'n gat lè'.

³ Nigo men do' ro' kabai par gak wei' men ma plo nzhakla men. ⁴ No biwi' go xmod nak bark, ter dox kwa'roi, mbaino ter dox tu mbi nika'n loi, per tu ya win tsa nikè xane kwa'n lè timón; kun kure' namás nzhak nitsè' men bark, no nzhuwe'i' xa' plo nzhakla xa'. ⁵ Se'ska nak luzh men: ter wintsai, per dox nazhe'b di'zh nidi'zhe; nake nela tu yek seri ga', gak tsinkiy ter tu yi' más kwa'ro. ⁶ Nela xmod nak tu seri

dox tu yi' ro nitsinkiy, sa'ta' nitsinu be rē men xa' nzhin naka'n lo be or nidi'zh be kwa'n gat lē' lo xa'; kuba' nilu' xmod nak be. Rē kwa'n gat lē' nidi'zh be gak tsinu rē xigab che'n be, mbaino gak tsinu rē kwa'n nile' be. Rē kwa'n nazhe'b nidi'zh men, Yub Mizhab nile' nidi'zh mene. ⁷ Rē lo ma kwa'n nzho yizhyuo re', gak le' nado' men ma, rē ma dan, no rē ma kwa'n nzob xi'l, mbaino rē ma kwa'n nizē nadu'b laxto', mbaino rē ma nzho le'n nitsdo'; rē ma re' gak le' men nado' ma. ⁸ Per luzh mense, nagakt ka'n men loi par nadi'zh men widi'zh nazhe'b. Nak luzh men nela tu ma nayi' ga', kwa'n dub nzho benen. ⁹ Kun luzh be nidi'zh be nazhon Jesukrist, Me nile' mandad be, mbaino nidi'zh be nazhon Dios, Me nak Xuz be; no kun luzh ska be, niye be men nak nela Dios ga'. ¹⁰ Mis ro' met niro' widi'zh nazhon par Dios, mbaino mis ro' ska met niro' widi'zh kwa'n nizhi'bde met men. Wi'ule wech no bizan, gat ñalt di'zh be se'. ¹¹ No, ¿chi zak len nits nax kun nits nala tutsa plo? ¹² Se'ska, nagakt za' ya nzhao' xa'la xlē, no ni ya gub gakt za'i nzhao'. Se'ska nagakt len nits nix nidao' plo nilen nits nazhi'.

Yalnzhak kwa'n niza' Dios

¹³ ¿Chi nzho tu xa' xid go, xa' nidi'zh lē'gaka xa' dox nane par kobe' xa' (wi' xa') rē kwa'n nzhak xid go? Per naki'n lu' xa' lo men xmod naban xa', mbaino chi walika miro'b la xa' lo che'n Dios, orze' lo rē kwa'n nile' xa' nilu' yalnado' che'n xa'. ¹⁴ Per chi nile' go lambid tu kwa'n no niyi'xian go kun wech go, orze' gat ñalt di'zh go, lē'gaka go dox nzhak, porke tu lad nila' go widi'zh nazhon che'n Dios por Jesukrist. ¹⁵ Men xa' nidi'zh, lē'gaka xa', xa' nzhak no nak xa' sa', orze' gat walit kinu xa' xigab che'n Dios; xigab che'n men, xa' gat nilibe't Dios kinu xa', no Mizhab nigo xigab re' yek xa', ¹⁶ porke plo nzho men niyi'xian kun xtu men por kwa'n kinu xa', mbaino plo nzho men lambid, ze' nzhin men ngokla ngwa por gat nzhon bixa' ro' xa' nile' mandad, mbaino nzho rē kwa'n gat lē' ze'. ¹⁷ Per rē men xa' walika nzhak che'n Dios, nambe naban xa' lo Dios, no niyent kun cho nidil xa', nixek xa' lo rē kwa'n nile' men lo xa', mbaino niki'nzha xa' kwa'n nidi'zh xtu men, no nizine laxto' xa' men nizak tu kwa'n, mbaino nile' xa' kwa'n wen par rē men, no gat nibet xa' men nzhaknu xa', mbaino rē kwa'n nidi'zh xa' walika naban xa'i. ¹⁸ Rē men xa' nile' chul niban rē men lo rē kwa'n, orze' chul ska nile' Dios niban xa' re', mbaino nazhon nzha xa' re' lo Dios.

4

Men xa' ño laxto' nile' kwa'n nzho yizhyuo, nagakt ban xa' kun Dios

¹ ¿Plo nzē rē kwa'n nile', nidil go, no rē kwa'n nile', niyi'xian go kun wech go, xa' nak men che'n Jesukrist? Per por nagak ka'n go lo rē xigab gat lē' kwa'n nzē laxto' go, kuze' nak go sa'. ² No nzhakla go gap go kwa'n, no or gat nile' go gan gap goi, orze' niyi'xian go no nzob dil laxto' go, haxta nzhut go men por niwix go gap go kwa'n namás. Kure' nizak go por gat nina'b goi lo Dios. ³ No chi nina'b goi lo Dios, no gat nine' Diose ka' go, porke nikwa'n go le' go kwa'n nzhakla kwerp che'n go namás. ⁴ ¡Tatu nazhe'b nak go lo Dios, nela rē xa' nile' burr tsa' ga'! ¿Chi nanet go, rē xa' kwa'n nile' rē kwa'n nzho lo yizhyuo re', xa' re' nak tu xa' niyi' nine Dios por xmod naban xa'? Kuze', xa' kwa'n nile' namás kwa'n nzho yizhyuo re', xa' re' nidil kun Dios. ⁵ O pas nile' go xigab, yent cho kwent nzobni' widi'zh re': "Por Sprit kwa'n mine' Dios nzho laxto' be, nika Dios be, le' be kwa'n nzho yizhyuo re'." ⁶ Per por nazhi' Dios be, nzhaknu Me be le' be kwa'n nzhakla Me, kuze' nzobni' widi'zh re':

Dios nzo la par kin rē men niziyaa, per nzhaknu Me rē men nado'.

⁷ Kuze', bizob go xti'zh Dios mbaino guyubchi go lo Mizhab, orze' lē' Mizhab yubchi lo go. ⁸ Guzubi go lo Dios nes par zubiska Dios lo go. Rē go xa' nzē'b xki lo Dios, bila' go rē kwa'n gat lē' kile' go ba'; no rē go xa' nile' chop xigab lo che'n Dios, bila' go rē xigab gat lē' kwa'n nile' go ba'. ⁹ Bizi go rē kwa'n nak go lo Dios, no biwin laxto' go, mbaino bi'n go por rē kwa'n gat lē' nile' go, no nazakt laxto' go por lē'i; más ñal biwin laxto' go par ne Dios, lē'i go nizi rē kwa'n nak go. ¹⁰ Bizi go yent kwan tsak go lo Dios, orze' lē' Dios le' zi go, ke lē' go tsak lo Dios.

Gat ñalt di'zh be tich wech be, men che'n Jesukrist

¹¹ Rē go wech no bizan, gat ñalt di'zh go nakap tich wech go, men che'n Jesukrist, no or nile' men sa', orze' yub ley nidi'zh xa' re' natsakt logardi ngale' xa' kwa'n nzobni' lo ley. ¹² Nabtsa Dios nak Me mizobni' xmod ñal ban men, no nab tsa Dios ñal gab xmod nak tu men, mbaino Dios tsa namás gab wei' tu men lo yihē' o xē'! tu men le'n bēl. Per lu, ¿kwan nakal par ti lu di'zh kwa'n nak tsa' menal?

Yent cho nane, kwan gak zhē kwa'n nzē yē'

¹³ Nal bin go kure', rē go xa' nidi'zh se': "Nal o yē', lē' be ya yezh ba', ze' yo be tu li'n par zi' be no to be, par le' be gan nayax dimi." ¹⁴ Per nanet go kwan nzē yē', o chi naban ka go zhē yē'. Go nak nela bēo ga', kwa'n ñaxo'b tu rrat, no xtu rrat tuli ñitloi. ¹⁵ Se' ñal bidi'zh go: "Chi lē' Dios nzhaklai, lē' be ban par le' be kure' o kuba'." ¹⁶ Per

go, dox yaa nizi go lo rē kwa'n nidi'zh go, porke rē men che'n Dios gat ñalt zi bixa' sa',¹⁷ porke men xa' nane la, naki'n le' xa' kwa'n wen, mbaino chi gat nile' xa'i, guzhē nzē'b xki xa' re' lo Dios por kuba'.

5

Par rē men rrik

¹ Bin go kure', rē go men rrik: Bi'n go no guruzhiē go por yalzi kwa'n nzhazhin lo go.
² Rē kwa'n kinu go lē'i lox; haxta rē xab go lē'i gak nela kwa'n nzhao mbēz ga'.
³ Rē kwa'n or no rē kwa'n plat kwa'n kinu go yent kwan tsake, nake nela tu kwa'n miēb la; rē kwa'n kinu go yent cho kwente, porke kuba' nilu' lo Dios go nak nela rē men niwix gap kwa'n ga'; komo lē'la rē kwa'n miēb no rē kwa'n nilo'x bēl, sa'ta' lox go lo Dios. Yent cho kwent mikan go rē kuba', porke yizhyuo kwa'n nal re', lē'i nzhazhin la lox.
⁴ Mbaino mile' go, ka nkē rē mos zhi'n che'n go, no lo Dios miza' bixa' kwente, lē' go nzē'b lo bixa'. No por xmod nili'nu go men, kun Dios kix goi, Dios Me nile' gan lo rē.
⁵ Dub naban go yizhyuo re', kwa'n nzhakla go nile' go, nile' go rē kwa'n nile' nizak laxto' go, no nagakt ka'n go loi; no nanet gox, lē' go nak nela rē ma kwa'n nilicha' men par gao men.
⁶ No nzhuwe'i' go tu men lo gustis, nzhab go gat xa' ter niyent kwan nak xa', mbaino niya' bixa' gat nigo' bixa' lo go or nzhut go bixa'.

Bixek go haxta yē'd Jesukrist, no una'b go lo Me

⁷ Per rē go wech no bizan, bixek go or nizakzi men go, haxta zhin zhē yē'd Jesukrist. Biwi' go xmod nile' men nzha'n, nibēz xa' nizhin yiu galo no haxta niro' biyiu, par zen xa' tu yalgo'n.
⁸ Se'ska go naye guzo go lo che'n Dios, no bixek go lo rē kwa'n nilinu men go haxta or yē'd Jesukrist, no lē' Me nzhazhin la yē'd.
⁹ Wech, naxi'dt laxto' go (nayant laxto' go) ne go wech go, nes par nana'b Dios kwent kure' lo go, porke Dios Me gab xmod gak kun kad men yizhyuo re', lē' Me nzhazhin la yē'd.
¹⁰ Wech, biwi' go xkwan nguzak rē profet xa' nzhala, rē xa' midizh por Dios; dox mixek bixa' lo rē kwa'n mili'nu men bixa'. Nuska go bixek.
¹¹ Walika kure', wen ña rē men, rē xa' nixek lo rē kwa'n nizakzi xa'. Rē go mbin la kwan nguzak Job, mbaino une go, lē' Dios miza' kwa'n ka' xa' or milox mixek xa' lo rē kwa'n nguzakzi xa', porke Dios dox nilats Dios laxto' men, mbaino nizine laxto' Me men.

¹² Rē go wech no bizan, or ya'n go di'zh le' go tu kwa'n, naze'tta' go lē' Dios, ni yibē' no ni yizhyuo, no ni xtu rē kwa'n. Or gab go: "Lē'i gak ka", ñal bile' goi orze'; mbaino or

gab go: "Nagakte", orze' sa' bile' go, nes par nana'b Dios kwent lo go por kuba'.

Dubta' guna'b go lo Dios

¹³ ¿Chi nzho tu rē go nizak tu kwa'n? Niki'n na'b xa' re' lo Dios. O, ¿chi nzho tu rē go nizak laxto'? Orze' kē' xa' re' kant lo Dios.
¹⁴ ¿No chi nzho tu xa' nzhakne xid go? Orze' gurezh go rē xa' nzo lo rē men che'n Jesukrist, par na'b bixa' lo Dios por xa' re', mbaino tsa' bixa' aseit yek xa' re', na'b bixa' liwen Jesukrist xa' nzhakne re'.
¹⁵ No kwa'n na'b bixa' lo Dios, yila bixa' lē' Dios le'i, orze' lē' Dios liwen xa' nzhakne re'; no chi mile' xa' re' kwa'n gat lē' lo Dios, orze' lē' Dios che' rē kwa'n mile' xa'.
¹⁶ Kuze', bizi go kwan mile' go lo tu go kun xtu go, no guzh go rē kwa'n mile' go lo xa'; no una'b go lo Dios tu go por xtu go, par liwen Dios go lo rē kwa'n nizak go, porke Dios nzhon kwa'n nina'b tu men xa' nile' kwa'n nzhakla Dios, mbaino widi'zh che'n xa' re', dox tsake lo Dios.
¹⁷ Li, tu profet xa' tiemp, ter midizh xa' por Dios, per ngok xa' nela be ga'; no dox una'b xa' lo Dios par nala yiu, no nangalat yiu chon li'n garol.
¹⁸ No orze' una'b xa' xtu wēlt par la yiu, no ngula yiu mbaino ngok rē yalgo'n.

¹⁹ Rē go wech no bizan, chi nzho tu xa' xid go, xa' mila' nez che'n Jesukrist, mbaino cho tu rē go le' yubre xa' re' xtu wēlt lo nez che'n Dios,
²⁰ bitsila go kure', cho go le', yubre xa' re' nez che'n Dios, orze' mile' go, nguro' xa' re' lo rē kwa'n nazhe'b kwa'n nzadkē tich xa', mbaino miche' Dios rē kwa'n nzē'b xki xa' re'.

Yech galo kwa'n mixë'¹ San Per

¿Ma go wech no bizan, men che'n Jesukrist?

¹ Na Per; Jesukrist mizo da nak da tu apost che'n Me; kixëla yech re' lo rë go xa' ngule Dios gak men che'n, rë go xa' nguzë'b zit rë lazh rë men re': lazh men Ponto, lazh men Galacia, lazh men Capadocia, lazh men Asia, mbaino lazh men Bitinia. ² Ni naga ko Dios yizhyuo re', lë' Dios Xuz be ngule la go, no mixë'¹ Me Sprit che'n Me nguio laxto' go par gak go nab tsa par lë' Me, no par gon go ro' Jesukrist, Me mitsumbe go kun ren che'n Me. Kina'ba lo Dios, gaknu Me go lo rë kwa'n, mbaino par zi go nazhon.

Kimbëz be ruban be nela nguruban Jesukrist ga'

³ Ñal di'zh be nazhon Dios, Xuz Jesukrist, Me nile' mandad be. Por dox nilats laxto' Me be, mile' Me nak be tu men nela tu më'd laore ngol ga' yizhyuo re' por nguruban Jesukrist, nes par dub kimbëz be yizhyuo re', nane be, lë' be kinu yalnaban par dubta'. ⁴ No lë' yalnaban kwa'n kinuchao' Me lo yibë' par be re', nayot loxe, no ni nayo ni tu kwa'n gat nambe loi, mbaino par dubta' di' yalnazon che'ne. ⁵ No por ñila go widi'zh che'n Dios, kuze' nikina Me go kun yalnazon ro che'n Me, par gal go yalnaban par dubta' kwa'n kinuchao' Dios par go, no kwa'n kuxo'b Dios al tich zhë lult.

⁶ Kuze', dox bizak laxto' go, ter nzho or niwin laxto' go por nayax kwa'n nizak go yizhyuo re', per nadi'te xche. ⁷ Or nided go lo rë kure', kizenbe' Dios go (kiwi' Dios xmod nak go) par nabei chi walika ñila go widi'zh che'n Me. Kwa'n ñila go Dios re', más tsake lo or kwa'n ño nilox, ter nidede lo ki par nzhake viv or; sa'ta' nak or niwi' Dios, walika ñila go widi'zh che'n Me, orze' di'zh Me wen por go, ne' Me kwa'n nazhon ka' go, mbaino le' Me gak go men dox tsak or ruxo'b Jesukrist yizhyuo re'.

⁸ Lë' go nazhi' Jesukrist ter nanganet go Me; no ñila go Me ter gat niwi't go lo Me, mbaino dox nizak laxto' go, haxta ni nane go xmod di'zh go kure' por dox nazhone. ⁹ Por se'gaka ñila go Jesukrist lo rë kwa'n nizak go, nzhazhin la gal go yalnaban kwa'n kinu Dios par go, kuze' dox nizak laxto' go.

¹⁰ Dox nzhala, wenawen ngurël rë xa' midiz'hor por Dios, nabei xmod nak yalnazon che'n Dios kwa'n nzadnu yalanaban par dubta', mbaino midiz'hor bixa' kwa'n ne' Dios gal go por nazhi' Me go. ¹¹ Nzho Sprit che'n Krist laxto' bixa', no kuze' milu'i lo bixa', lë' Krist dox zakzi, per or ded rë

kure', dox rë kwa'n nazhon gak. Ngokla bixa' ngane bixa' cho xa' re' mbaino pok gak rë kure', ¹² per milu' Sprit che'n Dios lo bixa', kwa'n midiz'hor bixa' gat lë't par lë' bixa'i; par go milu' Diose. Kure' nak widi'zh nazhon kwa'n milu' más men lo go, rë xa' mixë'¹ Sprit che'n Dios, mbaino Dios mixë'¹ Sprit che'n Me lo rë men re'. No haxta rë ganj che'n Dios, dox nzhakla bixa', ne bixa' xmod nak rë kure'.

Ban go nambe lo Dios

¹³ Kuze', wenawen bile' go xigab xmod le' go kwa'n ñal; gok go menaye; nab tsa bile' go xigab por kwa'n ne' Dios ka' go por nazhi' Me go, or ruxo'b Jesukrist xtu wëlt. ¹⁴ Kuze' bin go ro' Dios; nale'tra' go kwa'n nzhakla kwerp che'n go, nela xmod miban go nzhala, or naga libe' go Dios; ¹⁵ ñal biban go nab tsa par Dios, no gok nambe laxto' go lo rë kwa'n, porke sa' nak Dios, Me ngurezh go par gak go men che'n Me. ¹⁶ Se' nzobni' lo Yech che'n Dios: "Giubchi go lo rë kwa'n gat lë', porke nangagota' rë kuba'." ¹⁷ No chi nzhah go: "Pa" lo Dios, Me nguribet men or nigobe' Me xmod nak kwa'n nile' kad bixa', naki'n zheb go ne go Dios, dub nak go par yizhyuo re', nela tu men zit ga'. ¹⁸ Naya'lt laxto' go, Dios ngulo' go lo rë kostumbr nazu't kwa'n mila' rë xuz go; wenawen nane go, Dios ndix, gat lë't kun or no ni gat lë' kun plat kwa'n ño nilox, par nguro' go lo rë kuba'; ¹⁹ Dios ndix kun yub ren kwa'n dox tsak che'n Krist; or ngut Me lo Dios nela tu mbëkxi' gat nanut mbaino dub ma wen. ²⁰ Ni naga yuxkwa' yizhyuo, lë' Krist nak la di'zh gat por be; per haxta rë zhë lult ngwaxo'b kure' nes par ya be wen. ²¹ Por Jesukrist, ñila go Dios; no lë' Dios mile' nguruban Krist, orze' miza' Dios yalnazon ka' Me. No por ñila go Me, nane ka go lë' go gal kwa'n kinu Dios par go. ²² No nal, por ngwayila go Jesukrist, mia'n nambe laxto' go, nes walika chizhi' go tu go no kun xtu go, por nak go men che'n Jesukrist. Kun dub la go, bile' goi. ²³ Nal, nak go nela tu më'd laore ngol ga', no gat lë't por xuz go xa' ño nzhate; kure' ngok por widi'zh che'n Dios, kwa'n kinu yalnaban no kwa'n nzho par dubta'; ²⁴ porke se' nzobni' lo Yech che'n Dios:

Rë men yizhyuo re', nak bixa' nela yix nayë'
ga'.

No rë kwa'n nile' bixa' nake nela rë ye' che'n
rë yix nayë' ga';

nibizh yix no nzhah rë ye' che'ne,

²⁵ per widi'zh che'n Dios, nzho par dubta'.

No widi'zh re' nak widi'zh nazhon kwa'n
midiz'hor men lo go.

2

¹ Kuze' bila' go rë nak kwa'n gat lë', nadi'zht go kwa'n mbël, bidi'zh go kwa'n wali; no nawixt go gap go kwa'n kinu xtu men, mbaino nadi'zht go tich men. ² Más wen gok go nela tu më'd laore ngol, garga'l nzhoh më'd chich; sa'ta' bile' go kun widi'zh che'n Dios, nala't goi par ro'b go lo che'n Dios, nes gap go yalnaban par dubta'. ³ Se' bile' go, chi lë' go walika une, nazhi' Dios go.

Jesukrist nak ke nazhon kwa'n niza' yalnaban

⁴ Guzubi go lo Jesukrist, Me nak ke nazhon kwa'n niza' yalnaban. Ter nzhah rë men yizhyuo, yent kwan zu' ke re', per yub Dios ngulei mbaino tsak doxe par lë' Me. ⁵ Nuska go nak nela ke kwa'n kinu yalnaban ga'; ñal bila' go kizuxkwa' Dios yado' che'n Me kun go, plo nzhoh Sprit che'n Me, nes par gag go ngulëi' nab tsa par Dios, mbaino xa' niza' gon kwa'n ño laxto' Dios, por niza' goi nela xmod nzhakla Sprit che'n Dios, por nak go men che'n Jesukrist, ⁶ porke se' nzobni' lo Yech che'n Dios:

Lë'da ngule tu men xid rë men yezh Sion, xa' re' nak nela tu ke galo laka, tu kwa'n dox tsak lo Dios.

Mbaino rë men xa' yila widi'zh che'n xa' re', nayot tula bixa'.

⁷ Par rë go xa' ñila widi'zh che'n Jesukrist, dox tsak ke re':

Per par xa' gat ñilai,

nake nela ke kwa'n nzhah rë xa' nichao' yo', nazu't.

Per lë'i ngok ke galo laka kwa'n nzen dub yo',

⁸ no nak ke re' kwa'n niri'l xib men, mbaino nile'i ñachin men.

Rë men ñachin, nak la di'zh zak bixa' sa', por nile' bixa' naya' lo widi'zh che'n Jesukrist.

Se' ñal ban men che'n Dios

⁹ Per go nak tu ben men ngule Dios, mbaino nak go rë ngulëi' che'n Dios, Jesukrist Me nak rey mizo go nak goi; no nak go tu ben men nab tsa par Dios, mbaino men tsa che'n Dios, par di'zh go rë kwa'n nazhon che'n Dios, Dios Me ngulo' go lo nakao par nzhoh go lo biani nazhon che'n Me. ¹⁰ Nela nzobni' ka lo Yech che'n Dios:

Or galo, yent cho che'n men nak go, per nal, men che'n Dios go; nzhala ze', gat nilast laxto' Dios go, per nal, nilast laxto' Me go.

Bilu' go, walika men che'n Dios go

¹¹ Rë go wecha, xa' nazhi' da; dox kina'ba lo go, go nak nela tu men zit ga' par yizhyuo re'; ñal bika'n go lo rë kwa'n nzhakla kwerp che'n go. Nale't goi, porke rë kure' nayi' par yalnaban kwa'n mine' Dios ka' go. ¹² Biban go wen xid rë men yizhyuo, ter nidi'zh bixa'

tich go nela tich rë men nakap ga'. Or nine bixa' nile' go kwa'n wen, orze' lë' bixa' di'zh nazhon Dios, zhë kwa'n kube' Dios xmod gak kun kad men yizhyuo. ¹³ Por nak go men che'n Jesukrist, ñal gon go ro' rë men xa' nile' mandad yizhyuo re'; ro' gobier, ¹⁴ mbaino ro' rë gostis, xa' nzhin por gobier, par zakzi rë men nakap; no lë' rë men wen, wi' bixa' wen lo. ¹⁵ Dios nzhakla le' go kwa'n wen, par tsao' go ro' rë xa' gat nzhont ro' Dios, no ro' rë xa' nayao' yek lo kwa'n wen, orze' ni tu kwa'n gat lë' di'zh bixa' nak go. ¹⁶ Gok go tu men xa' yent kwan ka lo go, per gat lë't par ban gon nela xmod nzhakla goi; biban go nela men nguzi' Dios ga', porke lë' Me nile' mandad go. ¹⁷ Biwi' go wen lo rë men, no bichizhi' go rë wech go no bizan go, men che'n Jesukrist; mbaino bizheb go lo Dios, no bin go ro' gobier mbaino ro' rë men che'n xa'.

Se' ñal le' rë mos

¹⁸ Rë go xa' nak mos lo xtu men, naki'n gon go ro' xa' nile' mandad go, gat lë't nab ro' xa' wen gon go, xa' niwi' kwa'n naki'n go; nu ska ro' xa' nakap bin go, xa' nizakzi go lo zhi'n; ¹⁹ porke Dios le' ya be wen chi nixek be nizakzi be, ter gat nzhapt be dol, por nane be, nak be men che'n Jesukrist. ²⁰ No chi zakzi men go por nzë'b xki go, ¿kwan le' go gan or nixek go or nilinu men go sa'? Per or nixek go nizakzi men go por nile' go kwa'n wen, kuba'se tsak lo Dios orze'. ²¹ No por kure' ngurezhe Dios go, mbaino por rë kwa'n nzë'b xki go nguzakzi Jesukrist, par milu' Me xmod ñal le' go or zakzi men go. ²² Nangale't Me ni tu kwa'n gat lë', no lalta' nangakidet Me ni tu men. ²³ No or nde men Me, nangakabro't Me; no or mizakzi men Me, ni tu widi'zh nayi' nangaro't ro' Me; tutsa ya' Dios mila' Me rëi, Dios Me nigobe' xmod ñal kun kad men. ²⁴ Kun yub kwerp che'n Krist, ndix Me rë kwa'n nzë'b xki be, or ngut Me lo krus. Nguzak Me kuba' par la' be tuli rë kwa'n gat lë', mbaino ban be nab tsa xmod nzhakla Dios. Por rë plo miwe' Me, mile' miak be. ²⁵ Galo laka, ngok go nela mbëkxi'l nguzakwan ga', per nal lë' go miëk lo Krist, Me nak nela tu baxtor ga', par kina Me go.

3

Se' ñal ban go kun tsa' go

¹ Se'ska rë go una', go xa' kinu tsa'; bin go ro' tsa' go. No chi xa' nak tsa' go gat ñilat widi'zh che'n Dios, per or ne xa', lë' go nzhon ro' xa', orze' por go nzhoh rriez, lë' xa' yila Dios, ² porke niwi' xa', gat lokt go (gat bolt go), menaye go, mbaino nado' go lo xa'. ³ Gat ñalt zo go dox nabe: dox kuxkwa' go yichyek go, dox gap go rë kwa'n or, o dox lar wen nzhak go. ⁴ Más ñal wi'

men lo go por xmod nak laxto' go, porke tu una' nado' laxto', mbaino yent kwan ña la xa' lo rē kwa'n nizak xa'; una' re'se' dubta' chul xa', mbaino dox tsak xa' lo Dios. ⁵ Sa' rē una' nzhalā, xa' miban nab tsa par Dios, mbaino tugaka lo Dios miwi' bixa'; miwi' men lo rē una' re', lē' biuna' nado', no mbin bixa' ro' xmiyi' bixa'. ⁶ Sa' ngok Sar, tu una' tiemp; ngok nado' xa' no mbin xa' ro' tsa' xa' Abraham, mbaino nu nzhab xa' lo miyi': "Lu xa' nile' mandad da." Ben che'n una' re' nzē go, chi lē' go le' kwa'n wen dubta' no nayat laxto' go lo wanei kwan gab xmiyi' go li'nu xa' go.

⁷ Se'ska go miyi', go xa' kinu tsa'; biwi' laka go xmod ñal ban go kun una' che'n go. Bikina go una', lē' una' más nada (delikad) lo go, mbaino por nu ska una' gal yalnaban kwa'n nayot lox, kwa'n ne' Dios gal go. Sa' bile' rop tsa' go par niyent kwan ka or na'b go lo Dios.

Se' ñal ban rē men che'n Jesukrist

⁸ Lult kwa'n nin lo go; lal bile' go xigab, bilats laxto' go wech go, men che'n Jesukrist, no bichizhi' go bixa'; no bizine laxto' go bixa' mbaino gok go nado', tu go kun xtu go. ⁹ Nale't go nakap lo xa' nile' nakap lo go, no ni nadi'zh go nakap lo xa' nidi'zh nakap lo go; más wen guna'b go gaknu Dios men re', porke ngurezh Dios go par gal go rē yalnazon che'n Me, ¹⁰ porke se' nzobni' lo Yech che'n Dios:

Xa' nzhakla ban wen, mbaino ne xa' zhē nazhon,
ñal ka'n xa', naro'tra' rē widi'zh nakap ro'
xa',
mbaino nakē't xa' mbēl.

¹¹ No ro' xa' lo rē kwa'n gat lē',
mbaino le' xa' nab tsa kwa'n wen.

No zilita' le' xa' ya'n xa' wen kun rē men,

¹² porke nikina Dios rē men nile' kwa'n nzhakla Me,

mbaino nzhon Dios kwa'n nina'b bixa' lo Me.

Per rē men nile' kwa'n nakap,
nalat Dios gak rē kwa'n nzhakla bixa'.

¹³ Yent cho le' nakap lo go chi xo'byek go le' go kwa'n wen. ¹⁴ Per chi kinkitla' go tu men zakzi go por nile' go kwa'n nzhakla Dios, orze' dox wen ya go le' Dios, no yent kwan ya laxto' go or galka bixa' che'b bixa' go, mbaino ni nazheb go lo bixa'. ¹⁵ Más wen biwi' go lo Dios kun dub laxto' go, lē' go nane ka, nab tsa lē' Me nazhon; no nu zilita' gok go natsin par kab go lo men xa' ne lo go: "¿Chon nab tsa lo Jesukrist niwi' go?"

¹⁶ Per or kab go lo bixa', bile' goi kun di'zh nado' mbaino wen biwi' go lo bixa'. Biban go nambe lo Jesukrist, nes par yent kwan zi go nak go, par tula rē xa' nidi'zh nakap nak go por niwi' go nab tsa lo Jesukrist. ¹⁷ Más

wen zakzi men go por nile' go kwa'n wen, chi sa' nzhakla Dios, ke zakzi men go por nile' go kwa'n gat lē'. ¹⁸ Nuska Jesukrist, tutsa wēt nguzakzi Me, par dubta' ndix Me rē kwa'n nzē'b xki rē men; yent cho dol nzhap Me, per ngut Me por rē men nzē'b xki, nes par wei' Me be lo Dios. Mbit men Me, per nguruban Me por Sprit che'n Dios. ¹⁹ No nu, por Sprit che'n Dios, ngwa Me le'n gabil plo nayao'yo' rē sprit, par ngwadi'zh Me widi'zh che'n Dios lo bixa'. ²⁰ Rē sprit nayao'yo' re' nak rē xa' ngok nayi'lazh lo Dios; mbaino dox ngokla Dios ngala' bixa' rē kwa'n nak bixa' dub tiemp kichao' Noé yo'ya. Le'n yo'ya ze' xon tsa men mia'n naban, nangat le'n nits. ²¹ Rē nits re' nak par ne men, xmod niro' men lo kwa'n nzē'b xki men or nzhaklē'i men le'n nits. No or nile' men kure', gat lē'ta' par niro'be'd mene; lē'i nizu' par na'b men lo Dios, tsimbe Me men lo rē kwa'n nzē'b xki men lo Me, nes par yentra' kwan zi bixa' nak bixa' lo Me. Mbaino nu por nzhaklē'i men le'n nits, lē' men ruban or gat men, por nguruban Jesukrist. ²² Nkili Me yibē', plo nzob Me lad direch che'n Dios. Dizde ba', lē'gaka Me nile' mandad lo rē ganj, mbaino lo rē sprit xa' nzho lo yibē' no lo rē sprit xa' nzho yizhyuo.

4

Ban be xmod nzhakla Krist

¹ Nela nguzakzi Krist dub miban Me yizhyuo re', se'ta' ñal la' go zakzi go, porke or nizakzi go por nile' go kwa'n nzhakla Dios, kuba' le', nagaklatra' go le' go kwa'n gat lē', ² nes par dub ban ra' go yizhyuo re', nale'tra' go kwa'n nzhakla kwerp che'n go, orze' lē' go ban nab tsa xmod nzhakla Dios. ³ Dox xche miban go nela xmod naban rē men yizhyuo nal re'; go miyi' nguzen go cho la una'; no go una' nguzen go cho la miyi', mile' go dike kwa'n nzē la go, ngu' goi haxta mite'd go yē'l, orze' ngo't go kun tu men xtu men or nzhal lani che'n rē winab che'n go. ⁴ No rē men, xa' nile' kure', xe ña'n bixa' niwi' bixa' lo go por gat nibin ra' go kun lē' bixa', orze' nidi'zh bixa' nakap lo go. ⁵ Per lē' bixa' te'd kwent lo Dios por rē kwa'n nile' bixa', porke lē' Dios nzo la par gab Me xmod gak kun kad men, men nabane o men ngute. ⁶ Kuze' haxta lo rē men ngut la midid'zh Jesukrist xmod gap men yalnaban par dubta' kun Dios. Ter ngut bixa' nela nzhat ka rē men, per por Sprit che'n Dios, gak ban bixa' par dubta' nela Dios ga'.

⁷ No nal, gax la nzhazhin zhē lox yizhyuo; kuze' wenawen bile' go xigab kwan le' go, no bika'n go lo rē xigab gat lē', par gak na'b go lo Dios zilita'. ⁸ Mbaino kwa'n más bile' go, walika bichizhi' go tu go kun xtu go, nes par nazolia'zht go (le't go naya') ya'l laxto' go

rë kwa'n gat lë't kwa'n nile' go lo tu go kun xtu go. ⁹ Or ya'n men lizh go, nazolia'zht go (le't go naya') za' goi. ¹⁰ No ñal wi' go xmod le' go kun yalnazon kwa'n ndi'z Dios ka' tuga' go por wen Me, par gaku go men no ya bixa' wen. ¹¹ Chi xid go nzho tu men xa' nidi'zh por Dios, ñal di'zh xa' lo men nela xa nzhak Dios lo xa'; no xa' nzhaknu men, ñal le' xa'i kun yalnazon kwa'n miza' Dios ka' xa', nes par nazolia'zht xa' le' xa'i. Lo rë kwa'n le' go, bile' goi kun yalnazon che'n Dios, nes par rë men di'zh nazhon Dios por nak go men che'n Jesukrist. Lë'gaka Me kinu rë yalnazon, no Megaka nile' mandad par dubta'. Sa' gake.

Ñal xek be lo rë kwa'n nizak be por nak be men che'n Jesukrist

¹² Rë go wech no bizan xa' nazhi' da, or kided go lo tu kwa'n nazhe'b nela or nided men xid bël ga', nagabt go: "¿Kwan kure'?" Kuba' nzhak par nizenbe' Dios go (niwi' Dios xmod nak go), nabei chi walika ñila go Dios. ¹³ Más wen bizak laxto' go por nu go, kizak nela kwa'n une Jesukrist, dox nguzakzi Me; no par dox zak laxto' go or ne go yaxo'b Me xtu wëlt, kun rë yalnazon che'n Me. ¹⁴ Chi nidi'zh men nakap lo go por nak go men che'n Jesukrist, wen nzha go orze'; kure' nilu', lë' Sprit nazhon che'n Dios nzo zilita' kun go. Ter por rë men nidi'zh nakap re', gat lë't ñët Jesukrist, per por go, dox nazhon ñët Me. ¹⁵ Per chi zakzi go, gat lë't por gut go mene, o por wa'n go, o por cho la xtu kwa'n gat lë', no ni gat lë' por lazho' go (metich go) che'n xtu mene. ¹⁶ Per chi nzho go kizakzi por nak go men che'n Jesukrist, natulat go por kure'; más wen biza' go xkix lo Dios por nak go men che'n Me. ¹⁷ Kuze' nin, lë' zhë mizhin la, kube' Dios xmod gak kun rë men yizhyuo, per galo laka kun rë men che'n Me nguzublo Me. No chi nguzublo Dios kun rë men che'n Me, orze', ¿xkwan li'nu Dios rë men xa' nanet gon ro' Me? ¹⁸ Nela xmod nzobni' ka lo Yech che'n Dios:

No chi rë men xa' nzhon ro' Dios, dox bid ne bixa' par gal bixa' yalnaban kwa'n nayot lox.

Orze', ¿xmod yazë rë men xa' yent kwan nzhon,

nayi'lazh nzhon rë ley che'n Dios?

¹⁹ Kuze', rë go, or nizakzi men go, Dios ka nila' nizak go sa'; no ñal se'gaka bile' go kwa'n wen, mbaino gulo go ya' Dios, Dios Me ngulo rë kwa'n nzho, mbaino Me nile' rë kwa'n nila' Me di'zh.

5

Mika'b Per lo rë xa' nzo lo rë men che'n Dios

¹ Nal nin lo rë go, xa' nzo lo rë men che'n Jesukrist, porke nu ka da nzo lo rë men che'n Jesukrist, mbaino unen xmod nguza-kzi Me, no nu por kimbëza nen rë yalnazon che'n Krist or yaxo'b Me xtu wëlt; ² kina'ba lo go, bikina go rë men che'n Dios, rë xa' mika'b Dios lo go, nela or nikina men rë mbëkxi'l ga'; nazolia'zht go (le't go naya') zo go lo bixa', no ni nale' goi por dimi; ñal guzo go lo bixa' por nzëi laxto' go, no nela xmod nzhakla Dios. ³ Nalinut go bixa' nela nilinu men tu mos nado ga'; bile' pa' go par le' go kwa'n ñal, nes par nu bixa' le' xmod nak go. ⁴ Or ruxo'b Jesukrist, Me nile' mandad rë baxtor, lë' Me ne' tu koron zob yek be, tu koron kwa'n dox tsak no yot loxe.

Mika'b Per más rë kwa'n lo rë men che'n Dios

⁵ No rë go xa' xi, bin go ro' rë xa' más ngwagal lo go; rë go, kun yalnado' bin go ro' tu go kun xtu go, porke se' nzobni' lo Yech che'n Dios:

Dios nzo la par kin rë men niziya, per nzhaknu Me rë men nado'.

⁶ Kuze', kun yalnado' guzubi rë go lo Dios, Me nile' rë kwa'n nazhon; nes par le' Me gak go xa' tsak, or niwi' Me ñale. ⁷ Bila' go le'n ya' Dios rë kwa'n nile' nizob xigab yek go, porke yek Me nizob xigab por go.

⁸ Wenawen biwi' go kwan le' go; porke lë' Mizhab, xa' niyi' nine go, nikizë nela tu mbe'zh, xu' nibizhyë, kikwa'n cho gao. ⁹ Por nzo go wen lo widi'zh che'n Jesukrist, bixek go lo rë kwa'n nixë'l Mizhab lo go; bitsila go, gat lë't nab go nizakzi Mizhab; nu ska más rë wech go, men che'n Jesukrist, xa' nzhin rë plo, nizak rë kuba'. ¹⁰ Per or lox zakzi go che'p, orze' lë' Dios le' yo go nazhon, no le' Me, nayot ro'ya' go nez che'n Me; mbaino tsiro'b Dios la go, no zi go walika nazhon widi'zh che'n Me kwa'n ñila go. Bitsila go, por nak go men che'n Krist Jesús, lë' Dios ngurezho go par ban go lo yalnazon che'n Me par dubta'. ¹¹ Rë men ñal di'zh nazhon Dios, no lë'gaka Me nile' mandad par dubta'. Sa' gake.

Lult kwa'n midizh Per

¹² Por Silvan, tu xa' nanen walika men che'n Krist, mikë'n pla widi'zh lo yech re'. Kika'ba lo go, se'gaka bile' go kwa'n nzhakla Dios, no kilen par naya'lt laxto' go, rë yalnazon kwa'n mine' Dios ka' go. Rë kuba' nilu', walika nazhi' Dios go. ¿Guzo go wen lo kwa'n nazhi' Dios go re'!

¹³ Rë men che'n Jesukrist xa' nzhin laz men Babilonia, rë xa' ngule Dios nela go ga'; nu bixa' nzhakla gon, ¿chi wen ka go? Mbaino nu ska Mark, xa' nak nela tu xga'na ga', nzhakla gon, ¿chi wen ka go?

¹⁴ Kina'ba lo go, guzen go ya' rë wech go, uni' go lo bixa' kun dub laxto' go. No

kina'ba, le' Dios, zi go chul dizde le'n laxto'
go, rë go xa' nak men che'n Jesukrist. Sa'
gake.

Yech mirop kwa'n mixë'¹ San Per

¿Ma go wech no bizan, men che'n Jesukrist?

¹ Na Simón Per, nak da tu mos che'n Jesukrist, nela tu xa' nado ga' lo Me; mbaino mizo Jesukrist da nak da nu tu apost che'n Me. Kixëla yech re' lo rë go; por dox wen laxto' Jesukrist kun go, Me nak Dios che'n be no Me ngulo' be lo kwa'n nzë'b xki be, nu go ñila Me kun dub laxto' go, nela no ga'. ² Kina'ba lo Dios, yar más rë yalnazon che'n Dios kun go, mbaino par le' Me dox wen ban go por nilibe' go xmod nak Dios no Jesukrist, Me nile' mandad be.

Ñal gak rë men che'n Jesukrist nela xmod nzhakla Dios

³ Por yalnazon che'n Jesukrist, mine' Me rë kwa'n naki'n be par ban be zilita' nela xmod nzhakla Dios. Rë kure' mine' Jesukrist ka' be, par li'be' be xmod nak Dios, Me ngurezh be par gak be nela lë' Me. ⁴ Por rë kure', mila' Dios di'zh, ne' Me rë kwa'n nazhon no rë kwa'n dox tsak ka' be. Por ñila be rë kwa'n mila' Dios di'zh re', nu be gak nela lë' Me; por rë yalnazon re', nguro' be lo rë kwa'n nitsinu men; rë kure' nak rë kwa'n nzhakla kwerp che'n men. ⁵ Por ñila go Jesukrist, ñal bile' pa' go, gok nambe laxto' go lo rë kwa'n, par walika libe' go xmod nak Dios. ⁶ No por walipa' milibe' go xmod nak Dios, orze' gak ka'n go lo rë kwa'n nzhakla kwerp che'n go; no or naban go sa', gak xek go lo rë kwa'n nizam go por nak go men che'n Jesukrist; no or yent kwan ña laxto' go lo rë kuba', orze'se lë' go xo'byek le' go kwa'n nzhakla Dios. ⁷ Or mixo'byek go Dios, orze' lë' go kwın wen kun rë wech go, men che'n Jesukrist; no or nile' go kuba', lë' go chizhi' rë men dub la go.

⁸ Chi lë' go walika naban lo rë che'n Dios re', mbaino kitsiyar goi, orze' dox zu' nak go men che'n Dios, mbaino gat lë't ka mbin go widi'zh che'n Jesukrist, Me nile' mandad be. ⁹ Men xa' nzhak nak men che'n Jesukrist, no gat nabant xa' lo rë kure', orze' nak xa' nela tu men nikal lo ga'; mia'l laxto' xa', ngulo' Dios xa' lo kwa'n gat lë'. ¹⁰ Rë go wech no bizan, men che'n Jesukrist, ngurezh Dios go, nak go men che'n Me, no ngule Me go par le' go kwa'n nzhakla Me. Chi nzhakla go, nayot la' go nez che'n Dios, ñal más kën laxto' go, ro'b lo rë che'n Dios ke lë'la or galo, nes par ne rë men, nzho ka kwent nak go men che'n Dios. ¹¹ Orze' Jesukrist, Me nile' mandad be, no Me ngulo' be lo kwa'n nzë'b xki be, dub la Me xa'l Me plo yo go, plo kinu Me nile' Me mandad par dubta'.

¹² Kuze', lë'da dizh ra' kure' lo go; ter nane la goi, mbaino ter naye ka nzo go lo widi'zh che'n Jesukrist kwa'n mitse'd la go. ¹³ Ter ka xche'ptsa naban da, per ñal dizhnun go par tsila go rë kure'. ¹⁴ Lë'da nane la, porke lë' Jesukrist Me nile' mandad be ne lai lon, ka xche'ptsa naban da yizhyuo re'. ¹⁵ Kuze', kikën laxto'n par len rë kwa'n gak len; nez par or gat da, naya'lt laxto' go rë kure'.

Yub Per une yalnazon che'n Jesukrist

¹⁶ Or milu' no lo go, xmod nak rë yalnazon che'n Jesukrist Me nile' mandad be, no xmod gak or yë'd Me xtu wëlt, gat lë't michao' yek no rë kwa'n ne no lo go re'; kun yub zalo no une no yalnazon che'n Jesukrist kwa'n nilu', lë'gaka Me Dios; ¹⁷ rë no nzhin or milu' Xuz be Dios, lë'gaka Jesukrist nazhon, mbaino ne Dios lo no: "Miyi' re' nak Xga'na, Xa' dox nazhi' da, mbaino dox nizak laxto' ni wiwi'n lo Xga'na re'." ¹⁸ Yub no mbin, or midizh Dios; mien chi Me dizde lo yibë' or nzo no kun Jesukrist yek yi' che'n Dios.

¹⁹ Kuze' nanen, walika xti'zh Dios, rë kwa'n midizh rë xa' nzhalo por Dios; kuze' kina'ba lo go, wayila go rë kwa'n midizh rë xa' ze'; lë'i zu' par ne go xmod ñal ban go, haxta zhë yubre Jesukrist kun rë yalnazon che'n Me, kwa'n lu' nela or nilen ngubizh ga'. ²⁰ Naki'n galo laka ne go: rë widi'zh che'n Dios kwa'n midizh rë profet xa' nzhalo, ni tu men nagakt zobyekun mis xigab che'n xa', ²¹ porke rë profet, xa' midizh por Dios nzhalo, nangadi'zht bixa' kwa'n nzë yek bixa', lë' bixa' midizh por Sprit che'n Dios, nela xmod nzhakla Dios.

2

*Men xa' nigoch widi'zh che'n Dios
(Judas 4-13)*

¹ Nzhalo, xid rë men Israel, nguio rë xa' chigab walika men nidi'zh por Dios; se'ska yo men xid go, xa' chigab walika nilu' widi'zh che'n Jesukrist. Yo bixa' xid go, no nayanut laxto' go cho xigab che'n bixa', mbaino lë' bixa' le', ro'ya' pla rë xa' nzho xid go lo yub pa' widi'zh che'n Jesukrist, haxta di'zh bixa', gat lë't Dios Jesukrist, ter kun yub ren che'n Me nguizi' Me bixa'. Por nak bixa' sa', lë' bixa' yachib lo kwa'n lo'x bixa' tuli; ² no por nizen bixa' tu-xtu una', nayax men che'n Jesukrist tsinu bixa', orze' lë' men di'zh nakap tich widi'zh viv che'n Jesukrist. ³ No por nzhakla bixa' lat bixa' rë che'n go, nix laka chao' yek bixa' rë kwa'n lu' bixa' lo go, per nadedt lë' bixa' yachib lo kwa'n lo'x bixa', porke dizde nzhalo, nak la di'zh kwan zak bixa'.

⁴ Bitsila go, nangaya'lt laxto' Dios rë kwa'n mile' rë ganj, rë xa' ngok nayi'lazh lo Me; tuli mila Me rë ganj ze' le'n gabil plo nali'b bixa' kun kaden, no plo dox nakao, haxta or gab

Dios xmod gak kun lè' bixa'. ⁵ Mbaino nu milo'x Dios kun yiu nazhe'b rë men nguio chi tiemp, rë xa' ngok nayi'lazh lo Me. Per nab tsa Noé kun za gagh rë xa' lizh xa' nangala't Dios ngat, porke xmod'i'zh Noé lo rë men, naki'n ban bixa' nela xmod' nzhakla Dios. ⁶ No bitsila go, nu ska yezh Sodoma mbaino yezh Gomorra milo'x Dios, de laka mila' Diöse. Ngok rë kure' par ne rë men xa' laore yo, xmod nili'nu Dios rë men nakap. ⁷ Per Lot, tu miyi' mbin ro' Dios, nangala't Dios ngat xa' xid rë men ze'. Ter miban Lot xid rë men kwa'n nangont ro' Dios, per dox mile' Lot xigab, porke tu men-zhu men nizen bixa', niyitnu bixa'. ⁸ Lè' Lot, xa' naban nambe lo Dios, dub miban xa' xid rë men ze', zilita' miwin laxto' xa', por rë kwa'n une xa' no mbin xa', nile' rë men nakap ze'.

⁹ Rë kure' nilu', lè' Dios nzhak nigo' rë men nzhon ro' Me lo rë kwa'n nazhe'b, mbaino nane ka Me plo ñala' Me rë men nayi'lazh, rë xa' gat nzhont ro' Me, haxta zhin zhë gab Me xkwan zak bixa'. ¹⁰ Per más zakzi Dios rë xa' minu la lo rë kwa'n nzhakla kwerp che'n, mbaino rë xa' gat nzhont ro' Jesukrist.

Nad bixa', mbaino niye laxto' bixa', gat nizhebt bixa' niye bixa' rë sprit, xa' nile' mandad yizhyuo re'. ¹¹ No ter más nile' rë ganj che'n Dios mandad ke rë sprit xa' nile' mandad yizhyuo re', per ni nangaye laxto' rë ganj re', ngaye bixa' rë sprit re'. ¹² Per rë men re', niye bixa' rë kwa'n nanet bixa' kwan. Nak bixa' nela rë ma ga'; yent xigab yek bixa'; nela tu ma, nzhaal ma namás par gao xtu ma ma. Se'ska lox rë men ba' por minu la bixa' lo rë kwa'n nakap nile' bixa'.

¹³ Lè' Dios zakzi bixa' por nizakzi bixa' más men. Kwa'n más ño laxto' bixa' nak, nzhao cho' bixa' mbaino nzho cho' bixa'i dilant lo men; kuze', or nibin rë go par gao go, dox nitula go nile' bixa'. ¹⁴ Nikwa'n laka bixa' cho una' gat naya't ga' kun lè' bixa', no gat ñazhat bixa', nile' bixa' kwa'n gat lè'; mbaino nikwa'n laka bixa' rë men nanet be's xmod nak widi'zh pa' che'n Dios, par lat bixa' kwa'n nak che'n rë men re', porke lè' bixa' nzhak lai, kuze' nzh'i'bde la bixa' lo Dios. ¹⁵ Nguziwan bixa' por nguruya' bixa' nez nali che'n Dios, nela ngok Balaam, xga'n Beor; mile' xa' kwa'n gat lè' nab tsa par gap xa' dimi. ¹⁶ Per por xtol Balaam, yub burr kwa'n nzob Balaam mid'i'zh nayi' lo xa' nela tu men ga', par mikwë'z ma Balaam lo xigab tont kwa'n kinu xa'.

¹⁷ Rë men re', xa' nilu' widi'zh che'n Dios xa'la mod, nak bixa' nela plo nilen nits per mibizh nitse, o nela rë xkao kwa'n gat nilat yiu, rë plo nzhuwe'i' mbiy. Kuze', nak la di'zh, lè' bixa' lox par dubta' plo más nakao, ¹⁸ porke nilu' bixa' widi'zh dox ya mbaino dox nagan par zobyek mene, per yent kwan zu'i; niki'l bixa' men par nu men le' rë kwa'n

nzhakla kwerp che'n men, par nile' bixa' niru'ya' rë men re' lo widi'zh pa' che'n Dios, rë xa' kwa'n pe'n nguro' lo rë kwa'n gat lè'. ¹⁹ Nidi'zh bixa' lo rë men: "Gak ban go xmod nzhakla go, gat nayi'te lo Dios", per lè' rë kwa'n nitsinu men lè'i nile' mandad lo bixa', porke kad men xa' nagak ro' lo tu kwa'n gat lè', lè'i nile' mandad lo xa', ²⁰ porke tu men xa' nguro' la lo rë kwa'n gat lè', por ngwayila xa' Señor Jesukrist, Me niza' yalnaban par dubta' ka' men; chi yubre xa' yocho'n xa' lo kwa'n gat lè', kwa'n mile' mandad lo xa', más nalats nzha xa' orze', ke or galo. ²¹ Más wen nangalibe't xa' widi'zh wali pa' che'n Jesukrist ke la' xa'i or ya milibe' la xa'i. ²² Por nizak men rë kuba', kuze'ka nzhak rë widi'zh re' se': "Lè' mbëk gao ska kwa'n nguibre laxto' ma, no, lè' kuch ma milox ngoz, yubre ska le'n ben."

3

Lè' Jesukrist yi'd xtu wëlt

¹ Rë go men che'n Jesukrist, xa' dox nazhi' da; kure' rop yech kwa'n kixëla lo go, par naya'lt laxto' go, ñal ban go nambe lo Dios. ² Bitsila go rë widi'zh kwa'n mid'i'zh rë xa' mixë'l Dios nzhalá, no rë widi'zh kwa'n mika'b Jesukrist lo rë apost che'n Me, par mid'i'zh bixa'i lo go; no por ñila go rë widi'zh re', kinu go yalnaban par dubta'.

³ Naki'n galo laka ne go: or mer la yi'd Jesukrist xtu wëlt, galo laka yo rë xa' xizhnu rë kwa'n nazhon che'n Dios, no ban bixa' nela xmod niza' la bixa'. ⁴ Se' ne bixa' lo go: "¿Chon naga yè'd Krist, nela mila' xa' di'zh ga'? Ter dox nzhalá ngut rë xtit be, per yizhyuo se'gaka nake dizde nela or galo." ⁵ Rë men re', gat nzhaklat bixa' gon bixa', por widi'zh che'n Dios, nguixkwa' yibë'; mbaino por widi'zh ska che'n Dios, le'n rë nits kwa'n nguzhin al yët dizde nzhalá, nguro' yuo bizh. ⁶ No kun mis nits ba' milo'x Dios yizhyuo rë zhë che'n Noé. ⁷ No kun mis widi'zh che'n Dios, kinuchao' Me yibë' no yizhyuo kwa'n nal re', nes par lox Mei kun bël; no kun bël ska re' lo'x Me rë xa' gat nzhont ro' Me, zhë kwa'n ngule Me par gab Me xmod gak kun kad rë men re'.

⁸ No bitsila go, rë go men che'n Jesukrist, xa' dox nazhi' da; par Dios, lal tu zhë kun tu mil li'n, no tu mil li'n lal kun tu ngubizh. ⁹ Gabt go kilè' Dios par le' Me rë kwa'n mila' Me di'zh, nela xa' nile' rë men xigab ga'. Ka lè' Me, nzhap pasens kun rë men, porke gat nzhaklat Me lox ni tu men; lè' Dios nzhakla, la' men rë kwa'n gat lè' nak men, par ban bixa' xmod nzhakla Dios.

¹⁰ Per yent cho nane, cho zhë yè'd Jesukrist, lè'i gak nela or ño tu wa'n lizh men ga', yent cho nane poke; orze' dox naye kwez h lo yibë', no lox rë kwa'n nzho loi kun

bël; orze' yizhyuo kun rë nak kwa'n nzhin loi, rëi yëk.

¹¹No walika, se' lox rë kure', kuze' ñal ban go nab tsa par Dios, no gon go ro' Me. ¹²Dub kimbëz go zhin zhë yë'd Dios, bile' pa' go par le' go rë kwa'n nzhakla Dios, par zhin ga zhë ze'. Zhë ze' lox yibë' kun bël; no rë kwa'n nzho loi, lë'i gag nela tu ser ga', zhu'ne por nazho' che'n bël. ¹³Per be, kimbëz kwa'n mila' Dios di'zh, tu yibë' kub no tu yizhyuo kub, plo nile' men nab tsa kwa'n nzhakla Dios.

¹⁴Kuze' rë go men che'n Jesukrist, xa' dox nazhi' da, dub kimbëz go gag rë kure', bile' pa' go par kwin go wen tu go kun xtu go nes par ya'n nambe go lo Dios, mbaino gab Me yent kwan tu kwa'n nak go. ¹⁵Bitsila go, lë' Dios nzhap pasens kun go, par gag ro' go lo rë kwa'n gat lë' nak go; nu wech be Pab, xa' dox nazhi' be, se'ga' mizobni' xa' par go, nela xmod mizini Dios laxto' xa'. ¹⁶Rë kure' nane la go or mixé'l Pab yech lo go, ter nzho widi'zh che'n xa' nagan par zobyek mene. Nzho xa' nazu't be's widi'zh che'n Dios, ña-ñë'd xigab yek bixa', kuze' nigoch bixa' rë kwa'n mizobni' Pab, nela xmod nile' bixa' kun más rë kwa'n nzobni' lo yech che'n Dios; kuze' yub bixa' yachib lo kwa'n lo'x bixa'.

¹⁷Kuze', rë go men che'n Jesukrist xa' nazhi' da, lë' go mbin la rë kure'; bikina go go, par nayakë go tich rë xa' niban xmod niza' la xa', orze' la' go rë kwa'n mitse'd la go. ¹⁸Bin go rë kure' par se'gaka ne go lë' Jesukrist nazhi' go, mbaino par más libe' go xmod pa' nak Me, Me nile' mandad be no Me ngulo' be lo kwa'n nzë'b xki be. Rë men ñal di'zh, tugaka Dios nazhon, nal no par dubta'. Sa' gake.

Yech galo kwa'n mixë'l San Juan

Widi'zh che'n Dios kwa'n nzëdnu yalnaban par dubta'

¹ Ni naga yuxkwa' yizhyuo, lë' Jesukrist nzho la. Kun rop zalo no une no Jesukrist, no kun nzha no mbin no rë kwa'n ne Me lo no, mbaino kun yub ya' no mïgal no Me, Me nak yub widi'zh che'n Dios, Me niza' yalnaban par dubta'. ² Lë' Dios mile', milibe' no, Xga'n Me, Me niza' yalnaban ka' men par dubta'; no yub no une Me. Kuze' walika rë kwa'n kine no, no nilu' no lo go re', lë' Me re' nzho kun Dios Xuz be, mbaino milu' Me cho nak Dios. ³ Kine no lo go rë kwa'n une no mbin no par tutsa gag go kun no, nela no tutsa nak no kun Xuz be Dios mbaino kun Xga'n Me Jesukrist. ⁴ Kixë'l no rë widi'zh re' lo go par más zak laxto' go.

Men nikizë kun Dios nagakt ban xa' lo kwa'n gat lë'

⁵ Rë widi'zh re', lë' Me nei lo no par lu' noi lo go: Dios nak biani; rë kwa'n nile' Me, nazhon, no ni che'p nakao nagakt yo lo biani che'n Dios. ⁶ Chi nzho tu men xid be xa' nidi'zh, dox nikizë xa' kun Dios, per nikizë ra' xa' lo kwa'n gat lë', ka mbël xa' re', gat nikizët xa' xmod nzhakla Dios. ⁷ Per chi nikizë tu men lo kwa'n wen, nela rë kwa'n nile' Dios, orze' tutsa nak xa' kun rë wech xa', men che'n Jesukrist, no mimbe laxto' xa' lo rë kwa'n gat lë' por ren che'n Jesukrist, Xga'n Dios.

⁸ Chi nzho tu men xid be nzhah, ni tu kwa'n gat lë' gat nile't xa', orze' yub xa' re' nikide xa' xa', no nanet xa' ban xa' nela xmod nzhakla Dios; ⁹ per chi nixo'bdol be lo Dios rë kwa'n nzë'b be lo Me, orze' niche' Me rë kwa'n gat lë' nile' be, no nitsumbe Me laxto' be lo rë kwa'n nak be; porke nile' Me rë kwa'n mila' Me di'zh, mbaino nali rë kwa'n nile' Me. ¹⁰ No chi gab be, yent kwan nzë'b be lo Dios, kure' nak nela or nzhah be, gat walit kwa'n nidi'zh Dios, orze' nakbe' laka, gat nzhoh widi'zh che'n Dios laxto' be.

2

¹ Rë go men che'n Jesukrist xa' dox nazhi' da nela tu xmë'da; kixëla widi'zh re' lo rë go par nin, gat ñalt le' go rë kwa'n gat lë', per chi nzho go nile'i, nzho tu xa' nzhaknu be, nina'b xa' lo Dios por be; no xa' re' lë' Jesukrist, xa'gaka más nambe laxto' lo rë. ² Mbaino nab tsa por Jesukrist mizhe' rë kwa'n nzë'b xki be lo Dios; no gat lë't nab por rë kwa'n nzë'b xki bei; nu por rë kwa'n nzë'b xki rë nak rë men yizhyuo.

Chi walika nilibe' be Dios, lë' be gon ro' Me

³ Chi nile' be rë kwa'n nzhakla Dios, orze' walika nilu', nilibe' be Dios. ⁴ Chi nzhah tu men: "Na nilibe' Dios", mbaino gat nile't xa' kwa'n nzhakla Dios, orze' ka mbël xa', gat kinut xa' yub pa' widi'zh che'n Dios laxto' xa'. ⁵ Per xa' nile' kwa'n nzhakla Dios, xa' re' miro'b la lo kwa'n nazhi' xa' Dios; orze' nane be, ke walika nikizë be kun Dios. ⁶ Chi nidi'zh tu men: "Na nikizë' kun Dios", orze' naki'n ban xa' nela xmod miban Jesukrist yizhyuo re'.

⁷ Rë go men che'n Jesukrist xa' dox nazhi' da nela tu xmë'da, kwa'n kika'ba le' go re', gat lë't kwa'n kube, mis kure' kwa'n mika'b Dios lo go or laore ngwayila go Dios; mbaino widi'zh ska re' kwa'n mbin la go dizde nzhala; ⁸ ter nakkwa'n kika'ba lo go re', nela tu kwa'n kub ga' par go, porke kwa'n kub mile' Jesukrist or mbi'd Me yizhyuo re', no kwa'n kub nile' go nak, nazhi' go wech go tu go kun xtu go, porke nzalox la nakao che'n Mizhab, no lë' ki che'n Dios más nzadro'b. ⁹ Chi nzho tu men xid go nzhudi'zh: "Nikizë lo biani che'n Dios", per niyi' xa' nine xa' wech xa', men che'n Jesukrist, orze' se'gaka nikizë xa' ze' lo nakao. ¹⁰ Chi nzho tu men xid go, xa' nazhi' wech, men che'n Jesukrist, xa' re' walika nikizë lo biani che'n Dios, no yent kwan gag le', ro'ya' xa' lo nez che'n Dios. ¹¹ Per xa' niyi' nine wech, men che'n Jesukrist, nzo xa' lo nakao, mbaino nikizë xa' loi; net xa' plo ya xa', porke lë' nakao mile', nak xa' nela tu men nikal lo ga'.

Men xa' nilibe' Dios, gat ñalt xo'byek xa' rë kwa'n nzho yizhyuo re'

¹² Mixëla widi'zh re' lo rë go, men che'n Jesukrist, xa' nak nela më'd ga' lo widi'zh re', porke lë' Dios miche' la rë kwa'n nzë'b xki go lo Me por ñila go Jesukrist. ¹³ Mixëla widi'zh re' lo rë go, men che'n Jesukrist xa' nak nela men ngwagal la lo widi'zh che'n Jesukrist, porke nilibe' go Jesukrist, Me nzho dizde galo laka.

Mixëla widi'zh re' lo rë go, men che'n Jesukrist xa' nak nela xa' xi ga' lo widi'zh che'n Jesukrist, porke mile' go gan lo Mizhab, nangont go ro' xa'.

Mixëla widi'zh re' lo rë go, men che'n Jesukrist xa' nak nela më'd ga', porke nilibe' go Xuz be Dios. ¹⁴ Mixëla widi'zh re' lo rë go, men che'n Jesukrist xa' nak nela men ngwagal la lo widi'zh che'n Jesukrist, porke nilibe' go Jesukrist, Me nzho dizde galo laka.

Mixëla widi'zh re' lo rë go, men che'n Jesukrist xa' nak nela xa' xi lo widi'zh che'n Jesukrist, porke naye nzo go lo kwa'n ngwayila go Jesukrist por dox nzho widi'zh che'n Me laxto' go no che'ptsa (bi'ch laka) nzhak Mizhab lo go.

¹⁵ Nayot laxto' go yizhyuo re', no ni naxo'byek go rē kwa'n nzhō loi, porke rē men xa' nazhi' rē kure', gat nazhi't bixa' Xuz be Dios no ni rē men. ¹⁶ Rē men re', nixo'byek bixa' nab tsa kwa'n nzhakla kw-erp che'n bixa', no kwa'n nilu' chul lo bixa', mbaino ya nizi bixa' por rē kwa'n kinu bixa' yizhyuo re'. Rē xigab re', gat lē't lo Xuz be Dios nzēi; lē'i nzē lo rē kwa'n nzhō yizhyuo re'. ¹⁷ Nzadlox yizhyuo re' kun rē kwa'n nizē'b la men loi, per men xa' nile' kwa'n nzhakla Dios, par dubta' ban xa'.

Xa' más yi' ne Jesukrist nzhazhin la ruxo'b xa'

¹⁸ Rē go men che'n Jesukrist, rē xa' dox nazhi' da nela tu xmē'da; nzhazhin la zhē ka xche'p, lē' yizhyuo lox la. Per lē' go non la (lē' go nane la), xa' más yi' ne Jesukrist nzhazhin la ruxo'b xa', no nal nzhayar la bixa', kuze' nane be, nzhazhin la zhē, lox yizhyuo. ¹⁹ Rē men ba', xid be nguro' bixa', per gat lē't men che'n be bixa'. Chi men che'n bei, lē' bixa' ngaya'n kun be, per sa' ngok par milu', gat lē't rē bixa' men che'n be.

²⁰ Per Jesukrist, Megaka más nambe laxto' lo rē, mine' Sprit che'n Dios ka' be, no por kuze' nane be rē che'n Dios. ²¹ Kixēla widi'zh re' lo go, gat lē't por naga libe' go cho nak Jesukrist; lē' go nilibe' ka Me, no nane go, gat nzhot ni tu kwa'n mbēl lo widi'zh che'n Me.

²² ¿Cho xa' nidi'zh kwa'n mbēl? Xa' nikē' mbēl re' nak xa' nidi'zh lo rē men: “Gat walit Jesús nak Krist.” Xa' re' xa' niyi' nine Jesukrist, porke nidi'zh xa': “Gat lē't Dios Jesukrist”; mbaino ni Xuz Jesukrist, Dios Me nzho lo yibē', “Gat lē't Dios Me”, nzhab xa'. ²³ Rē xa' kwa'n nidi'zh: “Gat lē't Jesús nak Krist”, gat nilibe't xa' Xuz Jesukrist, Me nzho lo yibē'; per rē men xa' nzhudi'zh: “Lē' Jesús nak Xga'n Dios”, nu ka Xuz Me Dios, Me nzho lo yibē' nilibe' bixa'.

²⁴ Kuze', widi'zh che'n Dios kwa'n mbin go or ngwayila go Jesukrist, sa'gaka wayila go dubta'; chi lē' go le' sba', orze' dubta' zo Jesukrist kun go, kun Xuz Me Dios, Me nzho lo yibē'. ²⁵ No kure' nak kwa'n mila' Jesukrist di'zh, ne' Me yalnaban ka' be par dubta'.

²⁶ Nin rē widi'zh re' lo go, napa' goch rē men ba' yek go. ²⁷ Bitsila go, lē' Jesukrist mine' Sprit che'n Me ka' go, kuze' gat naki'ntra' go cho lu' widi'zh che'n Dios lo go, lē' Sprit che'n Dios nilu' rē che'n Dios lo go; no pura kwa'n wali nilu' Me lo go, gat lē't kwa'n mbēle. Kuze' wayila go nab tsa xmod nilu' Mei lo go, no dubta' guzo go kun Jesukrist, nalia't go Me.

²⁸ Nal, rē go xa' dox nazhi' da nela tu xmē'da; dubta' biban go lo rē che'n Jesukrist, nes par or yē'd Me, yent kwan zheb go, no

ni natula go lo Me. ²⁹ Lē' go nane ka, nile' Jesukrist nab tsa rē kwa'n nzhakla Xuz Me Dios; kuze' nane go, nab tsa rē xa' nile' kwa'n nzhakla Dios, nak xmē'd Dios.

3

Rē men che'n Jesukrist nak xmē'd Dios

¹ Biwi' go, itatu nazhi' Xuz be Dios be! Ngulu'lē Me be xmē'd Me, no nal, nak be xmē'd Me. Kuze', gat nilibe't men yizhyuo xmod nak be, porke gat nilibe't bixa' xmod ka nak Dios. ² Rē go xa' dox nazhi' da nela tu xmē'da, nal kinin lo go; ter nak la be xmē'd Dios, per gat lu' Dios lo be xmod ka gak be orze'; per lē' be nane ka, or yaxo'b Jesukrist, lē' be gak nela lē' Me, porke lē' be ne Me, nela xmod nak ka Me. ³ Kuze', chi lē' be nane la, gak be nela xmod nak Jesukrist, orze' ñal gak nambe laxto' be lo rē kwa'n, nela xmod nak Jesukrist.

Rē men che'n Jesukrist, gat nabant bixa' lo kwa'n gat lē'

⁴ Per tu men naban lo kwa'n gat lē', xa' re' gat nizhebt nine ley che'n Dios, porke rē men xa' naban lo kwa'n gat lē', tu lad mila' bixa' ley che'n Dios por nayi'lazh bixa'. ⁵ Lē' go nane ka, mbi'd Jesukrist yizhyuo re' par mizubchi Me rē kwa'n nzē'b xki be lo Dios; no ter yent cho dol nzhap Me. ⁶ Kuze', rē men xa' naban nela xmod nzhakla Jesukrist, gat nikizētra' bixa' lo kwa'n gat lē'; per rē men xa' chigab walika nak men che'n Jesukrist, mbaino se'gaka naban xa' lo kwa'n gat lē', orze' lalta' gat ne xa' Jesukrist, no ni naga libe' xa' Me. ⁷ Rē go xa' dox nazhi' da nela tu xmē'da, nala't go kide men go par naro'ya' go lo xnez Dios, porke tu men nile' kwa'n nzhakla Dios, nali nzo xa' lo Dios, nela nali nzo Jesukrist lo Dios ga'. ⁸ Mbaino men xa' naban lo kwa'n gat lē', men che'n Mizhab xa'; porke ni naga yo yizhyuo, lē' Mizhab kile' la rē kwa'n gat lē'. No por kuze', mbi'd Jesukrist Xga'n Dios yizhyuo re', par chil Me rē che'n Mizhab.

⁹ Men xa' nak xmē'd Dios, gat nikizētra' xa' lo kwa'n gat lē', porke nzhō Dios laxto' xa'; kuze' nagaktra' le' xa' kwa'n gat lē', porke por Sprit che'n Dios, nak xa' nela tu mē'd laore ngol ga'. ¹⁰ Se' nakbe' cho xa' nak xmē'd Dios, no cho rē xa' xin Mizhab: Men xa' gat nile' kwa'n nzhakla Dios, no gat nazhi' xa' guchin xa', gat lē't men che'n Dios xa'.

Rē men che'n Jesukrist, nazhi' bixa' guchin bixa'

¹¹ Kure' nak widi'zh che'n Dios kwa'n mbin go dizde galo laka: Ñal chizhi' be tu be kun xtu be, ¹² no gat ñalt gak be nela ngok Cain ga', xa' ngok men che'n Mizhab, mbit xa' wech xa'. No, ¿chon mbit xa' wech xa'? Porke wech xa' mile' kwa'n nzhakla Dios;

per lè' xa' mile' kwa'n gat lè' lo Dios. ¹³ Rê go wech mbaino bizan, men che'n Jesukrist, nayat laxto' go chi niyi' men yizhyuo nine go. ¹⁴ Por nazhi' be guchin be, men che'n Jesukrist, lè' be nane, nguro' la be lo nez kwa'n nzhuweï' men par lo'x men lo Dios. Per men xa' gat nazhi't xtu men, se'gaka nile' yalgut mandad lo xa', ¹⁵ mbaino xa' niyi' nine xtu men, men nzhut men xa'; no lè' go nane ka, rê xa' nzhut men, gat kinut xa' yalnaban par dubta'. ¹⁶ Jesukrist ngut por rê men por nazhi' Me men. Kuze' milibe' be xmod nak kwa'n nazhi' Dios men. Nal, ñal nu be, haxta la' be gat be por guchin be, men che'n Jesukrist. ¹⁷ Chi tu rê be kinu ka rê kwa'n naki'n be, per nane be, tu rê guchin be gat kinut xa' kwa'n naki'n xa', mbaino nalast laxto' be xa', orze', ¿xmod gab be, nzho yalnazhi' che'n Dios laxto' be? ¹⁸ Rê go men che'n Jesukrist xa' dox nazhi' da nela tu xmè'da, ñal chizhi' be men, gat lè't nab tsa kun widi'zhe; ñal chizhi' be men por kwa'n nile' be por lè' xa'.

Rê men che'n Jesukrist, ñal ne bixa', lè' Dios nzo kun lè' bixa'

¹⁹ Or naban be sa', nane be, men che'n Jesukrist be, mbaino nizi be, wen niwi' Dios lo be. ²⁰ Ter nizi be, lè' be nzhap dol por tu kwa'n, per más kwa'ro Dios lo kwa'n nizi be, porke lè'gaka Me nane rê xigab che'n men. ²¹ Rê go wech no bizan, xa' nazhi' da, or nizi be, yent kwan nak be, nize'n be, lè' Dios nzo ka kun be. ²² No chi na'b be tu kwa'n lo Me, lè' Me ne'ï'ka' be, porke nizo be xti'zh Me no nile' be rê kwa'n ño laxto' Me. ²³ No kure' kwa'n mika'b Dios lo be: Yila be widi'zh che'n Xga'n Me Jesukrist, no chizhi' be guchin be, tu be kun xtu be, nela xmod nzhakla Dios gak. ²⁴ No xa' nizob xti'zh Me, walika nikizè xa' kun Dios, mbaino Dios nzo kun lè' xa'. Nane be, Dios nzo kun be por Sprit che'n Me kwa'n mine' Me, nzho laxto' be.

4

Sprit che'n Dios, no sprit kwa'n nile', nayi'lazh men lo Jesukrist

¹ Rê go men che'n Jesukrist, xa' dox nazhi' da; nayilat go kwa'n nidi'zh wanei cho men, xa' ne lo go: "Na nidizh por Sprit che'n Dios." Galo laka, guzenbe' go xmod kidi'zh xa' (biwi' go xmod nak xa'), chi lo Dios ka nzé kwa'n kidi'zh xa', porke lo yizhyuo re', nayax men nikizè, xa' chigab walika nidi'zh por Dios. ² Se' libe' go rê xa' walika nidi'zh por Sprit che'n Dios. Xa' ne lo go: "Jesukrist ngol nela nzhah ka rê men yizhyuo", xa' re'se walika nidi'zh por Sprit che'n Dios. ³ Per xa' ne lo go, gat walit ngol Jesukrist nela tu men yizhyuo, xa' re' gat kinut Sprit che'n Dios; sprit che'n xa' más niyi' nine

Jesukrist kinu xa'. No lè' go nane la, lè' rê xa' kinu sprit ba' yo yizhyuo, no nal, lè' bixa' nzho la.

⁴ Rê go, men che'n Jesukrist xa' nak nela tu xmè'da; xmè'd Dios go, no por Sprit che'n Dios Me nzho laxto' go, mile' go gan lo rê xa' ba' por nangayila go kwa'n ne bixa'. Sprit Me nzho laxto' go, más nile' Me mandad ke sprit kwa'n kinu rê men ba'. ⁵ No rê men ba', lal bixa' kun más rê men yizhyuo, xa' gat nzhont ro' Dios, kuze' tutsa nidi'zh bixa', mbaino nzhon rê men yizhyuo ro' bixa'. ⁶ Per be, men che'n Dios be, no rê men xa' nzhon kwa'n nidi'zh be, nilibe' bixa' Dios, per rê men xa' gat nzhont kwa'n nidi'zh be, gat lè't men che'n Dios bixa'. Se' nilibe' be cho kinu Sprit che'n Dios no cho kinu sprit che'n xa' dox niyi' nine Jesukrist.

Lo Dios nzé kwa'n nazhi' men tsa' men

⁷ Nin lo rê go, men che'n Jesukrist xa' dox nazhi' da; ñal chizhi' be guchin be, tu be kun xtu be, porke kwa'n nazhi' men tsa' men men, lo Dios nzé; rê men, xa' nazhi' tsa' men, xmè'd Dios xa', no nilibe' xa' Dios. ⁸ No men xa' gat nazhi't xtu men, gat nilibe't xa' Dios, porke lo Dios nzé chizhi' men rê men. ⁹ Se' milu' Dios xmod nazhi' Me be: Mixè'l Me dubtsa Xga'n Me yizhyuo re', nes par men yila Xga'n Me, lè' xa' ban dubta' kun Dios. ¹⁰ Se' milu' Dios, nazhi' Dios be: Gat lè't por galo michizhi' be Dios, sino por galo Me milu' nazhi' Me be, mixè'l Me Xga'n Me yizhyuo re', par ngut por rê kwa'n nzé'b xki be. ¹¹ Rê go men che'n Jesukrist xa' nazhi' da, sa' milu' Dios, nazhi' Me be; kuze' ñal chizhi' be guchin be, tu be kun xtu be. ¹² Lalta', yent cho gat ne Dios; per chi nazhi' be tu be kun xtu be, orze' nilu', walika nzho Dios laxto' be, mbaino miro'b la be lo kwa'n nazhi' Dios be.

¹³ ¿Xmod nane be, nikizè be kun Dios, mbaino nzo Me kun be? Nane bei por Sprit che'n Dios, Me nzho laxto' be. ¹⁴ No uneï, kuze' nidi'zh no: Lè' Xuz be Dios mixè'l Me Xga'n Me lo rê men yizhyuo, par ko' Me bixa' lo rê kwa'n nazhe'b nak bixa'. ¹⁵ Kuze', men xa' nidi'zh, lè' Jesukrist nak Xga'n Dios, men re' nikizè kun Dios, no nzho Dios laxto' xa'. ¹⁶ Por rê kure', nane be no ñila be, lè' Dios nazhi' be.

Lo Dios nzé kwa'n nazhi' men tsa' men men. Men nazhi' xtu men, kun Dios nikizè xa', no nzho Dios laxto' xa'. ¹⁷ Sa' par lox ro'b be lo kwa'n nazhi' Dios be, nes par yent kwan ya laxto' be or zhin zhè gab Dios xmod gak kun tuga' men yizhyuo, porke naban be lo yizhyuo re' nela xmod miban Jesukrist ga'. ¹⁸ Tu men miro'b la lo kwa'n nazhi' Dios xa', yentra' kwan nizheb xa' or zhin xa' lo Dios; per men nangaro'bt lo kwa'n nazhi' Dios xa', nizheb xa' xkwan gab Dios or kube'

Dios kwan nak xa'; zak xa', napa' zakzi Dios xa'. ¹⁹ Lë' be nazhi' Dios no rë men, porke galo Dios, milu' Me nazhi' Me be. ²⁰ Chi tu men nidi'zh: "Na nazhi' Dios", per niyi' xa' nine xa' guchin xa', men che'n Jesukrist, ka mbël xa' re'. Chi gat nazhi' xa' tsa' men xa', xa' niwi' xa' lo, orze', ζ xmod chizhi' xa' Dios, Me gat nilu't lo xa'? ²¹ No Dios mile' mandad, chi nazhi' tu men Dios, nu guchin xa', rë men che'n Jesukrist, ñal chizhi' xa'.

5

Por ñila be widi'zh che'n Jesukrist, nguro' be lo rë kwa'n gat lë' nzhlo lo yizhyuo re'

¹ Rë men, xa' ñila, lë' Jesús nak Krist, xmë'd Dios bixa'; no chi nazhi' be Xuz be Dios, nu ska rë xa' nak xmë'd Dios ñal chizhi' be. ² Or nazhi' be Dios no nile' be rë kwa'n nile' Me mandad, orze' nu ñal chizhi' be rë men, xa' nak xmë'd Me. ³ Chi walika nazhi' be Dios, orze' nu rë kwa'n mika'b Me, nile' be; porke gat lë't nagane zak be. ⁴ Rë be xa' nak xmë'd Dios, por ñila be widi'zh che'n Dios por Jesukrist, nagaktra' wei' rë kwa'n nakap be, rë kwa'n nzhlo yizhyuo re', ⁵ no por ñila be, lë' Jesús nak Krist, nab tsa lo be nagakt le' yizhyuo mandad.

Yub Dios midi'zh, lë' Jesús nak Krist

⁶ Tugaka Jesukrist mixë'l Dios lo yizhyuo; ngoklë'i' Me le'n nits no mixo Me ren che'n Me or ngut Me. Gat lë't nab tsa ngoklë'i' Me; nu mixo Me ren che'n Me. Walika kwa'n nidi'zh Sprit che'n Dios por Jesukrist, porke nab tsa kwa'n wali nidi'zh Me. ⁷ Chon kwa'n nilu', cho nak Jesukrist: ⁸ Tube nak Sprit che'n Dios, xtube nak nits kwa'n ngoklë'i' Me, no xtube nak ren kwa'n mixo Me or ngut Me. Yon kure', tutsa kwa'n gabe. ⁹ Ñila be kwa'n nidi'zh men lo yizhyuo re', per más ñal yila be kwa'n midi'zh Dios por Xga'n Me. ¹⁰ Tu men xa' ñila, nak Jesukrist Xga'n Dios, yub Dios ñila xa'; per xa' gat ñilat kure', kinu xa' Dios nela tu men mbël ga', porke nanet xa', yila xa' kwa'n midi'zh Dios por Xga'n Me. ¹¹ No kure' nak kwa'n midi'zh Dios por Xga'n Me: Niza' Dios yalnaban ka' men par dubta', no yalnaban re' nzë lo tugaka Xga'n Dios. ¹² Men xa' ñila, lë' Jesus nak Krist, xa' re' kinu yalnaban par dubta'; per men xa' nanet yila kure', gat kinut xa' yalnaban par dubta'.

Kwa'n lult midi'zh Juan

¹³ Kixëla yech re' lo rë go xa' ñila, lë' Jesús nak Krist, par ne go, kinu go yalnaban par dubta'. ¹⁴ Por nane be, wen niwi' Dios lo be, kuze', or na'b be tu kwa'n lo Me, lë' Me nzhon kwa'n nina'b be chi nile' bei nela xmod nzhakla Me. ¹⁵ No chi nane be, nzhon ka Dios wanei kwan nina'b be lo Me, orze' guzhë kinu be kwa'n nina'b be lo Me.

¹⁶ Chi ne go tu rë wech go, men che'n Jesukrist, kile' tu kwa'n gat lë', kwa'n nawei't xa' lox xa' lo Dios, bina'b go lo Dios por xa' re', nes par za' Dios yalnaban ka' xa'. Per nzhlo kwa'n dox nayi' nile' men, kwa'n nzhuwe'i' men par lox men lo Dios tuli; gat kinita na'b go lo Dios por xa' re'. ¹⁷ Rë kwa'n gat lë', nile' nzë'b xki men lo Dios, per nzhlo kwa'n gat nile't, nzhata men lo Dios.

¹⁸ Lë' be nane ka, rë xa' nak xmë'd Dios, gat nabanra' bixa' lo kwa'n gat lë', no nikina Jesukrist bixa', Me nak Xga'n Dios, no nagaktra' chi Mizhab bixa' lo kwa'n gat lë', par le'i mandad lo bixa'.

¹⁹ Nane be, nak be men che'n Dios, per rë men yizhyuo, xa' gat nzhont ro' Dios, Mizhab nile' mandad lo bixa'.

²⁰ Nu nane be, mbi'd Jesukrist Xga'n Dios yizhyuo re' par mizini Me laxto' be, no ngok milibe' be yub pa' Dios. Nal, nikizë be kun lë' Me, Me re' nak Jesukrist, Xga'n Dios. Jesukrist walika Dios, mbaino tugaka Me niza' yalnaban par dubta'.

²¹ Rë go men che'n Jesukrist, go nak nela xmë'da, ne go, nazuxib go no ni nachizhi' go rë winab. Sa' gake.

Yech mirop kwa'n mixë'l San Juan

más zak laxto' rë be. ¹³Lë' rë guchin be, men che'n Jesukrist, xa' ngule Dios, nzhakla bixa' gon bixa' chi wen ka go. Sa' gake.

¿Ma go, men che'n Jesukrist?, ¿chi wen ka go?

¹ Na nak tu xa' nzo lo rë men che'n Jesukrist; kixëla yech re' lo go, guchi'na, xa' ngule Dios, no lo rë xmë'd go, men che'n Jesukrist. Dub laxto'n nazhi' da go, no gat lë't naba nazhi' go, nu rë xa' nilibe' yub pa' widi'zh nazhon che'n Dios nazhi' go. ²Kuze' nazhi' no go por viv rë widi'zh che'n Dios kwa'n nzho laxto' no, no dubta' nzho rë widi'zh re' laxto' no. ³Kina'ba lo Xuz be Dios no lo Jesukrist Me nak Xga'n Me, dubta' gaknu Dios go, lats laxto' Me go mbaino le' Me chul ze'n go dizde le'n laxto' go. Sa' gaknu Dios go por ñila go widi'zh che'n Me no por nazhi' go guchin go, men che'n Jesukrist.

Naru'ya't go lo viv widi'zh che'n Jesukrist

⁴ Dox nizak laxto'n or mbina, se'gaka nikizë pla go lo yub pa' widi'zh che'n Dios, nela xmod mika'b Xuz be Dios lo be, le' be. ⁵No nal, rë go men che'n Jesukrist, xa' dox nazhi' da; kina'ba lo go, chizhi' go tu go kun xtu go. Gat lë't laore nal nin kure' lo go; kure' nane la go dizde or nguzublo, ñila go widi'zh che'n Dios. ⁶Chi lë'i walika nazhi' be Dios, ñal le' be nela xmod mile' Me mandad, no kure' nak kwa'n mika'b Me: Chizhi' be men, no kure' nane la go dizde or galo. Se' ñal ban be.

Men xa' nilu' widi'zh che'n Dios xa' la mod

⁷ Kure' nin, porke nayax xa' nikide men nikizë yizhyuo re'; nidi'zh bixa', or mbi'd Jesukrist yizhyuo, gat walit ngol Me nela nzhal ka men yizhyuo. Sa' nak rë xa' ba' par nakbe', cho nikë' mbël mbaino cho niyi' nine Jesukrist. ⁸Ne go kun rë xa' ba', napa' yent cho kwent rë zhi'n nazhon kwa'n mile' Dios xid go. Kuze', bile' pa' go par gal go rë kwa'n nazhon kinu Dios par go. ⁹Wanei cho men tsiyar widi'zh che'n Dios kwa'n milu' Jesukrist, no gat nabant xa' lo yub pa' xmod milu' Jesukrist, orze' gat nzot Dios kun xa' re'; per xa' naban lo yub pa' widi'zh che'n Jesukrist, xa' re'se nzo Dios kun lë', Me nak Xuz Jesukrist, mbaino kun Jesukrist. ¹⁰Chi yi'd tu rë xa' ba' lizh go, no gat nzadnu xa' yub pa' widi'zh che'n Dios lo go, nade'dt go xa' lizh go, no ni nani' go lo xa', ¹¹porke xa' nini' lo rë men re', nu xa' ze' nzhap dol lo Dios por rë kwa'n gat lë' nile' rë men ba'.

Lult kwa'n nzhab Juan

¹²No dox kwa'n nzhaklan ganin lo go lo yech re', per gat nzhaklatra' ngazobni'ne lo yech. Más wen yuba ganiy or yala lo go, par

Yech mion kwa'n mixë'l San Juan

Mal wech, ¿chi wen kal?

¹ Na nak tu xa' nzo lo rë men che'n Jesukrist; kixëla yech re' lol, Gayo, lu xa' dox nazhi' da.

² Wecha, xa' dox nazhi' da, kina'ba lo Dios ne' Me yalnayë' no yalnaban che'nal, no yal wen lo rë kwa'n; na nane ka, wen nzol lo Dios. ³ Dox nizak laxto'n or mbi'dne pla wech be lon, men che'n Jesukrist, se'gaka nabanal lo yub pa' widi'zh che'n Dios. ⁴ Yentra' kwan más nile' nizak laxto'n ke lë'la or nzhona, lë' rë xa' nak nela xmë'da por Jesukrist, se'gaka naban bixa' lo viv widi'zh che'n Dios por Jesukrist.

Dox wen kwa'n kile' Gayo

⁵ Wecha xa' nazhi' da, dox nzhonal ro' Dios, nzhaknul rë wech be xa' ñadi'zh widi'zh che'n Jesukrist, ter nzho bixa' gat nilibe'tal. ⁶ No plo nibin rë men che'n Jesukrist, lë' bixa' midi'zh, dox wen mile'l ngoknul bixa', miza'l rë kwa'n naki'n bixa' plo nzha bixa'. Kuze' kina'ba lol, se'gaka gaknul bixa' nela xmod nzhakla Dios, ⁷ porke or ngwa bixa' ngwadi'zh bixa' widi'zh che'n Jesukrist lo rë xa' gat ñilat Dios, no ni tu gai' ngayixt rë xa' re' ngaka' bixa'. ⁸ Kuze', ñal gaku be rë xa' re' lo rë kwa'n naki'n bixa', par tutsa zhi'n le' be lo Jesukrist, Me nak che'n zhi'n re'.

Gat lë't kwa'n kile' Diótrefes

⁹ Lë'da mixë'l tu yech lo rë men che'n Jesukrist, rë xa' nzho plo nzhol ba', per lë' Diótrefes, lë'laka xa' tu kwa'n, no dox niyich xa' mandad che'n no. ¹⁰ Kuze', chi lë'da yal ba', lë'da di'zh kwan nak xa' lo rë men che'n Jesukrist: Nikë' xa' kixu' no kun rë widi'zh dox nakap. No gat ñayëlt xa' nile' xa' nab rë kuba', no nu dox nakap xa' lo rë wech be xa' ñadi'zh widi'zh che'n Jesukrist, mbaino rë xa' nzhakla gaku rë xa' re', nigo'tin Diótrefes rë men re' yado'.

Dox wen kwa'n kile' Met

¹¹ Wecha xa' nazhi' da, nagaktal nela rë xa' nakap, más wen gok xmod nak rë men wen, porke men nile' kwa'n wen, men che'n Dios xa'; per men nile' kwa'n nakap, gat nilibe't xa' Dios. ¹² Dox wen ñët Met, haxta xmod naban xa' nilu' men wen xa'; mbaino nu no nane kure', no gat nidi'zht no kwa'n mbël.

Lult kwa'n midi'zh Juan

¹³ Dox kwa'n ngoklan ngazobni'n lo yech re', per nangaletne, ¹⁴ por kimbëza yala lwegal lol, orze' dizha kun lu. ¹⁵ Kina'ba lo Dios, ze'nal chul dizde le'n laxto'l. Rë

xa' nzhin kun no, rë xa' nichë'l be, nzhakla bixa' gon bixa': "¿Chi wen ka rë go?", no, "¿Tatu wen gaka?" Guzh che'p, lë'da minabdi'zh: "¿Chi wen ka?", tu ga' rë xa' nichë'l be, rë xa' nzhin kun lu ba'.

Yech kwa'n mixë'l San Judas, wech Jesukrist

Ma go men che'n Jesukrist, ¿chi wen ka go?

¹ Na Judas, nak da nela tu mos nado ga' lo Jesukrist, no wecha nzhak Jakob; kixëla yech re' lo rë go; nazhi' Xuz be Dios go, no Jesukrist nikina go, mbaino Dios ngurezh go nak go men che'n Me. ² Kina'ba lo Dios, dox lats laxto' Me go, no le' Me zi go chul dizde le'n laxto' go, mbaino dox chizhi' go men.

Rë xa' nilu' widi'zh che'n Jesukrist xa'la mod

(2 Pedro 2:1-17)

³ Rë go xa' dox nazhi' da, ter pazhë ra' be's milen xigab, ngaxëla tu yech lo go, par ngadizha xmod nak yalnaban kwa'n mine' Jesukrist ka' be; per nalse, mile pa' por mixë'la yech re' par dizhun go, ne go namás, nala' go goch widi'zh che'n Dios kwa'n mika'b Jesukrist lo rë men che'n Me par dubta', ⁴ porke nguio pla men xid go, rë xa' chigab walika men che'n Jesukrist, par kide bixa' go, rë xa' nak la di'zh lo'x Dios, porke yent kwan ña laxto' bixa' lo rë kwa'n nazhon che'n Dios. Nidi'zh bixa', rë men che'n Jesukrist gak ban bixa' nela xmod niza' la bixa', mbaino zak bixa', lë' bixa' más lo Jesukrist, Me nile' mandad be.

⁵ Ter nane la go kure', per xtu wëlt nzhaklan tsila goi. Ter ngulat Dios rë men che'n Dios lo rë men Egipto, per dispwes di ngulo' Me rë men che'n Me, mbit Me rë xa' nangayilat kwa'n nzhak Me. ⁶ No rë ganj che'n Dios xa' nguro' plo mizo Dios bixa', mit-sao'yo' Dios bixa' plo nazhe'b nakao, nali'b bixa' kun kaden par dubta', haxta zhin zhë, wi' Dios kwan li'nu Dios bixa'. ⁷ Se'ska mile' Dios kun rë men yezh Sodoma no kun rë men yezh Gomorra, mbaino kun más rë men, rë xa' nzho rë yezh kwa'n nzhin naka'n ro' rop yezh re'. Rë men re' mile' kwa'n dox kwa'n nakap, nguzen miyi' tsa' miyi' miyi', no una' nguzen tsa' una' una'. Se' mile' Dios par ne más rë men, xkwan nili'nu Dios rë men nak sa': nizo'l Me men le'n bël kwa'n di' par dubta'.

⁸ No dub sa', rë men xa' chigab walika men wen, rë xa' nzho xid go ba', nidi'zh bixa', nilu' Dios kwa'n nazhon lo bixa' le'n mika'l, kuze' gat lë't nab niban bixa' lo kwa'n nile' ña'n gat nambe bixa' lo Dios; nu zak bixa' timás bixa' lo Dios, mbaino nu niye bixa' rë ganj che'n Dios. ⁹ Per ni ganj Miguel, xa' nile' mandad lo más rë ganj che'n Dios, or michëro' xa' kun Mizhab por kwerp che'n Muisés, nangayet laxto' ganj

re', ngadi'zh xkwan nak Mizhab, nab tsa nzhak ganj: "Lë' Dios da wi' kwan nakal." ¹⁰ Per rë men re', xa' yent kwan ña laxto' lo rë kwa'n nazhon che'n Dios, niye bixa' rë kwa'n nanet bixa' kwan; no or nile' bixa' rë kure', nak bixa' nela tu ma ga'; kure' le' lox bixa' tuli.

¹¹ ¡Dox nazhe'b zakzi bixa'!, porke nak bixa' nela xmod ngok Caín; no ngok miyizh bixa' por dimi nela Balaam ga'; no nu nak bixa' nela ngok Coré, xa' ngok nayi'lazh lo Dios, kuze' lë' bixa' zakzi nela xa' re' ga'. ¹² Por nzho bixa' xid go or nzhao go tu kwa'n por nak go men che'n Jesukrist, jwals ke'd bixa' kwa'n nak bixa' go. Dub kiyao bixa' xid go, gat nize'nt bixa' kwa'n nak bixa' lo go. Nak bixa' nela rë xa' nikina ma, nab tsa gut bixa' ma no gao bixa' ma. Mbaino nak bixa' nela rë xkao kwa'n chigab une la yiu, per nzhuwei' mbiy; no nak bixa' nela rë ya xlë kwa'n niyent kwan niza', orze' zu'i namás par ro'ge orze' bizhe. ¹³ Nak bixa' nela rë bol che'n nitsdo' kwa'n nayi' ga' or niro' tu mbi ro; maska rë bichi'n be'd nigo'i, rë plo nzhon men kwa'n nak bixa', kwa'n nile' nitula men; nak bixa' nela rë xke mbël ga' kwa'n nzhak lo yibë', orze' ñitloi lo nakao. Rë xa' re' nak la di'zh bi bixa' lo nakao nazhe'b par dubta'.

¹⁴ No por rë men re', tu xa' ngok ben che'n Adán lë Enoc, midizh xa' por Dios, nzhak xa': "¡Biwi'!; lë' Dios nzë kun dox nayax ganj che'n Me, ¹⁵ par le' Me yalgustis kun rë men yizhyuo, rë xa' yent kwan ña laxto' lo rë kwa'n nazhon che'n Dios; le' Me zi bixa' kwan nak bixa' por rë kwa'n nakap mile' bixa', no por rë widi'zh nazhe'b kwa'n nde bixa' Dios por nayi'lazh bixa' lo Me." ¹⁶ Rë men re', nidi'zh bixa' gat lë' por rë kwa'n nile' Dios mbaino por rë kwa'n nile' rë men; no nile' bixa' dike kwa'n niza' la bixa'. No dox ya xti'zh bixa', mbaino chul nidi'zh bixa' lo men par lat bixa' che'n men.

Ñal dubta' biban go lo widi'zh che'n Jesukrist

¹⁷ Per rë go, men che'n Jesukrist, xa' nazhi' da; bitsila go rë widi'zh kwa'n mbin la go che'n rë apost, rë xa' mixë'l Jesukrist, Me nile' mandad be. ¹⁸ Se' midizh bixa': "Or mer la yi'd Jesukrist xtu wëlt, galo laka yo rë xa' xizhnu rë kwa'n nazhon che'n Dios, no ban bixa' nela xmod niza' la bixa'." ¹⁹ Rë men re', nile' nibil rë men che'n Jesukrist, porke nab tsa xigab che'n men yizhyuo kinu bixa'; gat kinut bixa' xigab che'n Dios, gat nzhot Sprit che'n Dios laxto' bixa'. ²⁰ Per rë go, men che'n Jesukrist xa' nazhi' da; biro'b go lo kwa'n nazhon kwa'n ngwayila go Dios; no or nina'b go lo Dios, bile' goi nela xmod nilu' Sprit che'n Dios lo go. ²¹ Bitsila go, zilila' lë' Dios nazhi' go, nes par le' go

kwa'n nzhakla Dios, haxta zhè kwa'n gal go yalnaban kwa'n di' par dubta', kwa'n ne' Señor Jesukrist ka' go or yè'd Me, por nilats laxto' Me go.

²² Goknu go rē xa' nzhakla ro'ya' lo yub pa' widi'zh che'n Dios, ²³ no gulo' go zipla bixa' le'n bēl, mbaino bilats laxto' go más bixa', per ne go namás, nachēlt go kun lē' bixa', napa' ye'd xmod nak bixa' go; per ni xab bixa' nagalt go.

Lult kwa'n midi'zh Judas

²⁴ Ñal guzh go nazhon Jesukrist, Me nikina be par naro'ya' be lo nez che'n Me, nes or wei' Me be lo biani che'n Xuz Me, dox zak laxto' be por niyent kwan nak be lo Xuz Me Dios. ²⁵ Tugaka Dios nzho; por kwa'n mile' Jesukrist, Me nile' mandad be, nigo' Dios men lo kwa'n nazhe'b nzho men. Bidi'zh go nazhon Me, porke nab tsa lē' Me ñal di'zh men nazhon, mbaino tugaka Me más tsak lo rē kwa'n nzho, mbaino nab tsa Me nile' mandad dizde galo laka, no nal, mbaino par dubta'. Sa' gake.

Rë kwa'n milu' Jesukrist lo San Juan kwa'n laore gak

Ngurulo Jesukrist lo Juan

¹ Rë widi'zh re' kwa'n nzhab Dios lo Jesukrist, par lu' Jesukrist rë kwa'n mer la gak, lo rë xa' nak men che'n Me, mbaino mixë'l Jesukrist ganj che'n Me par nzhabe lo Juan, ² kuze' mizobni' Juan lo yech re', walika widi'zh che'n Dios kwa'n mbin xa' mbaino une xa', nela xmod milu' ka Jesukriste lo xa'. ³ Wen nzha rë xa' nzho'l no rë xa' nzhon rë widi'zh che'n Dios kwa'n nzobni' lo yech re', mbaino nizobyeq bixa'i, porke mizhin gax la gak rë kure'.

Mixë'l Juan tu yech lo za gagh yezh plo nzho rë men che'n Jesukrist

⁴ Na Juan, kixëla yech re' lo rë men che'n Jesukrist, xa' nzho za gagh yezh kwa'n ña'n laz men Asia. Kina'ba lo Dios, gaknu Dios go, no le' Dios zi go chul dizde le'n laxto' go; Dios Me nzho la dizde nzhal, no nzho Me nal, mbaino par dubta' yo Me. No se'ska, le' za gagh sprit, kwa'n nizo lo Dios, le'i ya go wen mbaino zi go chul dizde le'n laxto' go; ⁵ mbaino se'ga', le' Jesukrist kun go, Me nilu' lo be xmod pa' nak Dios, no Me galo laka nguruban par dubta', nes le' Me mandad lo rë rey yizhyuo, wanei choi. Nazhi' Jesukrist be, no kun ren che'n Me mitsumbe Me be lo rë kwa'n nzë'b xki be. ⁶ No por Jesukrist, mizhin nak be tu yezh ro; mbaino nu nak be ngulë'i lo Dios, Xuz Jesukrist. ⁷ Rë men ñal di'zh nazhon Jesukrist, porke par dubta' nile' Jesukrist mandad! Sa' gake.

⁷ Biwi' go, lë' Jesukrist yi'd le'n xkao, no rë men ne or yi'd Me. Haxta rë xa' ndid ta' Jesukrist nei; mbaino rë men yizhyuo go'n or ne bixa' Jesukrist; walikai, sa' gake.

⁸ "Na nak nela letr A no letr Z, kwa'n galo no kwa'n lult", nzhab Señor Dios, Dios Me nzho dizde or galo, no nzho Me nal, mbaino yo Me par dubta', tugaka Dios Me nile' mandad lo rë.

⁹ Na Juan, nak da wech go por Jesukrist. Nizakzi da nela go ga' por niziyël da nile' Jesukrist mandad lon, no nixek be lo rë kwa'n nizak be por tutsa nak be kun Jesukrist. Nzon tu plo lë Patmos kwa'n ña'n sao' nitsdo'; re' mixë'l bixa' da por nilun widi'zh che'n Dios por Jesukrist. ¹⁰ Tu zhë che'n Señor, dub nzuxiba lo Dios, lë'chi, ¹¹ dil, mizi da yalnazon che'n Sprit, mbina chi tu xa' dox naye, nela tu trompet ga', ¹¹ ne widi'zh ze' lon:

—Na nak dizde or galo, no or lult, nela nak letr A kun Z. Bikë' lo tu yech rë kwa'n

ganel, no bixë'le lo rë men da xa' nzhin za gagh yezh kwa'n ña'n laz men Asia, rë xa' nzho yezh Efeso, no yezh Smirna, yezh Perge kun yezh Tiatura, no yezh Sardis, mbaino yezh Filadelfia, no yezh Laodicea.

¹² Or miëka par ganen cho kidi'zh lon, unen, nzhin gagh kaneler kwa'n or, ¹³ no sao' za gagh kaneler ze', unen, nzo tu xa' nilu' nela Xga'n Dios, Me nu nak tu men yizhyuo; nak Me tu lad no'l kwa'n nizhin haxta xan ni' Me, no nazi' tu sinch or laz Me. ¹⁴ No bëo laka yich yek Me, nela xi'l ga', mbaino zalo Me nilu' nela tu bël ga'; ¹⁵ ñë'd ni' Me maska ñaz bël nela kwa'n lë brons ga' or nzhoi lo ki, no naye ñen chi Me nela or nzhas nits ga'; ¹⁶ kun ya' Me lad direch nzen Me gagh mbël yibë'; no ro' Me nguro' tu spad kwa'n nzho lo rop lad; mbaino lo Me nilu' nela ngubizh ga' or nizini ngubizh nayi'.

¹⁷ Or unen Me, ngwachin da xan ni' Me nela tu men ngut ga', orze' mixo'b Me ya' Me lad direch yeka no ne Me:

—Nazhebtal; Na Me nzho dizde or galo, no Me yo par dubta'. ¹⁸ Na Me kinu yalnaban; ngut Da per nguruban Da; no nal, naban Da par dubta', mbaino kinun yalnazon par xala plo nzho rë men ngut, nes len ruban bixa' par dubta'. ¹⁹ Nal bizobni' rë kwa'n unel, rë kwa'n kiyak nal, mbaino rë kwa'n laore gak. ²⁰ Lë'da ni lol kwan gab gagh mbël yibë' kwa'n unel, kwa'n nzho ya'n lad direch, mbaino kwan nak za gagh kaneler kwa'n or ze'. Rë mbël ze' nak rë ganj che'n Dios, xa' nikina rë men da, xa' nzho rë yezh ze'; no rë kaneler or ba' nak rë men da xa' nzhin lo rë yezh ska ze'.

2

Widi'zh re' nzha par rë men che'n Jesukrist xa' nzho yezh Efeso

¹ Orze' ne Me:

—Bizobni' widi'zh re' no bixë'le lo ganj, xa' nikina rë men da, rë xa' nzho yezh Efeso: "Se' ne Me nzen za gagh mbël yibë' kun ya' Me lad direch, no Me nikizë sao' za gagh kaneler or: ² Rë kwa'n nile'l nanen, haxta rë zhi'n vid nile'l por Da nanen; mbaino nane ska dox nixekal or nizakzil por nakal men da, no gat nila'tal ño rë men nakap kun lu. Nguzenbe'l rë xa' (miwi'l xmod nak rë xa') nidi'zh mis lë' nak apost, mbaino unel, ka mbël bixa'. ³ Mbaino se'gaka ñilal xti'zha, nixekal lo rë kwa'n nizakal por nakal men da, no gat ñot ñazhal. ⁴ Per kwa'n niyi' Da nakal, gat nazhi'tra'l Da nela or galo. ⁵ Nal bitsila kwan mile' ngwachinal, no bila' kwa'n nakal lo Dios; bile' ska xtu wëlt nela rë kwa'n mile'l or galo; no chi lë'l nagon yubre'l lo Dios, orze' lë' Da yal, kubchin kaneler che'nal plo nzoi. ⁶ Per nzho tu kwa'n wen nile'l: Niyi'l ninel rë kwa'n nile'

rë men nikolaíta, nela da ga' niyi' da ninene.
 7 Rë xa' nizob nzha kure', gon xa' kwa'n
 nzhab Sprit che'n Dios lo rè men da, no
 rè xa' nayot la' yila Da, zan xlë kwa'n nikë
 lo ya kwa'n kinu yalnaban par dubta', gao
 bixa', ya kwa'n nzo le'n jardín yibë' plo nzho
 Dios."

*Widi'zh re' nzha par rè men che'n Je-
 sukrist xa' nzho yezh Smirna*

⁸ Orze' ne Me lon:

—Bizobni' widi'zh re' no bixë'le lo ganj
 xa' nikina rè men da xa' nzho yezh Smirna:
 "Kure' ne Me nzho dizde or galo laka no
 nzho Me par dubta'; Me ngut per nguruban
 ska Me: ⁹ Na nane rè kwa'n nile'l; niwi'n
 xmod nizakzil por nakal men da, no nanen,
 ter yent kwan kinul yizhyuo re', per kun
 Dios dox rrikal; mbaino nanen dox nakap
 nidi'zh bixa' lol, rè xa' nzhab nak bixa' men
 Israel, per gat walite; men che'n Mizhab
 bixa' namás. ¹⁰ Nazhebtal por yalzi kwa'n
 la' Dios zakal, porke lë' Mizhab ko pla go
 lizhyi'b par zenbe' xa' go, nabei chi walika
 ñila go xti'zha; no chi' ngubizh di' yalzi
 kwa'n zak go re', per wen guzo go lo Dios,
 ter gat go por nak go men da, nes na ne
 yalnaban kwa'n di' par dubta' ka'o, nela tu
 koron ga'. ¹¹ Rë xa' nizob nzha kure', gon
 bixa' kwa'n nzhab Sprit che'n Dios lo rè men
 da: rè xa' se'gaka yila Da dub nizak bixa'
 tu kwa'n, yent kwan zak bixa' lo xtu yalgut
 kwa'n di' par dubta'."

*Widi'zh re' nzha par rè men che'n Je-
 sukrist xa' nzho yezh Perge*

¹² Orze' ne Me lon:

—Bizobni' widi'zh re' no bixë'le lo ganj xa'
 nikina rè men da, rè xa' nzho yezh Pérgamo:
 "Na Me kinu spad kwa'n nzho lo rop lad, nin
 widi'zh re': ¹³ Na nane, ter nzhol yezh plo
 nile' Mizhab mandad, per nzhonra'l ro'n,
 no ni le'n rè zhë kwa'n mbit men Antipas,
 xa' midi'zh xti'zha dox wen lo rè men, yezh
 plo nzho Mizhab, nangayot ngala'l ngayilal
 Da. ¹⁴ Per nzho pla kwa'n niyi' Da nakal:
 Kinul pla rè xa' nile' kwa'n nzhak Balaam,
 xa' mitse'd rey Balac par miki'l Balac nayax
 men Israel, ndao bixa' kwa'n miza' men
 par gon lo rè winab, no nugenen bixa' tu-xtu
 una'. ¹⁵ Mbaino nu kinul pla rè xa' se'gaka
 nile' nela rè men nikolaíta, no niyi' da ninen
 kwa'n nile' bixa'. ¹⁶ Kuze', bila' rè kwa'n
 nakal lo Dios, no chi nagonle, orze' nayan
 laka yala lol par dila kun lë' bixa' kun spad
 kwa'n niro' ro'n. ¹⁷ Rë xa' nizob nzha kure',
 naki'n gon bixa' rè kwa'n nzhab Sprit che'n
 Dios lo rè men da, no rè xa' nayot la' yila Da,
 lë' Da za maná kwa'n nzhuka'ch gao bixa',
 mbaino nu tu ke win kwa'n bëo laka, zan ka'
 bixa', lo ze' nikë lë' kub xa', no yent cho libe'i,
 nab tsa xa' ka'i gak libe'i."

*Widi'zh re' nzha par rè men che'n Je-
 sukrist xa' nzho yezh Tiatira*

¹⁸ No ne Me:

—Widi'zh re' bizobni' mbaino bixë'le lo
 ganj xa' nikina rè men da xa' nzho yezh
 Tiatira: "Kure' ne Xga'n Dios Me kinu zalo
 nela bèl ga', mbaino Me nilu' ni' nela brons
 kwa'n ña'zbël ga': ¹⁹ Rë kwa'n nile'l nanen;
 nanen kinul yalnazhi' por rè wechal, no
 ñilal xti'zha, no rè zhi'n nazhon kwa'n nile'l
 por da, mbaino nixekal nizakzil por Da; no
 haxta más zhi'n nazhon nile'l nal re' ke or
 galo. ²⁰ Per kwa'n niyi' Da nile'l, gat ñat
 laxto'l ter nzho Jesabel xid go, una' kwa'n
 mis lë' nidi'zh nak xa' nidi'zh por Dios, per
 por kwa'n nilu' xa', niki'l xa' rè men da
 par nzha' bixa' kun xa' gat lë't tsa' bixa',
 mbaino nzhao bixa' kwa'n niza' men gon lo
 rè winab. ²¹ Mizan tiemp par ngala' una' rè
 kwa'n gat lë't nak una', per nangont una'i.
²² Kuze', lë' Da le dox gakne una', no rè xa'
 mitse'd xmod una' tutsa zakzin bixa' kun lë'
 una' chi nala' bixa' rè mod kwa'n mitse'd
 bixa'. ²³ Mbaino len, gat rè xmë'd una', par
 ne rè men da, wenawan nanen rè xigab
 nile' men, mbaino kwan rè kwa'n nzhakla
 bixa' le' bixa', no tuga' go nen kwa'n ñal ka'
 go dike kwa'n mile' go. ²⁴ Per más go xa'
 nzho yezh Tiatira, rè go xa' nangatse'd rè
 kwa'n milu' Jesabel, no ni nangatse'd go rè
 kwa'n nzhab rè men che'n una' nak widi'zh
 naga'ch che'n Mizhab, yentra' kwa'n ka'ba
 lo go par nale' go be's xigab, ²⁵ per wen guzo
 go lo widi'zh che'n Dios kwa'n kinu go haxta
 or yala xtu wëlt, ²⁶ no rè xa' nayot la' yila Da,
 no le'ra' bixa' rè kwa'n nzhaklan dub ban
 bixa', orze' zon bixa' par le' bixa' mandad
 lo rè ben men yizhyuo. ²⁷ Nela xa mizo
 Xuza Da par nilen mandad, se'ska zon bixa'
 par le' bixa' mandad lo rè men nayi'lazh lo
 Dios, nela nile' rè xa' nichao' yëts, nilë' bixa'
 rè yëts nazu't. ²⁸ No nela xa mine' Xuza
 mbël yibë' kan, kwa'n nizini garzi'l laka por
 milen gan lo rè kwa'n gat lë', se'ska zane ka'
 bixa'. ²⁹ Rë xa' nizob nzha kure', naki'n gon
 xa' rè widi'zh kwa'n nzhab Sprit che'n Dios
 lo rè men da."

3

*Widi'zh re' nzha par rè men che'n Je-
 sukrist xa' nzho yezh Sardis*

¹ No ne Me lon:

—Bizobni' widi'zh re' no bixë'le lo ganj
 xa' kicina rè men da, xa' nzho yezh Sardis:
 "Kure' ne Me nile' mandad lo za gazh sprit
 che'n Dios, mbaino lo gazh mbël yibë': Na
 nane rè kwa'n nile'l. Ter nzho'b di'zh, dox
 nzholon ro'n, per gat walite; kuze' nakal
 par Na nela tu men naxiat ga'. ² Nal, bitsila
 plo nzol, no guka'la lo xti'zha kwa'n nzho
 laxto'l, porke unen, yent kwan zu' rè zhi'n
 che'nal lo Dios Da. ³ Bitsila rè widi'zh kwa'n

mitse'dal no rë kwa'n mbinal, mbaino bile'i, no bila' rë kwa'n nakal; per chi natsilal plo nzol, orze' lë' Da yal lol nela tu wa'n ga', or ni xigab nale'tle. ⁴ Per yezh Sardis ba', kinul pla xa' naban nambe lo Dios, nela tu men nzhak lar nambe ga'; no tutsa yo bixa' kun Na, mbaino gak bixa' lar bëo laka por ñal bixa'i. ⁵ Rë xa' se'gaka yila Da dub nizak bixa' tu kwa'n, lë' bixa' gak lar bëo laka, no nayot zhe' lë' bixa' lo yech plo nzobni' lë' rë xa' ban kun Dios par dubta'; mbaino gapa lo Xuza no lo rë ganj che'n Me, rë men re' nak men Da. ⁶ Rë xa' nizob nzha kure', naki'n gon xa' rë widi'zh kwa'n nzhak Sprit che'n Dios lo rë men da."

Widi'zh re' nzha par rë men che'n Jesukrist xa' nzho yezh Filadelfia

⁷ Mbaino ne Me:

—Bizobni' widi'zh re' no bixë'le lo ganj xa' nikina rë men Da xa' nzho yezh Filadelfia: "Kure' ne Me nile' lë'ska lë' kwa'n nzhakla Dios, no Me walika nak Xga'n Dios, no lë' Me kinu liab par le' Me mandad lo rë men che'n Dios, nela ngeh rey Dabi ga' lo rë men Israel; or nixa'l Me tu plo, yent cho le' gan tsao'we, mbaino or nitsao' Mei, yent cho le' gan xa'le: ⁸ Na nane rë kwa'n nile'l. Biwi', lë' Da mixal tu plo dedal, no yent cho le' gan, tsao'we; no ter nzhak más men yent kwan tsakal xid bixa', per Na nane ka, nizobal xti'zha, mbaino nangaka'chtal nakal men da. ⁹ Kuze', lë' rë men che'n Mizhab, rë xa' nidi'zh nak bixa' men Israel per gat walite; len, zuxib bixa', che'ptsä (bi'ch laka) gak bixa' lol, par ne bixa', luse walika nazhi' Diosal. ¹⁰ Por nixekal or nizakzil por ñilal xti'zha, kuze' na zo kun lu or dedal lo yalzi dox kwa'n ne rë men yizhyuo, or zenbe'n bixa' (or wi'n xmod nak bixa'). ¹¹ Nzhazhin gax la yala; se'gaka wayila xti'zha, nes yent cho lat lol kwa'n nazhon kwa'n galal. ¹² Rë xa' se'gaka yila Da, len bixa' nela tu yatso che'n yado' che'n Dios Da, no dubta' yo xa' ze'. Ta' yatso ze' kë'n lë' Dios Da, no lë' Jerusalén yezh kub, kwa'n nzë dizde lo yibë', kwa'n nak che'n Dios Da; mbaino nu kë'n ta' yatso ze' lën kwa'n kub. ¹³ Rë xa' nizob nzha kure', naki'n gon xa' rë widi'zh kwa'n nzhak Sprit che'n Dios lo rë men da."

Widi'zh re' nzha par rë men che'n Jesukrist xa' nzho yezh Laodicea

¹⁴ No ne Me lon:

—Bizobni' widi'zh re' no bixë'le lo ganj xa' nikina rë men Da, rë xa' nzho yezh Laodicea: "Se' ne Me nile' nzhak rë kwa'n mila' Dios di'zh, no Me nilu' lë'ska lë' xmod nak Dios, mbaino por lë' Me ngulo Dios rë kwa'n: ¹⁵ Na nzhakbe' ka xmod nakal; ni gat nayagal, no ni gat nazho'l, jolla' ngakal nayag lo widi'zh che'n Dios o ngakal tu men nazho' por dox nile'l che'n Dios! ¹⁶ Kuze',

por gat naktal ni tube no ni xtube, lë'la nakal tu men wë' nazhë' por wë'tsa nile'l che'n Dios, kuze' lë' Da kutinal tich, nela yalñubre ga'. ¹⁷ No nidi'zhal, lë'l rrik, mbaino dox wen nzhol, yent kwan jwatal, por nanetal dox nalats nabanal, nite'dal yalwin, yent kwan nzhapal, nikal-lol, mbaino milox xabal. ¹⁸ Kuze' kidi'zhnun lu di wen, neka lon guzi' kwa'n viv or, kwa'n ngurube' la lo ki, nes se' gakal walika rrik; mbaino lon guzi' lar bëo laka gakal par natulatra'l por milox xabal, mbaino nen tu kwa'n liyak lol, par gak wi'l, ¹⁹ porke rë men nazhi' Da, nibizhyën yek bixa' or nile' bixa' kwa'n gat lë', no haxta nichëlai tich bixa'; kuze' nin lol, bila' rë kwa'n nakal lo Dios, no kun dub laxto'l bile' rë kwa'n nin. ²⁰ Nal, lë' Da kikwe'zh ro' pwert; no cho gon kibeza no xa'l xa' ro' pwert, orze' lë' Da yo' lizh xa', no tutsa gao no kun lë' xa'. ²¹ Rë xa' nayot la' yila Da, lë' Da zo bixa' par tutsa le' bixa' mandad kun Na; nela Da dubta' ngwayilan Xuza, kuze' tutsa nguzo'ba kun Xuza plo nile' Me mandad. ²² Rë xa' nizob nzha kure', ñal gon xa' rë widi'zh kwa'n nzhak Sprit che'n Dios lo rë men da."

4

Une Juan, mixa'l ro' pwert yibë'

¹ Or milox ngok rë kure', unen, naxa'l tu pwert lo yibë', no mbina chi Me midi'zh lon or galo, ñen nela trompet ga', ne Me lon:

—¡Kili re'!, par lun lol rë kwa'n gak or ded rë kure'!

² Orze' jdi'l, mizi da yalnazhon che'n Sprit, unen, nzo tu yaxil plo nizob Me nile' mandad, mbaino nzob Me loi. ³ No Me nzob ze', nilu' nela tu ke kwa'n ña'zbël kwa'n lë jaspe o nela kwa'n lë cornalina; mbaino naka'n plo nzo yaxil ze' nzo tu biki't kwa'n ña'zbël nela tu ke kwa'n lë esmeralda. ⁴ No nu naka'n ze' nzhin galbitap yaxil plo nizob galbitap xa' nak zhi'n lo Me nzob lo yaxil ro kwa'n nzo sao' ze', nak rë xa' re' lar bëo laka, no yek kad bixa' nzob tu koron or. ⁵ No dizde lo yaxil ro ze', maska nzha' do'zi', no naye nini' nguzi', mbaino mbina más kwa'n; no dilant lo yaxil ro ze' nzobyol gazh mech, tugai nzob yek tuga' ya, kure' nak za gazh sprit che'n Dios. ⁶ No nu nilu' tu kwa'n nela nitsdo' ga', no ñaniy nela tu bidr ga', dilant lo yaxil ze'.

No sao' plo nzo yaxil ro, mbaino ta' yaxil ze' nzo tap ma naban, tuga' ma kad ta', no dub ta' bima kinu ma zalo ma. ⁷ Ma galo nilu' nela tu mbe'zh; no ma mirop, nilu' nela tu ngo'n; ma mion nilu' nela tu men ga', mbaino ma midap nilu' nela tu mitsi ñapep ga'. ⁸ No za dap bima kad ma kinu xo'p xi'l, no dub ta' bima haxta le'n xi'l bima nzob zalo ma; no zhë-yë'le gat ñazhat rë ma re' nidi'zh ma:

Nazhon, nazhon, nazhon nak Señor Dios,
Me nile' mandad rè kwa'n nzho;
Dios Me nzho dizde galo,
Me nzho nal,
mbaino Dios Me yo par dubta'.

⁹No kad or nidi'zh rè ma re' nazhon Dios, no nizuxib bima, mbaino or niza' bima xkix lo Me nzob nile' mandad, Me nzho par dubta',
¹⁰no nu dub galbitap xa' nak zhi'n ze', nizuxib lo Me nzob nile' mandad ze', mbaino nidi'zh bixa' dox nazhon Me nzho par dubta' ze', no kad bixa' nigubi koron che'n bixa' dilant plo nzob Me nile' mandad ze', nzhab bixa':

¹¹O Señor Dios che'n no, nab tsa Lu ñal di'zh men nazhon no zuxib men Lol,
porke Lu nile' mandad lo rè kwa'n nzho,
no nab tsa Lu ngulo rè nak kwa'n nzho nal,
mbaino sa' ngoklal ngok rëi, kuze' nzho rëi.

5

Tu yech naduzh no Me nak Mbëkxi'l che'n Dios

¹Orze' unen lad direch che'n Me nzob lo yaxil ro ze', tu yech naduzh, no rop tiche nikë letr, mbaino nayao'we kun gazh sey,
²no nu unen tu ganj xa' más nile' mandad, naye una'bdi'zh ganj ze', nzhab ganj:

—¿Cho ñal xa'l lo yech re', no chix xa' rè sey kun kwa'n nayao'we?

³Per ni lo yibë', no lo yizhyuo, no ni al yët lo yizhyuo, ni tu bixa' gat ñalt xa'l loi, no ni gat ñalt wi' xa' kwan nzobni' loi. ⁴Orze', dox nzhona por nangazhëlt ni tu xa', xa' ñal ngaxa'l lo yech ze', no ni nangakt ngawi' xa' kwan nzobni' loi, ⁵per midi'zh tu rè xa' nak zhi'n ze' lon, ne xa':

—Nago'ntra'l; lë' Me, Me kwa'n nak nela mbe'zh ga', Me re' nzë ben che'n Judá no ben che'n Dabi, Me mile' gan lo xa' ndil Me kun lë'; kuze', Me re'se ñal xa'l lo yech ba', no gak chix Me za gazh sey kwa'n kinui.

⁶Orze' sao' yaxil ro ze', no lo za dap ma kwa'n nzhin naka'n ze', mbaino sao' plo nzhin rè xa' nak zhi'n ze'; unen nzo Me nak Mbëkxi'l che'n Dios, nilu' laka plo miwe' Me, nela tu mbëkxi'l, ma miza' men gon lo Dios ga'; no kinu Me gazh kach no gazh zalo Me kwa'n nak za gazh sprit che'n Dios kwa'n mixë'l Me dub yizhyuo. ⁷Orze' nguzubi Me nak Mbëkxi'l ze' par nguzen Me yech kwa'n nzho lad direch ya' Me nzob lo yaxil ro ze'.
⁸Or nguzen Mbëkxi'l che'n Dios yech ze', orze' za dap ma kwa'n nzhin ze', no dub galbitap xa' nak zhi'n ze', nguzuxib bixa' lo Mbëkxi'l che'n Dios, no kad bixa' nzen tu arp no tu kop or kwa'n zhëi di ya'l, no ya'l re' nak rè kwa'n nina'b rè men che'n Dios lo Dios, ⁹orze' mikë' bixa' tu kant kub re' kwa'n nzhab:

Luse ñal zen yech re', no chixal rè sey che'ne,

porke ngutal lo krus,
no kun ren che'nal kwa'n miza'l gon lo Dios.
Nguzi'l rè men par gak bixa' men che'n Dios;
rè xa' nzë rè ben men,
no rè xa' nidi'zh rè lo di'zhzë,
mbaino rè xa' nzë rè lo yezh,
no rè lo laz men,

¹⁰no mile'l nak bixa' rey no ngulëi' lo Dios,
mbaino lë' bixa' le' mandad lo rè men yizhyuo.

¹¹Orze' unen, no mbina kidi'zh nayax ganj, rè xa' nzhin naka'n plo nzob Me nile' mandad ze', no plo nzhin dap ma naban ze', mbaino plo nzhin rè xa' nak zhi'n ze'; tanta nayax rè ganj che'n Dios xa' nzhin ze', yent cho gak lab bixa', je'nta' pla miyon nak bixa',
¹²mbaino naye kidi'zh bixa':

Dox ka' ñal Mbëkxi'l che'n Dios,
Me ngut lo krus.

Le' Me mandad,
no gap Me rè kwa'n dox tsak;
no ñal gap Me yalnzhak no rè yalnatsin.
Ñal ka zuxib be lo Me,
par di'zh be, rè yalnazhon kwa'n kinu Me,
no par zilita' za' be xkix lo Me.

¹³Mbaino rè kwa'n ngulo Dios lo yibë' no lo yizhyuo, no rè kwa'n nzhin al yët lo yizhyuo mbaino nitsdo', mbina se' kidi'zh rè kure', lo Me nzob lo yibë', no lo Me nak Mbëkxi'l che'n Dios:

Par dubta' nidi'zh be,
rè men ñal di'zh wen Me,
no más tsak Me lo rè.

Más nazhon Me,
mbaino más nile' Me mandad;
par dubta' le' Me mandad,
no nayot lox le' Me mandad.

¹⁴No dap rè ma naban kwa'n nzhin ze', nzhab:

—Sa' gake.

Mbaino dub galbitap xa' nak zhi'n ze', nguzuxib lo Dios no midi'zh bixa' rè yalnazhon kwa'n kinu Dios.

6

Dub gazh sey

¹Orze' unen, mixa'l Me nak Mbëkxi'l che'n Dios, sey galo laka che'n yech ze', no xid dap ma naban ze', mbina chi tu ma kwa'n ñen nela or nini' nguzi' ga', ne ma:

—¡Dë'!

²Orze' unen tu kabai naguzh; no xa' nzob tich ma nzen tu ark kun pla waz, no miza' Dios tu koron nka' xa' par mile' xa' gan, no par le'ra' xa' gan lo rè men yizhyuo.

³Or mixa'l Mbëkxi'l che'n Dios sey mirop, mbina ne ma rop:

—¡Dë'!

⁴Orze' nguro' xtu kabai, ma nilu' naxne, no xa' nzob tich ma nile' par nakwintra' rè men yizhyuo wen, mbaino par gut men tu

men kun xtu men; no miza' Dios tu spad ro ka' xa'.

⁵ Or mixa'l Mbëkxi'l che'n Dios sey mion, mbina ne ma yon:

—jDë'!

Orze' unen tu kabai nagats, no xa' nzob tich ma nzen tu balans, ⁶ no sao' dap rë ma nzhin ze', mbina chi tu xa' kwa'n ne:

—Nabtsa tu kil nzhob, o chon kil sebad le' men gan por tu ngubizh zhi'n, per nagaltal aseit no vin.

⁷ No or mixa'l Mbëkxi'l che'n Dios sey midap, mbina ne ma midap:

—jDë'!

⁸ Orze' unen tu kabai migach ngut, no xa' nzob tich ma lë La Mwert; tich La Mwert nzhakë xa' nile' mandad gabil, no mila' Dios gut La Mwert tu kwart part men yizhyuo; nzho xa' gat kun spad, kun yalwin, kun yalyizh, mbaino kun rë ma xu' nazhe'b kwa'n nzho dan.

⁹ Or mixa'l Mbëkxi'l sey gai', unen xan biko' che'n Dios, nzhin rë alm che'n rë xa' ngut por ñila bixa' Dios por Jesukrist, no nu por milu' bixa' widi'zh che'n Dios lo rë men nela xmod ñalkai. ¹⁰ Naye kibizhië rë xa' nak che'n rë alm re', nzhab bixa':

—O Señor Dios, Me nazhon no Me nile' rë kwa'n nila' di'zh, ¿haxta pok na'bal kwent lo rë men xa' nayi'lazh lol, par kix bixa' rë kwa'n milinu bixa' no?

¹¹ Orze' miza' Dios lar bëo laka ngok bixa', no nzhab Dios, le' bixa' diskans xche'p, haxta lox gat más rë wech bixa' xa' nilu' widi'zh che'n Dios por Jesukrist, nela lë' bixa'.

¹² No or mixa'l Mbëkxi'l che'n Dios sey xo'p, orze' miwin tu xo kwa'n dox kwa'ro, no za' laka milu' ngubizh, nela tu lar nagats ga', mbaino lë' mbëo' milu' nela ren ga'; ¹³ no ngob rë mbël lo yibë', nela or nigab tu mbi ro rë nzhao' ye'n che'n tu ya nzhao' ga'; ¹⁴ no mibil yibë', orze' miduzhe nela tu yech ga', no rë yi' kun rë yuo kwa'n nzhin sao' nitsdo', ñai xtu plo; ¹⁵ no rë men yizhyuo, dizde rë rey kun rë melizh rey, no rë xa' nile' mandad lo nayax sondad, rë xa' rrik, kun rë xa' naye mandad che'n; haxta rë xa' nak mos mido mbaino kun más rë xa' se'ga; rë men re' nguiuka'ch le'n rë ye'r ke, no le'n rë yi' plo gak yiuka'ch men, ¹⁶ nzhab bixa' lo rë yi' no lo rë ke ro:

—Gob go yek no, par koka'ch go no lo Me nzob nile' mandad lo yibë', mbaino lo yal-niyi'xian che'n Mbëkxi'l che'n Dios, ¹⁷ porke mizhin la zhë nazhe'b kwa'n zakzi Me be, ¿no cho xek loi?

7

Dios kina rë men che'n Me

¹ Or milox unen rë kure', unen, nzo tap ganj che'n Dios, lo za dap xi' yizhyuo, kikwë'z bixa' rë mbi par nazoi kwa'n dox yizhyuo, ni lo nitsdo', mbaino ni lo rë ya; ² no nu unen, xtu ganj che'n Dios, xa' nzë al nez plo nilen ngubizh, nzen ganj sey che'n Dios Me kinu yalnaban par dubta'; naye midi'zh ganj re' lo za dap ganj, rë xa' mika'b Dios lo, par zakzi bixa' kun mbi rë kwa'n nzho lo yuo no rë kwa'n nzho le'n nitsdo', nzhab ganj:

³ —Gulëz go haxta kë' no tu sey loxchuzh rë xa' nak men che'n Dios; orze'se, gak zakzi go rë kwa'n nzho lo yuo, no le'n nitsdo', mbaino rë ya.

⁴ No mbina, pla rë xa' nkë sey loxchuzh, nak bixa' tu gayo' nzho cho' bitap mil men, xa' nzë xid rë ben men Israel. ⁵ Xid rë ben che'n Judá, ngule Dios tu dusen mil men; xid rë ben che'n Rubén ngule Dios xtu dusen mil men; no xid rë ben che'n Gad ngule Dios xtu dusen mil men; ⁶ xid rë ben che'n Aser ngule Dios tu dusen mil ska men; no xid rë ben che'n Neftalí se'ska; ⁷ xid rë ben che'n Simeón se'ga; no xid rë ben che'n Manasés ngule Dios xtu tu dusen mil men; mbaino xid rë ben che'n Leví ngule Dios tu dusen mil ska men; no xid rë ben che'n Isacar se'ska; ⁸ no xid rë ben che'n Zabulón tu dusen mil ska men; no xid rë ben che'n Che se'ska; mbaino xid rë ben che'n Benjamín se'ga'.

Dox nayax men nak lar bëo laka

⁹ No or milox kure', unen tu béd men, yent cho gak lab bixa', rë xa' re' nzë rë lazhen, rë ben men no rë lo di'zhzë nidi'zh bixa'. Nzhin bixa' dilant plo nzob Me nile' mandad no lo Me nak Mbëkxi'l che'n Dios, nak bixa' lar bëo laka, no nzho tu la yayin ya' bixa', ¹⁰ no rë bixa' kidi'zh naye:

O Dios, Me nzob lo yaxil ro lo yibë',

mbaino Go Me nak Mbëkxi'l che'n Dios.

Nabtsa por Go nguro' no lo rë kwa'n nazhe'b kwa'n nguzak no.

¹¹ No rë ganj xa' nzhin naka'n plo nzob Me nile' mandad, no plo nzob rë xa' nak zhi'n ze', mbaino plo nzhin dap rë ma naban ze'; nguzuxib rë ganj re' lo Dios, haxta ngol loxchuzh bixa' lo yuo, ¹² nzhab bixa':

Sa' gake; nab tsa lo Dios che'n be ñal di'zh men nazhon;

nabtsa lë' Me nzhak rë kwa'n, no nab tsa lo Me ñal za' men xkix, mbaino lë'gaka Me más tsak.

Tugaka lë' Me nile' mandad lo rë.

Sa' gake, par dubta'.

¹³ Orze' nguna'bdi'zh tu rë xa' nak zhi'n ze' lon, ne xa':

—¿Cho rë xa' nak lar bëo laka re', no plo nzë bixa'?

¹⁴ Orze' nzhapa:

—Lè'ò nane ka choi.

Orze' ne xa':

—Rè men re', rè xa' mile' gan lo rè yalzi, nal mièt xab bixa', no mia'ne bèo laka por ren che'n Mbèkxi'l che'n Dios. ¹⁵ Kuze', nzhin bixa' naka'n plo nzo yaxil ro plo nizob Dios; no zhèy-yè'le nile' bixa' zhi'n nazhon le'n yado' che'n Dios, par nikina Dios bixa'. ¹⁶ Nayotra' zakzi bixa' por yalnila'n, ni por yalnuzei', no ni nazè'kra' ngubizh bixa', mbaino ni xtu kwa'n nazho' zakzit bixa', ¹⁷ porke lè' Mbèkxi'l che'n Dios Me nzob sao' che'n yaxil ro lo yibè', lè' Me nak Me nikina bixa', nela tu baxtor ga', no wei' Me bixa' plo nilèn nits kwa'n nile' ban men par dubta', no tsiyal Dios laxto' bixa' par nayotra' go'n bixa'.

8

Sey gazh

¹ Or mixa'l Mbèkxi'l che'n Dios sey gazh, pas garol or, xe mia'n dub lo yibè', ² orze' unen, za gazh ganj nizo lo Dios, no tuga' bixa' nka' tu trompet, ³ orze' mizhin xtu ganj kun tu bixki or, no nguzo xa' lo biko', no nguzen xa' nayax ya'l par lazhya'l xa' lo biko' or che'n Dios kwa'n nzob dilant plo nizob Dios, no migoch xa' ya'l kun rè widi'zh kwa'n nina'b rè men che'n Dios lo Dios, ⁴ no le'n bixki kwa'n nzho ya' ganj ze' nguro' zhen ya'l, nkiliy lo Dios tutsa kun rè widi'zh kwa'n nina'b rè men che'n Dios lo Dios, ⁵ orze' nguzen ganj ze' bixki, no michizhè xa'i kun ki che'n biko', mbaino ngulubi xa'i yizhyuo; orze' ngoch nguzi', no mien chi nayax men, no maska nzha' do' zi', mbaino miwin tu xo kwa'n dox kwa'ro.

Za gazh trompet

⁶ No nzo la za gazh ganj che'n Dios, xa' kinu tuga' trompet, par kwe'zh bixa'i. ⁷ Or mikwe'zh ganj galo laka trompet che'n, orze' ngula yiu ke kun bèl kwa'n noch kun ren lo yizhyuo, no di lo yon part yizhyuo, tlèi' mièk; mbaino di lo yon part rè ya, tu parte mièk; no mièk rè yix nayè'. ⁸ No or mikwe'zh ganj mirop trompet che'n, orze' ngob tu kwa'n nzobyol le'n nitsdo', tu kwa'n nak nela tu yi' ro ga', orze' di lo yon part nitsdo', tlèi' ngok ren; ⁹ no di lo yon part rè ma naban le'n nitsdo', tu part bima ngut; mbaino di lo yon part rè bark kwa'n nikizè lo nitsdo', milox tu parte. ¹⁰ No or mikwe'zh ganj mion trompet che'n, orze' ngob tu mbèl lo yibè' kwa'n nazhe'b kwa'ro, nzobyole nela tu bèl yer ga', no di lo yon part rè you' kwa'n nzho yizhyuo, ngobe lo tu part you'; mbaino di lo yon part rè plo nilen nits, lo tu parte ngob kure'. ¹¹ Mbèl rè lè Ajenjo; no di lo yon part rè you' mbaino plo nilen nits kwa'n nzho men, tu parte nguio nits nala; no por kure', dox men ngut. ¹² No or

mikwe'zh ganj midap trompet che'n, orze' di lo chon part nak ngubizh, tu parte ngok nakao, no se'ga' ngok kun mbè'o'; mbaino se'ga' ngok kun rè mbèl kwa'n nzhi'b lo yibè'; kuze', di lo chon part nak biani che'n dub zhè, tu parte ngok nakao, no se'ga' ngok kun yè'l, ¹³ orze' miwi'n al ya, no mbina chi tu mitsi ñapep ma lo yibè', no nzhab ma:

—iAy, ay, ay! jDox nalats zak rè men yizhyuo or kwezh zixchon trompet che'n zixchon ganj xa' jwalt kwe'zh trompet!

9

¹ Or mikwe'zh ganj gai', trompet che'n, orze' unen ngob tu mbèl lo yibè' haxta lo yuo; no tu xa' miza' liab kwa'n nayao' ro' zo che'n gabil, nka' mbèl re'; ² orze' mixa'l mbèl ro' zo che'n gabil, no nguro' zhen le'ne, nela le'n tu gor ro ga', mbaino mikao lo ngubizh por dox zhen; ³ no le'n zhen ze' nguro' tu bèd ma kwa'n lè langost, ngwazhè lo yuo di lè' ma, no nu mila' Dios gak kè' mai ta' men, nela rè nixguy kwa'n nzho yizhyuo ga'. ⁴ No nzhab Dios lo bima, yent kwan le' bima kun rè yixyè', no ni kun rè ya kwa'n nzhi'b lo yizhyuo; nab tsa gak zakzi ma rè xa' gat nikèt señ che'n Dios loxchuzh. ⁵ Per nangalat Dios gut ma men, nab tsa mila' Me zakzi ma men dub gai' mbè'o'; no yalne che'n ma nak nela yalne che'n tu nixguy ga', or nikè' mai ta' men. ⁶ No le'n rè zhè ze', gakla men gat men por dox yalne, per nayazhèlt bixa' mod gat bixa'.

⁷ Lè' rè langost ze' nilu' nela kabai ga', kwa'n nzo la par dil ma lo tu yèr; no yek ma nzob, chigab tu koron gor, mbaino nzhak lo ma nela lo men ga'. ⁸ No yichyek ma nak nela yichyek una' ga', mbaino lèi ma nak nela lèi mbe'zh ga'. ⁹ Dub ma nayao' kun tu kwa'n nela yi'b ga', no nibezh xi'l ma nela rruid che'n rè karret kwa'n nibe kabai lo yèr; ¹⁰ no kol che'n ma nak nela kol che'n nixguy ga', mbaino mila' Dios zakzi ma men dub gai' mbè'o' kun xku'nch ma. ¹¹ Xa' nile' mandad lo rè langost ze', no ska lo zo che'n gabil nile' xa' mandad; kun widi'zh hebreo, lè' xa' lè Abadón, mbaino kun widi'zh grieg, lè' xa' lè Apolión.

¹² Uded la yalzi galo, per nzè xchope.

¹³ Or mikwe'zh ganj xa' nak xo'p, trompet che'n, mbina tu widi'zh xid za dap kach che'n biko' kwa'n nakxao' kun viv gor, kwa'n nzob lo Dios, ¹⁴ nzhab widi'zh ze' lo ganj xa' nak xo'p, xa' kinu trompet ze':

—Bixèk za dap ganj xa' nali'b ro' you' ro kwa'n lè Eufrates.

¹⁵ Orze' mixèk za dap ganj ze', par gut bixa' tu part men yizhyuo, orze' ya'n naban xchoptsa part men yizhyuo; nab tsa par or ze', zhè ze', mbè'o' ze', no li'n ze', mizo Dios za dap xa' re', ¹⁶ no nu mbina, chop gayo' miyon sondad nzob tich kabai. ¹⁷ Sa' ngok

xmod ngurulo rë kabai lon; no rë xa' nzob tich ma, nayao' laz bixa' kun yi'b naxne nela bël ga', no asule nela violet, mbaino xinbëowe nela asufr, no nela yek mbe'zh ga' nak yek rë kabai, mbaino niro' bël ro' bima kun zhen no kun asufr. ¹⁸ Ngut tu part rë men yizhyuo por rë kwa'n niro' ro' rë kabai ze': bël, no zhen, mbaino asufr; mia'n xchoptsa part men naban. ¹⁹ No gat nabt kun ro' rë kabai ze' gak zakzi ma men; nu ska kun xkol bima kwa'n nak nela mbë'l naye' ga', nizakzi bima men.

²⁰ No rë xa' mile' gan lo rë yalzi re', ni sa' nangala't bixa' rë kwa'n gat lë' nak bixa'; no ni nangala' bixa' nizuxib bixa' lo rë mbi mal, no lo rë winab che'n bixa' kwa'n nakxao' kun or, no kun plat, mbaino kun brons, kun ke no kun ya; rë kwa'n nagakt wi', no ni nagak gone, mbaino ni nagakt zëi. ²¹ No ni nangala' rë men re' xmod bixa' nzhut bixa' men, ni rë yalbruj kwa'n nzhak bixa', mbaino ni nangala' bixa' ban bixa' kun men gat lë' tsa' bixa', no se'gaka niliwa'n bixa'.

10

Ganj mbaino libr kwa'n nzen xa' lad direch

¹ Orze' unen xtu ganj xa' más nile' mandad, nzho xa' le'n tu xkao, ngula xa' lo yibë', nu nzë'b tu biki't yek xa'; no ña'zbel lo xa' nela lo ngubizh ga', no rop ni' xa' nilu' nela pilar bël. ² No nzen ganj ze' tu libr win kwa'n naxa'l lo, no ni' xa' lad direch mizo xa' lo nitsdo', lë' xtu lad mizo xa' lo yuo, ³ naye nguruzhië ganj ze' nela nibizhyë tu mbe'zh ga', orze' naye mikab gahz nguzi'. ⁴ Or milox mien rë nguzi' ze', ngoklan ngakë'ne lo yech, per tuli ka mbina tu widi'zh dizde lo yibë':

—Le'n laxto'l guluchao' rë kwa'n midizh za gahz nguzi', nazobni'tle lo yech.

⁵ Orze', lë' ganj xa' nzo ni' lo nitsdo' no xtu lad lo yuo, ngulits xa' ya' xa' lad direch lo yibë', ⁶ naye midizh xa' lo Dios Me kinu yalnaban par dubta', Me ngulo yizhyuo no yibë', mbaino nitsdo', no rë kwa'n nzhin loi, nzhab ganj:

—Nalë'tra'; mizhin gax la lo'x Dios rë kwa'n nzhakla Me, ⁷ porke or zhin zhë kwe'zh ganj gahz, trompet che'n, orze' lox gak rë widi'zh naga'ch che'n Dios, kwa'n midizh Dios por rë xa' midizh por lë Dios, dizde nzhala.

⁸ Orze' widi'zh kwa'n mbina galo lo yibë', midizh Me xtu wëlt, ne Me:

—Wa par zenal libr win kwa'n naxa'l lo, kwa'n nzen ganj ba', xa' nzo lo nitsdo' no lo yuo.

⁹ Orze' ngwan lo ganj par una'ba libr win ze', no ne xa' lon:

—Mbai; guzen libr win re' no gudaowe. Le'n ro'l, lë'l zi naxe nela mizhin ga'; per le'n laxto'l, lë'l zi nalai.

¹⁰ Orze', nguzenne ya' ganj, no or ndaune, nax nida'we le'n ro'n nela mizhin ga'; per or milox ndaune, nala mile'i laxto'n, ¹¹ orze' ne xa' lon:

—Nal re', naki'n di'zhal por Dios xtu wëlt lo nayax lazh men, mbaino lo nayax ben men, no nu lo rë men nidi'zh xa'la di'zhzë, haxta nu lo rë rey, nes par gon bixa' cho xigab nile' Dios kun lë' bixa'.

11

Kwent che'n rop miyi' xa' midizh por Dios

¹ Orze' mine' bixa' tu bar nkan kwa'n nak nela tu nit ga', no ne bixa' lon:

—Bikë'la par wache'x yado' no biko' che'n Dios, mbaino bilab pla men nizuxib lo Dios. ² Per nache'xtal lo luwe che'n men gat lë't men che'n Dios, porke lë'i nka' rë xa' gat lë't men Israel, xa' yo lo yezh nazhon dub cho' bichop mbë'o', ³ no na xë'l chop miyi' xa' nak lar kwa'n nzhak men or niwin laxto' men, par di'zh rë xa' re' por da, dub tu mil nzho chop gayo' nzho chon gal ngubizh.

⁴ Rop men re' nak rop ya olib no rop kandelar kwa'n nzo lo Dios, Me nile' mandad yizhyuo, ⁵ no chi cho gakla zakzi rop miyi' re', orze' lë' bël ro', ro' bimiyi' par zë'k bixa' rë xa' nikwa'n dil kun lë' bixa'; no se' naki'n gak wane'i kun cho xa' gakla, zakzi bixa'. ⁶ No mile' Dios mandad rop men re' par tsao' bixa' lo yibë', nes nalatra' yiu rë zhë kwa'n nilu' bixa' widi'zh che'n Dios, no nu mile' Dios mandad par le' bixa' gak nits ren, mbaino par le' bixa', zakzi rë men yizhyuo kun rë lo yalzi, rë or nzhakla bixa'. ⁷ No or lox di'zh bixa' rë kwa'n nzhakla Dios di'zh bixa', orze' lë' ma nazhe'b xu' kwa'ro, ro', ro' zo che'n gabil, dil ma kun rop xa' re', no gut ma bixa'. ⁸ Orze' ya'n kwerp che'n rop men re' le'n nez yezh ro plo nkë Señor Jesukrist lo krus, yezh kwa'n zak Dios nak nela Sodoma mbaino Egipto. ⁹ Dub chon ngubizh garol, lo rë yezh no rë lo ben men, no rë men nidi'zh rë lo di'zhzë, mbaino rë lo lazh men; lë' bixa' ne kwerp che'n rop men ngut re', no nala't bixa' ga'che. ¹⁰ Rë xa' nzhin yizhyuo, dox nizak laxto' bixa' por ngut rop miyi' re', haxta za' bixa' rregal, ka' guchin bixa', porke dox mizakzi rop miyi' re', bixa'. ¹¹ No or nguded chon ngubizh garol, orze' mile' Dios, nguruban rop miyi' ze', nguzuli bixa' xtu wëlt, no dox mizheb rë xa' une kure'. ¹² Orze', rop miyi' ze' mbin tu widi'zh naye kwa'n nzë lo yibë', se' nzhabe:

—iKili go re'!

No nkili rop miyi' ze' lo yibë' le'n xkao dub kiwi' rë xa' nikwa'n dil kun lë' bixa', ¹³ lë'chi

miwin tu xo ro, di lo chi' yo' michile tu yo'; mbaino ngut gazh mil men yezh ze', no rë xa' mile' gan, dub nizheb bixa', nguzublo bixa' midizh bixa' nazhon Dios, Me nzho lo yibë'.

¹⁴ Se' nded mirop yalzi, per kwa'n yon nayen laka zhin.

Trompet gazh

¹⁵ Or mikwe'zh ganj gazh, trompet che'n, orze' naye mien nayax widizh lo yibë', kwa'n nzhab:

Mizhin la, le' Dios mandad, kun Señor Jesukrist, lo yizhyuo, no par dubta' le' Dios mandad.

¹⁶ No dub galbitap rë xa' nak zhi'n, xa' nzob lo Dios, nguzuxib bixa', haxta lo yuo ngol lo bixa', no midizh bixa', tugaka Dios nazhon.

¹⁷ Se' nzhab bixa':

Nine' no xkix Lo Go Señor Dios, Me nile' mandad lo rë kwa'n nzho. Go nak Dios nal,

no Go nak Dios dizde nzhalá,

no nak Go Dios par dubta'.

No nal milu' Go, Go gaka más nile' mandad, mbaino nguzublo Go kile' Go mandad dub yizhyuo.

¹⁸ Miyi'xian rë men yizhyuo kun Go, per mizhin la zhë, zakzi Go bixa', no le' Go yalgustis kun rë men ngut, no za' Go kwa'n wen ka' rë men che'n Go, xa' midizh por Go, no xa' ñila widizh che'n Go,

mbaino rë xa' nizuxib lo Go, rë xa' tsak, o rë xa' yent kwa'n tsak.

Per lo'x Go rë xa' nizakzi rë men yizhyuo.

¹⁹ Orze' mixa'l yado' che'n Dios kwa'n nzob lo yibë', no le'n yado' ze' unen, nax yin plo nzho ke kwa'n nzobni' rë widizh kwa'n mila' Dios dizh par rë men Israel; no maska nzha' do'zi' ze', mbaino mien widizh no nzhach nguzi', no miwin tu xo ro, mbaino ngula tu yiu ke dox kwa'n ro lo yizhyuo.

12

Tu una' mbaino tu ma ro, lë dragón

¹ Orze' nguruxo'b tu señ ro lo yibë': Unen tu una' nak tu vestid nela ngubizh ga', mbaino xan ni' una' nak nela mbë'o' ga', ñë'd yek xa' nzob tu koron kwa'n nakxao' kun tu dusen mbël lo yibë'. ² Nak xin una' re', no nibizhyë una' lo yalne par gal xin una', dox kizakzi yalne re' una'. ³ Orze' nguruxo'b xtu señ lo yibë': nguro' tu ma ro lë dragón mbaino naxne ma, kinu ma gazh yek ma, chi' xkach ma, no kad yek ma nzob tu koron. ⁴ No kun xkol ma migab ma lo yizhyuo, tu part mbël kwa'n nzhi'b lo yibë', mia'n xchoptsa part mbël lo yibë'. No nguzo ma lo una' gal xin re', par gao ma xmë'd una' dike or gal më'd. ⁵ Orze' ngol xin una' tu më'd miyi', no dox gak më'd tu men

nzhak par le' mandad lo rë men yizhyuo, no nalast laxto' xa' lo'x xa' rë men nikwa'n dil kun lë' xa'; per lwegá' nguiubchi xga'n una' yizhyuo, ña xga'n una' lo yibë', plo nile' Dios mandad, ⁶ orze' mikë' una' karre le'n yuo bizh, tu plo mizuxkwa' Dios kwëz una', plo nzho xa' miza' kwa'n ndao una', dub tu mil nzho chop gayo' nzho chon gal ngubizh.

⁷ Orze' nguio tu yër lo yibë'; tu rë ganj che'n Dios xa' lë Miguel, no kun rë ganj che'n ganj re', ndil bixa' kun ma lë dragón re'. Lë' ma lë dragón kun rë ganj che'n ma, ngokla ma ngale' ma gan lo Miguel kun rë ganj che'n, ⁸ per nangale't ma gan, no nangayotra' plo yo ma lo yibë' kun rë ganj che'n ma. ⁹ Sa' ngurotin ma lë dragón, ma kwa'n nak mbë'l tiemp, xa' lë Mizhab no Satanás; no nikide ma rë men yizhyuo, lë' ma no rë ganj che'n ma nguiubi ma yizhyuo. ¹⁰ Orze' mbina tu widizh lo yibë' kwa'n nzhab:

Lë' or mizhin la,

par ko' Dios rë men che'n Me lo rë kwa'n nazhe'b kwa'n kizak bixa',

mbaino par lu' Me, tugaka Me nile' mandad, no nu par le' Me nak Krist Me nile' mandad dub yizhyuo,

porke ngurutin la xa' nikë' kixu' rë wech be lo Dios, zhëy-yë'le.

¹¹ Por ren che'n Mbëkxi'l che'n Dios,

mile' rë wech be gan lo Mizhab,

mbaino por se'gaka ñila bixa' widizh che'n Dios.

Nangazhebt bixa' ter ngat bixa' por ñila bixa' widizh re',

¹² kuze', jbizak laxto' gol, rë go xa' nzho lo yibë'.

Per, jzhe'b nalats nzha rë go,

xa' nzhin lo yizhyuo no nu lo nitsdo'!

porke lë' Mizhab ngula yizhyuo dub xian xa',

porke nane xa', ka xche'p zakzi xa' go.

¹³ Or une ma re', lë' rë ganj che'n Dios ngulubi ma lo yizhyuo, orze' nguro'kë ma tich una' ngop më'd miyi' ze', ¹⁴ orze' miza' Dios chop xi'l ro una' ze', nela xi'l mitsi ga', par gak pep una', no zhin una' le'n yuo bizh, plo ya'n zit lo ma xu' nazhe'b kwa'n nak nela tu mbë'l ga', no plo nzho xa' za' kwa'n gao una' dub chon li'n garol, ¹⁵ orze' nayax nits ngulo' mbë'l ro' ma, nela tu you' ga' mixo mai tich una', par wei'ye una', ¹⁶ per ngoknu yuo una', porke ngu' yuo rë nits kwa'n nguro' ro' ma re' nela tu you' ga' tich una', ¹⁷ orze' dox miyi'xian ma re' kun lë' una', no ngwatil ma kun rë xa' mia'n, xa' nzë ben che'n una' re', rë xa' nzhon ro' Dios no nilu' bixa' widizh che'n Jesukrist lo más rë men.

13

Chop ma xu' nazhe'b

¹ Orze' unen nguro' tu ma ro le'n nitsdo', kwa'n kinu chi' xkach, mbaino gazh yek ma, no kad xkach ma nzob tu koron, no za gazh yek ma nzobni' rē widi'zh dox nayi' par Dios. ² No ma ro kwa'n unen re', nilu' nela tu leopardo, no ni' ma nak nela ni' os ga', mbaino ro' ma nak nela ro' mbe'zh ga'. Orze' mizo ma lē dragón re' ma re' par le' ma mandad. ³ Orze' unen, nawe' tu rē yek ma re', haxta nilu' ngut ma; per miake, orze' rē men yizhyuo mia'n xe por kure', no ngwayila bixa' ma, ngwakē bixa' tich ma, ⁴ no rē men nguzuxib lo ma lē dragón por mizo ma xtu ma le' mandad re', mbaino nu lo ma nile' mandad re' nguzuxib rē men yizhyuo, nzhab bixa':

—Yent cho más nazhon nela ma re', mbaino yent cho le' gan lo ma.

⁵ No mila' Dios, di'zh ma nile' mandad re', rē widi'zh dox ya, mbaino rē widi'zh dox nayi' par Dios, no le' ma mandad dub cho' bichop mbēo'. ⁶ Midi'zh ma rē widi'zh nayi' par Dios, mbaino par yado' che'n Dios, no par rē xa' nzho lo yibē' kun Dios. ⁷ No nu mila' Dios ndil ma kun rē men che'n Dios xa' nzho yizhyuo, haxta mile' ma gan lo bixa'; no nu mila' Dios mile' ma mandad lo rē ben men, no lo rē yezh, no lo rē men rē lo di'zhzē, mbaino lo rē lazh men; ⁸ no lo ma re', naki'n zuxib rē men yizhyuo; rē xa' gat nzobni't lē lo yech plo nzobni' lē rē xa' ban kun Dios par dubta', yech che'n Mbēkxi'l che'n Dios, Me ngut por lē' bixa'; porke ni naga yuxkwa' yizhyuo, lē' lo yech ze' nzobni' la, lē rē xa' gak men che'n Dios.

⁹ Rē xa' nzob nzha, gon xa' kure':

¹⁰ Cho rē men nzo la yaga', lē' xa' yaga' ka; no cho rē xa' nzo la gat kun spad, lē' xa' gat ka kun spad.

Kuze', rē xa' nak men che'n Dios, naki'n xek bixa', mbaino zo bixa' wen lo widi'zh che'n Dios kwa'n ñila bixa'.

¹¹ Orze' unen xtu ma xu' nazhe'b, nguro' ma le'n yuo; nzob chop kach yek ma nela che'n mbēkxi'l ga', per nidi'zh ma nela ma kwa'n lē dragón ze'. ¹² No ter lal nile' ma mandad kun ma nak rey re', per nile' ma mandad che'n ma re', mbaino nile' ma nizuxib rē men yizhyuo lo ma re', ma miwe' yek per miake. ¹³ No nu nile' ma rē kwa'n chigab walika nazhon, haxta nile' ma nila ma ki lo yibē', nzhab lo yuo, nine rē mene. ¹⁴ Kun rē kwa'n chigab walika nazhon re', rē kwa'n nile' ma por ma nak nela rey ze', nikide ma rop re' rē men xa' gat ñilat Dios, haxta mile' ma, michao' rē men tu winab che'n ma nak rey re', ma miwe' yek kun spad per miake. ¹⁵ No mila' Dios, mile' ma rop re' nab winab che'n ma galo ze', par di'zh winab ze', mbaino par le'i mandad gat rē xa' nane zuxib loi; ¹⁶ mbaino nu mile' ma rop re' mandad, kē tu sefi ya' rē men lad

direch o loxchuzh men, ter mē'd win or men ro, no ter men rrike o men probe, no ter men gat nadote o men nak mos mido lo xtu men. ¹⁷ No yent cho gak to ni zi' tu kwa'n chi gat nikē sefi re' xa'; no sefi re' nak lē ma nile' mandad, o numr che'n lē ma. ¹⁸ Re' naki'n men nzhak no men natsin, wi' xa' cho numr che'n ma kwa'n nile' mandad ze', porke jwals gap tu men numr re': xo'p gayo' nzho chon gal nzho xo'p.

14

Kant che'n tu gayo' nzho cho' bitap mil men

¹ Orze' unen nzo Mbēkxi'l che'n Dios, yek yi' kwa'n lē Sion, kun tu gayo' nzho cho' bitap mil men, loxchuzh bixa' nzobni' lē Mbēkxi'l che'n Dios, no lē Xuz Mbēkxi'l che'n Dios. ² No nu mbina, ngurezh tu kwa'n lo yibē', nzhab nela tu you' ga', o nela or ñen nini' tu nguzi' ga'; no nu ñen rruid ze', nela or nzho'l nayax men arp ga'. ³ Kikē' bixa' tu kant kub dilant plo nzob Me nile' mandad, no lo dap ma naban ze', mbaino nu lo rē xa' nak zhi'n; per yent cho gak tse'd kant ze', nab tsa rē xa' nak tu gayo' nzho cho' bitap mil men nzhab, rē xa' nguzi' Jesukrist kun ren che'n xid rē men yizhyuo. ⁴ Rē xa' re' nak xa' lalta' nangale't kwa'n gat lē' kun rē una', porke kun ni tu una', nanga't bixa' kun lē', no ñakē bixa' tich Mbēkxi'l che'n Dios wanei ploi. Nguzi' Mbēkxi'l che'n Dios rē men re' kun ren che'n Me, no nak bixa' nab tsa par Dios, nela yalgo'n kwa'n galo laka niza' men lo Dios, mbaino lo Mbēkxi'l che'n Dios. ⁵ No ni tu widi'zh mbēl nangaro't ro' bixa', kuze' nak bixa' men namba laxto' lo Dios.

Widi'zh kwa'n milu' chon ganj che'n Dios

⁶ Orze' unen, al ya' ñapep tu ganj che'n Dios, xa' nzhanu widi'zh nazhon che'n Dios, par lu' xa'i lo rē men xa' nzho yizhyuo, no lo rē lazh men, no lo rē xa' nzhu'di'zh rē lo di'zhzē, mbaino lo rē yezh; ⁷ naye midi'zh ganj ze', nzhab xa':

—jBin go ro' Dios, mbaino bidi'zh go tu-gaka Me nazhon!, porke lē' or ngol la, lē' Dios yalgustis lo rē men yizhyuo, kuze' guzuxib go lo Dios Me ngulo yizhyuo, yibē', no nitsdo', mbaino rē nits kwa'n nilen.

⁸ Orze' ñē'dkē xtu ganj tich ganj galo, xa' nzhab se':

—jMilox la, milox la yezh ro kwa'n lē Babilonia!, porke yezh re' mike'd rē kwa'n nakap che'ne lo más rē yezh kwa'n nzhin lo yizhyuo; lē' kwa'n nakap che'n yezh Babilonia nak nela vin ga' kwa'n milizuzh más rē yezh ze'.

⁹ Orze' nzhabē ganj mion, se' nzhab xa' naye:

—Cho men zuxib lo ma nile' mandad re', o lo winab che'n ma, no chi lè' xa' ziyèl, kè señ che'n ma loxchuzh xa', o ya' xa', ¹⁰ orze' dox yi' Dios kun xa' re' no dox zakzi Me xa'; gat lè't ka wè' zakzi Dios xa'; lè' Me zakzi xa' kun bël no asufr kwa'n ñol, dilant lo rè ganj no lo Mbèkxi'l che'n Dios. ¹¹ Par dubta' niro' zhen che'n bël kwa'n zakzi rè men re'; nayot xax bixa'; zhë-y'è'lè zakzi rè xa' nguzuxib lo ma nile' mandad ze' no lo winab che'n ma, mbaino rè xa' nguziyèl nkè señ che'n lè ma loxchuzh xa' mbaino ya' xa'. ¹² Kuze' naki'n xek rè xa' nak men che'n Dios no nile' bixa' rè kwa'n nzhakla Me, mbaino se'gaka ñila bixa' widi'zh che'n Jesukrist.

¹³ Orze' mbina dizde lo yibè', nguro' tu widi'zh kwa'n ne lon:

—Bizobni' kure': "Dizde nal par dilant, wen nzha rè xa' nzhat por nak bixa' men che'n Jesukrist."

Orze' nzhab Sprit che'n Dios:

—Sa' gake, par xax bixa' lo rè kwa'n nded bixa', porke lè' Dios nane ka xmod miban bixa'.

Yalgo'n che'n yizhyuo

¹⁴ Orze' unen tu xkao bèo laka, no lo xkao ze' nzob tu Me nilu' nela Xga'n Dios, Me nak ska tu men yizhyuo; yek Me nzob tu koron gor no nzen Me tu ganch kwa'n nzho lo, ¹⁵ orze' nguro' tu ganj le'n yado' che'n Dios kwa'n nzob lo yibè', naye nguruzhiè ganj re' lo Me nzob lo xkao ze':

—Gulo ganch che'nal yizhyuo nes bikan yalgo'n, porke lè'i une la.

¹⁶ Orze', Me nzob lo xkao ze', mite'd Me ganch che'n Me lo yizhyuo, no mikan Me yalgo'n che'n yizhyuo, ¹⁷ no nguro' xtu ganj le'n yado' che'n Dios Me nzob lo yibè', no nu xa' nzen tu ganch kwa'n nzho lo, ¹⁸ mbaino plo nzob biko' che'n Dios, nguro' xtu ganj xa' nile' mandad lo bël che'n biko', naye midi'zh ganj re' lo ganj mirop xa' nu ska kinu tu ganch kwa'n nzho lo, se' nzhab ganj:

—Gulo ganch che'nal no bicho' rè rrocim gub kwa'n nzho yizhyuo, porke ngol la or ro'ge, lè'i une la.

¹⁹ Orze' mite'd ganj rop ze' ganch che'n xa' lo yizhyuo, micho' xa' rè gub ze', no ngulo xa' le'n tu kwa'ro, par mizi'y; kure' nak nela tu señ lè' Dios niyi'xian kun rè men yizhyuo. ²⁰ Orze' mizi' rè gub ze' al ro' yezh Jerusalén, no nguro' ren le'n plo mizi'y ze', nkiya ren nela nzè'b ya ro' tu kabai ga', mbaino al naka'n mizhine, pas nela chon gayo' kilómetro.

15

Rè ganj che'n Dios xa' nzadnu za gazh yalzi kwa'n lult

¹ Orze' unen xtu señ ro lo yibè' kwa'n mile' mia'n xe da tuli; unen nzo gazh ganj che'n

Dios kun za gazh yalzi kwa'n lult; rè kure' lult rè xian che'n Dios kun rè men yizhyuo, xa' gat nzhont ro' Dios. ² No nu unen tu kwa'n nela nitsdo', bidr ga' ñani, noche kun bël, no rè xa' nanet ngazuxib lo ma nile' mandad ze', ni lo winab che'n ma, mbaino ni nangaziyèl bixa' ngakè numr che'n lè ma ta' bixa'; rè men re' nzo ro' nitsdo', kad bixa' kinu tu harp kwa'n miza' Dios nka' bixa'. ³ Kikè' bixa' kant che'n Muisés, xa' mile' rè kwa'n nzhab Dios, no kant che'n Mbèkxi'l che'n Dios; se' nzhab kant: Dox nazhon mbaino dox kwa'ro rè zhi'n nile' Go,

o Señor Dios, Me nile' mandad lo rè lo men. Dox nali rè kwa'n nile' Go,

no wali ka rè kwa'n nidi'zh Go,

Go nak rey lo rè men yizhyuo.

⁴ ¿Cho gat nizhebt lo Go, o Señor?

No, ¿cho gat nidi'zh, tugaka Go nazhon?

Rè men yizhyuo zubi lo Go par zuxib bixa' lo Go,

porke rè men une la,

or nigobe' Go kwent che'n men,

nali laka nile' Go.

⁵ Dispwés di kure', unen mixa'l yado' dox nazhon che'n Dios kwa'n nzob lo yibè', plo kinu Dios ke tab plo nzobni' rè widi'zh che'n ley. ⁶ No le'n yado' ze', nguro' gazh ganj che'n Dios, xa' kinu gazh yalzi par yizhyuo. Nak bixa' lar lino nambe no ñazbèle, mbaino laz kad bixa' nazi' tu sinch gor. ⁷ Di lo dap ma naban ze', tu ma miza' tu ga' kop or, ka' za gazh ganj, kop kwa'n zhè di yalgustis che'n Dios Me kinu yalnaban par dubta'. ⁸ No le'n yado' ngwazhè di zhen kwa'n nzè plo dox nayi' nizini yalnazhon ro che'n Dios, no yent cho gak yo le'n yado' ze', haxta lox za, za gazh yalzi kwa'n kinu rè ganj ze'.

16

Za gazh kop kwa'n zhè di yalgustis che'n Dios

¹ Orze' dizde le'n yado', mbina tu widi'zh naye nzhab lo za gazh ganj xa' nzhin ze':

—Wa go, waxo go za gazh kop kwa'n nzho yalgustis che'n Dios lo yizhyuo.

² No ngwaxo ganj galo kop che'n lo yizhyuo, mbaino lè' rè xa' nkè señ che'n ma nile' mandad ze', no rè xa' nizuxib lo winab che'n ma ze', dub bixa' nguluxo'b tu ben ye'zh dox nakap no dox nei.

³ Orze' ngwaxo ganj mirop kop che'n le'n nitsdo', no ngok nitsdo' ren, nela ren che'n tu men ngut ga', no ngut rè ma kwa'n nzho le'n nitsdo'.

⁴ Orze' ngwaxo ganj mion kop che'n le'n rè you' mbaino rè plo nilen nits, no rèi ngok ren. ⁵ Orze' mbina se' midi'zh ganj xa' nile' mandad rè nits:

—Dox nali kwa'n nile'l, por sa' nile'l yalgustis, O Señor; Me nzho nal, Me nzho dizde galo laka, mbaino Me yo par dubta, tugaka Me nazhon, ⁶ porke rē men re' nak rē xa' mixo ren che'n rē men che'n Go, rē xa' mid'i'zh por Go; kuze', miza' Go ren ngu' bixa' por ñal bixa'i.

⁷ Orze' mbina, xtu xa' se' mid'i'zh dizde lo biko':

—Walikai, O Señor Dios, Me nile' mandad rē kwa'n nzho; dox nali nile' Go rē yalgustis che'n Go, mbaino dox ñale.

⁸ Orze' ngwaxo ganj dap kop che'n lo ngubizh, no mila' Dios zē'ke rē men kun bēl. ⁹ No rē men yizhyuo, nazhe'b miēk bixa', no ter sa' nguzak bixa', per nangala't bixa' rē kwa'n nak bixa' lo Dios, no ni nangadi'zh bixa' nazhon Dios, lē'la más nayi' mid'i'zh bixa' lo Dios, Me nile' mandad lo rē yalzi re'.

¹⁰ Orze' ngwaxo ganj gai', kop che'n plo nizob ma nile' mandad ze', orze' dub plo nile' ma mandad mikao, no rē men maska nita'o' bixa' luzh bixa' por dox yalne kine bixa'. ¹¹ Ni por yalne kwa'n kizak bixa' mbaino ni por rē ye'zh kwa'n nzhi'b bixa', maxa bixa' ngala' rē kwa'n gat lē' nak bixa', lē'la más nayi' mid'i'zh bixa' lo Dios Me nzho lo yibē'.

¹² Orze' ngwaxo ganj xo'p kop che'n ro' you' ro kwa'n lē Eufates, no mibizh nits you' ze' par mixa'l tu nez plo ded rē rey xa' nzē plo nilen ngubizh, ¹³ orze' unen, nguro' chon mbi mal; tube ro' ma lē dragón ze', xtube ro' ma nile' mandad ze', no xtube ro' men xa' chigab walika nidi'zh por Dios; nela mbēezh ga' nak rē mbi mal ze'. ¹⁴ Rē mbi mal re' nak rē kwa'n nile' rē señ ro kwa'n chigab walika nazhon, no kwa'n nile', nigan rē rey yizhyuo, par tutsa kwin rē men yizhyuo, no dil bixa' kun Dios, zhē nazhe'b kwa'n le' Dios yalgustis kun lē' bixa', Dios Me nile' mandad lo rē kwa'n nzho. ¹⁵ “iBikina go go!, porke na yal nela tu wa'n ga'. Wen nzha xa' nazent mika'l, kimbēz la xa' or yala, mbaino nak xa' xab xa' par natula xa', kizē xa' kache' xa' lo rē men.” ¹⁶ Orze' plo lē Armagedón, kun widi'zh hebreo, ze' mikan rē mbi mal ze', rē rey yizhyuo.

¹⁷ Orze' ngwaxo ganj gazh kop che'n lo mbi, no dizde le'n yado' plo nzob Me nile' mandad, nguro' tu widi'zh naye, nzhab:

—iLē'i milox la!

¹⁸ Orze' ngoch ngu'zi, no nzha' do' zi', no naye nibezh kwa'n, no nazhe'b tu xo miwin yizhyuo, tu kwa'n lalta' nagat win dizde nguzublo nzhin men yizhyuo. ¹⁹ No chon lē' ngok yezh ro ze', no nu mibil rē yezh kwa'n nzho yizhyuo, orze' mitsila Dios yezh ro kwa'n lē Babilonia, dox mizakzi Dios rē men yezh ze' par milo'x Dios ngulo' Dios xian kun rē men ze'. ²⁰ Lē' xo mile' mitlo

rē yuo kwa'n nzhin sao' nitsdo', no rē yi' kwa'n nzob lo yizhyuo, ²¹ no dox nazhe'b ngula rē yiu ke lo yibē'; pas naga'i cho' kil kade. Mbaino ngobe yek men, orze' más nayi' mid'i'zh bixa' lo Dios por rē yiu ke nazhe'b ze', por dox kwa'n mile'i kun rē men yizhyuo.

17

Yalgustis kwa'n le' Dios kun tu una' le'n kai (kwa' gal) no kun ma naxne

¹ Tu rē gazh ganj, rē xa' kinu kop ze', nguzubi lon mbaino ne xa':

—Dē' par lun lol, yalzi kwa'n zak una' le'n kai (kwa' gal) re', xa' dox nzho'b xti'zh, no nzob xa' lo nayax nits. ² Rē rey yizhyuo, por una' re', mile' bixa' kwa'n nayi' lo Dios, no más rē men yizhyuo minu bixa' por kwa'n mike'd una' bixa'.

³ Orze' mbi'y ganj da le'n yuo bizh, ze' milu' Sprit che'n Dios lon tu una' nzob tich tu ma ro naxne, no ngoz ta' ma di rē widi'zh dox nayi' par Dios; kinu ma gazh yek ma, mbaino chi' xkach ma. ⁴ Lē' una' re' nak tu lar chop kulor: morad no naxne; no nabe una' kun or; kun rē ke chul, no kun perla kwa'n dox tsak; mbaino nzen una' tu kop or kwa'n zhē di vin; vin re' nak tu señ che'n rē kwa'n dox nikap laxto' Dios, mbaino che'n rē kwa'n nakap nile' una' kun rē men yizhyuo. ⁵ No loxchuzh una' nzobni' tu widi'zh naga'ch kwa'n yent cho nane, se' nzhab widi'zh ze': “Yezh Babilonia kwa'n nzho'b xti'zh nak xna' rē una' le'n kai (kwa' gal), no xna' rē kwa'n nile' rē men yizhyuo, kwa'n nikap laxto' Dios nine Me.” ⁶ No unen kiyo una' tu kwa'n nak nela vin ga', milizuzhe una'; kwa'n kiyo una' re' nak ren che'n rē men che'n Dios, xa' ngut por nak bixa' men che'n Jesukrist; mbaino por mid'i'zh bixa' widi'zh che'n Jesukrist. Or unen kure', xe mia'n da tuli, ⁷ orze', ne ganj ze' lon:

—¿Chon xe mia'nal? Na gani lol xmod nak kwent che'n una' ba', no che'n ma ro kwa'n kinu gazh yek ba', mbaino chi' xkach ma kwa'n nzob una' ba'. ⁸ Ma ro kwa'n unel ba', nak tu ma kwa'n nguio dizde nzhalā. Yentra' ma nal re', per lē' ma ro', ro' zo che'n gabil antis di yitlo ma par dubta'. No rē xa' nzho lo yizhyuo, xa' gat nzobni't lē lo Yech che'n Dios plo nzobni' lē rē xa' ban par dubta' kun Dios, Yech kwa'n ngokxao' or naga yo yizhyuo; lē' bixa' ya'n xe tuli or ne bixa' ma nzho dizde nzhalā; yentra' ma nal re' per lē' ma ruxo'b xtu wēlt. ⁹ Widi'zh re' nak par rē men nzhak: Dub gazh yek ma ze', nak gazh yi' kwa'n nzob una' lo, ¹⁰ no gazh rey: Gai' bixa' nded la, xtu xa' kile' mandad nal, no xtu xa' stubi nagat yi'd, per or yi'd xa', che'ptsa gak xa' rey. ¹¹ Orze'

lê' ma nazhe'b kwa'ro ze' kwa'n nzho dizde nzhalá, per nal yentra' ma, no ma re' nak rey xon; nu ma nzho xid za gazh rey ze', per dispwes, dubta' yitlo ma. ¹² No za chi' kach kwa'n unel ze', nak chi' rey xa' laore le' mandad, per che'ptsa le' bixa' mandad tutsa kun ma nazhe'b kwa'ro ze'. ¹³ Tutsa xigab le' za chi' rey ze', no zo bixa' ma xu' nazhe'b ze' par tugaka ma le' mandad. ¹⁴ No lê' bixa' dil kun Mbëkxi'l' che'n Dios, per lê' Mbëkxi'l' le' gan lo bixa', porke tugaka Mbëkxi'l' re' nile' mandad lo rê xa' tsak, mbaino lo rê rey xa' nzho yizhyuo; no rê xa' nzhakë tich Mbëkxi'l' nak rê xa' ngurezh Dios, mbaino rê xa' ngule Dios, no xa' nzhon ro' Dios

¹⁵ No nu ne ganj lon:

—Lo rê nits plo unel, nzob una' le'n kai (kwa' gal), nak rê lo yezh, no rê lo ben men, mbaino rê lo lazh men, no rê lo men nidi'zh rê lo di'zhzê. ¹⁶ No za chi' kach no ma xu' nazhe'b kwa'n unel ze', lê' bixa' yi' ne una' le'n kai (kwa' gal) ze', no la' nzê'b bixa' una' kache' una'; gao bixa' bê'l che'n una', orze' ko bixa' una' le'n bêl, ¹⁷ porke Dios ka mila' nguio xigab ze' yek bixa', par zo ma nazhe'b kwa'ro ze', le' ma mandad, haxta lox gak rê widi'zh kwa'n mila' Dios di'zh. ¹⁸ Una' kwa'n unel ba', nak yezh kwa'n dox nzho'b xti'zh, nile' mandad lo rê rey xa' nzho yizhyuo.

18

Dios lo'x yezh kwa'n dox nakbe' kwa'n lê Babilonia

¹ Or milox unen una' nzob tich ma ro naxne ze', unen xtu ganj ngula dizde lo yibê', haxta dub yizhyuo ngwani por biani che'n ganj re', no dox nile' ganj re' mandad.

² Naye nguruzhië ganj re', nzhab ganj; jMilox la yezh ro Babilonia, lê'i milox la!

Mizhin ngoke lizh rê lo mbi kwa'n nile' gat nambet men.

Mbaino lizh rê lo mbi mal;

no le'ne, dox miar yo che'n rê lo miyin gat nambet,

no che'n rê lo miyin kwa'n nayi' gao men.

³ Minu rê men xa' nzê kwansa plo, por mitse'd bixa' kwa'n nak una' re', mbaino por kwa'n mike'd una' re' rê men, rê rey ngwachibyek lo kwa'n gat lê', no rê xa' nile' xbi'.

Ngok rrik bixa' por nguzi' una' le'n kai (kwa' gal) re' rê kwa'n ngokla una', par mile' una' dike kwa'n ngokla kwerp che'n una'.

⁴ Orze' mbina xtu widi'zh kwa'n nzê lo yibê': Guro' go yezh ba', rê go xa' nak men da, par nazê'bxki go por rê kwa'n nak rê xa' nzho ba', no par nagal go, rê yalzi nazhe'b kwa'n zak bixa'.

⁵ Rê kwa'n gat lê' kile' bixa' dox nzhayare,

nila' zhine haxta lo yibê',

kuze', naya'lt laxto' Dios rê kwa'n nak bixa'.
⁶ Bile' go kun lê' una' nela xmod mile' una' kun rê men che'n Dios.

Bile' go haxta chop wêlt kix una' rê kwa'n gat lê' mile' una'.

Biza' go kwa'n go una', chop tant más nayi' lo kwa'n miza' una', go xtu men.

⁷ Nela xmod mile' una' le'n kai (kwa' gal) ba' haxta plo ngokla kwerp che'n xa', mile' xa' kwa'n yizhyuo re'.

Se'ska bizakzi go xa' haxta plo nagakra'i.

No por mis lê' xa', midi'zh dox tsak xa', no mizi xa' marian.

Mile' xa' xigab, le'n laxto' xa':

“Na, nzo'b nela tu rey ga', nayot gak da tu una' ngut xmiyi', mbaino nayot zakzi da.”

⁸ Kuze', tutsa ngubizh zhin rê yalzi lo una': zhin yalgut,

no yalnawin,

mbaino yalnila'n.

No haxta lo ki lo'x Dios una',

porke tugaka Dios nazhon,

Dios Me kobe' (wi') xmod gak kun lê' una'.

⁹ No rê rey yizhyuo mia'n bixa' gat lê' lo Dios por una' re', lê' bixa' go'n, mbaino win laxto' bixa' or ne bixa', zhen kwa'n zê'k Dios una'. ¹⁰ Zit ya'n nzo bixa' por zhe'b, por yalne kwa'n kine una', orze' naye gab bixa': jTatu nalats kizakal!, lu nak yezh ro Babilonia,

yezh kwa'n más tsak;

porke nayan laka, jdi!, mizhin yalzi lol.

¹¹ No rê xa' nile' xbi' yizhyuo re', lê' bixa' go'n, mbaino win laxto' bixa' por lê'i, porke yentra' plo to bixa': ¹² kwa'n or, kwa'n plat, kun rê ke dox chul, kun rê perla, no rê lar kwa'n lê lino fino, no kun rê lar sed, no rê kwa'n kulor morad naxne, no nu rê ya nix nixla, kun rê kwa'n nzhaxao' kun marfil, mbaino rê yi'b kwa'n brons, kun más rê yi'b, no kun mármol; ¹³ no nu kanel kun más rê lo kwa'n nile' nix nidao' kwa'n nzhao men; no ya'l mbaino mirra, no kun más rê nits nax kwa'n nix nixla; no kun vin, kun aseit, no harin wen kun triu; no nu rê ma kwa'n nzhuwe' kwa'n, kun rê mbëkxi'l' no rê kabai kun dub karret ma; no nu haxta rê men mido nela tu ma ga'. ¹⁴ Orze' gab rê men lo yezh re':

jNayotra' gupal rê xlê kwa'n dox ño laxto'l, rê kwa'n nix nzhao'wal, haxta micha'l.

Mbaino rê kwa'n kinul, maska ña'zbel;

no ni nayora' gapple xtu wêlt!

¹⁵ No rê xa' mito rê kure', por yezh re' ngok rrik bixa'; per haxta zit ya'n nzo bixa' di zhe'b por yalzi kwa'n zak yezh re', no por lê'i go'n bixa' di yalnawin, ¹⁶ orze' se' gab bixa':

¡Ay, ay; dox nalats kizak yezh ro ba'!
 Lê'i nak nela tu una' nabe ga',
 xa' nak lar tsak dox, lar lino kulor morad
 naxne,
 mbaino dub xa' naya' or no kun rê ke dox
 tsak,
 mbaino kun rê perla.

¹⁷ ¡Mbaino tu rratsa milox rê yalrrik kwa'n
 kinu una'!

Rê xa' nile' mandad rê bark, kun rê xa' nitsê'
 bark, no más rê xa' nikê zhi'n le'n nitsdo',
 mbaino kun rê xa' nzho le'n bark; haxta zit
 ya'n nzo bixa'; ¹⁸ or ne bixa' zhen kwa'n
 zobyol yezh ze', orze' se' kuzhiê bixa', gab
 bixa': "Yentra' cho xtu yezh ñët nela kure'."

¹⁹ No chob bixa' yuo yek bixa', no go'n bixa'
 por yalnawin, no se' kuzhiê bixa':
 ¡Ay, ay! ¡Dox nalats mia'n yezh ro ba',
 porke por yezh ro ba', ngok rrik rê xa' kinu
 bark le'n nitsdo',

mbaino, ¡tu rratsa miloxe!

²⁰ Per yibê', bizak laxto' go por kwa'n
 nguzak yezh ba';

no rê go xa' nzho lo yibê', bizak laxto' go.

No nu rê go xa' nak men che'n Dios,

no rê go xa' nak apost che'n Dios,
 mbaino rê go xa' midizh por Dios galo laka,
 porke yalgustis kwa'n mile' Dios yezh ba';
 por go mile' Diose, por mile'i nguzakzi go.

²¹ Orze' tu ganj xa' más nile' mandad,
 ngulits tu ke kwa'n nak nela tu ke ro kwa'n
 nikê men zhi'n par ño triu, no ngulubi ganje
 le'n nitsdo'.

Mbaino nzhab ganj:

Sa' yubil, yezh ro Babilonia par al yêt,
 mbaino nayotra' ne menal.

²² No le'n rê kai che'nal, Babilonia,

nayotra' gon men go'l harp,
 o kê' men kant,

o kwe'zh men bizhi, o trompet.

Nayotra' xa' nzhak nikê waneî cho zhi'n,

no ni nayora' men gon rruid le'n rê kai
 che'nal kwa'n nikê men zhi'n lol kun
 ke ro par ño triu.

²³ No nayotra' ne men ni xtu ki lol,

mbaino ni nayora' gon men, chi xa' nzhak
 jwandang che'n, kun una' xa' gak tsa'
 xa',

porke rê men che'nal xa' mile' xbi' lol,
 ngok rê xa' más tsak dub lo yizhyuo.

No kun yalbruj che'nal, mikidel rê men,
 xa' nzê kwantsa rê lazh men,

²⁴ porke le'n rê kai che'nal, michizhêl di ren
 che'n rê xa' midizh por Dios,

no ren che'n más rê xa' nak men che'n Dios,
 no haxta ren che'n más rê men yizhyuo xa'
 mile' men ngut.

19

¹ Or milox midizh ganj re' rê kure', mbina
 dizde lo yibê', kidizh tu béd men, nzhab
 bixa':

¡Bidi'zh go tugaka Dios nazhon!

No nab tsa Dios nak Me niza' yalnaban
 kwa'n nayot lox ka' men,
 mbaino lo nab tsa Dios ñal zuxib men.

No nab tsa Me nile' mandad lo rê kwa'n
 nzho,

² porke nab tsa Dios nile' kwa'n lê'ska lê' no
 kwa'n ñal,

or nigobe' Me xmod gak kun kad men,

porke nalse, lê' Me ngulube' la xmod gak
 kun una' le'n kai (kwa' gal) ba',

una' kwa'n mile' minu rê men yizhyuo por
 mitse'd una' bixa' kwa'n nak una'.

Nal mile' Dios, ndix una' rê ren che'n rê men
 che'n Dios, kwa'n mixo una'.

³ Orze' xtu wêlt, midizh rê xa' ze':

¡Bidi'zh go tugaka Dios nazhon!

porke par dubta', ñatso zhen kwa'n ñol una'
 ba'.

⁴ Orze', za gal bitap rê xa' nak zhi'n lo Dios,
 kudap rê ma ze', nguzuxib bixa' lo Dios plo
 nzob Me, nile' Me mandad, no nzhab bixa':
 ¡Sa' gake! ¡Bidi'zh go tugaka Dios nazhon!

⁵ Orze' dizde plo nzob Dios, nile' Me man-
 dad, mbina tu widizh kwa'n nzhab:

¡Bidi'zh go nab tsa Dios che'n be nazhon;

rê go xa' nak zhi'n nazhon che'n Dios,

no rê go xa' nzhon ro' Dios,

dizde rê xa' natsakt, haxta rê xa' tsak!

Jwandang che'n Mbêkxi'l che'n Dios

⁶ No mbina tu rruid, nela or kidizh nayax
 dox men, o nela or nzhas tu you' ga', o nela
 or nini' tu nguzi' ga'; se' mbina nzhab rê
 rruid ze':

¡Bidi'zh go, tugaka Dios nazhon!

porke lê'gaka Dios che'n be, Me nile' mandad
 lo rê kwa'n nzho,

nal, lê' Me kile' la mandad.

⁷ ¡Nal, zak laxto' be, haxta plo nagakra'i,

mbaino dizh be nab tsa Dios nazhon!

porke ngol la zhê gak jwandang che'n Me lê'
 Mbêkxi'l che'n Dios.

Lê' Una' nzo xti'zh kun lê' Me, kimbêz la.

⁸ No nguziyêl Dios,

gak Una' nzo xti'zh ze', lar kwa'n lê lino fino,
 kwa'n nambe, mbaino ña'zbel.

Lar re' nak rê kwa'n ngokla Dios, mile' rê
 men che'n Dios.

⁹ Orze' ne ganj lon:

—Se' bizobni': "Wen nzha rê xa' ngurezh
 Dios, par yatao lo jwandang che'n Mbêkxi'l
 che'n Dios."

No ne ganj:

—Kure' nak kwa'n ne Dios, lê'i walika.

¹⁰ Orze' nguzuxiba lo ganj re' par dizha
 nazhon xa', per tuli ne xa' lon:

—¡Nale'tal sa'!, porke na nak nela lu ka;
 tu xa' nile' mandad che'n Dios, nela más
 rê wechal, xa' nidizh widizh che'n Jesús lo
 men. Nabtsa lo Dios guzuxib; porke rê men

xa' nidi'zh widi'zh che'n Jesukrist lo men, rë xa' re' walika nidi'zh por Dios.

Me nzob tich kabai naguzh

¹¹ Orze' unen, mixa'l lo yibë', no ngxurox'o'b tu kabai naguzh, mbaino Me nzob tich ma lë: "Me nile' lë'ska lë' rë kwa'n nzhakla Dios", porke nigobe' Me kwent che'n men nela xmod ñalkai, mbaino lë'tsa lë' kwa'n nile' Me or nidil Me kun rë xa' niyi' nine Dios. ¹² No zalo Me nilu' nela bël ga', nayax koron nzob yek Me, no loxchuzh Me nzobni' lë Me kwa'n nab tsa lë' Me nane, ¹³ no nak Me tu lar naya' ren, no lë Me: "Widi'zh che'n Dios." ¹⁴ No tich Me nzhakë rë sondad yibë', xa' nak lar lino bëo laka no nambai, no pura kabai naguzh nzob bixa'. ¹⁵ Mbaino, Me lë Widi'zh che'n Dios, ro' Me niro' tu spad kwa'n dox nzho lo rop lad; kun lë'i, cho' Me kwantsa rë lazh men; mbaino bar yi'b kwa'n nzen Me, le' Me yalgustis kun rë xa' nayi'lazh lo Dios, par ta'ch Me yek rë men nela or nida'ch rë gub par nizi'y no nzhake vin, por tanta niyi' Dios por rë kwa'n nile' bixa', Dios Me nile' mandad lo rë kwa'n nzho. ¹⁶ Mbaino widi'zh re' nzobni' lo xab Me no ta' kor Me: "Me nile' mandad lo rë rey mbaino lo rë xa' tsak."

¹⁷ No nu unen tu ganj xa' nzo lo ngubizh, no naye nzhab ganj re' lo rë miyin kwa'n ñapep lo yibë':

—Dë' go par guzhin go re', nes gao xche' go haxta plo ne go, kwa'n kinu Dios par go; ¹⁸ rë bë'l che'n rë rey, no bë'l che'n rë xa' más nile' mandad, mbaino bë'l che'n rë men dox naye, no rë che'n kabai kun rë che'n rë xa' nzob tich ma, mbaino che'n más rë men, ter rë xa' yent cho nile' mandad lo o che'n rë xa' mido nela tu ma ga', mbaino che'n rë men tsak no che'n rë men natsakt.

¹⁹ Orze' unen, lë' ma nile' mandad ze', kun rë rey yizhyuo, no rë sondad che'n bixa'; tutsa nzhin bixa' par dil bixa' kun Me nzob tich kabai naguzh re', no kun rë sondad che'n Me. ²⁰ Per ngwaga' ma nile' mandad ze' tutsa kun ma nidi'zh por lë' ma, ma nile' nayax señ kwa'n chigab nazhon, par nikide ma rë men nkë señ che'n ma ta', no rë xa' nguzuxib lo winab che'n ma. Ma mile' mandad re' kun ma nidi'zh por lë' ma, dub naban bima ña bima le'n bël kwa'n ñol kun asufr. ²¹ No más rë men yizhyuo xa' mia'n, ngut kun spad kwa'n niro' ro' Me nzob tich kabai naguzh ze', no rë ma kwa'n nipep lo yibë', ndao bë'l che'n rë xa' re', haxta plo une bima.

20

Tu mil li'n

¹ No nu unen, tu ganj ngula lo yibë', no kinu xa' liab kwa'n nixa'l ro' gabil, no nazhe'b tu kaden nzen ganj, ² orze' nguzen

ganj re' ma lë dragón ze', ma lë ska mbë'l tiemp ze', ma nak yub Mizhab no Satanás; mbaino milibdo' ganj re' Mizhab kun kaden tu mil li'n, ³ no ngulubi ganj ma nazhe'b kwa'ro re' ro' zo che'n gabil, par miao'yo' Mizhab, mbaino mitsao' ganj re' ro' pwert gabil, par nakide ra' Mizhab rë men yizhyuo, haxta za tu mil li'n. Orze', lë' Mizhab rutin al tich che'ptsas.

⁴ Orze' unen plo nizob rë xa' tsak, xa' nile' mandad par kobe' bixa' (wi' bixa') kwent che'n rë men, no unen rë alm che'n rë xa' miro'g yek, por ñila bixa' widi'zh che'n Jesukrist, no nu por milu' bixa' widi'zh che'n Dios. Nangazuxibt rë men re' lo ma kwa'n mile' mandad ze', no ni lo winab che'n ma, mbaino ni nagaziyël bixa', ngakë señ che'n ma loxchuzh bixa' o ya' bixa'. Unen, nguruban bixa', no tutsa mile' bixa' mandad kun Jesukrist, dub tu mil li'n. ⁵ Per más rë men yizhyuo, xa' ngut, nangarubant bixa' or mile' Dios nguruban rë men re'; haxta ded tu mil li'n, lë' bixa' ruban. ⁶ Wen nzha rë men xa' ruban galo laka no namba laxto' bixa', porke yent kwan gak le' kun lë' bixa' kwa'n nile' nzhat men xtu wëlt, per lë' bixa' gak ngulë'i' che'n Dios no ngulë'i' che'n Jesukrist, no tutsa le' bixa' mandad kun Jesukrist, dub tu mil li'n.

⁷ No or ded tu mil li'n ze', lë' Dios ko' Mizhab al tich, ⁸ no lë' Mizhab kide ra' rë men xa' nzë rë plo lo yizhyuo; rë men re' nak nela xmod ngok Gog xa' nzë lazh men kwa'n lë Magog, rë xa' ngok xa' ndil Dios kun lë', kan Mizhab rë men re' par gak sondad che'n xa' lo yër. Yent cho gak lab bixa', nayax bixa' nela rë yux kwa'n nzhin ro' nitsdo' ga'. ⁹ No mire'ch bixa' dub lazh men Israel, no mile' bixa' kurral plo nzhin rë men che'n Dios, yezh kwa'n nazhi' Dios. Orze' mila Dios bël lo yibë' par milo'xe rë men re'. ¹⁰ No lë' Mizhab xa' mikide rë men re', yubi le'n bël kwa'n ñol no noch kun asufr, plo nguiubi la ma kwa'n mile' mandad ze' kun ma midi'zh por lë' ma; no zhëy-yë'l zakzi bixa' ze' par dubta'.

Lo yaxil ro kwa'n maska ñaz bël, ze' kobe' Me (wi' Me) lë Mbëkxi'l che'n Dios

¹¹ Orze' unen tu yaxil ro kwa'n maska ña'z bël, no nzob tu Me loi; dox nazhon nilu' Me haxta mitlo yizhyuo no yibë' lo Me, tuli miloxe. ¹² No lo Me re' unen, nzhin rë xa' nguruban xa' ngut nzhalá, rë xa' tsak no rë xa' natsakt. Orze' mixa'l lo rë libr no nu lo xtu libr plo nzobni' lë rë xa' kinu yalnaban par dubta'. Orze' Me nzob lo yaxil ro ze' ngulube' Me, xmod gak por kwa'n mile' kad bixa', nela xmod nzobni' ka lo rë libr ze'. ¹³ Rë plo lo yizhyuo nguro' men ngut: miza' nitsdo' rë men ngut le'ne, se'ska mile' xa' lë La Mwert no gabil, miza' bixa' rë men

ngut kinu bixa', orze' por kwa'n mile' tuga' rē xa' ngut re', ngulube' Me nzob lo yaxil ze'. ¹⁴ Orze' lē' gabil kun xa' lē' La Mwert, nu bixa' nguiubi le'n bēl; kure' nak gat men wēlt rop. ¹⁵ No le'n bēl ze' ña rē xa' gat nzobni' lē' lo libr plo nzobni' lē' rē men kinu yalnaban par dubta'.

21

Yibē' kub no yizhyuo kub

¹ Orze' unen tu yibē' kub no tu yizhyuo kub, porke yibē' galo no yizhyuo galo, lē'i milox, no ni nitsdo' yentra'. ² Na Juan, unen yezh nazhon Jerusalén kwa'n kub, ngulaliy dizde lo yibē' plo nzho Dios; nabei nela tu una' nzo xti'zh ga' par yo jwandang che'n kun miyi' xa' gak tsa' xa'. ³ Orze' mbina nguro' tu widi'zh dizde lo yibē', plo nzob Me nile' mandad, se' ne widi'zh ze' lon:

—Re' nak plo nzho Dios kun rē men; tutsa nzho Dios kun lē' bixa', mbaino nak bixa' men che'n Dios, no Yub Dios nzo kun lē' bixa', par gak Me Dios che'n bixa'. ⁴ Lē' Dios le', nago'ntra' bixa', no ni nayora' gat bixa'; mbaino ni nawin ra' laxto' bixa', no ni nane ra' bixa' yalne, porke rē kwa'n nguio galo, lē'i milox la.

⁵ Orze' ne Me nzob lo yaxil ro, Me nile' mandad ze':

—Lē' Da le kub rē kwa'n nzho.

No nu ne Me:

—Bizobni' rē widi'zh re' lo yech, porke lē'i walika, no dox ñal yayila mene.

⁶ Mbaino ne Me:

—Rē kure' mile la: Na nak nela letr A no letr Z; nela tu kwa'n galo laka, mbaino tu kwa'n lult. No rē xa' nizei' laxto', Na za nits naban go xa', no ka zane go bixa'. ⁷ No rē xa' se'gaka yila Da dub nizak bixa' tu kwa'n, rē men re' zan rē kure' gal; no Na gak Dios che'n bixa', no lē' bixa' gak men da. ⁸ Per rē xa' nanet yila Da por nizheb xa' zakzi xa' por Da, o xa' mila' gat ñilatra' xa' Da, o xa' nile' kwa'n nikap laxto' Dios, o xa' nzhut men, o xa' niban kun cho la men, o xa' nzhak yalbruj, o xa' nizuxib lo rē winab, mbaino rē xa' nikide men; rē xa' nak se' bi le'n bēl kwa'n noch kun asufr; kure' nak gat men wēlt rop.

Yezh Jerusalén nazhon kwa'n kub

⁹ Orze' mbi'd tu ganj lon, xa' nzho xid za gazh ganj xa' kinu za gazh kop kwa'n zhē di za gazh yalzi che'n Dios kwa'n lult, se' ne ganj re' lon:

—Dē' re', par lun lol una' nzo xti'zh xa' gak tsa' Mbēkxi'l che'n Dios.

¹⁰ Orze' mbi'y ganj re' da tu yi' ro, no unen por Sprit che'n Dios, yezh nazhon Jerusalén kwa'n kub, ngulaliy dizde lo yibē' plo nzho Dios. ¹¹ No ña'zbēle kun biani che'n Dios, nela ña'zbēl tu ke kwa'n dox chul ga', nela

ke kwa'n lē jaspe, kwa'n ñiani nela bidr. ¹² Naka'n ro' yezh ze' nzho tu mur pura ke, mbaino yai, no kinui tu dusen pwert; kad ro' pwert nzo tu ganj, no nzobni' lē' dub tu dusen ben men Israel. ¹³ Chon ro' pwert ze' nana al nez plo nilen ngubizh, xchone nana al nez al ya', no zixchone nana al nez al yēt, mbaino zixchone nana al nez plo ña'z ngubizh. ¹⁴ No xan rē mur ze' nzho tu dusen ke kwa'n nzene; ta' tuga' rē ke ze' nzobni' lē, za tu dusen apost che'n Mbēkxi'l che'n Dios.

¹⁵ Lē' ganj xa' kidi'zhnun, nzen xa' tu bar or, par che'x xa' dub yezh, no rē mur ro kwa'n nzho naka'n ta'l, mbaino rē pwert che'ne. ¹⁶ Tap ta' yezh re', mbaino lal ta' nzhoi. Miche'x ganj yezh kun bar kwa'n nzen xa': nzhoi chop mil nzho chop gayo' kilómetro di no'le, di naxene, mbaino di yai; tutsa nzhoi. ¹⁷ Orze' miche'x ganj mur kwa'n nzho naka'n ro' yezh ze', nzhoi, chon gal nzho tap metr; nela xmod niche'x rē men yizhyuo, se'ska miche'x ganje. ¹⁸ Rē mur ze' nakxaa' kun ke kwa'n lē jaspe, mbaino dub yezh ze' nakxaa' kun viv or, no ñaniy nela bidr ga'. ¹⁹ No rē ke kwa'n nzen rē mur kwa'n nzho yezh re', nakxaa'we kun rē lo ke tsak; rrin ke galo laka nak ke jaspe, rrin mirop nakxaa' kun ke kwa'n lē zafiro, kwa'n mion nakxaa' kun ke kwa'n lē ágata, kwa'n midap nakxaa' kun ke kwa'n lē esmeralda; ²⁰ rrin gai' nakxaa' kun ke kwa'n lē ónice, no kwa'n xo'p nakxaa' kun ke kwa'n lē cornalina, kwa'n gazh nakxaa' kun ke kwa'n lē crisólito, no kwa'n xon nakxaa' kun ke kwa'n lē berilio, kwa'n yē' nakxaa' kun ke kwa'n lē topacio, kwa'n chi' nakxaa' kun ke kwa'n lē crisoprasa, kwa'n chi' bitub nakxaa' kun ke kwa'n lē jacinto, mbaino rrin tu dusen nakxaa' kun ke kwa'n lē amatista. ²¹ No za tu dusen pwert, tugai nakxaa' kun tu perla; no mer nez ro che'n yezh re' nakxaa' kun viv or, ñiani nela bidr ga'. ²² Nanganeta ni tu yado' yezh re', porke lē' Señor Dios, Me tugaka nile' mandad, yub Me nak yado' che'n yezh re', no kun Me lē Mbēkxi'l che'n Dios. ²³ Gat naki'ntra' yezh re' ngubizh ni mbēo', porke yub yalnazon che'n Dios nile' ñaniy; no Me lē Mbēkxi'l che'n Dios nak biani che'ne. ²⁴ No lo biani che'n yezh re', zē rē men yizhyuo; mbaino rē rey wei' rē kwa'n tsak che'n bixa' yezh re'. ²⁵ No naxa'l ro' rē pwert che'n yezh re' dub zhē, porke ze' nayotra' yē'l. ²⁶ No yezh re', wei' rē men yizhyuo, rē kwa'n tsak che'n bixa'. ²⁷ Mbaino ze' nayot ni tu kwa'n gat nambet par lo Dios, ni nayo men xa' nile' kwa'n nikap laxto' Dios, mbaino ni rē xa' nikide men nayot ze'; nab tsa rē xa' yo ze', rē xa' nzobni' lē lo libr che'n Mbēkxi'l che'n Dios, libr plo nzobni' cho kinu yalnaban par dubta'.

22

¹ Orze' milu' ganj lon tu you' plo nzho viv nits nzhol laka nela bidr ga', kwa'n niza' yalnaban par dubta' ka' men; no nzê nits ze' dizde plo nzob Dios kun Me lè Mbèkxi'l che'n Dios, par nile' bi Me mandad. ² Nided you' garol sao' nez ro che'n yezh re', mbaino tuga' lad ro' you' nzhi'b rë ya kwa'n niza' xlë kwa'n niza' yalnaban par dubta' ka' men; tu dusen wëlt niza'i tu li'n, no rë la che'n nizu', niliyak rë men nzhakne, xa' nzho rë plo lo yizhyuo. ³ No yezh re', nayot ni tu kwa'n no ni tu men nzhi'bde lo Dios, porke re' nak plo nzob Dios par nile' Me mandad tutsa kun Me lè Mbèkxi'l che'n Dios; no nab tsa rë xa' nile' kwa'n nzhakla Dios yo re', par zuxib bixa' lo Dios. ⁴ No lè' bixa' ne lo Dios, mbaino loxchuzh bixa' kè lè Dios. ⁵ No nayotra' yè'l ze', no gat naki'ntra' rë xa' nzho ze', ki o ngubizh par zini lo bixa', porke yub Señor Dios zini lo bixa', no tutsa le' rë bixa' mandad kun Dios par dubta'.

Nzhazhin gax la, yè'd Jesukrist

⁶ No nu ne ganj lon:

—Walika rë widi'zh re', mbaino ñal ka yila mene. Lè' yub Señor Dios, Me nile', nidi'zh men por lè' Me; yub Dios re' mixè'l ganj che'n Me par lu' lo rë men che'n, rë kwa'n nzhazhin la gak.

⁷ Se' midi'zh Jesukrist lo rë men che'n Me:

—¡Walika, lè' Da mer la yal! Wen nzha rë xa' nile' kwa'n nzhazh widi'zh che'n Dios kwa'n nzobni' lo yech re', rë kwa'n nzhazhin la gak.

⁸ Na Juan, unen no mbina rë kure', no or milox unen rë kure', no mbine, orze' nguzuxiba lo ganj xa' milu' rë kure' lon, par ngadizha nazhon xa', ⁹ per ne ganj lon:

—¡Nale'tal kuba'!, porke nu ka da nak tu mos che'n Dios nela lu ga', mbaino nela más rë wechal xa' nidi'zh por Dios, no nela más rë xa' nile' rë widi'zh kwa'n nzobni' lo yech re'. Nabtsa lo Dios guzuxib, no bidi'zh nazhon Me.

¹⁰ No nu ne ganj:

—Nakuka'chtal ni tu rë widi'zh che'n Dios kwa'n nzobni' lo yech re', porke nzhazhin

gaxla gak rë kure' ¹¹ Bila' cho xa' kile' kwa'n gat lè', le'ra' xa'i; no bila' cho ninu lo kwa'n gat lè', bila' nu bixa'; per xa' kile' kwa'n nzhakla Dios, ñal zilita' le' xa'i; no xa' naban nambe lo Dios, ñal mbe xa' zilita' lo Dios.

¹² No nu, se' ne Jesukrist lon:

—¡Walika, lè' Da mer la yal!, no yi'dnun kwa'n ki'za ka' kad men, dike kwa'n mile' tuga' xa'. ¹³ Na nak nela letr A no letr Z, kwa'n galo no kwa'n lult.

¹⁴ Wen nzha rë xa' mizèt xab, par gak yo bixa' ro' pwert che'n yezh kub Jerusalén, no par gak gao bixa' xlë che'n ya kwa'n niza' yalnaban ka' men par dubta'. ¹⁵ Per al tich yezh ya'n rë xa' minu la lo Dios nela rë mbék ga', no rë xa' nzhak yalbruj, kun rë xa' niban kun cho la men, no kun rë xa' nzhut men, no rë xa' nizuxib lo rë winab, mbaino rë xa' ño laxto', nikide men.

¹⁶ Mbaino ne Me lon:

—Na Jesús, mixèla ganj da par di'zh xa' rë widi'zh re' lo go, rë go xa' nak men da; Na nak xga'n rey Dabi, nu nak da nela mbël lo yibè', kwa'n nizini nayi' or garzi'l.

¹⁷ Sprit che'n Dios, kun una' nzo xti'zh kun Mbèkxi'l che'n Dios, nzhazh bixa':

—Dè' re'.

No se'ga' gab xa' gon kure':

—Dè' re'.

No xa' nizei' laxto', yi'd xa', kun rë xa' nzhaklai, par ka go bixa' nits kwa'n niza' yalnaban par dubta' re'.

¹⁸ Par rë xa' nzhon widi'zh che'n Dios kwa'n nikè lo yech re', lè' xa' wane; chi lè' xa' tsiyar tu rë kwa'n nikè la lo kure', orze' lè' Dios zakzi xa' re' kun rë yalzi kwa'n nikè lo yech re'. ¹⁹ No wanei cho kubchi tu rë kwa'n nzho xid rë kwa'n nzobni' lo yech re', orze' Dios kubchi lo xa', nayot gao xa' xlë che'n ya kwa'n nile' niban men par dubta', mbaino kubchi Dios kwa'n gal xa' yo xa' yezh nazhon, mbaino más rë kwa'n nazhon nize't yech re'.

²⁰ Se' ne Me kidi'zh rë kure':

—Walikai, mer la yala.

Sa' gake, jdè' Señor Jesús!

²¹ Lè' Señor Jesukrist che'n be gaknu rë go por wen Me. Sa' gake.